


Chyoiyúng  
chyumlaiká:  
dangshikaq asik; Zaiwa



New Testament in Zaiwa

## **Chyoiyúng chyumlaiká: dangshikaq asik; Zaiwa New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
23f9fc55-a8a4-59ef-9513-707ec336b0ee

## Contents

Mahte . . . . .	1
Markuq . . . . .	58
Lukaq . . . . .	94
Yohan . . . . .	155
Lagyo . . . . .	201
Romaq . . . . .	257
1 Korinhtuq . . . . .	283
2 Korinhtuq . . . . .	308
Galatiq . . . . .	324
Ehpesu . . . . .	333
Hpilipi . . . . .	342
Kolose . . . . .	348
1 Htesaloni . . . . .	354
2 Htesaloni . . . . .	360
1 Timohti . . . . .	363
2 Timohti . . . . .	370
Tituq . . . . .	375
Hpilemon . . . . .	378
Hebre . . . . .	380
Yakuq . . . . .	399
1 Petruq . . . . .	406
2 Petruq . . . . .	413
1 Yohan . . . . .	418
2 Yohan . . . . .	425
3 Yohan . . . . .	426
Yude . . . . .	427
Shing-rán . . . . .	429

## MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô*  
*Luk 3:23-38*

<sup>1</sup> Abraham é awut ashín, Dawiq é yhangzo yhangshu,\* Yesuq Hkrisduq é byùxik labaù gi, a-ô mâ é eq rajung za nghut lhê.

<sup>2</sup> Abraham gi, Isak lé hkû;  
Isak gi, Yakup lé hkû;  
Yakup gi, Yudaq eq yhanggu yhangmâng pé lé hku é nghut lhê;

<sup>3</sup> Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;  
Hesrun gi, Ram lé hkû;

<sup>4</sup> Ram gi, Aminada lé hkû;  
Aminada gi, Nashon lé hkû;  
Nashon gi, Salamun lé hkû;

<sup>5</sup> Salamun gi, Buaq lé hkû;  
Buaq é yhângnu gi, Rahap nghut ri.

Buaq gi, Obet lé hkû;  
Obet é yhângnu gi, Ruhtaq nghut ri.

Obet gi, Yese lé hkû;  
<sup>6</sup> Yese gi, Hkohlâm Dawiq lé hkû;  
Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

<sup>7</sup> Sholumon gi, Rehoboam lé hkû;  
Rehoboam gi, Abiyaq lé hkû;  
Abiyaq gi, Asa lé hkû;

<sup>8</sup> Asa gi, Yehoshaphat lé hkû;  
Yehoshaphat gi, Yoram lé hkû;  
Yoram gi, Uzi-aq lé hkû;

<sup>9</sup> Uzi-aq gi, Yohtam lé hkû;  
Yohtam gi, Ahaza lé hkû;  
Ahaza gi, Hezekiaq lé hkû;

<sup>10</sup> Hezekiaq gi, Manase lé hkû;  
Manase gi, Amon lé hkû;  
Amon gi, Yosiaq lé hkû;

<sup>11</sup> Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

<sup>12</sup> Babelon má shúm dut huí é htâng má,  
Yehkoniaq gi, Shalahtila lé hkû;  
Shalahtila gi, Zerubabelaq lé hkû;

<sup>13</sup> Zerubabelaq gi, Abiut lé hkû;  
Abiut gi, Eliakim lé hkû;

Eliakim gi, Azor lé hkû;  
<sup>14</sup> Azor gi, Zaduk lé hkû;

Zaduk gi, Ahkim lé hkû;  
Ahkim gi, Eliut lé hkû;

<sup>15</sup> Eliut gi, Eliaza lé hkû;  
Eliaza gi, Mahtan lé hkû;  
Mahtan gi, Yakup lé hkû;

<sup>16</sup> Yakup gi, Mariq é yhanglâng Yosep lé hku é nghut ri;  
Mariq gi, Hkrisduq gâ é Yesuq lé hku é sù nghut ri.

<sup>17</sup> Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô*  
*Luk 2:1-7*

<sup>18</sup> Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri.

<sup>19</sup> Yhâng é yhumsîng hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám râ dê ri.

<sup>20</sup> Nghut kôlhang, yhang haú su myit nyi é hkûn, yhupmoq má, haú Yhumsîng é maumang lagyo gi, yhang lé, lé htoq shit luí, "Dawiq é yhangzo yhangshu Yosep é, haú nâng

\* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê. † **1:17** Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

é yhumsing myhí Mariq lé hâng yù râ hkyô lé, hkâ-myit chiq; haî mù gà le, yhang wun tô é zoshâng gùng gi, Chyoiyúng Woi-nyí dông lo é nghut lhê.

<sup>21</sup> Yhang gi, yuqzo rayuq hkû râ nghut luî, nâng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gà le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taî ri.

<sup>22</sup> Shí hkyô banshoq gi, Garai Gasâng eq, haú myiqhtoi dông taî é dang lé lhoq dik é nghut ri.

<sup>23</sup> Myiqhtoi dang haú gi, "Haú zomyi gyíng gi, zogûng dut luî, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê."\* gà ri. Hau é lichyúm gi, "Garai Gasang gi, nga-nhúng eq rahá nghut nyi lhê." gà é nghut lhê.

<sup>24</sup> Yosep gi, yhup bûn lo é hkûn, haú Yhumsing é maumang lagyo taî é eq rajung za, Mariq lé, yhangmyi dông yhûm má shuî yù bê nghut ri.

<sup>25</sup> Nghut kôlhâng, yhang gi, yuqzo haú hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byî ri.

## 2

### *Buihtoq Hkyam Mâ É Hpaqchyî Bò Bang*

<sup>1</sup> Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyî bò bang gi, Yerusalem wà mó má jé lé kômù,

<sup>2</sup> "Haú hku lé lô bê Yudaq byu pé é Hkohkâm gi, hkâmá nghut lhê lhú? Yhâng é kyî lé, buihtoq hkyam má ngamoq myàng luî, Yhang lé noq râ matú jé lé é nghut lhê." ga luî, myî akô nghut ri.

<sup>3</sup> Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mâ é lhunghâng bang le, myit myô bum akô nghut ri.

<sup>4</sup> Haú mù luî, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haú Hkrisduq hkâmá hku lé lô râ nghut é hkyô lé myî ri.

<sup>5</sup> Haú hkûn, yhangmoq gi, "Yuda mau Betlehem wà má nghut lhê. Hkâsu mù gà le, shí hkyô eq séng luî, haú myiqhtoi kê tô é má,

<sup>6</sup> "Yudaq mau mâ é Betlehem wà é, nâng gi, Yudaq mau mâ é wà pé má, je tiq sù a nghut; hkâsu mù gà le, ngá é Israelaq byu pé lé upzúng râ Zau gi, nâng chyáng mai htoq lô râ nghut lhê."\*

ga bo tô ri." ga tû taî akô.

<sup>7</sup> Hau htâng, Herut gi, haú hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri.

<sup>8</sup> Haú mù, yhang gi, "Nungmoq, zoshâng haú lé rago é ho wú keq. Ngò le, Yhang lé é wó noq râ matú, Yhang lé nungmoq é myâng eq yhang, ngo lé lo shit kyo keq." ga taî luî, haú bang lé Betlehem wà shut nhang kat bê nghut ri.

<sup>9</sup> Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtoq hkyam má yhangmoq myang é kyî gi, haú zonú nyi é ahtoq ang ang má ló nô é jé shoq, yhangmoq é hí má e ló byî ri.

<sup>10</sup> Yhangmoq gi, kyî haú lé myàng jáng, gyai yhang gabú bum akô nghut ri.

<sup>11</sup> Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htug luî, haú zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura\* pé lé yù mù, Yhang lé chyunghuq byî akô nghut ri.

<sup>12</sup> Yhangmoq gi, Herut chyáng a dum taú lô râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taú lô bekô nghut ri.

\* 1:23 Esai 7:14    ✧ 2:6 Mihka 5:2    \* 2:11 Mura gi, chi wó kut jung xû nghut lhê.

*Egutuq Ming Shut H pang E É Hkyô*

<sup>13</sup> Yhangmoq ló byuq é htâng má, haû Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haû zoshâng eq yhângnu lé, Egutuq ming shut shuí hpang ê aq. Ngò, nang lé dum ji yu é ahkyíng jé shoq, haú má nyi nyi keq. Haí mù gà le, Herut gi, zoshâng haú lé sat râ matú, ho nyi bê nghut ri." ga taí ri.

<sup>14</sup> Haû mù, yhang gi, toq luí, myín lé yhang, zôshang me lé shuí chùng mù, Egutuq ming shut e ló bê nghut ri.

<sup>15</sup> Yhangmoq gi, Herut shi é jé shoq, haú má nyi nyi akô. Haû gi, "Ngá zo lé, ngò, Egutuq ming mai wut htoq yû bê nghut lhê."\* ga, haû Yhumsing eq myiqhtoi dông taí é dang lé lhoq dik é ru nghut lhê.

<sup>16</sup> Herut gi, yhang lé, hpaqchyí bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri.

<sup>17</sup> Haû gi, "Ramaq gà é jowò má, yón kuq é eq ngau garû é htê lé wó gyô ri; Rahkelaq gi, yhang zô pé a nyi byuq lo kô é yanmai, ngau nyi é eq nhik a wó tít dut ri."\*

ga luí,

<sup>18</sup> myiqhtoi Yereamiaq dông taí tô é dang lé lhoq dik é nghut ri.

*Nazaret Wà Má Dum Taû Lo É Hkyô*

<sup>19</sup> Herut shi byuq é htâng, Egutuq ming má, haû Yhumsing é maumang lagyo gi, Yosep chyáng yhupmoq dông lé htoq shit mù,

<sup>20</sup> "Toq aq, haû zôshang me lé shuí chùng mù, Israelaq ming má taû ló aq; hkâsu mù gà le, haû zoshâng lé sat naû bang shi byuq bekô nghut ri." ga taí ri.

<sup>21</sup> Haû mù, Yosep gi, zôshang me lé shuí chùng mù, Israelaq ming shut taû ló bê nghut ri.

<sup>22</sup> Nghut kôhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byi é huí é eq rajung za, yhang gi, Galile mau shut e ló mù,

<sup>23</sup> Nazaret gà é wà má ló nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luí, haû myiqhtoi pé dông taí tô é dang lé lhoq dik é nghut ri.

**3***Wui-myhup Sará Yohan Shui Hen É Hkyô*

*Mrk 1:1-8; Luk 3:1-18; Yhn 1:19-28*

<sup>1</sup> Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi,

<sup>2</sup> "Myit lhîng keq; hkâsu mù gà le, mauhkûng mingdán gi, chyâng lò bê\* nghut ri." gà ri.

<sup>3</sup> Haú yuq gi, "Haú yoso má, byù rayuq garû taí é htê gi,

'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gà ri."\*

ga myiqhtoi Esai-aq taí tô é sù yuq nghut ri.

<sup>4</sup> Yohan gi, gola-uq shomaú eq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri.

<sup>5</sup> Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglháng mâ é bang gi, yhâng chyáng htoq e bum akô.

<sup>6</sup> Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri.

\* 2:15 Hos 11:1 \* 2:17 Yer 31:15 \* 3:2 Mauhkûng mingdán gi, chyâng lò bê gà é lichyúm gi, Garai up râ ahkyíng chyâng lò bê gà é nghut lhê. \* 3:3 Esai 40:3

<sup>7</sup> Nghut kôlhang, yhang gi, yhang wui-myhup hkám byî é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taî é gi, "Duq htân lhangmui amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taî pûn é l hú?"

<sup>8</sup> Myit lhîng hkyô eq gingdán é ashi pé zui keq.

<sup>9</sup> 'Ngamoq gi, Abraham é yhangzo yhangshû pé nghut lhê.' nghû luî, yhumsing é i-myit unghkaû má hkâlum to kó. Hkâsu mù gâ le, ngò, nungmoq lé taî kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

<sup>10</sup> Ahkuî l háng, Garai Gasang gi, Yhâng é wazung lé haû sîkgâm wang pé má tô to bê nghut ri; haû mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê.

<sup>11</sup> Ngò gi, nungmoq myit lhîng kó sháng gaq nghû, wui èq za wui-myhup hkám byî lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luî, ngò gi, Yhâng é hkyî-tsung chûng byi râ l háng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê.

<sup>12</sup> Yhang gi, loq má byò chung to mù, guq chyarâng mâ é guq bùm lé hik sân pyám luî, já é guq cham lé gi, guqchyí má tsîng kat to mù, guqsôm lé kúm gi, hkâ-nhám le shi byuq a sê é myî èq nyhê hkyô pyám râ nghut lhê." gâ ri.

*Yesuq, Wui-myhup Hkâm Yu É Hkyô*

*Mrk 1:9-11; Luk 3:21-22*

<sup>13</sup> Haû hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri.

<sup>14</sup> Nghut kôlhang, Yohan gi, "Ngò sheq Náng chyáng wui-myhup hkâm

yù râ sù ru nghut lhê nhîng! Nàng sheq ngá chyáng lé lo lhê l hú?" ga luî, lhóm taî hkûm ri.

<sup>15</sup> Haû hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkám byi laq." ga tû taî ri. Haû mù, Yohan le, gyo byi bê nghut ri.

<sup>16</sup> Yesuq gi, wui-myhup hkâm yù eq yhang, wui mai htoq lo ri. Haû hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri.

<sup>17</sup> Haû hkûn, "Shí yuq gi, Ngò chyit-dap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

## 4

*Yesuq, Gúnglaú Huí É Hkyô*

*Mrk 1:12-13; Luk 4:1-13*

<sup>1</sup> Hau htâng má, Chyoiyúng Woi-nyí gi, Yesuq lé, nat Tsadán èq gungláu é hui nhâng râ matú, yoso shut shuî é ri.

<sup>2</sup> Yesuq gi, zoshuq gám é myi xê nyí myi xê myìn jé jáng, zòmut hui bê nghut ri.

<sup>3</sup> Haû hkûn, gungláu sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taî ri.

<sup>4</sup> Haû jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mung-dang hkangmó èq sheq asak duì râ nghut lhê."\* ga luî, Chyúmdang má kâ tô ri." ga yhang lé tû taî ri.

<sup>5</sup> Haû hkûn, nat Tsadán gi, Yesuq lé, chyoiyúng myuq\* má shuî é mù, noqkuq yhum je myhang é shûhtâng htoq má yap nhang to luî,

<sup>6</sup> "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taî to râ nghut mù,

\* 4:4 Tarâ Pun 8:3 \* 4:5 chyoiyúng myuq gi, Yerusalem lé gâ lhê.

luqgok má Náng é hkyî a ló htung shoq,  
 yhangmoq é loq eq Nang lé lhom bún  
 yû kó râ nghut lhê.\*  
 ga luî, Chyúmdang má kê tô ri." ga taî ri.

7 Nghut kôlhang, Yesuq gi, "Haû Yhumsîng, nungmoq é Garai Gasang lé, wó chyam wú râ a nghut.\* ga luî le, Chyúmdang má kê tô ri." ga, yhang lé tû taî ri.

8 Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haû pé é hkikhkâm hkyô lé tûn shit ri.

9 Hau htâng, yhang gi, "Nàng hkyih-put htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taî ri.

10 Haû hkûn, Yesuq gi, "Tsadán nàng, ló byuq aq! Hkâsu mù gâ le, 'Haû Yhumsîng nàng é Garai Gasang lé za, nàng noqkuq dojaú ra râ nghut lhê.\* ga luî, Chyúmdang má kê tô ri." ga, yhang lé taî ri.

11 Haû mù, nat Tsadán gi, ló byuq bê nghut luî, maumang lagyô pé gi, Yesuq lé, lé dojaú nyi akô nghut ri.

*Yesuq Mungdang Hko Hi Lô É Hkyô  
 Mrk 1:14-15; Luk 4:14-15*

12 Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taû ló bê nghut ri.

13 Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri.

14 Haû gi, myiqhtoi Esai-aq laiká má,

15 "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau é,

16 mauchut hkaû má nyi nyi é bang, maubó mó lé myàng bê nghut ri;

shí wup hkaû má nyi to bâng é matú, maubó lô bê nghut ri.\*

ga kê tô é dang lé lhoq dik râ matú nghut ri.

17 Haû hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

*Yesuq É Chángzo Hí Dut Bang*

18 Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luî, nhông má gùn dú nyi akô nghut ri.

19 Haû mù, Yhang gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga taî ri.

20 Haû hkûn, yhangnhik gi, radá dâm, gùn pé lé tô pyâm to luî, Yhang htâng cháng bekô nghut ri.

21 Yesuq gi, jowò haû mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaî hkaû má gùn hpo nyi akô. Yhangnhik lé, Yesuq wut kat jáng,

22 yhangnhik gi, radá dâm, yhangnhik é yhângwa eq lhaî haû lé, tô pyâm to kôluî Yesuq htâng cháng bekô nghut ri.

*Nò Bang Lé, Yesuq Lhoq Gê Byî É Hkyô*

*Luk 6:17-19*

23 Yesuq gi, Galile mau ramau gón má htoq é mù, tarajong pé má, mhoqshit luî, mauhkûng mingdán eq sêng é gabú danglù lé, hko kyo uchyang, byu pé chyáng mâ é nòhpyo ajung jung hui bang eq nolì nojàng amyú myú dap bang lé, lhoq gê byî wún ri.

24 Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huî é bang, hkê-nhô jamjaú nyi é bang, nat gang wang júng é bang, mhúngtuq tuq é bang, gùngjum shi é

\* 4:6 Hkya-on 91:11-12 \* 4:7 Tarâ Pun 6:16  
 Dekapoli gâ é gi, Grik đông myuq raxê lé gâ lhê.

\* 4:10 Tarâ Pun 6:13

\* 4:16 Esai 9:1-2

† 4:25



bang lé, shuí lé lô kôluí, Yhang gi, haú bang lé lhoq gê byí ri.

<sup>25</sup> Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

## 5

### *Hkungsô Wó É Tarâ*

*Luk 6:20-23*

<sup>1</sup> Yesuq gi, byù moq mó lé myàng jáng, bùm má doq ló luí, ló zung tó ri. Haú hkûn, Yhâng é chángzô pé gi, Yhâng chyáng lé lô kôjáng,

<sup>2</sup> Yhang nhut hkum hpóng luí, yhangmoq lé mhoqshit é gi:

<sup>3</sup> "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

<sup>4</sup> Myit iyon huí é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó rá nghut lhê.

<sup>5</sup> I-myt nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó rá nghut lhê.

<sup>6</sup> Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó rá nghut lhê.

<sup>7</sup> Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyîn yu é hui kó rá nghut lhê.

<sup>8</sup> Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó rá nghut lhê.

<sup>9</sup> Nguingón hkyô sô xoq byí é bang gi, hkungsô wó nyi ri; hkâsu mù gâ le, yhangmoq gi, Garai Gasang é yhangzô pé gâ é hui kó rá nghut lhê.

<sup>10</sup> Dingmán hkyo é yanmai zing-ri huí é bang gi, hkungsô wó nyi ri; hkâsu mù gâ le, mauhkûng

mingdán gi, yhangmoq é nghut nyi ri.

<sup>11</sup> Ngá é yanmai, byu pé èq, nungmoq lé rhoi é, zing-rí é, a teng a mán é đông agè ashop é dang amyû myû tá tso kô é hkûn, nungmoq hkungsô wó nyi ri.

<sup>12</sup> Nguingón gabú nyí keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rí laí lo wú bekô nghut ri.

### *Xo Eq Maubó*

*Mrk 9:50; Luk 14:34-35*

<sup>13</sup> Nungmoq gi, myidàm htoq mâ é xo nghut nyi lhê. Nghut kôhang, xo gi, màn kân byuq jáng, haú lé hai èq dum wó lhoq ngam yù rá lúh? Shinggan shut dú pyám mù, byu pé èq nâng pyeq pyâm é mai lai luí, hai akyû le bò rá a nghut lo.

<sup>14</sup> Nungmoq gi, mingkân é maubó nghut akô; bùm htoq mâ é myuq lé gi, wó nghop to rá a nghut.

<sup>15</sup> Myibung lé tap mù, mûng èq nghop tô é ó a kut wú kó; haú su kut rá malaí, yhúmkaú má lúng tô é bang yuq hkangmó myoq wó myâng rá matú, tsungjang má kúm tsung to rá nghut lhê.

<sup>16</sup> Haú eq rajung za, byu pé gi, nungmoq é ge é muzó pé lé byu-myàng luí, mauhkûng htoq má é nungmoq é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

### *Tarâ Lhoq Dik É Hkyô*

<sup>17</sup> Ngò gi, myiqhtoí pé é dang eq jep é tarâ lé lhoq hpyoq pyám rá matú, jé lé é nghut nhô hkâ-ngâm kó; haú pé lé lhoq dik rá matú sheq jé lé é ru nghut lhê.

<sup>18</sup> Ngò, nungmoq lé teng za tá kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhú lhang byuq byuq rá a nghut.

19 Jep é tarâ shí pé mâ é tiq dik é dang rahkun lé lu lai luí, góbang lé le, haú su kut râ matú mhoq byî é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é hui râ nghut lhê.

20 Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

### *Byù Hkâsat*

21 'Byù hkâsat, ☆ sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê.

22 Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'\* ga taí é sù gi, Yudaq byin tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

23 Haú mù, hkungga gyap má, náng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng,

24 náng é hkungga lé, haú hkungga gyap hí má tô pyâm to mù, náng é gumang hpó haú yuq eq hí nguingón hkyô ló yù luí sheq, hkungga lé nhông byi aq.

25 Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haú a nghut jáng, haú yuq gi, nang lé, tarâ agyi chyáng ê ap pyâm mù, haú tarâ agyi gi, nang lé htóng hkyô pyâm râ matú, htóng suwún hpô é loq má ap pyâm râ nghut lhê.

26 Ngò, nang lé teng za taí lé, yuichyîn haú a ban xap xap gi, htóng haú mai nàng wó htoq ló râ a nghut.

### *Su-myi Sulàng Lú É Hkyô Eq Séng Luí Mhoqshit É Dang*

27 'Su-myi sulàng hkâlú' ☆ gâ é dang lé, nungmoq wó gyo wú bê nghut lhê.

28 Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaú má, myiwe haú yuq eq su-myi sulàng lú hkyô kut é sù nghut bê.

29 Haú mù, náng é loqyo myoq èq, nang lé mara kut shut nhang é nghut le gi, haú lé lap choq yù mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

30 Haú eq rajung za, náng é loqyo loq èq, nang lé mara kut shut nhang é nghut le gi, haú lé hpyit yù mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

### *Myi Làng Gâng É Hkyô Eq Séng Luí Mhoqshit É Hkyô*

*Mht 19:9; Mrk 10:11-12; Luk 16:18*

31 'Yhumsing é yhangmyi lé kâng é sù gi, lhoq kang laiká byi râ dut lhê.' ☆ gâ é dang joq lhê.

32 Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

### *Danggidiq*

33 Hau htoq agó, 'Danggidiq a zùng hkâmû; Yhumsing lé byi tô é dang-gidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê.

☆ 5:21 Htoq Ló 20:13

\* 5:22 *Byù gang* gâ é lé, Grik dông "Raka" gâ lhê. ☆ 5:27 Htoq Ló 20:14

☆ 5:31 Tarâ Pun 24:1

<sup>34</sup> Nghut kôlhang, Ngò, nungmoq lé taí kôlé, hai èq le hkâdakâm kó; mauhkông lé lang luí le, hkâdakâm kó; hkâsu mù gà le, haû gi, Garai Gasâng é zùng tanghkuq nghut lhê;

<sup>35</sup> myigùng lé lang luí le, hkâdakâm kó; hkâsu mù gà le, haû gi, Garaí é hkyî nang jang nghut lhê; Yerusalem lé lang luí le, hkâdakâm kó; hkâsu mù gà le, haû gi, Hkôhkâm mó é myuq nghut lhê.

<sup>36</sup> Hau htoq agó, yhumsing é ulhûm èq le, hkâdakâm kó; hkâsu mù gà le, xâm rahkat lé lhang hpyû shoq noq shoq, nàng wó kut é a nghut.

<sup>37</sup> Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haû mai lai é gi, haû agè ashop su chyáng mâ é nghut ri.

### *Lató Hpuq É Hkyô*

*Luk 6:29-30*

<sup>38</sup> 'Myoqjí matú myoqjí xap, zui matú zui xap' \*gâ é dang lé, nungmoq wó gyô wú bê nghut lhê.

<sup>39</sup> Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má ppuq byi sù lé, loqpaí hkyam le hkâm byi shi aq.

<sup>40</sup> Byù rayuq yuq, nang lé mara tsuq mù, náng é buzo lé yu pyám byí é nghut jáng, bumó lé le, hkyut byi shi aq.

<sup>41</sup> Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq.

<sup>42</sup> Nang lé dung sù lé, byi aq; náng chyáng mai chyi naû sù lé le, nunghtáng hkâlhik pyám.

### *Gyè Lé Chyitdap Râ É Hkyô*

*Luk 6:27-28, 32-36*

<sup>43</sup> 'Náng é chyangnâm mâ é bang lé gi, chyitdap mù, náng é gyè lé gi, a jú kut aq' \*gâ é dang lé, nungmoq wó gyô wú bê nghut lhê.

<sup>44</sup> Nghut kôlhang, Ngò, nungmoq lé taí kôlé, nungmoq gi, mauhkông htoq mâ é nungmoq é Íwâ é yhangzô pé wó

dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq;

<sup>45</sup> hkâsu mù gà le, Yhang gi, agè ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sû nghut ri.

<sup>46</sup> Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, haû su kut lhê a nghut kó lú?

<sup>47</sup> Hau htoq agó, nungmoq é gumang wui lé za shi-kyám kô le gi, nungmoq kut é muzó gi, gôbâng htoq má hai wá laklai râ lú? Tungbaù pé lhang haû su kut lhê a nghut kó lú?

<sup>48</sup> Haû mù, mauhkông htoq mâ é nungmoq é Íwa gumjup é su, nungmoq le gumjup nyi keq.

## 6

### *Alu Byí É Hkyô*

<sup>1</sup> Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haû su kut é nghut jáng, mauhkông htoq mâ é nungmoq é Íwâ chyáng mai, chyunghuq wó yû kó râ a nghut.

<sup>2</sup> Haû mù, haû gegùn labyoq kut bang gi, byu pé èq shigyaú é hui sháng gaq ga, tarajong pé hká, hkyô pé hká kut é su, náng gi, alu byí é hkûn, tut htê su hkâlhoq htoq. Ngò, nungmoq lé teng za taí kôlé, haû bang gi, yhangmoq é chyunghuq lé hkúm shoq wó yû bekô nghut lhê.

<sup>3</sup> Ra châ to bang lé nàng alu byí é hkûn, náng é loqyo loq kut é hkyô lé, loqpaí loq lé lhang hkâsé nhâng.

<sup>4</sup> Haû hkûn, nàng alu byí é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyaú râ nghut lhê.

### *Kyûdung É Hkyô*

*Luk 11:2-4*

5 Nungmoq kyûdûng le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô nghut ri.

6 Nghut kôlhang, nàng kyûdûng le, náng é gok hkaú má wang ló mù, hkum myhî pyám luí, a byu-myang é náng é Íwa chyáng dung aq. Haú jáng, ó a byu-myang é lé myàng sù, náng é Íwa gi, nang lé jeju dum tau byi râ nghut lhê.

7 Haú mù, kyûdûng le, tûngbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín luí dung jáng sheq, gyo byi nhô ngam akô nghut ri.

8 Haú bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.

9 Haú mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê, Náng é myìng gi, chyoiyúng nyí sháng gaq,

10 Náng é mingdán jé lô sháng gaq, Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

11 Ngamoq nyí wuî râ é zoshuq lé, ngamoq lé hkû-nyí byi laq.

12 Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

13 Ngamoq lé, agúng alau hkyô má a wàng nhang é za,

agè ashop jang mai hkyi yù laq ô. (Hkâsu mù gâ le, kô dik é up sîng hkyô, a-tsam eq hpungwup shîngkang gi, pyat dedu ahtum abyuq Náng chyáng ru joq nyi ri ô! Amen.)\*

ngghû dung keq.

\* 6:13 Chyúmlaika ra-am má, shí túm a bo é nghut lhê.

14 Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi râ nghut lhê.

15 Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

### Zoshuq Gám É Hkyô

16 Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhuî shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri.

17 Nungmoq kúm gi, zoshuq gám é hkûn, nungmoq zoshuq gám é hkyô lé, byu pé hí má de de a dut é za, nungmoq a byu-myang é Íwa za myàng sháng gaq, myoq chí pyám luí, u xù but keq;

18 haú jáng sheq, ó a sé loshoq kut é hkyô lé myang é Sù, nungmoq é Íwa gi, nungmoq lé chyunghuq shigyau râ nghut lhê.

### Mauhkûng Htoq Mâ É Sutzè

#### Luk 12:33-34

19 Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó.

20 Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzè hkong to keq.

21 Hkâsu mù gâ le, náng é sutzè joq jang má, náng é i-myit le jé nyí râ nghut lhê.

22 Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê.

<sup>23</sup> Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haû gi, hkâ-í yhang htû râ lhâ!

<sup>24</sup> Ó yuq nghut kôle, yhumsing í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap râ nghut lhê; haû a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

### *Hkâ-myt Chiq Kó*

*Luk 12:22-31*

<sup>25</sup> Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú?

<sup>26</sup> Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsing kat to kô é nghut le lhang, mauhkûng htoq mâ é nungmoq é Îwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lhú?

<sup>27</sup> Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lhú?

<sup>28</sup> Haû nghut le nhing, haí mù, mebû matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mú le a zui, hkying le a dui kó nghut ri.

<sup>29</sup> Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lhang, ban haû rabó lé a hkyit nghut ri.

<sup>30</sup> Lumjing myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su

kut hut é nghut le gi, nungmoq lé je riyhang hut râ a nghut kó lhú?

<sup>31</sup> Haû mù, 'Haí zo râ lhi?' 'Haí shuq râ lhi?' 'Haí wut râ lhi?' nghû hkâ-myt chiq myhing kó.

<sup>32</sup> Tungbaù pé kúm gi, haú pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haú pé lé nungmoq râ é hkyô, sé byí nyi lhê.

<sup>33</sup> Nghut kôlhang, Yhâng é mingdán eq dingmán hkyô lé hí hô keq, haû jáng, haú pé banshoq, nungmoq lé puq byi râ nghut lhê.

<sup>34</sup> Haû mù, napmá lhê é matú hkâ-myt chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

## 7

### *A Jéyang Râ Hkyô*

*Luk 6:37-38, 41-42*

<sup>1</sup> Nungmoq jéyang é a hui kó sháng gaq, ó lé le, hkâjéyang kó.

<sup>2</sup> Hkâsu mù gâ le, nungmoq jéyang é su, nungmoq le, jéyang é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

<sup>3</sup> Yhumsing myoq hkaû má lúng tô é siktúm lé lhang a myit wú é nhing, haí mù luí, nunggu nungmâng é myoqwàng lé myang lhê lhú?

<sup>4</sup> Yhumsing é myoq má siktúm lhung to luí nhing, 'Náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó taí râ lhú?

<sup>5</sup> Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

<sup>6</sup> Hkuí pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haú bang gi, zè haú pé lé nâng pyeq pyám mù, nungmoq lé dum taù ngat lò râ nghut lhê.

*Dung Keq, Hô Keq, Hkum Má Kok Keq*

*Luk 11:9-13*

<sup>7</sup> Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê.

<sup>8</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>9</sup> Nungmoq má, ó yuq wá, yhumsing yhangzo muk dúng le, luqgok byi kó râ lhú?

<sup>10</sup> Ngozo dúng le, lhangmui\* byi kó râ lhú?

<sup>11</sup> Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê!

<sup>12</sup> Haû mù, hai hkyô má nghut kôlhang, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haû mù gâ le, haû gi, jep é tarâ eq myiqhtoî pè é dang lo jup tô é nghut ri.

*Chyap É Hkúmdong Eq Lam É Hkúmdong*

*Luk 13:24*

<sup>13</sup> Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuí e é nghut mù luí, haû dông wàng bang gi, myô akô nghut ri.

<sup>14</sup> Chyap é hkúmdong eq hkyô zo kúm gi, asak hkyô shut shuí e é nghut mù luí, haû lé myang ho é bang gi, shaû akô nghut ri.

*Agàm Eq Ashi*

*Luk 6:43-45*

<sup>15</sup> Nungmoq chyáng jé lé lo é myiqhtoî pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô.

<sup>16</sup> Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai maihpáng-shi wó yu wú akô lhú?

<sup>17</sup> Ge é agàm gi, ge é ashî zui mù, a ge é agàm gi, a ge é ashî za dat zui ri.

<sup>18</sup> Ge é agàm gi, a ge é ashî a wó zui, a ge é agàm le, ge é ashî a wó zui nghut ri.

<sup>19</sup> Ge é ashî a zuî é shigâm hkanmó lé gi, htuq pyám mù, myi má dú kat pyám râ nghut lhê.

<sup>20</sup> Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

<sup>21</sup> Ngo lé, 'Yhumsîng ê, Yhumsîng ê,' ga, wut é bang yuq hkanmó gi, mauhkûng mingdán má myang wàng kó râ a nghut; haû mauhkûng htoq mâ é Ngá Wa ô nau é dông kut sù za sheq, myang wàng râ nghut lhê.

<sup>22</sup> Haû buinyi má, byù myo myo gi, 'Yhumsîng ê, Yhumsîng ê, Náng é myîng mai, ngamoq gi, myiqhtoî le htoi bê; nat gang lé hkat htoq bê; laklai kumlhá ajung jung lé, kut bê a nghut lhú?' ga luí, Ngo lé myi kó râ nghut lhê.

<sup>23</sup> Haû hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gânng ló byuq keq.' nghû, yhangmoq lé san za tû taí kat râ nghut lhê.

*Hpaqchyî Bò Sù Eq Ngok Sù*

*Luk 6:47-49*

<sup>24</sup> Haû mù, Ngá é dang shí pé lé wó gyô yù luí, châng kut é sù gi, hpaqchyî bò mù, lunghtân htoq má, yhûm saí é sù eq wuî nyi ri.

<sup>25</sup> Mau wô, wuî je, laidun lò mù, yhûm haû lé lo htung kôlhang, yhûm haû gi, a htên byoq byuq râ nghut lhê; hkâsu mù gâ le, yhûm haû gi, lunghtân htoq má tsuq tô é yanmai nghut ri.

<sup>26</sup> Nghut kôlhang, Ngá é dang lé, wó gyô yù mù, a châng sù gi, semuî-jàng má, yhûm saí é byù ngok eq wuî nyi râ nghut lhê.

\* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

27 Mau wô, wui je, laidun wò yup dut lò mù, yhùm haú lé lo htung jáng, yù whuí a mù loshoq htên byoq byuq râ nghut lhê." gâ ri.

28 Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akô;

29 hkâsu mù gâ le, Yhang gi, yhang-moq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

## 8

### *Manggâm Dap É Byù Rayuq* *Mrk 1:40-45; Luk 5:12-16*

1 Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri.

2 Haú hkûn, manggâm dap é byù rayuq gi, Yhâng é hí má, lé mù, hkyih-put htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.

3 Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri.

4 Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

### *Gyezau Hpô É Lumjîng Myit* *Luk 7:1-10; Yhn 4:43-54*

5 Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù,

6 "Yhumsîng ê, ngá é dui-nhâng zoshâng gi, gùngjum shi é htoq agó, yhùm má gyai no jamjaû leq tô ri." ga garúm lé dung ri.

7 Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

8 Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za

taí kat laq; haú hkûn, ngá é dui-nhâng zoshâng ge ló râ nghut lhê.

9 Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.

10 Yesuq gi, dang haú lé wó gyo jáng, maú byuq luí, Yhâng htâng châng bang lé, "Ngò, nungmoq lé teng za taí kôlé, Israelaq amyû má lháng, shî í lumjîng é sù lé, Ngò, rayuq lé le a myàng wú é nghut lhê.

11 Ngò, nungmoq lé taí kôlé, bui-htoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poi mó má myang zùng kó râ nghut lhê.

12 Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê." ga taí ri.

13 Hau htâng, Yesuq gi, gyezau lé, "Ló aq hkoi! Nàng lumjîng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

### *Byù Myo Myo Lé Lhoq Gê Byí É Hkyô*

#### *Mrk 1:29-34; Luk 4:38-41*

14 Yesuq gi, Petruq é yhùm má jé wang e é hkûn, Petruq é yhâng-aumó gyai yhang no leq tô é lé, ê myang ri.

15 Yesuq gi, yhâng é loq má ê záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

16 Myinhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dang eq hkat htoq pyám mù, nõhpyo huí é bang banshoq lé lhoq gê byí ri.

17 Haú gi, "Yhang gi, nga-nhông é nolì nojàng lé yu pyám byi mù, nga-nhông é

noli nojàng lé, wùn waq pyám byi bê nghut ri."☆  
ga, myiqhtoi Esai-aq taí tô é dang lhoq dik râ matú nghut ri.

*Yesuq Htâng Cháng Râ Bang*  
*Luk 9:57-62*

18 Yesuq gi, Yhâng é lhîngkhyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap é sháng gâ ri.

19 Haú hkûn, tarâ sará rayuq gi, lé lô mù, "Sará ê, ngò gi, Nàng hká e le hká cháng râ nghut lhê." ga Yhang lé lé taí ri.

20 Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u nghê jowò lháng a wó nghut ri." ga lhom taí kat ri.

21 Haú hkûn, chángzo rayuq gi, "Yhumsîng ê, ngá wa lé lô yhûm pyám râ ahkáng hí byi shilaq." ga taí kat ri.

22 Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taú taí ri.

*Laidun Lhoq Zîm É Hkyô*  
*Mrk 4:35-41; Luk 8:22-25*

23 Hau htâng, Yesuq lhaí hkaú má wàng mù, Yhâng é chángzô pé le, Yhâng htâng châng wàng bekô nghut ri.

24 Haú hkûn, nhông má byodanhtik laidun mó lò mù, wuìlhêng pé gi, lhaí má bat ùm lò bê nghut ri. Nghut kôlhang, Yesuq gi, yhup myhî tô ri.

25 Chángzô pé gi, Yhâng chyáng jé ê mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup lô nyi ri." ga taí akô.

26 Yhang gi, "Lumjîng myit shaú é bang ê! Haí mù, haú-í gyuq bum akô lhú?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.

27 Byù haú bang gi, maúhong byuq kômù, "Shí yuq gi, hkasú é byù lhà? Lai eq wuìlhêng pé lháng gi, Yhâng é dang lé gyo byi ri myhi-nhung!" ga

luí, rayuq eq rayuq myi lhûm bum akô nghut ri.

*Nat Wang Júng Su Nhik Lé, Lhoq Gê Byi É Hkyô*

*Mrk 5:1-20; Luk 8:26-39*

28 Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lháng a wám lai loshoq wuì é su nhik nghut akô.

29 Yhangnhik gi, Yesuq lé, "Garaí Yhangzo ê, Nàng, ngamoq eq haí sêng lhê lhú? Ahkyíng a jé shimá, ngamoq lé zing-ri râ matú jé lé lo é nghut lhê lhú?" ga taí garú akô.

30 Haú mai a lûm wê é jowò má, waq rajùm mó gi, myi dû but zô nyi bum akô nghut ri.

31 Nat gâng pé gi, Yesuq lé, "Nàng, ngamoq lé hkat htoq râ nghut jáng, hé waq pé chyáng wàng nhâng laq." ga dúng akô.

32 Yesuq gi, "Htoq ló keq!" ga taí kat ri. Haú mù, yhangmoq gi, htoq ló luí, waq pé chyáng wàng mù, waq haú jûm gi, gampyoq mai nhông hkaú shut din yán wang ló kôluí, wuì hkaú má myup shi byuq bekô nghut ri.

33 Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, lô taí kyo akô nghut ri.

34 Haú mù, rawa bang gi, Yesuq lé huí râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbán akô nghut ri.

## 9

*Gungjum Shî Sû Lé Lhoq Gê Byi É Hkyô*

*Mrk 2:1-12; Luk 5:17-26*

1 Yesuq gi, lhaí má wàng mù, yhum-sîng é wà shut jî dap ló bê nghut ri.

2 Byù ra-am gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjîng myit lé byu-myàng jáng, haú gùngjum

☆ 8:17 Esai 53:4



shî sù lé, "Ngá zo ê, nhik hkâ-ngê; náng é yubak mara lé hkyut pyám byi bê." ga taí ri.

<sup>3</sup> Haú hkûn, tarâ sará pé ra-am gi, yhangmoq é i-myt hkaú má, "Byù shí yuq gi, Garai Gasang lé rhoí dang taí nyi ri." ga myit nyi bum akô nghut ri.

<sup>4</sup> Yesuq gi, yhangmoq myit nyi é hkyô lé sé mù, "Nungmoq é i-myt hkaú má, haú su agè ashop é dông haí mù myit nyi akô lúhú?

<sup>5</sup> 'Náng é yubak mara lé hkyut pyám byi bê.' nghû taí rá eq 'Toq luí, hkyô so aq.' nghû taí rá má, hká hkun je taí lui lhê lúhú?

<sup>6</sup> Nghut kôlhang, haú Byu Yhangzo gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lhê." ga taí luí, haú gùngjum shî sù lé, "Toq aq, náng é taphkang yu chûng luí, yhûm taú ló aq hkoi." ga taí kat ri.

<sup>7</sup> Haú mù, haú yuq gi, toq mù, yhûm shut ló byuq bê nghut ri.

<sup>8</sup> Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

### *Mahte lé shuî yu é hkyô*

*Mrk 2:13-17; Luk 5:27-32*

<sup>9</sup> Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga taí jáng, haú yuq gi, toq luí, Yhâng htâng cháng bê nghut ri.

<sup>10</sup> Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

<sup>11</sup> Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lúhú?" ga myí akô.

<sup>12</sup> Yesuq gi, haú su ga kô é lé wó gyo jáng, "Wángzán bang gi, chí sará a ra kó; nòhpyo hui bang za sheq ru rá lhê.

<sup>13</sup> 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.'\* gâ é lichyúm lé mhoq yú keq. Hkâsu mù gâ le, Ngò gi, dingmán bang lé wut yù rá matú jé lé é a nghut, yubak dap bang lé jì yù rá matú sheq jé lé é ru nghut lhê." ga tû taí kat ri.

### *Zoshuq Gám É Eq Sêng É Hkyô*

*Mrk 2:18-22; Luk 5:33-39*

<sup>14</sup> Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lúhú?" ga luí, lé myí akô.

<sup>15</sup> Haú mù, Yesuq tû taí é gi, "Bíng pé gi, lusik eq rahá nghut nyi to ashî hkûn, hkâsu ge yón kó rá lúhú? Lusik lé, yhangmoq chyáng mai shuî yu pyâm é hkyíng jé rá nghut lhê; haú hkûn kúm gi, yhangmoq zoshuq gám kó rá nghut lhê.

<sup>16</sup> Ó yuq le, mebu xau má pán sik èq a lhaq hpò wú kó; hkâsu mù gâ le, pán sik kun byuqjáng, mebu xau le je lhoq cheq pyám rá nghut lhê.

<sup>17</sup> Tsibyiq wing asik lé le, shokuq htûng axau má ó a kat wú kó. Kat é nghut jáng, tsibyiq wing asik soq htân luí, htûng buq goq byuq mù, tsibyiq wing le yui shun byuq, htûng le htên byuq, dut rá nghut lhê. Haú mù, tsibyiq wing asik lé, shokuq htûng sik má kat jáng sheq, haú í jûng é a hten rá nghut lhê." gâ ri.

### *Shî Bê Myiwe Zo Eq No É Myiwe Myhí*

*Mrk 5:21-43; Luk 8:40-56*

<sup>18</sup> Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôlhang, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò rá nghut lhê." ga taí ri.

<sup>19</sup> Yesuq gi, toq mù, Yhâng é chángzô pé eq rahá, haú yuq htâng châng e ló akô.

\* 9:13 Hos 6:6

20 Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má é záng kat ri.

21 Myiwe myhí haú gi, yhang gûng yhang, "Ngò, Yhâng é buhtáng má é wó zángjáng gi, ge byuq râ nghut lhê." ga, wó myit é yanmai nghut ri.

22 Yesuq gi, lhing wú kat luí, yhang lé myàng jáng, "Ngá zo ê, nhik hkângê, náng é lumjíng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

23 Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, é myàng mù,

24 yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô.

25 Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq eq zuí kat jáng, myiwe zo haú gi, dum dui toq lo ri.

26 Haú hkyo é danglù gi, ramau gón yhang jam ló byuq bê nghut ri.

### *Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô*

27 Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng òn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

28 Yesuq gi, yhúmkaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsîng ê." ga tù taí akô.

29 Hau htâng, Yhang gi, haú nhik é myoqjí má é záng htung luí, "Nungnhik lumjíng é eq rajung za dut sháng gaq." ga taí ri.

30 Haú mù, yhangnhik gi, myoq wó myàng bekô nghut ri. Yesuq gi, "Shí

hkyô, ó lé le hkâsé nhâng kó." ga, yhangnhik lé htân htân sidiq byí ri.

31 Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

32 Haú nhik htoq ló nyi kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô.

33 Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

34 Nghut kôlhang, Hparishe pé kúm gi, "Nat gâng pé é zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

### *Mû Zui Byù Shaú Ri*

35 Yesuq gi, myuq pé eq wà pé ban-shoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq nolì nojàng hui bang yuq hkangmó lé, lhoq gê byí wún ri.

36 Yesuq gi, byù moq mó lé myàng jáng, wú shogyô nyi ri. Hkâsu mù gà le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri.

37 Haú mù, Yhang gi, Yhâng é chángzô pé lé, "Kyôshû yù râ myo shoq joq kôlhang, mû zui râ byù gi, shaú nyi ri.

38 Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

## 10

### *Raxe Í Yuq Lé Nhang Htoq Kat É Hkyô*

*Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17*

<sup>1</sup> Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, nolì nojàng eq

nòhpyo ajung jung lé wó lhoq gê rà ahko ahkáng yhangmoq lé byi ri.

<sup>2</sup> Haû lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan;

<sup>3</sup> Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade,

<sup>4</sup> Zelutuq\* dut é Simun eq, Yesuq lé ap pyám rà sù, Yudaq Iskarut pé nghut akô.

<sup>5</sup> Yesuq gi, haû bang raxe í yuq lé dangsâng mù, nhang htoq kat ri. Yhang sang kat é dang gi, "Tùngbaù pé chyáng le hkâ-ê kó; Samariq wà rawà má le hkâwâng kó.

<sup>6</sup> Haû byuq byuq é sau pé su nghut nyi é Israelaq byu pé chyáng sheq é keq.

<sup>7</sup> Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq.

<sup>8</sup> Nò bang lé lhoq gê byi, shí bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Láí láí wó é lé, láí láí byi keq.

<sup>9</sup> Nungmoq é hpyihit má, hîng, ngùn eq gyi pé hkâkat chùng kó;

<sup>10</sup> hkyowui é matú, etap, mebu htaí, hkyi-tsung eq dumbáng pé hkâyú chùng kó; hkâsu mù gà le, mù zui sù gi, zoshuq wó gíng lhê.

<sup>11</sup> Hká wà hká dum má jé wang ló le, haû mâ é gingdán é byù lé hô mù, haû mai htoq ló é hkûn jé shoq, haû yuq é yhûm má za nyi nyi keq.

<sup>12</sup> Haû yhûm má wang é hkûn, shichyên yù keq.

<sup>13</sup> Haû yhûm gi, gingdán é nghut jáng, nungmoq shimân byi é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq.

<sup>14</sup> Nungmoq lé a lhom hap yu é eq nungmoq é dang lé a lhom gyo byi kô é nghut jáng, haû yhûm haû wà mai

htoq ló é hkûn, nungmoq é hkyiwa má dap é hpuilhaù lé ko hkyô pyâm to keq.

<sup>15</sup> Ngò, nungmoq lé teng za taí kôlé, tarâ jéyáng é buinyi má, haû wà gi, Sodom eq Gomoraq myuq htoq má je hpuzo rà nghut lhê.

<sup>16</sup> Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haû mù, lhangmuì su hpaqchyí bò luì, hpûngkyui su nú-nhâm nyi keq.

<sup>17</sup> Byu pé lé sidiq keq; hkâsu mù gà le, yhangmoq gi, nungmoq lé, tarâ rûng pé má é ap pyám kó rà nghut é htoq agó, yhangmoq é tarajong pé má, nungmoq lé nhuq bat kó rà nghut lhê.

<sup>18</sup> Nungmoq gi, Ngá é yanmai, mauzau wui eq hkohkam pé é hí má shuì jé é hui luì, yhangmoq é hí má le, tûngbaù pé é hí má le, saksé myang hkâm kó rà nghut lhê.

<sup>19</sup> Nghut kôlhang, nungmoq lé ap pyám kô é hkûn, nungmoq hkâsu taí rà eq haí taí rà lé, hkâ-myit chiq kó. Haû hkûn taí rà dang, nungmoq wó kó rà nghut lhê.

<sup>20</sup> Hkâsu mù gà le, haû gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí rà ru nghut lhê.

<sup>21</sup> Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó rà nghut lhê; zo wuì gi, mó wuì lé gumlau toq mù, sat pyâm nhâng kó rà nghut lhê.

<sup>22</sup> Byù lhunglhang bang gi, Ngá é yanmai, nungmoq lé a nguì kut kó rà nghut lhê; nghut kôlhang, jihtûm jé shoq wó hkam jân nyi é sù gi, hkyi yu é hui rà nghut lhê.

<sup>23</sup> Rawò má zing-ri é hui jáng, rawò shut hpanq ê keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haû Byu Yhangzo jé rà nghut lhê.

\* **10:4** Zelutuq gà é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haû u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gà lhê.

24 Jongzo gi, sará htoq, dui-nhâng zoshâng gi, yhumsing htoq, gyaú râ a nghut.

25 Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lháng Bezebulaq† ga kô le gi, Yhâng é yhumbyù wuì lé gi, je riyhang nghú kó râ a nghut lú?\*

26 Haù mù, yhangmoq lé hkâgyuq kó. A byông htoq loshoq wó zaú nghop tô é haì le a joq râ nghut lhê; a sé loshoq wó haq tô é le, haì a joq râ nghut lhê.

27 Ngò, nungmoq lé mauchut hkaù má taì é hkyô lé, myoq myàng maubó má taì kyo keq; Ngò, nungmoq lé dangsoq soq kyo é hkyô lé, yhumhkûng htoq maì taì pyô keq.

28 Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraì ming má wó lhoq htên é Sù lé sheq, gyuq nyì keq.

29 Johkyáng í du lé, gyi htingchap rachap èq wó ùng pyâm lhê a nghut kó lú? Nghut kôlhang, haù radu lháng, nungmoq é Íwâ é myit èq a nghut jáng, myigùng má wó byit gyó râ a nghut.

30 Nungmoq é ulhum mâ é xâm banshoq lé lháng, nghap to gù nghut lhê.

31 Haù mù, hkâgyuq kó; nungmoq gi, haù johkyáng myo myô htoq má lháng gù je bo é bang nghut lhê.

32 Byu pé hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yù râ nghut lhê.

33 Byu pé é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám râ nghut lhê.

34 Ngo lé, haù myidàm htoq má simsaq hkyô byi râ matú lé lo é sù su hkângâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê.‡

35 Hkâsu mù gâ le, Yuqzo gi, yhângwa eq, byizo gi, yhângnu eq, dumó gi, yhângmhoì eq, byoq lhum kó râ nghut lhê.

36 Yhumsing é yhumbyù wuì gi, yhumsing é gyè taù dut râ nghut lhê.†\*

gâ tô é matú sheq, Ngò jé lé é ru nghut lhê.

37 Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wuì lé je chyt é sù ó yuq nghut kôle, Ngá é chángzo kut râ gingdán sù a nghut;

38 Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut.

39 Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

40 Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê.

41 Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê.

42 Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taì kôlé, yhâng é chyunghuq lé hkyak myang hkam yù râ za nghut lhê." gâ ri.

## 11

*Yesuq Eq Wui-myhup Sará Yohan  
Luk 7:18-35*

1 Yesuq gi, Yhâng é chángzo raxe í yuq lé dang ban pying é htâng má,

† 10:25 Bezebulaq gâ é gi, Tsadán é myíng rajà nghut lhê. ‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haù su ga taì é nghut lhê. \* 10:36 Mihka 7:6

Galile mau mâ é wà pé má mhoqshit râ matú eq hko kyo râ matú, haú jowò mai htoq e ló bê nghut ri.

<sup>2</sup> Wui-myhup Sará Yohan gi, Hkris-duq kut nyi é hkyô lé, htóng hkaú má wó gyo jáng,

<sup>3</sup> "Nàng gi, haú jé lé lô râ Sû nghut lhê lú? Haú a nghut jáng, ngamoq gi, góyuq lé láng ra shirâ lú?" ga, yhang é chángzô pé lé myí nhang kat ri.

<sup>4</sup> Yesuq tû taí é gi, "Nungmoq wó gyo wó myang é hkyô, Yohan lé ló taí kyo keq;

<sup>5</sup> myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

<sup>6</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

<sup>7</sup> Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wú râ matú, haú yoso shut e akô lú? Laí eq hik nhùn é jamgàm lé wú râ matú nghut akô lú?

<sup>8</sup> Haú a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê.

<sup>9</sup> Haú nghut lé gi, haí lé wú râ matú é kô é lú? Myiqhtoí rayuq lé lú? Haú kúm nghut ri; Ngò, nungmoq lé taí kôlé, Yohan gi, myiqhtoí htoq lhang gyaú sù nghut lhê.

<sup>10</sup> Haú yuq é hkyô lé, Chyúmdang má kâ tô é gi,

"Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê."\*

gâ ri.

<sup>11</sup> Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lhang a htoq wú shi; nghut kôlhang, Garai Gasâng é mauhkûng

mingdán má je tiq dik sù gi, Yohan htoq je kô lhê.

<sup>12</sup> Wui-myhup Sará Yohan é buinyi mai ahkuí jé shoq, mauhkûng mingdán gi, lú chyín wang nyi é hui mù, sarhé pé gi, haú lé wó yú bekô nghut ri.

<sup>13</sup> Hkâsu mù gâ le, Yohan é ahkyíng jé shoq, haú myiqhtoí pé banshoq eq tarâ gi, haú hkyô eq séng luí, myiqhtoí htoí to gù nghut lhê.

<sup>14</sup> Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê.\*

<sup>15</sup> Gyô yù râ nohkyap dap sù gi, gyô yù sháng gaq.

<sup>16</sup> Shí ipyat lhê é byu pé lé, Ngò, hai eq taí kê wú râ lú?

<sup>17</sup> Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó;

ngamoq, ngaú hkyangsâng kôlhang, nungmoq gi, a ngaú kó.'

ga luí, gai pé má zùng mù, góbang lé wut taí lhum nyi é zoshâng wui eq wui akô.

<sup>18</sup> Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô.

<sup>19</sup> Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhang é muzó eq saksé tûn shit nyi ri." gâ ri.

### *Myit A Lhîng É Wà Mó Pé Hkyô*

#### *Luk 10:13-15*

<sup>20</sup> Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi,

<sup>21</sup> "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq

mai myit lhîng mù, jimê tû wut lhê, myiwap kyaq gyûn lhê kut bekô râ nghut lhê.

<sup>22</sup> Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê.

<sup>23</sup> Dum mù, Kaperna-um wà nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê. Náng chyáng kut shit é laklaí kumlhá lé, haû Sodom wà má kut shit é ru nghut le gi, myuq haû hkû-nyí jé shoq joq nyí râ nghut lhê.

<sup>24</sup> Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." ga ri.

*Ngú Nyí Bàng É Matú Bánno Jang  
Luk 10:21-22*

<sup>25</sup> Haú u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wui lé tûn shit bê nghut é yanmai, Ngò, Nang lé hkya-on lhê ô.

<sup>26</sup> Nghut bê, Áwa ê, haû gi, Nàng ô nau é hkyô nghut ri.

<sup>27</sup> Ngá Wa gi, lhunglháng lé Ngá é loq má ap byí to bê. Haû Zo lé, Áwa mai lai luí ó le a sé; Áwa lé le, haû Zo eq haû Zo mai sé nhâng râ matú hkyin yu é bang mai lai luí ó a sé.

<sup>28</sup> Ngú é eq wòlai wun é lhunglhâng bang ê, Ngá chyáng lé keq; Ngò, nungmoq lé bánno nhâng râ nghut lhê.

<sup>29</sup> Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haû hkûn, nungmoq é asak woi-nyí bánno kó râ nghut lhê.

<sup>30</sup> Haî mù gà le, Ngá é kandang gi, waq lui é htoq agó, Ngá é wò le sôm lhê." gà ri.

## 12

*Bánno Buinyi É Yhumsîng*

*Mrk 2:23-28; 3:1-6; Luk 6:1-5, 6-11*

<sup>1</sup> Haú yoq lhê é Bánno buinyi ranyí má, Yesuq gi, Yhâng é chángzô pé eq rahá yò hkaû mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akô nghut ri.

<sup>2</sup> Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akô." ga taí kat akô.

<sup>3</sup> Haú hkûn, Yesuq tû taí é gi, "Dawiq lháng gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú?"

<sup>4</sup> Dawiq gi, Garai Gasâng é yhúmhkaû má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú?"

<sup>5</sup> Hau htoq agó, Bánno buinyi má, hkyangjông pé gi, noqkuq yhúmhkaû má Bánno buinyi é tarâ lé shut kôlhâng mara a wó é lé, haû tarâ laiká má nungmoq a nghap wú kó lú?"

<sup>6</sup> Ngò, nungmoq lé taí kôlé, haû noqkuq yhûm htoq je ko sù gi, shí má nghut nyi lhê.

<sup>7</sup> 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê\* gà é lichyúm lé nungmoq sé kô é ru nghut le gi, mara a bò bang lé mara hûn kó râ a nghut.

<sup>8</sup> Hkâsu mù gà le, haû Byu Yhangzo gi, haû Bánno buinyi é Yhumsîng nghut lhê." gà ri.

<sup>9</sup> Hau htâng, Yhang gi, haú jowò mai e ló mù, yhangmoq é tarajong má wang e ló ri.

<sup>10</sup> Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lú?" ga myi é dông, Yhang lé mara hûn râ hkyô ho akô nghut ri.

<sup>11</sup> Haú hkûn, Yesuq gi, "Nungmoq chyáng mâ é ó yuq wá, yhumsîng é

\* 12:7 Hos 6:6

sau radu, Bánno buinyi má dong gyó tô le, a xe htoq yu é nyi kó râ lhú?

<sup>12</sup> Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tarâ wang lhê." ga yhangmoq lé tâ ri.

<sup>13</sup> Hau htâng, Yhang gi, haù loq jum shî sù lé, "Náng é loq nyhang kat aq." ga tâ kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri.

<sup>14</sup> Hparishe pé kúm gi, htoq lô kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

### *Garai Hkyin Tô É Dui-nhâng Zoshâng*

<sup>15</sup> Yesuq gi, haù hkyô lé sé jáng, haù jowò mai htoq lô bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi luí,

<sup>16</sup> Yhang ó yuq nghut é hkyô lé, a tâi byông htoq râ matú, yhangmoq lé tâi hkùm tô ri.

<sup>17</sup> Haù gi, myiqhtoi Esai-aq é nhut dông mai tâi tô é dang lé lhoq dik râ matú nghut ri. Dang haù pé gi,

<sup>18</sup> "Shí yuq gi, Ngò chyt, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myù banshoq pé má tâi kyo râ nghut lhê.

<sup>19</sup> Yhang gi, haí a hpuq tú é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

<sup>20</sup> Yhang gi, tarâ dingmán é hkyô lhoq ung é hkùn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyi bê myi lé le, lhoq sat pyám râ a nghut.

<sup>21</sup> Byù myù chângjup gi, Yhâng é myìng má myit myoqbyù kó râ nghut lhê."✧

gâ ri.

### *Yesuq Eq Bezebulaq*

*Mrk 3:20-30; Luk 11:14-23; 12:10; 6:43-45*

<sup>22</sup> Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuì lé lô kôjáng, Yesuq gi, haù yuq lé lhom lhoq gê byi ri; haù mù, haù yuq gi, dang le wó nyô, myoq le wó myâng dut bê nghut ri.

<sup>23</sup> Byù hpûng mó gi, haù lé wú maù byuq kômù, "Shí yuq, Dawiq é Yhangzo za gi, nghut lhê laq?" ga tâi bum akô.

<sup>24</sup> Nghut kôlhang, Hparishe pé gi, haù lé wó gyo kôjáng, "Shí yuq gi, nat gâng pê é zau Bezebulaq\* é wum-o a-tsam èq za nat gâng pé lé wó hkat htoq é nghut ri." ga tâi bum akô nghut ri.

<sup>25</sup> Yhangmoq myit nyi é hkyô lé Yesuq sé mù, yhangmoq lé tâi é gi, "Hká mingdán nghut kôle, ahkaù má byoq gâng lhùm nyi kô é nghut jáng, htên byoq byuq râ za nghut lhê; haù eq rajung za, myuq ralhùm nghut nghut, yhumhtu ralhùm nghut nghut, yhangchang byoq lhùm nyi kô é nghut jáng, haù gi, wó gîng nyi râ a nghut.

<sup>26</sup> Tsadán gi, Tsadán lé hkat htoq pyâm é nghut jáng, yhumsing gùng yhumsîng lhoq hpyoq nyi gù bê nghut ri. Haù su nghut jáng, yhâng é mingdán gi, hkâsu kut wó gîng to râ lhú?

<sup>27</sup> Haù mù luí, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lhú? Haù su nghut jáng, haù bang gi, nungmoq lé tarâ jéyáng bang dut kó râ nghut lhê.

<sup>28</sup> Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

✧ 12:21 Esai 42:1-4

\* 12:24 Bezebulaq gâ é gi, Tsadán é myìng rajà nghut lhê.

29 Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yú râ lú? Haú yuq lé hí tuí zing pyám jáng sheq, yhâng é sutzè lé wó lú yú râ nghut lhê.

30 Ngá hkyam shut a dap sù gi, Ngo lé gyè kut sù nghut lhê; Ngò eq rahá a shúm tsing sù gi, lhoq pyo pyâm é sù nghut nyi ri.

31 Haú mù, Ngò, nungmoq lé taí kôlé, byu pê é yubak mara hkanmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyâm é gi, mara hkyut byí é hui râ a nghut.

32 Haú Byu Yhangzo lé dang đông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

33 Ashi lé wú luí, agàm lé sé rá nghut é yanmai, agàm lé lhoq gè jáng, ashí le gè rá nghut lhê; agàm lé a lhoq gè jáng, ashí le gè rá a nghut;

34 Duq htân lhangmuí amyû ê, nungmoq gi, agè ashop é bang nghut to kôluí nhing, dang gè hkâsu wó taí kó rá lú? Hkâsu mù gâ le, i-myt unghkaú má byíng mui tô é lé za, nhut mai taí htoq lo é nghut lhê.

35 Ge é sù gi, yhumsing é i-myt unghkaú má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú má é agè ashop é sutdò mai, agè ashop é zè pé lé lhoq htoq shit lhê.

36 Ngò, nungmoq lé taí kôlé, byù gi, yhumsing taí kat é akyú a bo é dang pé é matú, tarâ jéyáng é buinyi má taí sân kyo ra kó rá nghut lhê.

37 Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

*Limik Kumhá Lé Dung Kô É Hkyô  
Mrk 8:11-12; Luk 11:29-32; 11:24-26*

38 Hau htâng má, Hparishe pé eq tarâ sará pé ra-am gi, "Sará ê, ngamoq gi, Nang, limik kumhá kut shit râ lé myàng nau ri." ga Yhang lé dúng akô.

39 Haú mù, Yhang tù taí é gi, "Agè ashop é eq lhum a zuí é ipyat shí gi, limik kumhá dung nyi ri myihinung! Myiqhtoi Yonaq é kumhá mai lai luí, gotú haí le tûn shit râ a nghut.

40 Hkâsu mù gâ le, Yonaq gi, ngo mó é wamdau hkaú má sum nyí sum myín lúng é su, haú Byu Yhangzo le, myigùng káng má sum nyí sum myín lúng rá nghut lhê.

41 Ninewe wà byù wuí gi, Yonaq mungdang hko kyô é hkûn myit lhung kô é nghut mù, tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hún kó rá nghut lhê; haú Yonaq htoq ko sù gi, ahkuí shí má jé nyi to bê.

42 Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hún rá nghut lhê; haú Sholumon htoq ko sù gi, ahkuí shí má jé nyi to bê.

43 Haú agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no rá jowò hkat ho wú le, a myang hô nghut ri.

44 Haú hkûn, yhang gi, 'Ngò nyi lai lo é yhûm má dum taú ló wú rá.' ga taí ri. Yhang dum taú jé ló wú le, yhûm haú lé, ó le a sing yu hpyuq é htoq agó, san za rago dut to lánng é lé ló myang ri.

45 Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wang nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haú eq rajung za dut rá nghut lhê." gâ ri.

*Yesuq É Yhângnu Eq Yhanggû Pé  
Mrk 3:31-35; Luk 8:19-21*



<sup>46</sup> Yesuq, shiwa byu pé lé dang rû nyo nyi ashî hkûn, yhângnu eq yhanggu pé gi, Yhang lé nyò naù kômù, shinggan má lé yap tô akô nghut ri.

<sup>47</sup> Haû mù, Yesuq lé, "Náng nu eq nunggu pé gi, Nang lé nyò naù mù, shinggan má láng yap bum akô." ga taî kyô akô.

<sup>48</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga tû taî kat ri.

<sup>49</sup> Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wuì nghut bê.

<sup>50</sup> Hkâsu mù gâ le, mauhkûng htoq mâ é Ngá Wa ô nau é hkyô châng é sú ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taî ri.

## 13

### *Kyôshi Sân É Dangtú*

*Mrk 4:1-20; Luk 8:4-15*

<sup>1</sup> Haú nyí má yhang, Yesuq gi, yhúmkaû mai htoq ló mù, wuì nhông yàm má ê zung tô ri.

<sup>2</sup> Byù hpûng mó gi, Yhâng é lhinghkyuq má zup zîng lé bûm kô é yanmai, Yhang gi, lhaî hkaû má doq zùng tô ri. Shiwa byu pé kúm gi, gin-gau htoq má yap tô bum akô.

<sup>3</sup> Hau htâng, Yhang gi, haú bang lé, dangtú pé dông myo myo taî é má, "Kyô hkyó sú rayuq gi, kyôshi san rá ga htoq e ló ri.

<sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri.

<sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

<sup>6</sup> amyit a wó chin hing é nghut mù, buì htoq lô jáng, lhap kyuq pyám bê nghut ri.

<sup>7</sup> Dum ra-am gi, zugyóm hkaû má gyó ang luí, zubyap haú pé kô lò mù, wup pyâm ri.

<sup>8</sup> Ra-am dum nghut jáng, myìhpún bo é jang má gyó ang luí, ashî zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri.

<sup>9</sup> Gyô yù rá nohkyap dap sù gi, gyô yù sháng gaq." ga le taî ri.

<sup>10</sup> Haú hkûn, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông taî lhê lú?" ga myí akô.

<sup>11</sup> Haú jáng, Yhang tû taî é gi, "Mauhkûng mingdán eq sêng é sê gyo wuì é hkyô pé lé sê gyo rá ahko ahkáng, nungmoq lé byí to bê, nghut kôlhang, yhangmoq lé gi, a byi shî é nghut lhê.

<sup>12</sup> Wó to sù lé gi, yhang agùn agó wó rá matú, jat byi shirâ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê.

<sup>13</sup> Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí rá é nghut lhê.

<sup>14</sup> Haú gi, "Nungmoq gi, wó gyô tô nyi kôlhang, sê gyo kó rá a nghut; myang tô nyi kôlhang, wú sé kó rá a nghut.

<sup>15</sup> Hkâsu mù gâ le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù, i-myt bun bóng luí, lhing lò kômù, Ngò, yhangmoq lé yâ gè byi berâ nghut lhê.\*

gâ é, Esai-aq é myiqhtoi dang lé lhoq dik é nghut ri.

<sup>16</sup> Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyi ri.

<sup>17</sup> Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoi pé eq dingmán bang myo myo gi, myàng

\* 13:15 Esai 6:9-10

naù gyo naù kôlhang, a wó myâng, a wó gyo kó nghut ri.

<sup>18</sup> Ahkuì, kyôshi san sù eq sêng é dangtù é lichyúm lé rago gyô wú keq;

<sup>19</sup> Hkyô má gyó âng é kyôshi gi, mauhkûng mingdán eq sêng é danglù lé wó gyo kôlhang, a sê gyô é yanmai, haù agè ashop sù lé lô mù, yhâng é i-myt hkaù má san kat tô é kyôshi lé, lé yu pyám byî é hui sù lé gá nau é nghut lhê.

<sup>20</sup> Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôlhang,

<sup>21</sup> amyit a wó chin é yanmai, razup zo za yuq mù, mungdâng é yanmai, wuìhkê é eq zing-rî é hui kôjáng, hân hân htak lô byuq é sù lé gá nau é nghut lhê.

<sup>22</sup> Zugyóm má gyó âng é kyôshi gi, haù mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuì nghoq jung ngùn hîng zèhkoq èq hup pyám é yanmai, ashi a wó zuí é sù lé gá nau é nghut lhê.

<sup>23</sup> Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haù yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

### *Myoqgàm Dangtú*

<sup>24</sup> Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri.

<sup>25</sup> Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luì, taù lô byuq bê nghut ri.

<sup>26</sup> Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

<sup>27</sup> Yhumsîng hpô é dui-nhâng zoshâng wui gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng,

<sup>28</sup> haù yhumsîng hpó gi, 'Gumlau gye èq kut é nghut ri.' ga tù taí ri.

Haù jáng, dui-nhâng zoshâng wui gi, 'Ngamoq, myoq haù pé lé é nut pyám râ lé, nàng ô nau ri lhú?' ga myi akô.

<sup>29</sup> Haù hkûn, yhang gi, 'Hká nut pyám kó; hkâsu mù gá le, nungmoq, myoq haù pé lé nut é hkûn, guq gàm pé lé le bo záng nut pyám kó râ nghut lhê.

<sup>30</sup> Kyôshu yoq jé shoq rahá yuq to kó sháng gaq; haù hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luì, guq lé kúm gi, shù yù mù, ngá é chyî má tsing kat to râ matú, kyô shu bang lé ngò taí râ nghut lhê.' ga tù taí ri." gâ ri.

### *Angshi Cham Eq Múnchi Dangtú*

*Mrk 4:30-34; Luk 13:18-21*

<sup>31</sup> Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wui ri.

<sup>32</sup> Angshi cham haù gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

<sup>33</sup> Yhang, gotú dangtú dum xoq taí é gi, "Mauhkûng mingdán gi, myiwe rayuq èq sungso mún sum bûng má yu nyhó luì, haù pé banshoq lé wó lhoq dau nhang é múnchi eq wui ri." gâ ri.

<sup>34</sup> Yesuq gi, byù moq mó lé, haù pé banshoq dangtú dông mai chyat taí ri; yhangmoq lé, dangtú a bo é haì lhang a taí wú nghut ri.

<sup>35</sup> Haù gi,  
"Ngá nhut lé hpóng mù, dangtú dông mai taí râ;  
mingkan lé sâng-hi hpan é mai zaù tô é hkyô pé lé taí sân kyo râ nghut lhê."☆

ga, myiqhtoi dông taí tô é dang lo dik é nghut ri.

*Myoqgàm Dangtú Lé Taí Sân Kyô É Hkyô*

☆ 13:35 Hkya-on 78:2

36 Hau htâng má, Yesuq gi, byù moq mó mai htoq ló mù, yhúmkaû má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò má é myoqgàm dangtú eq sêng é hkyô lé taí sâk kyo laq." ga taí akô.

37 Haú jáng, Yhang tû taí é gi, "Ge é kyôshi san sù gi, haú Byu Yhangzo nghut ri.

38 Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô;

39 haú lé châng hkat sâk é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

40 Haú myoqgàm pé lé, nut yù mù, myi má nyê pyâm é su, haú mingkan htûm é ahkyíng má dut râ nghut lhê.

41 Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é mingdán mai hkyin she htoq yù mù,

42 gyúng nyi é myibung hkyûng hkaû má dú kat pyâm kó râ nghut lhê; hau má, ngaubyi ngaù nhap eq zuì kyik kyik shoq hpuzô nyi kó râ nghut lhê.

43 Haú hkûn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

### *Haq Tô É Sutzè Dangtú*

44 Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit èq taù ló luí, yhang wó é banshoq lé ùng pyâm mù, yò haú lé wuí yu ri.

45 Dum, mauhkûng mingdán gi, réng é palhé lé châng ho wún é hpugá hpó eq wuí ri.

46 Yhang gi, gyai hpaù é palhé lé myàng jáng, yhang wó é banshoq lé lô ùng pyâm mù, haú lé wuí yu ri.

### *Gùn Lé Dangtú Yu É Hkyô*

47 Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri.

48 Gùn haú má ngozo byíng jáng, ngo kóng bang gi, wuí yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô.

49 Haú eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yù luí,

50 ngaubyi ngaù nhap eq zuì kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyâm kó râ nghut lhê.

51 Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

52 Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

### *Myiqhtoi, Myoqdong A Wó Dut É Jang*

*Mrk 6:1-6; Luk 4:16-30*

53 Yesuq gi, dangtú haú pé lé ban taí jáng, haú jowò mai htoq e ló bê nghut ri.

54 Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?"

55 Yhang gi, laksíma hpô é yhangzo a nghut lhú? Yhângnû é myíng gi, Mariq gâ lhê a nghut lhú? Yhanggû pé gi, Yakuq, Yosep, Simun eq Yudaq gâ é bang a nghut kó lhú?

<sup>56</sup> Yhâng nhammó pé le, nga-nhúng eq rahá nghut nyi lê a nghut kó lú? Haû su nghut le nhîng, haû pé ban-shoq lé, Yhang hkâmai wó yu é nghut lê lê hà?" ga myí bùm kômù,

<sup>57</sup> Yesuq lé myit a ngón dut bùm bekô nghut ri.

Yesuq kúm gi, yhangmoq lé, "My-iqhtoi rayuq gi, yhumsing é yhum-mau eq yhumsing é yhûm má za, my-oqdong a lhaq wó wú é nghut lê." ga tû taí kat ri.

<sup>58</sup> Yhangmoq lumjîng myit a bò kô é yanmai, Yesuq gi, haû má, laklaí kumlhá myo myo a kut shit lo nghut ri.

## 14

*Wui-myhup Sará Yohan Shi Byuq É Hkyô*

*Mrk 6:14-29; Luk 9:7-9*

<sup>1</sup> Haû hkûn, mauzau Herut gi, Yesuq eq sêng é ludang lé wó gyo jáng,

<sup>2</sup> yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haû pé lé wó kut é nghut ri." ga taí ri.

<sup>3</sup> Herut haû su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri.

<sup>4</sup> Hkâsu mù gâ le, Yohan gi, yhang lé, "Nàng, myiwe haû lé hâng yu é gi, tarâ a wang é nghut lê." ga taí byí nyi é yanmai nghut ri.

<sup>5</sup> Herut gi, Yohan lé sat pyám naû kôlhang, mingbyû wuì lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

<sup>6</sup> Nghut kôlhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù,

<sup>7</sup> byizo haû lé, yhang haí dung le haí byi râ ga dakam é danggidiq byí ri.

<sup>8</sup> Byizo haû gi, yhângnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri.

<sup>9</sup> Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é my-oqdong lé tê nau é yanmai le, yhang dúng é lé, byi râ matú,

<sup>10</sup> htóng hkaû má lúng tô é Yohan é ulhum lé hpyit râ hkunmó hkyô kat bê nghut ri.

<sup>11</sup> Yohan é ulhum lé bó má kat luí, myiwe zo haû lé byi jáng, myiwe zo haû gi, haû lé yhângnú chyáng yu ló byí ri.

<sup>12</sup> Haû mù, Yohan é chángzô pé gi, yhâng é mâng lé lé yû luí, my-hup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

*Byù Ngo Hkyîng Lé Byi Tsô É Hkyô*  
*Mrk 6:30-44; Luk 9:10-17; Yhn 6:1-14*

<sup>13</sup> Yesuq gi, haû hkyô lé wó gyo jáng, haû mai lhai ji mù, tsím tsâm é jowò shut Yhang baú e ló ri. Haû lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri.

<sup>14</sup> Yesuq gi, lhai mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

<sup>15</sup> Myinhâng jé lô jáng, haû chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gym ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuì kó sháng gaq, yhangmoq lé nhang kat aq hkoi." ga taí akô.

<sup>16</sup> Haû hkûn, Yesuq gi, "Yhangmoq ló a ra. Nungmoq, yhangmoq lé ra-jung jung byi tso keq." ga tû taí kat ri.

<sup>17</sup> Haû su ga jáng, yhangmoq gi, "Muk ngo long eq ngozo í du za ru wó lê." ga dum tû taí akô.

<sup>18</sup> Haû jáng, Yesuq gi, "Yu lò keq." ga tû taí mù,

19 shiwa byu pé lé, wàhu yò má zùng nhang ri. Hau htàng, Yhang gi, haù muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haù chángzô pé gi, shiwa byu pé lé gàm byí akô nghut ri.

20 Yhangmoq banshoq bang zô gyí bùm kô é htàng má, haù chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri.

21 Haù má zô é bang gi, myiwe wuì eq zoshàng wuì lé a nghap lhôm é za, yuqgè baú ngo hkyîng kô bo ri.

*Yesuq, Wuì Htoq Má Sô É Hkyô  
Mrk 6:45-56; Yhn 6:15-21*

22 Yesuq gi, haù shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tú tap shut dap ló láng nhâng ri.

23 Shiwa byu pé lé nhang pyâm é htàng má, Yhang gi, kyûdung râ ga, Yhang baú bùm shut doq e ló ri. My-inhtàng chutshúm zó jé shoq, Yhang baú haù má nyi nyi ri.

24 Haù u lé, lhai gi, gin-gau mai tsómra wê é jowò má jé é hkûn, laì tau mut é yanmai, wuìheng èq gyai yhang lo bat nhún é hui zô ri.

25 Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri.

26 Haù mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taì garû akô nghut ri.

27 Haù jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

28 Haù hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

29 Haù jáng, Yesuq gi, "Lé lô aq." ga tú taì kat ri.

Haù mù, Petruq gi, lhai mai gyó mù, wuì htoq mai Yesuq chyáng sô e ló ri.

30 Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyi mù, "Yhumsîng ê, ngo lé hkyí yù laq." ga wut garû kat ri.

31 Yesuq gi, radá dâm yhâng é loq lhâm kat luí, Petruq lé láng zing to mù, "Lumjîng myit shau sù ê, nàng haì mù úng-âng lhê lú?" ga taì ri.

32 Yhangnhik, lhai má wàng kôjáng, laidun le zím byuq bê nghut ri.

33 Hau htàng, haù lhai má lúng tô é bang gi, Yhang lé paì gop mù, "Nàng gi, gè gè yhang, Garai Gasâng é Yhangzo nghut bê." ga taì akô nghut ri.

34 Yhangmoq gi, gû dap ló kômù, Genesarat mau má jé wang ló bekô nghut ri.

35 Haù mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haù mù, byu pé gi, nòhpyo hui bang lhunglhang lé, shuí lé lô kômù,

36 nòhpyo hui bang lé, Yhâng é bushi htàng má za lhang záng nhâng râ matú dúng tôngbán akô; Yhang lé záng é lhunglhang bang gi, lhoq gè byí é huì bekô nghut ri.

## 15

*Sansêng É Hkyô Eq A Sansêng É Hkyô*

*Mrk 7:1-23*

1 Hau htàng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù,

2 "Nàng é chángzô pé gi, haì mù luí, îchyí îwa pé é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taì akô.

3 Haù jáng, Yesuq tú taì é gi, "Nungmoq gi, haì mù, nungmoq é htungli é yanmai, Garai Gasâng é hkunmó lé a cháng kô é lú?"

4 Hkâsu mù gâ le, Garai Gasang gi, "Nungmoq é înu îwa lé, hkungga keq."\* ga le, 'Înu îwa lé, nhîng é sù ó yuq nghut kôle, sat pyâm é hui râ lhê.\* ga le, taì tô é nghut lhê.

\* 15:4 Htoq Ló 20:12    \* 15:4 Htoq Ló 21:17

<sup>5</sup> Nghut kôlhang, nungmoq taí é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taí é nghut jáng,

<sup>6</sup> haú yuq gi, yhângwa lé hkungga nó a ra.' gâ akô nghut ri. Haú đông mai, nungmoq gi, nungmoq é htunglí é yanmai, Garai Gasâng é mungdang lé he-ngik pyâm akô nghut ri.

<sup>7</sup> Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri.

<sup>8</sup> Myiqhtoi dang haú gi, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngo eq wê gâng nyi akô.

<sup>9</sup> Yhangmoq, Ngo lé noqkuq nyi kô é gi, akôm má za nghut nyi ri; hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.'<sup>☆</sup>

gâ é nghut lhê." gâ ri.

<sup>10</sup> Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq.

<sup>11</sup> Nhut má wang lo é haí jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

<sup>12</sup> Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

<sup>13</sup> Yhang gi, "Mauhkûng htoq tsáng myhâng má é Ngá Wa a hô tô é agàm hkangmó gi, apùn eq roq nut pyâm é hui râ nghut lhê.

<sup>14</sup> Yhangmoq é yanmai, myit hkâmyo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhùm é nghut le gi, í yuq é yhang dongkong má byit gyó kó râ za nghut lhê." ga tû taí ri.

<sup>15</sup> Haú hkûn, Petruq gi, "Ngamoq lé, dangtú hau é lichyúm taí sân kyo laq." ga taí jáng,

<sup>16</sup> Yesuq gi, "Nungmoq, ahkuí le haú-í yhang go nyi ashi kô luq?

<sup>17</sup> Nhut má wang lo é haí jung le, wamdau hkaú má jé wang ló mù, gungdu mai dum htoq ló é nghut lhê.

<sup>18</sup> Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri.

<sup>19</sup> Hkâsu mù gâ le, myit nhiklhum mai htoq lo é gi, agè ashop é đông myit é hkyô pé, byù sat é hkyô, su-myi sulàng lú hkyô, ashop é đông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri.

<sup>20</sup> Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

*Hkanan Myiwe Myhí Rayuq É Lumjín Myit*

*Mrk 7:24-30*

<sup>21</sup> Hau htâng, Yesuq gi, haú mai Turuq eq Sidun mau shut htoq e ló bê nghut ri.

<sup>22</sup> Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsing ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyín nyi ri." ga taí garú ri.

<sup>23</sup> Nghut kôlhang, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; haí mù gâ le, yhang gi, nga-nhùng é htâng má châng garú nyi ri." ga taí akô.

<sup>24</sup> Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taí ri.

<sup>25</sup> Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsing ê, ngo lé garúm yù laq ô!" ga taí ri.

<sup>☆</sup> 15:9 Esai 29:13

26 Yesuq gi, "Zô wui chyáng má é zoshuq lé yù mù, hkuî pé lé byi tsô é jung a nghut." ga tû taí jáng,

27 myiwe myhí haû gi, "Yhumsîng ê, haû kúm nghut ri; nghut kôlhang, hkuî pé lhang, yhumsîng hpô é zohpoq mai gyó é zang cham zang htâng lé, zô akô mhaî." ga dum taí ri.

28 Haû mù, Yesuq gi, "Myiwe zo ê, náng é lumjîng myit gi, kô nyi ri! Nàng dúng é hkyô lé gyo byi bê nghut lhê." ga tû taí ri. Haû hkûn jáng, myiwe myhí hau é byizo le ge byuq bê nghut ri.

*Byù Myi Hkyîng Lé Byi Tsô É Hkyô  
Mrk 8:1-10*

29 Yesuq gi, haû mai htoq ló luí, Galile nhông yàm má ê jé mù, bùm shut doq ló luí, ló zung nyi ri.

30 Haû hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nô bang gotû myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haû bang lé lhoq gê byi ri.

31 Haû shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkyâ-ôn bum akô nghut ri.

32 Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taí ri.

33 Haû hkûn, Yhâng é chángzô pé gi, "Isû é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ lú?" ga myí akô.

34 Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tû taí akô.

35 Haû mù, Yhang gi, byù hpûng lé, myigùng htoq má zùng nhang ri.

36 Hau htâng, Yhang gi, haû muk nyhit long eq ngozô lé yù mù, jeju ban hkyâ-on jáng, myhik hpé luí, haû chángzô pé lé byi jáng, yhangmoq gi, byù hpûng lé gàm byi akô nghut ri.

37 Yhangmoq lhunglhang bang zô gyí bùm kô é htâng má, haû chángzô pé gi, amyit ahtâng lé nyhit mung byíng shoq wó guq tsîng yu ashî kô nghut ri.

38 Haû hkûn zô é bang má, myiwe wui eq zoshâng wui lé a nghap lhôm é za, yuqgè wui baú myi hkyîng yuq bo ri.

39 Yesuq gi, byù hpûng lé ló nhang pyâm é htâng má, lhaî má wang ji mù, Magadan mau shut dap e ló bê nghut ri.

## 16

*Kumlhá Dung Kô É Hkyô  
Mrk 8:11-13; Luk 12:54-56*

1 Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng má é kumlhá kut shit râ matú, dúng akô.

2 Haû mù, Yhang gi, yhangmoq lé, "Nungmoq gi, myinhtâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le,

3 napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yû kô é nghut kôlhang, shí ipyat lhê é kumlhá lé gi, a sê gam hkoq yû kó nghut ri.

4 Agè ashop é eq lhum a zuí é ipyat shî gi, limik kumlhá lé ho nyi akô; nghut kôlhang, Yonaq é kumlhá mai lai luí, gotû haî le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

*Hparishe Pé Eq Saduke Pé É Múnchi  
Mrk 8:14-21*

5 Yhangmoq, nhông hé hpoq shut gû dap ló kô é hkûn, haû chángzô pé gi, muk yu chûng râ lé tô-myhî pyâm akô.

<sup>6</sup> Haú hkûn, Yesuq gi, "Hparishe pé eq Saduke pé é múnchilé, sídiq luí, koi pyâm nyí keq." ga, yhangmoq lé taí kat ri.

<sup>7</sup> Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

<sup>8</sup> Yhangmoq haú su taí lhúm nyí kô é lé Yesuq sé jáng, yhangmoq lé, "Lumjínng myít shaú é bang ê, muk a bo é hkyô lé, haí mù taí lhúm nyí akô lhú?"

<sup>9</sup> Ahkuí jé shoq, nungmoq gi, a sê gyo shi kó lhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le,

<sup>10</sup> muk nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myít bun kó lhú?

<sup>11</sup> Ngò gi, muk eq séng luí taí é a nghut é lé, nungmoq, hkâsu mù a sê gyo kô é lhú? Hparishe pé eq Saduke pé é múnchilé koi pyám keq nghut taí é ru nghut lhê." ga taí ri.

<sup>12</sup> Haú hkûn sheq, Yhang taí é gi, muk má chung é múnchilé koi pyám râ matú taí é a nghut e za, Hparishe pé eq Saduke pé é mhóqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

### *Yesuq Lé, Petruq Yín Yu É Hkyô* *Mrk 8:27-30; Luk 9:18-21*

<sup>13</sup> Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lhú?" ga myí ri.

<sup>14</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotú myiqhtoi rayuq yuq nghut ri ga, taí akô." ga tú taí kôjáng,

<sup>15</sup> Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myí ri.

<sup>16</sup> Haú hkûn, Simun Petruq gi, "Nàng gi, rú dui nyi é Garai Gasâng é Yhangzo, Hkrisduq nghut ri." ga tú taí ri.

<sup>17</sup> Haú mù, Yesuq tú taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Íwa mai tûn shit é ru nghut lhê.

<sup>18</sup> Ngò, nang lé taí lé, nàng gi, Petruq\* nghut luí, luqgok shí má, Ngò, Ngá é noqkuq hpúng lé xuq to râ nghut mù, haú momíng hkúmdong pé gi, hpúng haú lé wó ùng râ a nghut.

<sup>19</sup> Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri.

<sup>20</sup> Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkûm kat ri.

### *Yesuq Gi, Yhang Shí Râ Lé Hí Te Taí É Hkyô*

*Mrk 8:31–9:1; Luk 9:22-27*

<sup>21</sup> Yesuq gi, Yhang Yerusalem wà mó má ló mù, suwún wuí, hkyangjong agyi pé eq tarâ sará pé é loq má, zing-rí é myo myo hui zo luí, sat pyâm é hui ra râ nghut kôle, sum nyí nghut râ buinyí má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hi ló bê nghut ri.

<sup>22</sup> Haú mù, Petruq gi, Yhang lé rahkyam shut shuí htoq yù mù, "Yhumsíng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

<sup>23</sup> Yesuq gi, lhing wú kat mù, Petruq lé, "Tsdán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myít e za, byù eq sêng é hkyô lé za myít é sù nghut mù, Ngá

\* **16:18** Grik đông *Petruq* gâ é gi, luqgok lé gâ é nghut lhê.



é matú myit leqbat jowò nghut ri." ga taí ri.

<sup>24</sup> Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzìng lé waq chùng luí, cháng ra râ nghut lhê.

<sup>25</sup> Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyám é sù kúm gi, asak wó yù râ nghut lhê.

<sup>26</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyù bò râ lhú? Byù gi, yhumsing é asak woi-nyí lé, hai èq wó htaí yù râ lhú?

<sup>27</sup> Haú Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkanngmó lé, yhumsing kut lai bê eq rajung za akyù byi râ nghut lhê.

<sup>28</sup> Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

## 17

*Yesuq, Isâm Htaí Lo É Hkyô  
Mrk 9:2-13; Luk 9:28-36*

<sup>1</sup> Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chùng mù, yhangmoq baú myhang é bùm ralhum má doq ló akô.

<sup>2</sup> Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri.

<sup>3</sup> Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhùm nyi akô.

<sup>4</sup> Haú mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú

ralhum, Eliyaq é matú ralhum kut, ngò zúm sùm lhum saí bá." ga taí ri.

<sup>5</sup> Petruq dang ru taí nyi ashî le, duqbó é mhut gi, yhangmoq lé htop zìng lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

<sup>6</sup> Haú su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

<sup>7</sup> Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri.

<sup>8</sup> Yhangmoq tu wú kat kô le, Yesuq mai lai luí, ó lé le a myàng lo kó nghut ri.

<sup>9</sup> Bùm mai taú gyó lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shí é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

<sup>10</sup> Haú jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kó é lhú?" ga, Yesuq lé myí akô.

<sup>11</sup> Haú hkûn, Yesuq gi, "Eliyaq hí lé luí, lhungháng lé hen lajâng to râ gâ é gi, têng lhê.

<sup>12</sup> Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haú eq rajung za, haú Byu Yhangzo le, yhangmoq é loq má hpuzo râ nghut lhê." ga tú taí ri.

<sup>13</sup> Haú hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

*Nat Wang Júng Sù Lé Lhoq Gê Byí É  
Hkyô*

*Mrk 9:14-32; Luk 9:37-45*

<sup>14</sup> Yhangmoq, byù moq mó pé chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htuq luí,

15 "Yhumsing ê, ngá é yuqzo lé shogyô yù laq; yhang gi, mhûngtuq tuq luî, gyai yhang jamjaû nyi ri. Myihkyóm má le, wui má le, anum num lêng wàng wàng dut nyi ri.

16 Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taî ri.

17 Haû mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lú? Yuqgè zo haû lé, Ngá chyáng shuí lé lô keq." ga tû taî kat ri.

18 Yesuq gi, nat gang lé tân kat jáng, nat gang haû gi, yuqgè zo haû yuq chyáng mai htoq ló byuq bê nghut mù, haû hkûn jáng, yuqgè zo haû gi, ge byuq bê nghut ri.

19 Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haî mù, nat haû lé a wó hkat htoq é lú?" ga, lé myi kôjáng,

20 Yhang gi, "Nungmoq é lumjîng myit shaû é yanmai nghut ri. Ngò, nungmoq lé teng za taî kôlé, nungmoq é lumjîng myit angshi cham í za hkâlháng bò kô é nghut le gi, bùm shî lé, 'Hé shut htot ló aq.' ga taî le, htot râ nghut lhê. Nungmoq a wó kut é haî lháng joq râ a nghut.

21 Shí jung gi, kyûdung é eq zoshuq gám é dông za a nghut jáng, a htoq ló é nghut lhê.\*" ga dum tû taî ri.

22 Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê.

23 Haû bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyi nghû râ nyi má lhoq dui toq é hui râ nghut lhê." ga taî ri. Haû mù, haû chángzô pé gi, gyai yhang gyô yón nyi bekô nghut ri.

### *Noqkuq Yhûm Hkansê Kat É Hkyô*

24 Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi,

Petruq chyáng lé jé kômù, "Nungmoq é sará gi, noqkuq yhûm hkansê a kat lú?" ga myi akô.

25 Petruq gi, "Kat lhê." ga tû taî ri.

Hau htâng, Petruq yhûmhkaû má wang ló le, Yesuq hí lhom taî é gi, "Simun ê, mingkan hkohkam pé gi, kang eq hkansê pé lé, ô pé chyáng mai guq yu akô lú? Yhumsing byu pé chyáng mai lú? Haû a nghut jáng, góbâng chyáng mai lú? Náng, hkâsu wó myit lhê lú?" gâ ri.

26 Haû mù, Petruq gi, "Góbâng chyáng mai nghut ri." ga tû taî jáng, Yesuq gi, "Haû su nghut le gi, yhum-sing byu pé gi, lut akô nghut ri.

27 Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyô aq. Sâng-hi wó nhê yu é ngozô é nhut lé lêng há kat jáng, ngùn htêngchap rachap lé myàng râ nghut lhê. Haû lé yù mù, Ngá é matú eq náng é matú, yhangmoq lé ló byi aq." ga taî ri.

## 18

### *Kô Dik Sû Gi, Ó Yuq Nghut Lhê Lú?*

*Mrk 9:33-37, 42-48; Luk 9:46-48; 17:1-2*

1 Haû hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lú?" ga myi akô.

2 Yesuq gi, zoshâng zo rayuq lé wut yù mù, yhangmoq é gung gûng má shap to luî,

3 taî é gi, "Ngò, nungmoq lé teng za taî kôlé, nungmoq gi, myit htaî lhik luî, zoshâng zo wui su dut kô é za a nghut jáng, mauhkûng mingdán má hkâ-nhám le wó wâng kó râ a nghut.

4 Haû mù, zoshâng zo shí yuq su, yhumsing é i-myit wó lhoq nyhum é sû ó yuq nghut kôle, mauhkûng mingdán má, kô dik sû nghut ri.

5 Shî sû é zoshâng lé, Ngá é myîng mai hap yu é sû ó yuq nghut kôle, Ngo lé hap yu é sû nghut bê.

6 Nghut kôlhang, Ngo lé lumjîng é zoshâng wui mâ é rayuq yuq lé, mara

\* 17:21 Chyûmbun shî gi, chyûmding myo myo má a bo é nghut lhê.

kut shut nhang é sũ gi, yhang é lingz-ing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhang é matú je gè râ nghut lhê.

<sup>7</sup> Haũ mingkan gi, byu pé lé mara kut shut nhâng jang joq é yanmai, dingnyé wó ri. Haũ mara kut shut nhâng hkyô gi, htoq lugù bê; nghut kôlhang, haũ lé lhoq htoq sũ gi, dingnyé wó ri.

<sup>8</sup> Náng é loq èq, a nghut jáng, náng é hkyi èq, nang lé mara kut shut nhang é nghut le gi, haũ lé hpyit dú pyám aq. Ahtum abyuq é myi má, hkyi hkúm loq hkúm gũ dú hkyô pyâm é hui râ htoq má, hkyi loq a hkúm é za, asak wó yu é nghut le gi, náng é matú je ge ri.

<sup>9</sup> Náng é myoqjí èq, nang lé mara kut shut nhang é nghut le gi, haũ lé lap choq yũ mù, dú pyám aq; myoqjí í jí dap gũ ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

*Byuq Byuq É Sau*  
*Luk 15:3-7*

<sup>10</sup> Shĩ sũ é zoshâng zo wuĩ má é rayuq lé lhang a wũ tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkũng má é yhangmoq é maumang lagyô pé gi, mauhkũng htoq mâ é Ngá Wá é myoq-dong lé, hkâ-nhám le myang nyi akô.

<sup>11</sup> (Hkâsu mù gâ le, haũ Byu Yhangzo gi, byuq byuq bê bang lé hkyi yũ râ matú, jé lé é nghut lhê.)\*

<sup>12</sup> Byũ rayuq gi, sau rashô du wó é nghũ sháng, sau haũ gũ má é radu byuq byuq é nghut jáng, haũ gaũ xe gaũ du lé, bũm pé má nyhi pyâm to luí, byuq byuq é sau lé a châng ho é nyi râ lú? Haũ lé, nungmoq hkâsu wó myit ngam akô lú?

<sup>13</sup> Ngò, nungmoq lé teng za taí kôlé, yhang gi, haũ byuq byuq é sau haũ lé myang ho é hkũn, a lám byuq é sau

gaũ xe gaũ dũ é matú gabú é htoq má, haũ dũ matú je riyhang gabú ri.

<sup>14</sup> Haũ eq rajung za, mauhkũng htoq mâ é nungmoq é Íwa gi, shĩ tiq bang mâ é rayuq htên byoq byuq râ lé lhang, ô nau é a nghut.

*Mara Kut Shut É Gumang Hpó Lé*  
*Hkâsu Kut Râ Hkyô*

<sup>15</sup> Náng é gumang hpó, nang lé mara kut shut é nghut jáng, yhang chyáng ê mù, nungnhik baũ za nghut é hkũn, yhang é mara lé tũn shit aq. Yhang, náng é dang lé gyô é nghut jáng, náng gi, gumang rayuq dum wó bê nghut ri.

<sup>16</sup> Nghut kôlhang, yhang, náng é dang lé a gyô é nghut jáng, 'Mara hun é hkyô hkanmó lé, saksé í yuq sum yuq lòm jáng, wó lhoq teng sháng gaq.\* gâ tô é eq rajung za, náng, gotũ byũ ra-í yuq lé shuí chũng aq.

<sup>17</sup> Yhang gi, haũ bãng é dang lé le a lhom yu é nghut jáng, haũ hkyô lé, noqkuq hpúng má shit kyo aq; hpũng é dang lé le a gyô é nghut jáng, yhang lé, a lumjĩng é byũ rayuq dõng le, kang guq sũ rayuq dõng le sôn pyám aq.

<sup>18</sup> Ngò, nungmoq lé teng za taí kôlé, myigũng htoq má, nungmoq tuĩ to má tuĩ to lé, mauhkũng htoq má le, tuĩ to râ nghut lhê; myigũng htoq má, nungmoq lhoq lhut má lhoq lhut lé, mauhkũng htoq má le, lhoq lhut byi râ nghut lhê.

<sup>19</sup> Ngò, nungmoq lé dum taí kôlé, myigũng htoq má, nungmoq mâ é í yuq myit hui luí, haĩ lé dung kôlhang, mauhkũng htoq mâ é Ngá Wa gi, haũ nhik lé gyo byi râ nghut lhê.

<sup>20</sup> Hkâsu mù gâ le, Ngá myĩng lé lang luí, í yuq sum yuq zup zĩng é jang hkâmá nghut kôlhang, haũ bãng é gyoro má Ngò nyi lhê." gâ ri.

*Shogyo Nihkmyin A Sê É Jũn Hpô É*  
*Dangtũ*

<sup>21</sup> Haũ hkũn, Petruq gi, Yesuq chyáng huĩ ê mù, "Yhumsĩng é, ngá é gumang, ngo lé mara kut shut é

\* **18:11** Bun zo shĩ gi, chyũmdĩng myo myo má a bo é nghut lhê. ✧ **18:16** Tarâ Pun 19:15

nghut le, yhang lé hkâ-myhó dâm mara hkyut byi ra râ lú? Nyhit dâm jé shoq hkyut byi ra râ lú?" ga myi ri.

<sup>22</sup> Haû jáng, Yesuq tû taî é gi, "Ngò, nang lé taî lé, nyhit dâm za a nghut, nyhit xe nyhit tû dâm hkyut byi râ lê.

<sup>23</sup> Mauhkûng mingdán gi, yhumsing é dui-nhâng zoshâng wui é jihpán lé jep nau é hkohkâm rayuq eq du ri.

<sup>24</sup> Yhang gi, jihpán lé jep hí ló é u lé, yhang chyáng ngùn wan myo myo chyín dap to sú lé shuí lé lo akô.

<sup>25</sup> Haû yhumsing hpó gi, haú yuq chyín a wó xap é yanmai, chyín wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám râ hkunmó hkyô kat ri.

<sup>26</sup> Haû mù, dui-nhâng zoshâng haú yuq gi, yhang é hí má hkyihput htuq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri.

<sup>27</sup> Haû dui-nhâng zôshang é yhumsing hpó gi, haú yuq lé wú shogyo luí, chyín banshoq lhut pyám byi mù, nhang kat ri.

<sup>28</sup> Nghut kôlhang, dui-nhâng zoshâng haú gi, htoq ló mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga taî ri.

<sup>29</sup> Haú hkûn, yhang é luzúm dui-nhâng zoshâng haú gi, yhang é hí má hkyihput htuq luí, 'Ngo lé myit hîng byi shi laq; ngò xap râ.' ga dúng tôngbán ri.

<sup>30</sup> Nghut kôlhang, yhang gi, a gyo byi e za, yhang é chyín dum wó xap é hkûn jé shoq, haú yuq lé htóng hkyô pyám nhâng ri.

<sup>31</sup> Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí, yhangmoq é yhumsing hpó lé, haú hkyô banshoq ló taî kyô akô.

<sup>32</sup> Haû mù, haû yhumsing hpó gi, dui-nhâng zoshâng haú lé wut

hâng yù mù, 'Agè ashop é dui-nhâng zoshâng ê, nang, ngo lé dúng tôngbán é yanmai, nang, ngo lé dap é chyín banshoq lé, ngò lhut pyám byi bê nghut lhê mhai.

<sup>33</sup> Haû su é nhîng, ngò, nang lé shogyô yu é su, náng é luzúm dui-nhâng zoshâng lé, nang ge shogyô yu lhê a nghut lú?" ga taî luí,

<sup>34</sup> yhang gi, nhikjum yo mù, yhang é chyín ban xap é hkûn jé shoq, jamjau hui zo râ matú, yhang lé, htóng suwún pê chyáng ap byi pyám bê nghut ri.

<sup>35</sup> Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú dông kut râ nghut lhê." gâ ri.

## 19

### *Myi Làng Gâng É Hkyô*

#### *Mrk 10:1-12*

<sup>1</sup> Yesuq gi, mhoqshit é dang haú pé lé ban taî jáng, Galile mau mai htoq ló mù, Yodan làng tû tap mâ é Yuda mau má é jé ri.

<sup>2</sup> Byù moq mó gi, Yhang htâng cháng kô é nghut mù, Yhang gi, haú bang mâ é nòhpyo hui bang lé, haú má lhoq gê byi ri.

<sup>3</sup> Haú hkûn, Hparishe pé ra-am gi, Yhang chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lhê lú?" ga myi akô.

<sup>4</sup> Haû jáng, Yhang tû taî é gi, "Anham sâng-hi lé, Hpân Sû, 'byu hpan é hkûn, yuqgè eq myiwe lé hpan é nghut lhê.'\*

<sup>5</sup> 'Hau é yanmai, yuqgè gi, yhumsing é ìnu îwâ chyáng mai htoq luí, yhangmyi eq rahá rading rallum za kut nyi mù, yhangnhik gi, gungsho rallum za dut byuq kó râ nghut lhê.'\* ga kê tô é lé, nungmoq a nghap wú kó lú?"

<sup>6</sup> Haû mù luí, yhangnhik gi, í yuq a nghut lô e za, rayuq za dut bê nghut

† 18:28 Denari rachap gi, ra-nyí lhê é byù rayuq é zuihpau eq wuí ri. \* 19:4 Apùn 1:27 \* 19:5 Apùn 2:24

ri. Haû mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

<sup>7</sup> Haú hkûn, yhangmoq gi, "Haû lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lê ga, haí mù, Mosheq, hkunmó hkyô tô lê lú?" ga, Yhang lé dum taú myî akô.

<sup>8</sup> Haû mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklhum htân kô é yanmai, nungmoq é yhangmyi pé lé lhoq kang râ ahkáng, Mosheq byi tô é ru nghut lê.

<sup>9</sup> Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyâm mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum taú ri.

<sup>10</sup> Haú hkûn, haú chángzô pé gi, "Myi làng hkyô má haú dông ru nghut le gi, a yu le lhang je ge nyo ri." ga taí akô.

<sup>11</sup> Haû mù, Yesuq gi, "Yuq hkangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lê.

<sup>12</sup> Byù ra-am gi, ínû unghkaû mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taú ri.

*Zoshâng Wui Eq Yesuq*  
*Mrk 10:13-16; Luk 18:15-17*

<sup>13</sup> Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

<sup>14</sup> Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng

mingdán gi, haú sù é bâng é mingdán ru nghut lê." ga taí kat ri.

<sup>15</sup> Yhang gi, zoshâng wui htoq má loq ke shimân byi mù, haú jowò mai htoq lô bê nghut ri.

*Sùt Wó É Zorâm Rayuq É Hkyô*  
*Mrk 10:17-31; Luk 18:18-30*

<sup>16</sup> Byù rayuq gi, Yesuq chyáng lé jé mù, "Sarâ é, ahtum abyuq é asak wó yù râ matú, ge é muzó haí kut ra râ lú?" ga myî ri.

<sup>17</sup> Haú jáng, Yesuq gi, "Ge é hkyô eq séng luí, haí mù Ngo lé myî lê lú? Ge é Sù gi, rayuq za nyi lê. Nàng, asak dui é má wàng nau é nghut le gi, jep é tarâ pé lé cháng aq." ga taú ri.

<sup>18</sup> Haú yuq gi, "Hká gû lé lú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkám,

<sup>19</sup> nángnu nángwa lé hkungga aq, ✧ ga le, 'náng gûng lé nàng chyitdap e su, náng é chyangnâm mâ é bang lé le chyitdap aq. ✧ ga le bo tô ri." ga taí kat ri.

<sup>20</sup> Haú hkûn, zorâm hpó haú gi, "Haú pé banshoq lé, ngò cháng bê nghut lê; haí kut râ ashí lú?" ga dum taú myî ri.

<sup>21</sup> Yesuq gi, "Nàng, gumjup sù dut nau le gi, lô mù, nàng wó é sutzè pé lé ûng pyâm luí, myûng bang lé byi pyâm aq; haú jáng, nàng, mauhkûng htoq má sutzè wó râ nghut lê; haú mù, Ngá htâng lé cháng aq." ga taú ri.

<sup>22</sup> Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq lô byuq bê nghut ri.

<sup>23</sup> Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wàng râ gyai yhang wui ri.

<sup>24</sup> Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wàng lai râ gi, je lui râ nghut lê." ga taú ri.

25 Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lhú?" ga Yhang lé myî akô nghut ri.

26 Haû hkûn, Yesuq gi, yhangmoq lé wú kat mù, "Haû hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sû nghut lhê." ga taí ri.

27 Haû hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luí, Náng htâng cháng bê nghut lhê. Ngamoq, haí wá wó râ nghut lhê lhú?" ga myî kat ri.

28 Haû mù, Yesuq tù taí é gi, "Ngò, nungmoq lé teng za taí kôlê, lhunglhang lé asik dum saí dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhùm htoq má zùng to kômù, Israelaq amyû raxe í hú lé jéyáng kó râ nghut lhê.

29 Ngá é yanmai, yhumsing é yhùm, nhiktâng wuì, înu îwa, zo dù wuì eq yò pé rajung jung lé tô pyâm tô é sù ó yuq nghut kôlê, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê.

30 Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê.

## 20

### *Tsibiyiq Hkyâm Mû Zui Bang Lé Dangtú Yu É Hkyô*

1 Hkâsu mù gâ le, mauhkûng mingdán gi, yhumsing é tsibiyiq hkyâm má mù zui nhâng râ langchyáng é lûng râ ga, napsûn noq le htoq e ló é hkyâm yhumsing eq du ri.

2 Yhang gi, ra-nyí é matú denari rachap byi râ dông, haû bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

3 Napkyó gau hkyíng\* kô má, yhang gi, htoq e ló le, hai mù le a kut é za, gai má yap tô é bang ra-am lé ê myang ri.

4 Haû mù, yhang gi, haû bang lé, 'Nungmoq le, ngá é hkyâm má mù é zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

5 Hau htâng, yhang gi, raxe í hkyíng má le, myinhtâng sum hkyíng kô má le, dum htoq ê mù, haû eq rajung za langchyáng pé ê lung kat ri.

6 Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haû bang lé, 'Nungmoq gi, haí le a kut é za, ra-nyí buí haí mù shí má yap tô bum akô lhú?' ga myi jáng,

7 haû bang gi, 'Ngamoq lé, ó yuq eq le a lûng kô é yanmai nghut lhê.' ga tù taí akô.

Haû hkûn, yhang gi, 'Nungmoq le, ngá é hkyâm má mù é zui keq.' ga taí ri.

8 Myinhtâng jé jáng, tsibiyiq hkyâm yhumsing gi, yhâng é mù shuí u sù lé, 'Haû langchyáng pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga taí ri.

9 Myinhtâng ngo hkyíng má mù wàng bang le, denari rachap chap wó yu bum akô.

10 Haû mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri.

11 Yhangmoq gi, haû myhó za wó yu bùm kô é yanmai, haû hkyâm yhumsing lé,

12 'Shí bang gi, je htâng má mù lé wàng mù, nayí rahkum za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byi ri.' ga mara hùn dang taí akô.

13 Nghut kôlhang, haû hkyâm yhumsing gi, haû bang má é rayuq

\* 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

lé, 'Buinùm hpó ê, ngò, nang lé a tará é dông kut é a nghut. Denari rachap byi râ nghû, nàng eq ngò myit huí to bê a nghut lúhú?

<sup>14</sup> Nàng wó âng é lé yu chùng mù, ló aq. Je htâng má mù lé wang é sù lé le, nang lé byí é myhó, ngò byí nau ri.

<sup>15</sup> Ngá é ngùn lé, ngò kut nau é su a ge kut lúhú? Ngò, ge é kut le, nàng manôn ri lúhú?' ga taí ri.

<sup>16</sup> Haû mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê." gâ ri.

*Yesuq Gi, Yhang Shî Râ Hkyô Lé Dum Taí Ri*

*Mrk 10:32-34; Luk 18:31-34*

<sup>17</sup> Ahkuí, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù,

<sup>18</sup> "Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pé é loq má ap byí pyâm é hui râ nghut lhê; haû bang gi, Yhang lé, shî râ mara byi kó râ nghut é htoq agó,

<sup>19</sup> jóng pyâm é, nhuq bat é eq tapzîng má jén sat pyâm é hui râ matú, haû tûngbaù pé é loq má ap pyám kó râ nghut lhê. Nghut kôlhang, Yhang gi, sum nyí nghû râ buinyi má, lhoq dui toq é dum hui râ nghut lhê." ga taí ri.

*Zô Nhk Matú Ìnu Èq Dung Byí É Hkyô*

*Mrk 10:35-45*

<sup>20</sup> Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htuq nyi ri.

<sup>21</sup> Haû mù, Yesuq gi, "Nàng, haí ô nau ri lúhú?" ga yhang lé myi jáng, yhang gi, "Náng é mingdán má, shî ngá zô nhiktâng lé, Náng é loqyò hkyam má rayuq, loqpaí hkyam má rayuq kut, zùng râ ahkáng byi laq." ga taí ri.

<sup>22</sup> Haú hkûn, Yesuq gi, "Nungnhik haí dúng nyi é lé, nungnhik a sé kó

nghut ri. Ngò shuq râ góm† lé, nungnhik wó shuq kó râ lúhú?" ga myi jáng, yhangnhik tâng gi, "Wó shuq lhê." ga tû taí akô nghut ri.

<sup>23</sup> Haû mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

<sup>24</sup> Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri.

<sup>25</sup> Haû mù, Yesuq gi, yhangmoq banshoq bang lé wut tsîng yù luí, "Tûngbaù pé lé uphkang é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê.

<sup>26</sup> Nungmoq chyáng gi, haû su a dut kó sháng gaq; haû Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut é su,

<sup>27</sup> nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê.

<sup>28</sup> Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

*Myoqjit Í Yuq Myoq Dum Myang É Hkyô*

*Mrk 10:46-52; Luk 18:35-43*

<sup>29</sup> Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô.

<sup>30</sup> Haû hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhk lé shogyô yù laq ô!" ga, wut garû kat akô nghut ri.

† 20:22 Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

31 Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó eq wut garû kat akô nghut ri.

32 Haû mù, Yesuq gi, yap kat mù, "Ngò, nungnhik lé haî kut byi râ ô nau akô lú?" ga, yhangnhik lé wut myí kat ri.

33 Haú hkûn, yhangnhik gi, "Yhumsîng ê, ngá-nhik myoq myàng nau ri." ga tû taî akô.

34 Yesuq gi, yhangnhik lé wú shogyo luí, yhangnhik é myoqjí má é záng byî ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

## 21

*Yesuq, Yerusalem Wà Mó Má Wang  
E Ló É Hkyô*

*Mrk 11:1-11; Luk 19:28-38; Yhn 12:12-19*

1 Yesuq eq Yhâng é chángzô pé gi, Yerusalem wà mó eq chyâng lo nyí kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé,

2 "Nungnhik, hí mâ é wà má ê keq; wà haú má, logúng zîng radu lé, logúng zo eq rahá tuí to lánng é lé, ê myàng kó râ nghut lhê; haú lé hpyi yù mù, Ngá chyáng she lò keq.

3 Byù rayuq yuq, nungnhik lé ra-jung jung gâ lò jáng, 'Shí í du lé, haú Yhumsîng chûng râ ri.' gâ nghû tû taí keq; haú jáng, yhang, radá dâm nhâng byi râ nghut lhê." ga Yesuq taí luí, nhang kat ri.

4 Haû gi, myiqhtoi dang lhoq dik râ matú dut lo é nghut ri.

5 Myiqhtoi dang haû gi, "Zi-un byizo\* lé, shí su nghû keq; 'Wú aq, náng é hkohkâm gi, nú-nhâm é myít eq logúng htoq má ji mù, nghut bê, logúng zo htoq

má ji mù, náng chyáng lé lô bê nghut ri.'"☆

gâ ri.

6 Haû chángzô nhik gi, e ló mù, Yesuq taí kat é eq rajung za ê kut bekô nghut ri.

7 Yhangnhik gi, logúng me lé she lò mù, yhangnhik é buhîng pé lé, haú logúng mê é htoq má ke byi kôjáng, Yesuq gi, doq jî ri.

8 Byù moq mó mâ é myo myo gi, yhangmoq é buhîng lé, hkyô má hkyut hkang byî akô; ra-am gi, mhandíng pé lé zân hkyô yù mù, hkyô má hkang byî akô nghut ri.

9 Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí sháng gaq ô!"

"Haû Yhumsîng é myîng mai jé lé lô Sû gi, hkungsô wó nyí sháng gaq ô!"☆

"Htoq tsáng myhâng má, hosana nghut nyí sháng gaq ô!" ga luí, taí garû bum akô nghut ri.

10 Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhum bum akô.

11 Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

*Yesuq, Noqkuq Yhûm Lé Lhoq  
Sansêng Pyâm É Hkyô*

*Mrk 11:15-19; Luk 19:45-48; Yhn 2:13-22*

12 Yesuq gi, noqkuq yhûm má wang é mù, haú mâ é zè ung zè wui kut nyi é bang banshoq lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé, tu mhûq pyám byî ri.

13 Haú hkûn, Yhang gi, "Ngá yhûm gi, kyûdung yhûm ga râ nghut lhê."☆ ga kâ to kôlhang, nungmoq gi, jowò shí

\* 21:5 Zi-un byizo gâ é lichyúm gi, Yerusalem byu pé gâ é nghut lhê. ☆ 21:5 Zhk 9:9 † 21:9 Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkya-on dang dông chung é nghut lhê. ☆ 21:9 Hkya-on 118:26 ☆ 21:13 Esai 56:7 ☆ 21:13 Yer 7:11



lé 'damaq hkyûng'✧ kut nyi akô." ga, yhangmoq lé taí ri.

14 Yesuq, noqkuq yhûm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haú bang lé lhom lhoq gê byî ri.

15 Nghut kôhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuî garû nyi bùm kô é lé le, myàng kôjáng, wú nhik-yô bum akô nghut ri.

16 Haú mù, yhangmoq gi, "Zoshâng shí bang haí taí nyi kô é lé, Nang wó gyô lhê lú?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuî eq nyheqnú pé é nhut mai hkya-on kungtôn râ matú, nang lajâng to bê nghut ri.'✧

ga kâ tô é lé, Chyúmdang má a nghap wú kó lú?" ga yhangmoq lé taí ri.

17 Hau htâng má, Yhang gi, haú bang lé nyhi to luí, wà hkaú mai htoq lô mù, Behtani wà má ê jé luí, haú myîn, haú má bíng yu ri.

*Maihpáng Gâm Nyhuí Kyuq Shi Byuq É Hkyô*

*Mrk 11:12-14, 20-24*

18 Yhang gi, htang napkyó noq le, Yerusalem wà mó shut dum taú lô é hkûn, hkyô má zômút hui bê nghut ri.

19 Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nang má, hkâ-nhám le ashi a zui sháng gaq." ga taí kat ri. Haú hkûn jáng, agàm haú gi, nyhuí kyuq shi lô byuq bê nghut ri.

20 Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi lô lhê lhà?" ga myi akô.

21 Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má

lô gyó wâng aq.' ga taí jáng, taí é eq rajung za dut râ nghut lhê.

22 Nungmoq, lumjíng myit èq dung kô é nghut jáng, haí dúng le le wó yú kó râ nghut lhê." ga tú taí ri.

*Yesuq É Ahkáng Ayá Lé Myî Chyam É Hkyô*

*Mrk 11:27-33; Luk 20:1-8*

23 Yesuq gi, noqkuq yhûm wàng hkaú má wang é mù, mhoqshit nyi é hkûn, hkyangjong agyi pé eq ming-byu é suwún wuî gi, Yhâng chyáng lé jé kômù, "Hai ahko ahkâng èq, Nang, shí pé lé kut nyi lhê lú? Ahko ahkáng shí, Nang lé ó yuq byî é lú?" ga myi akô.

24 Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tú taí kô é nghut jáng, hai ahko ahkâng èq, Ngò, shí pé kut é hkyô lé taí kyo râ nghut lhê.

25 Yohan byî é baptisma gi, ó yuq é ahko ahkáng mai nghut lhê lú? Mauhkûng mai lú? A nghut jáng, byu chyáng mai lú?" ga taú myi kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghû, nga-nhúng taí jáng le, 'Haú nghut le nhíng, haí mù, yhang lé a lumjíng kô é lú?' ga râ nghut;

26 'Byu chyáng mai nghut lhê.' nghû jáng le, yhangmoq lunglhâng bang gi, Yohan lé, myiqhtoi rayuq ga lumjíng bùm kô é nghut lhê yanmai, haú bang lé, nga-nhúng gyuq râ lhê nghut." gâ akô.

27 Haú mù, yhangmoq gi, Yesuq lé, "Ngamoq a sé." ga tú taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

*Yuqzô Nhiktâng Lé Dangtú Yu É Hkyô*

28 Yesuq xoq taí é gi, "Nungmoq hkâsu wó myit akô lú? Byù rayuq gi, yuqzô í yuq wó ri. Yhang gi, ko sù yuq chyáng é mù, 'Ngá zo ê, nang, hkû-nyí

✧ 21:16 Hkya-on 8:2

tsibiyiq hkyâm má mù ê zui aq.' ga taí jáng,

<sup>29</sup> yuqzo haû gi, 'Ngò a kâm ê.' ga tù taí ri; nghut kôlhang, htâng má, yhang gi, myit dum lhîng mù, ê bê nghut ri.

<sup>30</sup> Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haû gi, 'Ê râ, âwa!' ga yín yû kôlhang, a ê kut ri.

<sup>31</sup> Haú nhiktâng má é hká yuq sheq, yhângwa ô nau é hkyô lé kut sù nghut ri lú?" gâ ri.

Haú hkûn, yhangmoq gi, "Ko sù nghut ri." ga tù taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê.

<sup>32</sup> Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhang, nungmoq gi, yhang lé a jîng kut akô nghut ri; nghut kôlhang, haú kang guq bang eq shiwa myhî pé gi, yhâng dang lé jîng akô nghut ri. Nungmoq gi, haú hkyô lé myang é nghut kôlhang, myit a lhîng kô é htoq agó, yhang lé a lumjîng shi kó nghut ri.

*Tsibiyiq Hkyâm Saí Bang Lé Dangtú Yu É Hkyô*

*Mrk 12:1-12; Luk 20:9-19*

<sup>33</sup> Gotû dangtú lé gyô wú shi keq; hkyâm yhumsîng rayuq gi, tsibiyiq hkyâm ralhum saí to mù, lhîngkyuq kyâm to luí, tsibiyiq wing pyik htoq rá dongkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri.

<sup>34</sup> Kyôshu yoq jé jáng, yhang gi, yhang eq sêng é tsibiyiq shi ê yû râ matú, yhâng é dui-nhâng zoshâng wuì lé, haú hkyâm saí zo bâng chyáng nhang kat ri.

<sup>35</sup> Haú hkyâm saí zo bang gi, dui-nhâng zoshâng wuì lé, lhom chyup yû kômù, rayuq lé gi, lhom nhuq bat,

rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri.

<sup>36</sup> Hau htâng má, yhang gi, hí dam lhê htoq je myo shoq gotû dui-nhâng zoshâng wuì lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri.

<sup>37</sup> Ló htâng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

<sup>38</sup> Nghut kôlhang, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù râ sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhûm bum akô nghut ri.

<sup>39</sup> Haú mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

<sup>40</sup> Haú mù luí, tsibiyiq hkyâm yhumsîng lé jé é hkûn lé, haú hkyâm saí zo bang lé hkâsu kut nhô ngam akô lú?" ga Yesuq myî ri.

<sup>41</sup> Haú hkûn, haú hkyangjong agyi pé eq suwún wuì gi, "Haú agè ashop bang lé gi, agè ashop é dông sat pyám râ nghut lhê. Haú tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byî pyám râ nghut lhê." ga, tù taí akô nghut ri.

<sup>42</sup> Haú jáng, Yesuq dum taí é gi, "Chyúmdang má,

'Yhûm saí bâng èq hkyin htoq pyâm é luqgok gi, htungchyûn má é ahkyak dik é luqgok dut bê.

Shí hkyô gi, haú Yhumsîng kut é nghut luí, nga-nhûng é myoq hí má mauhpo dut bê nghut ri.'<sup>✧</sup> ga bo tô é lé, nungmoq a nghap wú kó lú?"

<sup>43</sup> Haú mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byî pyám râ nghut lhê.

<sup>44</sup> Luqgok haú má gyó záng é sù gi, gyuí gyop byuq râ nghut lhê. Luqgok

✧ 21:42 Hkya-on 118:22-23

hau eq gyó nhê záng é sù le, nhê pyeq pyâm é hui râ nghut lhê." gâ ri.

<sup>45</sup> Hkyangjong agyi pé eq Hparishe pé gi, haú Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri.

<sup>46</sup> Haú mù, yhangmoq gi, Yhang lé chyup yú râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

## 22

### *Myiháng Poí Dangtú Pé*

*Luk 14:15-24*

<sup>1</sup> Yesuq, dangtú pé dông yhangmoq lé dum taí é gi,

<sup>2</sup> "Mauhkúng mingdán gi, yhumsing yhangzô é matú myiháng poí hen lajâng to byi é hkohkâm rayuq eq du ri.

<sup>3</sup> Hkohkâm hpó haú gi, yhang ji tô é bang, haú poí má lé lô râ matú, yhâng é dui-nhâng zoshâng wui lé ê tsing taí nhang ri; nghut kôlhang, haú bang gi, a lé kut akô nghut ri.

<sup>4</sup> Hau htâng má, yhang gi, gotú dui-nhâng zoshâng wui lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkanmó rì rì nghut to bê. Myiháng poí má lé lò keq' ga pyîng luí, nhang kat ri.

<sup>5</sup> Nghut kôlhang, haú ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dینگá hkyô shut ê byuq bekô nghut ri.

<sup>6</sup> Ra-am dum nghut jáng, yhâng é dui-nhâng zoshâng wui lé lhom chyup yú kômù, nhuq bat luí, sat pyám byi akô nghut ri.

<sup>7</sup> Haú mù, hkohkâm gi, nhikjum yo luí, yhâng é gyezô pé lé, haú byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

<sup>8</sup> Hau htâng má, yhang gi, yhâng é dui-nhâng zoshâng wui lé, 'Myiháng poí gi, rì rì nghut to bê; nghut kôlhang,

haú ji to huí é bang gi, lé râ a gingdán kó nghut ri.

<sup>9</sup> Haú mù, hkyô kang pé má ê luí, myang é yuq hkanmó lé, poí má lé râ matú é jî keq.' ga taí ri.

<sup>10</sup> Haú jáng, dui-nhâng zoshâng haú bang gi, hkyô kang pé má htoq ê luí, myang é byù gè byù gang lunglhang lé ji tsing yù kô é nghut mù, myiháng poí gi, bíng pé zung byíng bùm bê nghut ri.

<sup>11</sup> Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri.

<sup>12</sup> Haú mù, yhang gi, haú yuq lé, 'Buinum hpó ê, nàng gi, myiháng poí wàng hking le a wut é nhíng, shí má hkâsu kut wang lo é lhú?' ga myi jáng, haú yuq gi, haí le a dat tú taí lo nghut ri.

<sup>13</sup> Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyi loq má tui luí, haú ngaubyi ngaù nhap eq zui kyik kyik shoq hpuzô nyi râ nghut é shinggan mauchut hkaú má, dú htoq pyám keq.' gâ ri.

<sup>14</sup> Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaú ri." gâ ri.

### *Kehtaq Lé Kang Kat Byi É Hkyô*

*Mrk 12:13-17; Luk 20:20-26*

<sup>15</sup> Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyí dâ akô nghut ri.

<sup>16</sup> Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê.

<sup>17</sup> Haú mù, hkoséng Kehtaq lé kang kat byi le gi, ge lhê lhú? A gè lhú?

Nàng, hkâsu wó myit é hkyô taî kyô wú aq." ga taî akô nghut ri.

<sup>18</sup> Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haî mù, Ngo lé lé chyam wú akô lú?"

<sup>19</sup> Kang kat râ ngùn htingchap rachap, Ngo lé byi wú keq." ga taî kat ri. Haú hkûn, yhangmoq gi, denari rachap yù byi akô.

<sup>20</sup> Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lú?" ga myi jáng,

<sup>21</sup> yhangmoq gi, "Kehtaq é nghut ri." ga tû taî akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taî kat ri.

<sup>22</sup> Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

### *Saduke Pé, Yesuq Lé Myî Chyam É Hkyô*

*Mrk 12:18-27; Luk 20:27-40*

<sup>23</sup> Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

<sup>24</sup> Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taî tô é nghut lhê.

<sup>25</sup> Hí hpyang lé, ngamoq chyáng, gumang nhiktâng wuî nyhit yuq nyi akô. Lagám yuq gi, myiwe yù luî, zo dù a dap é za yhangmyi lé shi lhuî pyâm to bê nghut ri.

<sup>26</sup> Haú eq rajung za, Lanong, Lalaq mai Lahkâ jé shoq, chuimó haú lé gon luî, ó le zo dù a dap é za shi ló byuq bùm bekô nghut ri.

<sup>27</sup> Ló htáng má, myiwe myhí haú le châng shi ló byuq bê nghut ri.

<sup>28</sup> Haú mù luî, haú dum dui toq é buinyi má, myiwe myhí haú gi, haú

nhiktâng wuî nyhit yuq mâ é hká yuq é yhangmyi nghut râ lú? Hkâsu mù gâ le, yhang gi, haú nhiktâng wuî ban-shoq bâng é yhangmyi dut wú bê sù nghut ri." gâ akô.

<sup>29</sup> Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

<sup>30</sup> Haú dum dui toq é buinyi má gi, myi byi myi yù hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê.

<sup>31</sup> Shi é mai dum dui toq bang eq séng luî,

<sup>32</sup> Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'\* ga, nungmoq lé taî tô é lé, nungmoq a nghap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taî ri.

<sup>33</sup> Byù moq mó gi, dang haú wó gyo kôjáng, Yhang mhoqshít é hkyô lé maú byuq bum akô nghut ri.

### *Ahkyak Dik É Jep É Tarâ*

*Mrk 12:28-34; Luk 10:25-28*

<sup>34</sup> Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô.

<sup>35</sup> Yhangmoq má bo é tarâ sarâ rayuq gi, Yesuq lé chyam wú é dông,

<sup>36</sup> "Sarâ ê, jep é tarâ má, hká lhum gi, je ahkyak dik lhê lú?" ga myî ri.

<sup>37</sup> Haú mù, Yesuq gi, "'Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap râ lhê.'\* gâ é nghut lhê.

<sup>38</sup> Tarâ haú gi, je hí lhum eq je ahkyak dik é lhum nghut lhê.

<sup>39</sup> Hau htang lhum le haú eq du é nghut mù, 'Náng gûng lé nàng chyitdap é su, náng é chyangnâm mâ é

bang lé le chyitdap aq. <sup>☆</sup> gâ é nghut lhê.

<sup>40</sup> Tarâ haû í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taí kat ri.

### *Hkrisduq Gi, Ô Yuq É Yhangzo?*

*Mrk 12:35-37; Luk 20:41-44*

<sup>41</sup> Hparishe pé zup zîng to kô é hkûn, Yesuq gi, yhangmoq lé,

<sup>42</sup> "Nungmoq gi, Hkrisduq eq séng luí hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tú taí akô.

<sup>43</sup> Haû mù, Yhang gi, yhangmoq lé, "Haû hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gâ le, Dawiq taí é gi,

<sup>44</sup> 'Haû Yhumsîng Garai gi, ngá é Yhumsîng lé, "Ngò, náng é gum-lau gye pé lé, náng é hkyiwa ô má tô pyâm é hkyîng jé shoq, Ngá é loqyo hkyam shut zung nyi shi aq." ga taí ri. <sup>☆</sup>

gâ ri.

<sup>45</sup> Haû mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taí ri.

<sup>46</sup> Haû mù, ó yuq le, dang rahkun lháng a wó tú taí lo kô é nghut mù luí, haû nyí mai, ó yuq lháng Yhang lé dangmyi a wám myi lo kó nghut ri.

## 23

### *Tarâ Sará Pé Eq Hparishe Pé Lé Sidiq Râ Hkyô*

*Mrk 12:38-40; Luk 11:37-52; 20:45-47*

<sup>1</sup> Hau htâng, Yesuq gi, byù moq mó eq Yhâng é chángzô pé lé taí é má,

<sup>2</sup> "Tarâ sará pé eq Hparishe pé gi, Mosheq é tanghkuq má zung akô.

<sup>3</sup> Haû mù, yhangmoq mhoqshit é hkyô chângjup lé, nungmoq châng kut ra kó râ nghut lhê. Nghut kôlhâng, yhangmoq kut é dông gi, hkâkut kó;

hkâsu mù gâ le, yhangmoq gi, yhangmoq taí é dông a kut kó nghut ri.

<sup>4</sup> Yhangmoq gi, byu pé é goqsân má wòlai ke byi kôlhâng, yhangmoq yhang gi, wò haû pé lé bo waq râ matú, loqnyhui lháng a kâm lhoq túi kó nghut ri.

<sup>5</sup> Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyúbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri;

<sup>6</sup> yhangmoq gi, poî pé mâ é réng é jowò pé eq tarajong pé mâ é ahkyak dik é zûng jang pé má, myang zûng râ lé ô nau nyi akô;

<sup>7</sup> yhangmoq gi, gai pé má lhom shikyâm yù kó râ eq, byu pé mai, yhangmoq lé, 'Rabai' <sup>\*</sup> ga lhom wut kó râ lé ô nau nyi bum akô.

<sup>8</sup> Nungmoq kúm gi, 'Rabai' ga wut râ lé hkâ-ô nau kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê.

<sup>9</sup> Haû mù, myidàm htoq má, ó yuq lé le, 'âwa' hkâ-nghû kó; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê.

<sup>10</sup> Hau htoq agó, 'sará' ga wut râ lé, hkâ-ô nau kó; hkâsu mù gâ le, Hkrisduq za, nungmoq é Sará nghut lhê.

<sup>11</sup> Nungmoq mâ é je gyaú sù gi, nungmoq é dui-nhâng zoshâng dut râ nghut lhê.

<sup>12</sup> Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

<sup>13</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaû tô akô; nungmoq yhang le a wàng kó, wàng nau nyi bang lé le a wàng nhâng kó nghut ri.

<sup>☆</sup> 22:44 Hkya-on 110:1 \* 23:7 Aramaik dang dông *rabai* gâ é gi, sará gâ é lichyúm nghut lhê.

14 (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, chuimó pé é yhùm-yò pé lé hpyoq zo hpyoq shuq é eq kyû hîng hîng dúng shit mhaû é bang nghut akô; haû mù, dam byî é je myo hui zo kó râ nghut lhê.)†

15 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htúng má wó lhoq lhik yû râ matú, myî hkyô, wuî hkyô, châng jón wún kômù, wó lhoq lhik yu é sù lé gi, nungmoq su ngaraî byù í tú shuî dut akô nghut ri.

16 Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhùm lé lang luî dakam é sù gi, haî a ra; noqkuq yhùm mâ é hîng lé lang mù dakam é sù kúm gi, châng ra bê.' ga lhaq taî akô.

17 Myoqjit é byù nâ pé ê! Haû hîng eq hîng lé lhoq yúnglhô é noqkuq yhùm gi, hká lhum je ahkyak lhê lhú?

18 Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, châng ra bê.' ga le, lhaq taî akô nghut ri.

19 Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lhú?

20 Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang luî dakam é sù dut bê nghut ri.

21 Noqkuq yhùm lé lang luî dakam é sù gi, haû noqkuq yhùm eq haû má nyî é Sù lé lang luî dakam é sù dut bê nghut ri.

22 Hau htoq agó, mauhkûng lé lang luî dakam é sù gi, Garai Gasâng é tanghkuq eq haû má zung é Sù lé lang luî dakam é sù dut bê nghut ri.

23 Gegùn labyoq nghut é, tarâ sará

pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaî, hpakkyí pé mâ é xê gambùm ragambùm lé gi, byî nyî kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaî pyâm tô akô nghut ri. Hî lhum lé kut é su, htang lhum lé le kut râ lhê.

24 Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

25 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chî yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.

26 Hparishe myoqjit pé ê! Zo hkoq shuq góm é ahte lé hí chî yúng pyám keq, haû jáng, ahtoq le sâ-yúng râ nghut lhê.

27 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haû pé gi, ahtoq má wú yúng kôlhang, ahkaû má gi, mâng bup showui pé eq achaq achyut é chângjup byíng tô é nghut ri.

28 Haû eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

29 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón byi kôluî,

30 'Ngamoq gi, ngamoq é îchyí îwa pé é ipyat má nyî âng é ru nghut le gi, haû myiqhtoî pé é sui lhoq shun é bang má, ngamoq bo lôm râ a nghut.' ga lhaq taî akô.

31 Haû su mù, nungmoq gi, haû myiqhtoî pé lé sat pyám bâng é awut

† 23:14 Chyúmding ra-am má gi, bun zo 14 shî a bo é nghut lhê.

ashín pé nghut é hkyô lé, nungmoq gùng nungmoq saksé hkam yu nyi akô nghut ri.

<sup>32</sup> Haú mù, nungmoq é îchyí îwa pé hi tô é muzó lé, banshoq châng kut pán keq!

<sup>33</sup> Lhangmuì pé ê, duq htân lhangmuì amyú pé ê! Ngarai mîng é dam byi hkyô mai, hkâsu wó hpang lut kó rá lú?

<sup>34</sup> Hau é yanmai, myiqhtoî pé, hpaqchyí bò bang eq chyúm sará pé lé, Ngò, nungmoq chyáng nhang kat rá nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó rá nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó rá nghut lhê.

<sup>35</sup> Hau é yanmai, haú dingmán sù Abelaq é sui mai hí luí, noqkuq yhùm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidâm htoq má shun pyâm é dingmán bang banshoq é sui gi, nungmoq é ahtoq má jé lô rá nghut lhê.

<sup>36</sup> Ngò, nungmoq lé teng za tái kôlé, shí hkyô banshoq gi, ipyat shi é ahtoq má jé rá nghut lhê.

<sup>37</sup> Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsîng lhùng yu é su, nungzô pé lé, Ngò, hkâ-myhó dâm shuí tsîng yù nàu kôlhang, nàng a dóng nghut ri.

<sup>38</sup> Wú keq, nungmoq é yhùm gi, nungmoq é matú chamchyuiyui dut pyâm to berâ nghut lhê.

<sup>39</sup> Hkâsu mù gâ le, Ngò, nungmoq lé tái kôlé, 'Yhumsing é myîng mai jé lé lo é Sù gi, hkungsô wó nyî sháng gaq.'\* ga, nungmoq a tái tái gi, Ngo lé wó myâng kó rá a nghut lo." gâ ri.

## 24

*Ló Htâng Buinyì Má Dut Lò Râ Hkyô*

*Mrk 13:1-31; Luk 21:5-33*

<sup>1</sup> Yesuq gi, noqkuq yhùm mai htoq e lô é u lé, Yhâng é chângzô pé gi, Yhâng é nàm má huí lé lô kômù, haú noqkuq yhum é loqmú pé lé tûn shit akô.

<sup>2</sup> Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za tái kôlé, luqgok haú pé gi, rachâm htoq racham lhang a kê lhum loshoq, hpoyq hpyi pyâm é huí rá nghut lhê." ga tái ri.

<sup>3</sup> Yesuq gi, Tsanlun Bùm má zung tô é hkûn, haú chângzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò rá lú? Nàng gyó lé rá hkûn eq lô htâng buinyì má, hkâsù é kumlhá htoq lô rá nghut lhê lú? Ngamoq lé tái kyô wú laq." ga, Yhang lé myî akô.

<sup>4</sup> Haú hkûn, Yesuq, yhangmoq lé tû tái é gi, "Nungmoq lé, ó yuq eq le a wó shuí nghoq sháng gaq, sidiq nyi keq.

<sup>5</sup> Hkâsu mù gâ le, 'Ngò gi, haú Hkrisduq nghut lhê.' ga, Ngá myîng lé llang é byù myo myo pô htoq lô mù, byù myo myo lé hkyô shuí nghoq kó rá nghut lhê.

<sup>6</sup> Nungmoq gi, majan dut nyi é hkyô eq majan eq sêng é danglám pé lé, wó gyo kó rá nghut lhê; nghut kôlhang, hkâgyuq dàn kó. Haú hkyô pé gi, dut lò rá za nghut lhê; nghut kôlhang, lô htâng é buinyì gi, a nghut shi.

<sup>7</sup> Byù ra-myû eq ra-myû, mingdán ralhum eq ralhum majan zân lhùm lò kó rá nghut lhê. Jowò myo myo má, mutmó gyó é pé eq layàng nún é pé dut lò rá nghut lhê.

<sup>8</sup> Haú pé gi, wúhke jamjau hkyo é apûn awang za ru nghut ashî.\*

<sup>9</sup> Haú hkûn, nungmoq gi, zing-rî é eq sat pyâm é huí zo rá matú, ap pyâm é huí kó rá nghut lhê. Byù myû lhunglhang bang gi, Ngá é yanmai, nungmoq lé a nguì kut kó rá nghut lhê.

<sup>10</sup> Haú u lé, byù myo myo gi, lumjǐng myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó rà nghut lhê.

<sup>11</sup> Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó rà nghut lhê.

<sup>12</sup> Agè ashop é hkyô myô jat lo é yanmai, byù myo myô é chyitdap myit gi, kân ló byuq rà nghut lhê;

<sup>13</sup> nghut kôlhang, jiltôm jé shoq wó hkam jân nyi é sù gi, hkyi yu é hui rà nghut lhê.

<sup>14</sup> Byù myô banshoq má saksé dut rà matú, haú mingdán eq sêng é gabú danglù lé, mingkan gón má hko kyo rà nghut lhê. Hau htâng má sheq, ló htum buinyi jé rà nghut lhê.

<sup>15</sup> Haú mù luí, myiqhtoi Danielaq dông mai taí tô é eq rajung za, 'haú lhoq hten lhoq hpyoq é achag achyut hkyô<sup>☆</sup> gi, chyoiyúng jowò má shap tô é lé, nungmoq myàng kó rà nghut lhê. (Chyúmlaika nghap sù gi, sê gyo sháng gaq).

<sup>16</sup> Haú hkûn, Yuda mau má nyi é bang gi, bùm pé shut hfang doq ló kó sháng gaq.

<sup>17</sup> Yhumhkûng htoq má nyi tô é sù gi, yhúmkaú mâ é zè haí lé le, a ló gyó wang yù lo sháng gaq.

<sup>18</sup> Yò má nyi tô é sù gi, yhâng é buhîng lé a ló taú yu nyi lo sháng gaq.

<sup>19</sup> Haú buinyi pé má, zogûng dut é myiwe eq naú huq ashî nghut é înu wui gi, gyai yhang wuîhke jamjau kó rà nghut lhê.

<sup>20</sup> Haú nungmoq hpâng rà buinyi gi, gyoqmyò,\* a nghut jáng, Bánno buinyi má a ang rà matú, kyûdûng nyi keq.

<sup>21</sup> Hkâsu mù gâ le, mingkan lé joq é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haú buinyi pé má dut lò rà nghut lhê; haú sù é hkyô gi, htângnùng má hkâ-nhám le dum dut lo rà a nghut.

<sup>22</sup> Buinyi haú pé lé lhoq shaú pyâm

é za a nghut le gi, ó yuq le asak wó lut rà a nghut; nghut kôlhang, Garai Gasang èq hkyin yù hui bâng é matú gi, buinyi haú pé lé, lhoq shaú pyâm byi rà nghut lhê.

<sup>23</sup> Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjǐng kó.

<sup>24</sup> Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá mó pé eq laklaí kumlhá pé lé kut shit kó rà nghut lhê.

<sup>25</sup> Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

<sup>26</sup> Haú mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaú má lúng tô ri.' ga jáng le, hkâjǐng kó.

<sup>27</sup> Hkâsu mù gâ le, bui htoq hkyam má lhap hpyat é gi, bui wang hkyam má lháng jé shoq duqbó é su, haú Byu Yhangzo jé lé é hkûn le, dut rà nghut lhê.

<sup>28</sup> Màng leq é jang má, langdâ pé, lé zǐng bùm rà nghut lhê.

<sup>29</sup> Buinyi haú pé má é wuîhke jamjau lai eq yhang,

'Bui gi, noq byuq mù, lhamó gi, a tsò dut byuq rà nghut lhê;

kyi pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huí bùm kó rà nghut lhê.<sup>☆</sup>

<sup>30</sup> Haú hkûn, haú Byu Yhangzô é kumlhá gi, mauhkûng má htoq shit lô rà nghut mù, myidàm htoq mâ é byù myú lhunglháng gi, yón ngau bùm kó rà nghut lhê. Haú Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó rà nghut lhê.

<sup>31</sup> Hau htâng má, Yhang gi, Yhâng é maumang lagyô pé lé, tut htê mó èq

☆ 24:15 Dan 9:27; 11:31; 12:11 \* 24:20 Israelaq mau má gi, gyoqmyò lé hkyô htoq le gyai wuîhke é ahkyíng nghut lhê. ☆ 24:29 Esai 13:10; 34:4



nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuí tsîng yù kó râ nghut lhê.

<sup>32</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê.

<sup>33</sup> Haû eq rajung za, shí hkyô banshoq† lé, nungmoq myàng kôjáng, Yhang gi, chyâng bê nghut mù, hkúmdong má lháng nghut nyî bê hkyô lé, nungmoq sé lo keq.

<sup>34</sup> Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé‡ banshoq dut byuq râ nghut lhê.

<sup>35</sup> Mauhkûng eq myigùng gi, a joq lo dut byuq râ nghut lhê; nghut kôlháng, Ngá é dang gi, ru joq nyî râ nghut lhê.

*Haû Buinyî Eq Ahkyíng Lé, Ó Le A Sé  
Mrk 13:32-37; Luk 17:26-30, 34-36;  
12:35-48*

<sup>36</sup> Buinyî eq ahkyíng haû lé gi, ó yuq le a sé; mauhkûng htoq mâ é maumang lagyô pé lháng a sé; haû Zo le a sé; haû Íwa za ru sê lhê.

<sup>37</sup> Noaq é tsîn pyat má dut é su, haû Byu Yhangzo lé lo é hkûn le, dut râ nghut lhê.

<sup>38</sup> Hkâsu mù gâ le, dowuî a dîng shí é buinyî pé má, byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri;

<sup>39</sup> yhangmoq gi, dowuî dîng lô mù, yhangmoq banshoq lé ûm sat pyâm é hkûn jé shoq, haî dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê.

<sup>40</sup> Haû hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê.

<sup>41</sup> Luqluí chôm láng nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

<sup>42</sup> Haû su mù, haû nungmoq é Yhumsîng gi, hká nyî jé lé lô râ lé, nungmoq a sê kô é yanmai, sidiq machya nyi keq.

<sup>43</sup> Myín hká u má hkau sù jé lé lò râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq.

<sup>44</sup> Haû mù, nungmoq le rì rì nghut nyî keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

<sup>45</sup> Yhumsîng hpô é dui-nhâng zoshâng wuî lé, uphkâng râ eq ahkyíng jé jáng zoshuq gàm byi râ matú, yhumsîng hpô eq mù nhang tô é, lhumzui luî, hpaqchyî bo é dui-nhâng zoshâng gi, ó yuq nghut râ lúh?

<sup>46</sup> Yhumsîng hpó dum taû lo é hkûn, haû su kut nyî láng é dui-nhâng zoshâng gi, hkungsô wó nyi ri.

<sup>47</sup> Ngò, nungmoq lé teng za taí kôlé, yhumsîng hpó haû gi, yhâng é sutzé banshoq, dui-nhâng zoshâng haû yuq lé ap to râ nghut lhê.

<sup>48</sup> Nghut kôlháng, laqma mù, dui-nhâng zoshâng haû yuq gi, agè ashop sù nghut luî, 'Ngá é yhumsîng hpó jé lô râ gyai myáng ashí.' ga, yhâng é i-myit unghkaû má myit yù mù,

<sup>49</sup> gotû dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi,

<sup>50</sup> dui-nhâng zoshâng hau é yhumsîng hpó gi, yhang a myitngam tô é buinyî eq yhang a sê tô é ahkyíng má jé lô mù,

<sup>51</sup> yhang lé jap pyám luî, gegùn labyoq kut bang hkâm zô é, ngaubyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

## 25

*Zomyi Raxê Yuq Lé Dangtú Yu É  
Hkyô*

† 24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lhê. ‡ 24:34 Haû hkyô pé gâ é gi, Yerusalem noqkuq yhûm htên byoq râ lé taí é nghut lhê.

<sup>1</sup> Haú hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê.

<sup>2</sup> Haú bang má, ngo yuq gi, nhik a gyîng kó; ngo yuq gi, nhik gyîng akô nghut ri.

<sup>3</sup> Haú nhik a gyîng é bang gi, myibung yu chûng kôlhang, xû a yu chûng kó nghut ri.

<sup>4</sup> Nghut kôlhang, haú nhik gyîng é bang kúm gi, yhangmoq é myibung lé le, xû bo é bòng lé le yu chung akô nghut ri.

<sup>5</sup> Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

<sup>6</sup> Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garú é htê htoq lo ri.

<sup>7</sup> Haú hkûn, zomyi haú bang banshoq gi, toq lô mù, yhangmoq é myibung lé hen lajâng akô nghut ri.

<sup>8</sup> Haú nhik a gyîng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi lô nyi ri.' ga, haú nhik gyîng bâng chyáng dúng akô.

<sup>9</sup> Haú hkûn, haú nhik gyîng bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xû ung bâng chyáng é wui yù keq.' ga tû taí kat akô.

<sup>10</sup> Yhangmoq, xû wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poi má wang ló bekô. Hkum le myhî byuq bê nghut ri.

<sup>11</sup> Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

<sup>12</sup> Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

<sup>13</sup> Haú mù luí, haú Byu Yhangzo jé lé râ buinyi eq ahkýing lé, nungmoq a sé kô é yanmai, sidiq machya nyi keq.

*Dui-nhâng Zoshâng Sum Yuq Lé,  
Dangtú Yu É Hkyô  
Luk 19:11-27*

<sup>14</sup> Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashî nghut ri.

<sup>15</sup> Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byi to mù, byìn we shut htoq ló byuq bê nghut ri.

<sup>16</sup> Ngùn ngo jói wó yù sù gi, haú hkûn jáng htoq ló mù, hpugá gá luí, ngùn ngo jói wó myat yù bê nghut ri.

<sup>17</sup> Haú eq rajung za, ngùn í jói wó yù sù le, í jói wó myat yù bê nghut ri.

<sup>18</sup> Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.

<sup>19</sup> Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taú jé lô mù, yhangmoq é ngùn chyârâng lé, lo jep ri.

<sup>20</sup> Ngùn ngo jói wó yù sù gi, amyat ngo jói lé le yu lé lô mù, 'Yhumsîng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taí ri.

<sup>21</sup> Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taí ri.

<sup>22</sup> Haú eq rajung za, í jói wó yù sù le, lé lô mù, 'Yhumsîng ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taí ri.

<sup>23</sup> Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taí ri.

<sup>24</sup> Hau htâng, rajoí wó yù sù le, lé lô mù, 'Yhumsîng ê, nàng gi, byù wui

nghut mù, yhumsîng a hô tô é jang mâ é shû yù nau é htoq agó, yhumsîng, kyôshi a sân hkyô tô é jang mâ é tsîng yù nau sù nghut é lé, ngò sê lhê.

<sup>25</sup> Haû mù, ngò gi, gyuq luî, htoq ê mù, náng é ngùn lé, myigùng má ê haq myhup tô é nghut lhê. Wú aq, shî gi, nàng é ngùn nghut lhê.' ga taî ri.

<sup>26</sup> Haû mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shû yù nau é eq, yhumsîng, kyôshi a sân hkyô tô é jang mâ é tsîng yù nau sù nghut é lé, nàng sê to gù nghut le nhîng,

<sup>27</sup> ngá é ngùn lé, ngò dum taû jé lô jáng, aráng eq amyat wó yû shoq, ngùn hpún kat jang má, haî mù a kat tô é lhú?

<sup>28</sup> Haû mù, haû ngùn rajoí lé, náng chyáng mai yù luî, raxê joí wó to sù lé, byî pyám nhâng râ nghut lhê.

<sup>29</sup> Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lháng yu pyám byi shirâ nghut lhê.

<sup>30</sup> Haû mù, haû akyû a bo é dui-nhâng zoshâng lé gi, ngaubyi ngaù nhap eq zuì kyik kyik shoq hpuzô nyî râ jowò nghut é, shinggan mauchut hkaû má dú htoq pyám keq.' gâ ri.

### *Sau Eq Bainám*

<sup>31</sup> Haû Byu Yhangzo gi, Yhâng é hpungwup shingkang mai, mau-mang lagyo lhunglhâng bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê.

<sup>32</sup> Haû hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê.

<sup>33</sup> Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi tô râ nghut lhê.

<sup>34</sup> Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân

jeju hkam yu é hui bang ê, lé keq; mingkan lé hpan é hkûn mai, nung-moq é matú ga hen lajâng tô é mùi mingdán má wang ló keq.

<sup>35</sup> Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuîshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

<sup>36</sup> Ngò gùngchîn dut é u lé, nung-moq, Ngo lé byi hut kô é nghut lhê; Ngò nòhpyo huî é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taî râ nghut lhê.

<sup>37</sup> Haû hkûn, haû dingmán bang gi, Yhang lé, 'Yhumsîng ê, Nàng zòmut huî é lé, ngamoq, hkâ-nhám myàng luî, byi tsô wú é lhú? Nàng wuîshit é lé, ngamoq, hkâ-nhám myàng luî, byi huq wú é lhú?

<sup>38</sup> Nàng bíng kut wún é lé, ngamoq, hkâ-nhám myàng luî, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú?

<sup>39</sup> Nàng nòhpyo huî é lé le, htóng lúng é lé le, ngamoq, hkâ-nhám myàng luî, lé gon lé kúm wú é lhú?' ga myi kó râ nghut lhê.

<sup>40</sup> Haû hkûn, haû hkohkâm gi, 'Ngò, nungmoq lé teng za taî kôlé, shî, Ngá gumang wuî mâ é je tiq sù lé, nung-moq kut byî é hkyô haî le, Ngo lé kut byî é nghut bê.' ga tû taî râ nghut lhê.

<sup>41</sup> Hau htâng má, Yhang gi, Yhâng é loqpaî hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq.

<sup>42</sup> Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuîshit é u lé, nungmoq, Ngo lé a byi huq kó;

<sup>43</sup> Ngò bíng kut wún é u lé, nung-moq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huî é eq htóng lúng é u lé, nungmoq,

Ngo lé a gon kó nghut ri.' ga tái rã nghut lhê.

<sup>44</sup> Haú hkûn, yhangmoq gi, 'Yhumsing ê, nãng zòmút wuìshit é, bíng kut wún é, gùngchín dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lhú?' ga tái myi kó rã nghut lhê.

<sup>45</sup> Haú hkûn, Yhang gi, 'Ngò, nungmoq lé teng za tái kôlé, shí bang má é je tíq sũ lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tái rã nghut lhê.

<sup>46</sup> Haú mù luí, haú bang gi, ahtum abyuq mara dam byí é má wang ló kó rã nghut lhê; haú dingmán bang kúm gi, ahtum abyuq é asak má wang ló kó rã nghut lhê." ga Yesuq tái ri.

## 26

*Yesuq Lé, Sat Rã Da Kô É Hkyô*

*Mrk 14:1-2; Luk 22:1-2; Yhn 11:45-*

53

<sup>1</sup> Yesuq gi, haú hkyô pé lé ban tái é htâng má, Yhâng é chángzô pé lé,

<sup>2</sup> "Nungmoq sê tô é eq rajung za, í nyí lai é htâng má, Lhoqlhai Poí jé rã nghut mù, haú Byu Yhangzo gi, tapzîng má jén sat é hui rã matú, ap pyâm é hui rã nghut lhê." ga tái ri.

<sup>3</sup> Haú u lé, hkyangjong agyi pé eq suwún wuì gi, Kayahpaq gâ é hkyangjong mó rayuq é yhumwàng má zup zîng to kômù,

<sup>4</sup> Yesuq lé haq chyup yû rã eq sat pyám rã hkyô lé, hpyê lhùm bum akò nghut ri.

<sup>5</sup> Nghut kôlhang, yhangmoq gi, "Byu pé gabyông lò kó abe, poí gyoro má gi, a kut shí sháng." ga, tái lhùm akò nghut ri.

*Yesuq, Xũ Hut Gyun Huí É Hkyô*

*Mrk 14:3-9; Yhn 12:1-8*

<sup>6</sup> Yesuq gi, Behtani wà má nyi é manggâm dap wú sũ Simûn é yhùm má nyi tô é hkûn,

<sup>7</sup> myiwe myhí rayuq gi, gyai hpaû é namngón xũ bo é luq hpyû bông yu lé lô mù, Yesuq zo shuq nyi é hkûn, namngón xũ haú lé, Yhâng é ulhum má hut gyun byí ri.

<sup>8</sup> Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lhú?"

<sup>9</sup> Xũ haú lé, ahpau myo myô eq ûng pyám mù, myùng bang lé byí le ge lhê mhaí!" ga tái kat akò.

<sup>10</sup> Yesuq gi, haú hkyô lé sé luí, "Haí mù, myiwe zo haú lé, i-myt lhoq myô nyi akò lhú? Yhang gi, Ngá é ahtoq má ge é hkyô kut bê nghut ri.

<sup>11</sup> Haú myùng bang gi, nungmoq eq rahá hkâ-nhám le nyi rã nghut lhê; nghut kôlhang, Ngò gi, nungmoq eq rahá ayang nyi nyi rã sũ a nghut.

<sup>12</sup> Yhang, Ngá gûng má namngón xũ hut gyûn é gi, Ngá gûng lé yhum rã matú, hen lajâng é hkyô nghut ri.

<sup>13</sup> Ngò, nungmoq lé teng za tái kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, tái kyo bekò rã nghut lhê." ga tái kyo ri.

*Yesuq Lé, Yudaq Êq Ung Zô Pyâm É Hkyô*

*Mrk 14:10-11; Luk 22:3-6*

<sup>14</sup> Hau htâng, haú chángzo raxe í yuq má bo é Yudaq Iskarut ga sũ gi, hkyangjong agyi pê chyáng ê mù,

<sup>15</sup> "Ngò, Yesuq lé nungmoq é loq má ap byí é nghut jáng, nungmoq, ngo lé haí byi kó rã lhú?" ga myí ri. Haú mù, yhangmoq gi, yhang lé ngùn denggá sum xê chap nghap byí akò.

<sup>16</sup> Haú hkûn mai, Yudaq gi, Yesuq lé ap pyám rã hkyô ho nyi bê nghut ri.

*Yhumsing É Myinzang*

*Mrk 14:12-26; Luk 22:7-23; Yhn 13:21-30*

<sup>17</sup> Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, "Nãng zo rã Lhoqlhai Poí zoshuq lé, ngamoq hkâmá món to rã lhú?" ga myí akò.

<sup>18</sup> Haú mù, Yhang gi, "Myuq hkaû shut wang ló mù, byù rayuq chyáng é luí, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhùm má Lhoqlhai Poí kut rã

nghut lhê.' gâ Sará taî ri nghû, ê taî keq." ga pying kat ri.

<sup>19</sup> Haû mù, haû chángzô pé gi, Yesuq pying kat é eq rajung za ê taî kômù, Lhoqlhai Poî lé món to bekô nghut ri.

<sup>20</sup> Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri.

<sup>21</sup> Yhangmoq zô nyi bùm kô é u lé, Yesuq gi, "Ngò, nungmoq lé teng za taî kôlé, nungmoq mâ é rayuq sù gi, Ngo lé ap pyám râ nghut lhê." ga taî ri.

<sup>22</sup> Haú hkûn, yhangmoq gi, gyai gyô yón kômù, rayuq htâng rayuq, "Yhumsîng ê, ngò a nghut hkaî?" ga, Yhang lé chôm myî akô.

<sup>23</sup> Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê.

<sup>24</sup> Haú Byu Yhangzo gi, Yhang eq séng luî kâ tô é eq rajung za, shí râ za nghut lhê. Nghut kôlhang, haû Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri." ga dum taî kat ri.

<sup>25</sup> Hau htâng, Yhang lé ap pyám râ sù, Yudaq gi, "Rabai ê, ngò a nghut hkaî?" ga myî jáng, Yesuq gi, "Nàng nghut ri." ga tû taî kat ri.

<sup>26</sup> Yhangmoq zô nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taî uchyang, Yhâng é chángzô pé lé gâm byî ri.

<sup>27</sup> Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taî é gi, "Nungmoq banshoq bang, shuq keq.

<sup>28</sup> Shî gi, yubak mara hkyut pyám byi râ, byù myo myô é matú htoq pyám é, dangshikaq eq sêng é Ngá sui nghut lhê.

<sup>29</sup> Ngò, nungmoq lé taî kôlé, ahkuî mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyî a jé jé, tsibiyiq wing lé dum shuq râ a nghut lo." ga taî ri.

<sup>30</sup> Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e lô bekô nghut ri.

*Petruq He-ngik Râ Lé, Te Taî É Hkyô*

*Mrk 14:27-31; Luk 22:31-34; Yhn 13:36-38*

<sup>31</sup> Hau htâng má, Yesuq gi, yhangmoq lé, "Nungmoq lhunglhang bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyám é hui kó râ nghut lhê.'<sup>✧</sup>

ga kâ tô ri.

<sup>32</sup> Nghut kôlhang, Ngò gi, lhoq dui toq é huî htâng má, Galile mau shut, nungmoq é hí má e lô lánng râ nghut lhê." gâ ri.

<sup>33</sup> Haú hkûn, Petruq gi, "Náng é yanmai, góbang banshoq myit lingbat kôlhang, ngò gi, hkâ-nhám le myit lingbat râ a nghut." ga tû taî ri.

<sup>34</sup> Yesuq gi, "Ngò, nang lé teng za taî lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tû taî ri.

<sup>35</sup> Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga saî taî ri. Haû chángzô pé góbang banshoq le, haû su ga châng taî bum akô nghut ri.

*Get-samane Gâ É Jowò Má Kyûdûng É Hkyô*

*Mrk 14:32-42; Luk 22:39-46*

<sup>36</sup> Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zúng lánng keq." ga taî ri.

<sup>37</sup> Yesuq gi, Petruq eq Zebedi yhangzô nhik lé shuí chúng ri. Yhang gi, myit gyai a ngón é eq myit wui nhik hkyik dut lò bê nghut ri.

<sup>38</sup> Hau htâng, Yhang gi, yhangmoq lé, "Ngò gi, shí râ í yhang myit yón nyi

✧ 26:31 Zhk 13:7

ri; nungmoq gi, Ngò su machyâ luí, shí má láng nyí keq." ga taí ri.

<sup>39</sup> Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm\* shí lé, Ngá chyáng mai lhaí pyám byi laq. Nghut kôlhang, Ngò ô nau é đông a nghut, Nang ô nau é đông sheq nghut sháng gaq." ga kyûdùng ri.

<sup>40</sup> Hau htâng, Yhang gi, Yhâng é chángzô pê chyáng dum taú lo le, yhangmoq yhup myhí to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lháng, Ngò eq rahá a wó machya nyí kó lú?"

<sup>41</sup> Gunglaú é a hui sháng gaq, machyâ luí, kyûdùng nyí keq. Haú woi-nyí gi, kâm nyí kôlhang, gungsho gi, wum nyhôm nyi ri." ga taí ri.

<sup>42</sup> Yhang gi, radàm dum ê mù, "Áwa ê, góm shí lé, Ngò a shuq é a wó lai rá nghut jáng gi, Nang ô nau é đông nghut sháng gaq hkoi." ga kyû dum dùng ri.

<sup>43</sup> Yhang dum taú lo le, yhangmoq gi, myoqkuq lai kô é yanmai, yhup myhí to láng kô é lé, lo dum myàng ri.

<sup>44</sup> Haú mù, Yhang gi, yhangmoq lé tô pyám to mù, sum dâm nghú rá dâm dum ê luí, hí lé dùng é dang lé roq é dum dùng ri.

<sup>45</sup> Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyám é hui rá nghut bê.

<sup>46</sup> Toq keq! Ló losháng hkoi! Ngo lé ap pyám rá sù gi, jé lé bê nghut ri." ga taí ri.

*Yesuq, Chyup Yú Huí É Hkyô*  
*Mrk 14:43-50; Luk 22:47-53; Yhn 18:3-12*

<sup>47</sup> Yesuq, dáng nyo nyi ashí u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai

nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô.

<sup>48</sup> Yesuq lé ap pyám rá sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yú keq." ga kumhá byí tô ri.

<sup>49</sup> Yudaq gi, Yesuq chyáng hkyê za ê mù, "Rabai ê, wángzán nyi lhê lú?" ga taí luí, Yhang lé bopuq puq byí ri.

<sup>50</sup> Haú hkùn, Yesuq gi, "Buinùm hpó ê, nang kut rá muzó lé kut aq hkoi." ga tú taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yú bekô nghut ri.

<sup>51</sup> Haú mù, Yesuq eq rahá nyi bang mâ é rayuq gi, shâm she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>52</sup> Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shí rá nghut lhê.

<sup>53</sup> Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rá nghut é lé, nungmoq a sé kó lú?

<sup>54</sup> Nghut kôlhang, haú su nghut é nghut jáng, shí hkyô dut lò rá nghut lhê ga Chyúmdang pé má bò tô é hkyô gi, hkâsu wó dik lò rá lú?" ga taí kat ri.

<sup>55</sup> Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rá matú, shâm eq dumbáng pé chùng mù, lé lo akô lú? Ngò gi, nyí wui, noqkuq yhùm má zùng mù, mhogshit nyí kôlhang, nungmoq, Ngo lé a chyup yú kô é nghut lhê.

<sup>56</sup> Nghut kôlhang, shí su dut é hkyô pé banshoq gi, haú myiqhtoí pé kê tô é hkyô pé lo dik rá matú dut é nghut ri." ga taí ri. Haú hkùn, haú chángzô pé banshoq gi, Yesuq lé tô pyám to kôluí, hpang byo byuq bekô nghut ri.

\* 26:39 Góm gâ é gi, Yesuq, jamjau hui rá hkyô eq shí rá hkyô lé, taí nau é nghut lhê.

*Yudaq Byìn Tú Wapdoq Má Jep Huì É Hkyô*

*Mrk 14:53-65; Luk 22:54-55, 63-71; Yhn 18:13-14, 19-24*

<sup>57</sup> Yesuq lé chyup yu é bang gi, haû tarâ sará pé eq suwún wuì zup zîng nyi é jang, hkyangjong mó Kayahpaq é yhûm má, Yhang lé shuí e akô.

<sup>58</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luí, wâng hkaû má wang ê mù, zúng bang eq rahá zung tô ri.

<sup>59</sup> Haû hkyangjong agyi pé eq Yudaq byìn tú wapdoq mâ é góbang gi, Yesuq lé sat pyâm nhâng râ matú, a têng é saksé ho nyi akô.

<sup>60</sup> A têng é saksé myo myo htoq lô kôlhang, wó sat râ î é saksé a myàng kó nghut ri.

Ló htáng má, byù í yuq gi, lé lô kômù,

<sup>61</sup> "Shí yuq gi, 'Ngò gi, haû Garai Gasâng é noqkuq yhûm lé lhoq hten pyâm mù, sum nyi gyoro má dum wó saí lhê,' ga taí sù nghut ri." ga taí akô.

<sup>62</sup> Haú hkûn, haû hkyangjong mó gi, toq yap mù, "Nàng, haí le a tú taí luq? Shí bang, Nang lé mara hun nyi é saksé gi, hká dông nghut lhê lú?" ga, Yesuq lé myí ri.

<sup>63</sup> Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, "Haû rú dui nyi é Garai Gasâng é myìng lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng,

<sup>64</sup> Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haû Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhê." ga taí ri.

<sup>65</sup> Haú hkûn, hkyangjong mó gi, yhang é bu lé lêng cheq pyâm mù, "Yhang gi, Garai Gasâng lé rhoí dang

taí bê nghut ri! Nga-nhúng, hai saksé râ ashí lú? Yhang, Garai Gasâng lé rhoí dang taí é lé, nungmoq, ahkuí wó gyo bekô nghut lhê.

<sup>66</sup> Nungmoq hkâsu wó myit akô lú?" ga myi jáng, yhangmoq gi, "Yhang gi, shí gíng sù nghut lhê." ga tú taí akô nghut ri.

<sup>67</sup> Hau htâng má, yhangmoq gi, Yesuq é myoqdong má sôkan byé gyun luí, loqtsup eq htui byí akô nghut ri. Góbang gi, Yhang lé bo-pyuq pyuq byi luí,

<sup>68</sup> "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

*Yesuq Lé, Petruq He-ngik Pyâm É Hkyô*

*Mrk 14:66-72; Luk 22:56-62; Yhn 18:15-18, 25-27*

<sup>69</sup> Petruq gi, wâng hkaû má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haû Galile byù Yesuq eq rahá nyi sù nghut ri." ga taí ri.

<sup>70</sup> Nghut kôlhang, Petruq gi, haú bang banshoq é hí má yhang, "Nàng haí taí nyi é lé, ngò a sé." ga he kat ri.

<sup>71</sup> Hau htâng, yhang gi, wâng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haú mâ é bang lé taí kat ri.

<sup>72</sup> Haú hkûn, yhang gi, "Byù haú yuq lé, ngò a sé!" ga dakam é dông he pyâm ri.

<sup>73</sup> Hau htâng razup zo má, haú jowò má yap to bang gi, Petruq chyáng huì ê kômù, "Nàng le, haú bang má bò sù yhang nghut ri; náng é danghtê lé sê gyô ri." ga taí akô.

<sup>74</sup> Haú hkûn, yhang gi, yhanggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tân bê nghut ri.

<sup>75</sup> Haú mù, Petruq gi, "Woq a tân shi má, nàng, Ngo lé sum dâm he pyâm râ nghut lhê." ga, Yesuq, yhang lé taí

é dang lé, myit bûn kat mù, shinggan shut htoq ê luî, gyai yhang ê ngau ri.

## 27

*Yudaq Juîshi É Hkyô*

*Mrk 15:1; Luk 23:1-2; Yhn 18:28-32*

<sup>1</sup> Napsûn noq le, hkyangjong agyi pé banshoq bang eq mingbyu é suwún wuî gi, Yesuq lé sat pyám nhâng râ matú chôm myit hpyit yû bekô nghut ri.

<sup>2</sup> Haû mù, yhangmoq gi, Yhang lé tuî yù luî, shuî htoq ê kômù, mauzau Pilat chyáng ê ap byî akô nghut ri.

<sup>3</sup> Yesuq lé ap pyâm é sù Yudaq gi, Yesuq lé jéyáng doqdân é hkyô lé myang sé jáng, nungngham wó mù, haû ngùn sum xê chap lé, hkyangjong agyi pé eq suwún wui chyáng ló dum taû byî ri.

<sup>4</sup> Haû mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haû hkyô, ngamoq eq haî sêng lhê lú? Haû gi, nàng eq sheq ru sêng lhê." ga lhom taí kat akô nghut ri.

<sup>5</sup> Haû mù, Yudaq gi, ngùn haû lé, noqkuq yhúmhaû má dú pyâm to luî, htoq ló mù, yhang gûng yhang ê juîshi byuq bê nghut ri.

<sup>6</sup> Haû hkyangjong agyi pé gi, ngùn chap haû pé kui yù luî, "Shî gi, sui hpau ngùn nghut lhê yanmai, alu sidek má a ge kat." ga taí akô.

<sup>7</sup> Haû mù, yhangmoq gi, tûngbaù pé é lupdùng kut râ matú, au saí zo su é maumyî lé, ngùn hau èq wui hpyit yû râ dông, chôm myit hpyit to bekô nghut ri.

<sup>8</sup> Hau é yanmai, ahkuî jé shoq, haû jowò lé, sui myigùng ga myhîng tô akô nghut ri.

<sup>9</sup> Haû gi, "Haû Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsîng Garai, ngo lé pying tô é eq rajung za,

<sup>10</sup> haû au saí zo su é maumyî lé, yhangmoq wui yù bekô nghut ri." ga

myiqhtoi Yeremiaq taí tô é dang lo dik é nghut ri.

*Yesuq Lé, Pilat Myî Jep Wú É Hkyô*

*Mrk 15:2-15; Luk 23:3-5, 13-26; Yhn 18:33-19:16*

<sup>11</sup> Haû u lé, Yesuq gi, mauzau hpô é hí má yap tô é nghut mù, haû mauzau hpô gi, Yhang lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tú taí ri.

<sup>12</sup> Haû hkyangjong agyi pé eq suwún wuî gi, Yhang lé, mara hùn kôjáng, Yhang gi, haî le a tú taí nghut ri.

<sup>13</sup> Haû hkûn, Pilat gi, Yhang lé, "Yhangmoq, Nang lé mara hùn saksé haû-í hkâm nyi kô é lé, Nàng a wó gyo lú?" ga saí myî ri.

<sup>14</sup> Nghut kôlhang, Yesuq gi, dang rahkun lhang a tú taí é yanmai, haû mauzau hpô gi, gyai maú byuq bê nghut ri.

<sup>15</sup> Haû Lhoqlhai Poî u lé, mingbyû wui ô nau é má cháng luî, haû mauzau hpô gi, htóng byû rayuq yuq lé nhâng byî é htung joq ri.

<sup>16</sup> Haû u lé, a gè mying htoq é htóng byû, Barabaq ga sù rayuq nyi ri.

<sup>17</sup> Haû mù, byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haû a nghut jáng, Hkrisduq gâ é Yesuq lé luq?" ga myî ri.

<sup>18</sup> Yhang haû su ga myî é gi, yhangmoq, Yesuq lé manôn kôluî, yhang chyáng lé ap byi kô é hkyô lé sê é yanmai nghut ri.

<sup>19</sup> Pilat gi, tarâ jéyáng tingnyâng htoq má zung tô ashî hkûn, yhangmyi gi, "Haû mara a bò Sù lé, haî le hkâkut; hkâsu mù gâ le, hkû-nyî za lhang, yhupmoq má, haû yuq é yanmai, ngò tsómra hpuzô pyám bê nghut lhê." ga, yhang chyáng dang pying kat ri.

<sup>20</sup> Nghut kôlhang, haû hkyangjong agyi pé eq suwún wuî gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.



21 Haû mauzau hpó gi, "Shí í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tú taí akô nghut ri.

22 Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myi kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tú taí akô nghut ri.

23 Nghut kôlhang, yhang gi, "Haí mù luí lhú? Yhang gi, hai mara kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garú lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yù mù, shiwa byu pé hí má loq chi luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

25 Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshù pé htoq má joq nyi sháng gaq." ga, dum tú taí kat akô nghut ri.

26 Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

### *Yesuq Lé, Gyezô Pé Rhoi É Hkyô*

*Mrk 15:16-21; Yhn 19:2-3*

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang lô kômù, Yhâng é lhîngkyuq má, gyedap gón lé ji tsîng tô akô.

28 Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù,

29 zujanmaú ralhûm saí yù kôluí, Yhâng é ulhum má tsung byi akô nghut ri. Yhangmoq gi, jâm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpó ê! Chyung hîng xê hîng nyi sháng gaq ô!" ga, jihpoi dang taí akô.

30 Yhangmoq gi, Yhang lé sôkan byé gyun luí, Yhâng é loq mai jâm-yang lú yù mù, Yhâng é ulhum má dum bat bat kut akô nghut ri.

31 Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e lô bekô nghut ri.

### *Yesuq Lé Jén Pyám É Hkyô*

*Mrk 15:22-32; Luk 23:27-43; Yhn 19:17-27*

32 Yhangmoq htoq e lô nyi le, Kuru ni myuq byù nghut é Simun ga sù lé myàng kômù, yhang lé, zik luí tapzîng waq nhang akô nghut ri.

33 Yhangmoq gi, Golgahta gâ é jowò má jé e lô bekô nghut ri. Golgahta gâ é lichyúm gi, ugyap joq é jowò lé gâ é nghut lhê.

34 Haú má jé jáng, yhangmoq gi, Yesuq lé, hkô jung eq nyhô tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyám ri.

35 Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyám byi akô.

36 Hau htâng, yhangmoq gi, haú jowò má zung to mù, Yhang lé zúng nyi akô nghut ri.

37 Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô.

38 Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

39 Hkyô sô lai lô é bang gi, nyhap é dông u-ngut nut mù, taí kô é gi,

40 "Noqkuq yhûm lé hpyoq pyám luí, sum nyí gyoro má dum wó saí lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhaí!" ga akô nghut ri.

41 Haú eq rajung za, hkyangjong agyi pé, tarâ sará pé eq suwún wuí le, Yhang lé rhoî jihkyoî kut mù, taí kô é gi,

42 "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhê! Ngamoq wó lumjîng râ matú, Yhang, tapzîng mai gyó lo wú sháng gaq.

43 Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gà le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri.

44 Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoî dang taí akô nghut ri.

*Yesuq Soqkâng Byit É Hkyô*

*Mrk 15:33-41; Luk 23:44-49; Yhn 19:28-30*

45 Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.

46 Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garú kat ri. Hau é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lhú?" gà é nghut ri.✧

47 Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

48 Haú hkûn jáng, yhangmoq mâ é rayuq gi, din e ló mù, wuímaù lé ê yu ri. Yhang gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun byî ri.

49 Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taí akô nghut ri.

50 Haú hkûn, Yesuq gi, htê mó èq dum garú kat luí, Yhâng é soqkâng byit bê nghut ri.

51 Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

52 Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

53 Haú bang gi, Yesuq dum dui toq é htâng, lup mai htoq lô kômù, chyoiyúng myuq\* má wang ê luí, byù myo myô hí má htoq shit akô nghut ri.

54 Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô ban-shoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

55 Myiwe wuí myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô.

56 Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

*Yesuq Lé, Myhup Pyâm É Hkyô*

*Mrk 15:42-47; Luk 23:50-56; Yhn 19:38-42*

57 Myinhtâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

58 Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri.

59 Yosep gi, gungsôm lé yù mù, pán yúng èq htup yup luí,

60 luqgok lé kyûng tô é, yhâng é lup sik hkaú má ê kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bê nghut ri.

✧ 27:46 Hkya-on 22:1 \* 27:53 Chyoiyúng myuq gà é gi, Yerusalem wà mó lé gà é nghut lhê.

61 Magadalaq wà mâ é Mariq eq goyuq Mariq gi, lup hí má zung tô akô nghut ri.

### *Lup Zúng É Hkyô*

62 Haû Hên Lajang Buinyi lai é htâng nyí lé, hkyangjong agyi pé eq Hparishe pé gi, Pilat chyáng è mù,

63 "Yhumsing è, Yhang, asak dui nyi ashí hkûn, 'Sum nyí nghû râ buinyi má, Ngò dum dui toq lô râ.' ga, haû byù mhaû taí é dang lé, ngamoq bûn nyi lhê.

64 Haû mù, haû sum nyí nghû râ buinyi jé shoq, lup lé rago za zúng nhang to aq. Haû a nghut jáng, Yhâng é chángzô pé, mâng lé lé hkaû yu lô mù, Yhang shi é mai dum dui toq lô bê ga, byu pé lé taí kó râ nghut lhê. Shí, lô htâng dâm mhaû é hkyô gi, sâng-hi dâm htoq je wui râ nghut lhê." ga, lé taí akô nghut ri.

65 Haû hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri.

66 Haû mù, yhangmoq gi, è luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

## 28

### *Dum Dui Toq Lo É Hkyô*

*Mrk 16:1-8; Luk 24:1-12; Yhn 20:1-*

10

1 Bánno buinyi lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má è wú râ ga, e lô akô.

2 Haû hkûn, layàng mó nún lo ri; hkâsu mù gâ le, Yhumsing Garaí é maumang lagyo rayuq gi, mauhkûng mai gyó lé lô mù, lup má è luí, haû luqlong lé tu lheng mù, hau ahtoq má zung tô ri.

3 Yhâng é isâm gi, lhap su duqbó mù, Yhâng é mebu gi, gyo su hpyu zan tô ri.

4 Zúng nyi é bang gi, yhang lé lûm wú gyuq kômù, pyik pyik nán luí, shí gùng su dut bùm bekô nghut ri.

5 Haû maumang lagyo gi, myiwe haû nhik lé, "Hkâgyuq kó! Haû tapzîng má jén sat huí é Yesuq lé, nungnhik ho nyi kô é lé, ngò sê lhê.

6 Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq.

7 Haû mù, hân taû lô luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut lô láng berâ. Nungmoq, Yhang lé, haû má lô myâng kó râ nghut lhê.' nghû lô taí kyo keq. Nungnhik lé, ngò taí é lé matsing chûng keq." ga taí kat ri.

8 Haû mù luí, myiwe myhí haû nhik gi, gyuq kôlhang, gyai gabú é myit eq lup mai hân taû lô mù, Yhâng é chángzô pé lé lô taí kyo râ matú, din lô bê nghut ri.

9 Haû hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haû mù, yhangnhik gi, huí è luí, Yhâng é hkyi má po zing to mù, Yhang lé noqkuq akô.

10 Haû hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e lô keq nghû lô taí kyo keq; haû má, yhangmoq, Ngo lé myàng kó râ nghut lhê." ga taí kat ri.

### *Zúng Nyi É Gyezô Pé Taí É Danglù*

11 Myiwe haû nhik hkyô má ru nghut nyi ashí le, lup zúng é gyezô pé ra-am gi, myuq hkaû má wang lô mù, dut lai lo é hkyô banshoq lé, haû hkyangjong agyi pé lé lô taí kyo akô nghut ri.

12 Haû hkyangjong agyi pé gi, suwún wui eq huí lhum luí, hpyé lhûm é htâng má, haû gyezô pé lé, ngùn myo myo tsup byi mù,

13 "'Myín lé, ngamoq yhup myhí tô é hkûn, Yhâng é chángzô pé lé lô mù, mâng lé, lé hkaû yu lô bekô nghut ri.' nghû taí keq.

14 Shí hkyô lé, haû mauzau hpó wó gyô é nghut jáng, yhang myit ngón shoq, ngamoq taí râ nghut lhê; haû

hkûn, nungmoq gi, hai manghkáng a htoq râ nghut lhê." ga taî kat ri.

<sup>15</sup> Haû mù, gyezô pé gi, ngùn haû pé lé yù luî, yhangmoq lé taî kat é eq rajung za kut bekô nghut ri. Haû su mù, haû hkyô gi, Yudaq byu pé má taî pyo myhîn lô bê nghut mù, ahkuî jé shoq taî nyi bum akô nghut ri.

*Chángzô Pé Kut Râ Sasana Muzó*

*Mrk 16:14-18; Luk 24:36-49; Yhn 20:19-23; Lagyo 1:6-8*

<sup>16</sup> Hau htâng má, haû chángzo raxe rayuq gi, yhangmoq lé, Yesuq é nhang tô é Galile mau mâ é bùm shut e lô bekô nghut ri.

<sup>17</sup> Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri.

<sup>18</sup> Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá ban-shoq, Ngo lé byî to bê nghut lhê.

<sup>19</sup> Haû mù, nungmoq gi, htoq é luî, byù myû chângjup lé, Ngá é chángzô pé dut nhâng mù, haû Îwa, Yhangzo, Chyoiyúng Woi-nyí é myìng lang luî, wui-myhup hkám byi mù,

<sup>20</sup> nungmoq lé, Ngò hkunmó hkyô tô é lhungháng lé châng kut râ matú, yhangmoq lé mhoqshit keq. Ngò gi, mingkan pyat htûm é hkûn jé shoq lháng, nungmoq eq rahá ru nghut nyî râ nghut lhê." ga pying tô ri.

## MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byî É Hkyô*

*Mht 3:1-12; Luk 3:1-18; Yhn 1:19-28*

<sup>1</sup> Haû Garai Gasâng é Yhangzo, Yesuq Hkrisduq eq sêng é gabú danglù hí é hkyô gi,

<sup>2</sup> haû myiqhtoi Esai-aq laiká má: "Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê."✧

ga luí le,

<sup>3</sup> "Haû yoso má, byù rayuq garû taí é htê gi,

'Haû Yhumsing é matú, hkyô hen to keq; Yhâng é matú hkyô lhoq nyhang to keq.'"✧

ga luí le, kê tô é eq rajung za nghut lhê.

<sup>4</sup> Haû mù, Wui-myhup Sará Yohan gi, yoso hkaú má jé lé luí, wui-myhup hkám byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri.

<sup>5</sup> Haû hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri.

<sup>6</sup> Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri.

<sup>7</sup> Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê.

<sup>8</sup> Ngò gi, nungmoq lé, wui èq za wui-myhup wó hkám byi lhê; nghut

kôlhang, Yhang gi, Chyoiyúng Woi-nyí má nungmoq lé wui-myhup hkám byi râ nghut lhê." gâ ri.

*Yesuq, Wui-myhup Hkâm Yu É Hkyô Eq Gunglaú Huí É Hkyô*

*Mht 3:13-17; 4:1-11; Luk 3:21-22; 4:1-13*

<sup>9</sup> Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri.

<sup>10</sup> Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gungghyâng sù é dông mai, Yhang ahtoq má gyó lé lo é lé le, Yhang myang kat ri.

<sup>11</sup> Haû hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

<sup>12</sup> Haû hkûn jáng, Woi-nyí gi, Yhang lé yoso shut wang e ló nhang ri.

<sup>13</sup> Haû mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

*Sâng-hi Lhé É Chángzô Pé*

*Mht 4:12-22; Luk 4:14-15; 5:1-11*

<sup>14</sup> Yohan htóng gyó é htâng má, Yesuq gi, Galile mau má ló jé mù,

<sup>15</sup> "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haû gabú danglù lé lumjîng keq hkoí." ga luí, Garai Gasâng é gabú danglù lé hkô kyo wún ri.

<sup>16</sup> Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyí kô é lé, myang ri; haû nhik gi, ngozo kóng zo su nhik nghut akô.

<sup>17</sup> Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri.

<sup>18</sup> Haû hkûn, yhangnhik gi, radá dâm, gùn pé lé tô pyám to luí, Yhang htâng cháng bekô nghut ri.

19 Yesuq gi, radun zo dum sô e lô é hkûn, Zebedi é yhangzo, Yakuq eq yhanggu Yohan nhiktâng, lhaî hkaû má gùn hpo nyi kô é lé, myang ri.

20 Haú hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyâng pé lé, lhaî hkaû má nyhi pyâm to kôluî, Yhang htâng cháng bekô nghut ri.

*Nat Lé, Yesuq Hkat Htoq Pyâm É Hkyô*

*Luk 4:31-37*

21 Yhangmoq gi, Kaperna-um wà má e akô; Bánno buinyi nyi jé jáng, Yesuq gi, tarajong má wang é mù, mhoqshit hi lô bê nghut ri.

22 Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.

23 Haú u lé, agè ashop é nat wang júng é byù rayuq tarajong má bo lom nyi luî, wut garû kat é gi,

24 "Nazaret wà byù Yesuq ê, ngamoq gi, Nàng eq haî sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garaî Gasâng é Chyoiyúng Sù nghut é lé, ngò sê lhê." gâ ri.

25 Haú hkûn, Yesuq gi, "Hkâjop, yhang chyáng mai htoq lô aq." ga yhang lé tân kat ri.

26 Haú hkûn, agè ashop é nat haú gi, byù haú yuq lé wum kat langhtân nhâng luî, htê mó èq garu uchyang htoq lô byuq bê nghut ri.

27 Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byi akô nghut ri." ga luî, taí lhûm bum akô nghut ri.

28 Yesuq eq sêng é ludang gi, Galile mau jam shoq, yang é dông byo myín lô bê nghut ri.

*Byù Myo Myo Lé, Yesuq Lhoq Gê Byi É Hkyô*

*Mht 8:14-17; Luk 4:38-41*

29 Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e lô bekô nghut ri.

30 Simûn é yhâng-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taí kyô akô nghut ri.

31 Haú mù luî, Yesuq gi, yhâng chyáng huî é mù, yhâng é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaí tso gaí huq bê nghut ri.

32 Haú nyi buiwang é htâng má, byu pé gi, no é bang eq nat gang wang júng nyi é bang banshoq lé, Yesuq chyáng shuî lé lo bum akô nghut ri.

33 Rawa bang, hkúmdong nàm má lé zup zing tô akô.

34 Haú mù, Yesuq gi, awáng nòhpyo ajung jung huî é bang myo myo lé lhoq gê byi ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

35 Yesuq gi, htang napkyó mau lháng a bó shimá, toq mù, gaú é jowò ralhûm má htoq ê luî, kyû é dúng ri.

36 Simun eq yhâng é luzúm wuî kúm gi, Yhang lé châng hô kômù,

37 Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luî, taí kyô akô nghut ri.

38 Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tû taí ri.

39 Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byi wún ri.

*Manggâm Dap Sù Lé, Yesuq Lhoq Gê Byi É Hkyô*

*Mht 8:1-4; Luk 5:12-16*

40 Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byi râ nghut lhê." ga dung wut ri.

41 Haú hkûn, Yesuq gi, yhang lé wú shogyo luí, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga taí ri.

42 Haú hkûn jáng, manggâm ana byuq byuq luí, yhang gi, gè bê nghut ri.

43-44 Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri.

45 Nghut kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mâ é chamchuyuiyui dut é jowò má za nyi nyi ri. Nghut kôlhang, byu pé gi, jowò hkanmó mai Yhâng chyáng ru zîng lé nyi bum ashí kó nghut ri.

## 2

### *Gùngjum Shí Sû Lé, Yesuq Lhoq Gé Byí É Hkyô*

*Mht 9:1-8; Luk 5:17-26*

1 Buinyi hkâ-myháng a myáng má, Yesuq gi, Kaperna-um wà má dum wang lô jáng, Yhang yhûm dum taú jé lô bê gâ é hkyô lé, byu pé wó gyô bum akô nghut ri.

2 Haú mù, byù myo myo zîng lé lô kôluí, yhúmkaú má jowò a joq lô é htoq agó, hkumtot má lháng a joq lo nghut ri; Yesuq gi, yhangmoq lé mungdang hko kyô nyi ri.

3 Haú hkûn, byù myi yuq gi, gùngjum shí sû rayuq lé chôm dang waq luí, Yhâng chyáng lé lo akô.

4 Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq má é yhumhkûng lé dong htông yù luí, gùngjum shí sù lé taphkang eq roq hkyô kat akô nghut ri.

5 Yesuq gi, yhangmoq é lumjîng myit lé byu-myàng jáng, gùngjum shí sù lé, "Ngá zo ê, náng é yubak mara lé hkyut pyám byi bê." ga taí ri.

6 Haú hkûn, tarâ sará pé ra-am gi, haú má zung to kôluí, yhangmoq é i-myit unghkaú má,

7 "Byù shí yuq gi, haí mù luí haú su gâ lhê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi râ lhú?" ga luí, myit són wuî nyi bum akô nghut ri.

8 Yesuq gi, yhangmoq é unghkaú má myit wú nyi kô é hkyô lé, radá dâm Yhang é myit mai sé mù, "Nungmoq é i-myit hkaú má, haí mù haú su nghú myit són wuî nyi bum akô lhú?"

9 Haú gùngjum shí sù lé, 'Náng é yubak mara lé hkyut pyám byi bê.' nghú taí é dang eq, 'Toq aq, náng é taphkang lé yù mù, hkyô so aq.' nghú taí râ má, hká hkun je taí lui lhê lhú?

10 Nghut kôlhang, haú Byu Yhangzo\* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga, yhangmoq lé taí kat ri.

11 Hau htâng, Yhang gi, haú gùngjum shí sù lé, "Ngò, nang lé taí bá, toq aq, náng é taphkang lé yu chûng luí, yhûm taú lô aq hkoi." ga taí ri.

12 Haú yuq gi, toq mù, yhâng é taphkang lé yu chûng luí, yhangmoq banshoq bang wú tsuq tô é myoq hí mai sô htoq lô byuq bê nghut ri. Hau é yanmai, yuq hkanmó gi, mauhong bùm kômù, "Isû é hkyô gi, hkâ-nhám lháng a myàng wú shí." ga, Garai Gasang lé hkyá-on kungton bum akô nghut ri.

\* 2:10 Byu Yhangzo gâ é gi, Yesuq Yhânggùng yhang lé le taí é nghut lhê, Mesaia lé le taí é nghut lhê.

*Lewiq (Mahte) Lé Wut Yu É Hkyô*  
*Mht 9:9-13; Luk 5:27-32*

<sup>13</sup> Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yhang gi, haú bang lé lhom mhogshit nyi ri.

<sup>14</sup> Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga taí ri. Haú hkûn, Lewiq gi, toq luí, Yhang htâng cháng bê nghut ri.

<sup>15</sup> Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri.

<sup>16</sup> Tarâ sará nghut é Hparishe pé ram gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê lú?" ga myí bum akô nghut ri.

<sup>17</sup> Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

*Zoshuq Gám É Eq Sêng É Hkyô*  
*Mht 9:14-17; Luk 5:33-39*

<sup>18</sup> Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é lú?" ga luí, myí akô nghut ri.

<sup>19</sup> Haú hkûn, Yesuq tú taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám râ lú? Yhangmoq gi, lusik eq rahá nghut nyi é u lé, zoshuq gám kó râ a nghut.

<sup>20</sup> Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

<sup>21</sup> Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhê.

<sup>22</sup> Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsîng*  
*Mht 12:1-14; Luk 6:1-11*

<sup>23</sup> Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô laí ló é hkûn, Yhâng é chángzô pé gi, kyôshi ratsuí langshap yu akô nghut ri.

<sup>24</sup> Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga taí akô.

<sup>25</sup> Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú?"

<sup>26</sup> Abiahta, hkyangjong mó kut nyi é u lé, Dawiq gi, Garai Gasâng é yhúmkaú má wang ê mù, hkyangjong pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tú taí ri.

<sup>27</sup> Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut.

<sup>28</sup> Haú mù, haú Byu Yhangzo gi, haú Bánno buinyi é Yhumsîng lháng nghut lhê." ga xoq taí ri.



### 3

<sup>1</sup> Yesuq gi, tarajong má radàm dum wang e le, loq raloq ajum shi byuq é byù rayuq nyi to lánq ri.

<sup>2</sup> Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lhú ga, mara hùn râ matú gyám wú nyi akô nghut ri.

<sup>3</sup> Yesuq gi, haú loq jum shi sù lé, "Banshoq bâng é hí má, toq yap shit aq." ga taí kat ri.

<sup>4</sup> Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyí râ eq byù sat râ hkyô pé má, hká lhum kut le sheq tará wang lhé lhú?" ga myí kat jáng, yhangmoq kúm gi, jit le a ga kó nghut ri.

<sup>5</sup> Haú mù, Yhang gi, nhik-yô nau é myit èq haú bang lé lhing wú mù, yhangmoq myit htan é hkyô lé, wú yón luí, haú loq jum shi sù lé, "Náng é loq nyhang kat aq." ga taí kat jáng, haú yuq gi, loq nyhang kat luí, yhang é loq gi, shoq za ge byuq bê nghut ri.

<sup>6</sup> Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chòm hpyê lhùm bum akô nghut ri.

#### *Byù Ajùm Ayò, Yesuq Htâng Cháng Kô É Hkyô*

<sup>7</sup> Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htâng châng e ló bum akô nghut ri.

<sup>8</sup> Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri.

<sup>9-10</sup> Yesuq gi, byù myo myo lé lhoq gê byí é yanmai, nòhpyo hui to bang gi, Yhang lé wó záng shoq ga, chyín chyap wang ló bum akô. Byù lúm

myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhum hen to nhang ri.

<sup>11</sup> Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô.

<sup>12</sup> Nghut kôlháng, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

#### *Lagyo Kut Râ Byù Raxe Í Yuq Hkyin Yu É Hkyô*

*Mht 10:1-4; Luk 6:12-16*

<sup>13</sup> Yesuq gi, bùm shut doq ló mù, Yhang ô nau é bang lé ji kat luí, haú bang gi, Yhâng chyáng jé lé lo bum akô nghut ri.

<sup>14</sup> Haú hkûn, Yesuq gi, byù raxe í yuq lé hkyin yù luí, lagyo ayá byí ri; haú bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq,

<sup>15</sup> nat gâng pé lé hkat htoq râ ahko ahkáng wó râ matú le, nghut akô nghut ri.

<sup>16</sup> Haú raxe í yuq gi, Simun (Yesuq mai Petruq ga mying myhíng byi sù);

<sup>17</sup> Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga mying myhíng byí ri; hau é lichyúm gi, maugum zô nhik gâ é nghut lhé);

<sup>18</sup> Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq\* dut é Simun eq,

<sup>19</sup> Yhang lé ap pyám râ sù, Yudaq Iskarut pé nghut akô.

#### *Yesuq Eq Bezebulaq*

*Mht 12:22-32; Luk 11:14-23; 12:10*

<sup>20</sup> Hau htâng, Yesuq gi, yhùm má wang ló le, byù ajùm ayò dum zing lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri.

<sup>21</sup> Yhâng é yhumbyù wui gi, haú hkyô lé wó gyo kôjáng, "Yhang, myit

\* **3:18** Zelutuq gâ é lichyúm gi, yhumsíng zui saí é hkyô má gyai yhang myit lòm shirong é sù lé gâ lhé. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhé.

a gying lo nghut ri." ga luí, Yhang lé hung shuí yù râ matú, e akô nghut ri.

<sup>22</sup> Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaú é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

<sup>23</sup> Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ lú?"

<sup>24</sup> Mingdán ralhú gi, ahkaú má byoq gâng lhúm nyi kô é nghut jáng, mingdán haú wó gíng nyi râ a nghut.

<sup>25</sup> Yhumhtu ralhú má le, ikun byù yhangchang byoq gâng lhúm nyi é nghut le gi, yhumhtu haú wó gíng nyi râ a nghut.

<sup>26</sup> Haú eq rajung za, Tsadán le, yhanggùng yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htúm byuq râ za nghut lhé.

<sup>27</sup> Ó yuq nghut kôle, wum-o bò sù lé hí tui zing pyâm é a nghut le gi, yhang é yhúm má lú wâng mù, yhang é sutzè lé wó lú yù râ a nghut: Haú yuq lé hí tui zing pyám jáng sheq, yhang é sutzè lé wó lú yù râ a nghut lhé.

<sup>28</sup> Ngò, nungmoq lé teng za taí kôlé, byu pé kut shut é mara banshoq eq rhoi dang taí pyâm é pé lé gi, mara wó hkyut pyám byi lhé.

<sup>29</sup> Nghut kôhang, haú Chyoiyúng Woi-nyí lé rhoi dang taí pyâm é sù gi, hkâ-nhám le, mara hkyut byi é wó hui râ a nghut; haú yuq gi, ahtum abyuq yubak wó sù nghut nyi ri." gâ ri.

<sup>30</sup> Yhang haú su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

*Yesuq É Yhângnu Eq Yhanggu Pé  
Mht 12:46-50; Luk 8:19-21*

<sup>31</sup> Hau htâng, Yesuq é yhângnu eq yhanggu pé gi, jé lé mù, yhúm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri.

<sup>32</sup> Byù ajùm ayò gi, Yhâng é lhîngkhyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má láng bum akô." ga taí kyô akô nghut ri.

<sup>33</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga myi kat ri.

<sup>34</sup> Hau htâng, Yhang gi, Yhâng é lhîngkhyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê!"

<sup>35</sup> Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

## 4

*Kyôshi Sân É Dangtú*

*Mht 13:1-23; Luk 8:4-15*

<sup>1</sup> Yesuq gi, nhông yàm má radàm dum mhoqshit hi lô bê nghut ri. Haú hkûn, Yhâng é lhîngkhyuq má byù moq mó lúm yán zîng lé lo bùm kô é yanmai, Yhang gi, nhông hkaú mâ é lhai má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri.

<sup>2</sup> Yhang gi, haú bang lé, dangtú pé đông myo myo mhoqshit byi nyi ri; Yhang mhoqshit é má,

<sup>3</sup> "Gyo wú keq! Kyô hkyó sù rayuq gi, kyôshi san râ gâ htoq e lô ri.

<sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri.

<sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

<sup>6</sup> amyit a wó chin hing é nghut mù, bui htoq lô jáng, lhap kyuq pyám bê nghut ri.

<sup>7</sup> Dum ra-am gi, zugyóm hkaú má gyó ang luí, zubyap haú pé kô lò mù, wup pyâm é yanmai, ashi a wó zui nghut ri.

<sup>8</sup> Nghut kôhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú,

rashô tú lhang, zui myô lo é nghut ri." gâ ri.

<sup>9</sup> Hau htâng, Yesuq dum taî é gi, "Gyo yù râ nohkyap dap sù gi, gyô yù sháng gaq." gâ ri.

<sup>10</sup> Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myî akô.

<sup>11</sup> Haú hkûn, Yhang, yhangmoq lé taî kyô é gi, "Garai Gasâng é mingdán eq sêng é sê gyo wuí é hkyô lé sé gyo rá ahko ahkáng, nungmoq lé byî to lugù nghut bê. Nghut kôlhang, góbâng é matú gi, jung hkanmó lé dangtú dông chyat taî é nghut lhê.

<sup>12</sup> Haú mù luí, "Yhangmoq gi, myang nyi kôlhang, a wú sé kó, gyô nyi kôlhang, a sê gyo kó;

sé wú sê gyo kô é ru nghut le gi, lhîng taú lò mù, mara hkyut pyám byî é hui kó râ nghut lhê!\*" gâ ri." ga tô ri.

<sup>13</sup> Hau htâng, Yhang, yhangmoq lé dum xoq taî é gi, "Nungmoq, dangtú shî lé a sê gyo kô é nghut le gi, gotú dangtú pé lé hkâsu kut ung sê gyo kó râ lúhú?

<sup>14</sup> Yô mù zui sù san kat é kyôshi gi, mungdang nghut lhê.

<sup>15</sup> Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byî ri.

<sup>16</sup> Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit eq hap yù akô.

<sup>17</sup> Nghut kôlhang, yhangmoq gi, amyit a wó chîn é yanmai, razup zo za yuq kômù, mungdâng é yanmai, wúihke é eq zing-rî é pé hui kôjáng, hân hân htaq ló byuq kó râ nghut lhê.

<sup>18</sup> Dum ra-am nghut jáng, zugyóm hkaú má gyó âng é kyôshi eq wuí akô; yhangmoq gi, mungdang lé wó gyô yù kôlhang,

<sup>19</sup> shí ipyat lhê é myit wui myit hke hkyô, hkyô shuí ngoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyám é yanmai, ashi a wó zui dut kó râ nghut lhê.

<sup>20</sup> Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haú mungdang lé gyô yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

### *Myibung Htûn É Hkyô*

#### *Luk 8:16-18*

<sup>21</sup> Yesuq, yhangmoq lé xoq taî é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jáng, yhupchong ô má tsung tô é, ó yuq wá kut wú akô lúhú?

<sup>22</sup> Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê.

<sup>23</sup> Gyô yù râ nohkyap dap sù ó yuq nghut kôle, gyô yù sháng gaq." gâ ri.

<sup>24</sup> Hau htoq agó, Yhang dum taî é gi, "Nungmoq gi, wó gyô yu é hkyô lé rago myit wú keq; nungmoq lik byî é bung eq, nungmoq lé dum lik byî râ nghut lhê; hau htoq lhang myo shoq wó kó râ nghut lhê.

<sup>25</sup> Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

### *Kyôshi Yuq Kô Lo É Dangtú*

<sup>26</sup> Hau htâng, Yhang dum xoq taî é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri.

<sup>27</sup> Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri.

<sup>28</sup> Myigùng gi, yhang baú yhang, kyôshi lé, sânghi má abum bum

\* 4:12 Esai 6:9-10

nhâng, hau htâng má a-nhâm htoq nhâng mù luí, ashi zui shoq kut é nghut lhê.

<sup>29</sup> Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô*  
*Mht 13:31-32; Luk 13:18-19*

<sup>30</sup> Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhú? Hai jung dangtú yù mù, shit wú râ lhú?

<sup>31</sup> Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê.

<sup>32</sup> Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agâm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê." gâ ri.

<sup>33</sup> Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri.

<sup>34</sup> Yhang gi, yhangmoq lé, dangtú a bo é hai lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkanmó é lichyúm lé taí sân kyô ri.

*Laidun Mó Lé, Yesuq Lhoq Zím*  
*Pyâm É Hkyô*

*Mht 8:23-27; Luk 8:22-25*

<sup>35</sup> Haú nyí, myinhtâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri.

<sup>36</sup> Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap ló bekô; gotû lhai pé le, yhangmoq eq rahá bo gû dap ló akô nghut ri.

<sup>37</sup> Haú u lé, laidun mó jé lô mù, wuìlhêng hta toq lô luí, lhai má lo bat hâng é yanmai, wuì byíng lô bê nghut ri.

<sup>38</sup> Haú hkûn, Yesuq gi, lhai htâng má uhkuq hkuq mù yhup myhí tô ri; haú chángzô pé gi, Yhang lé nhaú pun luí

"Sarâ ê, nga-nhúng myup shi ló râ dut é lé, nàng a chiq byi lhú?" ga taí akô nghut ri.

<sup>39</sup> Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num ló byuq luí, banshoq zím byuq bê nghut ri.

<sup>40</sup> Hau htâng, Yhang gi, Yhâng é chángzô pé lé, "Haí mù, haú-í gyuq bum akô lhú? Nungmoq gi, lumjíng myit a bò shi kó lhú?" ga taí ri.

<sup>41</sup> Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lhê là? Là eq wuìlhêng pé lhang gi, Yhâng é dang lé gyo byí ri-nhung!" ga luí, rayuq eq rayuq myí lhum bum akô nghut ri.

## 5

*Nat Gang Hkat Htoq Pyâm É Hkyô*  
*Mht 8:28-34; Luk 8:26-39*

<sup>1</sup> Yhangmoq gi, nhông hé hpoq mâ é Gerase byu pé é mau má jé dap e ló akô.

<sup>2</sup> Yesuq lhai mai htoq ló é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri.

<sup>3</sup> Haú yuq gi, lupdùng má za nyi é sù nghut ri; yhang lé, ó yuq èq le, shamtoq-tuí èq lhang a wó tuí zing wú kó nghut ri.

<sup>4</sup> Hkâsu mù gâ le, adàm dàm, yhâng é loq eq hkyí má shamtoq-tuí èq tuí tô wú kôlhang, yhang gi, loq mâ é shamtoq-tuí pé lé lhang hpyit pyám pyám kut mù, hkyí mâ é shamtoq kyum lé lhoq hkyop pyám pyám kut ri. Yhang lé, ó yuq èq le a wó hkuq yù kó nghut ri.

<sup>5</sup> Yhang gi, nyí myín aga lupdùng eq bùm pé má puk garu uchyang, yhum-sing gùng lé luqgok èq dùn cheq wún ri.

<sup>6</sup> Yhang gi, Yesuq lé, we mai myang kat jáng, dín e ló mù, Yhâng é hí má hkyihput htuq ngop luí,

<sup>7</sup> htê mó èq, "Myhang htâng é Garai Yhangzo Yesuq ê! Nàng gi, ngò eq haí sêng lhê lhú? Nàng gi, ngo lé a zing-ri râ matú, Garai Gasâng hí má danggidiq byi laq." ga taí garú ri.

8 Haî mù gà le, Yesuq gi, yhang lé, "Agè ashop é nat nàng ê, byù shí yuq chyáng mai htoq ló aq." ga taî kat é yanmai nghut ri.

9 Hau htâng, Yesuq gi, "Náng myîng haî gà lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gà lhê." ga tû taî ri.

10 Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

11 Haú u lé, waq rajùm mó gi, bùm yàm má dû but zô nyi bum akô nghut ri.

12 Haú mù luî, nat gâng pé gi, "Ngamoq lé, waq pê chyáng nhang kat luî, yhangmoq chyáng wàng nhâng laq." ga luî, Yesuq lé dung akô.

13 Haú hkûn, Yesuq gi, yhangmoq lé ahkáng byî kat jáng, haú agè ashop é nat pé gi, haú yuq chyáng mai htoq ló kôluî, waq pê chyáng wang ló byuq bekô nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôluî, myup shi byuq bekô nghut ri.

14 Waq zúng bang gi, hpang din wang ló kômù, myuq hkaú má é bang eq awui ayàm má é bang lé, haú hkyô ló shit kyo kô é yanmai, byù haú bang gi, dut laî lò bê hkyô lé, ê htoq wú akô nghut ri.

15 Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luî, byù gè rayuq su zung to lánng é lé myàng kômù, gyuq dan bùm bekô nghut ri.

16 Haú hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé taî kyo akô nghut ri.

17 Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tôngbán akô nghut ri.

18 Yesuq lhaî hkaú má wang ló é u lé, haú nat gâng pé wang júng laî lò bê sù gi, Yesuq htâng cháng râ matú, Yesuq lé dung tôngbán ri.

19 Nghut kôlhang, Yesuq gi, yhang lé ahkáng a byi e za, "Nàng, yhûm shut sheq lô mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, náng é yhumbyù buinùm ji-myi wui lé ló taî kyo aq." ga taî kat ri.

20 Haú mù, byù haú yuq gi, ló luî, yhang lé Yesuq hkâ-í kut byi bê hkyô lé, Dekapoli\* mau bang lé ló taî kyô ri. Haú hkûn, wó gyô é bang banshoq gi, mauhong bum akô nghut ri.

*Shi Byuq Bê Myiwe Zo Eq No É Myiwe Myhi Rayuq É Hkyô Mht 9:18-26; Luk 8:40-56*

21 Yesuq gi, lhaî ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhînghkyuq má lé zîng bum akô nghut ri;

22 haú hkûn, Ya-iruoq gà é, tarajong má up bang má é rayuq gi, haú má lé luî, Yesuq lé myang kat jáng, Yhâng é hkyî wang má paî gop to mù,

23 "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nàng lé mù, yhâng é ahtoq má loq lé ke byi laq." ga, wum kat dúng tôngbán nyi ri.

24 Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

25 Haú hkûn, raxe í zân suí yui nyi é myiwe myhí rayuq le haú hpúng má bo tô ri.

26 Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luî yâ wú kôlhang, ge é hkyô a joq é htoq agó, je lháng wuîhke lò ri.

27 Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huî lé mù, Yhâng é bu má é záng kat ri.

28 Haî mù luî gà le, yhang gi, "Ngò, Yhang é bu má za lháng ê wó záng é nghut le gi, ge byuq râ nghut lhê." ga

\* 5:20 Dekapoli gà é gi, Grik đông myuq raxê lé gà lhê.

wó myit é yanmai, haú su kut é nghut ri.

<sup>29</sup> Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

<sup>30</sup> Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lú?" ga myi kat ri.

<sup>31</sup> Haú hkûn, Yhâng é chángzô pé gi, "Náng é lhinghkyuq má byù ajùm ayò chýn chyap nyi é lé, myang to luí nhing, 'Ngo lé, ó yuq záng bê lú?' nghú myi lè lú?" ga tû taí kat akô.

<sup>32</sup> Nghut kôlháng, Yesuq gi, Yhang lé lé záng sú lé myàng râ matú, ho lhing wú nyi ashí nghut ri.

<sup>33</sup> Haú hkûn, myiwe myhí haú gi, yhâng chyáng hkâsu dut laí lò bê hkyô lé sê é yanmai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut laí lò bê hkyô banshoq lé taí kyô ri.

<sup>34</sup> Haú mù, Yesuq gi, myiwe myhí haú lé, "Byizo é, náng é lumjínng myit gi, náng lé lhoq gê byi bê nghut ri; náng é nòhpyo ge byuq bê nghut ri; ngón za ló aq hkoi!" ga taí ri.

<sup>35</sup> Yesuq gi, dang ru taí nyi ashí hkûn, tarajong má up sú Ya-iruy é yhûm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lè lú?" ga luí, lé taí kat akô.

<sup>36</sup> Yesuq gi, haú bang taí é dang lé gyô lhaí pyám mù, "Hkâgyuq, za lumjínng aq." ga, haú tarajong má up sú lé taí kat ri.

<sup>37</sup> Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri.

<sup>38</sup> Yhangmoq, haú tarajong má up sú é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri.

<sup>39</sup> Yhang gi, yhúmkaú shut wang ló mù, haú bang lé, "Haí mù, yón ngau gabyông nyi bum akô lú? Haú

zoshâng gi, shi byuq é a nghut, yhup myhí tô é sheq ru nghut lè." ga taí ri.

<sup>40</sup> Nghut kôlháng, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lèq tô é gok má wang e akô nghut ri.

<sup>41</sup> Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo é, ngò, nang lé taí bá, toq aq." gâ é nghut lè.) ga taí ri.

<sup>42</sup> Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sú dut é hkyô lé gyai yhang maú byuq bùm bekô nghut ri.

<sup>43</sup> Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yhangmoq lé taí ri.

## 6

### *Yhumsing Wà Má Myoqdong A Wó É Hkyô*

*Mht 13:53-58; Luk 4:16-30*

<sup>1</sup> Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri.

<sup>2</sup> Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é là? Yhang wó yu é hpaqchyî byéng-yá gi, hkasú é wá nghut mù luí, laklaí kumlhá lé lhang kut lè laq?

<sup>3</sup> Shí yuq gi, Mariq é yhangzo, laksíma hpó nghut lè, a nghut lú? Yhang gi, Yakuq, Yose, Yudaq, Simun pé é yhangmang nghut lè, a nghut lú? Yhâng nhammó pé le, nga-nhúng eq rahá nghut nyi lè, a nghut kó lú?" ga luí, Yhang lé myit a ngón dut bùm bekô nghut ri.

<sup>4</sup> Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wui eq

yhumsing é yhûm má za, myoqdong a lhaq wó wú é nghut lhê." gâ ri.

<sup>5</sup> Yhang gi, nò byù ra-am lé loq ke byi mù, lhoq gê byî é mai lai luî, gotû laklaí kumlhá haí le, haú má a wó kut shit nghut ri.

<sup>6</sup> Haú mù, Yesuq gi, yhangmoq lumjínng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

*Lagyo Raxe Í Yuq Lé Nhang Htoq Kat É Hkyô*

*Mht 10:5-15; Luk 9:1-6*

<sup>7</sup> Yesuq gi, haú lagyo raxe í yuq lé wut yù mù, agè ashop é nat pé lé ùng râ a-tsam byi luî, í yuq yuq kut nhang htoq kat ri.

<sup>8</sup> Yhang, yhangmoq lé châng pying kat é dang gi, "Hkyowui é matú má, dumbáng mai lai luî, zoshuq le, etap le, ngùn le, gotû haí le, hkâyü chûng kó;

<sup>9</sup> hkyî-tsung kúm gi, tsûng chûng keq; nghut kôlhang, bu í dung hkâwut chûng kó.

<sup>10</sup> Hká má nghut kôlhang, rayhûm yhûm má nungmoq wang bíng kô é nghut le gi, haú wâ mai dum htoq ló é buinyì jé shoq, haú yhûm má za nyi nyi keq.

<sup>11</sup> Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

<sup>12</sup> Haú mù, yhangmoq gi, htoq e ló luî, myit lhîng râ é hkyô, byu pé lé hkô kyô akô.

<sup>13</sup> Hau htoq agó, yhangmoq gi, nat gâng pé myo myo lé hkat htoq pyâm byi mù, no é bang myo myo lé le xû but byi luî, lhoq ge byî akô nghut ri.

*Yohan, Ulhum Hpyit Huí é Hkyô*

*Mht 4:1-12; Luk 9:7-9*

<sup>14</sup> Yesuq é myìng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi,

"Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luî, taí bum akô nghut ri.

<sup>15</sup> Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

<sup>16</sup> Herut kúm gi, haú lé wó gyo jáng, "Ngò, ulhum hpyit pyâm byî é Yohan gi, shi é mai dum dui toq bu-nhung!" ga taí ri.

<sup>17</sup> Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyâm nhang wú é sù nghut lhê.

<sup>18</sup> Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luî, taí byî nyi é yanmai nghut ri.

<sup>19</sup> Haú mù, Herudiaq gi, Yohan lé gyai a jú dut byuq luî, sat pyâm nau kôlhang, a wó sat dut nyi ri.

<sup>20</sup> Haí mù gâ le, Herut gi, Yohan, dingmán chyoiyúng é sù nghut é lé sé mù luî, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashî nghut ri.

<sup>21</sup> Nghut kôlhang, Herut gi, yhâng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poi mó kut é yanmai, haú nyí gi, Herudiaq é matú, buinyì gè dut bê nghut ri.

<sup>22</sup> Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byî ri.

<sup>23</sup> Hau htoq agó, yhang gi, myiwe zo haú lé, "Nàng dung é haí nghut kôle,

ngò byi râ; ngá é mingdán rawuí gù lhang, byi râ nghut lhê." ga, dakam é danggidiq byi ri.

<sup>24</sup> Haú hkûn, myiwe zo haú gi, htoq ló mù, yhang nu lé, "Haí dúng le gè râ laq?" ga myi jáng, yhangnu gi, "Wui-myhup Sará Yohan é ulhum dung aq." ga tú taí kat ri.

<sup>25</sup> Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

<sup>26</sup> Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, myiwe zo haú taí é dang lé a kâm he pyám lo nghut ri.

<sup>27</sup> Haú mù, hkohkâm gi, zúng é gyezo rayuq lé, Yohan é ulhum ê hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má ê luí, Yohan é ulhum lé, ê hpyit mù,

<sup>28</sup> bó má kat luí, myiwe zo haú lé lo byi ri; myiwe zo haú gi, ulhum haú lé, yhangnú chyáng yu ló byi ri.

<sup>29</sup> Yohan é chángzô pé gi, haú hkyô lé wó gyo kôjáng, yhang é mâng lé lé yú luí, lup má ló myhup pyám bekô nghut ri.

*Byù Ngo Hkyîng Lé Byi Tsô É Hkyô Mht 14:13-21; Luk 9:10-17; Yhn 6:1-14*

<sup>30</sup> Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taí kyô akô nghut ri.

<sup>31</sup> Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyíng lhang a wó kó nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhum má ê mù, ê nô yù sháng." ga taí ri.

<sup>32</sup> Haú mù, yhangmoq gi, yhangmoq baú lhai racham má jì mù, tsím tsâm é jowò shut e ló akô nghut ri.

<sup>33</sup> Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyô châng din é kômù, yhangmoq é hí má jé to lánng akô nghut ri.

<sup>34</sup> Yesuq gi, lhai mai gyó dap ló é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hi ló bê nghut ri.

<sup>35</sup> Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê;

<sup>36</sup> yhangmoq gi, awui ayàm mâ é yhùm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoi." ga taí akô nghut ri.

<sup>37</sup> Haú hkûn, Yhang gi, "Nungmoq, yhangmoq lé rajungjung byi tso keq." ga tú taí jáng, yhangmoq gi, "Shí myhó é bang zo râ matú, ngamoq gi, ê luí, denari\* í sho eq muk ê wui byi ra râ luq?" ga dum taú myí akô nghut ri.

<sup>38</sup> Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tú taí akô nghut ri.

<sup>39</sup> Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhang é chángzô pé lé taí kat ri.

<sup>40</sup> Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri.

<sup>41</sup> Yesuq gi, haú muk ngo long eq ngozo í du lé yù mù, mauhkung shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhang é chángzô pé lé byi

\* 6:37 Denari rachap gi, byù rayuq é ra-nyí lhê é zuihpau eq wuí ri.



ri. Ngozo í du lé le, Yhang yù mù, banshoq bang lé gàm byî ri.

<sup>42</sup> Yhangmoq banshoq bang gi, zô gyî bùm bekô nghut ri.

<sup>43</sup> Hau htâng, haù chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashî kó nghut ri.

<sup>44</sup> Haù hkûn, zô é bang gi, yuqgè wuì baú lhang, byù du ngo hkyíng nghut ri.

*Yesuq, Wuì Htoq Má Sô É Hkyô  
Mht 14:22-33; Yhn 6:15-21*

<sup>45</sup> Yesuq gi, haù shiwa byu pé lé byo ló nhang nyi é hkûn jáng, Yhâng é chángzô pé lé lhai má wang ji nhâng mù, tû tap mâ é Bet-saida wà mó shut dap ló lán nhang ri.

<sup>46</sup> Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

<sup>47</sup> Buigyum htâng, lhai gi, nhông gùng má jé tô é u lé, Yesuq gi, Yhang baú za myi htoq má nyi tô ashî nghut ri.

<sup>48</sup> Lai tau mut é yanmai, haù chángzô pé gi, lhai lhu wuîhkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló râ dâ ri.

<sup>49</sup> Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akô nghut ri.

<sup>50</sup> Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri.

<sup>51</sup> Hau htâng, Yhang gi, lhai htoq má yhangmoq eq rahá é doq ji jáng, lai gi, zim byuq bê nghut ri; haù mù, yhangmoq gi, gyai yhang mauhong byuq bùm bekô nghut ri.

<sup>52</sup> Hkâsu mù gâ lé, yhangmoq gi, muk gam é laklai kumlhá eq séng luí

a sê gyo kô é htoq agó, myitbun a bóng kô é yanmai nghut ri.

<sup>53</sup> Yhangmoq gi, gû dap ló kômù, Genesarat mau má jé wang lò jáng, lhai lé haù má ló shap tô akô nghut ri.

<sup>54</sup> Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri.

<sup>55</sup> Haù mù, yhangmoq gi, haù mau ramau gón má din jón mù, nò bang lé taphkang mai waq luí, Yesuq nyi ri gâ é jowò hkangmó má, shuì lé lo bum akô nghut ri.

<sup>56</sup> Yesuq jé é wà hkangmó, myuq hkangmó, awuì ayâm mâ é wà hkangmó pé má, yhangmoq gi, nò byù lé gai pé má lé lheq to kôluí, Yhâng é bushi htâng má za lhang, haù bang lé byi záng nhâng râ matú, Yhang lé dúng tóngbán akô. Yhang lé záng é lhunglhâng bang gi, lhoq gè byi é huì akô nghut ri.

## 7

*A Sanséng Dut Nhang É Hkyô Pé  
Mht 15:1-20*

<sup>1</sup> Haù Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô.

<sup>2</sup> Haù hkûn, Yhâng é chángzô pé ra-am gi, htungli dông a chí pyâm é, a sanséng é loq eq zo shuq nyi kô é lé, yhangmoq myang akô nghut ri.

<sup>3</sup> (Hparishe pé eq Yudaq byù banshoq bang gi, yhangmoq é íchyí îwâ pé é htungli lé châng é bang nghut lhê mù luí, loq hí a chí é gi, haí le a zô wú kó nghut ri.

<sup>4</sup> Yhangmoq gi, gai pé mai taù lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chôkon pé lé chí é htungli gotú pé lé le, châng akô nghut ri.)

<sup>5</sup> Haù mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, íchyí îwa pé é htungli lé a châng e za, a sanséng é loq eq zo shuq nyi akô lhú?" ga myi akô.

<sup>6</sup> Haù hkûn, Yesuq gi, yhangmoq lé, "Gegùn labyoq kut bang ê, nungmoq

eq séng luí myiqhtoi Esai-aq htoî tô é dang má,

'Byù shí bang gi, nhut htoq mai za Ngo lé hkunggâ akô; yhang-moq é myit nhiklhum gi, Ngò eq wê gâng nyi akô.

<sup>7</sup> Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.\*

ga kâ tô é gi, têng ri.

<sup>8</sup> Nungmoq gi, Garai Gasang tô tô é hkunmó lé tô pyám luí, byu é htungli lé za, myhik zing tô akô nghut ri." ga luí tâ ri.

<sup>9</sup> Hau htâng, Yhang xoq taí é gi, "Nungmoq gi, yhumsing é htungli lé za cháng râ matú, Garai Gasang é hkunmó lé he-ngik pyâm é má, hpaqchyí gyaí bo akô nghut ri.

<sup>10</sup> Hkâsu mù gâ le, Mosheq gi, 'Nungmoq é înu îwa lé, hkungga keq.\* ga le, 'Înu îwa lé, nhíng é sù ó yuq nghut kôle, sat pyâm é hui râ lhê.\* ga le, kâ tô é nghut lhê.

<sup>11</sup> Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô.

<sup>12</sup> Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri.

<sup>13</sup> Haú dông mai, nungmoq gi, nungmoq chung gyó lo é htungli é yanmai, Garai Gasang é mungdang lé he-ngik pyâm akô; haú sù é hkyô myo myo lé lé, nungmoq kut akô nghut ri." gâ ri.

<sup>14</sup> Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq;

<sup>15</sup> Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaú mai htoq ló é zè kúm gi, byù lé a sanséng dut nhang lhê." gâ ri.

<sup>16</sup> (Gyo râ nohkyap dap é sù gi, gyô yù sháng gaq.)" ga taí ri.\*

<sup>17</sup> Yhang gi, byù moq mó mai htoq ló mù, yhúmkaú má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myí akô nghut ri.

<sup>18</sup> Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lhú?

<sup>19</sup> Hkâsu mù gâ lé, haú gi, byu é myit nhiklhum hkaú má wang ló é a nghut e za, wamdau hkaú má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é gi, zoshuq lhunglhang sanséng lhê gá nau é dông nghut ri.)

<sup>20</sup> Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê.

<sup>21</sup> Hkâsu mù gâ lé, ahkaú mai htoq lo é gi, byu pé é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaú é hkyô, byù sat é hkyô, su-myi sulàng lú hkyô,

<sup>22</sup> myoqnoq é hkyô, agè ashop é hkyô, mhaú zô é hkyô, achayut zùm yap lhúm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;

<sup>23</sup> Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri." gâ ri.

*Tungbàu Myiwe Myhi Rayuq É Lumjng Myit*

*Mht 15:21-28*

<sup>24</sup> Yesuq gi, haú jowò mai htoq ló mù, Turuq eq Sidun maukyo shut e ló luí, yhúm ralhú má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri.

\* 7:7 Esai 29:13 \* 7:10 Htoq Ló 20:12 \* 7:10 Htoq Ló 21:17 \* 7:16 Bun zo shí gi, Chyúmlaika ra-am má bo lhê, ra-am má a bò.

25 Haû mù, agè ashop é nat wang júng tô é myiwe zo rayuq é yhangnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyî wang má lé paí gop to luí,

26 yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haû gi, Suru-Hpiniki mau mâ é Grik byuhú nghut ri.

27 Yesuq gi, "Zo wuî† hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé‡ lé byi tsô é jung a nghut." ga yhang lé taí kyo ri.

28 Haú hkûn, yhang gi, "Yhumsîng ê! Haû kúm nghut ri; nghut kôlhang, siboî ô mâ é hkuí lháng, zô wui é zô myhit shuq htâng lé, ge zo lhê a nghut lhú?" ga dum tú taí ri.

29 Haû mù, Yesuq gi, yhang lé, "Nàng tú taí é dang hau é yanmai, ló lo aq hkoi; haû nat gang gi, nung zô chyáng mai htoq ló byuq bê nghut ri." ga taí kat ri.

30 Myiwe myhí haû gi, yhûm má dum taú jé lo é hkûn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

### *Nojit É Eq Dang A Hkyang É Sû Lé Lhoq Gê Byî É Hkyô*

31 Yesuq gi, Turuq mau mai dum htoq ló mù, Sidun mai sô laí ló luí, Dekapoli mau hkaû đông laí byit mù, Galile nhông shut gyó jé ló ri.

32 Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

33 Yesuq gi, haú yuq lé baú za byù hpúng mai shuí htoq yù mù, yhâng é nohkyûng má loqnyhui htaû háng byi luí, sôkan byé tik yù mù, haú yuq é shô má htau byî ri.

34 Hau htâng, Yhang gi, mauhkûng shut tu wú mù, soq mó shê luí, "Eh-pahta!" (Lichyúm gi, "Bóng aq hkoi!") ga luí, haú yuq lé taí kat ri.

35 Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

36 Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri.

37 Byu pé gi, gyai yhang mauhong byuq bùm kôluí, "Yhang gi, haí lé le, ge é đông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

## 8

### *Byù Myi Hkyîng Lé Byi Tsô É Hkyô Mht 15:32-39*

1 Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù,

2 "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri.

3 Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmút gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taí ri.

4 Haú hkûn, Yhâng é chángzô pé gi, Yhang lé, "Îsu é yoso má nhîng, shî myhò bang lé luq shoq byi tso râ zoshuq gi, hkâmá ê yù râ lhú?" ga taí akô.

5 Yesuq gi, "Nungmoq, muk hkâm-myhó long wó akô lhú?" ga taú myi jáng, yhangmoq gi, "Nyhít long." ga, dum tú taí akô nghut ri.

6 Haû mù, Yhang gi, byù hpúng lé myigùng htoq má zùng nhang to luí, muk haû nyhit long lé yù mù, jeju ban hkya-on jáng, myhik hpé luí,

† 7:27 Zo wuî gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tûngbaù pé lé gâ é nghut lhê.

haú bang lé gàm byi râ matú, Yhâng é chángzô pé lé byi kat ri; haú mù, yhangmoq gi, haú bang lé gàm byi akô nghut ri.

<sup>7</sup> Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pê é matú jeju hkya-on luí, chángzô pé lé dum gàm byi nhang ri.

<sup>8</sup> Yuq hkanmó zô gyi bùm kô é htâng má, haú chángzô pé gi, amyit ahtâng lé nyhit mung bying shoq wó guq tsing yu ashí kó nghut ri.

<sup>9</sup> Zô é bang gi, byù myi hkying kô nghut ri; Yesuq gi, haú bang lé, nhang kat luí,

<sup>10</sup> Yhâng é chángzô pé eq rahá, lhai má wang ji mù, Dalamauhta mau má ê jé akô nghut ri.

<sup>11</sup> Hparishe pé gi, lé mù, Yesuq eq dang htíng htíng lhùm akô; hau htoq agó, yhangmoq gi, mauhkung má é kumlhá lé dúng é dông, Yhang lé chyam wú akô nghut ri.

<sup>12</sup> Yesuq gi, myit nò-kying kying luí, yhangmoq lé taí é gi, "Haí mù luí, shí ipyat lhé é byu pé gi, limik kumlhá dúng akô lhú? Ngò teng za taí kôlé, shí ipyat má é bang lé, hai kumlhá le tûn shit râ a nghut." gâ ri.

<sup>13</sup> Hau htâng, Yhang gi, yhangmoq lé pyâm to mù, lhai má dum taú wang ló luí, tû tap shut gû dap e ló bê nghut ri.

*Hparishe Pé Eq Herut É Múnchi Mht 16:5-12*

<sup>14</sup> Haú chángzô pé gi, muk yu chûng râ lé tô-myhî pyám kôluí, lhai hkaú má muk ralong za ru wó akô nghut ri.

<sup>15</sup> Yesuq gi, yhangmoq lé, "Nungmoq gi, Hparishe pé eq Herut é múnchi\* lé, sidiq luí, koi pyâm nyi keq." ga taí ri.

<sup>16</sup> Haú hkûn, yhangmoq gi, "Nga-nhûng chyang muk a bo é yanmai, haú su ga taí é nghut ri." ga luí, rayuq eq rayuq taí lhùm bum akô nghut ri.

<sup>17</sup> Haú su ga taí lhùm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù

taí lhùm nyi akô lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhum gi, ru htan nyi ashí kó lhú?

<sup>18</sup> Myoq dap to kôluí nhing, a myàng kó lhú? Nohkyap dap to kôluí nhing, a wó gyo kó lhú?

<sup>19</sup> Ngò, muk ngo long lé myhik hpé mù, byù ngo hkying lé byi tsô é hkûn, zô myhit shuq htâng lé, nungmoq hkâ-myhó mung wó guq tsing yu é lé, bun ashí kó lhú?" ga myi jáng, yhangmoq gi, "Raxe í mung." ga tû taí akô.

<sup>20</sup> Dum, Yesuq gi, "Ngò, muk nyhit long lé myhik hpé mù, byù myi hkying lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsing yu kô é lhú?" ga myi jáng, yhangmoq gi, "Nyhit mung." ga dum tû taí akô.

<sup>21</sup> Haú hkûn, Yesuq gi, "Haú nghut le nhing, ahkuí le, a sê gyo shi kó lhú?" ga, yhangmoq lé myi ri.

*Myoqjit Sû Rayuq Lé Lhoq Gê Byi É Hkyô*

<sup>22</sup> Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyang shuí lé lô mù, haú yuq lé záng byi râ matú, dúng tóngbán akô.

<sup>23</sup> Yesuq gi, myoqjit sù haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myi kat ri.

<sup>24</sup> Haú jáng, yhang gi, tu wú kat luí, "Byu pé gi, siggâm su dut luí, hkyô sô wún é lé, ngò myang ri." ga taí ri.

<sup>25</sup> Hau htâng, Yesuq gi, haú yuq é myoq má Yhâng é loq dum ke byi ri; haú hkûn, haú yuq é myoq gi, búng lô mù, ge byuq luí, haí lé le san za myàng bê nghut ri.

<sup>26</sup> Yesuq gi, haú yuq lé, "Wà hkaú má hkâwang ló lo." ga taí luí, yhâng é yhùm shut ló nhang kat bê nghut ri.

*Hkrisduq Ga, Petruq Yín Yu É Hkyô Mht 16:13-20; Luk 9:18-21*

\* **8:15** Shí má taí é *múnchi* gi, Hparishe pé eq Herut é mhoqshit hkyô lé, lhoq pyo é lé gâ lhé.

<sup>27</sup> Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myî ri.

<sup>28</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoî rayuq yuq nghut ri ga taí akô." ga, Yhang lé tú taí akô.

<sup>29</sup> Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tú taí ri.

<sup>30</sup> Yesuq gi, haú hkyô ó lé le a taí kyo rá matú, yhangmoq lé taí hkúm ri.

*Byu Yhangzo Gi, Sat Pyâm É Hui Luî, Dum Dui Toq Râ Hkyô*

*Mht 16:21-28; Luk 9:22-27*

<sup>31</sup> Hau htâng, Yhang gi, yhangmoq lé mhogshit é má, "Haú Byu Yhangzo gi, zing-rî é myo myo hui zo luî, suwún wuî, hkyangjong agyi pé, tarâ sará pé èq he-ngik pyâm é hui mù, sat pyâm é hui ra rá nghut lhê; nghut kôlhang, sum nyí nghû rá buinyî má, dum dui toq rá nghut lhê." gâ ri.

<sup>32</sup> Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yû mù, Yhang lé tân ri.

<sup>33</sup> Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

<sup>34</sup> Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luî, cháng ra rá nghut lhê.

<sup>35</sup> Hkâsu mù gâ le, yhumsing é asak lé hkyi yù naù sù ó yuq nghut kôle,

asak sum rá nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui rá nghut lhê.

<sup>36</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò rá lhú?

<sup>37</sup> Byù gi, yhumsing é asak woi-nyí lé, hai èq wó htaî yù rá lhú?

<sup>38</sup> Yubak mara myô é eq su-myi sulàng shut é ipyat shî má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpungwup shingkang bo é èq, haú chyoiyung maumang lagyô pé eq rahá jé lé é hkûn, hoq pyám rá nghut lhê.\* gâ ri.

## 9

<sup>1</sup> Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shî kó rá a nghut." ga taí ri.

*Yesuq É Ihpyô Isâm Htaî Lo É Hkyô*  
*Mht 17:1-13; Luk 9:28-36*

<sup>2</sup> Hkyuq nyí laî htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhum má doq ló akô; haú hkûn, yhangmoq é myoq hí té má, Yesuq é ihpyô isâm htaî lo ri.

<sup>3</sup> Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaù hpyu wú é nghut lhê.

<sup>4</sup> Eliyaq eq Mosheq gi, yhangmoq é hí má htoq shit mù, Yesuq eq dâng nyo lhûm nyi akô.

<sup>5</sup> Haú mù, Petruq gi, Yesuq lé, "Rabai ê, shí jowò má nga-nhúng nyi le ge ri; haú mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri.

† 8:29 Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. \* 8:38 Yer 3:8; Ezk 23:37; Hos 2:2-10

<sup>6</sup> Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haî taî râ le a sé mù, haû su gâ é nghut ri.

<sup>7</sup> Hau htâng, mhut htoq lô luî, yhangmoq lé htup zîng lô mù, mhut hkaû mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

<sup>8</sup> Haú hkûn jáng, chángzô pé gi, lhîngkhyuq má wú kat le, Yesuq za yhangmoq eq rahá nghut nyi é mai lai luî, ó lé le, a myàng lo kó nghut ri.

<sup>9</sup> Yhangmoq, bùm mai taû gyó lô kô é hkûn, Yesuq gi, haû Byu Yhangzo shi é mai a dum dui toq toq gi, yhangmoq myang é hkyô lé, ó lé le a taî kyo râ matú taî hkûm tô ri.

<sup>10</sup> Chángzô pé gi, dang haú lé myit má kat to kôluî, "Shi é mai dum dui toq râ." gâ é lichyúm lé, rayuq eq rayuq myî lhûm bum akô nghut ri.

<sup>11</sup> Hau htâng, yhangmoq gi, "Eliyaq hí lé ra râ nghut lhê ga, tarâ sará pé haî mù taî kô é lhú?" ga, Yesuq lé myî akô.

<sup>12</sup> Haú hkûn, Yesuq gi, "Eliyaq hí jé lé é gi, teng bê nghut luî, lhunglháng lé dum lajâng tô é nghut ri. Nghut kôlhang, haû Byu Yhangzo gi, myo myo hpuzo luî, he-ngik pyâm é hui ra nghut lhê ga le, Chyúmdang má kê to ashî, a nghut kó lhú?"

<sup>13</sup> Ngò, nungmoq lé taî kôlé, Eliyaq gi, jé lé bê nghut mù, yhang eq séng luî Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taî ri.

*Nat Dap É Yuqgè Zo Rayuq Lé Lhoq Gê Byî É Hkyô*

*Mht 17:14-20, 22-23; Luk 9:37-45*

<sup>14</sup> Yhangmoq gi, chángzô pé chyáng dum taû jé lô kô é hkûn, haú bang é lhîngkhyuq má byù moq mó zîng lé é lé le, tarâ sará pé, haú bang eq dang htíng htíng lhûm nyi kô é lé le, myang akô.

<sup>15</sup> Haú má nyi tô é lhunglhâng bang gi, Yesuq lé myang kat é eq, maû byuq kôluî, din ê mù, ê shi-kyâm akô nghut ri.

<sup>16</sup> Haú hkûn, Yesuq gi, yhangmoq lé, "Nungmoq gi, yhangmoq eq haî lé dang htíng htíng lhûm nyi akô lhú?" ga myî ri.

<sup>17</sup> Byù hpúng hkaû mâ é rayuq tû taî kat é gi, "Sarâ ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê.

<sup>18</sup> Nat haû gi, yhâng chyáng wàng hkanmó, yhang lé myî htoq má lhoq leqbat nhang ri; haû mù, yhang gi, nhut mai guttsû htoq lhê, zuì kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

<sup>19</sup> Haú hkûn, Yesuq gi, "Lumjîng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga taî kat ri.

<sup>20</sup> Haû mù, yhangmoq gi, yuqgè zo haú lé shuí lé lo akô; nat haû gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haû gi, myigùng má lêng leq luî goleng leng mù, nhut mai tsû-myup htoq nyi ri.

<sup>21</sup> Haú hkûn, Yesuq gi, yhângwa lé, "Yhang, isu dut é hkâ-myháng myáng bê lhú?" ga myi jáng, yhâng wa gi, "Zoshâng hkûn mai nghut bê.

<sup>22</sup> Nat haû gi, yhang lé lhoq sat pyám naû mù, myi má le, wui má le, anum num lêng wàng nhang wú bê nghut lhê; nghut kôlhang, Náng, rajung jung wó kut byî é nghut le gi, ngá hpe lé shogyo yù laq, garúm yù laq." ga tû taî ri.

<sup>23</sup> Yesuq gi, "Nàng, wó kut byî é nghut le gi, 'nghú, haî mù taî lhê lhú? Lumjîng myit bò su é matú gi, haî le wó dut lhê.'" ga, yhang lé taî ri.

<sup>24</sup> Haû zôshang é yhângwa gi, radá dâm, "Ngò lumjîng lhê; nghut kôlhang, ngá é lumjîng myit gi, shaû ashî nghut é yanmai garúm yù laq." ga taî garú ri.

<sup>25</sup> Yesuq gi, byù hpúng din zîng lé lô kô é lé, myàng jáng, haû agè ashop é nat lé, "Nojit, nhutjit nhang é nat ê!

Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo." ga tân kat ri.

<sup>26</sup> Haú hkûn, nat haú gi, garu mù, zoshâng haú lé wum kat langhtân nhâng luí, htoq ló byuq bê. Zoshâng haú gi, shî mâng gùng su dut byuq é yanmai, byù myo myo gi, "Yhang shî bê nghut ri." ga taí akô.

<sup>27</sup> Nghut kôlhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

<sup>28</sup> Yesuq, yhúmhkaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myí akô.

<sup>29</sup> Yesuq gi, "Haú jung nat lé gi, kyûdûng é dông za a nghut jáng, wó hkat htoq râ a nghut." ga, yhangmoq lé tâ taí ri.

<sup>30</sup> Yhangmoq gi, haú jowò mai htoq ló mù, Galile mau mai laí ló akô; nghut kôlhang, Yesuq gi, ó lé le a sé nhâng naù nghut ri.

<sup>31</sup> Haí mù gâ le, Yhang gi, "Haú Byu Yhangzo gi, byu pé é loq má ap pyâm é hui râ nghut lhê; haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byí nyi é yanmai nghut ri.

<sup>32</sup> Yhâng é chángzô pé gi, dang haú lé a sé gyo kôlhang, Yhâng chyáng a wám myí kó nghut ri.

*Kô Dik Sû Gi, Ó Yuq Nghut Lhê Lhú?  
Mht 18:1-5; Luk 9:46-48*

<sup>33</sup> Yhangmoq gi, Kaperna-um wà má jé e akô nghut ri. Yesuq gi, yhúmhkaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lú?" ga myí ri.

<sup>34</sup> Nghut kôlhang, yhangmoq gi, zim za nyi tô akô; hkâsu mù gâ le, ko dik sù gi, ó yuq nghut lhê nghû é hkyô lé, hkyolat má, yhangmoq dang chyin chyin lhum kô é yanmai nghut ri.

<sup>35</sup> Yesuq gi, zùng mù, haú chángzo raxe í yuq lé, wut yù luí, "Kô dik naù sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taí ri.

<sup>36</sup> Hau htâng, Yhang gi, zoshâng rayuq lé shuí yù mù, yhangmoq é gung gùng má shap to luí, dum bún yù mù, yhangmoq lé taí é gi,

<sup>37</sup> "Shî sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

*Nga-nhúng Lé Gyè A Kut É Sù Gi,  
Nga-nhúng É Hkyam Shut Nghut Lhê  
Gâ É Hkyô*

*Luk 9:49-50*

<sup>38</sup> Haú hkûn, Yohan gi, "Sarà ê! Náng é myìng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkûm pyám é nghut lhê." ga taí ri.

<sup>39</sup> Yesuq kúm gi, "Yhang lé hkâhkúm kó; Ngá myìng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut;

<sup>40</sup> Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê.

<sup>41</sup> Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê gâ é yanmai, ngá é myìng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

*Mara Shut Nhang É Hkyô*

*Mht 18:6-9; Luk 17:1-2*

<sup>42</sup> Ngo lé lumjìng é zoshâng wui mà é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má ê dú hkyó pyâm é huí é nghut lé gi, yhang é matú je gè râ nghut lhê.

<sup>43</sup> Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri.

<sup>44</sup> (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)\*

<sup>45</sup> Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyô pyâm é hui râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri.

<sup>46</sup> (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)

<sup>47</sup> Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dú hkyô pyâm é hui râ htoq má, myoq rají eq za, Garai Gasang é mingdán má wang le gi, náng é matú je ge ri.

<sup>48</sup> (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)\*

<sup>49</sup> Hkâsu mù gà le, hkungga sho lé xo kat luí lhoq sansêng é su, myi gi, yuq hkanmó lé lhoq sanséng râ nghut lhê.\*

<sup>50</sup> Xo gi, ge lhê. Nghut kôlháng, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguínón nyi keq." ga taí ri.

## 10

*Myi, Làng Gâng É Hkyô  
Mht 19:1-12; Luk 16:18*

<sup>1</sup> Hau htâng má, Yesuq gi, Kapernaum mai htoq ló mù, Yuda mau mâ é maukyo má ê jé luí, Yodan làng tú tap má dap ló bê nghut ri; byù myo myo gi, Yhâng chyáng dum zing lé lô

kôluí, Yesuq gi, Yhang lhaq kut nyi é eq rajung za, haú bang lé mhoqshit byi ri.

<sup>2</sup> Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhú?" ga myi é dong, Yhang lé chyam wú akô.

<sup>3</sup> Yesuq gi, "Mosheq gi, nungmoq lé, hkâsu ga hkunmó hkyô tô é lhú?" ga taú myi ri.

<sup>4</sup> Haú hkûn, yhangmoq gi, "Yuggè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byi tô ri." ga tú taí akô.

<sup>5</sup> Yesuq dum tú taí é gi, "Nungmoq é myit nhiklum htân kô é yanmai, Mosheq gi, tarâ haú lé ká tô é nghut lhê.

<sup>6</sup> Nghut kôlháng, mau htoq xâng hkun lé, Garai Gasang gi, 'yuggè eq myiwe lé hpan é nghut lhê'.\*

<sup>7</sup> 'Hau é yanmai, yuggè gi, yhum-sing înu îwâ chyáng mai htoq luí, yhangmyi eq rahá rading ralhum za kut nyi mù,

<sup>8</sup> yhangnhik gi, gungsho ralhum za dut byuq kó râ nghut lhê.'\* Haú mù luí, yhangnhik gi, í yuq a nghut lo é za, rayuq za dut bê nghut ri.

<sup>9</sup> Haú mù luí, Garai Gasang lhoq tsûm tô é lé, byù gi, a lhoq kang sháng gaq." gà ri.

<sup>10</sup> Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myi akô.

<sup>11</sup> Haú hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.

<sup>12</sup> Myiwe rayuq le, yhumsing é yhanglâng lé kâng pyám mù, yuggè góyuq eq dum hâng é nghut le gi, sulàng lú é hkyô lé kut bê nghut ri." ga tú taí ri.

*Zoshâng Wuí Eq Yesuq É Hkyô  
Mht 19:13-15; Luk 18:15-17*

\* **9:44** Bun zo 44, 46, gi, Chyúmlaiká myo myo má a bo é nghut lhê. ✧ **9:48** Esai 66:24 ✧ **9:49** Nhung 2:13 ✧ **10:6** Apûn 1:27 ✧ **10:8** Apûn 2:24



13 Byu pé gi, zoshâng wuì lé Yesuq záng byi sháng gaq ga, Yesuq chyáng shuì lé lo akô; nghut kôlhang, chángzô pé gi, yhangmoq lé lhom tân hkùm akô nghut ri.

14 Haù lé Yesuq myàng jáng, Yhang gi, wú nhik-yo naù luì, "Haù zoshâng wuì lé, Ngá chyáng lé nhâng keq; yhangmoq lé hkâhkùm zing to kô; hkâsu mù gâ le, Garai Gasâng é mingdán gi, haù su é bâng é mingdán ru nghut lhê.

15 Ngò, nungmoq lé teng za taí kôlé, ó yuq nghut kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haù má wó wâng râ a nghut." ga yhangmoq lé taí ri.

16 Hau htâng, Yesuq gi, zoshâng wuì lé bún yû mù, yhangmoq ahtoq má loq ke luì, shimân byi ri.

*Sùt Wó É Zorâm Rayuq É Hkyô  
Mht 19:16-30; Luk 18:18-30*

17 Yesuq gi, hkyô dum so xoq e ló é hkùn, byù rayuq gi, din lé lô mù, Yhâng é hí má hkyihput htuq luì, "Ge é Sará ê, ahtum abyuq é asak wó yû râ matú, ngò haì kut ra râ lú?" ga myi ri.

18 Haù mù, Yesuq gi, "Haì mù, Ngo lé ge é Sará nghu lhê lú? Garai Gasang mai lai luì, ge é ó yuq le a nyi.

19 Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!\*" ga bo tô é lé, náng sê lhê." ga tú taí ri.

20 Haù hkùn, haù yuq gi, "Sará ê, haù pé banshoq lé, ngò, zoshâng hkùn mai cháng bê nghut lhê." ga taí ri.

21 Yesuq gi, haù yuq lé wú tsuq to mù, yhang lé chyitdap luì, taí é gi, "Nàng kut râ rajung râ tô ashì; lô mù, náng wó miwó lé ûng pyám luì, myùng bang lé byi pyám aq; haù jáng, náng, mauhkûng htoq má sutzè wó râ nghut lhê; haù mù, Ngá htâng lé cháng aq." gâ ri.

22 Haù yuq gi, dang haù lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq lô byuq bê nghut ri.

23 Yesuq gi, lhîngkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haù-í yhang wuì ri-nhung!" ga taí ri.

24 Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuì ê, Garai Gasâng é mingdán má wàng râ matú, haù-í yhang wuì ri-nhung!"

25 Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luì râ nghut lhê." gâ taí ri.

26 Haù hkùn, chángzô pé gi, je riyhang maù byuq kômù, rayuq eq rayuq, "Haù su ru nghut le gi, ó yuq za hkyi yu é hui râ nghut lhê lú?" ga, taí lhum bum akô nghut ri.

27 Haù hkùn, Yesuq gi, yhangmoq lé wú kat mù, "Haù hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

28 Haù hkùn, Petruq gi, Yhang lé, "Ngamoq gi, wó é gû lhunglhang lé tô pyâm to luì, Náng htâng cháng bê nghut lhê." ga taí ri.

29 Haù mù, Yesuq tú taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuì eq yò pé lé tô pyâm tô é sù ó yuq nghut kôlé,

30 shí pyat lhê é yhûm pé, gumang gu-nhá wuì, înu pé, zo dù wuì eq yò pé lé, rashô tú wó hkam yù luì, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê.

31 Nghut kôlhang, hí nghut nyi é bang myo myo gi, htâng gyó byuq kó

\* 10:19 Htoq Lô 20:12-16

râ nghut mù, htâng gyó nyi bang yuq gi, hí bekô râ nghut lhê." gâ ri.

*Yesuq, Yhang Shî Râ Hkyô Lé Dum Taí É Hkyô*

*Mht 20:17-19; Luk 18:31-34*

<sup>32</sup> Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi,

<sup>33</sup> "Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byi pyâm é hui râ nghut lhê; haú bang gi, Yhang lé, shî râ mara byi luí, tûngbau pé é loq má ap byi pyám kó râ nghut lhê.

<sup>34</sup> Haú bang gi, Yhang lé, wuizui kut pyâm é, sôkan byé gyûn é, nhuq bat é kut yù mù, sat pyám kó râ nghut lhê. Hau htâng sum nyi má, Yhang dum dui toq lô râ nghut lhê." gâ ri.

*Yakuq eq Yohan nhik dung é hkyô*

*Mht 20:20-28*

<sup>35</sup> Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sará ê, ngá-nhik dúng é gû banshoq, Nang kut byi râ lé, ngá-nhik ô nau ri." ga taí akô.

<sup>36</sup> Haú hkûn, Yhang gi, "Ngò, nungnhik lé haí kut byi râ ô naú akô lhú?" ga myí ri.

<sup>37</sup> Yhangnhik gi, "Náng é hpung-wup shingkang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tú taí akô.

<sup>38</sup> Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm\* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tú taí ri.

\* **10:38** Góm eq baptisma gâ é gi, jamjau hui râ eq shî râ lé, taí nau é nghut lhê.

<sup>39</sup> Haú hkûn, yhangnhik gi, "Nga-nhik wó dut lhê." ga tú taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

<sup>40</sup> Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byi jung a nghut. Jowò haú pé gi, hen to byi é hui bâng matú za nghut lhê." ga yhangnhik lé taí ri.

<sup>41</sup> Haú su gâ é hkyô lé, haú gotû chángzo raxe yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri.

<sup>42</sup> Yesuq gi, yhangmoq banshoq bang lé wut tsing yù luí, "Tûngbau pé lé uphkan é ga bang gi, tûngbau pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê.

<sup>43</sup> Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut naú sù ó yuq nghut kôle, nungmoq é dui-nhâng zoshâng dut ra râ nghut lhê.

<sup>44</sup> Hau htoq agó, nungmoq má ushuq dut naú sù ó yuq nghut kôle, banshoq bâng é jùn dut ra râ nghut lhê.

<sup>45</sup> Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

*Myoqjit Sû Barateme, Myoq Dum Myang É Hkyô*

*Mht 20:29-34; Luk 18:35-43*

<sup>46</sup> Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyi kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri.

<sup>47</sup> Yhang gi, Nazaret wà byù Yesuq lai ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

<sup>48</sup> Haú mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

<sup>49</sup> Haú mù luí, Yesuq gi, yap nô kat mù, "Yhang lé ji kat keq." ga tái jáng, yhangmoq gi, "Myit ngón aq hkoí; Yhang, nàng lé ji nyi ri; toq aq." ga myoqjit sù haú lé tái akô.

<sup>50</sup> Haú hkûn, haú yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

<sup>51</sup> Yesuq gi, yhang lé, "Ngò, nang lé haí kut byi râ ô nau ri lú?" ga myi jáng, yhang gi, "Sarà ê, ngò myoq myàng nau ri." ga tû tái ri.

<sup>52</sup> Yesuq gi, "Ló aq hkoí, nàng é lumjîng myit gi, nàng lé lhoq gê byi bê nghut ri." ga tái kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

## 11

*Yesuq, Yerusalem Wà Mó Má Wang  
Ló É Hkyô*

*Mht 21:1-11; Luk 19:28-40; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé,

<sup>2</sup> "Nungnhik, hí mâ é wà má ê keq; wà haú má wang é hkûn jáng, ó le a jî wú shí é logúng zo tái to lánng é lé, ê myâng kó râ nghut lhê; haú lé hpyi yù mù, Ngá chyáng she lò keq.

<sup>3</sup> Byù rayuq yuq mai, 'Haí mù, haú su kut nyi akô lú?' ga nungnhik lé lhom myi jáng, 'Shí du lé, haú Yhumsîng râ ri ga, razup má dum taú dé byi râ nghut lhê.' nghû tû tái keq." ga pyîng luí, nhang kat ri.

\* **11:9** Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkyá-on dang dông chung é nghut lhê. ✨ **11:10** Hkyá-on 118:25-26

<sup>4</sup> Haú nhik gi, e ló mù, hkyô mó yâm mâ é hkumdong nàm má tái tô é logúng zo radu lé, ê myâng kôluí, haú lé tái hpyi nyi akô.

<sup>5</sup> Haú hkûn, haú má yap tô é bang ra-am gi, "Haí mù, logúng tái hpyi nyi akô lú?" ga myi akô.

<sup>6</sup> Haú jáng, yhangnhik gi, Yesuq pying kat é eq rajung za tái kyo kôjáng, yhangmoq gi, she ló râ ahkáng byi kat akô nghut ri.

<sup>7</sup> Yhangnhik, logúng zo haú lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri.

<sup>8</sup> Byù myo myo gi, yhangmoq é buhîng pé lé, hkyô má hkyut hkang byi akô; ra-am gi, yò pé má zân yu é mhandíng lé hkang byi akô nghut ri.

<sup>9</sup> Hí má so bang eq htâng má châng é bang gi, "Hosana!"

Haú Yhumsîng é myîng mai jé lé lô Sù gi, hkungsô wó nyi sháng gaq ô!

<sup>10</sup> Jé lé lô râ nghut é, nga-nhûng é îwa Dawiq é mingdán gi, hkungsô wó nyi sháng gaq ô!

Htoq tsáng myhâng má hosana nghut sháng gaq ô! ✨

ga luí, tái garû bum akô nghut ri.

<sup>11</sup> Yesuq gi, Yerusalem wà mó má jé mù, noqkuq yhûm má wang é luí, lînghkyuq mâ é jung hkangmó lé wú ri; nghut kôlhang, buí gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

*Maihpáng Gâm Ashi A Zui Râ Matú  
Tái É Hkyô*

*Mht 21:18-19*

<sup>12</sup> Hau htang nyi, yhangmoq, Behtani wà mai htoq ló kô é hkûn, Yesuq gi, zo mut bê nghut ri.

<sup>13</sup> Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashi zui lhê laq ga é jé wú le, ahaq mai lai luí,

haî le a myàng nghut ri. Haî mù gâ le, maihpáng-shi zui yâm a nghut é yanmai nghut ri.

<sup>14</sup> Haû mù, Yesuq gi, shigâm haû lé, "Ahkuî mai gi, náng chyáng mâ é ashi, ó yuq le a myàng zo lo kó sháng gaq." ga taî ri. Yhâng é chángzô pé gi, haû su ga taî é dang lé wó gyô yu akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mht 21:12-17; Luk 19:45-48; Yhn 2:13-22*

<sup>15</sup> Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haû mâ é zè ung zè wuî kut nyi é bang lé, hkat htoq pyám luî, ngùn htaî zo bâng é siboî pé eq hpûngkyui ung zo bâng é tanghkuq pé lé tu mhuq pyám byî ri.

<sup>16</sup> Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri.

<sup>17</sup> Yesuq, yhangmoq lé mhoqshit é gi,

"Ngá yhûm gi, byù myû lhunglhâng bâng é matú, kyûdung yhûm ga râ nghut lhê.\*

ga kê tô é a nghut kó lhú? Nghut kôlhâng, nungmoq gi, 'damaq hkyûng' kut pyám bekô nghut ri." gâ ri.\*

<sup>18</sup> Hkyangjong agyi pé eq tarâ sará pé gi, haû lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhâng, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

<sup>19</sup> Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

*Maihpáng Gâm Nyhuî Shi Byuq É Hkyô*

*Mht 21:20-22*

<sup>20</sup> Htang napkyó, yhangmoq sô lai ló le, maihpáng gâm gi, amyit mai yhang nyhuî kyuq shi byuq é lé myang akô.

<sup>21</sup> Petruq gi, myit bûn kat luî, "Rabai ê, wú aq! Nàng nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé taî ri.

<sup>22</sup> Haû hkûn, Yesuq gi, "Garai Gasang lé lumjîng keq.

<sup>23</sup> Ngò, nungmoq lé teng za taî kôlé, ó yuq nghut kôle, i-myit má úng-âng é hkyô a bo é za, yhumsîng taî é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyô wâng aq.' ga taî le lhâng, haû hkyô dut byi râ nghut lhê.

<sup>24</sup> Haû mù luî, Ngò, nungmoq lé taî kôlé, nungmoq haî dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê.

<sup>25</sup> Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq;

<sup>26</sup> (Nghut kôlhâng, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tû taî ri.†

*Yesuq É Ahko Ahkáng Lé Myî Chyam É Hkyô*

*Mht 21:23-27; Luk 20:1-8*

<sup>27</sup> Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù,

<sup>28</sup> "Hai ahko ahkâng èq, Nàng, shí pé lé kut nyi lhê lhú? Haû su kut râ ahko ahkáng, Nang lé ó yuq byi é lhú?" ga myî akô.

<sup>29</sup> Haû jáng, Yesuq gi, "Ngò le, nungmoq lé rajung myî wú kôlé, tû taî wú keq; haû hkûn, hai ahko ahkâng èq, Ngò, shí pé kut é hkyô lé taî kyo râ nghut lhê.

<sup>30</sup> Yohan byi é bapisma gi, mauhkûng mai lhú? A nghut jáng,

\* 11:17 Esai 56:7    \* 11:17 Yer 7:11    † 11:26 Bun zo shî gi, Chyúmlaika ra-am má za bo lhê.

byu chyáng mai lúh? Taí wú keq!" ga taú myí kat ri.

<sup>31</sup> Haú hkûn, yhangmoq chôm hpyê lhum kô é gi, "Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lúh?' ga râ nghut;

<sup>32</sup> 'Byu chyáng mai nghut lhê.' nghû jáng le..." gâ ri. (Yohan gi, my-iqhtoi rayuq gè gè nghut lhê ga, lunglhang bang lumjîng bûm kô é yanmai, yhangmoq gi, haú byu pé lé gyuq bum akô nghut ri.)

<sup>33</sup> Haú mù, yhangmoq gi, Yesuq lé, "Ngamoq a sé." ga tú taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

## 12

*Tsibiyiq Hkyâm Saí Bang Lé Dangtú Yu É Hkyô*

*Mht 21:33-46; Luk 20:9-19*

<sup>1</sup> Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lhîngkyuq kyâm to luí, tsibiyiq wing pyik htoq râ dongkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri.

<sup>2</sup> Kyôshu yoq jé jáng, yhang gi, yhang yù âng é tsibiyiq shi ê yù râ matú, dui-nhâng zoshâng rayuq lé, hkyâm saí zo bâng chyáng nhang kat ri.

<sup>3</sup> Nghut kôlhang, haú bang gi, haú yuq lé lhom chyup bat luí, loq kôm taú nhang kat akô.

<sup>4</sup> Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byí kôluí, hoq lhoq hpû kat akô nghut ri.

<sup>5</sup> Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé

le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

<sup>6</sup> Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

<sup>7</sup> Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yù râ nghut lhê.' ga rayuq eq rayuq taí lhûm bum akô.

<sup>8</sup> Haú mù, yhang lé chyup yù luí, sat pyám mù, hkyâm shinggan shut dú htoq pyâm akô nghut ri.

<sup>9</sup> Haú jáng, tsibiyiq hkyâm yhumsîng gi, yhangmoq lé hkâsu kut râ lúh? Yhang gi, ê mù, haú hkyâm saí zo bang lé sat pyám luí, hkyâm haú lé, góbang lé htoq ngho byí pyám râ nghut lhê.

<sup>10</sup> Chyúmdang má, 'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

<sup>11</sup> Shí hkyô gi, haú Yhumsîng kut é nghut luí, nga-nhûng é myoq hí má mauhpo dut bê nghut ri.' ga bò tô é lé, nungmoq a nghap wú kó lúh?"\*

gâ ri.

<sup>12</sup> Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

*Kehtaq\* Lé Kang Kat Byí É Hkyô*  
*Mht 22:15-22; Luk 20:20-26*

<sup>13</sup> Hau htâng má, yhangmoq gi, Yesuq é dang má mara hô luí Yhang lé chyup yù râ matú, Hparishe pé ra-am eq Herut é byu pé ra-am lé, Yesuq chyáng nhang kat akô.

\* 12:11 Hkya-on 118:22-23 \* 12:12 Kehtaq gâ é gi, "hkoséng" gâ é nghut lhê.

14 Haú bang gi, Yhâng chyáng lé jé kômù, "Sarà ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byî é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byî le gi, ge lhê lhú?"

15 Ngamoq kat ra râ lhú? A kat ra râ lhú?" ga Yhang lé taí akô.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri.

16 Haú hkún, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myî ri.

Yhangmoq gi, "Kehtaq é nghut ri." ga tû taí akô.

17 Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

### *Saduke Pé, Yesuq Lé Myî Chyam É Hkyô*

*Mht 22:23-33; Luk 20:27-40*

18 Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

19 Yhangmoq myi kô é gi, "Sarà ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byî ri.

20 Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi lô byuq bê nghut ri.

21 Lanong yuq gi, yhangmang mó é chui lé gon mù, zo dù a dap é za shi lô byuq bê. Lalaq yuq le, haú eq rajung za dut byuq bê nghut ri.

22 Haú nhiktâng wuì nyhit yuq gi, zo dù a dap é chyat shi lô byuq bùm bekô

nghut ri. Htâng má, myiwe myhí haú le châng shi lô byuq bê nghut ri.

23 Haú mù luí, haú dum dui toq é buinyi má, myiwe myhí haú gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

24 Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú?"

25 Haú shi byuq bê bang dum dui toq é hkún gi, myi byi myi yù hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê.

26 Shi é mai dum lhoq dui toq é hkyô eq séng luí, Mosheq kâ tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.\* ga kâ tô é lé, nungmoq a nghap wú kó lhú?"

27 Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

### *Ahkyak Dik É Jep É Tarâ*

*Mht 22:34-40; Luk 10:25-28*

28 Tarâ sará rayuq gi, lé lô mù, yhangmoq taí htíng lhum nyi kô é lé, lé wó gyô ri. Yhang gi, haú bang lé, Yesuq rago tû taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myî ri.

29 Haú jáng, Yesuq gi, "Ahkyak dik é jep é tarâ gi, 'Israellaq byu pé ê, gyo wú keq! Nga-nhúng é Yhumsîng Garai Gasang za, Garai Gasang nghut lhê.

30 Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq, náng é wum-o banshoq eq, chyitdap râ lhê.\* gâ é nghut lhê.

31 Hau htang lhum gi, 'Náng gûng lé nàng chyitdap é su, náng é chyangnâm mâ é bang lé le chyitdap aq.'\* gâ é nghut lhê. Shî í lhûm htoq kô é tarâ gotû a joq lo." ga yhangmoq lé tû tai ri.

32 Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotû a nyi lo ga nàng taí é gi, têng ri.

33 Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé nàng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga tai ri.

34 Yesuq gi, yhang hpaqchyí bo é dông tû tai nyi é lé myàng jáng, "Nàng gi, Garai Gasang é mingdán eq a we lo nghut ri." ga yhang lé tai kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Luk 20:41-44*

35 Yesuq, noqkuq yhûm má mhoqshit nyi é hkûn lé tai é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lhê gâ akô lhú?"

36 Dawiq gi, Chyoiyúng Woi-nyí èq tai nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga tai ri.\* gâ ri.

37 Haú mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?" gâ ri.

Byù hpûng mó gi, Yhâng é dang lé, gabú myit èq gyô nyi bum akô nghut ri.

38 Yesuq gi, mhoqshit uchyang tai é má, "Tarâ sará pé lé sidiq nyi keq. Yhangmoq gi, réng é buhîng wut chúng mù, sô yông wún luí, gai pé má lhom shi-kyâm yù râ lé le,

39 tarajong pé mâ é ahkyak dik é zùng jang pé eq poi pé má é réng é zùng jowò pé má myang zùng râ lé le, ô nau nyi bum akô.

40 Yhangmoq gi, chuimó pé é yhûm-yò pé lé hpýoq zo hpýoq shuq kôluí, kyû hîng hîng dúng shit mhaú é bang nghut akô. Haú su é bang gi, dam byí é je riyhang hui zo kó râ nghut lhê." gâ ri.

### *Chuimó Myhí Kat É Alu Ngùn*

*Luk 21:1-4*

41 Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô.

42 Haú hkûn, myung é chuimó myhí rayuq gi, lé mù, gyi htìngchap ngùn zo í chap lé kat ri.

43 Yesuq gi, Yhâng é chángzô pé lé wut yù mù, "Ngò, nungmoq lé teng za tai kôlé, shî myung é chuimó myhí gi, góbang banshoq htoq má je myo kat bê nghut ri.

44 Haú góbang banshoq gi, yhumsîng agùn agó wó é má é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga tai ri.

## 13

### *Ló Htâng Buinyi Má Dut Lò Râ Hkyô*

*Mht 24:1-21, 29-35; Luk 21:5-33*

1 Yesuq, noqkuq yhûm mai htoq ló é hkûn, Yhâng é chángzo rayuq gi, "Sará ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé tai kat ri.

2 Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lháng a kê lhum loshoq,

\* 12:31 Nhang 19:18 \* 12:36 Hkya-on 110:1

hpyoq hpyi pyâm é hui râ nghut lhê." gâ tù taí ri.

<sup>3</sup> Yesuq gi, Tsanlun Bùm má, no-qkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù,

<sup>4</sup> "Haú hkyô pé gi, hkâ-nhám dut lò râ lú? Haú dut lò râ hkûn, hkasû é kumlhá htoq lô râ nghut lhê lú? Ngamoq lé taí kyô wú laq." ga Yhang lé baú myí akô nghut ri.

<sup>5</sup> Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq.

<sup>6</sup> Hkâsu mù gâ le, 'Ngò gi, haú yuq\* nghut lhê.' ga, Ngá myíng lé lêng é byù myo myo pô htoq lô mù, byù myo myo lé shuí nghoq kó râ nghut lhê.

<sup>7</sup> Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dân kó. Haú hkyô pé gi, dut lò râ za nghut lhê; nghut kôlhang, ló htâng é buinyi gi, a nghut shi.

<sup>8</sup> Byù ra-myû eq ra-myû, mingdán ralhum eq ralhum majan zân lhum lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashî.

<sup>9</sup> Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá myíng é yanmai, mauzau wuî eq hkohkam pé é hí má, saksé dông yap ra kó râ nghut lhê.

<sup>10</sup> Haú gabú danglù gi, amyû ban-shoq lé hí hko kyo ra râ nghut lhê.

<sup>11</sup> Nungmoq gi, chyup yu é hui luí, jep huí é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

<sup>12</sup> Nhiktâng gi, nhiktâng yhangchang, îwa gi, yhangzo lé, shî shoq ap pyâm

lhum kó râ nghut lhê; zo wuî gi, mó wuî lé gumlau toq mù, sat pyâm nhâng kó râ nghut lhê.

<sup>13</sup> Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihtûm jé shoq wó hkam jân nyi é sù gi, hkyi yu é hui râ nghut lhê.

<sup>14</sup> 'Haú lhoq hten lhoq hpyoq é achag achyut hkyô\* gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpang doq ló kó sháng gaq.

<sup>15</sup> Yhumhkûng htoq má nyi tô é sù gi, yhúmkaû mã é zè haí lé le, a ló gyó wang yù lo sháng gaq.

<sup>16</sup> Yò má nyi tô é sù gi, yhâng é buhîng lé a ló taú yu nyi lo sháng gaq.

<sup>17</sup> Haú buinyi pé má, zogùng dut é myiwe wuî eq naú huq ashî nghut é înu wuî gi, hkâ-í yhang wuîhke bekó nghut ri myhi-nhung.

<sup>18</sup> Haú hkyô gi, gyoqmyò má a dut sháng gaq, kyûdûng nyi keq.

<sup>19</sup> Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuîhke jamjau mó gi, haú buinyi pé má dut lò râ nghut lhê; haú su é hkyô gi, htàngnùng má hkâ-nhám le dum dut lo râ a nghut.

<sup>20</sup> Buinyi haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri.

<sup>21</sup> Haú ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó.

<sup>22</sup> Hkâsu mù gâ le, Hkrisduq apyoq pé eq myiqhtoí pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga,

\* 13:6 Haú yuq gâ é gi, Hkrisduq lé gâ é nghut lhê. ✧ 13:14 Dan 9:27; 11:31; 12:11



kumhá pé eq laklaí kumhá pé lé kut shit kó râ nghut lhê.

<sup>23</sup> Haû mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

<sup>24</sup> Buinyi haú pé má, wuîhke jamjau haú pé laí é htâng,

'Buì gi, noq byuq mù, lhamó gi, a tsò dut byuq râ nghut lhê;

<sup>25</sup> kyî pé gi, mauhkûng mai byit gyó lo bùm mù, mauhkûng mã é wum-o a-tsam pé gi, lhoq nhûn é huí bùm kó râ nghut lhê.\*

<sup>26</sup> Haú hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkang eq le, gyó lé lo é lé, byu pé byu-myàng kó râ nghut lhê.

<sup>27</sup> Hau htâng má, Yhang gi, Yhâng é maumang lagyô pé lé nhang kat mù, maumyí chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsíng yù nhâng râ nghut lhê.

<sup>28</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, buì nyé nám chyâng lò bê lé, nungmoq sê lhê.

<sup>29</sup> Haû eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyi bê hkyô lé, nungmoq sé lo keq.

<sup>30</sup> Ngò, nungmoq lé teng za taí kôlé, shí pyat mã é byu pé a ban shi byuq shimá, haú hkyô pé banshoq dut byuq râ nghut lhê.

<sup>31</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

### *Haû Buinyi Eq Ahkyíng Lé, Ó Le A Sé Mht 24:36-44*

<sup>32</sup> Buinyi eq ahkyíng haú lé gi, ó yuq le a sé; mauhkûng htoq mã é maumang lagyô pé lháng a sé; haû Zo le a sé; haû Îwa za ru sê lhê.

<sup>33</sup> Haû mù, nungmoq gi, ahkyíng haû hkâ-nhám jé râ lé, a sé kô é yan-mai, sidiq nyi keq! Machya nyi keq!

<sup>34</sup> Haû gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byi to mù, hkum zúng sù lé le, machya nyi râ matú pying to luí, yhâng yhûm lé, haû dui-nhâng zoshâng wui chyáng ap pyâm to mù, byin we shut htoq lô byuq é sù eq pung ri.

<sup>35</sup> Haû mù, haû Yhumsîng hpó gi, myinhtâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyi keq.

<sup>36</sup> Haû a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê.

<sup>37</sup> Ngò, nungmoq lé, 'sidiq machya nyi keq,' nghû taí é eq rajung za, yuq hkangmó lé le, taí é nghut lhê." ga taí ri.

## 14

### *Yesuq, Xû But Byi Huí É Hkyô*

*Mht 26:1-16; Luk 22:1-6; Yhn 11:45-53; 12:1-8*

<sup>1</sup> Ahkuí, haû Lhoqlhai Poí eq múmchi a kat é Muk Zo Poí jé râ í nyi za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akô nghut ri.

<sup>2</sup> Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akô.

<sup>3</sup> Yesuq gi, Behtani và má nyi é manggâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaû é namngón xû bo é alabasta (luq hpyû) bòng yu lé lô mù, bòng haú lé láng hkyui luí, namngón xû haú lé Yesuq é ulhum má hut gyun byi ri.

<sup>4</sup> Haú má nyi tô é bang ra-am gi, wú nhik-yô é myit èq, rayuq eq rayuq taí

\* **13:25** Esai 13:10; 34:4 \* **14:5** Denari rachap gi, byù rayuq é ra-nyí lhê é zuihpau eq wuí ri.

lhum kô é gi, "Haî mù, namngón xû lé aha agó kut pyâm lhê laq?

<sup>5</sup> Haû namngón xû lé, denari\* sùm sho eq ung luî, myùng bang lé byî le ge lhê mhaî!" gâ akô. Yhangmoq gi, myiwe myhí hau lé le, gyai chôm tân akô.

<sup>6</sup> Nghut kôlhang, Yesuq gi, yhangmoq lé, "Myiwe zo haú lé, hkâtân nyî kó; haî mù, yhang lé i-myt lhoq myo nhang nyî akô lhú? Yhang gi, Ngá é ahtoq má ge é hkyô kut bê nghut ri.

<sup>7</sup> Haû myùng bang gi, nungmoq eq rahá hkâ-nhám le nyî râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyî nyî râ sù a nghut.

<sup>8</sup> Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê.

<sup>9</sup> Ngò, nungmoq lé teng za taí kôlé, haû gabú danglù lé mingkan gón hko kyô é jowò hkangmó má, yhang lé myit bún é dông, yhang kut é hkyô shî lé, taí kyo bekô râ nghut lhê." ga taí kyo ri.

<sup>10</sup> Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pé chyáng e ri.

<sup>11</sup> Haû bang gi, haû hkyô lé lhom wó gyo kôjáng, gyô gabú luî, yhang lé ngùn byî râ ga, danggidiq byî akô. Haû mù, yhang gi, Yesuq lé ap pyám râ hkyô ho nyî bê nghut ri.

### *Yhumsing É Myinzang*

*Mht 26:17-30; Luk 22:7-23; Yhn 13:21-30*

<sup>12</sup> Haû htungli joq é eq rajung za, Lhoqlhai Poî hkungga sauzo jaú byî é, múnchi a kat é Muk Zo Poî sâng-hi nyî má, Yesuq é chángzô pé gi, Yesuq lé, "Nàng zo râ Lhoqlhai Poî lé, ngamoq hkâmá é món to râ lhú?" ga myí akô.

<sup>13</sup> Haû mù, Yhang gi, chángzo í yuq lé, "Nungnhik, myuq hkaû shut wang ló keq, wuì yambú waq é byù rayuq

lhom hui râ nghut lhê; haú hkûn, nungnhik gi, yhâng htâng cháng keq.

<sup>14</sup> Haú yuq, wang ló é yhûm mâ é yhumsing lé, 'Ngò, Ngá é chángzô pé eq rahá, Lhoqlhai Poî lé zo râ bíng wap hkâmá nghut lhê lhú ga, Sará myí nhang kat ri.' nghû taí keq.

<sup>15</sup> Haú hkûn, hen to gû nghut é, ahtoq mâ é wap mó lé lhom tún shit râ nghut lhê. Wap haú má, nga-nhûng é matú ê hen to keq." ga taí luî, nhang kat ri.

<sup>16</sup> Chángzo haú nhik gi, htoq e ló mù, myuq hkaû má wang e ló le, Yesuq taí kat é eq roq za é myâng kômù luî, Lhoqlhai Poî lé, món to bekô nghut ri.

<sup>17</sup> Myinhtâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri.

<sup>18</sup> Yhangmoq gi, siboî má nghê mù, zô nyî bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyî é bang nungmoq mâ é rayuq sù gi, Ngo lé ap pyám râ nghut lhê." ga taí ri.

<sup>19</sup> Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaî?" ga Yhang lé myí akô.

<sup>20</sup> Haú hkûn, Yhang gi, "Haú yuq gi, haû raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê.

<sup>21</sup> Haû Byu Yhangzo gi, Yhang eq séng luî kâ tô é eq rajung za, shî râ za nghut lhê. Nghut kôlhang, haû Byu Yhangzo lé ap pyám é sù gi, dingnyé wó ri; haú yuq gi, a hku lé le lháng, je ge ri.

<sup>22</sup> Yhangmoq zo nyî kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

<sup>23</sup> Hau htâng, Yhang gi, góm lé le, yù mù, jeju hkya-on luî, yhangmoq lé byî ri; yhangmoq banshoq bang gi, haú lé yù shuq akô nghut ri.

<sup>24</sup> Yesuq gi, yhangmoq lé, "Shî gi, byù myo myô é matú htoq pyám é,

dangshikaq eq sêng é Ngá sui nghut lhê.

<sup>25</sup> Ngò, nungmoq lé teng za taí kôlé, Ngò, Garai Gasâng é mingdán má, tsi-byiq wing asik lé shuq é buinyì a jé jé, tsi-byiq wing lé dum shuq râ a nghut lo." ga taí ri.

<sup>26</sup> Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Hkyô Lé, Te Tai É Hkyô*

*Mht 26:31-35; Luk 22:31-34; Yhn 13:36-38*

<sup>27</sup> Yesuq gi, yhangmoq lé, "Nungmoq lhunglhâng bang gi, myit lingbat kó râ nghut lhê; hkâsu mù gâ le,

'Haù sau zúng sù lé, Ngò bat sat pyám mù, sau pé gi, lhoq pyo pyâm é hui kó râ nghut lhê.<sup>✠</sup>

ga kê tô ri.

<sup>28</sup> Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." ga taí ri.

<sup>29</sup> Haù hkûn, Petruq gi, "Góbang banshoq myit lingbat kôlhâng, ngò gi, myit lingbat râ a nghut." ga taí kat ri.

<sup>30</sup> Haù mù, Yesuq gi, "Ngò, nàng lé teng za taí lé, hkû-nyí, hkû-myín yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

<sup>31</sup> Nghut kôlhâng, Petruq gi, "Ngò, Nàng eq rahá shí râ dut kôlhâng, Nang lé ngò he-ngik pyám râ a nghut." ga zuq zuq taí ri. Góbang banshoq le, haù su ga châng taí bum akô nghut ri.

*Get-samane Gâ é Jowò Má Kyûdûng É Hkyô*

*Mht 26:36-46; Luk 22:39-46*

<sup>32</sup> Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû é dúng nyi é u lé, shí má zùng lánng keq." ga taí ri.

<sup>33</sup> Yesuq gi, Yhang eq rahá Petruq, Yakuq, Yohan pé lé, shuí chûng ri.

Haù hkûn, Yhang gi, myit gyai a ngón é eq myit wuîhke é hui mù,

<sup>34</sup> yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí má lánng nyí keq." ga taí ri.

<sup>35</sup> Yesuq gi, haù mai ratsuí zo sô é mù, myigùng má gop byên to luí, ahkyíng haù lé ge lhoq lhai pyám byí le gi, Yhâng chyáng mai lhoq lhai pyám byi râ matú,

<sup>36</sup> "Aba,† Áwa ê, Nàng gi, haí le wó dut é Sù nghut lhê. Góm‡ shí lé, Ngá chyáng mai yu pyám byi laq. Nghut kôlhâng, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

<sup>37</sup> Hau htâng, Yhang gi, Yhâng é chángzô pê chyáng dum taù lo le, yhangmoq yhup myhí to kô é lé lo myang ri. Haù mù, Yhang gi, Petruq lé, "Simun, nàng yhup ngón nyi lhê lhú? Razup za lánng a wó machya nyi lhú?

<sup>38</sup> Gunlaú é a hui sháng gaq, machyâ luí, kyûdûng nyi keq. Haù woi-nyí gi, kâm nyi kôlhâng, gungsho gi, wum nyhôm nyi ri." ga taí ri.

<sup>39</sup> Yesuq gi, radâm dum é mù, hí lé dúng é dang lé za, é dung ri.

<sup>40</sup> Yhang dum taù lo le, yhangmoq gi, myoqkuq lai kô é yanmai, yhup myhí to lánng kô é lé, lo dum myang ri. Yhangmoq gi, Yhang lé haí taí râ a sé dut byuq akô nghut ri.

<sup>41</sup> Yesuq gi, sum dâm nghû râ lhîng má, yhangmoq chyáng dum taù jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Gé bê! Haù ahkyíng gi, jé bê nghut luí, haù Byu Yhangzo gi, yubak dap bâng é loq má ap pyâm é hui râ nghut bê.

<sup>42</sup> Toq keq! Ló losháng hkoi! Ngo lé ap pyám râ sù gi, jé lé lô bê nghut ri." ga taí ri.

*Yesuq, Chyup Yû Huí É Hkyô*

*Mht 26:47-56; Luk 22:47-53; Yhn 18:3-12*

✠ 14:27 Zhk 13:7 † 14:36 Aba gâ é gi, Aramaik dang dông "Áwa" gâ é lichyúm nghut lhê. ‡ 14:36 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

<sup>43</sup> Yesuq, dáng nyo nyi ashî u lé, haû chángzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

<sup>44</sup> Yesuq lé ap pyâm râ sù gi, yhangmoq lé, "Ngò bopuq puq é sù gi, haû yuq nghut bê; Yhang lé chyup yû mù, zúng shuí ló keq." ga kumlhá byî to bê nghut ri.

<sup>45</sup> Yudaq gi, Yesuq chyáng hkyê za ê mù, "Rabai ê." ga taí luî, Yhang lé bopuq puq byî ri.

<sup>46</sup> Haû hkûn, yhangmoq gi, Yesuq lé chôm zuí zìng mù, chyup yû bekò nghut ri.

<sup>47</sup> Haû mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>48</sup> Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akò lú?"

<sup>49</sup> Ngò gi, nyí wuî, nungmoq eq rahá nyi luî, noqkuq yhûm má mhoqshit byî nyi kôlhang, nungmoq, Ngo lé a chyup yû kô é nghut lhê. Nghut kôlhang, Chyúmdang pé gi, dik ra râ nghut lhê." ga taí ri.

<sup>50</sup> Haû hkûn, haû chángzô pé gi, Yesuq lé tô pyâm to kôluî, h pang byo byuq bekò nghut ri.

<sup>51</sup> Buhîng za wut é zorâm rayuq gi, Yesuq htâng cháng wún ri. Yhangmoq gi, haû yuq lé, wó kyaq zui kô é hkûn,

<sup>52</sup> yhang gi, buhîng lé hkyut hkyô pyâm to mù, gùngchîn hpang ló byuq bê nghut ri.

*Yudaq Byìn Tú Wapdoq Má Jéyáng Huî É Hkyô*

*Mht 26:57-68; Luk 22:54-55, 63-71; Yhn 18:13-14, 19-24*

<sup>53</sup> Yhangmoq gi, Yesuq lé, hkyangjong mó chyáng shuí e akò; haû hkyangjong agyi pé lhunglhang

bang, suwún wuî eq tarâ sará pé le, lé zup zîng bum akò.

<sup>54</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, haû má, zúng bang eq rahá, myihkyóm yâm má gyoq gang zung tô ri.

<sup>55</sup> Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri.

<sup>56</sup> Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

<sup>57</sup> Hau htâng, ra-am gi, toq yap mù, a têng é saksé hkám kô é gi,

<sup>58</sup> "Yhang gi, 'Byu loq èq saî é noqkuq yhûm shî lé, Ngò hpyoq hpyi pyám mù, sum nyí gyoro má, byu loq èq a saî é, gotû ralhum dum saî râ nghut lhê.' ga taí é lé, ngamoq wó gyô ri." ga akò.

<sup>59</sup> Nghut kôlhang, yhangmoq é saksé gi, a tsûng lhum kó nghut ri.

<sup>60</sup> Hau htâng má, hkyangjong mó gi, yhangmoq é hí má toq yap mù, "Nàng, haî le a tú taí luq? Shí bang, Nang lé mara hun nyi é saksé gi, hká dông nghut lhê lú?" ga luî, Yesuq lé myí ri.

<sup>61</sup> Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myí ri.

<sup>62</sup> Haû hkûn, Yesuq gi, "Nghut lhê; haû ngò Byu Yhangzo gi, a-tsam bo dik Su é loqyo hkyamS má zung tô é lé le, mhuthtui ji mù, mauhkûng mai lé lo é\* lé le, nungmoq myàng kó râ nghut lhê." ga taí ri.

<sup>63</sup> Haû hkûn, hkyangjong mó gi, yhâng é bu lé lêng cheq pyám mù, "Nga-nhúng, hai saksé râ ashî lú?"

<sup>64</sup> Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsu wó myit akò lú?" ga myí ri; yhangmoq banshoq bang gi,

§ 14:62 Loqyò hkyam gâ é gi, ahko ahkáng wó é jowò lé gâ é nghut lhê. \* 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lhê.

shî gíng sù nghut ri ga, chôm myit huí akô.

<sup>65</sup> Haú mù, ra-am gi, Yhang lé sôkan byé gyun é eq, myoq má nghop pyám byi luí, loqtsup èq htui byi lê kut mù, "Nang lé ó yuq htui é, myiqhtoi htoí wú aq." ga taí akô. Haú zúng bang gi, Yhang lé shuí yù mù, nhuq bat akô nghut ri.

*Yesuq Lé, Petruq He-ngik Pyâm É Hkyô*

*Mht 26:69-75; Luk 22:56-62; Yhn 18:1-18, 25-27*

<sup>66</sup> Petruq gi, wàng hkaú má nyi tô é u lé, haú hkyangjong mó é dui-nhâng zoshâng myhí rayuq jé lé lo ri.

<sup>67</sup> Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taí ri.

<sup>68</sup> Nghut kôlhang, yhang gi, "Nàng taí é hkyô lé, ngò, sé le a sé, gyo le a sé gyo." ga he pyám luí, wâng hkúmdong shut htoq e ló bê nghut ri.†

<sup>69</sup> Dui-nhâng zoshâng myhí haú gi, Petruq lé, haú má dum myàng jáng, awui ayám má yap tô é bang lé, "Shí yuq le, haú hpúng má lom é sù rayuq nghut ri." ga dum taí ri.

<sup>70</sup> Petruq gi, radàm dum he pyâm ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lê." ga taí akô.

<sup>71</sup> Haú hkùn, yhang gi, yhânggùng yhang nhing luí, "Haú nungmoq taí é byù lé, ngò a sé." ga dakam ri.

<sup>72</sup> Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tún shimá, nàng, Ngo lé sum dâm he-ngik pyám râ nghut lê." ga, Yesuq, yhang lé taí é dang lé, myit bûn kat mù, wum kat ngau ri.

## 15

*Pilat Hí Má Yesuq Jé Nyi É Hkyô*

*Mht 27:1-2, 11-26; Luk 23:1-5, 13-25; Yhn 18:28-19:16*

<sup>1</sup> Haú napkyó noq za má, hkyangjong agyi pé gi, suwún wuí, tarâ sará pé, Yudaq byìn tú wapdoq gón bang eq rahá kut, chôm bóng yú kômù, Yesuq lé tuí yú luí, shuí htoq é kômù, mauzau Pilat chyáng é ap byi akô nghut ri.

<sup>2</sup> Pilat gi, Yesuq lé, "Nàng gi, Yudaq byu pé é hkohkâm nghut lê lú?" ga myi jáng, Yesuq gi, "Nàng taí é eq rajung za nghut lê." ga, tú taí ri.

<sup>3</sup> Haú hkyangjong agyi pé gi, Yhang lé mara gyai myo shoq chôm hun akô.

<sup>4</sup> Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tú taí lú?" ga myi ri.

<sup>5</sup> Nghut kôlhang, Yesuq gi, haí le a tú taí kut jáng, Pilat gi, maú byuq bê nghut ri.

<sup>6</sup> Haú Lhoqlhai Poí u lé, mingbyù wuí dúng é htóng byù rayuq yuq lé, mauzau mai lhaq lhoq htoq byi byi kut é htung joq ri.

<sup>7</sup> Haú hkùn, Barabaq gâ é byù rayuq gi, gumlau gabyông é hkùn, byù sat é gumlau bang eq rahá, htóng gyó tô ri.

<sup>8</sup> Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

<sup>9</sup> Haú mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lú?" ga myi ri.

<sup>10</sup> Pilat, haú su ga myi é gi, haú hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sé é yanmai nghut ri.

<sup>11</sup> Nghut kôlhang, haú hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haú byù moq mó lé i-myit lhoq toq byi akô.

<sup>12</sup> Pilat gi, "Haú jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?" ga yhangmoq lé myi ri.

<sup>13</sup> Haú hkùn, yhangmoq gi, "Yhang lé tapzîng má jén sat pyám aq." ga chôm garu akô.

† 14:68 Chyúmding ra-am má Haú hkùn jáng, woq tún bê nghut ri gâ é le bo ri.

14 Haû jáng, Pilat gi, "Haî mù luí lhú? Yhang haî kut shut bê lhú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

15 Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byí kat bê nghut ri.

*Gyezô Pé Gi, Yesuq Lé Rhoi É Hkyô Mht 27:27-30; Yhn 19:2-3*

16 Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô.

17 Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akô.

18 Hau htâng, yhangmoq gi, "Yudaq byu pé é hkohkâm hpó ê! Chyung hîng xê hîng nyí sháng gaq ô!" ga wut garû akô.

19 Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù, paí mhaû akô nghut ri.

20 Yhangmoq gi, Yhang lé rhoi jihkyoî ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyám É Hkyô*

*Mht 27:31-44; Luk 23:27-43; Yhn 19:17-27*

21 Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haû jowò mai lai ló ri. Haû hkûn, gyezô pé gi, yhang lé, tapzîng waq nhang akô nghut ri.

22 Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri).

23 Hau htâng, yhangmoq gi, Yhang lé, mura\* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri.

24 Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byí akô nghut ri.

25 Yhangmoq, Yesuq lé tapzîng má jén tap pyám é hkûn gi, napkyó gau hkyíng nghut bê nghut ri.

26 Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri.

27 Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri.

28 (Haû gi, "Yhang gi, yubak dap bâng chyáng nghap lhôm é hui bê nghut ri."\* gâ é Chyúmdang lé lhoq dik é nghut ri.)†

29 Hkyô sô lai ló é bang gi, nyhap é dông u-ngut ngut mù, taí kô é gi, "Noqkuq yhûm lé hpyoq pyám luí, sum nyí gyoro má dum wó saí lhê ga Sû ê!

30 Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

31 Haû eq rajung za, hkyangjong agyi pé eq tará sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhinhung!

32 Nga-nhúng wó myâng mù, lumjîng râ matú, shî, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to huí é su nhik le, Yhang lé rhoi dang taí akô nghut ri.

*Yesuq, Shi É Hkyô*

*Mht 27:45-56; Luk 23:44-49; Yhn 19:28-30*

33 Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri.

\* 15:23 Mura gi, chi wó kut jung xû nghut lhê. ✨ 15:28 Esai 53:12 † 15:28 Bun zo shí gi, chyúmding axau ra-am pé má za bo é nghut lhê.

34 Myinhâng sum hkyíng jé é hkûn, Yesuq gi, "Eloi, Eloi, lama sabakhtani." ✧ ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nang, haí mù, Ngo lé tô pyâm tô lhê lhú?" gâ é nghut ri.

35 Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

36 Haú hkûn, byù rayuq gi, din e ló mù, wuimaù lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

37 Yesuq gi, htê mó èq garû kat luí, kâng byit byuq bê nghut ri.

38 Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri.

39 Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut rinhung!" ga taí ri.

40 Myiwe wuì ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri.

41 Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

*Yesuq Lé, Myhup Pyâm É Hkyô*  
Mht 27:57-61; Luk 23:50-56; Yhn 19:38-42

42 Haú nyí gi, Hên Lajang Buinyi (Bánno buinyi é hí nyí) nghut ri. Haú mù, myinhâng jé lô jáng,

43 Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù

Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri.

44 Pilat gi, Yesuq shi bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shi teng bê lhú ga myi ri.

45 Shi teng bê hkyô lé, shô up gyezaù chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri.

46 Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaú má é kat tô ri. Hau htâng, yhang gi, luphkum má, luqlông èq lhêng chí pyâm tô ri.

47 Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

## 16

*Dum Dui Toq Lo É Hkyô*  
Mht 28:1-8; Luk 24:1-12; Yhn 20:1-10

1 Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi râ matú namngón jung ê wui akô.

2 Bánno buinyi htang napkyó bui htoq lo é hkûn yhang, yhangmoq gi, lup shut e ló akô.

3 Yhangmoq gi, "Luphkum mâ é luqgok lé, ó yuq chyûn lhêng pyám byi râ lhú?" ga, rayuq eq rayuq taí lhum akô.

4 Nghut kôlhang, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê.

5 Yhangmoq gi, lup hkaú má wang é kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

6 Haú hkûn, haú yuq gi, "Hkâgyuq dàn kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lhú? Yhang dui toq ló

bê! Yhang gi, shí má a nyi lo. Yhang lé, lheq tô é jowò lé wú wú keq.

<sup>7</sup> Ahkuî, nungmoq gi, ló mù, 'Yesuq gi, nungmoq hí má, Galile mau shut so lánq râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myâng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

<sup>8</sup> Haú mù, myiwe myhí haú bang gi, byòdàn gyuq nán é eq, lup mai hpanq htoq ló akô; yhangmoq gi, lùm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

*Yesuq Htoq Shit É Hkyô*

*Mht 28:9-10, 16-20; Luk 24:13-53; Yhn 20:11-23; Lagyo 1:6-11*

<sup>9</sup> Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mà é Mariq lé hí htoq shit ri.

<sup>10</sup> Mariq haú gi, ló mù, haú Yesuq eq nyi lai lò bê bang, yón ngau nyi kô é hkûn, haú hkyô lé ló taí kyô ri.

<sup>11</sup> Yhangmoq gi, Yesuq dum duì bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jing kó nghut ri.

<sup>12</sup> Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri.

<sup>13</sup> Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

<sup>14</sup> Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

<sup>15</sup> Hau htoq agó, Yesuq gi, yhangmoq lé, "Mingkan jàm shoq htoq é

mù, waxâng zo wuî lhunglhang lé, haú gabú danglù hko kyo keq.

<sup>16</sup> Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byi é hui râ nghut lhê.

<sup>17</sup> Lumjing é bang wó kut shit râ kumlhá pé gi, Ngá é mying lé lang luí, nat gang pé lé wó hkat htoq kó râ eq laklai é mying pé lé dat nyò kó râ nghut lhê;

<sup>18</sup> yhangmoq gi, lhangmuì pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

<sup>19</sup> Haú Yhumsing Yesuq gi, yhangmoq lé dang ban taí é htâng má, mauhkung shut shuí toq yu é hui luí, Garai Gasâng é loqyo hkyam má zung to bê nghut ri.

<sup>20</sup> Hau htâng, haú chángzô pé gi, htoq ê mù, jowò hkanmó má mungdang ê hko kyô akô nghut ri; haú Yhumsing gi, yhangmoq eq rahá nghut nyi mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.



## LUKAQ é Gabú Danglù Laiká (The Gospel of Luke)

<sup>1</sup> Aróng wó dik é sù Htohpiluq é, ngamoq chyáng dut laí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí,

<sup>2</sup> byù myo myo gi, shikut luí kâ to bekô nghut ri.

<sup>3-4</sup> Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghú, nàng é matú banshoq tok za kâ kat byi râ lé, ngò wó myit ri.

### *Wui-myhup Sará Yohan Hku Lé Lô Râ Gà É Hkyô*

<sup>5</sup> Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri.

<sup>6</sup> Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dîngmán é su nhik nghut akô.

<sup>7</sup> Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kô. Yhangnhik gi, asak ipyat le ko bekô nghut ri.

<sup>8</sup> Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le,

<sup>9</sup> haú Yhumsing é noqkuq yhûm ahkaú má namngón hkungga é wang nyhé râ matú, hká yuq nghut râ lé hkyangjông pé é htúngli eq rajung za byù hkyîn shosé she wú é hkûn, yhâng chyáng âng ri.

<sup>10</sup> Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdûng nyi akô.

<sup>11</sup> Haú hkûn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

<sup>12</sup> Zahkariq gi, maumang lagyo haú lé myàng jáng, dan gyuq nyi ri.

<sup>13</sup> Nghut kôlhang, maumang lagyo gi, "Zahkariq é, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berâ nghut lhê; nàng gi, yhang lé Yohan nghú myhíng byi ra râ nghut lhê.

<sup>14</sup> Yhang gi, náng é matú gabú hpo eq nguóngón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê.

<sup>15</sup> Hkâsu mù gà le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nú é unghkaú mai yhang, Choyiyúng Woi-nyí eq byíng nyí râ sù nghut lhê.

<sup>16</sup> Yhang gi, Israelaq yhangzo yhangshú pé myo myo lé, Yhumsing yhangmoq é Garaí Gasâng chyáng lhing lò nhâng râ sù nghut lhê.

<sup>17</sup> Íwâ pé é myit nhiklhum lé gi, zô wui shut, nyo é a gyo bang lé gi, dîngmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé taí ri.

<sup>18</sup> Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngá é yhumsing myhí le asak ipyat ko bê." ga luí, mau-mang lagyo lé tû taí ri.

<sup>19</sup> Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê.

<sup>20</sup> Ahkyíng jé jáng, ngá dang gi, gè dut lò râ nghut lhê. Dang shí pé lé nàng a lumjîng é yanmai, mù haú

dut lo é buinyì jé shoq, nàng gi, nhut jit byuq râ nghut lhê." ga luí, yhang lé tû taí ri.

<sup>21</sup> Haú u, shiwa byu pé gi, Zakhariq noqkuq yhûm ahkaú má haú-í myáng shoq lúng byuq é hkyô lé lánng maú nyi akô.

<sup>22</sup> Zakhariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

<sup>23</sup> Ahkuí, Zakhariq gi, hkyangjong jong âng é buinyì ngap jáng, yhûm shut dum taú ló byuq bê.

<sup>24</sup> Hau htàng má, yhang é yhumsîng myhí Elizabet gi, zogûng dut lò mù luí, hká le a htoq e za lhamó ngo hkyap yhúmhaú má lúng byuq ri.

<sup>25</sup> Haú hkûn, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyì má, Yhang ge é hkyô lé, ngo lé tûn shit bê nghut ri." ga taí ri.

#### *Yesuq Hku Lé Lô Berâ Gâ É Hkyô*

<sup>26</sup> Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri.

<sup>27</sup> Zomyi hau é myìng gi, Mariq gâ ri; yhang gi, Dawiq amyû mâ é Yosep gá su èq dúng tô é zomyi nghut ri.

<sup>28</sup> Maumang haú gi, Mariq chyáng jé jáng, "Mariq ê, nguìngón nyi sháng gaq; Nàng, hkungsô wó nyi ri; Haú Yhumsîng Garai gi, nàng eq rahá nyi nyi ri ò!" ga taí ri.

<sup>29</sup> Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lhú ga luí, myit maú nyi ri.

<sup>30</sup> Haú hkûn, haú maumang lagyo gi, "Mariq ê, hkâgyuq, nàng gi, Garai Gasang é hí má myoqdong wó bê nghut ri.

<sup>31</sup> Wú aq, nàng zogûng dut lò mù luí, yuqzo rayuq bau râ nghut lhê. Yhang é myìng lé gi, 'Yesuq' nghû luí, nàng myhíng byi ra râ nghut lhê.

<sup>32</sup> Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsîng Garai Gasang gi, yhang lé, yhang é íchyí îwa Dawiq é hkohkâm tanghkuq lé, byi râ nghut mù luí,

<sup>33</sup> Yhang gi, Yakup yhûm\* lé hkâ-nhám le ru-up nyi râ nghut lhê. Yhang é mingdán le htum nghu é joq râ a nghut." ga luí, yhang lé taí ri.

<sup>34</sup> Haú hkûn, Mariq gi, "Ngò gi, zomyi gyíng ru nghut ashî, haú gi, hkâsu wó dut râ lhú?" ga luí, mau-mang lagyo lé tû taí ri.

<sup>35</sup> Haú maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò râ Chyoiyúng sù le gi, Garai Gasang é Yhangzo ga kó râ nghut lhê.

<sup>36</sup> Hau htoq agó, wú aq, náng é amyû suisho haùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri.

<sup>37</sup> Hkâsu mù gâ le, Garai Gasang a wó kut é haí le a joq." ga luí, yhang lé tû taí ri.

<sup>38</sup> Haú hkûn, Mariq gi, "Yhumsîng é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tû taí ri. Hau htàng, maumang lagyo gi, yhang chyáng mai ló byuq bê.

#### *Elizabet Lé Mariq Ê Huí É Hkyô*

<sup>39</sup> Hau htàng hkâ-í a myáng má, Mariq gi, Yuda mau bum mau mâ é wà rawà shut hân hân e ló luí,

<sup>40</sup> Zakhariq é yhûm má wàng mù, Elizabet eq huí nyo lhûm ri.

<sup>41</sup> Mariq é danghtê lé Elizabet wó gyo jáng, yhang é unghkaú mâ é zoshâng gi, byam chyû lo ri.

<sup>42</sup> Elizabet le, Chyoiyúng Woi-nyí byíng to mù luí, Mariq lé htê mó èq

\* 1:33 Yakup yhûm nghu e gi, Israelaq amyû lé gâ lhê.

taí é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô!

<sup>43</sup> Ngá Yhumsing é yhângnu ngá chyáng jé lé é jeju gi, hai é yanmai nghut bê l hú?

<sup>44</sup> Wú aq, náng danghtê lé wó gyo kat jáng, ngá unghkaû mâ é zoshâng gi, gabú luí byam chyû nyi ri.

<sup>45</sup> Haú Yhumsing taí é dang gi, gè gè dik lò râ nghut lhê ga luí, lumjáng é myiwe gi, hkungsô wó nyi ri." gâ ri.

### *Mariq É Hkya-on Dang*

<sup>46</sup> Haú hkûn, Mariq gi, "Ngá é i-myt mai haú Yhumsing lé hkya-on nyi lhê,

<sup>47</sup> ngá é woi-nyí le, Garai Gasang ngá é hkyi yù Sû má gabú nyi lhê.

<sup>48</sup> Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô râ nghut lhê.

<sup>49</sup> hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,

Yhâng é myìng gi, chyoiyúng nyi ri ô.

<sup>50</sup> Yhang lé gyuq hoq nyí bâng é ahtoq má, Yhang shogyo nhikmyín é hkyô gi,

pyat bán hkangmó jé shoq hkâ-nhám le joq nyi râ nghut lhê.

<sup>51</sup> Yhâng é wum-o bo é loq èq mauhpo mù mó pé lé tân shit bê.

Yhumsing myit é hkyô má nghutbún nyi é bang lé, Yhang lhoq pyo pyám bê.

<sup>52</sup> Zaugun suwún wuí lé gi, zau zûng tanghkuq mai lhoq hkyô pyám mù,

i-myt nyhûm bang lé gi, lhoq myhâng bê nghut ri.

<sup>53</sup> Zòmut hui bang lé gi, ge é zoshuq gyi shoq byi tso mù,

sutzè wó bang lé gi, akôm nhang kat bê nghut ri.

<sup>54-55</sup> Nga-nhûng é íchyí íwâ pé lé taí tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyín nyi râ gâ e lé myit bûn nyi é yanmai,

Yhâng é dui-nhâng zoshâng Israe-laq byu pé lé hku baú nyi ri."

ga luí, taí ri.

<sup>56</sup> Mariq gi, Elizabet chyáng lhamó sum hkyap kô nyi mù luí, yhûm shut dum taú lò byuq bê.

### *Wui-myhup Sará Yohan Baú É Hkyô*

<sup>57</sup> Hau htâng, Elizabet gi, zoshâng bau râ buinyi jé mù, yuqgè zo bau bê.

<sup>58</sup> Yhang lé haú-í kô é jeju Yhumsing tân shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akô.

<sup>59</sup> Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ matú lé kôluí, yhâng wâ é myìng eq rajung za, Zahkariq ga myhíng byi râ dâ akô.

<sup>60</sup> Nghut kôlhang, yhâng nu gi, "A nghut, Yohan nghû sheq myhíng râ nghut lhê." ga tú taí ri.

<sup>61</sup> Yhangmoq gi, "Náng é amyû su-isho má le, haú su gâ é myìng rayuq le a bo wú shi." ga luí, yhang lé taí akô.

<sup>62</sup> Haú hkûn, zoshâng haú lé hkâsu nghû myhíng nau lhê laq ga, yhâng wa lé loq lik lik shit mù myí akô.

<sup>63</sup> Zahkariq gi, kê jung longpá dúng yù mù, "Yhâng é myìng gi, Yohan nghut lhê." ga kê shit ri. Haú mù, lhunglhâng bang gi, maú byuq bum akô.

<sup>64</sup> Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri.

<sup>65</sup> Haú su dut é hkyô lé, wó gyô é awui ayàm lhíngkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akô.

<sup>66</sup> Wó gyô é lhunglhâng bang gi, haú hkyô lé yhumsing é i-myt unghkaû má kat to mù, "Zoshâng shí gi, hkâsu dut lò râ sù nghut lhê l hú?" ga myit

wú nyi akô. Haî mù gâ le, haû Yhum-sing é loq gi, yhang eq rahá nghut nyi é yanmai nghut ri.

### *Zahkariq É Myiqhtoi Dang*

<sup>67</sup> Haû hkûn, zôshang é yhangwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

<sup>68</sup> "Haû Yhumsing, Israelaq é Garai Gasang lé hkyá-on sháng ô!

Haî mù gâ le, Yhang gi, Yhâng é amyú lé, lé kûm wú mù luí, lé hkyi yù bê nghut ri.

<sup>69</sup> Garai Gasang gi, Yhâng é dui-nhâng zoshâng, Dawiq é amyú mai nga-nhúng é matú

wum-o bo é hkyi yu é hkyuî† lé, yuq htoq lô nhâng bê.

<sup>70</sup> Shí hkyô gi, a-nham pyat mai yhâng é chyoiyúng myiqhtoi pé é nhut mai taí tô é eq rajung za nghut ri.

<sup>71</sup> Haû hkyuî gi, nga-nhúng lé nga-nhúng é gye pé chyáng mai le, a nguí a naù bang banshoq é loq mai le, hkyi yù râ nghut lhê.

<sup>72</sup> Íwa Garai gi, nga-nhúng é íchyí íwa pé lé shogyo nhikmyin hkyô lé tún shit râ matú, Yhang byí tô é chyoiyúng dangshikaq lé a tô-myhí nghut ri.

<sup>73</sup> Haû gi, nga-nhúng é chyiké Abraham lé byi tô é danggidiq nghut lhê.

<sup>74-75</sup> Nga-nhúng lé gye pé loq mai hkyi yù râ eq, nga-nhúng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dینگmán é hkyô mai,

Yhang lé wó dojaú nyí nhâng râ matú, Yhang jé lé é nghut lhê.

<sup>76</sup> Ngá zo ê, nàng gi, Yhumsing é hí má, e lô mù luí, Yhâng é hkyô lé hen lajang byi râ sù nghut é yanmai,

nang lé Myhang htáng htúm Su é myiqhtoi ga kó râ nghut lhê.

<sup>77</sup> Nàng gi, Garai Gasâng é byu pé lé, yhangmoq é yubak mara hkyut pyám byí é dong, hkyi yu é hui râ hkyô lé taí kyo râ sù nghut lhê.

<sup>78</sup> Haî mù gâ le, Garai Gasâng é shogyo nhikmyin é yanmai, napsûn bui‡ gi, mauhkûng mai nga-nhúng chyáng htoq lé lô râ nghut lhê.

<sup>79</sup> Yhang gi, mauchut hkaû§ eq shí wup hkaû má lúng to bang lé builoq su duqbó byi râ eq, nga-nhúng lé nguingón simsaq é hkyô shut shuí e lô râ sù nghut lhê." ga ri.

<sup>80</sup> Zoshâng haû gi, kô lò mù, woi-nyí wum-o bo lò luí, Israelaq byu pé chyáng htoq shit lo é buinyi jé shoq, yoso pé má nyi nyi ri.

## 2

### *Betlehem Wà Mó Má Yesuq Hku Lo É Hkyô*

#### *Mht 1:18-25*

<sup>1</sup> Buinyi haû pé má, Romaq hkoséng ming banshoq mâ é byù lhunghâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri.

<sup>2</sup> Jihpán haû lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri.

<sup>3</sup> Haû hkûn, byù du jup gi, myìng jihpán kat râ matú, ó le ô é wà shut lô bum akô.

<sup>4</sup> Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut,

<sup>5</sup> yhang dúng tô é myiwe Mariq eq rahá myìng kat lhóm râ matú jé doq lô akô; Mariq kúm gi, gungloq laí to bê nghut ri.

<sup>6</sup> Haû Betlehem má nyi tô ashí le, Mariq gi, zo hkû râ buinyi jé mù, zomún yuqzo lé bau bê.

<sup>7</sup> Yhang gi, zoshâng haû lé panchoq eq htup mù no tso langhkang má lheq

† 1:69 Hkyi yu é hkyuî gi, Yhumsing Yesuq lé taí é nghut ri. ‡ 1:78 Napsûn bui gâ é gi, Yesuq lé taí é nghut lhê. § 1:79 Mauchut hkaû gâ é gi, Garai lé a sé mù woi-nyí má shi tô é bang lé gâ lhê.

tô ri; haî mù gâ le, bíng yhûm má yhangmoq nyî râ jowò a joq lo é yan-mai nghut ri.

*Sau Zúng Bang Yesuq Chyáng Jé Lé É Hkyô*

<sup>8</sup> Ahkuî, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô.

<sup>9</sup> Haú hkûn, Yhumsîng é maumang lagyo gi, yhangmoq é hí má lé htoq yap shit to mù, Yhumsîng é hpungwup shing kang gi, awui ayàm má duqbang lò luî, yhangmoq gyai gyuq bum akô.

<sup>10</sup> Maumang lagyo gi, "Hkâgyuq kó, byù lhunglhâng bâng é matú, gyai yhang gabú é danglù, ngò nungmoq chyáng wun lé lo lhê.

<sup>11</sup> Hkû-nyí lhê buinyì má, Hkrisduq\* nghu é Yhumsîng nghut é hkyi yù Sù gi, Dawiq é wà má nungmoq é matú hku to bê.

<sup>12</sup> Nungmoq é matú kumlhá gi, zoshâng nyheqnú rayuq panchoq èq htup mù, no tso langhkang má lheq to lán ra nghut lhê." ga luî, yhangmoq lé taî ri.

<sup>13</sup> Haú hkûn jáng yhang, mauhkûng bang rajùm rayò htoq lò mù, maumang lagyo haú eq rahá Garai Gasang lé hkya-ôn é dang gi,

<sup>14</sup> "Htoq tsáng myhâng má, Garai Gasang gi, hpungwup shing kang nghû râ matú, Yhumsîng chyáng é ap bo nyi sháng gaq ô!

Myigùng htoq má le, Yhang ô nau é byu pé má, nguínón é gi, hkâ-nhám le joq nyi sháng gaq ô!" ga akô.

<sup>15</sup> Maumang lagyo pé, yhangmoq chyáng mai, mauhkûng shut dum lò byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuî za Yhumsîng nga-nhúng lé lé shit kyô laî ló bê hkyô lé é gôn wú sháng." ga luî, rayuq eq rayuq taî lhûm akô.

<sup>16</sup> Hau htâng, yhangmoq gi, hân hân é luî, Mariq eq Yosep lé le, no tso

langhkang má lheq tô é zoshâng nyheqnú lé le, ê myàng akô.

<sup>17</sup> Zoshâng haú lé, yhangmoq myàng kôjáng, zoshâng haú eq séng luî yhangmoq lé, lé taî kyô é dang lé, taî pyô kat bekô.

<sup>18</sup> Wó gyô é bang banshoq gi, haú sau zúng bang taî kyô é dang lé, maú byuq bum akô.

<sup>19</sup> Mariq kúm gi, dut lo é hkyô pé eq wó gyô é dang banshoq lé unghkaú má matsîng yù mù luî, nik nik myit wú nyi ri.

<sup>20</sup> Sau zúng bang gi, yhangmoq lé maumang lagyo taî kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú ló bekô nghut ri.

*Yesuq Lé, Noquq Yhûm Má Shuî É Hkyô*

<sup>21</sup> Zoshâng haú, shit nyí jé mù ahpyo-kuq hpyit byi râ buinyí má, yhang unghkaú má a lúng shi mai maumang lagyo myhîng tô é myîng eq rajung za, yhang lé, "Yesuq" ga luî, myhîng byî akô.

<sup>22</sup> Mosheq é tarâ eq rajung za, yhangmoq é lhoq san lhoq séng é buinyì byîng jáng, Yhumsîng é tarâ má, "Zomún yuqzo hkangmó gi, haú Yhumsîng é hí má chyoiyúng sù wó nghû râ matú, Yhumsîng chyáng é ap byi râ lhê."\* gâ é eq,

<sup>23</sup> "Hpûngkyui razúm, haú a nghut jáng, nghoqmyhû zo í du,"\* hkungga byi râ lhê ga kê tô é eq rajung za,

<sup>24</sup> Mariq eq Yosep gi, zoshâng haú lé shui mù Yerusalem wà mó shut é akô.

<sup>25</sup> Haú hkûn, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq tíng râ ahkyîng lé lán nyi sù nghut ri; haú Chyoiyúng Woi-nyí le, yhâng é ahtoq má nyi nyi ri.

<sup>26</sup> Yhang gi, haú Yhumsîng Hkrisduq lé a myang é za, shî râ a nghut,

\* **2:11** Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. ✧ **2:22** Htoq Ló 13:2,12 ✧ **2:23** Nhung 12:8

ga Chyoiyúng Woi-nyí eq tún shit tô é hui sù nghut lhê.

<sup>27</sup> Yhang gi, Chyoiyúng Woi-nyí eq shui mù, noqkuq yhúmhaû má é jé nyi tô é hkún lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuí wang ló kôjáng,

<sup>28</sup> Simeon gi, zoshâng lé loq eq lhom bún yû mù, Garai Gasang lé hkya-ôn é dang gi,

<sup>29</sup> "Yhumsîng ê, náng é danggidiq gi, dik bê nghut ri; hkû-nyí náng é jùn ngò gi, nguínón é eq wó shi ló berâ nghut lhê.

<sup>30</sup> Haî mù gâ le, byù lhunglhâng bâng é matú, nàng lajang tô é hkyi yù hkyô lé, ngá myoq eq yhang wó myâng bê.

<sup>31</sup> Haû gi, byù myû chângjup wó myâng râ matú, nàng lajang to byí é nghut mù,

<sup>32</sup> tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkâng matú le nghut nyi ri."

gâ ri.

<sup>33</sup> Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô.

<sup>34</sup> Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shî gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri.

<sup>35</sup> Haû mù, byù myo myô é unghkaû má, myit mi-myit lé lhoq htoq shit râ nghut lhê. Náng é myit nhiklum má, sâm chûn eq htaû kyâng kat é su gâ é lé, nàng hui zo râ nghut lhê." ga taí ri.

<sup>36</sup> Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyî pyat mai, yhanglâng eq nyhit zân za nyi luî, shit

xe myi zân jé shoq chuimó mó nyi to sù nghut ri.

<sup>37</sup> Myiwe haû gi, noqkuq yhûm mai a htoq é za, nyí myín a ga noqkuq do-jaú nyi mù, zoshuq gám luî kyûdûng nyi ri.

<sup>38</sup> Simeon dang ban taí jáng, Annaq gi, hui lé lô mù, Garai Gasâng jeju lé hkya-on luî, Yerusalem wà mó lé Garai Gasang hkyi yù râ gâ é lé, myit lum to bang lhunglhâng lé, zoshâng hau é hkyô taí kyô ri.

<sup>39</sup> Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taû ló bekô.

<sup>40</sup> Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

### *Noqkuq Yhúmhaû Má Zoshâng Yesuq Jé Nyi É Hkyô*

<sup>41</sup> Yhângnu yhângwâ nhik gi, Lho-qlhai Poî jé hkangmó, zàn wui Yerusalem wà mó má é ê kut akô.

<sup>42</sup> Yesuq raxe í zân jé jáng, poî haû, é bo lòm ra htungli joq é eq rajung za, yhangme wui yhanghpe wui doq ló akô.

<sup>43</sup> Haû poî buinyi lai luî, dum taû lo é hkún, zoshâng Yesuq gi, Yerusalem wà mó má nyi gyó tô ri; nghut kôlhâng, yhângnu yhângwâ nhik gi, a sé kó.

<sup>44</sup> Yesuq lé rahá lo é luzúm wui chyáng bò râ su ngàm kômù luî, Yosep eq Mariq gi, ra-nyí buigyùm chap sô lò bê htâng má, mung moq wui eq, sê lhûm é buinùm ji-myi wui chyáng Yhang lé châng ho akô.

<sup>45</sup> Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e ló bekô.

<sup>46</sup> Ahkuî, sum nyí nghû râ nyí sheq, noqkuq yhúmhaû má, tarâ sará pé é gung gung má zùng to mù, yhangmoq é dang lé gyo yù luî, dum taû myi myi kut nyi é lé, yhangnhik é myàng akô.

<sup>47</sup> Yhâng é dang wó gyô é bang ban-shoq gi, Yhâng é u-nuq nyau é hkyô lé

le, Yhang tû taî é dang lé le, maú nyi akô.

<sup>48</sup> Yhang lé myàng jáng, yhangnhik maú byuq kômù luí, yhângnu gi, "Ngá zo ê, haî mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, náng lé jaq châng ho pyám bê." ga luí, Yhang lé taî ri.

<sup>49</sup> Yhang gi, "Haî mù luí, ngo lé châng ho akô lhú? mauhkûng má é ngá Wâ é yhûm má ngò nyi râ lhê le gi, nungnhik a sé kó lhú?" ga luí, yhangnhik lé tû taî ri.

<sup>50</sup> Nghut kôlhang, yhangnhik gi, Yesuq taî é dang lichyúm lé, a sê gyo kó.

<sup>51</sup> Yesuq kúm gi, yhangnhik eq rahá Nazaret wà shut taû jé gyó ló luí, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklum má matsing tô ri.

<sup>52</sup> Yesuq gi, hpaqchyî byéng-yá kûng zet lo é eq, gungghyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

### 3

#### *Wui-myhup Sará Yohan Mhoqshit É Hkyô*

*Mht 3:1-12; Mrk 1:1-8; Yhn 1:19-28*

<sup>1</sup> Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má;

<sup>2</sup> Anna eq Kayahpaq gi, hkyangjong mó mú má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri.

<sup>3</sup> Haú mù, yhang gi, Yodan làng yàm jowò hkanmó má, sô jón wún luí,

yubak mara hkyut pyám byî é hui râ matú myit lhing mù, wui-myhup hkâm\* yù râ hkyô lé, hko kyô nyi ri.

<sup>4</sup> Haú gi, myiqhtoi Esai-aq laiká má, "Haú yoso má, byù rayuq garû taî é htê gi,

'Haú Yhumsing é matú, hkyô hen to keq, Yhâng é matú hkyô lhoq nyhang to keq;

<sup>5</sup> wuìhkung langhkop hkanmó lé lhoq pyíng ra râ nghut lhê; bùm eq wingkáng hkanmó lé hpyit pyám ra râ nghut lhê;

agoí aguq é hkyô hkat hkanmó lé lhoq nyhâng ra râ nghut lhê; ahkung ahkop dut é hkyô hkat hkanmó lé lhoq rhá ra râ nghut lhê.

<sup>6</sup> Haú hkûn, byù banshoq gi, Garai Gasâng é hkyi yù hkyô lé myàng râ nghut lhê."<sup>†</sup>

ga luí, kâ tô é eq rajung za nghut ri.

<sup>7</sup> Shiwa byù rajum rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taî é gi, "Duq htan é lhangmuì amyû pé† é, jé lô râ yubak dam mai wó hpan lut kó sháng gaq ga, nungmoq lé ó yuq taî pûn é lhú?

<sup>8</sup> Myit lhing hkyô eq gingdán é ashi zui keq. 'Nga-nhúng gi, Abraham é yhangzo yhangshû pé nghut lhê.‡ nghû luí, yhumsing é i-myit unghkaû má hkâtaí kó. Hkâsu mù gâ le, ngò, nungmoq lé taî kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

<sup>9</sup> Ahkuí lhang, Garai Gasang gi, Yhâng é wazung lé haú sikgâm wang pé má tô to bê nghut ri; haú mù, ge é ashi a zui é agàm hkanmó lé gi, htug lhêng pyám mù, myi má dú kat pyám râ nghut lhê." gâ ri. §

\* **3:3** *Wui-myhup hkâm* gâ é gi, baptilma lé gâ é nghut lhê. ✨ **3:6** Esai 40:3-5 † **3:7** *Lhangmuì amyû* pé gâ é gi, Lukaq 3:7-10 má bo é Hparishe eq Saduke pé lé taî é nghut ri. ‡ **3:8** *Nga-nhúng gi, Abraham* é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § **3:9** Bun zo shí lhûm é lichyúm gi, myit a lhing bang lé, Garai Gasang jéyáng é buinyi jé râ nghut lhê ga nau é nghut ri.

10 Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luí, yhang lé myí akô.

11 Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tû taí kat ri.

12 Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lhú?" ga luí, yhang lé myí akô.

13 Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

14 Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é đông mara le hkâhún kó; nungmoq wó e aphaú èq gé bûn nyi keq." ga luí, yhangmoq lé taí ri.

15 Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaú má myit wú nyi bum akô.

16 Haú hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkám byí lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhang é hkyî-tsung tui lé hpyí râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê.

17 Yhang gi, loq má byò chung to mô, guq chyarâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.\*

18 Haú mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

19 Nghut kôlhang, hkâ-myháng a myáng má mauzau Herut gi, yhanggû

é yhangmyi Herudiaq lé lú yu é hkyô eq, yhang kut shut é gotû a ge é mô banshoq é yanmai, Yohan gi, yhang lé tân mhoqshit bê nghut ri.

20 Mara haú pè htoq agó, Herut dum kut jat yu é mara gi, Yohan lé htóng má lhùng kat é nghut ri.

*Yesuq, Wui-myhup Hkâm Yu É Hkyô*

*Mht 3:13-17; Mrk 1:9-11*

21 Yohan lé htóng má a lhùng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdùng nyi le, mauhkúng búng lô mù,

22 haú Chyoiyúng Woi-nyí gi, hpûngkyui gunghkyâng sù é đông mai Yhang ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkúng mai danghtê htoq lo ri.

*Yesuq É Byù Xik Shap Kyô É Hkyô*

*Mht 1:1-17*

23 Yesuq gi, Yhang mô zuí hi é hkûn, asak sum xê zàn kô nghut bê; Yhang lé byù hkyam đông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

24 Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

25 Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,

26 Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,

27 Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo,

\* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.



28 Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo,

29 Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo,

30 Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo,

31 Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nah-tan é yhangzo, Nahtan gi, Dawiq é yhangzo,

32 Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo,

33 Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo,

34 Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo,

35 Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo,

36 Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo,

37 Lamek gi, Mehtusela é yhangzo, Mehtusela gi, Eruk é yhangzo, Eruk gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,

38 Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é

yhangzo nghut ri.

## 4

### *Yesuq Lé Tsadán Gunglaú É Hkyô Mht 4:1-11; Mrk 1:12-13*

1 Yesuq gi, Chyoiyúng Woi-nyí èq byíng mù, Yodan làng mai dum taú lo é hkún, Chyoiyúng Woi-nyí gi, Yhang lé yoso shut shuí e ri.

2 Haú má, Yesuq gi, buinyí myi xê nyí jé shoq, nat Tsadán èq gunglaú é huí ri. Buinyí haú gyoro má, Yesuq gi, haí le a zô é yanmai, zòmut hui bê nghut ri.

3 Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

4 Haú hkún, Yesuq gi, "'Byù gi, muk èq za asak duí rá a nghut.' ga luí, Chyúmdang má kê tô ri."☆ ga yhang lé tû taí ri.

5 Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí,

6 "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhang, byí rá nghut lhê.

7 Haú mù, Nàng, ngo lé noq é nghut jáng, shí pé banshoq Nàng é dut rá nghut lhê." ga, Yesuq lé taí ri.

8 Haú hkún, Yesuq gi, "'Haú Yhumsîng nâng é Garai Gasang lé za, nâng noqkuq dojaú ra rá nghut lhê.'☆ ga luí, Chyúmdang má kê tô ri." ga luí, yhang lé tû taí ri.

9 Nat Tsadán gi, Yesuq lé Yerusalem wà mó má shuí è mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq.

10 Hkâsu mù gâ le,

'Nang lé upzúng byî nyî râ matú,  
Garai Gasang gi, Yhâng é mau-  
mang lagyô pé lé taí to râ nghut  
mù,

11 luqgok má náng é hkyî a ló htung  
shoq, yhangmoq é loq eq Nang  
lé lhom bún yû kó râ nghut  
lhê.<sup>☆</sup>

ga luî, Chyúmdang má kê tô ri." ga taí  
ri.

12 Nghut kôlhang, Yesuq gi, "'Haû  
Yhumsîng, nungmoq é Garai Gasang  
lé, wó chyam wú râ a nghut.<sup>☆</sup> ga luî,  
Chyúmdang má bo tô ri." ga, yhang lé  
tû taí ri.

13 Nat Tsadán gi, gunglaú é hkyô pé  
banshoq ban kut jáng, ahko ahkáng  
láng wú uchyang yhâng chyáng mai  
byam gâng nyi byuq ri.

*Yesuq Lé Nazaret Wà Bang He-ngik  
Pyâm É Hkyô*

*Mht 4:12-17; 13:53-58; Mrk 1:14-  
15; 6:1-6*

14 Yesuq kúm gi, Chyoiyúng Woi-  
nyî wum-o byíng é eq Galile mau  
shut dum taú lo ri. Haú mau jowò  
hkanmó má, Yhâng é hkyô lé taí pyo  
ló bùm bekô.

15 Yhangmoq é tarajong pé má,  
Yesuq mhoqshit byi mù, lhunghâng  
bang gi, Yhang lé taí hkya-ôn nyi bum  
akô.

16 Hau htâng má, Yhang nyi kô lo  
é Nazaret wà má dum taú jé ló bê;  
Yhang gi, hkâ-nhám le kut nyi é eq  
rajung za, Bánno buinyî\* lé tarajong  
má wang ê mù, laiká nghap râ ga toq  
yap é hkûn,

17 Yhang lé myiqhtoi Esai-  
aq chyúmding byi kôjáng, Yhang  
chyúmding haú lé hpông kat le,

18 "Yhumsîng é Woi-nyî gi, ngá é ahtoq  
má nyi nyi ri;

hkâsu mù gâ le, asho awuî é bang lé  
gabú danglù hkô kyo râ matú,  
Yhang ngo lé hkyin yù bê.

Htóng lúng bang lé lhoq htoq râ hkyô  
eq, myoqjit bang lé myoq dum

myàng nhâng râ hkyô hkô kyo  
râ matú le,  
zik zo huî é bang lé nhang kat  
nhâng râ eq,

19 Yhumsîng, Yhâng é byu pé lé hkyi  
yù râ ahkyíng zanwut lé hkô  
kyo râ matú le, Yhang, ngo lé  
nhang kat bê nghut ri.<sup>☆</sup>

ga luî, kê tô é jowò lé myang záng mù  
nghap ri.

20 Hau htâng, Yesuq gi, chyúmding  
haú lé ding mù, shuí-u sù lé tau byî  
pyám luî, dum zung tô ri; tarajong mâ  
é byù lhunghâng bang gi, Yesuq lé  
chôm wú tô é hkûn,

21 Yesuq gi, "Nungmoq é nohkyap  
má, ahkuî wó gyô é Chyúmdang shî  
gi, hkû-nyî yhang lo dik bê." ga luî,  
yhangmoq lé taí hi kat ri.

22 Lhunghâng bang gi, Yhang ge é  
hkyô lé saksé hkám byi kômù, Yhâng  
é nhut mai htoq é jeju bo é dang lé  
le, maú kôluî, "Shí yuq gi, Yosep é  
yhangzo a nghut lhú?" ga taí bum  
akô.

23 Haû mù luî, Yesuq gi, "Nung-  
moq gè gè yhang, 'Chi sará ê, yhum-  
sing gùng lé lhoq ge yù aq.'<sup>†</sup> gâ é  
sanghkyang eq le, 'Nàng, Kaperna-um  
wà má kut shit wú é hkyô ngamoq wó  
gyo bê, haû eq rajung za, náng, náng é  
yhum mau má le, kut shit wú aq.' ga  
luî le, ngo lé taí kó râ nghut lhê." ga taí  
ri.

24 Yhang dum xoq taí é gi, "Ngò,  
nungmoq lé teng za taí kôlé, myiqhtoi  
ó yuq le yhumsîng é yhum mau má  
myoqdong wó wú é a nghut.

25 Ngò, nungmoq lé teng za taí kôlé,  
Eliyaq é pyat lé, Israelaq ming má  
chuimó myo myo nyi bum akô.

26 Nghut kôlhang, haú ming má sùm  
zan eq lhamó hkyuq hkyap yhang,  
mau a wò dut byuq mù, mutmó gyó  
tô é hkûn, Garai Gasang gi, yhangmoq  
mâ é rayuq chyáng le, Eliyaq lé a  
nhang kat é za, Sidun mau Zarephta

<sup>☆</sup> 4:11 Hkya-on 91:11-12 <sup>☆</sup> 4:12 Tarâ Pun 6:16

<sup>☆</sup> 4:16 Bánno buinyî gâ é gi, Yudaq byu pé nòmu  
é buinyî lé gâ lhê. Ahkui lhê é dông ga jáng, Bánno buinyî gi, bat htoq hkyuq nyî lé âng ri. <sup>☆</sup> 4:19  
Esai 61:1-2 <sup>†</sup> 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi,  
mauhpo mù wó tân shit râ nghut lhê." gâ é nghut lhê.

wà mà é, chuimó myhí rayuq chyáng sheq nhang kat byî é nghut lhê.

<sup>27</sup> Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng mà é rayuq le wó sân-yúng yù kô é a nghut; Suriq byù Naman ga sù tungbaù hpó za sheq wó sân-yúng é nghut lhê." ga taí ri.

<sup>28</sup> Tarajong hkaù mà é lhunglhang bang gi, haù hkyô lé wó gyo kôjáng, gyai yhang nhik-yo nau bùm kômù,

<sup>29</sup> toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq mà é gampyoq má, é chyùn hpyit hkyô pyám râ ga shuî e ló akô.

<sup>30</sup> Nghut kôlhang, Yesuq kúm gi, byù hpûng haù mai so hkoq htoq ló byuq bê nghut ri.

*Agè Ashop É Nat Lé Yesuq Hkat Htoq É Hkyô*

*Mrk 1:21-28*

<sup>31</sup> Hau htâng, Yesuq gi, Galile mau mà é Kaperna-um wà má jé ê mù, Bánno buinyi má byu pé lé mhoqshit hi ló bê nghut ri.

<sup>32</sup> Yhangmoq gi, Yhang mhoqshit é hkyô lé mauhong nyi akô; hkâsu mù gà le, Yhang gi, ahko ahkáng bo é dang dông taí nyi é yanmai nghut ri.

<sup>33</sup> Yesuq, tarajong hkaù má mhoqshit byî nyi é hkûn, nat gang wang júng é byù rayuq htê mó o mó èq taí é gi,

<sup>34</sup> "Ê, Nazaret wà byù Yesuq ê, ngamoq gi, Nàng eq haí sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garai Gasâng é Chyoiyúng Sù nghut é lé, ngò sê lhê." gà ri.

<sup>35</sup> Haù hkûn, Yesuq gi, "Hkâjop, yhang chyáng mai htoq ló aq." ga yhang lé tân kat jáng, nat gi, haù yuq le yhangmoq é gung gùng má lhoq lheq to mù, a nò nhang é za, yhang chyáng mai htoq ló byuq ri.

<sup>36</sup> Haù mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lhú?

Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyô jáng, haù bang htoq ló byuq akô." ga taí lhùm bum akô.

<sup>37</sup> Haù hkûn, haù mau mà é awui ayàm jowò hkangmó má jàm shoq, Yhang é hkyô lé taí pyo hù ló bùm bekô nghut ri.

*Yesuq Nòhpyo Lhoq Gê Byî É Hkyô*  
*Mht 8:14-17; Mrk 1:29-34*

<sup>38</sup> Yesuq gi, haù tarajong mai toq ló mù, Simun é yhùm má wang ló ri. Simun é yhang-aumó gi, ali gyai nyé no nyi é nghut mù luí, lhoq gê byî râ matú, Yesuq lé garúm dung byî akô.

<sup>39</sup> Yesuq gi, Simun é yhang-aumó nàm má yap to mù, nòhpyo haù lé tân kat jáng, Simun é yhang-aumó gi, ge ló byuq bê; haù hkûn jáng, yhang gi, toq mù, yhangmoq lé gai tso gai huq bê nghut ri.

<sup>40</sup> Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuî lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byî ri.

<sup>41</sup> Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

<sup>42</sup> Maubó lô jáng, Yesuq gi, htoq ló mù, gaù é jowò yoso hkaù má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkùm wú akô.

<sup>43</sup> Nghut kôlhang, Yesuq gi, "Garai Gasâng é mingdán é gabú danglù lé, gó wà pé má le ngò hko kyo râ râ ashî, haù é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri.

<sup>44</sup> Haù mù, Yesuq gi, Yuda mau mà é tarajong pé má, hko kyô wún nyi ri.

## 5

*Sâng-hi Ji Yü Huî É Chángzô Pé*  
*Mht 4:18-22; Mrk 1:16-20*

<sup>1</sup> Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkûn,

<sup>2</sup> nhông gin-gau yàm má lhai razúm joq tô é lé, Yhang myang kat ri. Ngogûn dú bang kúm gi, lhai mai htoq mù, yhangmoq é gùn pé lé chi nyi akô.

<sup>3</sup> Yesuq gi, Simûn é lhai má wàng mù gin-gau mai rachyit lhoq kang nhâng luî, haû lhai htoq má zung to mù, shiwa byu pé lé mhoqshit taî kyô nyi ri.

<sup>4</sup> Dang ban taî jáng, Yesuq gi, Simun lé, "Wuî nik é shut hui luî, ngozo wó kông yù râ matú, nungmoq é gùn pé lé dú hkyô kat keq." ga taî ri.

<sup>5</sup> Simun gi, "Yhumsîng ê, ngamoq amàn ra-myin mau shikut wú kôhang, haî le a wó; nghut kôhang, náng dang é yanmai, ngò gùn dú hkyô kat râ nghut lhê." ga tú taî ri.

<sup>6</sup> Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô râ su dut é yanmai,

<sup>7</sup> lhai gó lhum mâ é luzúm wuî lé, lé garúm yù râ matú loq lik lik kat kôjáng, haû bang lé lô mù, haû lhai í lhum aluq myup lô shoq ngozo lé kat pyíng bekô.

<sup>8</sup> Simun Petruq gi, haû lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai lô byuq aq, haî mù gâ le, ngò gi, yubak dap é byù nghut nyi lhê." ga taî ri.

<sup>9</sup> Haî mù luî gâ le, Simun le, yhang eq nyi tô é lhunghâng bang le, haû su ngozo wó yu é yanmai, maú nyi bùm kômù nghut ri.

<sup>10</sup> Simûn é luzúm nhik, Zebedi é yhangzo Yakuq eq Yohan le, haû su chòm maú byuq akô.

Hau htâng, Yesuq gi, "Hkâgyuq, ahkuî mai náng gi, byù lé châng kóng

sû dut râ nghut lhê." ga luî, Simun lé taî ri.

<sup>11</sup> Yhangmoq gi, wuiyàm má jé jáng, lhai pé eq yhangmoq é zè banshoq lé tô pyâm to luî, Yesuq htâng cháng bekô nghut ri.

*Manggâm Dap Bang Lé Yesuq Lhoq Gê Byî É Hkyô*

*Mht 8:1-4; Mrk 1:40-45*

<sup>12</sup> Radàm lé, Yesuq gi, wà rawà má nyi tô lé, ragùngdú é manggâm dap é byù rayuq lé lo ri; haû yuq gi, Yesuq lé myàng jáng, hkyihput htuq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

<sup>13</sup> Yesuq gi, loq lhâm kat mù, haû yuq lé é záng luî, "Ngò dóng lhê, sân-yúng aq hkoi." ga taî ri; haû hkûn jáng, haû yuq é manggâm gi, ge byuq bê nghut ri.

<sup>14</sup> Yesuq gi, "Nàng, shí hkyô ó lé le hkâtaî kyo. Nghut kôhang, náng é gungdu lé, hkyangjong hpô chyáng lô tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga lô nhông byi aq." ga, yhang lé taî hkûm kat ri.

<sup>15</sup> Nghut kôhang, Yesuq é hkyô gi, je riyhang taî pyo hú jam lô mù luî, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô.

<sup>16</sup> Yesuq kúm gi, Yhang baú tsik za yoso shut htoq ê mù, kyû ê dung dung kut ri.

*Gùngjum Shî Sû Lé, Yesuq Lhoq Gê Byî É Hkyô*

*Mht 9:1-8; Mrk 2:1-12*

<sup>17</sup> Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haû bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaî é wum-o a-tsam le nòhpyo lhoq gê râ matú Yesuq eq rahá nghut nyi ri.

<sup>18</sup> Haû hkûn, byù ra-am gi, gùngjum shî sù rayuq lé taphkang mai waq lé

lô kômù, haú yuq lé, yhúmhaú má nyi tô é Yesuq é hí má, wó lhez byi shoq ga hkyô ho nyi akô.

<sup>19</sup> Byù lùm myô chyîn chyap to mù, haú nò sù lé hká dông le a wó shuí wàng kôluí, haú yhumhkung htoq shut waq doq ló mù, haú yuq lé taphkang eq roq, shiwa hpong gung gung, Yesuq é hí ang ang má hkyô hang kat akô.

<sup>20</sup> Yesuq gi, yhangmoq é lumjिंग myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

<sup>21</sup> Haú hkûn, Hparishe pé eq tarâ sará pé gi, "Shí su ga luí, Garai Gasang lé rhoi dang taí é sù gi, ó yuq wá nghut lhê lú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lú?" ga luí, myit sôn wuî nyi bum akô.

<sup>22</sup> Yesuq gi, yhangmoq myit sôn wuî nyi é hkyô lé sé mù, "Nungmoq é i-myit hkaú má, haí mù shí pé lé myit sôn wuî nyi akô lú?"

<sup>23</sup> 'Náng é yubak mara lé hkyut pyám byi bê.' nghú taí râ eq, "Toq luí, hkyô so aq." nghú taí râ má, hká hkun je taí lui lhê lú?"

<sup>24</sup> Nghut kôhang, haú Byu Yhangzo\* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gungjum shí sù lé, "Ngò, nàng lé taí bá, toq aq, náng é taphkang yu chùng luí, yhúm taú ló aq hkoi." ga taí ri.

<sup>25</sup> Haú hkûn jáng, yhang gi, yhangmoq é hí má toq yap mù, yhang é taphkang waq chùng luí, yhang é yhúm shut Garai Gasang lé hkya-on kungtôn uchyang ló byuq bê.

<sup>26</sup> Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akô.

*Yesuq Gi, Lewiq É Yhúm Má Yubak Dap Bang Eq Rahá Zo Shuq É Hkyô Mht 9:9-13; Mrk 2:13-17*

<sup>27</sup> Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga taí ri.

<sup>28</sup> Lewiq gi, haú mâ é zè banshoq lé tô pyâm to mù, toq luí, Yhâng htâng cháng bê nghut ri.

<sup>29</sup> Hau htâng, Lewiq gi, yhang é yhúm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô.

<sup>30</sup> Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lú?" ga, Yhâng é chángzô pé lé mara hùn dang taí akô.

<sup>31</sup> Yesuq gi, yhangmoq lé, "Wángzán bang chi sará a ra kó, nòhpyo hui bang za sheq ru râ lhê.

<sup>32</sup> Ngò gi, dingmán bang lé wut yù râ matú jé lé é a nghut, yubak dap bang myit lhing râ matú sheq jé lé é ru nghut lhê." ga tû taí ri.

*Zoshuq Gám Hkyô Eq Séng Luí, Yesuq Taí É Hkyô*

*Mht 9:14-17; Mrk 2:18-22*

<sup>33</sup> Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôhang, náng é chángzô pé gi, haí mù zô nyi shuq nyi akô lú?" ga Yesuq lé taí akô.

<sup>34</sup> Yesuq, yhangmoq lé tû taí é gi, "Bíng pé gi, lusik eq rahá nghut nyi to ashí hkûn, yhangmoq lé zo shuq wó gám nhâng râ lú?"

<sup>35</sup> Nghut kôhang, lusik† lé yhangmoq chyáng mai shuí yu pyâm é hkying jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." gâ ri.

\* 5:24 Byu Yhangzo gâ é gi, Yesuq Yhànggung yhang lé le taí e nghut lhê, Mesaia lé le taí é nghut lhê.

† 5:35 Lusik gâ é gi, Yesuq lé taí nau é nghut lhê.

<sup>36</sup> Dangtú dông mai le, Yesuq, yhangmoq lé taí é gi, "Mebu sik mâ é lãng cheq yû mù, mebu xau má hpo é gi, ó a kut wú kó; haû su kut é nghut jáng, mebu sik lé le lãng cheq pyâm é dut mù, pán jap sik le mebu xau eq du lhum râ a nghut.

<sup>37</sup> Tsibiyiq wing asik lé le, shokuq htông axau má ó a kat wú kó. Kat é nghut jáng, tsibiyiq wing asik gi, htông lé lhoq buq goq nhâng mù, tsibiyiq wing le yui shun byuq, htông le htên byuq, dut râ nghut lhê.

<sup>38</sup> Haû su a dut shoq gi, tsibiyiq wing asik lé, shokuq htông asik má kat ra râ nghut lhê.

<sup>39</sup> Tsibiyiq wing axau shuq nyî bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga taí râ." gâ ri.

## 6

*Bánno Buinyi Má, Yesuq É Chángzô Pé Kyôshi Shap Zô É Hkyô*  
*Mht 12:1-8; Mrk 2:23-28*

<sup>1</sup> Bánno buinyi ra-nyí má, Yesuq gi, Yhâng é chángzô pé eq yò hkaû mai sô laí ló é hkûn, Yhâng é chángzô pé gi, kyôshi ratsuí langshap yû mù, loq eq nè hpuq zô akô.

<sup>2</sup> Haû mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haû su kut akô lhú?" ga taí akô.

<sup>3</sup> Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú?"

<sup>4</sup> Dawiq gi, Garai Gasâng é yhûm\* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tû taí ri.

<sup>5</sup> Hau htâng, Yhang gi, "Haû Byu Yhangzo gi, haû Bánno buinyi é Yhumsing nghut lhê." ga yhangmoq lé taí ri.

*Loq Jum Shî Sû Lé Yesuq Lhoq Gê Byî É Hkyô*

*Mht 12:9-14; Mrk 3:1-6*

<sup>6</sup> Gotû Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri.

<sup>7</sup> Haú hkûn, tarâ sará pé eq Hparishe pé gi, Bánno buinyi má nõhpyo lhoq gê byi râ lhú ga luí, Yhang lé mara wó hûn shoq ga gyám wú nyi akô.

<sup>8</sup> Yesuq kúm gi, yhangmoq é i-myt lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

<sup>9</sup> Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé taí ri.

<sup>10</sup> Hau htâng má, yhangmoq banshoq lé lhing wú mù, haû loq jum shî sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri.

<sup>11</sup> Nghut kôlhang, yhangmoq gi, myoq chum nhô chik yhang nhik-yo naû kômù luí, "Yesuq lé hkâsu wá kut pyám râ lhú?" ga luí, rayuq eq rayuq taí lhûm nyi akô.

*Raxe Í Yuq Lé Lagyo Ga Myhîng Yu É Hkyô*

*Mht 10:1-4; Mrk 3:13-19*

<sup>12</sup> Haû yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri.

<sup>13</sup> Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyo pé ga myhîng to byî ri.

<sup>14</sup> Haú bang gi, Yesuq eq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtolume,

\* **6:4** Garai Gasâng é yhûm nghu é gi, Yerusalem wà mó má joq é saksé zúm lé gâ é nghut lhê.

15 Mahte eq Htomaq, Alhpe é yhangzo Yakuq eq Zelutuq<sup>†</sup> dut é Simun,

16 Yakuq é yhangzo Yudaq eq, Yesuq lé ap pyám râ sú Yudaq Iskarut pé nghut akô.

*Hkungsô Wó É Hkyô Eq Dingnyé Wó É Hkyô*

*Mht 4:23-25; 5:1-12*

17 Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuìshuq lung-aû ayàm mâ é Turuq myuq eq Sidun myuq mâ é bang, rajùm rayò gi,

18 Yhâng é dang gyô yù râ eq yhangmoq é nòhpyo lhoq gè nhâng râ matú, rahá za zup míng tô akô. Agè ashop é nat eq zing-ri huí é bang le ge byuq akô.

19 Yhâng é gùng mai htoq é wum-ô eq byù banshoq lé lhoq gè byi nyi é yanmai shiwa byu pé le Yhang lé wó záng shoq ga, ho nyi akô.

20 Haú hkûn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán<sup>‡</sup> gi, nungmoq é mingdán nghut nyi ri.

21 Ahkuí, zòmút wuìshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wuì kó râ nghut lhê.

22 Haú Byu Yhangzô é yanmai nungmoq lé su eq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

23 Haú hkûn lé, gabú byam chyù nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gâ le, yhangmoq é îchyí îwa pé le myiqhtoi pé<sup>§</sup> lé haú su kut wú bekô."

24 Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shí nhik dik é hkyô lé huí yù bekô.

25 Ahkuí, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmút wuìshit é hui kó râ nghut lhê.

Ahkuí, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

26 Byù banshoq bang, nungmoq lé ge é byù ga kôjáng, nungmoq gi, dingnyé wó râ,

hkâsu mù gâ le, yhangmoq é îchyí îwâ pé le, myiqhtoi pyoq pé\* lé, haú su ga taí wú bekô.

*Gye Pé Lé Chyitdap Râ Hkyô*

*Mht 5:38-48; 7:12*

27 Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq;

28 nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq.

29 Nang lé bo-pyuq rahkyam shut pyuq byi sú lé, rahkyam dum hkâm byi shi aq; náng bumó hkyut yu é sú lé, buzo le dum hkyut byi shi aq;

<sup>†</sup> 6:15 Zelutuq gâ é lichyúm gi, yhumsing zui saí é hkyô má gyai yhang myit lòm shirong é sú lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

<sup>‡</sup> 6:20 Garai Gasâng é mingdán gâ é gi, Garai Gasang up é lé gâ lhê. <sup>§</sup> 6:23 Myiqhtoi pé le zing-ri huí é yanmai, yhangmoq chyunghuq wó nyi akô. Haú eq rajung za, jamjau huí é bang nga-nhúng le chyunghuq wó râ nghut lhê. \* 6:26 Myiqhtoi pyoq pé gi, Garai Gasang jéyáng é hui râ.

30 nang lé rajung jung dúng é sù lé le, byí pyám aq; náng zè yu pyám byí é su chyáng mai le, hkâdúng yù lo.

31 Nungmoq ô nau é dông supé lé kut nhâng nau é su, yhangmoq lé le kut byi keq.

32 Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lúhú? Yubak dap bang le, yhumsing lé chyitdap é bang lé gi, chyitdap nyi akô.

33 Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ lúhú? Yubak dap bang le haû su kut nyi akô.

34 Supé lé zè chyi byí le, dum wó tau byi râ su dut é bang lé za, chyi byí le gi, nungmoq é matú hai akyû bò kó râ lúhú? Yubak dap bang lhang chyi byí é myhó dum wó yû shoq, yubak dap é bang lé chyi byí akô.

35 Nghut kôlhang, nungmoq gi, nungmoq é gye pé lé chyitdap mù, ge é dông kut byí nyi keq. Dum wó tau yù râ lé myoq a byu é za, chyi ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gà le, Yhang gi, jeju a dat bun bang eq agè ashop é bang lé ge é kut nyi ri.

36 Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

### *A Jéyáng Râ Hkyô*

#### *Mht 7:1-5*

37 A jéyáng é za nyi keq; haû jáng, nungmoq le jéyáng é a hui kó râ nghut lhê. A doqdân é za nyi keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byí é hui kó râ nghut lhê.

38 Byi keq, haû jáng, nungmoq le dum byí é hui kó râ nghut lhê. Mán é búng mai byíng mui shún shoq nhún chyíng, dùn chyíng kat mù, nungmoq é tanghkoí hkaû má lik kat byí é hui

kó râ. Hkâsu mù gà le, nungmoq lik byí é bung èq, nungmoq lé dum lik byi râ nghut lhê." gà ri.

39 Hau htoq agó, Yhang dangtú ralhum dông yhangmoq lé dum taí é gi, "Myoqjit sù gi, myoqjit sù lé hkyô wó tân shit lhê lúhú? Yhangnhik í yuq é donghkong má byit gyó kó râ nghut lhê, a nghut kó lúhú?

40 Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

41 Yhumsing myoq hkaû má lúng tô é siktúm† lé lhang a myit wú é nhíng, haí mù luí, nunggu nungmang é myoqwàng‡ lé myang lhê lúhú?

42 Yhumsing é myoq má lúng tô é siktúm lé lhang a myàng sù nhíng, 'Gumang hpó é, náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó taí râ lúhú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, nàng san za myàng râ nghut lhê.

### *Agàm Eq Ashi*

#### *Mht 7:17-20; 12:34-35*

43 A ge é ashí zuí é, ge é shigâm hkâmá le a joq. Ge é ashí zuí é, a ge é shigâm le a joq.

44 Haû mù luí, shigâm hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú.

45 Ge é sù gi, yhumsing é i-myit unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû mâ é agè ashop é sutdò mai, agè ashop é zè pé lé lhoq htoq shit lhê. Haí mù gà le, yhang é i-myit unghkaû má byíng mui tô é lé za, yhang é nhut mai taí htoq lo é nghut lhê.

† 6:41 Siktúm nghu e gi, yubak mara kô é lé taí lhê. lé taí é nghut lhê.

‡ 6:41 Myoqwàng nghu e gi, yubak mara atiq azo



*Luqhtân Htoq Má Yhûm Sai Sû Eq  
Myi Chîn Dum Má Yhûm Sai Su É Hkyô  
Mht 7:24-27*

<sup>46</sup> Ngò taî é eq rajung za lhang a wó châng kut kô é nhîng, haî mù luî, nungmoq Ngo lé 'Yhumsîng ê, Yhumsîng ê.' nghu nyi akô lhu?

<sup>47</sup> Ngá chyáng lé mù, ngá dang gyô yù luî, châng kut é sù ó nghut kôle, hkasû é sù eq wuí é lé ngò nungmoq lé shit kyo kôle.

<sup>48</sup> Haú yuq gi, wahpang yhûm saî le, nik nik du luî a dui é lunghtân htoq má apûn awang hi é sù eq wuí lhê. Wui jê lò luî wuibaù pê èq yhûm haù lé lo gùn kôhang, ging ging tîng tîng saî to bê nghut luî, haù lé a wó gun nhún.

<sup>49</sup> Ngá dang gyô yù mù, a cháng sù gi, apûn awang a saî é za myi chîn dum má wahpang yhûm saî sù eq wuí nyi ri. Wuibaù pê èq yhûm haù lé lo gun kat é eq, haù hkûn jáng, lêng gyop byuq ri. Yhûm haù byoq hten byuq é gi, yù whuí a bò loshoq dut byuq râ nghut lhê." gâ ri.

## 7

*Romaq Gyezau Rayuq É Lumjîng  
Myit*

*Mht 8:5-13; Yhn 4:43-54*

<sup>1</sup> Yesuq gi, shiwa byu pé lé ban mhogshit é htâng má, Kaperna-um wà shut wang ló ri.

<sup>2</sup> Haú hkûn, Romaq gyezau rayuq é chytidap dui-nhâng zoshâng gi, shî-nò no nyi ri.

<sup>3</sup> Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri.

<sup>4</sup> Haú bang gi, Yesuq chyáng jé ê kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri;

<sup>5</sup> hkâsu mù gâ le, yhang gi, nga-nhûng amyû lé chytidap é eq, ngamoq matú tarajong le kut byi sù nghut ri." ga luî, Yhang lé zuq zuq dúng wut nyi akô.

<sup>6</sup> Haù mù luî, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taî nhang kat é gi, "Yhumsîng Yesuq ê, nàng gûng lé hkâlhoq hkyik lo. Nàng, ngá é laishîntâng má, lé nang râ lhang ngò má a gingdán.

<sup>7</sup> Haù mù, ngò, nàng chyáng jé lé râ matú gingdán é sù a nghut; Nàng, dang rahkun za taî kat laq, haù hkûn, ngá é dui-nhâng zoshâng ge ló râ nghut lhê.

<sup>8</sup> Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

<sup>9</sup> Yesuq gi, dang haù lé wó gyo jáng, haù yuq é hkyô lé maú byuq luî, Yhang htâng châng é shiwa byu pé lé lhing wú mù, "Ngò, nungmoq lé taî kôlé, Israelaq amyû má lhang, shî í lumjîng é sù lé, Ngò a myang wú." ga taî ri.

<sup>10</sup> Nhang kat é bang yhûm má dum taù jé jáng, no nyi é dui-nhâng zoshâng gi, ge to lánng é lé ló myang akô.

*Shî Sû Lé Dum Lhoq Tui É Hkyô*

<sup>11</sup> Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Nain gâ é wà shut e ló akô.

<sup>12</sup> Haù wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhí haù eq rahá châng lé lo akô.

<sup>13</sup> Yhumsîng gi, haù chuimó myhí lé myàng jáng, yhang lé wú shogyo luî, "Hkâ-ngaù." ga taî ri.

<sup>14</sup> Yesuq gi, gung shut huî ê mù, loq èq é záng kat ri. Haù hkûn, waq tô é bang le jâng yap to byi akô. Yhang gi, "Zorâm ê, ngò, nang lé taî lhê, toq aq." ga taî ri.

15 Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnú chyáng dum ap byî ri.

16 Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô.

17 Haú Yesuq é hkyô eq sêng é ludang lé, Yuda mau eq haú mau awui ayâm jowò hkangmó má taí pyo myhîn ló bum akô.

### *Yesuq Eq Wui-myhup Sará Yohan É Hkyô*

*Mht 11:1-19*

18 Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô.

19 Haú mù luí, Yohan gi, yhâng é chángzo í yuq lé ji yù mù, haú Yhum-sing chyáng nhang kat luí, "Nàng gi, haú jé lé lô râ Sù nghut lhê lú? Haú a nghut jáng, ngamoq, góyuq lé lánng ra shirâ lú?" ga, myí nhang kat ri.

20 Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lú? Haú a nghut jáng, ngamoq góyuq lé myoqbyu lánng nyí ra shirâ lú?" ga luí, Wui-myhup Sará Yohan gi, ngá-nhik lé nánng chyáng myí nhang kat ri." ga taí akô.

21 Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé, lhoq gê byî ri. Myoqjit bang myo myo lé le, myoq dum myàng nhang ri.

22 Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byî é huí bekô; nojit bang le, wó gyo bekô; shî bê bang le, lhoq dui toq é huí bekô; myùng bânng é matú, gabú danglù hko kyô nyi bê nghut lhê.

✧ 7:27 Mal 3:1

23 Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

24 Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú râ matú, haú yoso shut e akô lú? Lai èq hik nhûn é jamgàm lé wú râ matú nghut akô lú?"

25 Haú a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê.

26 Haú nghut le gi, haí lé wú râ matú é kô é lú? Myiqhtoi rayuq lé lú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê.

27 Haú yuq é hkyô lé, Chyúmdang má kê tô é gi,

'Wú aq, Náng é hkyô lajang lánng râ matú, Ngá é lagyo lé, Náng é hí má Ngò nhang kat râ nghut lhê.'✧

gâ ri.

28 Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lháng a nyi, nghut kôlhâng, Garai Gasâng é mingdán má je tiq dik sù gi, Yohan htoq je kô lhê." gâ ri.

29 Mingbyû lhunglhâng bang eq kang guq bang gi, dang haú pé lé wó gyo kôjáng, Yohan byî é baptisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô.

30 Hparishe pé eq tarâ sará pé kúm gi, Yohan byî é baptisma a hkam yù kômu luí, Garai Gasang hen lajang é hkyô lé yhumsing gung é matú hengik pyâm akô.

31 Yesuq dum taí é gi, "Haú mù luí, byù myû shî lé, Ngò, hai èq taí kê wú râ lú? Yhangmoq hai eq wui akô lú?"

32 Yhangmoq gi,

'Nungmoq é matú, ngamoq sampyi mut byi kôlhang, nungmoq gi, a gó kó,

ngamoq ngaù hkyangsâng kôlhang, nungmoq gi, a ngaù kó.'

ga luí, gài pé má zùng uchyang rayuq eq rayuq wut taí lhùm nyi é zoshâng wui eq wui akô.

<sup>33</sup> Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô.

<sup>34</sup> Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô.

<sup>35</sup> Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byí nyi akô.\* gâ ri.

### *Yubak Dap É Myiwe Rayuq, Yesuq Lé Xû But Byí É Hkyô*

<sup>36</sup> Hparishe rayuq gi, Yesuq lé yhâng chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri.

<sup>37</sup> Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xû bo é luq hpyû bòng yu lé luí,

<sup>38</sup> Yesuq é nunghtáng hkyí wàng má ngau yap to mù, Yhâng é hkyí má ngaubyí èq záng lhoq teq byí jáng, ûxam èq but sut pyám byí ri. Dum nghut jáng, nhut èq puq luí mura lé but byí ri.

<sup>39</sup> Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luí, yhâng é unghkaû má myit nyi ri.

<sup>40</sup> Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

<sup>41</sup> Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri.

<sup>42</sup> Haú nhik gi, chyín xap râ ngùn a wó kôluí, chyín yhumsîng gi, yhangnhik lé xap a ra lò gâ pyám ri. Haú mù luí, haú nhik mâ é hká yuq gi, yhang lé je chyitdap râ lhú?" ga myí ri.

<sup>43</sup> Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e dôngjô ri." ga taí ri.

<sup>44</sup> Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhùm má wang le, hkyí chí râ uchyam, nàng a byi, yhang kúm gi, ngaubyí èq ngá hkyí lé tik byi luí, yhâng é xam èq sut pyám byi bê.

<sup>45</sup> Nàng gi, ngo lé nhut èq a puq nghut ri; yhang kúm gi, ngò yhùmhkaû má wang é mai ngá hkyí má a no loshoq puq nyi râ.

<sup>46</sup> Nàng gi, ngá ulhum má xû a but byí wú, yhang kúm gi, ngá é hkyí má nàm ngón é mura but byi bê nghut ri.

<sup>47</sup> Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byí é hui sù gi, shau za mara hkyut pyám byí é hui sù gi, shau za chyitdap sù nghut ri." ga taí ri.

<sup>48</sup> Yesuq gi, myiwe haú lé le, "Ngò, nàng é yubak mara hkyut pyám byi bê." ga taí ri.

<sup>49</sup> Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

<sup>50</sup> Yesuq gi, "Nàng é lumjîng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

\* **7:35** Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkám nyi akô. † **7:41** Denari rachap gi, ra-nyí lhê é byu rayuq é zuihpau eq wui ri.

## 8

*Yesuq Htâng Châng É Myiwe Wui*

<sup>1</sup> Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé tai kyo uchyang, Yhâng é lagyo raxe í yuq eq rahá za, rawa htâng rawà jé e ló ri.

<sup>2</sup> Hau htoq agó, nat gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà má é Mariq le,

<sup>3</sup> Herut é ikun zum sù Kuza é yhumsing myhí Yoanaq le, Susannaq le, gotù myiwe wui myo myo le, Yesuq eq rahá nghut akô. Haú bang gi, yhumsing wó du é í Yesuq eq lagyo pé lé byi zo byi huq nyi akô.

*Kyôshi Sân É Hkyô**Mht 13:1-23; Mrk 4:1-20*

<sup>4</sup> Wà hkang wà mó má é bang gi, Yesuq chyáng zup zing lé lo bùm kômù shiwa byù moq mó zup ming tô é hkûn, Yesuq dangtú dông tai kyô é gi,

<sup>5</sup> "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pê eq hte zo pyâm lhê dut ri.

<sup>6</sup> Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô.

<sup>7</sup> Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyâm é hui bê nghut ri.

<sup>8</sup> Nghut kôlhang, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga tai ri.

Yhang haú su ga tai nyi é hkûn, "Gyô yù rá nohkyap dap sù gi, gyô yù sháng gaq!" ga le, htê mó eq tai kat ri.

<sup>9</sup> Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myi akô.

<sup>10</sup> Yhang gi, "Garai Gasâng é mingdán eq sêng é sê gyo wui é hkyô pé lé sê gyo rá ahko ahkáng, nungmoq lé byi to bê. Nghut kôlhang, góbâng matú gi,

'Wú to kôlhang, a myàng kó sháng, gyô nyi kôlhang, a sê gyo kó sháng.\*<sup>†</sup> nghû, ngò dangtú dông tai lhê.

<sup>11</sup> Ahkui lhê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lhê.

<sup>12</sup> Hkyô má gyó âng é kyôshi gi, haí eq wui lhê lhú gâ le, haú mungdang lé byu pé wó gyô é htâng má, lumjínng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán eq mungdang haú lé, lé yu pyâm é hui bang eq wui lhê.

<sup>13</sup> Luqgok yò pé má gyó âng é kyôshi gi, haí eq wui lhê lhú gâ le, haú mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjínng luí, gunlaú huí é nyí má, dum htak ló byuq é bang eq wui lhê.

<sup>14</sup> Zugyóm má gyó âng é kyôshi gi, haí eq wui lhê lhú gâ le, haú mungdang lé gyô yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wui lhê.

<sup>15</sup> Hpún bo é myigùng má gyó é kyôshi kúm gi, haí eq wui lhê lhú gâ le, haú mungdang lé lhumzui luí ge é i-myt eq ban gyô yù mù, ging títng shoq zuí zìng luí, wó jân é i-myt eq ashi zuí é bang eq wui lhê.

*Myibung Htûn É Hkyô**Mrk 4:21-25*

<sup>16</sup> Myibung lé tap mù, aú eq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô.

<sup>17</sup> Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri.

<sup>18</sup> Haú mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirâ, a wó su chyáng mai kúm gi, yhang wó to

\* 8:10 Esai 6:9

bùn é mâ é lé lhang, yu pyám byi shirá nghut lhê." ga tai ri.

*Yesuq É Yhangnu Eq Yhanggu Pé  
Mht 12:46-50; Mrk 3:31-35*

<sup>19</sup> Haú hkûn, Yesuq é yhangnu eq yhanggu pé gi, Yhang chyáng lé lô kô le, shiwa byu pé lúm chyûn chyap to kômù, Yhang chyáng a wó wang ê kó nghut ri.

<sup>20</sup> Haú hkûn, Yhang lé, "Náng nu eq nunggu pé gi, nang lé hui nau luí, shinggan má láng yap bum akô." ga tai kyo akô.

<sup>21</sup> Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tú tai kat ri.

*Laidun Mó Lé Yesuq Lhoq Zim É Hkyô*

*Mht 8:23-27; Mrk 4:35-41*

<sup>22</sup> Ra-nyí lé, Yesuq gi, Yhang é chángzô pé lé, "Nga-nhung nhông he hpoq shut dap e ló sháng." ga tai luí, lhai má wàng mù gû dap e ló akô.

<sup>23</sup> Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhai má wui byíng lô mù, yhangmoq myup shí râ su dut lò nyi bekô nghut ri.

<sup>24</sup> Haú mù, yhangmoq gi, Yesuq chyáng huí ê luí, Yhang lé nhaú pun mù, "Yhumsîng ê, Yhumsîng ê, nga-nhung myup ló nyi ri." ga tai akô.

Haú hkûn, Yhang toq luí, laidun eq wuilhêng pé lé tân kat jáng, haú pé gi, zim za dut ló byuq bê.

<sup>25</sup> Haú mù, Yesuq gi, "Nungmoq é lumjîng myit gi, hkâmá nghut akô lhú?" ga luí, yhangmoq lé myî ri.

Yhangmoq kúm gi, gyuq maú byuq bùm kôluí, "Shí yuq gi, hkasû é byù nghut lhê là? Yhang hkunmó hkyó jáng, lai eq wuilhêng pé lhang gyo byi ri-nhung!" ga luí, rayuq eq rayuq myî lhûm bum akô nghut ri.

*Nat Lé Hkat Htoq Byî É Hkyô  
Mht 8:28-34; Mrk 5:1-20*

<sup>26</sup> Hau htâng, yhangmoq gi, Galile mau tú tap mâ é Gerase byu pé é mau má jé dap e ló bekô.

<sup>27</sup> Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhûm má le a nyi é za, mebu a dap é, lupdùng má myáng myáng nyi nyi sù nghut ri.

<sup>28</sup> Haú yuq gi, Yesuq lé myàng jáng, wut garu luí, yhang é hkyí wang má paí gop to mù, "Myhang htâng é Garaí Yhangzo Yesuq ê, Náng gi, ngò eq haí séng lhê lhú? Ngo lé a zing-ri râ matú, ngò nang lé dúng nyi lhê." ga luí, hte mó eq tai garú nyi ri.

<sup>29</sup> Hkâsu mù gâ le, Yesuq gi, agè ashop é nat lé haú yuq gùng mai htoq ló râ matú, tân pyâm é yanmai nghut ri. Byù haú yuq lé nat gâng eq adàm dàm wang júng hkangmó, loq eq hkyí má toqjâng tuí eq tuí shung, kyum xâng tô é eq, zúng tô é nghut kôlhang, lêng hpyit pyám pyám kut é htoq ago, nat gâng eq yhang lé yoso hkaú shut lêngmhap yù yù kut nyi ri.

<sup>30</sup> Yesuq gi, yhang lé, "Náng myîng haí gâ lhê?" ga myî kat é hkûn, yhang gi, "Legio\* gâ lhê." ga tú tai ri. Haí mù gâ le, yhang chyáng nat gang myo myo wang lúng tô é yanmai nghut ri.

<sup>31</sup> Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chòm dúng nyi bum akô.

<sup>32</sup> Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pé chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri.

<sup>33</sup> Haú mù luí, nat gang jùm gi, byù haú yuq chyáng mai htoq ló kôluí, waq pé chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

<sup>34</sup> Waq zúng bang gi, haú su dut é lé myàng jáng, hpang din ló kômù, myuq

\* 8:30 Legio gâ é lichyúm gi, gyezo 4000 eq 6000 gyoro bo é gyedap lé tai ri.

hkaû mã é bang eq awui ayàm mã é bang lé ló taí kyô akô nghut ri.

<sup>35</sup> Haû mù, wó gyô é bang gi, haû hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang mã mebu wut to luí, byù gè rayuq su zùng to láng é lé myàng kômù, gyuq dan bùm bekô nghut ri.

<sup>36</sup> Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri.

<sup>37</sup> Haû hkûn, Gerase byu pè é mau mã é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chôm dúng tóngbán akô. Haû mù luí, Yesuq gi, taú ló byuq râ matú lhaí mã wàng bê nghut ri.

<sup>38</sup> Nat htoq byuq huí é sù gi, Yesuq htâng cháng râ matú, Yesuq lé dúng tóngbán ri.

<sup>39</sup> Nghut kôlhâng, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haû hkûn, yhang htoq ló mù, Yesuq yhang lé hkâ-í kut byi bê hkyô lé, haû wà rawà bang lé ló taí kyô ri.

*Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô*

*Mht 9:18-26; Mrk 5:21-43*

<sup>40</sup> Ahkuí, Galile byu pé gi, Yesuq dum taú lò râ lé láng nyí kô é nghut mù, Yhang dum taú gû dap lo é hkûn gabú myit eq lhom te yu akô.

<sup>41</sup> Haû hkûn, Ya-iruaq gâ é tarajong mã up sù rayuq gi, jé lé lô mù, Yesuq é hkyî wang mã hkyihput htuq luí, yhang yhûm mã lé râ matú ji nyi ri.

<sup>42</sup> Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haû mù, Yesuq cháng e ló le, shiwa byu pé gi, Yhang lé záng htông lo bum akô.

<sup>43</sup> Haû u lé, raxe í zân sui yuí luí ngunzè lhunglhâng ban pyám shoq chi sará pè chyáng yâ wú kôlhâng, hká yuq le a wó yâ gè byi é† myiwe myhí rayuq le haû hkaû mã bo tô ri.

<sup>44</sup> Myiwe haû gi, Yesuq é nunghtáng mã huí lé mù, Yhâng é bushi htâng mã ê záng kat eq, suí yuí é ana gi, ge byuq bê nghut ri.

<sup>45</sup> Haû hkûn, Yesuq gi, "Ngo lé, ó yuq záng bê lhú?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, nang é lhinghkyuq mai nang chyáng chyín chyap wang lo bùm kô é yanmai, nang lé záng bekô râ nghut lhê?" ga taí ri.

<sup>46</sup> Yesuq gi, "Byù rayuq ngo lé lé záng mù, ngá chyáng mã é hpungwup a-tsam htoq ló é lé, ngò châng sé kat ri." ga taí ri.

<sup>47</sup> Haû jáng, myiwe myhí haû gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang mã ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí mã Yesuq lé taí kyô nyi ri.

<sup>48</sup> Yesuq gi, "Ngá zo ê, nang é lumjîng myit gi, nang lé lhoq gè byi bê nghut ri, ngón za ló aq hkoí!" ga luí, myiwe haû lé taí kat ri.

<sup>49</sup> Yesuq gi, dang ru taí nyi ashí hkûn, tarajong mã up sù Ya-iruaq é yhûm mai byù rayuq jé lé lô luí, "Nung zo gi, shi byuq bê, haû sará lé hkâlhoq hkyik nyí lo." ga luí, Ya-iruaq lé taí kyô ri.

<sup>50</sup> Yesuq gi, dang haû lé wó gyo jáng, "Hkâgyuq, za lumjîng aq, haû jáng, yhang ge byuq râ nghut lhê." ga luí, Ya-iruaq lé taí ri.

<sup>51</sup> Yesuq gi, Ya-iruaq é yhûm mã jé é hkûn lé, Petruq, Yohan, Yakuq, eq haû myiwe zô é yhângnu eq yhângwa mai

† 8:43 Ngunzè lhunglhâng ban pyám shoq chi sará pè chyáng yâ wú kôlhâng, hká yuq le a wó yâ gè byi gâ é, Chyúmdang ra-am mã gi, bo lhê; ra-am mã gi, a bò.

lai luí, yhûm haú má, ó lé le a wàng nhâng kut ri.

<sup>52</sup> Haú u lé, lhunghâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhî tô é sheq ru nghut lhê." ga luí, yhangmoq lé taí ri.

<sup>53</sup> Zoshâng gi, shi byuq bê lé yhangmoq sé kôluí, yhangmoq gi, Yesuq lé wuìzui kut pyám byí akô.

<sup>54</sup> Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri.

<sup>55</sup> Haú mù luí, yhâng woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri.

<sup>56</sup> Haú myiwe zô é yhângnu eq yhângwa nhik gi, gyai maú byuq akô. Nghut kôhang, Yesuq gi, haú dut é hkyô ó lé le a taí kyo rá matú, yhangnhik lé taí hkûm tô ri.

## 9

*Lagyo Raxe Í Yuq Lé Nhang Htoq Kat É Hkyô*

*Mht 10:5-15; Mrk 6:7-13*

<sup>1</sup> Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám rá matú eq, noli nojàng wó lhoq gê rá matú, yhangmoq lé wum-o a-tsam eq ahko ahkáng byí ri.

<sup>2</sup> Hau htâng má, Garai Gasâng é mingdán hkyô hko kyo rá eq, nòhpyo lhoq gê byi rá matú nhang htoq kat ri.

<sup>3</sup> Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó.

<sup>4</sup> Nungmoq hká yhûm má wàng kôhang, haú wâ mai dum htoq ló é buinyi jé shoq, haú yhûm má za nyi nyi keq.

<sup>5</sup> Nungmoq lé a lhom hap yu é bang lé gi, yhangmoq é wà mai htoq ló é hkûn, nungmoq lé a lhom hap yu é saksé dut sháng gaq, nungmoq é

hkyiwa má dap é hpuilhaú lé yhangmoq é myoq hí má ko hkyô pyám to keq." ga taí kat ri.

<sup>6</sup> Haú mù, yhangmoq gi, htoq e ló luí, wà hkang wà mó má haú gabú danglù hko kyo uchyang, hká jé hkâmá nòhpyo lhoq gê byí wún akô.

*Herut Maú Úng-âng É Hkyô*

*Mht 14:1-12; Mrk 6:14-29*

<sup>7</sup> Haú su dut é hkyô banshoq lé, mauzau Herut wó gyô yù luí myit wuì nyi ri. Hkâsu mù gà le, ra-am gi, Yohan shi é mai dum dui toq lô bê ga,

<sup>8</sup> ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiqhtoi rayuq yuq dum dui toq lô bê ga luí, taí bùm kô é yanmai nghut ri.

<sup>9</sup> Herut gi, "Yohan é ulhum lé, ngò hpyit pyám nhâng bê, nghut kôhang, shí í wá taí byông bùm kô é gi, ó wá nghut lhê lhú?" ga luí, Yesuq lé myàng shoq ga ho nyi ri.

*Byù Ngo Hkyîng Lé Yesuq Zoshuq Byi Tsô É Hkyô*

*Mht 14:13-21; Mrk 6:30-44; Yhn 6:1-14*

<sup>10</sup> Lagyo pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuì chûng mù, Betsaida gà é wà mó shut tsik za e ló byuq ri.

<sup>11</sup> Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nòhpyo gè naù bang lé, lhoq gê byí ri.

<sup>12</sup> Buigyùm zó má, lagyo raxe í yuq gi, Yhâng chyáng huí ê mù, "Haú shiwa byu pé lé, awui ayàm mâ é yhûm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gà le, ahkuí ngan-húng gi, yoso má nghut nyi ri." ga luí, Yhang lé taí akô.

<sup>13</sup> Haú hkûn, Yesuq gi, "Nungmoq, yhangmoq lé rajungjung byi tso keq." ga tû taí ri.

Yhangmoq gi, "Shî myhô bang lé tso râ zoshuq a ê wui le gi, ng-amoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baú lhang ngo hkyîng kô nghut ri.)

14 Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng é chángzô pé lé taí ri.

15 Yhangmoq lé Yesuq taí é eq ra-jung za, banshoq bang lé zùng nhang to bekô.

16 Haú hkûn, Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri.

17 Haú hkûn, yhangmoq banshoq bang zô gyî bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

*Yesuq Gi, Hkrisduq Nghut Lhê Ga Petruq Taí É Hkyô*

*Mht 16:13-28; Mrk 8:27-9:1*

18 Radàm lé, Yesuq gi, Yhang baú kyûdung nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhú?" ga myî ri.

19 "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tû taí akô.

20 Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myî ri.

Haú hkûn, Petruq gi, "Nàng gi, Garai Gasang nhâng byî é Hkrisduq nghut ri." ga tû taí ri.

21 Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri.

22 Haú mù, Yhang gi, "Haú Byu Yhangzo gi, zing-rî é myo myo hui zo luí, suwún wui, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyi má, lhoq toq yu é hui râ nghut lhê." ga taí ri.

23 Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhum-sing gùng yhumsing he-ngik pyâm mù, nyí wui yhumsing é tapzîng lé waq chûng\* luí, cháng ra râ nghut lhê.

24 Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê.

25 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyû bò râ lhú?

26 Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haú chyoiyúng maumang lagyô pê é hpungwup shingkang èq jé lé é hkûn, hoq pyâm râ nghut lhê.

27 Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shî kó râ a nghut." gâ ri.

*Mosheq Eq Eliyaq Yesuq Lé Hui Nyo É Hkyô*

*Mht 17:1-8; Mrk 9:2-8*

28 Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri.

29 Kyû dung nyi le, Yesuq é myoq-dong gi, ihpyô isâm htaí lò mù, Yhâng é mebu gi, lhap su duq bang lo ri.

30 Haú hkûn, wú keq, Mosheq eq Eliyaq gi, hpungwup shingkang eq htoq lé lò luí, Yesuq eq dâng nyo lhùm nyi akô.

\* 9:23 Tapzîng lé waq chûng nghu é gi, Yesuq é yanmai jamjau huí é lé taí é nghut lhê.



<sup>31</sup> Yhangmoq gi, Garai Gasang myit tô é hkyô Yerusalem wà mó má Yesuq shî hkâm é dông mai dik lò râ nghut é hkyô lé taí lhûm nyi akô.

<sup>32</sup> Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shing kang lé le, Yhang eq rahá yap to su nhik lé le, myang kat akô.

<sup>33</sup> Haû nhik Yesuq chyáng mai gâng ló nyi é hkûn, Petruq gi, Yesuq lé, "Yhumsîng ê, shí jowò má nga-nhúng nyi le ge ri, haû mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sôm lhum saí nhâng laq." ga taí kat kôlhang, yhang haí taí nyi é lé, yhang a sé.

<sup>34</sup> Petruq dang taí nyi ashî hkûn lé, mhut jé mù, yhangmoq lé htup zîng lo nyi ri. Mhut haû htup lo nyi é yanmai, yhangmoq gi, gyuq byuq akô.

<sup>35</sup> Haû mhut hkaû mai htoq lo é htê gi, "Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq." gâ ri.

<sup>36</sup> Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haû bun haû yoq má, ó lé le a taí kyô é zim za nyi byuq akô.

*Nat Gang Dap É Yuqgè Zo Rayuq Lé Lhoq Gê Byî É Hkyô*

*Mht 17:14-18; Mrk 9:14-27*

<sup>37</sup> Hau htâng nyi, yhangmoq bùm haû mai gyó ló kô le, byù moq mó gi, Yesuq lé lhom te yu akô.

<sup>38</sup> Haú hkûn, byù hpúng haú mâ é byù rayuq wut garû htoq ló é gi,

<sup>39</sup> "Sarâ ê, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri.

<sup>40</sup> Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé

gyai myit lum é eq dúng kat lhê." gâ ri.

<sup>41</sup> Haû mù luí, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myhâng jé shoq nungmoq eq rahá nyi mù, wó jân nyi râ lhú? Nung zo lé, shí shut shuí lé lô aq." ga tû taí ri.

<sup>42</sup> Zoshâng haû, lé lo nyi le lháng, nat gang gi, yhang lé lhoq lhêng to mù langhtân nhang ashî. Yesuq kúm gi, haû agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byî ri.

<sup>43</sup> Nyi mi-nyî gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haû lé maú nyi bùm kô le, Yesuq gi,

<sup>44</sup> "Haû Byu Yhangzo gi, byu pê é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri.

<sup>45</sup> Yhangmoq kúm gi, dang haú lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

*Ó Yuq Gi, Kô Dik Sû Nghut Râ Lhú? Mht 18:1-5; Mrk 9:33-40*

<sup>46</sup> Hau htâng, lagyô pé gi, hká yuq sheq, kô dik sù nghut lhê lhú ga, rayuq eq rayuq taí myíng myô lhûm nyi akô.

<sup>47</sup> Yesuq kúm gi, yhangmoq é unghkaû má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí,

<sup>48</sup> "Shî zoshâng lé Ngá é myìng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haû Ngo lé nhang kat é Sû lé hap yu é le nghut lhê. Haû mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé taí ri.

<sup>49</sup> Haú hkûn, Yohan gi, "Yhumsîng ê, Náng é myìng láng luí, nat gâng pé

lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkùm pyám é nghut lhê." ga taí ri.

<sup>50</sup> Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé taí ri.

### *Samariq Wà Bang Yesuq Lé A Lhom Hap Yu É Hkyô*

<sup>51</sup> Ahkuí, Yesuq gi, Yhang lé mauhkúng shut shuí toq yû rá buinyi chyáng lò bê nghut mù, Yerusalem wà mó shut ê rá lé myit hpyit to luí, Yhâng é hí má lagyo nhang kat ri.

<sup>52</sup> Lagyo haú bang gi, Yhâng matú rá é hkyô lajang lánng rá ga, Samariq wà rawà má wang ló akô.

<sup>53</sup> Nghut kôlhang, Yesuq gi, Yerusalem wà mó shut lai e ló é sù nghut é yanmai, haú wà bang gi, Yhang lé a lhom hap yù kó.

<sup>54</sup> Haú hkùn, lagyo Yakuq eq Yohan nhik gi, haú lé myáng jáng, "Yhumsîng ê, yhangmoq lé lhoq htên pyám rá matú, ngá-nhik mauhkúng mai myi wut hkyó le, a gè lhu?" ga luí, Yesuq lé myí akô.

<sup>55</sup> Yhang kúm gi, lhing wú luí yhangnhik lé, tân pyám ri,

<sup>56</sup> haú mù luí, yhangmoq gi, gó wà shut e ló byuq akô.

### *Yesuq É Htâng, Hkâsu Kut Cháng Râ Hkyô*

#### *Mht 8:19-22*

<sup>57</sup> Yhangmoq haú hkyô má e ló kô le, byù rayuq gi, "Nàng hká e le hká ngò cháng rá." ga luí, Yesuq lé taí ri.

<sup>58</sup> Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haú Byu Yhangzo gi, ulhum to jang lháng a wó é nghut ri." ga taí pyám ri.

<sup>59</sup> Dum rayuq lé, "Ngá htâng cháng aq." ga taí jáng, haú yuq gi, "Yhumsîng

ê, ngá wa lé, ló yhùm pyám rá ahkáng hí byi shi laq." ga taí ri.

<sup>60</sup> Yesuq gi, yhang lé, "Shî bê bang† gi, shî bê bang yhangchang yhùm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

<sup>61</sup> Byù rayuq dum, Yhang lé, "Yhumsîng ê, ngò le náng htâng cháng rá, nghut kôlhang, ngá yhumbyù lé hí hkyang ló shit to rá ahkáng byi shi laq." ga taí ri.

<sup>62</sup> Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé taí ri.

## 10

### *Yesuq, Chángzô Pé Nyhit Xê Yuq Lé, Nhang Htoq Kat É Hkyô*

<sup>1</sup> Hau htâng má, Yhumsîng gi, gotû chángzô pé nyhit xê yuq\* lé hkyin yù mù, Yhang e ló rá wà eq jowò hkgangmó shut í yuq razúm zúm kut luí, Yhâng é hí má ê nhang kat ri.

<sup>2</sup> Yesuq gi, yhangmoq lé, "Kyô† shù yù rá myo shoq joq kôlhang, mù zui rá byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi rá matú, dung keq.

<sup>3</sup> Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê.

<sup>4</sup> Ngùn htûng eq, etap, hkyî-tsung pé hkâyü chûng kó, hkyô má ó lé le hkâshichyên kûn nyi kó.

<sup>5</sup> Nungmoq gi, hká yhùm má wàng e ló kô le, 'Shi yhùm nguingón nyi sháng gaq.' nghû luí, hí taí keq.

<sup>6</sup> Haú yhùm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to rá nghut lhê. Haú a nghut jáng, nguingón hkyô haú gi, nungmoq chyáng dum taú lo byuq rá nghut lhê.

† 9:60 Shî bê bang gâ é gi, woi-nyí má shi to bang lé gâ lhê. \* 10:1 Chyúmdang ra-am má gi, chángzo nyhit xê í yuq ga le kâ tô ri. † 10:2 Kyô nghû é gi, Yesuq lé lumjîng nàu kôlhang taí kyo rá bang a nyi luí lánng tô é bang nghut ri. ‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

7 Haú yhùm má nyi to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yú gíng lhê; haú mù, nungmoq rayhum htâng rayhùm hkâhtot nyi wún kó.

8 Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq.

9 Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghú luí, yhangmoq lé taí kyo keq.

10 Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wâ mâ é hkyô mó má htoq ê mù,

11 'Ngamoq é hkyî má dap tô é nungmoq wà mâ é hpuilhaú lhang, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghú luí taí keq.

12 Ngò, nungmoq lé taí kôlé, haú buinyi§ lé, haú wâ gi, Sodom wà htoq má je hpuzo râ nghut lhê.

13 Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyún lhê kut zung ngúng to bekô râ nghut lhê.

14 Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo\* kó râ nghut lhê.

15 Dum mù, Kaperna-um wà nàng ê, nàng gi, mauhkúng jé shoq waq toq é hui râ lú? A nghut, mosumhkung má sheq gyó râ nghut lhê." ga taí ri.

16 Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê;

nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

### *Nyhit Xê Yuq Dum Taú Jé Lo É Hkyô*

17 Hau htâng, haú chángzô nyhit xê yuq gi, gabú myit eq dum taú lò mù, "Yhumsing ê, náng é mying lé lang jáng, nat gâng pé lhang ngamoq é dang lé gyô bum akô." ga taí akô.

18 Haú su ga taí kôjáng, Yesuq tú taí é gi, "Tsadán gi, mauhkúng htoq mai lhap hpyat é su byit gyó lo é lé ngò myang kat bê.

19 Wú keq! Ngò gi, nungmoq lé, lhangmuí eq gogok pé lé wó nang râ eq gumlau gyè pé é wum-o a-tsam banshoq lé wó úng râ ahko ahkáng lé byi bê nghut mù luí, hai eq le nungmoq lé wó lhoq hten râ a nghut lo.

20 Nghut kôlhang, nat pé nungmoq é dang gyô é lé za hkâgabú nyí kó, mauhkúng htoq mâ é asak jihpán laiká buk má nungmoq é mying bo to bê lé sheq gabú nyí keq." ga taí ri.

21 Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkúng eq myigung é Yhumsing, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wui lé tûn shit bê nghut é yanmai, Ngò, Nang lé hkyâ-ôn lhê ô. Nghut bê, Áwa ê, haú gi, Nàng ô nau é hkyô nghut ri.

22 Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luí, ó a sé." ga taí ri.

23 Hau htâng má, Yhâng é chángzô pé shut lhing wú luí, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri.

§ 10:12 Haú buinyi gâ é gi, Garai Gasâng tarâ jéyáng é buinyi lé gâ lhê. \* 10:14 Nungnhik je hpuzo é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri.

24 Hkâsu mù gâ le, Ngò, nungmoq lé taí kôlé, nungmoq wó myâng, wó gyô é pé lé, myiqhtoí pé eq hkohkam pé myo myo gi, myàng naù gyo naù kôlhang, a wó myâng, a wó gyo kó nghut ri." ga taí ri.

### *Gè É Samariq Byù*

25 Haú hkûn, wú keq, tarâ sará rayuq gi, toq luí, Yesuq lé, "Sarâ é, ahtum abyuq é asak lé wó yû shoq, ngò hkâsu kut râ râ lhê lhú?" ga luí, Yhang lé myí chyam wú ri.

26 Yesuq gi, "Mosheq é tarâ má hkâsu ga kê tô ri lhú? Nàng haú lé hkâsu nghap yu nyi lhê lhú?" ga luí, yhang lé myí ri.

27 Haú yuq gi, "'Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lhê; \* 'náng gûng lé nàng chyitdap é su, náng é chyangnâm mâ é bang lé le chyitdap aq. \*'" ga tû taí ri.

28 Yesuq gi, "Nàng tû taí é dang jô ri; haú su yhang kut aq, haú jáng nàng gi, asak duì râ nghut lhê." ga yhang lé taí ri.

29 Nghut kôlhang, haú yuq gi, yhang gungdu dingmán é lé, tûn shit naú luí, "Ngá é chyangnâm mâ é sù gi, ó yuq nghut lhê lhú?" ga luí, Yesuq lé myí ri.

30 Yesuq tû taí é gi, "Byù rayuq gi, Yerusalem wà mó mai Yerihko wà shut gyó ló le, damyaq eq htûng huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyám to kôluí ló byuq bekô.

31 Haú u lé, hkyangjong rayuq gi, haú hkyô mai laí âng ló le, haú damyaq hui sù lé myàng jáng, koi laí ló byuq ri.

32 Haú eq rajung za, Lewiq rayuq le, haú mai laí ló é hkûn, haú yuq lé myàng jáng, koi laí ló byuq ri.

33 Nghut kôlhang, Samariq byù rayuq le, haú mai laí ló é hkûn, haú

yuq leq tô é lé myàng jáng, wú shogyo luí yhâng chyáng huí é mù,

34 yhâng é dàm má, xû eq tsibiyiq wing shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhûm má jé shoq shuí ló mù, gôn lajang byi ri.

35 Htang nyí lé, yhang gi, haú bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gûng má nàng myo chung záng é banshoq lé ngò dum taú lò jáng, lo xap râ.' gâ ri." gâ ri.

36 Hau htâng, tarâ sará lé, "Nàng gi, byù haú bang sum yuq má damyaq huí sù é chyangnâm mâ é dông nghut sù gi, hká yuq nghut râ su ngam ri lhú?" ga luí, Yesuq myí ri.

37 Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú dông ló kut aq." ga luí, yhang lé taí kat ri.

### *Mariq Eq Mahtaq Nihik Chyáng Yesuq É Jé É Hkyô*

38 Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri.

39 Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsîng Yesuq é hkyi wang má zung to mù, Yhang mhoqshit é dang lé gyô nyi ri.

40 Mahtaq kúm gi, saí tso saí huq é amû myo luí, gyin bûn nyi ri. Haú mù luí, yhang huí é mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

41 Haú hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.

42 Nghut kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu

pyám byi râ a nghut." ga luí, yhang lé tú tái ri.

## 11

### *Yesuq Mhoqshit É Kyûdung Dang* *Mht 6:9-13; 7:7-11*

<sup>1</sup> Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsîng ê, Yohan gi, yhâng é chángzô pé lé kyûdung râ hkyô mhoq byi é su, ngamoq lé le mhoq byi laq." ga Yhang lé tái ri.

<sup>2</sup> Haú hkûn, Yhang gi, "Nungmoq kyûdung le, 'Mauhkûng htoq tsáng myhâng mâ é ngamoq é Áwa ê, Náng é myîng gi, chyoiyúng nyi sháng gaq.

Náng é mingdán jé lô sháng gaq.

<sup>3</sup> Ngamoq nyi wuî râ é zoshuq lé, ngamoq lé nyi wuî byi laq.

<sup>4</sup> Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshit ri.

<sup>5</sup> Yesuq yhangmoq lé dum tái é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyí byi kat laq,

<sup>6</sup> haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga tái é hkûn,

<sup>7</sup> yhúmkaú shut mâ é sù gi, 'Ngo lé, hkâlê lhoq hkyik lo, hkum le myhí pyám bê, ngá zoshâng wuî le ngò eq rahá yhupjang má yhup to bekô. Ngò, nang lé haí le a wó toq yû byi lo.' ga tu kat ri.

<sup>8</sup> Ngò, nungmoq lé tái kôlé, buinùm nghut é yanmai za gi, muk a kâm toq byi lo kôhang, zuq zuq dúng nyi é

yanmai, haú yuq lé, yhang ra châ é banshoq toq yû byi râ nghut lhê.

<sup>9</sup> Haú mù, ngò, nungmoq lé dum tái kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê.

<sup>10</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>11</sup> Nungmoq îwâ pé má, ó yuq wá, yhumsîng yhangzo muk dúng le, luqgok byi kó râ lhú? Ngozo dúng le, lhangmuí byi kó râ lhú?

<sup>12</sup> Woq-ú dúng le, gogok byi kó râ lhú?

<sup>13</sup> Agè ashop é bang nungmoq lhang gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga tái ri.

### *Mara Hûn É Dang Lé Yesuq Tú Tái É Hkyô*

*Mht 12:22-30, 43-45; Mrk 3:20-27*

<sup>14</sup> Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô.

<sup>15</sup> Nghut kôhang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsam èq za, nat gâng pé lé wó hkat pyâm é nghut ri." ga tái bum akô nghut ri.

<sup>16</sup> Ra-am le, Yhang lé, mauhkûng mâ é kumlhá tûn shit wú laq ga dúng chyam wú akô.\*

<sup>17</sup> Yesuq kúm yhangmoq myit nyi é hkyô lé sé mù tái é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq

\* **11:16** Byu pé gi, Yesuq lé Garai Gasang nhang kat é hkyô lé saksé myàng naú luí, mauhpo kumlhá dúng nyi akô.

rayuq byoq lhûm é yhûm htu gi, byoq gâng lhûm râ za nghut lhê.

<sup>18</sup> Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gîng to râ lú? Ngò isu nghu taí é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê.

<sup>19</sup> Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyám kô é nghut lhê lú? Haû mù luí, yhangmoq gi, nungmoq lé jéyáng é bang dut bekô râ nghut lhê.

<sup>20</sup> Nghut kôlhang, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

<sup>21</sup> Wum-o bo é sù rayuq gi, yhâng é yhûm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê.

<sup>22</sup> Nghut kôlhang, yhâng htoq wum je bo é sù lé luí, haû yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

<sup>23</sup> Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

<sup>24</sup> Haû agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. Haû hkûn, yhang gi, 'Ngò nyi laí lo é yhûm má dum taû ló wú râ.' ga taí ri.

<sup>25</sup> Yhang dum taû jé ló wú le, yhûm haû gi, shum pyám mù san za rago dut to lánq é lé ló myang ri.

<sup>26</sup> Haû jáng, yhang gi, dum taû é mù, yhâng htoq je wú é nat nyhit nat lé shuí lò luí, haû má lo wàng nyi to

bekô. Haû mù, haû yuq é nyi yap sâmlai gi, hí lhê htoq má je wú lò bê nghut ri." ga taí ri.

<sup>27</sup> Haû su ga, Yesuq taí nyi é hkûn, haû shiwa hpong mâ é, myiwe zo rayuq htê mó o mó èq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

<sup>28</sup> Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

### *Mauhpo Kumhá Lé Dung Kô É Hkyô*

*Mht 12:38-42; Mrk 8:12*

<sup>29</sup> Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumhá dúng nyi bùm kôlhang, Yonaq é kumhá mai lai luí, gotû haí le tûn shit râ a nghut.

<sup>30</sup> Yonaq gi, Ninewe wà byù pé hí má kumhá§ dut é su, haû Byu Yhangzo gi, shí pyat lhê é byu pé hí má, kumhá dut râ nghut lhê.

<sup>31</sup> Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyi má, shí ipyat mâ é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê.

<sup>32</sup> Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

### *Myibung Su Duqbó Râ Hkyô*

*Mht 5:15; 6:22-23*

† **11:20** *Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkanq é lé gâ é nghut lhê.* ‡ **11:22** *Haû eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri.* § **11:30** *Kumhá gi, Yonaq, ngozô wamdaumá sum nyí lúng é su, Yesuq le, shí bê mai sum nyí nghû râ nyí má, dum dui toq lô râ hkyô lé taí nau é nghut ri.*

33 Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng rá matú kúm gi, tsungjang má tsung to to chyat kut akô.

34 Náng é myoq gi, náng gungdû é myibung\* nghut nyi ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi rá nghut lhê.

35 Haû mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjínq é hkyô eq náng myit é hkyô gi, mauchut tuq a dut sháng gaq, sidiq nyi aq.

36 Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi rá nghut lhê." ga taí ri.

*Hparishe Pé Eq Tarâ Sará Pé Lé, Yesuq Mara Hun É Hkyô*

*Mht 23:1-36; Mrk 12:38-40; Luk 20:45-47*

37 Yesuq haû su ga ban taí é htâng má, Hparishe rayuq gi, yhang eq zang rahá zo rá matú, Yesuq lé ji ri. Haû mù, Yesuq gi, haû yhûm má wang ê mù zang zo rá ga siboî nam má zung tô ri.

38 Nghut kôlhang, Hparishe wá gi, zang zo rá hí má Yesuq loq a chí é lé, myàng luí maú nyi ri.†

39 Haû mù luí, Yhumsíng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri.

40 Byù bâm pé ê, ahte‡ lé le, ahtoq\$ lé le, saí sù gi, Garai Gasang rayuq za nghut é lé, a sé kó lúhú?

41 Nghut kôlhang, ahte má bo é zè pé lé, ra châ é bang lé byi pyám keq;

haû hkûn, nungmoq é matú banshoq gi, sân-yúng lô rá nghut lhê.

42 Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhaí pyâm tô akô. Xê gambùm ragambùm byi é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi rá lhê.

43 Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

44 Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô laí é lupdùng eq du akô." ga taí ri.

45 Haû hkûn, tarâ sará rayuq gi, "Sará ê, náng haû su gâ é gi, ngamoq lé le rhoi lhôm nyi é nghut bê." ga Yhang lé tô taí ri.

46 Haû su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq rá wuí é noqkuq htúng tarâ wòlai lé wùn nhâng luí, yhumsíng yhang gi, wò haû lé loqnyhuí eq lhang, a bo záng wú kó nghut ri.

47 Nungmoq gi, dingnyé wó ri, hkâsu mù gâ le, nungmoq gi, nungmoq é íchýí îwâ pé sat pyâm é myiqhtoí pé é lup lé luptsuq tsuq akô.

48 Haû mù luí, nungmoq gi, nungmoq é íchýí îwa pé é muzó lé, myit bo huí é bang nghut nyi akô. Hkâsu mù gâ le, yhangmoq gi, myiqhtoí pé lé sat pyám mù, nungmoq gi, lup haû pé lé luptsuq tsuq akô.

49 Haû mù luí, Garai Gasang, Yhâng é hpaqchyí byéng-yá mai taí é gi, 'Myiqhtoí pé eq lagýô pé lé, ngò yhang-

\* 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri. † 11:38 Yudaq htúng tarâ má gi, zang a zo shi má loq chí rá lhê. ‡ 11:40 Ahte gâ é gi, i-myit unghkaû lé taí ri. § 11:40 Ahtoq gâ é gi, gungdu lé taí ri.

moq chyáng nhang kat râ nghut lhê; haú bang mâ é ra-am lé gi, yhangmoq lhom sat pyám mù, ra-am lé gi, zing-ri kó râ nghut lhê.' gâ ri.

<sup>50</sup> Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyám huí é Zahkariq é sui jé shoq, shun pyám é myiqhtoí pê é sui ban-shoq bâng é manglat gi, shí pyat mâ é byu pé lé hûn râ nghut lhê.

<sup>51</sup> Ngò, nungmoq lé taí kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

<sup>52</sup> Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naú bang lé le, hkûm zing tô akò nghut ri." ga taí ri.

<sup>53-54</sup> Yesuq haú mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuî é dangmyi myo myo myi luí, gyám wú nyi akò nghut ri.

## 12

*Gegùn Labyoq Kut É Bang Lé Sidiq Râ Hkyô*

*Mht 10:28-33; 12:32; 10:19-20*

<sup>1</sup> Haú u, byù hkyîng mun zup zîng lò mù, rayuq eq rayuq lhang záng nang lhum shoq dut nyi é hkûn, Yesuq, Yhâng é chángzô pé lé taí hi é gi, "Gegùn labyoq kut é Hparishe pê é múnchi lé koi sidiq pyám keq.

<sup>2</sup> A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê.

<sup>3</sup> Haú mù luí, nungmoq, mauchut hkaú má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô râ nghut lhê.

<sup>4</sup> Ngá buinùm wuî ê, Ngò, nungmoq lé taí kôlé, gungdu lé za wó sat pyám

mù, woi-nyí lé haí le a wó kut é bang lé, hkâgyuq kó.

<sup>5</sup> Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyám é htâng má, woi-nyí lé ngaraí ming shut wó hkyô kat pyám é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyi keq.

<sup>6</sup> Johkyáng ngo du lé, gyi htingchap í chap èq wó ùng pyám lhê a nghut kó lú? Haú johkyáng radu lé lhang, Garai Gasang gi, tô-myhî pyám é a nghut.

<sup>7</sup> Garai Gasang gi, nungmoq é ulhum mâ é xâm banshoq lé lhang, ngahap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

<sup>8</sup> Ngò, nungmoq lé taí kôlé, byu pé hí má Ngo lé lhom yín yu é sù ó yuq nghut kôle, Garai Gasang é maumang lagyô pê é hí má, haú Byu Yhangzo gi, haú yuq lé lhom yín yú râ nghut lhê.

<sup>9</sup> Nghut kôlhang, byu pé é hí má Ngo lé he-ngik pyám é sù lé chyaú gi, Garai Gasang é maumang lagyô pê é hí má, he-ngik pyám râ nghut lhê.

<sup>10</sup> Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoí dang taí pyám é sù gi, mara hkyut byí é hui râ a nghut.

<sup>11</sup> Byu pé nungmoq lé jéyáng râ matú tarajong pé má le, agyi suwún wuî eq ahkáng ayá wó bâng é hí má le, shuî e ló kô é hkûn, hkâsu kut râ lé le, hkâsu nghú tú taí râ lé le, hkâ-myt chiq kó.

<sup>12</sup> Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhogshit byi râ nghut lhê." ga taí ri.

*Hpaqchyî A Bo É Sahtê Hpó Lé Dangtú Yu É Hkyô*

<sup>13</sup> Haú hkûn, shiwa hpúng hkaú mai, byù rayuq gi, "Sará ê, ngá-nhik tâng wó é muizè pé lé chôm gam lhum



râ matú, ngá mang lé bo taí byi laq." ga luí, Yesuq lé taí ri.

<sup>14</sup> Yesuq gi, "Byù nàng ê, nungnhik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é lú?" ga luí, yhang lé tâ taí ri.

<sup>15</sup> Yesuq yhangmoq lé tâ é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

<sup>16</sup> Dangtú ralhum dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri.

<sup>17</sup> Haú mù luí, yhâng é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

<sup>18</sup> Dum nghut jáng, yhang gi, 'Ngò îsu kut wú râ abe, ngá é chyí xau pé lé hpyoq pyám luí, je kô é chyí pé lé saí rá nghut lhê. Chyí haú pé má ngá é guqzo muilhum pé eq sutzè banshoq lé, tsìng kat to luí,

<sup>19</sup> ngá é i-myt lé îsu nghû taí râ, "I-myt ê, zanwut myáng myáng é matú, zè gè myo myo ngò tsìng to bê. I-myt nàng zim za kut nyi aq hkoi. Zo mù, shuq mù, ngón ngón nyi aq." ga' gâ ri.

<sup>20</sup> Nghut kôlhang, Garai Gasang gi, 'Byù gò ê, náng é asak lé, hkû-myín yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut râ lú?' ga luí, yhang lé tâ ri.

<sup>21</sup> Haú eq rajung za, yhumsing é matú sutzè hkong to mù luí, Garai Gasang é hí má myung nyi sù gi, haú yuq su nghut râ nghut lhê." gâ ri.

### *Myit A Chiq É Za Garai Lé Lumjìng Râ Hkyô*

*Mht 6:25-34, 19-21*

<sup>22</sup> Yesuq, Yhâng é chángzô pé lé dum taí é gi, "Haú mù luí, Ngò, nungmoq lé tâ kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó.

<sup>23</sup> Asak gi, zoshuq htoq má, gungdu gi, mebû htoq má, je ahkyak lhê.

<sup>24</sup> Nghonoq pé é hkyô lé myit wú keq; yhangmoq gi, kyô hkyó kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lú?

<sup>25</sup> Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lú?

<sup>26</sup> Haú su mù luí, tiq dik é hkyô lé lháng, nungmoq a wó kut kô é nhìng, haí mù luí gotû hkyô pé lé, myit myô nyi akô lú?

<sup>27</sup> Htutbó ban\* pé hkâsu kut kô lo é lé, myit wú keq. Haú pé gi, mù le a zui, hkyíng le a òi kó nghut ri. Nghut kôlhang, Ngò, nungmoq lé tâ kyo kôlé, Hkôhkâm Sholumon hpúng kô dik u lé wut é mebu lháng, ban haú rabó lé a hkyit nghut ri.

<sup>28</sup> Lumjìng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lháng, Garai Gasang haú su kut hut é nghut le gi, nungmoq lé, je riyhang hut râ a nghut kó lú?

<sup>29</sup> Nungmoq gi, haí zo haí shuq râ lé hkâho nyi kó; haú eq séng luí lé hkâ-myt chiq nyi kó.

<sup>30</sup> Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Îwa Garai Gasang gi, haú pé lé nungmoq râ é hkyô, sé byí nyi lhê.

<sup>31</sup> Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

<sup>32</sup> Sau hpúng zô pé ê, hkâgyuq ko, hkâsu mù gâ le, nungmoq é Îwa Garai Gasang gi, Yhâng é mingdán nungmoq lé byí nau nyi ri.

<sup>33</sup> Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot èq

\* **12:27** Htutbó ban gi, yúng dik é yosô ban nghut lhê.

le a wó zô é sutzè lé mauhkûng htoq má hkong to keq.

<sup>34</sup> Hkâsu mù gâ le, náng é sutzè joq jang má, náng é i-myit le jé nyí râ nghut lhê.

*Yesuq Dum Jé Lé Lô Râ Hkyíng Lé Machya Nyí Râ Hkyô*

*Mht 24:45-51*

<sup>35</sup> Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù,

<sup>36</sup> myiháng poí mai dum taú lò luí, hkúm lo kok é, yhumsíng hpó lé radá dâm hkum lhom wó hpông hâng yù shoq, láng tô é dui-nhâng zoshâng wui su kut nyí keq.

<sup>37</sup> Haú yhumsíng jé lo le, machya nyí láng é dui-nhâng zoshâng wui gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haú yhumsíng hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê.

<sup>38</sup> Gunggàm yoq lé nghut kôlhang, woq tân hkûn lé nghut kôlhang, haú su kut machya nyi é lé, yhumsíng hpó lo myang é nghut le gi, dui-nhâng zoshâng haú bang hkungsô wó nyi ri.

<sup>39</sup> Yhumsíng hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhâng yhúm lé a wó hput htong nhâng râ nghut é lé, bûn sê nyi keq.

<sup>40</sup> Haú mù, nungmoq le rì rì nghut nyí keq; hkâsu mù gâ le, haú Byu Yhangzo gi, a bûn nùng má jé lé lô râ nghut lhê." gâ ri.

<sup>41</sup> Haú hkûn, Petruq gi, "Yhumsíng ê, dangtú shí gi, ngamoq lé za, taí é nghut lhê lú? Haú a nghut jáng, lhunglhâng bang lé taí é dông nghut lhê lú?" ga myí ri.

<sup>42</sup> Haú jáng, Yesuq gi, "Lumgíng é eq hpaqchyí bo é sùt zum sù gi, hká yuq nghut lhê lú? Haú yuq gi, yhâng yhumsíng é dui-nhâng zoshâng wui lé ahkyíng jé jáng zoshuq gàm byi râ

matú, yhumsíng hpô eq hkyin to sù dut râ nghut lhê.

<sup>43</sup> Yhumsíng hpó dum taú lo é hkûn, haú su kut nyí láng é dui-nhâng zoshâng gi, hkungsô wó nyi ri.

<sup>44</sup> Ngò, nungmoq lé teng za taí kôlé, yhumsíng hpó haú gi, yhâng é sutzè banshoq, dui-nhâng zoshâng haú lé ap to râ nghut lhê.

<sup>45</sup> Nghut kôlhang, dui-nhâng zoshâng haú gi, yhâng é i-myit unghkaú má, 'Ngá é yhumsíng hpó jé lô râ gyai myáng ashí.' ga myit pyám mù, dui-nhâng zoshâng luzúm wui myiwe, yuqgè lé nhuq bat é eq, zo yê shuq yê î shuq wut nyi é nghut jáng,

<sup>46</sup> dui-nhâng zoshâng hau é yhumsíng hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luí a lumjíng bang eq rahá nyhi pyám râ nghut lhê.

<sup>47</sup> Yhumsíng hpô é i-myit lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsíng eq nhuq bat é lé, myo myo hui zo râ nghut lhê.

<sup>48</sup> Nghut kôlhang, a sé mù kut shut sù kúm gi, shau za bat é hui râ nghut lhê. Haú eq rajung za, Garai Gasang gi, myo shoq wó yú su chyáng mai, myo shoq dúng yù râ nghut lhê. Myo myo ap byi tô é hui su chyáng mai, je myo shoq dum dúng yù râ nghut lhê.

*Nguingón Nhâng Râ A Nghut, Lhoq Kang Nhâng Râ Ru Nghut Lhé*

*Mht 10:34-36*

<sup>49</sup> Ngò jé lé é gi, myigùng htoq má, myi nyé nhâng râ matú nghut lhê. Myi haú dap to láng é nghut le gi, ngò ô nau é hkyô jup byíng bê.

<sup>50</sup> Nghut kôlhang, ngò hkam yù râ é baptisma† rajung joq ashí, haú a hkam yù yù gi, ngò gyai yhang hkâm zo wui nyi ri.

<sup>51</sup> Ngò jé lé é gi, myidàm htoq má simsaq hkyô byi râ matú nghut nhô ngam akô lú? Haú dông a nghut, Ngò, nungmoq lé taí kôlé, byu pé lé

† 12:50 Shí má é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

lhoq pyô lhoq kang râ matú sheq ru nghut lhê.

<sup>52</sup> Haû su mù, ahkuî mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê.

<sup>53</sup> Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

*Dut Lò Râ Hkyo É Kumlhá Lé Sê Gam Hkoq Râ Lhé*

*Mht 16:2-3; 5:25-26*

<sup>54</sup> Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haû eq rajung za le, dut lò lò mu ri.

<sup>55</sup> Dum nghut jáng, maupyî shut mâ é lai lo le, 'Bùi htân berâ.' ga lhaq taí taí mu akô, haû eq rajung za le dut lò lò mu ri.

<sup>56</sup> Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haû su nghut kô le nhîng, haí mù luí, shí ipyat mâ é kumlhá lé gi, a sê gam hkoq dut tô akô lhú?

<sup>57</sup> Haû eq rajung za, haí mù haû dingmán é hkyô lé yhumsîng yhang yhang a wó doqdân yù kô é lhú?

<sup>58</sup> Dangké, nang lé yui tsuq sù eq rahá, tarâ agyî wá chyáng e ló le, hkyô má yhang eq ngón shoq byìn hpyé huí yù aq. Haû a nghut jáng, yui yhumsîng gi, nang lé tarâ agyî chyáng é dé pyám luí, tarâ agyî gi, htóng hkyô su chyáng, nang lé ap pyám luí, yhang gi, nang lé htóng má lhúng pyám râ nghut lhê.

<sup>59</sup> Ngò, nang lé taí lé, yuichyîn haû a ban xap xap gi, htóng haû mai nàng wó htoq ló râ a nghut." ga taí ri.

## 13

*Myit A Lhîng Jáng Shi Hten Byuq Râ*

<sup>1</sup> Haû hkûn, haû má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhô pyâm é hkyô, Yesuq lé lé taí kyô akô.

<sup>2</sup> Yesuq gi, "Galile byù haû bang haû su kut hui zo kô é yanmai, yhangmoq gi, gotú Galile byu pé banshoq htoq má, yubak je myô akô nghû, nungmoq myit ngam akô lhú?

<sup>3</sup> Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê.

<sup>4</sup> Haû htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lhú?

<sup>5</sup> Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê." ga taí ri.

<sup>6</sup> Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haû má, ashi ê ho wú le, zui tô é a myàng nghut ri.

<sup>7</sup> Haû hkûn, yhang gi, 'Wú aq, ngò sum zân tup maihpáng gâm haû má ashi ê ho wú le, a myàng nghut ri; haû lé htuq pyám aq. Haí mù, maumyî aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

<sup>8</sup> Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhînghkyuq má ngò du lhîng to mù, myìhpún kat luí bóm byi wú shirâ.

<sup>9</sup> Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsîng lé tû taí ri." gâ ri.

*Bánno Buinyî Má Gùng Loq Hten Sù Lé, Lhoq Gê Byî É Hkyô*

10 Bánno buinyì lé, Yesuq gi, tara-jong ralhummá, mhoqshit nyi ri.

11 Haú hkûn, haú má raxe shit zân tup nat dap luí, gùng loq lhoqhten huí é myiwe rayuq le nyi tô ri. Yhang gi, dângngóm luí, gungdu ratsuí lhang a wó lhoq nyhâng lô é sù nghut ri.

12 Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí,

13 yhâng é ahtoq má loq ke byí ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

14 Haú mù, Bánno buinyì lé, Yesuq nòhpyo lhoq gè byí é yanmai, tarajong má up sù gi, wú nhik-yo luí, "Mù wó zúí é buinyì hkyuq nyí joq tô le, buinyì haú pé má, lé wó lhoq ge yù lhê. Haú mù, Bánno buinyì má gi, hkâkut kó." ga luí, shiwa byu pé lé taí kat ri.

15 Haú hkûn, Yhumsîng Yesuq gi, "Gegùn labyoq kut bang é, nungmoq yuq hkanmó gi, Bánno buinyì lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lú?"

16 Haú nghut le gi, raxe shit zân gón Tsadán èq tuí to huí é, Abraham é yhangzo yhangshu myiwe zo shí lé, Bánno buinyì má Tsadán loq mai, hkyut byi a gíng râ lú?" ga tú taí ri.

17 Haú su ga taí jáng, Yhang eq i-myit shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

*Angshi Cham Eq Munchi Dangké  
Mht 13:31-33; Mrk 4:30-32*

18 Haú hkûn, Yesuq taí é gi, "Garai Gasâng é mingdán gi, haí eq wuí lhê lú? Ngò hai eq taí kê wú râ lú?"

19 Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé

má, maulat nghoq zô pé wó zung nô yu akô." gâ ri.

20 Yhang dum xoq taí é gi, "Garai Gasâng é mingdán lé, ngò hai eq taí kê wú râ lú?"

21 Haú gi, myiwe zo rayuq èq sungso múm sum búng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

*Chyap É Hkúmdong  
Mht 7:13-14, 21-23*

22 Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byí ri.

23 Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lú?" ga luí, Yesuq lé myí ri.

24 Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlhang, a wó wâng kó râ nghut lhê.

25 Yhumsîng hpó,\* hkum toq myhí pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí râ nghut lhê.

26 Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

27 Nghut kôlhang, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dòng kut é bang banshoq è, ngá chyáng mai gâng ló byuq keq.' ga tú taí kat râ nghut lhê.

28 Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí,

\* 13:25 Yhumsîng hpó gi, Garai nghut lhê. Yhûm gi, Garai é mingdán lé taí é nghut lhê.

haú jowò má ngaubiyi ngaù nhap eq zuì kyik kyik shoq hpuzô nyi bùm bekô râ nghut lhê.

<sup>29</sup> Hau hkûn, buihotoq, buiwàng, maupyî, mautsûng mâ é mingdán myo myo mai byu pé lé luî, Garai Gasâng é mingdán zoshuq poî má myang zùng kó râ nghut lhê.

<sup>30</sup> Haú hkûn, ahkuî htâng gyó nyi bang gi, hí bekô râ; ahkuî hí to bang gi, htâng gyó bekô râ." ga luî, yhangmoq lé taí ri.

### *Yerusalem Wà Mó Eq Séng Luî, Yesuq Taí É Hkyô*

<sup>31</sup> Haú u lé, Hparishe pé ra-am gi, Yesuq chyáng lé luî, "Shí jowò mai hotoq ló byuq aq. Hkâsu mù gà le, Herut gi, nang lé sat râ hen nyi ri." ga luî, Yhang lé taí akô.

<sup>32</sup> Haú jáng, Yesuq gi, "Hkû-nyí, napmá,† ngò nat gang hkat pyám luî, nò zo hpyo zo lhoq gê byi râ nghut lhê; sum nyí nghû râ buinyi‡ má sheq, ngá mù bàn râ nghut lhê.' nghû luî, agè ashop é wamhkui haú lé ló taí kyo keq.

<sup>33</sup> Haí wá dut kôlhang, hkû-nyí, napmá, sânghepe nyí, ngò gi, e ló rá dut ashí. Hkâsu mù gà le, myiqhtoî pé gi, Yerusalem wà mó mai lai luî gotú jowò má a shi wú kó nghut ri.

<sup>34</sup> Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé, luq-gok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsìng lhùng yu é su, nungzô pé lé, Ngò hkâ-myhó dâm shuí tsìng yù naù kôlhang, nàng a dóng nghut ri.

<sup>35</sup> Wú keq, nungmoq é yhûm gi, nungmoq é matú chamchuyiuyi dut pyâm to berâ nghut lhê; Ngò, nungmoq lé taí kôlé; 'Yhumsìng é myìng mai jé lé lo é Sù gi, hkungsô wó nyi sháng gaq.'\* nghû, nungmoq a taí taí gi, Ngo lé wó myàng kó râ a nghut lo." ga luî, yhangmoq lé taí ri.

## 14

### *Hparishe Rayuq É Yhûm Má Yesuq Jé Nyi É Hkyô*

<sup>1</sup> Bánno buinyi ra-nyí má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú má é bang gi, Yhang lé gyui gyui chôm wú nyi bum akô.

<sup>2</sup> Haú u lé, wuì wam ana dut sù rayuq gi, Yesuq é hí má jé nyi tô ri.

<sup>3</sup> Haú mù, Yesuq gi, "Bánno buinyi má nòhpyo lé lhoq gê byi é gi, tarâ wang lhê lhú, a wang é lhú?" ga luî, tarâ sará pé eq Hparishe pé lé myi kat ri.

<sup>4</sup> Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zuì to mù, lhoq gê byi luî, nhang kat ri.

<sup>5</sup> Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsìng é yhangzo rayuq yuq, haú a nghut jáng, no myang radu du, Bánno buinyi má, wuìhtung má byit gyó le, haú hkûn jáng, a xe hotoq yu é za, wó nyi kó râ nghut lhê lhú?" ga myi kat ri.

<sup>6</sup> Yhangmoq kúm gi, dang haú hkun lé, haí le a wó tù taí kó nghut ri.

<sup>7</sup> Haú hkûn, Yesuq gi, ji tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dông taí é gi,

<sup>8</sup> "Byù rayuq yuq nang lé, myiháng poî má ji é nghut jáng, je réng é jowò má hkâ-ê zùng. Hkâsu mù gà le, náng hotoq je aróng wó sù lé le, ji to shirâ abe.

<sup>9</sup> Ji tô é nghut jáng gi, nungnhik lé ji tô é yhumsìng hpó lé lô mù, 'Shí yuq lé jowò hui byi aq.' ga luî, náng lé lé taí jáng, nàng hoq hpu luî, hkyi htâng shut huì zùng ra râ nghut lhê.

<sup>10</sup> Haú mù luî, supé nang lé ji le, hkyi htâng má ê zùng aq; haú hkûn, nang lé jì sù lé mù luî, 'Buinùm hpó ê, shì je réng é jowò má huì doq zùng aq.' ga luî, nang lé taí jáng, nàng eq rahá

† 13:32 Hkû-nyí, napmá gà é gi, Yesuq mingkan hotoq má mù zuì râ ahkyíng lé taí é nghut lhê. ‡ 13:32 Sum nyí nghû râ buinyi gà é gi, Yesuq mingkan hotoq má mù ban zuì é buinyi lé taí é nghut lhê. \* 13:35 Hkya-on 118:26

zung tô é bíng lhunglhâng bâng é hí má, nàng gi, myoqdong wó rã nghut lhê.

<sup>11</sup> Hkâsu mù gâ le, yhumsing gùng lé waq toq é sũ ó yuq nghut kôle, lhoq nyhum pyâm é hui rã nghut lhê; yhumsing gùng lé, lhoq nyhum é sũ kúm gi, waq toq é hui rã nghut lhê." ga taí ri.

<sup>12</sup> Hau htâng, Yesuq yhang lé ji é yhumsing hpó lé taí é gi, "Napzang, a nghut jáng, myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjî tso. Háu bang lé jì tsô é nghut jáng gi, yhangmoq nang lé dum jì tsô é eq, jeju dum tau kó rã nghut lhê.

<sup>13</sup> Nghut kôlhâng, nàng poí kut mù, byi tso byi huq nau é nghut le gi, myùng bang, hkyî gyui loq hten bang eq myoqjît é bang lé, jì tso aq.

<sup>14</sup> Háu su kut jáng, nàng hkungsô wó nyî rã nghut lhê. Yhangmoq nang lé jeju a wó tau kôlhâng, dingmán bang dum dui toq lo é buinyî má, hau é akyû lé, nàng wó hkam yù rã nghut lhê." gâ ri.

### *Zoshuq Poí Mó Lé Dangtú Yu É Hkyô*

*Mht 22:1-10*

<sup>15</sup> Yesuq eq rahá zô zung tô é byù rayuq gi, dang háu wó gyo jáng, "Garai Gasâng é mingdán mâ é zoshuq poí má wó zo rã sũ gi, hkungsô wó nyî sũ nghut rã." ga lui, Yesuq lé taí ri.

<sup>16</sup> Yesuq háu yuq lé tũ taí é gi, "Byù rayuq gi, myinzang byi tso rã ga, zoshuq poí mó ralhum hen to mù, byù myo myo lé jì tô ri.

<sup>17</sup> Zang byi tso rã yàm jé jáng, yhang é dui-nhâng zoshâng lé, jì tô é bâng chyáng 'Lé keq hkoi, zoshuq jin to bê.' ga é châng wut nhang ri.

<sup>18</sup> Nghut kôlhâng, háu bang ban-shoq gi, zoshuq poí má a é rã dông chyat he pyâm akô. Rayuq sũ gi, 'Ngò yohtung rahkyang wui tô lhê; háu lé é wú rã dut ri. Háu mù, ngo lé ahkáng byi shi laq.' ga yhang lé taí ri.

<sup>19</sup> Dum rayuq le, 'Ngò, nohtó ngo zúm wui tô lhê; háu pé lé dui nhang chyam wú rã dut ri; ngo lé ahkáng byi shi laq.' ga taí wô ho ri.

<sup>20</sup> Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

<sup>21</sup> Háu jáng, dui-nhâng zoshâng taú lò mù, yhang é yhumsing lé háu hkyô banshoq lò taí kyô ri. Háu hkûn, yhumsing hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân é mù lui, myùng bang, hkyî gyui loq hten bang eq myoqjît bang lé, é jì lò aq.' ga lui, yhang é dui-nhâng zoshâng lé nhang kat ri.

<sup>22</sup> Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhâng, zùng rã jowò gi, mân tô ashî.' ga taí ri.

<sup>23</sup> Háu su ga jáng, yhumsing hpó gi, 'Ngá yhûm byíng rã matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shuí lò aq.

<sup>24</sup> Nang lé ngò taí lé, hí lé jì to huí é bang rayuq lhang, ngá é zoshuq poí lé wó chyim wú rã a nghut.' ga lui, yhang é dui-nhâng zoshâng lé taí ri." gâ ri.

### *Yesuq É Chángzo Wó Dut Rã Matú*

*Mht 10:37-38; 5:13; Mrk 9:50*

<sup>25</sup> Byù hpûng mó Yesuq eq rahá e ló kô é hkûn, Yesuq gi, háu bang lé lhing wú lui,

<sup>26</sup> "Ngá chyáng lé sũ ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhang nhammó pé lé le, háu htoq agó, yhumsing é asak lé le, ngo lé chyitdap é htoq má je chyitdap sũ gi, ngá é chángzo a wó dut.

<sup>27</sup> Yhumsing é tapzîng lé a waq é za, Ngá htâng châng é sũ ó yuq nghut kôle, Ngá é chángzo a wó dut.

<sup>28</sup> Dangké, nungmoq chyáng má é byù rayuq yuq, tsehtung yhûm ralhum saí nau le, yhang gi, yhûm háu ban saí rã matú, ngùn hkâ-myhó bàn rã eq yhang wó tô é ngùn luq a luq é

lé, zùng mù luí, hí a sôn wú é byù nyi kó rã lúhú?

<sup>29</sup> Laqmá mù, apûn awang gi, saí hi to mù luí, a wó lhoq pân é nghut jáng,

<sup>30</sup> myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rã nghut lhê.

<sup>31</sup> Dangké, hkohkâm rayuq gi, gyè zan rã hen le, gyezo í mun eq lé sù hkohkâm lé, gyezo ramûn eq za lhom wó zân ûng rã, a wó zân ûng rã lé, zùng mù luí, hí a myit wú é nyi rã lúhú?

<sup>32</sup> A ûng rã dut le gi, gyè pé we we má nyi tô ashí hkûn lé, lagyo suwún pé lé nhang kat luí, simsaq rã matú htingrám pyám ra rã nghut lhê.

<sup>33</sup> Haú eq rajung za, nungmoq chyáng mâ é ó yuq nghut kôlháng, yhumsîng wó é zè banshoq lé, a pyám to sù gi, ngá é chángzo wó dut rã a nghut.

<sup>34</sup> Xo gi, gè lhê. Nghut kôlháng, xomân kân byuq jáng gi, haú lé hai èq dum wó lhoq ngam yù rã lúhú?

<sup>35</sup> Haú gi, myigung matú le, myìhpún kut rã matú le, akyû a bò lo. Haú mù luí, shinggan shut kúm gi, dú pyám sê akô.

Gyo rã nohkyap dap sù gi, gyô yù sháng gaq." ga taí ri.

## 15

### *Byuq Byuq É Sau* *Mht 18:12-14*

<sup>1</sup> Ra-nyí lé, Yesuq é dang gyo kó rã ga, kang guq bang eq yubak dap bang gi, Yhâng chyáng lé zîng bum akô.

<sup>2</sup> Haú hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

<sup>3</sup> Haú mù, Yesuq yhangmoq lé dangtú dông taí é gi,

<sup>4</sup> "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyám to mù, byuq byuq é sau haú lé, myàng shoq a châng ho yu é, ó yuq wá nyi kó rã lúhú?

<sup>5</sup> Byuq byuq é sau haú lé myang hô jáng, gyaí gau é i-myit èq goqsân htoq má bún kê chûng mù,

<sup>6</sup> yhûm má jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí rã nghut lhê.

<sup>7</sup> Haú eq rajung za, Ngò, nungmoq lé taí kôlé, myit lhîng a rã é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut rã nghut lhê.

### *Byuq Byuq É Ngùn Chap*

<sup>8</sup> Dum nghut jáng, dangtú ralhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú rã a nghut lúhú?

<sup>9</sup> Haú lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí rã nghut lhê.

<sup>10</sup> Haú eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garai Gasâng é maumang lagyô pé hí má, gabú jowò dut rã nghut lhê." gâ ri.

### *Byuq Byuq É Yuqzo*

<sup>11</sup> Yesuq xoq taí é gi, "Byù rayuq gi, yuqzo í yuq wó ri.

<sup>12</sup> Haú nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

<sup>13</sup> Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chûng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê.

<sup>14</sup> Haú su kut ngunzè wó mi-wó lé ban langsâ pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri.

15 Haû mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri.

16 Haú hkûn, yhang gi, waq jùm zô é shigyang cham pé lé lhang, zo naú shoq dut kôlhang, ó yuq le a byi zo kó nghut ri.

17 Haú mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôlhang, ngò gi, shí jowò má, zo mut wuishit é eq shí ló rá dut bê.

18 Ahkuí, ngò toq mù, ngá wâ chyáng taú ló luí, "Áwa ê, ngò gi, Garai Gasang lé le, nang lé le, shut bê.

19 Ahkuí mai ngò gi, nung zo nghû râ a gíng lo, hau é yanmai, nang é langchyáng rayuq dông za ngo lé nyi nhâng laq." nghû luí, ló taí rá.' gâ ri.

20 Hau htâng, yhang toq luí, yhang wâ chyáng ló le, yhang we we má ru nghut ashí hkûn mai, yhang wa gi, yhang lé lhom myàng jáng, wú shogyo luí, din ê mù, yhangzô é lingzing má é po pyik dap to luí, bopuq puq byí ri.

21 Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.' ga luí, yhang wa lé dúng tôngbán ri.

22 Yhângwa kúm gi, yhang é langchyâng pé lé, 'Réng dik é mebu hân hân yu lé mù, yhang lé hut byi keq; yhang é loq má, loqchyop chyop byi keq; hkyí má le hkyí-tsung tsung byi keq.

23 Tsô myum tô é nojûng zo le yu sat keq. Haú mù, nga-nhúng gi, zoshuq poí kut mù chóm ngón sháng.

24 Haí mù gâ le, ngá zo shí yuq gi, shi byuq é mai, ahkuí dum duí bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekô.

25 Haú u lé, yhangzo ko sù yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zìng út bat luí gó nyi é htê lé lò wó gyô ri.

26 Haú mù, langchyáng rayuq lé wut yù luí, haú hkyô lé yhang myí wú le,

27 langchyáng haú gi, 'Nung gu dum taú jé lô bê. Haú mù, nang wa gi, nung gu wáng wáng zán zán dum taú jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

28 Dang haú lé wó gyo jáng, yhang gi, gyô nhik-yo luí, yhúmkaú shut a wàng lo kut ri. Haú mù, yhang wa htoq é luí, yhang lé é chyuq ri.

29 Yhangzo kúm gi, 'Wú aq, ngò, shí-myháng shílo nang é jùn dông kut luí, hkâ-nhám le nang dang lé a lu laí wú. Nghut kôlhang, ngò ngá é luzúm wuí eq ngón kún râ matú, bainám zo radu lhang radàm le nang a byi wú shi.

30 Shiwa myhí pé eq zum yap wún luí, nang é sutzè lé lhoq pân pyâm é sù nung zo haú dum taú jé lô jáng kúm gi, tsô myum tô é nojûng zo lé, yhang é matú nang sat byi bu-nhung!' ga luí, yhang wa lé tû taí ri.

31 Yhângwa gi, 'Ngá zo ê, nang gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, nang é chyat nghut lhê.

32 Nghut kôlhang, shí nung gu gi, shi byuq é mai ahkuí dum duí bê; byuq byuq é mai le, dum myàng bê. Haú mù, gabú hpo nghut bê.' ga luí, yhang lé taí ri." gâ ri.

## 16

### *Hpaqchyí Ge Dâ É Sùt Zum Sù*

1 Yesuq, Yhâng é chángzô pé lé taí é gi, "Sahtê rayuq chyáng sùt zum sù rayuq nyi ri. Haú yuq gi, yhang yhumsing é sutzè pé lé jai hpyuq pyâm ri ga, yhang yhumsing é hí má, yhang lé mara lé hun akô.

2 Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhú? Nàng sùt zûm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nang gi, sùt zum sù wó kut lo râ a nghut lo.' ga taí ri.



<sup>3</sup> Haû jáng, sùt zum sù gi, 'Ahkuî, ngò hkâsu kut lo râ lú? Ngá é yhumsîng gi, ngo lé sùt zum ayá mai lhoq hkyô pyám bê. Myî du myî hkop zo râ le ngò wum a bò; dung zo dung shuq râ le ngò hoq ri.

<sup>4</sup> Ngo lé sùt zûm é ayá mai hkyô pyâm htâng má, supé ngo lé yhangmoq é yhûm má lhom hap yù râ matù, hkâsu kut râ hkyô lé ngò sé bê.' ga wó myit rot jáng,

<sup>5</sup> yhang gi, yhâng yhumsîng hpó lé chyîn dap tô é bang rayuq htâng rayuq lé wut yù mù, sâng-hî yuq lé, 'Ngá yhumsîng hpô chyáng nàng chyîn hkâ-myhó dap tô lhê lú?' ga myi jáng,

<sup>6</sup> haú yuq gi, 'Xû rashô pûng dap lhê.' ga tû taî ri.

Haû jáng, sùt zum sù gi, 'Náng é jihpán yù luî, hân zùng mù, ngo xê pûng kut kê to aq.' ga yhang lé taî ri.

<sup>7</sup> Dum rayuq lé, 'Nàng hkâ-myhó dap tô lhê lú?' ga myi jáng, haú yuq gi, 'Sungsô rashô bûng dap lhê.' ga tû taî ri. Sutzum sù gi, haú yuq lé, 'Náng é jihpán má shit xê bûng kut kê to aq.' ga taî ri.

<sup>8</sup> Haû a dingmán é sùt zum sù lé, yhumsîng hpó gi, hpaqchyî ge da sù nghut ri ga hkya-ôn ri. Ngò shî lé taî é gi, mingkan zo wuî gi, yhangmoq é mingkan eq sêng é hkyô pé má, maubó gung é yhangzo pé\* htoq hpaqchyî je bò kê é yanmai nghut lhê.

<sup>9</sup> Haû mù luî, Ngò nungmoq lé taî kyo kôle, a tara é sutzè pé èq buinùm ho nyî keq, haû mù, sutzè haû htûm byuq jáng, nungmoq lé, ahtum abyuq joq tô é yhûm má, lhom hap yu é hui kó râ nghut lhê.

<sup>10</sup> Tiq é mù má wó lum é sù ó yuq nghut kôlhang, mù mó má le wó lûm râ nghut lhê. Tiq é mù má lhum a zuî é sù ó yuq nghut kôlhang, mù mó má le lhumzui râ a nghut.

<sup>11</sup> Haû mù, mingkan sutzè má lhang nungmoq lé a wó lûm kê é nghut le gi, haû tengmán é sutzè lé, nungmoq chyáng ó yuq wá kê ap byi râ lú?

<sup>12</sup> Supé é sutzè má, nungmoq lé a wó lûm kê é nghut le gi, nungmoq sîng âng é sutzè lé, nungmoq chyáng ó yuq wá kê ap byi râ lú?

<sup>13</sup> Dui-nhâng zoshâng ó yuq nghut kôlhang, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taî ri.

<sup>14</sup> Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byî akô.

<sup>15</sup> Haû mù luî, Yesuq gi, yhangmoq lé, "Nungmoq gi, byu pé hí má yhum-sing gùng lé yhumsîng dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myit unghkaû lé sé sù nghut lhê. Byù é hí má hpaudap é pé gi, Garai Gasâng é hí má achaq achyut é nghut nyi ri.

<sup>16</sup> Jep é tarâ† eq myiqhtoî pé é dang, ahko ahkáng wó tô é ahkyíng gi, wui-myhup sará Yohan jé lé é buinyî jé shoq nghut bê. Haú hkyíng mai gi, Garai Gasâng é mingdán hkyô gabú danglù lé, hko kyô nyî mù, yuq du jup gi, haú hkyô má htûng chyíng wang ló bum akô.

<sup>17</sup> Jep é tarâ mâ é tiq dik é dangjí eq myihkyet zo ralhum lé wó lhoq hten râ htoq, mauhkûng eq myigùng hten râ gi, je luî râ nghut lhê.

<sup>18</sup> Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taî ri.

### Sahtê Hpó Eq Lazaruq

<sup>19</sup> Yesuq dum xoq taî é gi, "Radàm lé, sahtê rayuq gi, nè é eq nú-nhâm é

\* **16:8** Maubó gung é yhangzô pé nghu é gi, Garai Gasâng é yhangzô pé lé taî é nghut lhê. † **16:16** Jep é tarâ gâ é gi, Garai Gasang, Mosheq mai nga-nhúng lé byî tô é tarâ lé gâ lhê.

mebu wut mù luí, nyí nyí bui bui zo ngón shuq ngón nyi ri.

<sup>20</sup> Yhâng é hkúmdong má gi, ragùngdû é jeq byi tô é Lazaruq gá é dung zo sù rayuq lé, lé nyhi tô akô.

<sup>21</sup> Haú yuq gi, sahtê wá é siboî mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byí nyi akô.

<sup>22</sup> Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhûm pyám bekô nghut ri.

<sup>23</sup> Sahtê wá gi, ngaraî ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri.

<sup>24</sup> Haú mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achyí aku nyé é hui zô nyi ri. Haú mù, Lazaruq gi, yhâng é loqnyhui ú èq wui má tik yù mù, ngá é shô má wui ra-poq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

<sup>25</sup> Haú hkûn, Abraham gi, 'Ngá zo é, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê.

<sup>26</sup> Haú mai gotû gi, shí mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyám to bê nghut ri.' ga tû taí ri.

<sup>27</sup> Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashî; yhangmoq le ísu hpuzô é jowò má a jé sháng gaq,

<sup>28</sup> yhangmoq myit lhîng shoq ló taí pun râ matú, Lazaruq lé ngá wá yhûm shut nhang kat byi laq ô!' ga luí, dúng wut ngau nyi ri.

<sup>29</sup> Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga taí ri.

<sup>30</sup> Sahtê wá gi, 'Áwa Abraham ê, haú su a nghut. Shi byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit lhîng kó râ nghut lhê.' ga taí ri.

<sup>31</sup> Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang má é rayuq yuq dum dui toq ló mù, ló taí kyo kôhang, kâm gyo kó râ a nghut.' ga luí, yhang lé tû taí ri." gâ ri.

## 17

*Mara Hkyut É Hkyô Eq Lumjîng Myit*

*Mht 18:6-7, 21-22; Mrk 9:42*

<sup>1</sup> Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôhang, mara kut shut nhang é hkyô lé lhoq htoq é sù gi, dingnyé wó râ.

<sup>2</sup> Zoshâng shí bang má é rayuq lé, mara kut shut nhang é sù gi, yhâng é lingjîng má luqluí long mó tuí hut byi luí, wuimau má é dú hkyô pyám é hui é nghut le gi, yhang é matú je gè râ nghut lhê.

<sup>3</sup> Nungmoq gi, yhumsîng gùng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyám byi aq.

<sup>4</sup> Ra-nyí má za, yhang nang lé nyhit dàm shut mù, 'Ngò myit lhîng bê.' ga luí, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

<sup>5</sup> Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

<sup>6</sup> Haú jáng, Yhumsîng gi, "Nungmoq é lumjîng myit angshi cham í za hkâlháng bò kô é nghut le gi, shí hangwâ gàm lé, 'Sikgâm ê, amyit eq

roq bún luí, wuìshuq lung-aú má, é yuq to aq ô.' gâ le, nungmoq é dang lé sîkgâm haú gyo byi râ nghut lhê.

<sup>7</sup> Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haú yohtung pá mai jé lo é hkûn, yhang lé, 'Hân zúng mù zang zo aq.' ga luí, ó yuq wá taí kó râ lhú?

<sup>8</sup> Haú dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lhú?

<sup>9</sup> Taí mitaí banshoq lé, dui-nhâng zoshâng ban zui saí byi é nghut kôlhang, yhang lé jeju bún é dang ó yuq wá taí wú akô lhú?

<sup>10</sup> Haú eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga taí ri.

### *Manggâm Dap Bang Raxê Yuq Lé, Yesuq Lhoq Gê Byi É Hkyô*

<sup>11</sup> Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri.

<sup>12</sup> Yhang, wà rawà shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé,

<sup>13</sup> "Yesuq, Zau ê, ngamoq lé shogyô yù laq ô." ga luí, wut garú bum akô.

<sup>14</sup> Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shit keq." ga yhangmoq lé taí ri. Yhangmoq gi, hkyô má ru sô nyi ashí le lháng, sân-yúng ló byuq bekô.

<sup>15</sup> Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taú ê mù, htê mó eq Garai Gasang lé hkya-ôn é eq,

<sup>16</sup> Yesuq é hkyi wang má paí gop to luí, Yhang lé jeju hkya-ôn nyi ri. Haú yuq gi, Samariq byù nghut ri.

<sup>17</sup> Haú mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô?"

<sup>18</sup> Shí tûngbaù rayuq mai lai luí, dum taú lé mù Garai Gasang lé hkya-ôn é byù, rayuq le a nyi lo kó lhú?" ga taí ri.

<sup>19</sup> Hau htâng, Yesuq gi, haú yuq lé, "Toq mù ló aq, náng é lumjín myit gi, nang lé lhoq sân-yúng byi bê nghut ri." ga taí ri.

### *Garai Gasâng É Mingdán Jé Lô Râ Hkyô*

*Mht 24:23-28, 37-41*

<sup>20</sup> Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myi akô. Haú jáng, Yesuq gi, "Garai Gasâng é mingdán jé lé râ gi, myoq eq wú luí myàng râ a nghut.

<sup>21</sup> Garai Gasâng é mingdán gi, nungmoq yuq jup é ahkaú má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tû taí ri.

<sup>22</sup> Chángzô pé lé le Yesuq taí é gi, "Haú Byu Yhangzô é buinyi ra-nyi lé, nungmoq myàng nau dik é ahkyíng jé râ. Nghut kôlhang, nungmoq gi, Byu Yhangzo lé wó myàng kó râ a nghut.

<sup>23</sup> Haú buinyi má, byu pé gi, nungmoq lé, 'Yhang shí má nyi ri.' haú a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkâcháng kó.

<sup>24</sup> Hkâsu mù gâ le, maumyí rahkyam má hpyat é maulhap gi, maumyí gó hkyam jé shoq duqbó é su, haú Byu Yhangzo dum jé lé é buinyi má le dut râ nghut lhê.

<sup>25</sup> Nghut kôlhang, haú su a dut htoq shimá, Yhang gi, zing-rí é myo myo lé le, ipyat shi mâ é byu pé eq he-ngik pyâm é lé le, hui shirâ nghut lhê.

<sup>26</sup> Noaq é tsín pyat má dut é su, haú Byu Yhangzo jé lé é buinyi má le dut râ nghut lhê.

<sup>27</sup> Byu pé gi, Noaq, wuì-sanghpo mó hkaú má wang é hkûn jé shoq, zo zo shuq shuq, myi byi myi yú, myiháng

kut luí, nyi nyi bum akô. Haú hkûn, dowuí dǐng lô mù, yhangmoq ban-shoq lé lo lhoq htên pyám bê nghut ri.

<sup>28</sup> Haú eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhûm kut luí nyi nyi akô.

<sup>29</sup> Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luí, lhunglhang lé lhoq htên pyám bê nghut ri.

<sup>30</sup> Haú Byu Yhangzo, lé htoq shit é buinyi má le, haú eq rajung za dut rá nghut lhê.

<sup>31</sup> Haú buinyi má, yhumhkûng\* htoq má nyi tô é sù gi, yhúmkaú má é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhûm shut a taú ló lo sháng gaq.

<sup>32</sup> Lot é yhangmyi† lé bûn nyi keq.

<sup>33</sup> Yhumsing é asak duì hkyô hô sù ó yuq nghut kôle, asak sum rá nghut lhê; asak sum pyám é sù kúm gi, asak wó duí rá nghut lhê.

<sup>34</sup> Ngò, nungmoq lé taí kyo kôlé, haú myín lé, yhupjang ralhum má byù í yuq nyi to kô le, rayuq gi, shuí yu é hui mù, rayuq gi, myit gyó to rá nghut lhê.

<sup>35</sup> Myiwe í yuq luí má rahá za chôm luí nyi tô le; rayuq gi, shuí yu é hui mù, rayuq gi, myit gyó pyám to rá nghut lhê.

<sup>36</sup> Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyám to berâ nghut lhê." gâ ri.

<sup>37</sup> Haú hkûn, chángzô pé gi, "Yhumsing Yesuq ê, haú gi, hká gyo má dut rá lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bûm rá nghut lhê." ga luí, yhangmoq lé tû taí ri.

## 18

### *Chuimó Myhí Eq Tarâ Agyi É Hkyô Lé Dangtú Yù É Hkyô*

\* **17:31** Yudaq byu pé é yhumhkûng gi, rá é nghut lhê mù, nyi kún jang kut akô. † **17:32** Lot é yhangmyi gi, Sodom wà shut dum taú lhing wú é yanmai, Garai Gasang lhoq hten pyám é hui sù nghut lhê.

<sup>1</sup> Yesuq, Yhâng é chángzô pé lé, myit wum a gyuí é za, hkâ-nhám le kyûdung nyi rá hkyô lé, dangtú dông mhoqshit é gi,

<sup>2</sup> "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri.

<sup>3</sup> Haú wà má chuimó myhí rayuq le nyi ri. Yhang gi, haú tarâ agyi wá chyáng ê luí, 'Ngò eq amú htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyi ri.

<sup>4</sup> Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byi é tô tô ri. Hau htàng má, yhang gi, 'Ngò, Garai Gasang lé le a gyuq a hoq, byù lé le haí su a ngàm,

<sup>5</sup> nghut kôlhang, chuimó myhí shí yuq é amú lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng rá dut ri. Haú mù, ngò yhâng é amú lé jéyáng byi rá.' ga, yhâng é unghkaú má myit yu ri." gâ ri.

<sup>6</sup> Haú mù luí, Yhumsing Yesuq gi, "A ding a mán é tarâ agyi wá taí é dang mai mhoq yù keq.

<sup>7</sup> Garai Gasang gi, Yhang lé nyi myín wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to rá lhú?

<sup>8</sup> Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haú Byu Yhangzo jé lé é buinyi má, lumjáng hkyô lé gi, mingkan htoq má myang wú shirâ lhú?" ga taí ri.

### *Hparishe Eq Kang Guq Sù Kyûdung É Hkyô*

<sup>9</sup> Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi,

<sup>10</sup> "Byù í yuq kyûdung kó rá ga, no-qkuq yhûm má doq e akô. Rayuq gi, Hparishe, rayuq gi, kang guq sù nghut ri.

11 Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù su le, a nghut é yanmai, ngò nàng lé jeju bûn lhê ô!

12 Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotû kut dúng nyi ri.

13 Kang guq sù kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dúng ri.

14 Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byí é lé wó yú luí, yhúm shut dum taú ló bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhum-sing gùng lé lhoq nyhum é sù kúm gi, waq toq é hui râ nghut lhê." ga taí ri.

### *Zoshâng Wuí Lé Yesuq Shimân Byí É Hkyô*

*Mht 19:13-15; Mrk 10:13-16*

15 Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkúm akô nghut ri.

16 Nghut kôlhang, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhang-moq lé hkâhkúm zing to kó; hkâsu mù gâ le, Garai Gasang é mingdán gi, haú sù é bâng é mingdán ru nghut lhê.

17 Ngò, nungmoq lé teng za taí kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng râ a nghut." ga taí ri.

### *Ayá Wó É Sahtê Hpó*

*Mht 19:16-30; Mrk 10:17-31*

18 Ayá wó é byù rayuq le, Yesuq lé, "Ge é Sará ê, ahtum abyuq é asak wó

yú râ matú, ngò haí kut ra râ lhú?" ga myí ri.

19 Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyí.

20 Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq. ✧ gâ é dang pé lé, nàng sé gû bê." ga luí, yhang lé tú taí ri.

21 Haú yuq gi, "Haú pé banshoq lé, ngò, zoshâng hkûn mai cháng bê nghut lhê." ga taí ri.

22 Yesuq gi, dang haú lé wó gyo jáng, "Nàng kut râ rajung râ tô ashí; nàng wó miwó lé ûng pyám luí, myùng bang lé byí pyám aq; haú jáng, nàng, mauhkúng htoq má sutzè wó râ nghut lhê; haú mù, Ngá htâng lé cháng aq." ga luí, yhang lé taí ri.

23 Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

24 Yesuq gi, haú yuq lé wú luí, "Sutzè wó bang gi, Garai Gasang é mingdán má wàng râ matú, haú í yhang wuí ri-nhung!

25 Sutzè wó sù rayuq, Garai Gasang é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

26 Dang haú lé wó gyô é bang gi, "Haú su ru nghut le gi, ó yuq za hkyí yu é hui râ nghut lhê lhú?" ga myí bum akô nghut ri.

27 Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

28 Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htâng cháng bê nghut lhê." ga taí jáng,

29 Yesuq gi, "Ngò, nungmoq lé teng za taí kôlé, Garai Gasang é mingdán é yanmai, yhumsing é yhúm, yhum-sing é yhangmyí, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôle,

<sup>30</sup> shí pyat má, akyû myo myo wó hkam yû râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé taí ri.

*Yesuq, Yhang Shî Hkám Râ Lé Dum Taí É Hkyô*

*Mht 20:29-34; Mrk 10:46-52*

<sup>31</sup> Yesuq gi, Yhâng é lagyô pé raxe í yuq lé gotû kut wut yù mù, "Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lhê.

<sup>32</sup> Hkâsu mù gâ le, Byu Yhangzo gi, tûngbaù pé é loq má ap pyâm é hui luí, haú bâng èq Yhang lé, wuizui kut pyâm é, rhoi rip e, sôkan byé gyûn é, nhuq bat é kut yû mù, sat pyám kó râ nghut lhê.

<sup>33</sup> Hau htâng sum nyi nghû râ buinyi má, Yhang gi, dum dui toq lô râ nghut lhê." ga luí, yhangmoq lé taí ri.

<sup>34</sup> Lagyo pé gi, dang haú pé rahkun lé lhang a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

*Dung Zo É Myoqjit Sû Lé, Yesuq, Myoq Dum Myàng Nhang É Hkyô*

<sup>35</sup> Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yâm má zùng mù, dung zô nyi ri.

<sup>36</sup> Yhang gi, byù rajùm rayò sô laí ló é htê lé wó gyo jáng, haú haí dut nyi é hkyô lé, myi kat ri.

<sup>37</sup> Haú hkûn, yhangmoq gi, "Nazaret wà byù Yesuq laí ló ri." ga luí, yhang lé taí kyo akô.

<sup>38</sup> Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

<sup>39</sup> Hí má laí ló é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

<sup>40</sup> Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi,

<sup>41</sup> "Ngò, nàng lé haí kut byi râ ô nau ri lhú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tû taí ri.

<sup>42</sup> Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taí ri.

<sup>43</sup> Haú yuq gi, haú hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haú lé myàng kôjáng, Garai Gasang lé hkya-ôn nyi bum akô.

## 19

*Yesuq Eq Zake*

<sup>1</sup> Yesuq gi, Yerihko wà má wàng mù, sô laí ló nyi ri.

<sup>2</sup> Haú hkûn, haú wâ má, Zake gâ é kang guq agyi rayuq nyi ri; haú yuq gi, sutzè wó sù nghut ri.

<sup>3</sup> Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myâng nghut ri.

<sup>4</sup> Haú mù, yhang gi, Yesuq lé wó myâng shoq ga, Yesuq laí ló râ hkyô hí shut din ê mù, hkohúm gâm htoq má é doq zung tô ri.

<sup>5</sup> Yesuq gi, haú jowò má jé jáng, tu wú kat luí, "Zake é, hân gyó lô aq; hkûnyí ngò náng yhûm má bíng râ nghut lhê." ga taí ri.

<sup>6</sup> Haú jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

<sup>7</sup> Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luí, mara hûn dang taí nyi bum akô.

<sup>8</sup> Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byi pyám râ; ngò záng mop zô pyâm é byù rayuq

yuq nyi le gi, myi tú dum tau byi râ." ga Yhumsing Yesuq lé tai ri.

<sup>9</sup> Haú hkûn, Yesuq gi, "Shí yuq le, Abraham é yhangzo\* rayuq nghut é yanmai, hkû-nyí shí yhûm má hkyi yù hkyô jé bê,

<sup>10</sup> hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luí, Zake lé tai ri.

### *Hkohkam É Dui-nhâng Zoshâng Raxê Yuq*

#### *Mht 25:14-30*

<sup>11</sup> Haú hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum dông dum tai jat é gi,

<sup>12</sup> "Aróng wó sù byù rayuq gi, hkokhâm ayá ê hkam yù luí, dum taú lò râ ga, wê é ming shut ê râ matú hen nyi ri.

<sup>13</sup> Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi eq hpugá gá nyí láng keq.' ga luí, yhangmoq lé pying tô ri.

<sup>14</sup> Yhâng é mingbyù wui kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô nau.' ga luí, ê tai râ matú lagyo châng nhang kat akô.

<sup>15</sup> Nghut kôlhang, yhang kúm gi, hkokhâm ayá wó hkam yù luí, dum taú jé lô jáng, yhang ngùn ap byi tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

<sup>16</sup> Haú hkûn, sâng-hí yuq gi, lé mù luí, 'Yhumsing ê, ngò, náng é ngùn rajoí mai, amyat raxê joí wó ho jat yù bê.' ga tai ri.

<sup>17</sup> Haú hkûn, yhumsing hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhâng wó lum é sù nghut é yanmai, wà raxê lé upzo lo aq hkoi.' ga luí, yhang lé tai ri.

<sup>18</sup> Htang yuq le, lé mù luí, 'Yhumsing ê, ngò, náng é ngùn rajoí mai, amyat ngo joí wó ho jat yù bê.' gâ ri.

<sup>19</sup> Yhumsing gi, haú yuq lé, 'Nàng gi, wà ngo wâ lé up lo aq hkoi.' ga tai ri.

<sup>20</sup> Dum rayuq le, lé mù luí, 'Yhumsing ê, náng é ngùn rajoí lé a byuq shoq, ngò panchoq eq htup tô lhê; wú aq, shí nghut lhê.

<sup>21</sup> Nàng gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga tai ri.

<sup>22</sup> Haú hkûn, yhumsing gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lhê. Ngò gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhing,

<sup>23</sup> ngá ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?' ga yhang lé tai ri.

<sup>24</sup> Hau htâng, yhumsing hpó gi, ayám má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga tai ri.

<sup>25</sup> Haú bang gi, 'Yhumsing ê, yhang gi, raxê joí wó to bê lé nhing.' ga akô.

<sup>26</sup> Haú jáng, yhang gi, 'Ngò, nungmoq lé tai kôlé, wó sú† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lháng, yu pyám byi shirâ nghut lhê.

<sup>27</sup> Ahkuí, yhangmoq ahtoq má ngò hkokhâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

\* **19:9** Abraham é yhangzo nghû é lichyúm gi, Abraham su Garai Gasang lé lumjing é sù lé gâ lhê.

† **19:26** Wó sú nghu é gi, yhumsing a-tsam lé rago dat chùng sù lé tai é nghut lhê.

*Yesuq Logúng Ji Mù, Yerusalem Wà Mó Shut Wang E Ló É Hkyô*

*Mht 21:1-11; Mrk 11:1-11; Yhn 12:12-19*

<sup>28</sup> Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri.

<sup>29</sup> Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé,

<sup>30</sup> "Nungnhik, hí mâ é wà má é keq; wà haú má wang é hkûn jáng, ó le a jî wú shí é logúng zo tuí tô láng é lé, é myâng kó râ nghut lhê; haú lé hpyi yù mù, Ngá chyáng she lò keq.

<sup>31</sup> Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsîng râ ri gâ.' nghû tú taí keq." ga pyîng luí, nhang kat ri.

<sup>32</sup> Nhang kat é sù nhik ê jé lé, Yesuq taí kat é dõng yhang, dut to láng é lé é myang akô.

<sup>33</sup> Yhangnhik logúng zo haú lé hpyi nyi kô é hkûn, yhumsîng wuì gi, "Haú logúng zo lé, haí mù hpyi nyi akô lú?" ga luí, yhangnhik lé myí akô.

<sup>34</sup> Haú jáng, yhangnhik gi, "Shí du lé haú Yhumsîng râ ri gâ." ga taí akô.

<sup>35</sup> Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akô.

<sup>36</sup> Haú su kut, Yhang ji e ló nyi le, byu pé gi, yhangmoq é buhîng pé lé hkyô má hkang byí akô.

<sup>37</sup> Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pé é yanmai, gabú myit mai htê mó o mó èq Garai Gasang lé hkya-on kô é dang gi,

<sup>38</sup> "Haú Yhumsîng é myîng mai jé lé lo é hkohkâm gi, hkungsô wó nyí sháng gaq ô! ✧ Mauhkûng htoq má, nguîngón nyí sháng gaq ô! Htoq tsáng myhâng má, Garai Gasang gi, hpungwup shing kang bo nyí sháng gaq ô!"

gâ akô.

<sup>39</sup> Haú mù luí, haú byù hpûng hkaú má bo é Hparishe pé ra-am gi, "Sarâ è, náng é chángzô pé lé tân pyám aq." ga luí, Yesuq lé taí akô.

<sup>40</sup> Haú hkûn, Yesuq gi, "Ngò, nungmoq lé taí kôlé, shí bang zim za nyí kó é nghut le gi, luqgok pé garû lô râ nghut lhê." ga tú taí ri.

<sup>41</sup> Ahkuí, Yesuq, Yerusalem wà mó eq chyáng lò luí, wà mó haú lé myâng jáng, haú wà mó é matú ngaù mù, taí é gi,

<sup>42</sup> "Wà nàng è! Hkû-nyí lhê é buinyi má, nguîngón é hkyô lé nàng bûn sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri.

<sup>43</sup> Hkâsu mù gâ le, náng chyáng Garai Gasang lé kûm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyi jé lô râ nghut lhê.

<sup>44</sup> Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô râ; náng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

*Yesuq, Noqkuq Yhûm Lé Sêng Pyâm É Hkyô*

*Mht 21:12-17; Mrk 11:15-19; Yhn 2:13-22*

<sup>45</sup> Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê." ✧ ga kâ to kôhang,

<sup>46</sup> nungmoq gi, jowò shí lé 'damyaq hkyûng' ✧ kut akô." ga taí uchyang, hkat htoq pyâm ri.

<sup>47</sup> Yhang gi, nyí wuî noqkuq yhûm má mhoqshit nyi ri. Hkyangjong agyí pé, tarâ sarâ pé eq, byu pé é suwún wuî kúm gi, Yhang lé wó sat pyám râ hkyô ho nyi akô.

<sup>48</sup> Nghut kôhang, byù banshoq bang gi, Yhâng mhoqshit é dang lé



gyo nau nyi kô é yanmai, wó sat rá hkyô lé, a myang hô kó nghut ri.

## 20

*Yesuq É Ahko Ahkáng Lé Myi Chyam Wú É Hkyô*

*Mht 21:23-27; Mrk 11:27-33*

<sup>1</sup> Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù,

<sup>2</sup> "Hai ahko ahkâng èq Nang shí pé lé kut nyi lhê lhú? Ahko ahkáng shí, Nang lé ó yuq byí é lhú? Ngamoq lé tai kyô wú aq." ga Yhang lé myi akô.

<sup>3</sup> Haú hkûn, Yhang gi, "Ngò le, nungmoq lé rajung myi wú kôlé;

<sup>4</sup> Yohan byí é baptisma gi, mauhkûng mai lhú? A nghut jáng, byu chyáng mai lhú? Ngo lé tai kyô wú keq?" ga yhangmoq lé myi ri.

<sup>5</sup> Haú hkûn, yhangmoq chôm hpyê lhum kô é gi, "Mauhkûng mai nghut lhê.", ngû nga-nhúng tai jáng le, 'Hai mù, yhang lé a lumjîng kô é lhú?' ga rá nghut;

<sup>6</sup> 'Byu chyáng mai nghut lhê.' ngû jáng le, shiwa byù banshoq gi, Yohan lé, myiqhtoi rayuq ga lumjîng to kô é yanmai, yhangmoq, nga-nhúng lé luqgok èq dú sat kó rá nghut." ga akô.

<sup>7</sup> Haú mù, yhangmoq gi, "Hkâmai nghut é lé, ngamoq a sé." ga tû tai akô.

<sup>8</sup> Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a tai kyo." ga, yhangmoq lé tai ri.

*Tsibiyiq Hkyâm Yhumsîng Eq Hkyâm Saí Zo Bang*

*Mht 21:3-46; Mrk 12:1-12*

<sup>9</sup> Byu pé lé, Yesuq dangtú dông xoq tai kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bâng chyáng ngho byí to lui, gó ming shut myáng myáng é nyi byuq ri.

<sup>10</sup> Kyôshu yoq jé jáng, yhang gi, hkyâm saí zo bâng èq, hkyâm mâ é

tsibiyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhâng, hkyâm saí zo bang gi, haú yuq lé lhom bat mù, loq kôm taú nhang kat akô.

<sup>11</sup> Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haú yuq lé le, lhom bat mù, hoq lhoq hpu lui, loq kôm dum taú nhang kat akô.

<sup>12</sup> Sum yuq ngû rá dui-nhâng zoshâng lé dum nhang kat ri. Yhangmoq gi, haú yuq lé le bat cheq lui, hkyâm mai hkat htoq kat akô.

<sup>13</sup> Haú hkûn, tsibiyiq hkyâm yhumsîng gi, 'Ngò hkâsu kut wú rá lhú? Ngò chyitdap é ngá zo lé, nhang kat wú rá nghut ri. Yhang lé kúm gi, yhangmoq lhom hkungga kó abe.' ga tai ri.

<sup>14</sup> Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù rá sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq tai lhum bum akô.

<sup>15</sup> Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut rá lhú?

<sup>16</sup> Yhang gi, é mù, haú hkyâm saí zo bang lé sat pyám lui, hkyâm haú lé góbang lé htot ngho byí pyám rá nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

<sup>17</sup> Hau htâng, Yesuq gi, yhangmoq lé byu wú lui, "Haú jáng gi,

'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'<sup>☆</sup>

ga Chyúmdang má kê tô é gi, hai gá nau é nghut lhê lhú?

<sup>18</sup> Luqgok\* haú má gyó záng é sù ó yuq nghut kôle, gyui gyop byuq rá nghut lhê. Luqgok hau èq gyó nhê

☆ 20:17 Hkya-on 118:22 \* 20:18 Luqgok nghu é gi, Yesuq lé tai ri.

záng é sù le, nhê pyeq pyâm é hui râ nghut lhê." ga taî ri.

<sup>19</sup> Tarâ sará pé eq hkyangjong agyi pé gi, dangtú shí gi, yhangmoq lé lhoq ang luî taî é hkyô lé, sé kô é yanmai, haú hkûn jáng lháng Yhang lé chyup yû râ matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

*Kang Kat É Hkyô Eq Séng Luî Myi É Dang*

*Mht 22:15-22; Mrk 12:13-17*

<sup>20</sup> Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri.

<sup>21</sup> Haú jowú bang gi, "Sará ê, nàng gi, dǐng dǐng mán mán taî mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dǒng mhoqshit é sù nghut é lé, ngamoq sê lhê.

<sup>22</sup> Hkoséng Kehtaq lé, ngamoq kang kat râ gi, tarâ wang lhê lhú? A wang é lhú?" ga luî, Yhang lé myi wú akô.

<sup>23</sup> Nghut kôlhang, Yesuq gi, haú bâng é myit goí é hkyô lé sé mù luî, yhangmoq lé,

<sup>24</sup> "Ngo lé, ngùn rachap tân shit wú keq. Ó yuq é alhò eq masat laiká dap tô ri lhú?" ga myi jáng,

<sup>25</sup> yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taî ri.

<sup>26</sup> Yhangmoq gi, byu pé hí má, Yhâng é dang má mara a wó ho myang é eq, Yhang tú taî é dâng é yanmai, maú hong byuq kôluî, zim byuq akô.

*Dum Dui Toq Lô Râ Hkyô Eq Séng Luî Myi É Dang*

*Mht 22:23-33; Mrk 12:18-27*

<sup>27</sup> Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù,

<sup>28</sup> "Sará ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byí ri.

<sup>29</sup> Hí hpyang lé, gumang nhiktâng wuî nyhit yuq nyi akô. Lagám yuq gi, myiwe yù luî, zo dù a dap é za shi lô byuq bê nghut ri.

<sup>30</sup> Lanong yuq le, yhangmang mó é chui lé gon mù, zo dù a dap é za shi lô byuq bê.

<sup>31</sup> Hau htâng, Lalaq yuq mai Lahkâ yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi lô byuq bùm bekô nghut ri.

<sup>32</sup> Lô htáng má, myiwe myhí haú le châng shi lô byuq bê nghut ri.

<sup>33</sup> Haú mù luî, haú dum dui toq é buinyi má, myiwe myhí haú gi, haú nhiktâng wuî mâ é hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luî, Yhang lé myi wú akô.

<sup>34</sup> Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yû kut nyi bum akô.

<sup>35</sup> Shi é mai dum dui toq râ eq, haú pyat má nyi râ gǐng bâng é matú gi, ikun kut é eq myi byi myi yû hkyô joq lo râ a nghut.

<sup>36</sup> Haú bang gi, maumang lagyô pé su dut byuq luî, a dat shí lo kô râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô.

<sup>37</sup> Haú nyé duq nyi é mhanpúng eq séng luî, Mosheq eq kê tô é má lháng, Yhumsǐng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.†☆ ga

† 20:36 Dum dui toq lô su é yhangzô pé gâ é gi, Yesuq lé lumjǐng luî, shi é htâng má dum dui toq lo é bang lé gâ lhê. ☆ 20:37 Htoq Lô 3:6

bo tô é yanmai, shi é bang dum dui toq lô rá hkyô lé tân shit to bê nghut ri.

<sup>38</sup> Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tâi ri.

<sup>39</sup> Haú hkûn, tarâ sará pé ra-am gi, "Sará ê, nàng taí é jô ri." ga akô.

<sup>40</sup> Haú mù, yhangmoq gi, Yhang lé haí le a wám myî jat lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Mrk 12:35-37*

<sup>41</sup> Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lú?"

<sup>42-43</sup> Dawiq yhang yhang lháng gi, Hkya-on Kungtôn Laiká má, 'Haú Yhumsîng Garai gi, ngá é Yhumsîng lé, "Ngò, nàng é gye pé lé,

náng é hkyî nang tanghkuq kut pyám byî é hkyíng jé shoq, Ngá é loqyo hkyam‡ shut zung nyi shi aq." gâ ri.'\*

ga kê tô ri.

<sup>44</sup> Haú mù, Dawiq yhang lháng, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lú?" ga tâi ri.

### *Tarâ Sará Pé Lé Sidiq Râ Hkyô*

*Mht 23:1-36; Mrk 12:38-40; Luk 11:37-54*

<sup>45</sup> Byù banshoq gyô nyi é u lé, Yesuq, Yhâng é chángzô pé lé taí é gi,

<sup>46</sup> "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luî, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poî pé mâ é je réng é zùng jowò pé má myang zùng râ lé le, ô nau nyi bum akô.

<sup>47</sup> Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dîng shit mhaú é bang

nghut akô. Haú sù é bang gi, je riyhang htan é dông dam byî é hui zo kó râ nghut lhê." gâ ri.

## 21

### *Chuimó Myhí Kat É Alu*

*Mrk 12:41-44*

<sup>1</sup> Yesuq tu wú kat é hkûn lé, noqkuq yhûm má é alu sidek má, wó bang alu kat nyi bùm kô é lé myang ri.

<sup>2</sup> Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri.

<sup>3</sup> Haú mù, Yhang gi, "Ngò, nungmoq lé teng za taí kôlé, shî myung é chuimó myhí gi, góbang banshoq htoq má je myo kat bê nghut ri.

<sup>4</sup> Hkâsu mù gâ le, haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglháng lé kat bê nghut ri." ga tâi ri.

### *Ló Htûm Buinyi Má Dut Lò Râ Hkyô*

*Mht 24:1-21, 29-35; Mrk 13:1-19, 24-31*

<sup>5</sup> Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi,

<sup>6</sup> "Nungmoq myang nyi é shí pé gi, luqgok rachâm htoq racham lháng a kê lhum loshoq, hpyoq hpyi pyám é buinyi jé râ nghut lhê." ga tâi ri.

<sup>7</sup> Haú su ga jáng, yhangmoq gi, "Sará ê, haú nghut le gi, haú hkyô pé gi, hkâ-nhám dut lô râ lú? Haú dut râ chyâng lò jáng, hkasû é kumlhá htoq lô râ nghut lhê lú?" ga, Yhang lé myî akô.

<sup>8</sup> Haú hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lâng é byù myo myo pô htoq lô kó râ nghut lhê. Nghut kôlhâng, nungmoq gi, yhangmoq htâng hkácháng kó.

‡ 20:42-43 Loqyo hkyam ngu é gi, ahko ahkáng wó é jowò nghut lhê. \* 20:42-43 Hkya-on 110:1

<sup>9</sup> Majan htoq é eq, gumlau toq é hkyô lé, wó gyo kôjáng, hkâgyuq hkâkyâm kó, haú hkyô pé hí dut lò râ nghut lhê. Nghut kôlhang, ló htâng é buinyi gi, haú hkûn jáng dut râ a nghut shi." ga taí ri.

<sup>10</sup> Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhum eq ralhum majan zân lhûm lò kó râ nghut lhê.

<sup>11</sup> Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkûng htoq mai htoq shit lô râ nghut lhê.

<sup>12</sup> Nghut kôlhang, haú hkyô banshoq a dut shimá, Ngá mying é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng ê ap byi é le, hui kó râ nghut lhê.

<sup>13</sup> Haú su é pé mai, nungmoq gi, ngò eq séng luí, saksé wó hkám râ hkyô htoq lô berá nghut lhê.

<sup>14</sup> Nghut kôlhang, hkâsu nghû lhom tú taí râ hkyô lé, hí mai a myit wui nyi râ lé, nungmoq myit hpyit to keq.

<sup>15</sup> Hkâsu mù gâ le, nungmoq é gye pé lhunghâng bang, haí le a wó lhom tú taí loshoq, ngò, nungmoq lé dang eq hpaqchyí byi râ nghut lhê.

<sup>16</sup> Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui eq lhang, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lhang, sat pyám kó râ nghut lhê.

<sup>17</sup> Byù lhunghâng bang gi, Ngá é yanmai, nungmoq lé a nguì kut kó râ nghut lhê.

<sup>18</sup> Nghut kôlhang, nungmoq é xâm rahkat lhang wó htên byuq râ a nghut.\*

<sup>19</sup> Nungmoq gi, wó jân é hkyô mai, asak lé wó yû kó râ nghut lhê.

<sup>20</sup> Yerusalem wà mó lé gye hpúng mó eq lóm tô é lé, nungmoq myàng

jáng, wà mó haú htên byuq râ ahkyíng chyâng lò bê lé, bûn sê nyi keq.

<sup>21</sup> Haú hkûn lé, Yuda mau má nyi é bang gi, bùm pé shut hpang doq ló kó sháng gaq; haú wà hkaú má nyi é bang le, hpang htoq kó sháng gaq; wà tiq wà zo pé má nyi é bangle, wà hkaú shut a wàng kó sháng gaq.

<sup>22</sup> Hkâsu mù gâ le, Chyúmdang má kâ to má kâ to banshoq dik lò râ matú, buinyi haú pé gi, mara dam byi é buinyi pé dut râ nghut lhê.

<sup>23</sup> Haú buinyi pé má, zogûng dut é myiwe wui eq náu huq ashî nghut é înu wui gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyuahtoq má Garai Gasang nhikmó-yô é jé lô râ nghut lhê.

<sup>24</sup> Yhangmoq gi, shâm lhâm èq sat pyám hui lhê eq, ming hkang ming mó má chyup shuí ló é le hui kó râ nghut lhê. Tungbaù pé lé byi tô é buinyi ahkyíng htáng shoq, Yerusalem wà mó gi, tungbaù pé èq nâng zik tô é hui râ nghut lhê.

<sup>25</sup> Haú hkûn, bui, kyî, lhamó pé má, kumlhá htoq shit râ nghut lhê. Wuishuq lung-aù mâ é wuîhêng pé é mying é htê mó é yanmai, myigùng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê.

<sup>26</sup> Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bùm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huí bùm kô râ nghut lhê.

<sup>27</sup> Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shíngkang mó eq le, gyó lé lo é lé, yhangmoq byu-myàng kó râ nghut lhê.

<sup>28</sup> Haú hkyô pé dut hi lò jáng, ulhum tú mù wú kat keq, hkâsu mù gâ le, nungmoq lé hkyi yù râ buinyi gi, chyâng lò bê nghut ri." gâ ri.

<sup>29</sup> Yhang, yhangmoq lé dangtú dông xoq taí é gi, "Maihpáng gâm eq siggâm

\* 21:18 Shí má gi, asak woi-nyi a shí râ hkyô lé taí é nghut lhê.

banshoq lé wú wú keq.

<sup>30</sup> Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô.

<sup>31</sup> Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

<sup>32</sup> Ngò, nungmoq lé teng za tái kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê.

<sup>33</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

<sup>34</sup> "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pé èq, nungmoq é i-myit wò laí nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq.

<sup>35</sup> Hkâsu mù gâ le, buinyi haú gi, mingkan htoq má nyi é byù banshoq bâng é ahtoq má, haú su jé lô râ nghut lhê.

<sup>36</sup> Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gíng é bang dut sháng gaq, hkâ-nhám le kyúdung luí, ahkyíng hkangmó má machya nyi keq." gâ ri.

<sup>37</sup> Yesuq gi, nyí wui noqkuq yhûm má mhoqshit nyi luí, myìn wui Tsan-lun Bùm gâ é bùm shut htoq ê mù, ê nyi to to kut ri.

<sup>38</sup> Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

## 22

*Yesuq Lé, Yudaq Èq Ung Zô É Hkyô*  
Mht 26:1-5,14,16; Mrk 14:1-2, 10-11; Yhn 11:45-53

<sup>1</sup> Ahkuí, Lhoqlhai Poí gâ é Azuma (múnchi a kat é Muk Zo Poí) jé râ chyâng lò bê.

<sup>2</sup> Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu

mù gâ le, yhangmoq gi, mingbyû wui lé gyuq bùm kô é yanmai nghut ri.

<sup>3</sup> Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí,

<sup>4</sup> yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri.

<sup>5</sup> Haú mù, yhangmoq gi, gyô ngui luí, Yudaq lé ngùn byi râ hkyô myit hui bekô.

<sup>6</sup> Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

*Lhoqlhai Poí Lé Món É Hkyô*  
Mht 26:17-30; Mrk 14:12-26; Yhn 13:21-30

<sup>7</sup> Ahkuí, haú Lhoqlhai Poí mâ é sauzo shigu hkungga sat nhông byi râ é Azuma buinyi jé bê.

<sup>8</sup> Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poí ê món láng keq." ga luí, nhang kat ri.

<sup>9</sup> Haú nhik gi, "Hkâmá ê món to nhâng nau ri lú?" ga luí, Yhang lé myi akô.

<sup>10</sup> Haú hkûn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhûm má châng wàng mù,

<sup>11</sup> yhumsíng lé, 'Ngò Ngá é chángzô pé eq rahá, Lhoqlhai Poí zo râ bíng wap hkâmá nghut lhê lú ga, Sará myi nhang kat ri.' nghu tái keq.

<sup>12</sup> Haú hkûn, hen tô é ahtoq mâ é wap mó lé, nungnhik lé lhom tún shit râ nghut lhê; wap haú má ê món to keq." ga tái kat ri.

<sup>13</sup> Haú chángzo nhik htoq e ló le, Yesuq tái kat é eq roq za ê myâng kômù, Lhoqlhai Poí lé món to bekô nghut ri.

### *Yhumsing É Myinzang*

<sup>14</sup> Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô.

15 Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poî shî lé nungmoq eq rahá zo râ lé, Ngò gyai ô nau nyi lhê.

16 Hkâsu mù gâ le, ngò, nungmoq lé taí kôlé, Garai Gasâng é mingdán má poî shî a ló dik dik gi, ngò haú lé dum zo râ a nghut ló." ga luî, yhangmoq lé taí ri.

17 Hau htâng, Yesuq gi, góm lé yù mù jeju ban hkya-on jáng, "Góm shî lé yù luî, nungmoq yhangchang gàm shuq lhum keq.

18 Ngò, nungmoq lé taí kôlé, ahkuî mai gi, Ngò, Garai Gasâng é mingdán a jé jé tsibiyiq wing lé dum shuq rá a nghut lo." ga taí ri.

19 Hau htâng, Yhang gi, muk lé yù mù, jeju hkya-on luî, muk lé myhik hpé mù, yhangmoq lé byi uchyang, "Shî gi, nungmoq é matú byi pyâm é, Ngá é gungdu nghut lhê; Ngo lé bûn nyi râ matú, shî su kut nyi keq." ga taí ri.

20 Haú eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê.

21 Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri.

22 Haú Byu Yhangzo gi, hkyin to huî é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri.

23 Haú su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhú ga, rayuq eq rayuq myí lhum bum akô.

24 Haú htoq agó, yhangmoq mâ é hká yuq sheq je kô lhê lhú ga le, rayuq eq rayuq taí htîng lhûm bum akô.

25 Haú mù luî, Yesuq gi, "Tûngbaù pé é hkohkam pé gi, yhangmoq byù myú pé é ahtoq má up zô nyi kô é nghut luî, byu pé gi, ahkáng ayá wó é bang lé jeju yhumsing pé ga luî, taí hkungga nyi bum akô.

26 Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq.

27 Hká yuq sheq je kô lhê lhú? Zô zung nyi sù lhú? Haú a nghut jáng, saí tsô é sù lhú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê.

28 Nungmoq kúm gi, Ngò jamjau huî nyi le, Ngò eq rahá nyi nyi é bang nghut nyi akô.

29 Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê.

30 Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyú raxe í hú lé jéyáng kó râ nghut lhê.

*Yesuq Lé, Petruq (Simun) He-ngik Pyâm Râ Hkyô*

*Mht 26:31-35; Mrk 14:27-31; Yhn 13:36-38*

31 Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê.

32 Nghut kôlhang, náng é lumjín myit a hten sháng gaq nghû, Ngò, náng é matú kyûdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq." ga taí ri.

33 Haú hkûn, Simun gi, "Yhumsîng ê, htóng wâng kôlhang, shî kôlhang, ngò gi, nàng eq rahá cháng râ matú myit hpyit to bê." ga tú taí ri.

34 Yesuq gi, "Petruq ê, nang lé Ngò taí lé, hkû-nyí\* lháng woq a tûn shi má, nàng, Ngo lé a sé ga luî sum dâm he-ngik pyám râ nghut lhê." ga taí ri.

35 Hau htâng, Yesuq, yhangmoq lé taí é gi, "Ngò, nungmoq lé ngunhtûng, jîhtûng, hkyî-tsung a wùn a chûng nhang é za, nhang kat é nghut hkûn, nungmoq chyáng haí ra akô lhú?" ga

\* 22:34 Yudaq byu pé é ra-nyí gi, myinhâng bui wang é mai, htang nyí bui wang é jé shoq nghut lhê. Shî mâ é hkû-nyí gi, nga-nhûng é matú myín âng ri.

myi jáng, yhangmoq gi, "Haî le a ra lo." ga taî akô.

<sup>36</sup> Haú hkûn, Yhang gi, "Ahkuî kúm gi, ngunhtûng wó sù gi, yù wun sháng gaq, jìhtûng wó sù le, yù wùn sháng gaq, shâm a wó sù gi, bumó ung luî wuî sháng gaq.

<sup>37</sup> Hkâsu mù gâ le, Ngò, nungmoq lé taî kôlé, Ngò eq séng luî Chyúmdang má kâ tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.'<sup>✧</sup> ga kâ tô é dang gi, Ngá chyáng dik lò râ nghut lhê." ga luî, yhangmoq lé taî ri.

<sup>38</sup> Haú mù, lagyô pé gi, "Yhumsîng ê, wú aq, shí má shâm í hkyam joq tô ri." ga taî kôjáng, Yesuq gi, "Gé bê." ga luî, yhangmoq lé taî ri.

*Tsanlun Bùm Má Yesuq Kyûdûng É Hkyô*

*Mht 26:36-46; Mrk 14:32-42*

<sup>39</sup> Ahkuî, Yesuq gi, htoq luî, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô.

<sup>40</sup> Haú jowò má jé jáng, Yhang gi, "Nungmoq, gunglaú é a hui sháng gaq, kyûdûng nyi keq." ga luî, yhangmoq lé taî to mù,

<sup>41</sup> chángzô pé nyi é mai luqgok radú we kô gâng e ló luî, hkyihput htuoq mù,

<sup>42</sup> "Áwa ê, Náng ô nau é nghut le gi, góm† shí lé Ngá chyáng mai lhai pyám byi laq. Nghut kôlhang, Ngò ô nau é dông a nghut, Nang ô é dông sheq nghut sháng gaq." ga kyûdûng ri.

<sup>43</sup> Haú hkûn, mauhkûng mai mau-mang lagyo rayuq htoq lé luî, Yhang lé i-myt nhik lé taî tîng ri.

<sup>44</sup> I-myt hkaú má dik shoq hkâm zo wuî é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigûng má yui gyó ri.

<sup>45</sup> Haú mù, kyû ban dung jáng, Yhang toq luî, chángzô pé chyáng ló wú le, yhangmoq gi, myit yón mù luî, yhup myhî to kô é lé ló myâng mù,

<sup>46</sup> "Haî mù yhup nyi akô lhú? Toq keq! Gunglaú é a hui sháng gaq, kyûdûng nyi keq." ga luî, yhangmoq lé taî ri.

*Yesuq Lé Chyup É Hkyô*

*Mht 26:47-56; Mrk 14:43-50; Yhn 18:3-11*

<sup>47</sup> Haú su ga, ru taî nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luî, yhang gi, Yesuq lé bopuq puq râ ga huî lé lo ri.

<sup>48</sup> Haú mù luî, Yesuq gi, "Yudaq ê, nàng gi, haú Byu Yhangzo lé bopuq puq é èq gyè pé chyáng ap pyâm lhê lhú?" ga luî, yhang lé lhom myî ri.

<sup>49</sup> Haú hkûn, Yesuq htâng cháng bang gi, haî dut lò râ lé bûn sé kô é yanmai, "Yhumsîng ê, ngamoq gi, sham èq zân le, gè râ lhú?" ga myî akô.

<sup>50</sup> Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luî, yhâng é loqyo nohkyap byit byuq bê nghut ri.

<sup>51</sup> Yesuq kúm gi, "Gé bê. Yhangmoq ô nau é su nghut kó sháng gaq." ga tú taî mù, haú yuq é nohkyap lé ê záng luî lhoq gê byi ri.

<sup>52</sup> Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luî, lé lo akô lhú?"

<sup>53</sup> Ngò gi, nyi wuî, noqkuq yhûm má nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuî gi, mauchut èq up‡ nyi bê yanmai, nungmoq é ahkyíng nghut nyi ri." ga taî ri.

*Yesuq Lé, Petruq Èq He-ngik Pyâm É Hkyô*

*Mht 26:57-58, 67-75; Mrk 14:53-54, 66-72; Yhn 18:12-18, 25-27*

<sup>54</sup> Haú hkûn, yhangmoq gi, Yhang lé chyup yû mù she ló luî, hkyangjong mó é yhûm shut shuí wang ló akô. Petruq le we we mai châng tô ri.

✧ 22:37 Esai 53:12 † 22:42 góm gâ é gi, Yesuq jamjau hui râ hkyô eq shí râ hkyô lé, taî nau é nghut lhê. ‡ 22:53 Mauchut èq up gâ é gi, Tsadán èq up é lé gâ ri.

<sup>55</sup> Ahkuî, yhangmoq gi, wàng hkaû má myi mut yû luî zung tô bum é hkûn, Petruq le yhangmoq é ahkaû má bo tô ri.

<sup>56</sup> Langchyang myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, "Shí yuq le Yesuq eq rahá nyi sù nghut ri." ga taî ri.

<sup>57</sup> Haú hkûn, Petruq gi, "Myiwe myhí ê, nàng taî é sù lé, ngò a sé." ga he pyâm ri.

<sup>58</sup> Hau htàng hkâ-myháng a myáng má, byù rayuq gi, yhang lé dum myàng luî, "Nàng le yhangmoq chyang bo nyi sù nghut ri." ga taî kat jáng, Petruq gi, "Byù hpó ê, ngò a nghut." ga tû taî ri.

<sup>59</sup> Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haî mù gâ le, yhang gi, Galile byù le nghut ri." ga zuq zuq taî ri.

<sup>60</sup> Petruq gi, "Byù hpó ê, nàng taî nyi é hkyô lé, ngò a sé." ga tû taî ri. Haú su ga ru taî nyi ashî le, woq tân bê nghut ri.

<sup>61</sup> Haú hkûn, Yesuq gi, lhîng luî, Petruq lé wú kat ri. Haú mù, Petruq gi, "Hkû-nyí lháng, woq a tân shi má, nàng Ngo lé sum dâm he pyám râ nghut lhê." ga luî, Yhumsîng yhang lé taî é dang lé bûn kat ri.

<sup>62</sup> Haú mù, yhang gi, shinggan shut htoq ê luî, gyai yhang ê ngau nyi ri.

### *Gyezô Pé Yesuq Lé Rhoî É Hkyô*

<sup>63</sup> Yesuq lé zúng nyi é bang gi, Yhang lé rhoî luî nghap myíng nghap htê mu nyi akô.

<sup>64</sup> Yhangmoq gi, Yhâng é myoqdong nghop pyám byi luî, "Nang lé bat sù gi, ó yuq nghut ri lhú? Myiqhtoi htoî wú aq." ga myî akô.

<sup>65</sup> Yhangmoq gi, Yhang lé nyhap é dang ajung jung dông taî rhoi nyi akô.

### *Suwún Wui É Hí Má Yesuq Jé Nyi É Hkyô*

*Mht 26:59-66; Mrk 14:55-64; Yhn 18:19-24*

<sup>66</sup> Napkyó myoqmyàng jáng, mingbyû wui é suwún hpúng bang eq rahá,

hkyangjong agyi pé, tarâ sará pé, zup hpong kut nyi é má, Yesuq lé shuî ê mù,

<sup>67</sup> "Nàng Hkrisduq nghut é têng le gi, ngamoq lé taî kyo laq." gâ akô.

Yesuq gi, "Ngò gi, Hkrisduq nghut lhê nghû taî kôlhang, nungmoq jíng kó râ a nghut.

<sup>68</sup> Ngò, nungmoq lé myi kôlhang, nungmoq gi, tû taî kó râ a nghut.

<sup>69</sup> Nghut kôlhang, ahkuî mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luî, yhangmoq lé taî ri.

<sup>70</sup> Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myî akô.

Yesuq gi, "Nungmoq taî é eq rajung za Ngò nghut lhê." ga luî, yhangmoq lé tû taî ri.

<sup>71</sup> Haú hkûn, yhangmoq gi, "Nga-nhúng haî jung saksé wá râ nyi ashî lhú? Yhâng é nhut mai yhang, taî htoq kat é dang lé, nga-nhúng wó gyo bê nghut lhê." ga akô.

## 23

### *Yesuq Lé Mara Hun É Hkyô*

*Mht 27:1-2, 11-14; Mrk 15:1-5; Yhn 18:28-38*

<sup>1</sup> Haú hkûn, zup zîng tô é bang banshoq gi, htoq mù, Yesuq lé mauzau Pilat chyang shuî wang ê luî,

<sup>2</sup> "Shí yuq gi, mingbyû wui lé hkyô shuî nghoq é eq, hkoséng Kehtaq chyang kang kat râ hkyô lé le hkûm to luî, Yhânggùng yhang gi, haú Hkrisduq nghû é hkohkâm nghut lhê ga luî, taî nyi é lé ngamoq myang ri." ga luî, Yhang lé mara hun akô.

<sup>3</sup> Haú hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lhú?" ga myî jáng, Yesuq gi, "Nàng taî é eq rajung za nghut lhê." ga tû taî ri.

<sup>4</sup> Pilat gi, "Shí yuq lé hûn râ mara ngò a myàng." ga luî, hkyangjong agyi pé eq shiwa byu pé lé taî ri.



<sup>5</sup> Nghut kôlhang, haú bang gi, "Shí yuq gi, Yuda mau gón má yhang mhoqshít é dông mai, mingbyû wui é i-myit lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

<sup>6</sup> Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

<sup>7</sup> Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

<sup>8</sup> Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shít râ lé, wó myâng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri.

<sup>9</sup> Haú mù, yhang gi, Yesuq lé dangmyi myo myô èq myí wú kôlhang, Yesuq gi, dang rahkun lhang a tû taí byi nghut ri.

<sup>10</sup> Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô.

<sup>11</sup> Herut eq yhâng é gyezô pé gi, Yesuq lé rhoí jihkyoí kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat akô.

<sup>12</sup> Haú nyí jáng, hí hpyang gyè dut lhúm é Herut eq Pilat gi, buinùm dut byuq bekô nghut ri.

*Yesuq Lé Sat Râ Matú Doqdân É Hkyô*

*Mht 27:15-26; Mrk 15:6-15; Yhn 18:39-19:16*

<sup>13</sup> Haú hkûn, Pilat gi, hkyangjong agyi pé eq zau suwún wui, mingbyû wui lé wut tsing to mù,

<sup>14</sup> "Shí yuq gi, mingbyû wui lé hkyô shuí ngoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri.

<sup>15</sup> Hau htoq agó, Herut le, hai mara le a myàng mù, shí yuq lé nga-nhung

chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri.

<sup>16</sup> Haú mù, ngò, Yhang lé dam byi luí, nhang pyám râ." ga luí, yhangmoq lé taí ri.

<sup>17</sup> Nghut kôlhang, Lhoqlhai Poí hkangmó má, Pilat gi, mingbyû wui lé htongbyû rayuq yuq nhang kat byi byi kut é yanmai,

<sup>18</sup> yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô.

<sup>19</sup> Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

<sup>20</sup> Pilat gi, Yesuq lé nhang pyám nau é nghut mù luí, yhangmoq lé dum puq taí ri.

<sup>21</sup> Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garu nyi bum akô.

<sup>22</sup> Haú mù luí, sum dâm nghû râ hkûn, Pilat dum taí é gi, "Haí mù luí lhú? Yhang gi, hai mara kut shut bê lhú? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshít luí, nhang pyám râ." ga luí, yhangmoq lé taí ri.

<sup>23</sup> Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yù bekô nghut ri.

<sup>24</sup> Haú mù luí, Pilat gi, yhangmoq dúng é eq rajung za myit hpyit doqdan byí ri.

<sup>25</sup> Haú su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

*Yesuq Lé Tapzîng Htoq Má Jén Tap É Hkyô*

*Mht 27:31-44; Mrk 15:21-32; Yhn 19:17-27*

<sup>26</sup> Yhangmoq gi, Yesuq lé shuí htoq ló kô é hkûn, yosô wà mai lo é, Kuruni

myuq byû nghut é Simun ga sù lé, chyup yû mù, tapzîng waq nhâng luí, Yesuq htâng má cháng nhang akô.

<sup>27</sup> Byû rajùm rayò gi, Yhang htâng má châng e ló bum akô. Yhang é yanmai ngaubyi ngaù nhap eq iyon yôn é myiwe zo wuì le haú má bo tô ri.

<sup>28</sup> Yesuq gi, yhangmoq shut lhîng wú luí, "Yerusalem byizo wuì ê, Ngá é yanmai hkâ-ngau nyì kó, nungmoq gi, yhumsing gùng eq yhumsing é zo dù wuì é matú sheq ngau nyì keq.

<sup>29</sup> Hkâsu mù gâ le, 'Zogûng a dut wú é eq naú a huq wú é baùdung myhí pé gi, hkungsô wó nyi ri.' ga luí, taí é buinyì gi, jé lô râ nghut lhê.

<sup>30</sup> Haú buinyì má, byu pé gi, bùm pé lé,

'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'<sup>☆</sup>

ga luí le, wut taí bùm bekô râ nghut lhê.

<sup>31</sup> Byu pé gi, sîkgâm jûm tô ashî le isu kut kô é nghut le gi, mán jáng gi, hkâsu wá dut lò râ lhú?" ga taí ri.

<sup>32</sup> Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô.

<sup>33</sup> Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô.

<sup>34</sup> Haú hkûn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é dông gam yu pyám byí akô.

<sup>35</sup> Mingbyû wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

<sup>36</sup> Gyezô pé le, huí ê mù, rhoi nyaú nyaú akô. Yhangmoq gi, chyîn wing lé yhun byi kôluí,

<sup>37</sup> "Nàng gi, Yudaq byu pé é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé taí akô.

<sup>38</sup> Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

<sup>39</sup> Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lhú? Haú Náng gùng nàng le, ngá-nhik lé le, hkyi yu aq." ga luí, Yhang lé rhoi ri.

<sup>40</sup> Damyaq góyuq sù kúm gi, "Nàng le shî yuq eq rajung za jén tô é hui luí nhîng, Garai Gasang lé a gyuq lhú?"

<sup>41</sup> Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

<sup>42</sup> Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

<sup>43</sup> Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu\* má nyi râ nghut lhê." ga luí, yhang lé tû taí kat ri.

### *Yesuq Soqkang Byit É Hkyô*

*Mht 27:45-56; Mrk 15:33-41; Yhn 19:28-30*

<sup>44</sup> Haú ahkyíng gi, nyí káng raxe í hkyíng nghut luí, myinhtâng sum hkyíng jé shoq ramau gón mauchut tuq dut byuq bê nghut ri;†

<sup>45</sup> hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri.

<sup>46</sup> Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó èq garû kat ri. Haú su ga ban taí eq, Yhang káng byit bê nghut ri.

☆ **23:30** Hos 10:8 \* **23:43** Hparadisu nghu é gi, mauhkûng mingdán lé taí ri. † **23:44** Nga-nhûng é nyí káng raxe í hkyíng gi, Yudaq byù pé é napkyó hkyuq hkyíng nghut lhê; yhangmoq é gau hkyíng gi, nga-nhûng é myinhtâng sum hkyíng nghut bê.

<sup>47</sup> Shô up gyezau hpó gi, haû su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri.

<sup>48</sup> Haû hkyô lé wú râ ga, lé zîng tô é byù lhunglhâng bang le, haû su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

<sup>49</sup> Nghut kôlhang, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haú hkyô pé lé byu wú nyi akô.

### *Yesuq É Màng Lé Lup Hkaû Má Kat É Hkyô*

*Mht 27:57-61; Mrk 15:42-47; Yhn 19:38-42*

<sup>50</sup> Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé râ hkyô lé myit myoqbyu to sù le, nghut mù luí,

<sup>51</sup> yhang gi, Yudaq uphkâng hpúng mâ é rayuq nghut kôlhang, hpyé lhúm é hkyô má le, zui saí é hkyô má le, myit a bo huí lom é sù nghut ri.

<sup>52</sup> Yhang gi, Pilat chyáng wàng luí, Yesuq é gungsôm lé dúng yu ri.

<sup>53</sup> Haú mù, gungsôm haú lé tapzîng mai hkyut hkyô yù luí, pán yúng èq htup yup mù, ó lé lhang a kat wú shí é, luggok lé kyûng tô é luggok lup hkaû má kat tô ri.

<sup>54</sup> Haú nyí gi, Hên Lajang Buinyi nghut luí, Bánno buinyi jé râ za nghut bê.

<sup>55</sup> Galile mau mai Yesuq eq rahá htoq lé lo é myiwe zo wui le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô.

<sup>56</sup> Hau htâng, yhangmoq gi, yhúm shut taú lò mù, Yesuq é gung sôm lé but byi râ matú, namngón é jung eq mura xú lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

## 24

### *Yesuq, Dum Dui Toq É Hkyô*

*Mht 28:1-10; Mrk 16:1-8; Yhn 20:1-10*

<sup>1</sup> Bánno buinyi htang napsûn noq le, myiwe wui gi, yhangmoq hen tô é namngón jung pé lé yu chûng mù, lup shut e ló akô.

<sup>2</sup> Yhangmoq gi, lup mâ é luqhkum lêng búng to lánng é lé, ê myâng kômù,

<sup>3</sup> wang e wú kô le, haû Yhumsîng Yesuq é gungsôm lé, a myàng lo kó nghut ri.

<sup>4</sup> Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô.

<sup>5</sup> Haú mù, myiwe haú bang gi, gyuq dan bum kôluí, myigùng shut myoq-dong ngóm gop tô bum é u lé, haú nhik gi, "Nungmoq gi, duí sù lé, shi to bâng chyáng haí mù ho nyi akô lhú?

<sup>6</sup> Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé,

<sup>7</sup> 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghú é buinyi má lhoq dui toq yu é hui râ nghut lhê.' ga nungmoq lé taí tô é dang lé myit bun keq." ga luí, yhangmoq lé taí ri.

<sup>8</sup> Haú hkûn, yhangmoq gi, Yesuq é dang lé bûn kat bekô nghut ri.

<sup>9</sup> Yhangmoq gi, lup mai dum taú lò mù, lagyo raxe rayuq eq gotù lhunglhâng bang lé, haú hkyô ban-shoq lo taí kyô akô.

<sup>10</sup> Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô.

<sup>11</sup> Lagyo pé kúm gi, yhangmoq é dang lé dangsôm su ngam pyâm kôluí, a jîng byi kó nghut ri.

<sup>12</sup> Nghut kôlhang, Petruq gi, toq luí lup má din jé ê mù ngóm wú kat le, màng htup é pán leq tô é lé za myàng mù luí, haú su dut é hkyô lé maú é èq,

yhûm shut dum taû ló byuq bê nghut ri.

*Chángzo Í Yuq Lé Yesuq Htoq Shit É Hkyô*

*Mrk 16:12-13*

<sup>13</sup> Haû ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô.

<sup>14</sup> Yhangnhik gi, dut lai ló é hkyô pé banshoq lé, rayuq eq rayuq taî lhûm nyi akô.

<sup>15</sup> Yhangnhik gi, haú hkyô pé lé rayuq eq rayuq taî hpyê lhûm e ló kô le, Yesuq gi, yhangnhik chyáng jé lé ló mù, yhangnhik eq rahá sô nyi ri.

<sup>16</sup> Nghut kôlhang, yhangnhik gi, myoq hpuq hpuq pyám byî é hui kômù, Yhang lé a sê wú byuq kó nghut ri.

<sup>17</sup> Hau hkûn, Yesuq gi, yhangnhik lé, "Nungnhik hkyô so uchyang taî lhûm lé lo é gi, haí jung wá nghut akô lú?" ga myi kat jáng, yhangnhik gi, myoqdong shûm kut luí, hkyîng yap tô akô.

<sup>18</sup> Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyí luí nhîng, shí gyoro lé haû wà má dut lo é hkyô pé lé, a sê é bíng gi, Nàng baú za wá nghut lhê lú?" ga myi kat ri.

<sup>19</sup> Yhang gi, "Haí jung lú?" ga dum myî é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lhunglhang bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri.

<sup>20</sup> Nghut kôlhang, hkyangjong agyi pé eq ngamoq é zau suwún wui eq haú yuq lé sat pyám râ matú ap byî pyám kômù, yhangmoq gi, Yhang lé tapzîng má jén sat pyám bekô nghut ri.

<sup>21</sup> Ngamoq kúm gi, haú yuq lé, Israelaq byù myû lé hkyi yù râ sù nghut lhê nghú luí, myit myoqbyu nyi bum lhê. Nghut kôlhang, haú su dut lai ló é gi, hkû-nyí sum nyí lhang bò bê.

<sup>22</sup> Hau htoq agó, hkû-nap noq le, lup má ê wú é, ngamoq hpúng mâ é

myiwe wui ra-am gi, ngamoq lé, lo lhoq maú akô.

<sup>23</sup> Yhangmoq gi, Yesuq é gungsôm lé a myàng jáng dum taû lò mù, 'Haû Yhumsîng dui nyi ri.' ga luí, taî kyô é maumang lagyo htoq shit é shing-rán lé, myang é hkyô lé lo taî kyô akô.

<sup>24</sup> Haû mù, ngamoq é luzúm wui ra-am gi, lup má ê wú kô le, myiwe wui taî é eq rajung za, dut to láng é lé ê myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé taî kyô akô.

<sup>25</sup> Haú hkûn, Yhang gi, "Myiqhtoi pé taî é dang banshoq lé lumjîng râ matú, hpaqchyî a bo é eq ngha é sù nhik ê,

<sup>26</sup> Hkrisduq gi, haú su é wuihke jamjau hkâm zô yu é htâng má sheq, Yhâng é hpungwup shing kang má wó wang nyi to râ, a nghut kó lú?" ga luí, yhangnhik lé myî ri.

<sup>27</sup> Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taî hpông kyô ri.

<sup>28</sup> Ahkuí, yhangmoq, haú nhik e ló é wà má chyáng lò kôjáng, Yesuq gi, lai ló râ su kut ri.

<sup>29</sup> Haú hkûn, yhangnhik gi, "Nganhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luí, Yhang lé wum kat chòm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

<sup>30</sup> Yesuq gi, zang zo râ ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byî ri.

<sup>31</sup> Haú hkûn, yhangnhik é myoq bóng lò luí, Yesuq nghut é lé bûn sé kat bekô. Yesuq kúm gi, yhangnhik chyáng mai byuq byuq bê nghut ri.

<sup>32</sup> Haú mù, yhangnhik gi, "Yhang gi, hkyô má ngá-nhik eq dang nyo lhûm é eq Chyúmdang é lichyúm taî hpóng shit é hkûn, ngá-nhik gi, i-myit unghkaú má, achyí aku dut

bê a nghut l hú?" ga luí, yhangnhik yhangchang taí lhùm akô.

<sup>33</sup> Yhangnhik gi, toq mù, radá dâm Yerusalem wà mó shut dum taú ló kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô.

<sup>34</sup> Haú bang gi, "Haú Yhumsîng gi, teng za yhang dum dui toq ló bê; Simun lé l háng htoq shit bê nghut ri." ga taí lhùm nyi bum akô.

<sup>35</sup> Haú hkûn, yhangnhik gi, hkyô má dut lai ló é hkyô pé eq, muk hpê é hkûn má Yesuq lé bûn sé kat é hkyô lé, taí kyô akô nghut ri.

### *Chángzô Pé Lé Yesuq Htoq Shit É Hkyô*

*Mht 28:16-20; Mrk 16:14-18; Yhn 20:19-23; Lagyo 1:6-8*

<sup>36</sup> Yhangmoq haú hkyô lé chôm taí nyi tô bum ashî le, Yesuq gi, Yhang gûng yhang, yhangmoq é agùng má yap to luí, "Nungmoq nguingón yuqyo nyi sháng gaq." ga luí, yhangmoq lé taí ri.

<sup>37</sup> Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô.

<sup>38</sup> Haú mù luí, Yhang gi, "Nungmoq gi, haí mù dan nyi bum akô l hú? Haí mù nungmoq é i-myit unghkaú má úng-âng nyi bum akô l hú?"

<sup>39</sup> Ngá é loq eq Ngá é hkyî lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

<sup>40</sup> Yhang gi, haú su ga taí mù, Yhâng é hkyî loq lé tûn shit ri.

<sup>41</sup> Yhangmoq gi, gabú é eq maú nyi bùm kômù, a wó jîng shi dut tô é hkûn lé, Yesuq gi, "Nungmoq shí má zôhpo rajung jung wó akô l hú?" ga luí, yhangmoq lé myi kat ri.

<sup>42</sup> Haú hkûn, yhangmoq gi, nyhîn nyhoq tô é ngozo rahtung lé, byî akô.

<sup>43</sup> Yhang gi, haú lé yù mù, yhangmoq é hí má zô shit ri.

<sup>44</sup> Hau htâng, Yhang, yhangmoq lé taí é gi, "Mosheq é tarâ eq, myiqh-toi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghû luí, nungmoq eq rahá nyi to ashî hkûn lé, Ngò, nungmoq lé taí kyô tô é pé gi, shî nghut bê." ga taí ri.

<sup>45</sup> Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byî ri.

<sup>46</sup> Haú mù, Yhang gi, "Hkrisduq gi, wuîhke jamjau hui zo mù, sum nyi nghû râ buinyi má, shi é mai dum dui toq lô râ hkyô lé le,

<sup>47</sup> Yerusalem wà mó mai hí luí, byù myû chângiup lé, Yhâng é myîng lé lang luí yubak mara hkyut pyâm byi râ hkyô eq myit lhîng râ hkyô lé le, hko kyo râ hkyô lé, kâ to bê nghut ri.

<sup>48</sup> Nungmoq gi, shí pé é saksé pé nghut nyi akô.

<sup>49</sup> Ngá Wa byî tô é danggidiq\* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng má é wum-o a-tsam wó yu é buinyi jé shoq, Yerusalem wà mó má láng nyî keq." ga luí, yhangmoq lé taí ri.

### *Yesuq Mauhkûng Shut Shuî Toq Yu Huî É Hkyô*

*Mrk 16:19-20; Lagyo 1:9-11*

<sup>50</sup> Hau htâng, Yhang gi, yhangmoq lé Behtani wà yàm shut shuî htoq é mù, Yhâng é loq tu toq luí, shimân byî ri.

<sup>51</sup> Haú su kut shimân byî nyi ashî le, Yhang gi, yhangmoq chyáng mai gâng ló byuq luí, mauhkûng shut shuî toq yu é hui bê nghut ri.

<sup>52</sup> Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô.

<sup>53</sup> Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

\* **24:49** Ngá Wâ byi tô é danggidiq nghu é gi, Chyoiyung é Woi-nyí lé taí ri.

## YOHAN é Gabú Danglù Laiká (The Gospel of John)

### *Haù Mungdang, Xângzo Byù Gùng Lé Dut É Hkyô*

<sup>1</sup> A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri.

<sup>2</sup> Yhang gi, a-nham sâng-hi má, Garai Gasang eq rahá nghut nyi ri.

<sup>3</sup> Nyi mi-nyì, joq mijoq gi, Yhang dông mai hpan tô é chyat nghut lhê; Yhang dông mai a hpan é gi, haì lhang a joq nghut ri.

<sup>4</sup> Asak chyungxe gi, Yhang má nghut lhê mù, asak haù gi, byu pé é matú maubó nghut ri.

<sup>5</sup> Haù maubó gi, mauchut má duqbó byì nyi kôhlang, mauchut gi, haù lé a hap yù nghut ri.

<sup>6</sup> Garai Gasang mai nhang kat é, Yohan gâ é byù rayuq jé lé ri.

<sup>7</sup> Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjínng kó sháng gaq ga, saksé rayuq dông jé lé é sù nghut ri.

<sup>8</sup> Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê.

<sup>9</sup> Byù yuq jup lé duqbó byi é, maubó akying haù gi, mingkan htoq má jé nyi to bê.

<sup>10</sup> Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut kôhlang, mingkan haù gi, Yhang lé a wú sé nghut ri.

<sup>11</sup> Yhang gi, yhumsing mau má jé lé kôhlang, Yhang é amyú pé gi, Yhang lé a lhom hap yù kó nghut ri.

<sup>12</sup> Nghut kôhlang, Yhang gi, Yhang lé lhom hap yù luí, Yhang é mying lé lumjínng é bang lhunglhang lé, Garai

Gasâng é yhangzô pé dut râ ahkáng byi bê nghut ri.

<sup>13</sup> Haù bang gi, sui sho dông hku kat é le a nghut, byù ô nau é dông hku kat é le a nghut, gungsho ô nau é dông hku kat é le a nghut e za, Garai Gasang chyáng mai hku kat é bang ru nghut lhê.

<sup>14</sup> Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô byíng tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq dông, Yhang wó yu é hpungwup shingkang nghut ri.

<sup>15</sup> Wui-myhup Sará Yohan gi, Yhang eq sêng é hkyô lé saksé hkám é hkûn, garû taí é gi, "Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri." nghû, ngò taí é sù gi, shí yuq nghut bê." gâ ri.

<sup>16</sup> Yhang é gumjup é jeju ahkaù mai, nga-nhung banshoq bang gi, shimân jeju lé ralhûm htoq ralhûm myang yu nyi bê nghut lhê.

<sup>17</sup> Hkâsu mù gâ lé, haù jep é tarâ gi, Mosheq é loq dông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

<sup>18</sup> Garai Gasang lé, ó yuq èq le a myang wú wú é nghut lhê; nghut kôhlang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

### *Wui-myhup Sará Yohan Hko Kyô É Hkyô*

*Mht 3:1-12; Mrk 1:1-8; Luk 3:15-17*

<sup>19</sup> Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkám é gi, a-ô mâ é hkyô pé nghut ri.

<sup>20</sup> Yhang gi, a hê a zaú tô e za, "Ngò gi, Hkrisduq\* a nghut." ga lhom taí kyô ri.

\* **1:20** Grik dong *Hkrisduq* gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

21 Haú hkûn, yhangmoq gi, "Haú nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haú Myiqhtoi nghut lhê lhú?" ga dum myi kôjáng, yhang gi, "A nghut." ga tû taí ri.

22 Haú mù, yhangmoq gi, "Ngamoq lé nhang kat bâng chyáng ló wó taí kyo rá matú, nàng gi, ó yuq nghut lhê lhú? Nàng gûng lé nàng hkâsu nghut lhê lhú? Taí kyô wú laq." ga dum myi akô.

23 Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê."\* ga tû taí ri.

24 Hparishe pé mai nhang kat é bang ra-am gi, yhang lé,

25 "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhing, haí mù luí, wui-myhup hkám byi nyi lhê lhú?" ga dangmyi myi akô.

26 Haú hkûn, Yohan tû taí é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri.

27 Yhang gi, ngá htâng má lé é sù yuq nghut bê; ngò gi, Yhâng é hkyi-tsung tui lé hpyí rá lhang a gingdán é nghut ri." gâ ri.

28 Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani wà má dut é hkyô pé chyat nghut ri.

### *Yesuq Gi, Garai Gasâng É Sauzo Nghut É Hkyô*

29 Hau htang nyí, Yohan gi, yhâng chyáng Yesuq lé lô nyi é lé myàng luí, taí é gi, "Mingkan byu pé é yubak mara lé yu pyám byi é Garai Gasâng é Sauzo lé, wú keq!"

30 Shí yuq gi, "Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri." nghut, ngò taí é sù yhang nghut bê.

31 Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghut, ngò lé jé mù, wui èq wui-myhup hkám byi nyi é nghut lhê." gâ ri.

32 Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri.

33 Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi rá matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi rá sù nghut lhê.' gâ ri.

34 Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghut, ngò saksé hkâm lhê." gâ ri.

### *Sâng-hi Lhê É Chángzô Pé*

35 Hau htang nyí, Yohan gi, yhâng é chángzo í yuq eq rahá, haú má dum nyi tô akô.

36 Haú hkûn, yhang gi, Yesuq láí lô nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

37 Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri.

38 Yesuq gi, lhing wú kat le, yhangnhik châng tô é lé myàng luí, "Nungnhik haí o akô lhú?" ga myi jáng, yhangnhik gi, "Rabai ê, Nàng hkâmá nyi lhê lhú?" ga taú myi kat akô nghut ri. (Rabai gâ é gi, Sará gâ é lichyúm nghut lhê.)

39 Haú hkûn, Yhang gi, "Lé keq, haú jáng, nungnhik myàng kó rá nghut lhê." ga tû taí ri.

(Haú-u gi, raxê hkyíng† kô nghut ri.) Haú mù luí, yhangnhik gi, châng é mù, Yhang hkâmá nyi é lé, ê myàng kôluí, haú nyi buigyùm shoq, Yhang eq rahá ê nyi nyi akô nghut ri.

\* 1:23 Esai 40:3 † 1:39 Raxê hkyíng gi, myinhâng myi hkyíng záng ri.

40 Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri.

41 Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.)

42 Hau htâng, yhang gi, yhangmang lé Yesuq chyáng shuî e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa<sup>‡</sup> gâ é mying lé, nàng wó yû râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

### *Hpilip Eq Nahtanelaq Lé Hkyin Yu É Hkyô*

43 Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

44 Hpilip gi, Andre eq Petruq nhik nyi é Bet-saida wà mó mâ é byù nghut ri.

45 Yhang gi, Nahtanelaq lé myàng jáng, "Mosheq mai tarâ laiká má kê tô é eq myiqhtoí pé mai le lhoq ang luí kê tô é sũ, Yosep é yhangzo, Nazaret wà byù Yesuq lé, ngamoq myàng bê." ga yhang lé taí kyô ri.

46 Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé taí ri.

47 Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sũ, Israelaq byù akying rayuq nghut ri." ga taí ri.

48 Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yû shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tũ taí ri.

49 Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pê é Hkohkâm le nghut ri." ga taí ri.

50 Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yanmai, nàng lumjínghê a nghut lhú? Hau htoq je kê é muzó pé lé, nàng myàng râ nghut lhê." ga taí ri.

51 Hau htâng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq ló gyó lô kut nyi kê é lé, nungmoq myàng kó râ nghut lhê." gâ ri.

## 2

### *Wuì Lé Tsibiyiq Wing Dut Nhang É Hkyô*

1 Hau htâng, í nyi nghú râ nyi má, Galile mau má é Hkanaq wà mó má, myiháng poí ralhum joq ri. Haú má Yesuq é yhângnu le, bo lom ri.

2 Yesuq eq Yhâng é chángzô pé lé le, myiháng poí haú má ji akô nghut ri.

3 Tsibiyiq wing jaú tũm to kê é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

4 Haú hkûn, Yesuq gi, "Ânu ê,\* haú, nàng gi, Ngò eq haí sêng lhê lhú? Ngá é ahkying a jé shi é nghut lhê." ga tũ taí ri.

5 Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

6 Haú nàm má, í sum xê galan kê wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

7 Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

8 Hau htâng, Yhang gi, yhangmoq lé, "Ahkuí, ratsuí hkû yù mù, poí-up lé

<sup>‡</sup> 1:42 Aramaik dang đông *Kehpa* gâ é eq Grik dang đông "Petruq" gâ é lichyúm gi, luqgok gâ é nghut lhê. \* 2:4 *Ânu ê* gâ é lé, Grik đông gi, "Myiwe myhi ê" ga bo tô é nghut lhê.



yu ló byi keq." ga tái jáng, yhangmoq gi, yu ló byi akô nghut ri.

<sup>9</sup> Poî-up hpó gi, wuì mai dut é tsi-biyiq wing haù lé, shuq chyam wú ri; wuì hkam é dui-nhâng zoshâng wuì gi, tsibiyiq wing haù hkâmai lo é hkyô lé sê to kôlhang, yhang gi, a sé nghut ri. Haù mù, yhang gi, lusik lé, ji yù luì,

<sup>10</sup> "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuì jé shoq wó hkong tô ri-nhung!" ga tái ri.

<sup>11</sup> Galile mau mâ é Hkanaq wà mó má, Yesuq tân shit é limik kumlhá gi, Yhang kut é limik kumlhá pé mâ é sâng-hí dàm nghut ri. Yhang gi, Yhâng é hpungwup shingkang lé, haù đông lhoq htoq shit é nghut mù luì, Yhâng é chángzô pé gi, Yhang lé lumjíng bum akô nghut ri.

*Noqkuq Yhâm Lé Lhoq Sansêng Pyâm É Hkyô*

*Mht 21:12-13; Mrk 11:15-17; Luk 19:45-46*

<sup>12</sup> Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haù má buinyì myi ngò nyí nyi akô nghut ri.

<sup>13</sup> Yudaq byu pé é Lhoqlhai Poì jé râ nghut é hkûn, Yesuq gi, Yerusalem wà mó má doq ló ri.

<sup>14</sup> Haù hkûn, noqkuq yhâm wàng má, nojûng, sau, hpûngkyui pé lé ûng nyi é bang lé le, siboì má ngùn htaì zô zung nyi é bang lé le, Yhang ló myàng ri.

<sup>15</sup> Haù mù, Yhang gi, tui lé, nhuq râ wase saì yù mù, banshoq bang lé le, sau eq nojûng lé le, haù noqkuq yhâm wàng mai hkat htoq luì, ngùn htaì zo bâng é ngùn htingchap lé gi, tû hut pyám byi mù, yhangmoq é siboì lé gi, tu nhuq pyám byi ri;

<sup>16</sup> haù hpûngkyui ung zô é bang lé le, "Zè shi pé lé yu htoq ló keq! Ngá Wá é yhâm lé, hpugá jowò hkâkut kó!" ga luì nhik-yô ri.

☆ 2:17 Hkya-on 69:9

<sup>17</sup> Haù mù, Yhâng é chángzô pé gi, "Ngò, Náng é yhâm lé chytidap kâng tuí é hkyô gi, Ngo lé myi su nyhê jôm pyám râ nghut lhê."☆ ga kâ tô é lé, myit bûn kat akô nghut ri.

<sup>18</sup> Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, haì jung limik kumlhá wó tân shit râ lhú?" ga chôm myi akô nghut ri.

<sup>19</sup> Haù hkûn, Yesuq gi, "Noqkuq yhâm shí lé nungmoq hpyoq pyám keq, sum nyí gyoro má, Ngò, haù lé dum tu shap râ nghut lhê." ga, yhangmoq lé tû tái ri.

<sup>20</sup> Haù Yudaq byu pé gi, "Noqkuq yhâm shí lé, myi xe hkyuq zân tup saì é ru nghut lhê; sum nyí gyoro má za, Náng wó tu shap râ lhú?" ga tu myi akô nghut ri.

<sup>21</sup> Nghut kôlhang, Yesuq tái é noqkuq yhâm gi, Yhâng é gùng lé lhoq ang luì tái é nghut ri.

<sup>22</sup> Haù mù, Yhang, shi é mai lhoq dui toq huì é hkûn sheq, Yhâng é chángzô pé gi, Yhang haù su ga tái é dang lé myit bun kômù, Chyúmdang lé le, Yesuq tái é dang pé lé le, lumjíng akô nghut ri.

<sup>23</sup> Haù Lhoqlhai Poì nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjíng bum akô nghut ri.

<sup>24</sup> Nghut kôlhang, Yesuq gi, byù lhunglhâng bâng é myit lé sê é yanmai, yhangmoq chyáng, Yhânggùng lé a ap to nghut ri.

<sup>25</sup> Yhang gi, byu é i-myt unghkaù má haì lúng tô é lé sê é yanmai, byù yhangchang saksé hkám byi é a ra nghut ri.

### 3

*Nikodimu Lé, Yesuq Mhoqshit É Hkyô*

<sup>1</sup> Nikodimu gâ é Hparishe rayuq nyi ri; yhang gi, Yudaq byu pé é byin tú wapdoq má bo é sù nghut ri.

<sup>2</sup> Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

<sup>3</sup> Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

<sup>4</sup> Haú jáng, Nikodimu gi, "Ipyat kó bê é byù gi, dum hkú é hkâsu kut wó hui râ l hú? Ínû é unghkaû má dum wàng mù, dum hku é hui râ gi, gè gè yhang wó dut râ a nghut!" ga taí ri.

<sup>5</sup> Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut.

<sup>6</sup> Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

<sup>7</sup> 'Nungmoq gi, dum hku é hui râ lhê' nghû Ngò taí é dang lé, nàng hkâmaú nyí.

<sup>8</sup> Haú, lai gi, yhang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tû taí ri.

<sup>9</sup> Haú hkûn, Nikodimu gi, "Haú gi, hkâsu wó dut râ l hú?" ga myí ri.

<sup>10</sup> Yesuq tû taí é gi, "Nàng gi, Israe-laq byu pé é sará rayuq nghut to lui nhing, haú hkyô pé lé a sê gyo l hú?"

<sup>11</sup> Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

<sup>12</sup> Ngò gi, nungmoq lé, mingkan eq sêng é hkyô lé taí kyô le l háng, a lumjínng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjínng kó râ l hú?

<sup>13</sup> Mauhkûng mingdán mai gyó lo é sù, haú Byu Yhangzo mai lai lui, mauhkûng mingdán má ó yuq l háng wó doq ló wú é a nghut.

<sup>14</sup> Mosheq gi, yoso má lhangmùi lé tu shap tô é su, haú Byu Yhangzo le tu shap tô é hui ra râ nghut lhê.

<sup>15</sup> Haú mù, haú Byu Yhangzo lé lumjínng é yuq hkangmó gi, ahtum abyuq é asak wó yû râ nghut lhê.

<sup>16</sup> Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjínng é sù ó yuq nghut kôle, htên byoq é a huí e za, ahtum abyuq é asak wó yû sháng gaq ga, rayuq za é Yhâng é Zote lé byí pyám bê nghut ri.

<sup>17</sup> Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê.

<sup>18</sup> Yhang lé lumjínng é sù gi, mara byí é hui râ a nghut; nghut kôlhang, Yhang lé a lumjínng é sù kúm gi, Garai Gasâng é Yhangzo zote lé a lumjínng é sù nghut é yanmai, mara byí é huí to gù bê nghut ri.

<sup>19</sup> Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaí, mauchut lé chyit akô nghut ri; haú gi, mara byí é hui râ hkyô yhang nghut ri.

<sup>20</sup> Agè ashop hkyô kut é sù ó yuq nghut kôle, maubó lé a nguí nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut.

<sup>21</sup> Nghut kôlhang, haú tengmán hkyô dông asak dui é sù ó yuq le, yhumsing kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

*Yesuq Eq Séng Lui, Wui-myhup Sará Yohan Saksé Hkâm É Hkyô*

<sup>22</sup> Hau htâng má, Yesuq gi, Yhâng é chángzô pé eq rahá, Yuda mau shut

wang ló mù, haú má rayoq zo nyi luí, wui-myhup hkâm byí ri.

<sup>23</sup> Haú u lé, Yohan gi, Salim nàm má é E-nun gâ é jowò má, wui gyai myo joq é yanmai, wui-myhup hkâm byí nyi ri; byu pé gi, abyit alan lé lò kômù, wui-myhup lé hkâm yu nyi bum akò nghut ri.

<sup>24</sup> (Haú gi, Yohan lé htóng a lhoq hkyó shí é hkun lhê é hkyô nghut ri.)

<sup>25</sup> Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhùm bum akò nghut ri.

<sup>26</sup> Hau htâng, yhangmoq gi, Yohan chyáng lé luí, "Rabai é, Yodan làng hé hpoq shut nàng eq rahá nyi luí, nàng èq saksé hkâm byí é Sû gi, ahkuí, wui-myhup hkâm byí nyi é nghut mù, yuq hkangmó gi, Yhâng chyáng e bum akò nghut ri mhaí." ga, yhang lé taí akò.

<sup>27</sup> Haú eq séng luí, Yohan tû taí é gi, "Byù rayuq gi, mauhkûng mai byí é za a nghut jáng, haí le wó hap yù rá a nghut.

<sup>28</sup> 'Ngò gi, Hkrisduq a nghut, Yhang é hí má nhang kat huí é sù za nghut lhê.' nghû, ngò taí é lé, nungmoq yhang saksé nghut bum akò.

<sup>29</sup> Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyô gi, ngá é gabú hkyô nghut mù, ngò má byíng jup nyi bê nghut ri.

<sup>30</sup> Yhang gi, kô jat lò ra rá nghut lhê; ngò gi, yom ló ra rá nghut lhê.

<sup>31</sup> Ahtoq mai lé é Sû gi, lhunglhâng é ahtoq má nghut ri; myigùng htoq má é sù kúm gi, myigùng htoq eq séng é nghut luí, myigùng htoq eq séng é dông za taí ri; mauhkûng mai lé é Sû gi, lhunglháng é ahtoq má nghut ri.

<sup>32</sup> Yhang gi, wó myâng wó gyô é hkyô lé, saksé hkâm kôlhâng, Yhang hkâm é saksé lé, ó yuq le a hap yù kó nghut ri.

<sup>33</sup> Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê.

<sup>34</sup> Garai Gasâng èq nhang kat é hui Sû gi, Garai Gasâng é mungdang lé taí ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri.

<sup>35</sup> Haú Íwa gi, Zo lé chyitdap luí, jung hkangmó lé Yhâng é loq má ap byi bê nghut ri.

<sup>36</sup> Haú Zo lé lumjíng é sù ó yuq nghut kôle, ahtum abyuq é asak wó lhê; nghut kôlhâng, haú Zo lé he-ngik pyâm é sù ó yuq nghut kôle, asak haú lé myàng rá a nghut; hkâsu mù gâ le, Garai Gasâng é nhikmo-yo hkyó gi, yhâng chyáng ru joq nyi ri." gâ ri.

## 4

### *Yesuq Eq Samariq Myhí Huí É Hkyô*

<sup>1</sup> Yesuq gi, Yohan htoq má, chángzo je lhoq myô é eq wui-myhup hkâm byí nyi ri gâ é hkyô lé, haú Hparishe pé wó gyô akò nghut ri.

<sup>2</sup> (Nghut kôlhâng, gè gè ga jáng, Yesuq gi, Yhang wui-myhup hkâm byí é a nghut, Yhâng é chángzô pé sheq ru nghut akò.)

<sup>3</sup> Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.

<sup>4</sup> Ahkuí, Yesuq gi, Samariq mau mai sô laí ló rá dut bê nghut ri.

<sup>5</sup> Haú mù, Yhang gi, Yakup mai yhang zo Yosep lé byí é maumyí rajap eq chyâng lhùm é, Suhka ga myhíng é, Samariq mau má é wà mó ralhum má lo jé ri.

<sup>6</sup> Haú má, Yakup é wuhtung le joq to luí, Yesuq gi, hkyô sô núg é yanmai, wuhtung hau é nàm má zung gyô tô ri. Haú u gi, nyí-káng raxe í hkyíng\* nghut bê nghut ri.

<sup>7</sup> Haú hkûn, Samariq myiwe myhí rayuq wui lé hkam ri; Yesuq gi, yhang lé, "Ngo lé wui byi shuq laq." ga taí ri.

<sup>8</sup> (Haú u gi, Yhâng é chángzô pé, zoshuq wui rá matú wà hkaú shut e byuq kô é ahkyíng nghut ri.)

<sup>9</sup> Haú Samariq myiwe myhí gi, Yhang lé, "Nàng gi, Yudaq byù rayuq

\* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

nghut to lui nhing, ngo Samariq myiwe myhi chyang, hai mu shuq wui dung lhe lhu?" ga tai ri. (Hkasu mu ga le, Yudaq byu pe gi, Samariq byu pe eq a zum yap ko nghut ri.)

10 Hau hkun, Yesuq gi, yang le, "Nang gi, hau Garai Gasang e chyunghuq le le, nang le wui dung su o yuq nghut e le le, se e nghut le gi, noq mai Yang le dung tongban lui, Yang gi, nang le asak-wui byi berâ nghut lhe." ga tu tai ri.

11 Myiwe myhi hau gi, "Yhumsing e, Nang gi, wui hkam ra ze hai le a wo, wuihtung le nik ri; hau asak-wui le, Nang hkama e wo yu ra lhu?"

12 Ngamoq e iwa Yakup gi, ngamoq le wuihtung shi byi to be nghut lhe; yang yang le, yang zo pe le, yang rem e dusak pe le, wuihtung shi ma e wui shuq bekô nghut ri; Nang gi, Yakup htoq je ko lhe lhu?" ga Yang le tai ri.

13 Yesuq gi, "Wui shi le shuq e su o yuq le, wuishit e dum hui ra nghut lhe.

14 Nghut kolhang, Ngo byi e wui le shuq e su o yuq nghut kole, wuishit e hkâ-nham a hui lo ra nghut lhe. Ngo byi e wui hau gi, hau yuq ma, ahtum abyuq e asak matu wuibum dut ra nghut lhe." ga yang le tu tai ri.

15 Myiwe myhi hau gi, Yang le, "Yhumsing e, ngo gi, wui le a shit lo, shi ma wui hkam le a le ra lo shang gaq, wui hau ngo le byi laq." ga tai ri.

16 Hau hkun, Yesuq gi, "Lo mu, nung lang le lo wut lo aq." ga, yang le tai ri.

17 Yang gi, "Ngo, lang a wo." ga tai jang, Yesuq gi, yang le, "Nang, lang a wo ga e gi, teng ri.

18 Hkasu mu ga le, nang gi, yuqge ngo yuq wo wu be su nghut ri; nang, ahku wu to e yuqge le nung lang a nghut. Nang gi, teng e dang tai be nghut ri." ga tai ri.

19 Hau hkun, myiwe myhi hau gi, "Yhumsing e, Nang gi, myiqhtoi rayuq nghut e hkyo le, ngo wu se be.

20 Ngamoq e ichyi iwa pe gi, bum shi ma noqkuq ko e nghut lhe; nghut kolhang, nungmoq Yudaq byu pe gi, Yerusalem wa mo za noqkuq jowo nghut lhe ga tai akô nghut ri." ga tai ri.

21 Hau hkun, Yesuq tai e gi, "Myiwe myhi e, Ngo le jing aq; bum shi ma le a nghut, Yerusalem wa mo ma le a nghut e za, hau Iwa le noqkuq ra ahkying, je lo nyi be nghut ri.

22 Nungmoq Samariq byu pe gi, yhumsing lhang a se e le, noqkuq akô; ngamoq kum gi, ngamoq se e le noqkuq lhe; hkasu mu ga le, hkyi yu hkyo gi, Yudaq amyû mai lo e nghut lhe.<sup>†</sup>

23 Nghut kolhang, hau teng e dong noqkuq e bang gi, woi-nyi mai le, tengman hkyo mai le, hau Iwa le noqkuq ra ahkying gi, je lo nyi be nghut lui, ahku lhang je to be nghut ri; hkasu mu ga le, hau Iwa gi, hau su kut noqkuq e bang le o nau ri.

24 Garai Gasang gi, woi-nyi nghut lhe; hau mu, Yang le noqkuq e bang gi, woi-nyi mai le, tengman hkyo mai le, noqkuq ra ra nghut lhe." ga tai ri.

25 Myiwe myhi hau gi, "Hkrisduq ga e Mesaia je le ra nghut e le gi, ngo se lhe. Yang je le jang, nga-nhung le banshoq tai san kyo ra nghut lhe." ga tai ri.

26 Hau htang, Yesuq gi, "Nang eq dang nyo nyi e su ngo gi, hau yuq nghut lhe." ga tai ri.

### *Hau Changzo Pe Dum Tau Je Lo E Hkun Lhe Hkyo*

27 Hau u le, Yhang e changzo pe gi, dum tau je lo bum akô; yangmoq gi, Yesuq, myiwe rayuq eq dang nyo nyi e le lo myang lui, mau byuq bum akô. Nghut kolhang, "Nang, hai o ri lhu?" ga le, "Hai mu Yang eq dang nyo nyi lhe lhu?" ga le, Yang le o yuq a myi ko nghut ri.

28 Hau htang, myiwe myhi hau gi, yhang e wui yambu le to pyam to lui,

<sup>†</sup> 4:22 Bun zo shi ma, Yesuq tai nau e gi, hkyi yu hkyo le, Garai Gasang gi, Yudaq byu pe dong danggidiq byi to e nghut e le tai nau e nghut ri.

wà shut taû wang ló mù, wà byù wuì lé ló taî kyô é gi,

<sup>29</sup> "Ngò kut lai lò bê hkyô pé lunglhang lé, taî kyô é byù rayuq lé, lé wú keq! Yhang gi, Hkrisduq nghut lhê abe?" gâ ri.

<sup>30</sup> Haû mù, yhangmoq gi, wà mai htoq lé luì, Yesuq chyáng lé lo bum akô nghut ri.

<sup>31</sup> Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taî akô.

<sup>32</sup> Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taî ri.

<sup>33</sup> Haû mù, Yhâng é chángzô pé gi, "Yhang lé, rayuq yuq èq zoshuq lé dé byî é abe?" ga, rayuq eq rayuq taî lhûm bum akô.

<sup>34</sup> Haú hkûn, Yesuq taî é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

<sup>35</sup> 'Kyôshu yoq jé râ gi, lhamó myi hkyap râ ashî.' ga, nungmoq lhaq taî lhê a nghut kó lhu? Ngò, nungmoq lé taî kôlé, nungmoq é myoq hpóng luì, haú yò pé má wú kat wú keq! Kyôshi gi, myhíng luì, kyô shu yoq gi, jé to bê nghut ri.

<sup>36</sup> Haú kyô hkyó sù eq kyô shu sù gi, rahá wó gabú kó sháng gaq ga, ahkuì lhang, haú kyô shu sù gi, yhang é zuihpau lé myang yù luì, ahtum abyuq é asak é matú, kyôshi shù tsíng to bê nghut ri.

<sup>37</sup> Haú su mù, 'Rayuq gi, sân hkyó, góyuq gi, shù yù.' gâ é sanghkyang gi, têng ri.

<sup>38</sup> Nungmoq a zui saî tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saî to bê nghut mù, nungmoq gi, haú bang zui saî é akyû lé shu yù bekô nghut ri." gâ ri.

### *Samariq Byù Myo Myo Lumjínq Kô É Hkyô*

<sup>39</sup> "Yhang gi, ngò kut lai lò bê hkyô lunglhang lé, taî kyô ri." ga luì, myiwe myhí haú saksé hkâm é yanmai, haú wâ mâ é Samariq byù

myo myo gi, Yesuq lé lumjínq bùm bekô nghut ri.

<sup>40</sup> Haú mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyi bo nyi bê nghut ri.

<sup>41</sup> Yhâng é dang pê é yanmai, byù myo myo gi, lumjínq bang dut jat lò bekô nghut ri.

<sup>42</sup> Yhangmoq gi, myiwe myhí haú lé, "Ahkuì, ngamoq lumjínq é gi, nàng taî é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chôm taî akô nghut ri.

### *Mingsuwún Hpó É Yhangzo Lé Lhoq Gê Byî É Hkyô*

*Mht 8:5-13; Luk 7:1-10*

<sup>43</sup> Í nyi lai jáng, Yesuq gi, haú mai Galile mau shut htoq e ló bê nghut ri.

<sup>44</sup> "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê.

<sup>45</sup> Yesuq gi, Galile mau má jé é hkûn, Galile byu pé gi, Yhang lé lhom hku-lum yu akô; yhangmoq gi, Yerusalem wà mó má, Lhoqlhai Poî ê lóm kô é nghut é yanmai, poî u lé, Yesuq kut é hkyô lunglhang lé, myàng kô é bang nghut ri.

<sup>46</sup> Yesuq gi, Yhang mai haú wuì lé tsibiyiq wíng dut nhang é, Galile mau mâ é Hkanaq wà mó má, ê dum kûm ri. Haú ming suwún rayuq é yhangzo yuqzo gi, Kaperna-um wà má no nyi ri.

<sup>47</sup> Yesuq gi, Yuda mau mai Galile mau má jé lé bê gâ é hkyô lé, ming suwún haú wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi râ matú, Yhang lé dúng tóngbán ri.

<sup>48</sup> Haú hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjínq kó râ a nghut." ga taî ri.

<sup>49</sup> Mingsuwún haú gi, "Yhumsîng ê, ngá zo a shî shimá gyó lé laq." ga taí ri.

<sup>50</sup> Haú hkûn, Yesuq gi, "Nàng wó ló bê; nung zo byùn râ nghut lhê." ga tú taí ri.

Suwún haú gi, Yesuq taí é dang haú lé gyô jîng luí, tau ló bê nghut ri.

<sup>51</sup> Yhang gi, hkyô má ru nghut nyi ashî hkûn, yhang é dui-nhâng zoshâng wuì gi, yhang lé lé hui luí, zoshâng haú gè byuq é hkyô, lé taí kyô akô nghut ri.

<sup>52</sup> Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é chám ló byuq bê nghut ri." ga taí kyô akô.

<sup>53</sup> Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haú yhangwa bûn sé bê nghut ri. Haú mù, yhang eq yhang yhumbyù banshoq bang gi, lumjîng bekô nghut ri.

<sup>54</sup> Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

## 5

### *Wuìhtum Yàm Má, Nòhpyo Lhoq Gê Byî É Hkyô*

<sup>1</sup> Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri.

<sup>2</sup> Ahkuí, haú Yerusalem wà mó é Sau Hkúmdong nàm má, Hebre myíng dông gi, Betzahta ga myhîng é wuìhtum ralhum joq ri; hau é lhîngkhyuq má, jìrop ngo lhum joq tô ri.

<sup>3</sup> Jìrop haú pé má, myoqjit bang, hkyî hten bang, gùngjum shî bang ajùm ayò leq tô bum akô. (Hau bang gi, wuì dui nún râ lé láng tô é bang nghut akô.

<sup>4</sup> Hkâsu mù gà le, haú Yhumsîng é maumang lagyo gyó lé lé kut mù, wuì lé, lé lhu nhún jáng, wuìhtum haú má hí wó wang é sù gi, haí jung ana

wa dap to kôlhang, ge byuq é huí é yanmai nghut ri.)\*

<sup>5</sup> Súm xe shit zân tup no nyi é byù rayuq le, haú má bo tô ri.

<sup>6</sup> Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lú?" ga myí ri.

<sup>7</sup> Nò sù haú yuq gi, "Yhumsîng ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tú taí ri.

<sup>8</sup> Hau htâng, Yesuq gi, yhang lé, "Toq aq! Nàng é taphkang yu chûng luí, sô ló aq." ga taí ri.

<sup>9</sup> Haú yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

Haú nyí gi, Bánno buinyì nghut ri.

<sup>10</sup> Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

<sup>11</sup> Nghut kôlhang, yhang tú taí é gi, "Haú ngo lé lhoq gê byi sù gi, ngo lé, 'Nàng é taphkang yu chûng mù, sô ló aq.' ga taí é nghut lhê." gâ ri.

<sup>12</sup> Haú mù, yhangmoq gi, "'Nàng é taphkang yu chûng mù sô ló aq.' ga, nang lé taí é sù gi, ó yuq wá nghut ri lú?" ga myí akô.

<sup>13</sup> Nghut kôlhang, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gà le, Yesuq gi, haú má é byù moq mó má wang nyó ló byuq é yanmai nghut ri.

<sup>14</sup> Htâng má, Yesuq gi, haú yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri.

<sup>15</sup> Haú yuq gi, htoq ló mù, yhang lé lhoq gê byi é sù gi, Yesuq nghut ri ga, Yudaq byu pé lé taí kyô ri.

\* 5:4 Bun zo 3 lhum mâ é ahtang túm eq bun zo 4 lhum gi, chyúmding myo myo má a bo é nghut lhê.

### *Asak Wó Yú Râ Hkyô*

16 Haú mù, Yudaq byu pé gi, Bánno buinyì nyí má, Yesuq, haú hkyô kut é yanmai, Yhang lé gunjang lo akô nghut ri.

17 Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mú zuí nyi é nghut mù, Ngò le mú zuí nyi lhê." ga taí ri.

18 Haú mù luí, Yesuq gi, Bánno buinyì lé lhoq htên é htoq agó, Garai Gasang lé lhang, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

19 Yesuq, yhangmoq lé tû taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê.

20 Hkâsu mù gâ le, haú Íwa gi, Zo lé chyitdap é nghut luí, Yhang kut é hkyô lhungháng, haú Zo lé tûn shit ri; nungmoq máu hông shoq, shí pé htoq je ko é hkyô pé lé lhang, haú Zo lé tûn shit shirâ nghut lhê.

21 Haú Íwa gi, shí bê bang lé lhoq dui toq mù, yhangmoq lé asak byí é eq rajung za, haú Zo le, Yhang byí nau é bang lé, asak byi râ nghut lhê.

22 Hau htoq agó, haú Íwa lé hkunggâ é eq rajung za, haú Zo lé le, lhunghâng bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhungháng, haú Zo lé lum to bê nghut ri.

23 Haú Zo lé a hkunggâ é sù gi, haú Yhang lé nhang kat é sù Íwa lé le, a hkunggâ é sù nghut ri.

24 Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjínng é sù, ó yuq nghut kôlé, mara byí é a hui e za, ahtum abyuq é

asak wó é nghut lhê; haú yuq gi, shi é mai lut luí, asak duí bê sù nghut ri.

25 Ngò, nungmoq lé teng za taí kôlé, haú Garai Gasâng é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lhang jé to bê nghut ri. Htê haú lé gyô é bang gi, asak duí kó râ nghut lhê.

26 Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri.

27 Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

28 Shí hkyô lé hkâ-má hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ ahkyíng jé lò râ nghut lhê.

29 Ge é hkyô kut é bang gi, asak duí râ matú, dui toq kó râ nghut lhê; agè ashop hkyô kut é bang gi, mara byí é hui zo râ matú, dui toq kó râ nghut lhê.

30 Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sù ô nau é dông châng é sheq ru nghut lhê.

### *Yesuq Eq Séng Luí, Saksé Hkâm É Hkyô*

31 Ngá gùng lé ngò saksé hkâm é nghut jáng, ngò za saksé hkâm é hkyô gi, teng râ a nghut.

32 Ngá é hkyô lé saksé hkâm byí é Sù (Ngá Wa) góyuq nyi lhê; Ngò eq séng luí, haú yuq hkâm é saksé gi, têng é hkyô lé, Ngò sê lhê.

33 Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê.

34 Ngò gi, xângzo byu pé mai saksé hkâm byi râ lé, ra luí a nghut, nghut

† 5:33 Yohan shí yuq gi, Wui-myhup Sará Yohan nghut lhê.

kôlhang, nungmoq hkyi yu é wó hui rá matú sheq, haû su nghû taí é ru nghut lhê.

<sup>35</sup> Yohan gi, duq nyi é myibung su duqbó byí é nghut mù luí, nungmoq gi, haû duqbó é hkaû má, rayoq zo ngón nau nyi akô nghut ri.

<sup>36</sup> Nghut kôlhang, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán rá matú, haû Íwa, Ngo lé ap byí tô é nghut luí, haû Íwa, Ngo lé nhang kat é hkyô lé, saksé hkám byí nyi ri.

<sup>37</sup> Hau htoq agó, haû Ngo lé nhang kat é sù Íwa le, Ngò eq séng luí saksé hkám byí ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó;

<sup>38</sup> haû Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sù lé a lumjíng kô é yanmai nghut ri.

<sup>39</sup> Nungmoq gi, haû Chyúmdang mai ahtum abyuq é asak wó yû rá nghut lhê ga myit yû kô é yanmai, haû Chyúmdang má ho wú akô nghut ri; nghut kôlhang, Chyúmdang haû gi, Ngò eq séng luí saksé hkám byí ri;

<sup>40</sup> nghut kôlhang, asak wó yû rá matú, nungmoq gi, Ngá chyáng a kâm lé kó nghut ri.

<sup>41</sup> Ngò gi, byu èq hkya-ôn é lé a lhom yu é nghut lhê.

<sup>42</sup> Nghut kôlhang, nungmoq lé gi, Ngò sê lhê; nungmoq é i-myit hkaû má, Garai Gasang lé chyitdap é myit a bò kó nghut ri.

<sup>43</sup> Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yû kó; yhâng myìng yhang lang é byù, gotû rayuq jé lé é ru nghut le gi, haû yuq lé, nungmoq lhom hap yû kó rá nghut lhê.

<sup>44</sup> Nungmoq gi, rayuq eq rayuq hkya-ôn lhúm é lé za hap yû luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é

bang nhîng, hkâsu kut wó lumjíng kó rá lhú?

<sup>45</sup> Nghut kôlhang, haû Íwâ é hí má, Ngò, nungmoq lé mara hûn nhô hkângâm kó; nungmoq lé mara hun é sù gi, haû nungmoq mai myit myoqbyu tô é Mosheq ru nghut lhê.

<sup>46</sup> Mosheq lé nungmoq gè gè yhang lumjíng kô é ru nghut le gi, Ngo lé le lumjíng kó rá nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

<sup>47</sup> Nghut kôlhang, nungmoq gi, yhang kâ tô é pé lé lháng a lumjíng kô é nhîng, Ngá dang lé, hkâsu kut wó lumjíng kó rá lhú?" gâ ri.

## 6

*Byù Ngo Hkyîng Lé Zoshuq Byi Tsô É Hkyô*

*Mht 14:13-21; Mrk 6:30-44; Luk 9:10-17*

<sup>1</sup> Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri.

<sup>2</sup> Haú hkûn, byù ajùm ayò gi, haû nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri.

<sup>3</sup> Yesuq gi, bùm shut doq ló mù, Yhâng é chángzô pé eq rahá zung tô ri.

<sup>4</sup> Yudaq byu pê é Lhoqlhai Poí gi, chyâng lo nyi bê nghut ri.

<sup>5</sup> Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo rá muk, nga-nhúng, hkâmá é wó wuí rá lhú?" ga taí ri.

<sup>6</sup> Yesuq, haû su ga taí é gi, yhang lé chyam wú rá matú za nghut ri; hkâsu mù gâ le, hkâsu kut rá hkyô gi, Yhâng é myit má bo to gù bê nghut ri.

<sup>7</sup> Hpilip gi, Yhang lé, "Denari\* í sho èq muk wui le lháng, rayuq ratsuí tsuí ngap rá a nghut." ga tú taí ri.

<sup>8</sup> Haú hkûn, Yhâng é chángzo nghut é, Simun Petruq é yhanggu Andre gi, Yhang lé,

\* **6:7** Denari rachap gi, byù rayuq é ra-nyí é zuihpau eq wuí é nghut lhê.



9 "Muk-yo muk ngo long eq ngozo í du wó é yuqgè zo rayuq, shî má nyi ri; nghut kôlhang, byù shî myhò bang lé luq shoq, hkâsu kut wó gâm byi râ lhú?" ga taí htoq kat ri.

10 Yesuq gi, "Haù shiwa byu pé lé, zùng nhâng keq." ga taí ri. Jowò haù gi, mhán htu é jang nghut mù, yuqgè wuì baú lhang, ngo hkyîng kô zung tô bùm bekô nghut ri;

11 hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gâm byi ri. Haù eq rajung za, ngozo lé le haù su kut ri.

12 Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haí le a langsâ pyám sháng gaq." ga taí ri.

13 Haù mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe í mung bying shoq wó guq tsing yu akô nghut ri.

14 Haù shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut rinhung!" ga taí bum akô.

15 Yesuq gi, yhangmoq lé mù, Yhang lé hkohkâm zik kut nhâng kó râ dá é hkyô lé, sê é yanmai, Yhang baú tsik za bùm shut dum haq doq lô bê nghut ri.

#### *Yesuq, Wuì Htoq Má Sô É Hkyô*

*Mht 14:22-27; Mrk 6:45-52*

16 Buigyum htâng, Yhâng é chángzô pé gi, haù nhông shut gyó lô mù,

17 lhaí má wang ji luí, nhông hé hpoq mâ é Kaperna-um wà shut gû e lô akô; haù hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri.

18 Haù u lé, laidun htan lo é yanmai, wuìlhêng toq lô bê nghut ri.

19 Yhangmoq gi, sum myi déng kô lhaí kôn e lô kô é hkûn, Yesuq gi, nhông htoq má so luí, haù lhaí shut chyâng lé lo nyi é lé myàng kômù, gyuq dan bùm bekô nghut ri.

20 Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri.

21 Haù mù, yhangmoq gi, Yesuq lé gabú myit eq lhaí hkaù má shuì hâng yù nau akô. Haù hkûn, lhaí haù gi, radá dâm yhangmoq jé nau é jang wuiyàm má jé bê nghut ri.

22 Nhông hé hpoq má nyi tô é byù moq mó gi, haù má lhaí racham za joq lai lo é hkyô eq, lhaí haù má Yesuq a bo doq jí e za, chángzô pé baú ji htoq lô kô é hkyô lé, hau htang nyí, bûn sê kat akô nghut ri.

23 Haù hkûn, haù Yhumsing, jeju hkya-on é htâng, byu pé muk zô é jowò nàm má, Tiberi myuq mâ é lhaí pé jé lé bum ri.

24 Haù byù moq mó gi, Yesuq eq Yhâng é chángzô pé, haù má a nyi lo kô é hkyô lé sé kô é yanmai, Yesuq lé châng hô râ matú lhaí haù pé má wang ji mù, Kaperna-um wà shut e lô akô nghut ri.

#### *Yesuq, Asak Muk Nghut É Hkyô*

25 Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shî má hkâ-nhám jé lé é lhú?" ga, Yhang lé myí akô.

26 Haù hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

27 Htên byuq sê é zoshuq é matú, hkâshikut kó; haù Byu Yhangzo byi râ nghut é ahtum abyuq é asak é matú, ru gíng nyi é zoshuq wó yù râ lé sheq shikut nyi keq. Yhâng chyáng gi, haù Íwa Garai Gasang mai Yhâng é saksé dizik tap to bê nghut lhê." ga tû taí ri.

28 Haù mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhú?" ga Yhang lé myí akô.

29 Haù hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bé." ga tû taí ri.

30 Haû mù luî, yhangmoq gi, Yhang lé, "Ngamoq myoq èq wó myâng luî, Nàng lé lumjîng râ matú, Nàng, haí jung limik kumlhá kut shit râ lhú? Nàng, haí jung kut shit râ lhú?"

31 Haû Chyúmdang má, 'Yhang gi, yhangmoq zo râ matú, mauhkûng mai muk byî ri. '✧ ga kê tô é eq rajung za, ngamoq é îchyí îwa pé gi, haû yoso hkaû má mannaq muk zo bekô nghut lhê." ga taí akô.

32 Haû hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haû Ngá Wa sheq, nungmoq lé mauhkûng mai tengmán é muk byî é Sû ru nghut lhê.

33 Hkâsu mù gâ le, Garai Gasang byî é muk gi, mauhkûng mai gyó lé luî, haû mingkan lé asak byî é Sû nghut lhê." ga taí ri.

34 Yhangmoq gi, "Yhumsîng ê, ahkuî mai, ngamoq lé muk haû hkâ-nhám le byî nyî laq." ga chôm taí bum akô.

35 Haû mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjîng é sù le, hkâ-nhám le wuîshit é hui râ a nghut.

36 Nghut kôlhâng, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhâng, a lumjîng shi kó nghut ri.

37 Haû Îwa mai Ngo lé ap byî tô é byù lhunglhâng bang gi, Ngá chyáng lé kó râ nghut luî, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut.

38 Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê.

39 Haû Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhâng, Ngò, a lhoq hpyuq pyâm e za, jìhtûm buinyì má yhangmoq lé dum lhoq dui toq yû râ matú ru nghut lhê.

40 Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjîng é sù yuq hkangmó, ahtum abyuq é asak lé wó yû râ matú nghut lhê; Ngò le, jìhtûm buinyì má haû bang lé lhoq dui toq râ nghut lhê." gâ ri.

41 Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luî, Yudaq byu pé taí put kô é gi,

42 "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhú? Haû sù é nhîng, ahkuî, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhú?" gâ bum akô.

43 Haû hkûn, Yesuq gi, "Nungmoq ahkaû má hkâtaí put nyî kó.

44 Haû Ngo lé nhang kat é sù Îwa mai shuî jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jìhtûm buinyì má, Ngò lhoq dui toq râ nghut lhê.

45 Myiqhtoi laiká pé má, 'Yhangmoq lhunglhâng bang gi, Garai Gasâng èq mhoq byî é hui kó râ nghut lhê. '✧ ga kê tô é eq rajung za, haû Îwa chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê.

46 Haû gi, rayuq yuq mai, haû Îwa lé myang wú bê nghû nau é a nghut; Garai Gasâng chyáng mâ é Sû za sheq, haû Îwa lé myang wú é Sû nghut lhê.

47 Ngò, nungmoq lé teng za taí kôlé, lumjîng é sù gi, ahtum abyuq é asak wó lhê.

48 Ngò gi, asak muk nghut lhê.

49 Nungmoq é îchyí îwa pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri.

50 Nghut kôlhâng, shî gi, mauhkûng mai gyó lé lo é muk nghut lhê; haû lé zô é sù gi, a shî lo râ nghut lhê.

51 Ngò gi, mauhkûng mai gyó lé lo é, haû asak dui é muk nghut lhê; rayuq yuq, muk shî lé zô é nghut

le gi, ahtum abyuq dui nyi râ nghut lhê; muk shî gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

<sup>52</sup> Haû mù, haû Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htíng htíng lhùm bum akô.

<sup>53</sup> Haú hkûn, Yesuq gi, yhangmoq lé, "Ngò, nungmoq lé teng za taí kôlé, haû Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut.

<sup>54</sup> Ngá é gungsho lé zô é eq Ngá é sui lé shuq é sù, ó yuq nghut kôlé, ahtum abyuq é asak wó é nghut lhê; Ngò gi, jhtûm buinyi má, haú yuq lé lhoq dui toq yû râ nghut lhê.

<sup>55</sup> Hkâsu mù gâ le, Ngá é gungsho gi, zojung yhang nghut lhê; Ngá é sui gi, shujung yhang nghut lhê.

<sup>56</sup> Ngá é gungsho lé zô é eq Ngá é sui shuq é sù, ó yuq nghut kôlé, Ngò má nghut nyi luí, Ngò le haú yuq má nghut nyi bê nghut lhê.

<sup>57</sup> Haû rû dui nyi é Îwa gi, Ngo lé nhang kat luí, Ngò gi, haû Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê.

<sup>58</sup> Shî gi, mauhkûng mai gyó lé lo é muk nghut lhê. Nungmoq é íchyí îwâ pé gi, mannaq muk zo kôlé, shi byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lhê." ga taí ri.

<sup>59</sup> Dang haú pé gi, Yesuq, Kapernaum wà mà é tarajong má mhoqshit nyi é u lé, taí é dang nghut ri.

### *Chángzô Pé Myo Myo, Yesuq Lé Kâng Pyâm To Kô É Hkyô*

<sup>60</sup> Yhâng é chángzô pé myo myo gi, haû lé wó gyo kôjáng, "Dang shî gi, gyai wuî ri. Ó yuq wá wó cháng râ lhú?" ga taí bum akô.

<sup>61</sup> Yesuq gi, haû eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé,

"Dang shi é yanmai, nungmoq myit htên bum akô lhú?

<sup>62</sup> Haû Byu Yhangzo gi, Yhang nyi laí lò bê jowò shut taû doq ló é lé, nungmoq myàng kô é nghut le gi, hkâsu nghu kó râ lhú?

<sup>63</sup> Haû Woi-nyí gi, asak byi lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê.

<sup>64</sup> Nghut kôlé, nungmoq chyáng mâ é ra-am gi, a lumjúng kó nghut ri." ga taí ri. Hkâsu mù gâ le, ô pé gi, a lumjúng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri.

<sup>65</sup> Yhang xoq taí é gi, "Haû su mù, haû Îwâ èq ahkáng byi é sù za a nghut le gi, ó yuq le Ngá chyáng wó lé râ a nghut nghu, Ngò, nungmoq lé taí kyo wú bê nghut lhê." gâ ri.

<sup>66</sup> Haú dâm mai, Yhâng é chángzô pé myo myo gi, Yhâng htâng a cháng lo kô e za, taû ló byuq bùm bekô nghut ri.

<sup>67</sup> Haû su mù, Yesuq gi, haû chángzo raxe í yuq lé, "Nungmoq le, ló byuq nau akô, a nghut lhú?" ga myi ri.

<sup>68</sup> Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sû nghut to bê lé nhîng, ngamoq gi, ó yuq chyáng é shirâ lhú?

<sup>69</sup> Nàng gi, Garai Gasâng é Chyoiyúng Sû nghut é lé, ngamoq, lumjúng lhê, sê nyi lhê." ga, Yhang lé tû taí ri.

<sup>70</sup> Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôlé, nungmoq mâ é rayuq gi, nat nghut ri." ga tû taí ri.

<sup>71</sup> (Yhang gi, haû Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôlé, htâng má, Yhang lé ap pyám râ sù nghut ri.)

## 7

### *Yesuq Eq Yhâng É Gumang Wui*

<sup>1</sup> Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô

wún mù, Galile mau má sô lhing wún ri.

<sup>2</sup> Nghut kôlhang, haû Yudaq byu pé é Saksé Zúm Poî chyâng lo nyí é hkûn,

<sup>3</sup> Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklai kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq.

<sup>4</sup> Myìng hu nau é sù gi, hkaû zaú luí haí le a kut wú é nghut lhê. Nàng gi, haú pé lé kut nyí bê nghut é yanmai, mingkan lé, Náng gûng tân shit aq." ga taí akô.

<sup>5</sup> Hkâsu mù gâ le, yhanggu sîng yuqzô pé lhang, Yhang lé a lumjîng kó nghut ri.

<sup>6</sup> Haû mù luí, Yesuq gi, yhangmoq lé, "Ngá é ahkyîng gi, a jé shi nghut ri; nungmoq é ahkyîng kúm gi, hká hkûn le joq nyi ri.

<sup>7</sup> Haû mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haí mù gâ le, yhang kut é hkyô gi, agè ashop é nghut é lé, Ngò, saksé tân shit é yanmai nghut ri.

<sup>8</sup> Nungmoq gi, poî haú shut doq ló keq. Ngò kúm gi, Ngá é ahkyîng a jé shi nghut é yanmai, poî haú shut a doq ló shirâ nghut lhê." ga taí ri.

<sup>9</sup> Haû su ga taí luí, Yhang gi, Galile mau má nyi gyó to bê nghut ri.

<sup>10</sup> Nghut kôlhang, Yhang gu pé, haû poî shut doq ló byuq é htâng má, Yhang gi, de de a nghut é dông, tsik za châng doq ló bê nghut ri.

<sup>11</sup> Yudaq byu pé gi, haû poî má, Yhang lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

<sup>12</sup> Haû byù hpûng hkaû má, Yhang eq séng luí taí lhùm bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuí nghoq sù nghut ri." ga tú taí akô.

<sup>13</sup> Nghut kôlhang, haû Yudaq suwún wuí lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

*Haû Poî Má, Yesuq Mhoqshit É Hkyô*

<sup>14</sup> Haû poî rawuí nghut ló é hkûn, Yesuq gi, noqkuq yhùm má doq é luí, mhoqshit hi ló bê nghut ri.

<sup>15</sup> Haú hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haû-í hkâsu mù sê lhê laq?" ga myi bum akô.

<sup>16</sup> Haû mù, Yesuq tú taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

<sup>17</sup> Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng mâ é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yû râ nghut lhê.

<sup>18</sup> Yhumsing é myit dông taí é sù gi, yhumsing é matú aróng hô sù nghut ri; nghut kôlhang, yhumsîng lé nhang kat su é matú, aróng ho é sù gi, tengmán é byù nghut ri; yhang má, a tengmán é hkyô haí le a bò nghut ri.

<sup>19</sup> Mosheq gi, nungmoq lé jep é tarâ byí to bê, a nghut kó lhú? Nghut kôlhang, nungmoq ó yuq le, jep é tarâ haú lé a châng kó nghut ri. Haí mù luí, Ngo lé sat nau nyi akô lhú?" gâ ri.

<sup>20</sup> Haú hkûn, haû byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tú taí akô.

<sup>21</sup> Yesuq gi, yhangmoq lé, "Ngò, laklai kumlhá ralhum kut jáng, nungmoq banshoq bang gi, maú byuq bum akô.

<sup>22</sup> Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, îchyí îwâ pé chyáng mai lo é ru nghut lhê.).

<sup>23</sup> Haû, Mosheq é jep é tarâ lé a lhoq htên pyám sháng gaq nghú, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byù rayuq é gùng

gón lé, Ngò lhoq gê byi é yanmai, Ngo lé nhikjum yô akô lhú?

<sup>24</sup> Byù du lé wú luí hkâjéyáng kó; tengmán é dông sheq jéyáng keq." ga taí ri.

*Yesuq Gi, Hkrisduq Nghut Lhê Lhú?*

<sup>25</sup> Haù mù luí, Yerusalem wà mó má é byu pé ra-am gi, "Haù yhangmoq sat pyám nau nyi é sù gi, shí yuq a nghut lhi?

<sup>26</sup> Yhang gi, shí má de de dâng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lhê ga, haù ahkáng ayá wó bang gi, gè gè yhang, sê akô abe?

<sup>27</sup> Haù Hkrisduq jé lé é hkûn gi, Yhang hkâmai lé lo é lé, ó yuq lhang sé rà a nghut." ga taí bum akô. Nghut kôlhang, shí yuq gi, hkâmâ é sù nghut é lé, nga-nhung sê lhê;

<sup>28</sup> Haù mù, Yesuq gi, noqkuq yhûm wàng má mhoqshit uchyang, htê mó eq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lè le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang,

<sup>29</sup> Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

<sup>30</sup> Haù mù, yhangmoq gi, Yhang lé chyup rà dà akô; nghut kôlhang, Yhâng é ahkýng a jé shi é yanmai, Yhang lé chyup rà matú, ó yuq le loq a jé kó nghut ri.

<sup>31</sup> Nghut kôlhang, byù hpûng hkaù má é bang myo myo gi, Yhang lé lumjíng bûm kôluí, "Haù Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit rà lhú?" ga taí bum akô nghut ri.

<sup>32</sup> Haù Hparishe pé gi, haù byù hpûng hkaù má, Yesuq eq sêng é hkyô lé, haù su ga dangsoq soq lhûm nyi kô é hkyô lé wó gyô yu akô. Haù mù, haù hkyangjong agyi pé eq Hparishe pé

gi, Yhang lé é chyup rà matú, noqkuq yhûm zúng é bang lé nhang kat akô.

<sup>33</sup> Haù hkûn, Yesuq gi, "Ngò gi, nungmoq eq rahá rayoq zo za nyi rà nghut lhê; hau htâng, Ngo lé nhang kat Su chyáng taù ló rà nghut lhê.

<sup>34</sup> Haù hkûn, nungmoq gi, Ngo lé hô kôlhang, myang hô kó rà a nghut; Ngò nyi é jang má, nungmoq wó jé kó rà a nghut." ga taí ri.

<sup>35</sup> Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhung a myang hô loshoq, hká shut e byuq rà dà lhê lhú? Yhang gi, Grik byu pé má nyi byo myín tô é nga-nhung é byu pé nyi é jowò má ê mù, Grik byu pé lé, ê mhoqshit rà dà lhê lhú?

<sup>36</sup> 'Nungmoq gi, Ngo lé hô kôlhang, myang hô kó rà a nghut.' gâ é eq, 'Ngò nyi é jang má, nungmoq wó jé kó rà a nghut.' gâ é, Yhang taí é dang gi, haí jung wá gá naù é nghut lhê lhú?" gâ akô.

<sup>37</sup> Haù lô htâng é eq je ahkyak é Poí buinyi má, Yesuq toq yap luí, htê mó eq taí é gi, "Wuì shit sù gi, Ngá chyáng lé mù, shuq sháng gaq.

<sup>38</sup> Ngo lé lumjíng é sù ó yuq nghut kôle, haù Chyúmdang má taí tô é eq rajung za, 'Yhâng chyáng mai asak uchyâm é wuilàng yui htoq lô rà nghut lhê.'" gâ ri.

<sup>39</sup> Yhang haù su gâ é gi, Yhang lé lumjíng é bang myang hap yù rà nghut é, haù Woi-nyí lé taí é nghut ri. Haù hkûn jé shoq, haù Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hù é a hui nhâng shi é yanmai nghut ri.

<sup>40</sup> Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haù nghut ri." ga taí akô.

<sup>41</sup> Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé rà nghut lhê lhú?

<sup>42</sup> Haù Chyúmdang má, Hkrisduq gi, Dawiq é awut ashín má é nghut luí, Dawiq nyi laí lo é Betlehem wà mai

htoq ló râ nghut lhê gâ é, a nghut lhú?" ga myî bum akô nghut ri.

<sup>43</sup> Haû mù luî, Yesuq é yanmai, shiwa byu pé gi, gàm hkoq lò byuq bekô nghut ri.

<sup>44</sup> Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

### *Yudaq Byu Pé Lé Shuî U É Bang A Lumjîng Kô É Hkyô*

<sup>45</sup> Hau htâng má, haû noqkuq yhûm zúng bang gi, haû hkyangjong agyi pé eq Hparishe pê chyáng taû ló kô é hkûn, haû bang gi, yhangmoq lé, "Nungmoq, haî mù luî, Yhang lé a shuî lo kô é lhú?" ga lhom myî akô.

<sup>46</sup> Haû hkûn, haû noqkuq yhûm zúng bang gi, "Shí yuq su ga taî é byù gi, ó le a nyî wú é nghut lhê." ga taî kyô akô.

<sup>47</sup> Haû mù, haû Hparishe pé gi, "Nungmoq lé le, Yhang èq mhoq hpyoq yù bekô lhú?"

<sup>48</sup> Haû zaú wui chyáng le, Hparishe pê chyáng le, Yhang lé lumjîng é byù bò akô lhú?"

<sup>49</sup> A bò! Nghut kôlhang, haû jep é tarâ lé a sê é byù moq mó shî gi, nhîng pyâm é hui bekô nghut ri." ga nhik-yô é dông tû taî kat akô nghut ri.

<sup>50</sup> Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi,

<sup>51</sup> "Nga-nhúng é tarâ gi, byù rayuq lé, yhang é dang hí a gyô wú é eq, yhang haî kut é lé a sê e za, mara byi lhê lhú?" ga, yhangmoq lé myî ri.

<sup>52</sup> Haû hkûn, yhangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lhang a htoq é hkyô lé, nàng gon wú aq, haû jáng sé râ nghut lhê." ga tû taî akô.

<sup>53</sup> Hau htâng, yuq hkangmó gi, ó le ô yhûm shut taû ló byuq bùm bekô nghut ri.\*

## 8

### *Yesuq Lé, Lé Myî Chyam Wú Kô É Hkyô*

<sup>1</sup> Yesuq kúm gi, Tsanlun Bùm shut e ló bê nghut ri.

<sup>2</sup> Htang napkyô napsûn noq le, Yesuq gi, noqkuq yhûm wàng hkaû má dum é luî, byu pé lhunglhang gi, Yhang é lhîngkyuq má lé zîng bum akô; haû mù, Yhang gi, zung to luî, yhangmoq lé mhoqshit ri.

<sup>3</sup> Haû hkûn, haû tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuî lé lô kômù, gung gung má shap to kôluî,

<sup>4</sup> Yesuq lé, "Sarâ é, myiwe myhí shî lé, sulàng shut nyi é má myang chyup yu é nghut lhê.

<sup>5</sup> Haû Mosheq é tarâ má gi, shî su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuî, Nàng gi, hkâsu nghû râ lhú?" ga myî akô.

<sup>6</sup> Yhangmoq haû su ga myî é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuî èq htaû kê nyi ri.

<sup>7</sup> Yhang lé, yhangmoq ru jang myî nyi kô é hkûn, Yhang gi, yap nyhang kat mù, yhangmoq lé, "Nungmoq mã é mara a wó é sù hí, myiwe myhí shí yuq lé luqgok èq dú sháng gaq." ga taî ri.

<sup>8</sup> Hau htâng, Yhang gi, dum ngóm luî, myigùng má kê nyi ri.

<sup>9</sup> Yhangmoq gi, haû su gâ é lé wó gyo kôjáng, je mang bang mai hí luî, rayuq htâng rayuq ló byuq bekô nghut luî, Yesuq baú za myit gyó tô é eq, myiwe myhí haû jâng yap nân tô ri.

<sup>10</sup> Yesuq gi, yap nyhang kat luî, yhang lé, "Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?" ga myî ri.

<sup>11</sup> Yhang gi, "Yhumsîng ê, ó yuq le mara a byi kó nghut ri." ga tû taî ri.

Haû hkûn, Yesuq gi, "Ngò le, nàng lé mara a byi, ló aq hkoî, ahkuî mai

\* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

mara hkâdum kut shut lo." ga taî kat ri.

*Yesuq, Mingkân É Maubó*

12 Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaû má hkâ-nhâm le so râ a nghut, asak maubó lé wó râ nghut lhê." ga taî ri.

13 Haû mù, haû Hparishe pé gi, "Wú aq, Náng gûng Nàng saksé hkâm yu é nghut ri; Náng é saksé gi, teng râ a nghut." ga taî akô.

14 Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gà le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

15 Nungmoq gi, byù hkyam đông za jéyáng akô; Ngò gi, ó yuq lé le a jéyáng é nghut lhê.

16 Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gà le, Ngò gi, Ngò baú a nghut, haû Ngo lé nhang kat é sù Íwa eq rahá nghut nyi lhê.

17 Haû nungmoq é tarâ má yhang le, í yuq mai hkâm é saksé gi, têng lhê ga kâ tô ri.

18 Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Íwa le, Ngá é matú saksé hkâm byî é nghut lhê." ga tû taî ri.

19 Haû mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tû taî ri.

20 Dang haú pé gi, haû noqkuq yhûm wàng hkaû mã é alu kat jang nâm má, Yhang mhoqshit nyi é u lé taî é dang nghut ri. Nghut kôlhang, Yhang lé, ó yuq le a chyup kó; hkâsu

mù gà le, Yhâng é ahkyíng a jé shi é yanmai nghut ri.

21 Haû mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shi kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taî ri.

22 Hau é yanmai, haû Yudaq byu pé gi, "Ngò ló é jang má, nungmoq wó jé kó râ a nghut." gà é gi, Yhânggùng yhang sat shi râ gà é nghut lhê lhú?" ga myi bum akô.

23 Nghut kôlhang, Yesuq xoq taî é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shi eq sêng é bang nghut akô; Ngò kúm gi, mingkan shi eq sêng é sù a nghut.

24 Haû mù, nungmoq gi, yhumsing é mara má shi kó râ nghut lhê nghû, Ngò taî é nghut lhê. Ngò gi, haú Yuq nghut lhê nghû taî é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shi kó râ nghut lhê." gà ri.

25 Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhâm le taî nyi bê nghut lhê.

26 Ngò gi, nungmoq eq séng luí, taî râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gù lé, Ngò, mingkan lé taî kyô lhê." ga tû taî ri.

27 Yesuq gi, yhangmoq lé, Yhâng Wa eq sêng é hkyô taî kyô nyi é lé, yhangmoq gi, a sê gyo kó nghut ri.

28 Haû mù luí, Yesuq gi, "Haû Byu Yhangzo lé nungmoq tu shap\* kat é hkûn sheq, Ngò gi, haû Yuq nghut é hkyô lé le, yhumsing myit đông haî le a kut e za, haû Íwa mhoq byî é đông za taî é hkyô lé le, nungmoq sé kó râ nghut lhê.

\* 8:28 Tu shap gà é lichyúm gi, tapzìng htoq má jén sat pyám râ gà é nghut lhê.

29 Haû Ngo lé nhang kat é Sû gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taî ri.

30 Yhang, haû su taî nyi é u lé lhang, byù myo myo gi, Yhang lé lumjîng bûm bekô nghut ri.

### *Abraham É Awut Ashín Pê Hkyô*

31 Haû mù, Yesuq gi, Yhang lé lumjîng é Yudaq byu pé lé, "Ngò mhoqshít é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô.

32 Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taî ri.

33 Haú hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nang hkâsu kut wó taî lhê lú?" ga tû taî akô.

34 Yesuq dum tû taî é gi, "Ngò, nungmoq lé teng za taî kôlé, mara kut shut é sù gi, mará é jùn nghut lhê.

35 Jùn gi, yhûm ikun eq hkâ-nhám le sêng nyi râ a nghut; zo kúm gi, ikun eq ahtum abyuq sêng lhê.

36 Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê.

37 Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri.

38 Ngò gi, Ngá Wâ chyáng mai myang yu é eq rajung za, nungmoq lé taî kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

39 Haú hkûn, yhangmoq gi, "Ngamoq é îwa gi, Abraham nghut lhê." ga tû taî kôjáng, Yesuq gi, "Nungmoq, Abraham é yhangzô pé nghut é nghut

le gi, Abraham kut é su kut kó râ nghut lhê.

40 Nghut kôlhang, nungmoq gi, haû Garai Gasâng chyáng mai wó gyô yu é tengmán hkyô lé taî kyo sù nghut é Ngo lé, sat pyâm nau akô nghut ri. Haû sù é hkyô gi, Abraham a kut é nghut lhê.

41 Nungmoq gi, nungmoq é îwa kut é muzó lé yhang, kut nyi akô." ga taî ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê." ga taî he akô nghut ri.

### *Zô Wui É A-kyang Gi, Mó Ó Nghut É Hkyô Shit*

42 Yesuq gi, yhangmoq lé, "Garai Gasang gi, nungmoq é Îwa nghut é nghut jáng, nungmoq gi, Ngo lé chyitdap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê.

43 Nungmoq gi, haû mù Ngá é dang lé a sê gyo kó é lú gâ le, Ngò taî é dang lé, nungmoq a wó lhom yù kô é yanmai nghut ri.

44 Nungmoq gi, haû nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gîng nyi nghut ri. Yhang gi, mhaú é hkûn, yhang é myit má bo é dông taî ri; hkâsu mù gâ le, Yhang gi, byù mhaú nghut luí, mhaú hkyô pé é îwa nghut ri.

45 Haû su mù, Ngò, nungmoq lé, haû tengmán hkyô taî kyô é yanmai, nungmoq gi, Ngo lé a lumjîng kó nghut ri.

46 Nungmoq mâ é ó yuq wá, Ngo lé mara bo lhê nghû saksé wó tûn shit akô lú? Ngò gi, haû tengmán hkyô



lé taí nyi é nghut le nhing, nungmoq, Ngo lé haí mù a lumjínk kô é lúhú?

<sup>47</sup> Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

### *Yesuq Eq Abraham*

<sup>48</sup> Haú hkûn, haú Yudaq byu pé gi, Yhang lé, "Nàng gi, Samariq byu nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lúhú?" ga myí akô.

<sup>49</sup> Yesuq gi, "Ngò gi, nat gang wang júng é huí sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô nghut ri.

<sup>50</sup> Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haú yuq jéyáng sháng gaq.

<sup>51</sup> Ngò, nungmoq lé teng za taí kôlé, Ngá dang lé châng é sù gi, hkâ-nhám le, shí rá a nghut." ga taí ri.

<sup>52</sup> Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shí rá a nghut.' ga taí ri.

<sup>53</sup> Nàng gi, ngamoq é îwa Abraham htoq hkik lhê lúhú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lúhú?" ga taí akô.

<sup>54</sup> Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê.

<sup>55</sup> Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut

le gi, Ngò le nungmoq su byù mhaú dut rá nghut lhê; nghut kôlhang, Ngò gi, Yhang lé sé luí, Yhâng é dang gyo sù nghut lhê.

<sup>56</sup> Nungmoq é îwa Abraham gi, Ngo lé rá buinyi lé myoqbyu gabú nyi é nghut luí, myàng mù, gabú bê nghut ri." ga tû taí ri.

<sup>57</sup> Haú hkûn, haú Yudaq byu pé gi, Yhang lé, "Nàng gi, asak ngo xê zán lhang a nghut shí é nhing, Abraham lé myàng wú é nghut lhê lúhú?" ga taí akô.

<sup>58</sup> Yesuq gi, "Ngò, nungmoq lé teng za taí kôlé, Abraham lhang a hkú shi má, Ngò nyi gù bê nghut lhê."\* ga tû taí ri.†

<sup>59</sup> Haú mù luí, yhangmoq gi, Yesuq lé, dú rá ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

## 9

### *Myoqjit Sù Lé Lhoq Gê Byí É Hkyô*

<sup>1</sup> Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri.

<sup>2</sup> Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lúhú? Yhang kut shut é lúhú? A nghut jáng, yhâng nu yhâng wa kut shut é lúhú?" ga myí akô.

<sup>3</sup> Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit rá matú, haú dut é ru nghut lhê.

<sup>4</sup> Nga-nhúng gi, haú Ngo lé nhang kat Su é muzó lé, nyí nghut tô ashí hkûn, zui saí nyi ra rá dut lhê; myín jé jáng gi, ó yuq le, mú wó zui saí rá a nghut.

<sup>5</sup> Ngò gi, mingkan htoq má nyi tô é u lé, mingkân é maubó nghut lhê." gâ ri.

\* 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gâ nyi nghut ri.

6 Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri.

7 Hau htâng, haú yuq lé, "Haú Siloam wuihtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhùm shut ló bê nghut ri.

8 Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lhú?" ga myí bum akô.

9 Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

10 Haú hkùn, yhangmoq gi, "Haú nghut le gi, náng myoq hkâsu kut wó myang é lhú?" ga myí akô.

11 Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuihtum má ê chí pyám aq.' ga ngo lé taí ri; haú mù, ngò ê chí pyám é htâng má, ngá myoq wó myang é nghut lhê." ga tû taí ri.

12 Haú hkùn, yhangmoq gi, "Byù haú yuq gi, hkâmá nyi ri lhú?" ga, yhang lé myí akô.

Yhang gi, "Ngò a sé." ga taí ri.

### *Myoq Dum Myang Byuq É Hkyô Lé, Hparishe Pé Gôn Wú É Hkyô*

13 Yhangmoq gi, haú myoqjit wú bê sù lé, Hparishe pé chyáng shuí lé akô.

14 Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri.

15 Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

16 Haú Hparishe pé ra-am gi, "Shí yuq gi, Bánno buinyi é tarâ lé a châng

é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lhú?" ga myí akô. Haú mù, yhangmoq gi, myit a huí lhùm bùm lò kó nghut ri.

17 Haú mù, yhangmoq gi, haú myoqjit wú sù shut lhing mù, "Nang lé myoq lhoq myâng byí é sù gi, hkasú é byù nghut lhê nghú, nàng taí râ lhú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

18 Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, é ji lò nhang é hkùn jé shoq, a lumjínng kó nghut ri.

19 Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lhú? Hku lé é hkùn mai, myoqjit gù nghut lhê lhú? Yhang, ahkuí, hkâsu kut wó myang é lhú?" ga myí akô.

20 Haú hkùn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkùn mai myoqjit gù nghut é lé le, ngá-nhik sê lhê.

21 Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tû taí akô.

22 Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wui chôm myit hpyit to bekô nghut é yanmai nghut ri.

23 Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

24 Haú Hparishe pé gi, myoqjit wú bê sù haú yuq lé dum ji yù mù,

"Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

<sup>25</sup> Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

<sup>26</sup> Hau htâng, yhangmoq gi, "Yhang, nang lé haí kut byí ri lhú? Náng é myoq lé, yhang, hkâsu kut lhoq myâng byí ri lhú?" ga, yhang lé myí akô.

<sup>27</sup> Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lhú? Nungmoq le, Yhâng é chángzô pé dut nau akô lhú?" ga taú myí ri.

<sup>28</sup> Haú mù, yhangmoq gi, yhang lé gyaí rhoí é dông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

<sup>29</sup> Garai Gasang gi, Mosheq lé dâng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sù nghut é lé lhâng, ngamoq a sé." ga taí akô.

<sup>30</sup> Haú hkûn, haú yuq gi, "Yhang, ngo lé myoq wó lhoq myang byí kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

<sup>31</sup> Garai Gasang gi, yubak dap bâng é dang lé a gyo byí é hkyô lé, nganhúng sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sù é dang lé kúm gyo byí lhê.

<sup>32</sup> Hku lé é hkûn mai myoqjit gù nghut é byù lé, ó yuq èq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

<sup>33</sup> Haú yuq gi, Garai Gasâng chyáng mai lé é sù za a nghut le gi, haí le wó kut râ a nghut." ga tû taí ri.

<sup>34</sup> Haú su ga jáng, yhangmoq gi, "Nàng gi, yubak htui má hku lé é sù nghut to luí nhîng, ngamoq lé wám

mhoqshit lhê lhú?" ga tû taí kôluí, yhang lé hkat htoq pyâm akô nghut ri.

### *Woi-nyí Má Myoqjit É Hkyô*

<sup>35</sup> Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjîng lhê lhú?" ga myí ri.

<sup>36</sup> Haú hkûn, haú yuq gi, "Yhumsîng ê, haú gi, ó yuq nghut lhê lhú? Yhang lé, ngò wó lumjîng sháng gaq, taí kyo laq." ga myí ri.

<sup>37</sup> Yesuq gi, "Nàng, haú yuq lé myàng wú bê nghut lhê; ahkuí, nàng eq dâng nyo nyí é sù gi, haú yuq yhang nghut lhê." ga taí ri.

<sup>38</sup> Haú mù, haú yuq gi, "Yhumsîng ê, ngò lumjîng lhê!" ga taí luí, Yhang lé noqkuq ri.

<sup>39</sup> Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê." ga taí ri.

<sup>40</sup> Yhang eq rahá nghut nyí é Hparishe pé ra-am gi, Yhang haú su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lhú?" ga myí akô.

<sup>41</sup> Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

## 10

### *Sau Zúng Sù Eq Sau Hpúng*

<sup>1</sup> Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô dông doq lut wang é sù gi, hkau sù eq damyaq nghut ri.

<sup>2</sup> Haú hkúmdong mai wang é sù kúm gi, sau zúng sù nghut ri.

<sup>3</sup> Haú hkum zúng sù gi, yhang lé hkum hpóng byí é htoq agó, haú sau pé gi, yhâng é htê lé gyo byí akô. Yhang gi, yhâng é sau pé lé, myîng

lang lui wut yù mù, yhangmoq lé shuí htoq htoq kut nyi ri.

<sup>4</sup> Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri.

<sup>5</sup> Nghut kôlhang, yhangmoq gi, byù bing é htâng má, hkâ-nhám lhang châng kó rá a nghut e za, yhâng chyáng mai kúm hpang byuq kó rá nghut lhê; hkâsu mù gâ le, haù byù bing é htê lé, yhangmoq a sê gyo kô é yanmai nghut ri." ga taí ri.

<sup>6</sup> Yesuq gi, dangtú haù lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

<sup>7</sup> Haù mù, Yesuq dum taí é gi, "Ngò, nungmoq lé teng za taí kôlé, Ngò gi, haù sau pé wang é hkúmdong nghut lhê.

<sup>8</sup> Ngá é hí má lé é lhunglhang bang gi, hkau bang eq damyaq pé nghut akô; haù sau pé kúm gi, yhangmoq é dang lé a lhom gyo byi kó nghut ri.

<sup>9</sup> Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui rá nghut lhê. Haù yuq gi, htoq htoq wàng wàng wó kut rá eq mhan-yô myang hô rá nghut lhê.

<sup>10</sup> Haù hkau sù gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yù rá eq byíngjup é asak lé wó yù rá matú sheq nghut lhê.

<sup>11</sup> Ngò gi, ge é sau zúng sù nghut lhê; haù ge é sau zúng sù gi, sau pé é matú, yhumsing é asak lé ap byi pyâm é nghut lhê.

<sup>12</sup> Haù langchyáng kut sù gi, sau pé lé sing é sau zúng sù a nghut; haù mù, yhang gi, haù wamhkuí lé lo é lé myàng jáng, saù pé lé pyâm to mù hpang ló byuq rá nghut lhê; haù hkûn, wamhkuí gi, sau hpúng lé é htim lui, lhoq pyo pyám rá nghut lhê.

<sup>13</sup> Yhang gi, langchyáng hpó nghut lui, haù sau pé é matú haí le a myit chiq byi é yanmai, hpang é nghut ri.

<sup>14</sup> Ngò gi, haù ge é sau zúng sù nghut lhê; haù Íwa gi, Ngo lé sê é nghut lui, Ngò le, haù Íwa lé sê é eq rajung za,

<sup>15</sup> Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haù sau pé é matú, yhumsing é asak lé ap byi pyâm é nghut lhê.

<sup>16</sup> Ngò gi, sau hkup shi má é a nghut é gotú sau pé wó ashí; sau haù pé lé le, Ngò, shuí yù ra rá nghut lhê; sau haù pé le, Ngá é htê lé gyo kó rá nghut lhê; haù hkûn, sau hpúng rahpúng za dut lui, sau zúng sù le rayuq za, nghut rá nghut lhê.\*

<sup>17</sup> Ngò gi, Ngá é asak lé dum wó taù yù sháng gaq nghu, yhumsing é asak lé ap byi pyâm é yanmai, Ngá Wa gi, Ngo lé chyitdap é nghut lhê.

<sup>18</sup> Ngá é asak lé, ó yuq èq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyám rá ahko ahkáng eq haù lé dum taù yù rá ahko ahkáng wó sù nghut lhê. Haù gi, Ngá Wâ chyáng mai Ngò wó yu é hkunmó nghut lhê." gâ ri.

<sup>19</sup> Dang haù pé é yanmai, haù Yudaq byu pé gi, myit a huí lhum dum dut byuq bekô nghut ri.

<sup>20</sup> Haù má é bang myo myo gi, "Yhang gi, nat gang wang júng to lui, nâ byuq bê nghut ri. Yhâng é dang lé, haù mù gyô nyi akô lhu?" ga taí bum akô.

<sup>21</sup> Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng rá lhu?" ga taí bum akô nghut ri.

### *Yudaq Byu Pé A Lumjng Kô É Hkyô*

<sup>22</sup> Yerusalem wà mó má, Ap Nóng Poí\* jé bê nghut ri. Haù gi, gyoqmyô nám nghut ri.

<sup>23</sup> Haù hkûn, Yesuq gi, haù noqkuq yhâm wàng má é, Sholumon é Jirop má sô yông wún ri.

<sup>24</sup> Haù u lé, haù Yudaq byu pé gi, Yhâng é lhungkyuq má lé zing

\* 10:16 Esai 56:8 \* 10:22 Ap Nóng Poí gâ é gi, Garai Gasâng é yhùm lé ap nóng lé gâ lhê.

bùm kômù, "Nàng gi, ngamoq lé hkâm-yháng jé shoq úng-áng nhang nyi rà lú? Nàng, Hkrisduq nghut le gi, ngamoq lé san za taí kyô pyám laq." ga taí akô.

<sup>25</sup> Yesuq gi, "Ngò, nungmoq lé taí kyo bê nghut lhê; nghut kôhang, nungmoq a lumjúng kó nghut ri. Ngá Wá é mying mai, Ngò kut é laklaí kumlhá haú pé gi, Ngá é matú saksé hkám byi nyi ri.

<sup>26</sup> Nghut kôhang, nungmoq gi, Ngá é sau a nghut kô é yanmai, a lumjúng kó nghut ri.

<sup>27</sup> Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htàng châng akô nghut ri.

<sup>28</sup> Ngò gi, yhangmoq lé, ahtum abyuq é asak byi é nghut mù, yhangmoq gi, hkâm-nhám le htên byoq kó rà a nghut; ó yuq èq le, yhangmoq lé, Ngá é loq mai wó lú yú rà a nghut.

<sup>29</sup> Yhangmoq lé, Ngá é loq má ap byi tô é sù, haú Ngá Wa gi, lhunglhang htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yú rà a nghut.

<sup>30</sup> Ngò eq haú Íwa gi, rayuq za nghut lhê." ga tũ taí ri.

<sup>31</sup> Haú hkân, haú Yudaq byu pé gi, Yesuq lé, dú rà matú luqgok dum kui akô.

<sup>32</sup> Nghut kôhang, Yesuq gi, yhangmoq lé, "Haú Íwâ chyáng mâ é laklaí kumlhá mó pé myo myo, Ngò, nungmoq lé tũn shit bê nghut lhê. Nungmoq, Ngo lé dú rà gi, hkám lhâm é yanmai nghut akô lú?" ga myi ri.

<sup>33</sup> Haú Yudaq byu pé gi, "Ngamoq, Nang lé dú rà gi, haú pé hkám lhâm é yanmai le a nghut; Nàng gi, byù rayuq nghut to luí, Garai Gasang nghut é đông taí whuí luí, Yhang lé rhoi dang taí é yanmai, dú rà nghut lhê." ga tũ taí akô.

<sup>34</sup> Haú hkân, Yesuq gi, yhangmoq lé, "Nungmoq gi, garaí pé nghut akô nghut, Ngò taí bê nghut lhê." ga nung-

moq é tarâ má kâ to lhê a nghut kó lú?

<sup>35</sup> Chyúmdang haú lé gi, a ge lhoq hpyoq pyám é nghut luí, haú Garai Gasang é mungdang lé wó yu é bang lé, 'garaí pé' gâ é nghut le gi,

<sup>36</sup> haú Íwa mai, Yhang é matú hkyin htoq yú luí, mingkan má nhang é Sù eq séng luí gi, hkám đông nghut kó rà lú? 'Ngò gi, Garai Gasang é Yhangzo nghut lhê.' nghut taí é yanmai, Ngò gi, Garai Gasang lé taí hpoi ri nghut, nungmoq, haú mù Ngo lé mara hũn akô lú?

<sup>37</sup> Ngá Wá é muzó pé lé, Ngò kut é a nghut jáng, Ngo lé hkám lumjúng kó.

<sup>38</sup> Nghut kôhang, Ngò, haú pé lé kut é nghut le gi, nungmoq, Ngo lé a lumjúng kôhang, haú muzó pé lé lumjúng keq; haú hkân, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sê gyo kó rà nghut lhê." ga tũ taí ri.

<sup>39</sup> Yhangmoq gi, Yhang lé chyup rà dum hen akô; nghut kôhang, Yhang gi, yhangmoq é loq mai wó lut ló bê nghut ri.

<sup>40</sup> Hau htàng, Yesuq gi, haú Yodan làng he hpoq mâ é, Yohan, wui-myhup hkám byi hi é jowò má ló jé ri. Haú má, Yhang nyi nyi é nghut luí,

<sup>41</sup> byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôhang, shí yuq eq séng luí, Yohan taí é hkyô lhunglhang gi, têng ri." ga taí bum akô.

<sup>42</sup> Haú jowò má, byù myo myo gi, Yesuq lé lumjúng bùm bekô nghut ri.

## 11

### *Lazaruq Shi Byuq É Hkyô*

<sup>1</sup> Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahta q nhik nyi é Behtani wâ mâ é sù nghut lhê.

<sup>2</sup> Mariq haú gi, Yhumsing lé namngón-xũ hut gyun luí, hkyi má yhâng xam èq sùt byi é sù nghut ri; yhang

gi, haù no nyi é Lazaruq é yhangnhá nghut ri.

<sup>3</sup> Haù mù, haù yhangnhâ nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng ê táí nhang akô.

<sup>4</sup> Yesuq gi, dang haù lé wó gyo jáng, "Nòhpyo haù gi, shî-nò a nghut. Haù Garai Gasâng é Yhangzo gi, hau é yan-mai, hpungwup shingkang wó dan hù é huì sháng gaq ga, Garai Gasâng é hpungwup shingkang é matú dut é ru nghut lhê.

<sup>5</sup> Yesuq gi, Mahtaq eq yhanggu Mariq lé le, Lazaruq lé le, chyitdap ri.

<sup>6</sup> Haù su mù, Yhang gi, haù Lazaruq no nyi ri gâ é lé, wó gyo é hkûn, haù Yhang nyi é jowò má, í nyí nyi tô ashí nghut ri.

<sup>7</sup> Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taù ló sháng." ga taí ri.

<sup>8</sup> Haù hkûn, yhangmoq gi, "Rabai ê, hkû-yoq za, haù Yudaq byu pé, Nang lé luqgok eq dú sat râ da kô é nghut le nhîng, ahkuí, haù shut dum taù ló râ l hú?" ga Yhang lé myí akô.

<sup>9</sup> Yesuq gi, "Nyí gi, hkyíng hkum raxe í hkum bo lhê a nghut kó l hú?\*" Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut.

<sup>10</sup> Myín lé hkyô sô é sù kúm gi, maubó lé a wó é yanmai, lengbat lhê." ga tũ taí ri.

<sup>11</sup> Haù su ga taí é htâng má, Yhang, yhangmoq lé xoq taí kyô é gi, "Nga-nhúng é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaù toq râ nghut lhê." gâ ri.

<sup>12</sup> Haù hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô.

<sup>13</sup> Yesuq gi, Lazaruq shi byuq bê hkyô lé táí é nghut ri; nghut kôlhang, Yhâng é chángzô pé gi, gè gè yhup

myhî tô é lé taí é su ngam pyâm akô nghut ri.

<sup>14</sup> Haù mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê.

<sup>15</sup> Ngò haù má a nyi záng é gi, nung-moq wó lumjîng râ matú nghut luí, nungmoq é matú Ngò gabú byí ri; yhâng chyáng e ló sháng hkoi." gâ ri.

<sup>16</sup> Haù mù, haù Zozûm le gâ é Htomaq gi, gotú chángzô pé lé, "Nga-nhúng le, Yhang eq rahá shî sháng gaq, châng e ló sháng." ga taí ri.

### *Haù Ê-nhâ Nhik Lé, Yesuq Nhik Tîng É Hkyô*

<sup>17</sup> Yesuq gi, jé e é hkûn, haù Lazaruq lé lup má kat pyâm é myi nyí nghut bê hkyô lé, lhom taí kyô akô.

<sup>18</sup> Behtani wà gi, Yerusalem wà mó eq í déng kô za wê lhûm ri.

<sup>19</sup> Haù mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri.

<sup>20</sup> Mahtaq gi, Yesuq jé lé lo é hkyô lé wó gyo jáng, htoq é mù, Yhang lé é huí ri; nghut kôlhang, Mariq gi, yhûm má nyi tô ri.

<sup>21</sup> Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut.

<sup>22</sup> Nghut kôlhang, ahkuí le, Garai Gasâng chyáng Nàng haì dung kôlhang, Yhang byi râ nghut é lé, ngò sê lhê." ga taí ri.

<sup>23</sup> Yesuq gi, yhang lé, "Nung gu, dum dui toq râ nghut lhê." ga taí ri.

<sup>24</sup> Haù hkûn, Mahtaq gi, "Haù jì-htûm buinyì má dum dui toq é hkûn, yhang le dum dui toq râ nghut é lé, ngò sê lhê." ga tũ taí ri.

<sup>25</sup> Haù hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum dui râ nghut lhê.

<sup>26</sup> Asak dui nyi luí, Ngo lé lumjîng é sù ó yuq nghut kôle, hkâ-nhám le shi

\* **11:9** Nyí gi, hkyíng hkum raxe í hkum bo lhê a nghut kó l hú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

é hui râ a nghut. Nàng gi, dang shî lé lumjínng lèhê lúhú?" ga taí ri.

27 Haú hkûn, yhang gi, "Yhumsínng ê, ngò lumjínng lèhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjínng lèhê." ga, Yhang lé taí kyô ri.

28 Yhang gi, haú su ga taí é htâng má, taú ló mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myí nyi ri." ga taí kyô ri.

29 Mariq gi, haú lé wó gyo jáng, hân za toq mù, Yesuq chyáng ê bê nghut ri.

30 Haú u lé, Yesuq gi, haú wâ hkaú má a wang ló shî e za, Mahtaq eq huí é jowò má ru nyi tô ashî nghut ri.

31 Haú yhúmhaú má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má ê ngaú râ dâ lèhê abe ga, myit yù kômù, yhang htâng châng e ló bum akô nghut ri.

32 Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang má ngóm gop to luí, "Yhumsínng ê, Nàng, shî má nyi tô é ru nghut le gi, ngá gu shi byuq râ a nghut." ga taí ri.

33 Yesuq gi, Mariq ngaú nyi é lé le, haú yhang eq rahá lé lo é Yudaq byu pé ngaú nyi kô é lé le, myàng jáng, Yhâng é myit má gyai yhang hkâm zo wuí é eq myit wui myit hke dut nyi ri.

34 Haú mù, Yhang gi, "Yhang lé, hkâmá tô tô akô lúhú?" ga myi jáng, yhangmoq gi, "Yhumsínng ê, lé wú wú aq." ga tû taí akô.

35 Yesuq gi, ngaú bê nghut ri.

36 Haú mù, haú Yudaq byu pé gi, "Wú keq, Yhang gi, Lazaruq lé, haú-í yhang chyit ri-nhung!" ga taí akô.

37 Nghut kôlhang, ra-am gi, "Haú myoqjit sù lé, myoq wó lhoq myàng byí é Sù gi, shí yuq lé le, a shî lo shoq a wó kut é lúhú?" ga taí bum akô nghut ri.

### *Lazaruq Lé Lhoq Dui Toq É Hkyô*

† 11:27 Hkrisduq lé Mesaia le gâ lèhê.

38 Yesuq gi, Yhâng é myit má radàm dum gyai yhang hkâm zo wuí é eq, lup má lé jé ri. Lup haú gi, luqhkyûng dong nghut luí, luqgok rachâm eq chí tô akô.

39 Haú mù, Yhang gi, "Luqgok haú lé yu pyám keq." ga taí ri.

Haú hkûn, haú shi byuq su é yhângnhá Mahtaq gi, "Yhumsínng ê, yhang lé, haú má tô tô é myi nyi lhang nghut bê yanmai, ahkuí gi, bup nàm berâ nghut lèhê." ga taí ri.

40 Haú mù, Yesuq gi, "Nàng, lumjínng é nghut le gi, haú Garai Gasâng é hpungwup shingkang lé, wó myàng râ nghut lèhê nghû, Ngò, nang lé taí kyô wú bê a nghut lúhú?" ga taí ri.

41 Haú mù luí, yhangmoq gi, luqgok haú lé yu pyám akô. Hau htâng, Yesuq gi, mauhkûng shut tu wú luí, "Áwa ê, Nàng, Ngá é dang lé gyo byí é yanmai, Ngò, Nang lé jeju hkyá-ôn lèhê.

42 Nàng gi, hkâ-nhám le, Ngá é dang lé gyo byí nyi é lé, Ngò sê lèhê; nghut kôlhang, Nàng, Ngo lé nhang kat é hkyô lé, shî má yap tô é bang lumjínng kó sháng gaq nghû, yhangmoq é matú, Ngò, isu nghû taí é nghut lèhê." ga taí ri.

43 Yhang gi, haú su ga taí luí, "Lazaruq é, htoq lô aq." ga htê mó eq wut kat ri.

44 Haú hkûn, haú shi byuq bê sù gi, yhâng é loq hkyí pé má pân eq htup yup to gù eq, yhâng é myoqdong má hpajet eq htup to gù htoq lo ri.

Haú mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

### *Yesuq Lé Sat Pyám Râ Haq Dâ É Hkyô*

*Mht 26:1-5; Mrk 14:1-2; Luk 22:1-2*

45 Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjínng bùm bekô nghut ri.

46 Nghut kôlhang, yhangmoq chyáng mâ é ra-am gi, haú Hparishe pê chyáng ló mù, Yesuq kut é hkyô lé, ló taí kyô akô.

<sup>47</sup> Haû mù, haû hkyangjong agyi pé eq Hparishe pé gi, Yudaq byìn tú wapdoq‡ zuphpong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lhú?"

<sup>48</sup> Nga-nhúng, Yhang lé haû su ru kut nyi nhang é nghut jáng, yuq hkgangmó gi, Yhang lé lumjínng kó râ nghut lhê; haú hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó râ nghut lhê." ga taí akô nghut ri.

<sup>49</sup> Haú hkûn, yhangmoq chyáng má é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lhang a sé kó nghut ri-nhung!"

<sup>50</sup> Haú byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

<sup>51</sup> Yhang haû su ga taí é gi, yhum-sing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shí hkâm byi râ nghut é hkyô lé le,

<sup>52</sup> byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsing yù mù, rading ralhum za dut nhâng râ matú, shí hkâm byi râ nghut é hkyô lé le, myiqhtoi dang taí é ru nghut lhê.

<sup>53</sup> Haú nyí mai, yhangmoq gi, Yesuq lé sat râ matú chôm da bekô nghut ri.

<sup>54</sup> Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhúm é mau má é, Ehprim gâ é wà má é mù, Yhâng é chángzô pé eq rahá nyi nyi ri.

<sup>55</sup> Haú Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yú râ matú, yosô wà pé mai, Yerusalem wà mó shut doq lô bum akô.

<sup>56</sup> Haû mù, yhangmoq gi, Yesuq lé ho nyi kô é nghut luí, haû noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê lhà?" ga myí lhúm bum akô.

<sup>57</sup> Nghut kôlhang, haû hkyangjong agyi pé eq Hparishe pé gi, Yesuq lé wó chyup yú râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyô tô akô nghut ri.

## 12

*Yesuq, Namngón-xù But Byi Huí É Hkyô*

*Mht 26:6-13; Mrk 14:3-9*

<sup>1</sup> Haú Lhoqlhai Poí jé râ hkyuq nyi râ ashí hkûn, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri.

<sup>2</sup> Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang má é rayuq nghut ri.

<sup>3</sup> Haú hkûn, Mariq gi, haû nardu amyit mai za saí yu é, gyai hpaû é namngón-xù raxe í rûng kô yu lé mù, Yesuq é hkyí má hut gyun byi luí, yhâng é uxam eq sùt byi ri. Haû mù, yhúm haú gi, namngón-xù shôm byíng to bê nghut ri.

<sup>4</sup> Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi,

<sup>5</sup> "Haú myùng bang lé byi pyám râ matú, haú namngón-xù lé denari sum sho eq haí mù a ùng pyám é lhú?" ga taí ri.

<sup>6</sup> Yhang haû su ga taí é gi, myùng bang lé chiq byi é yanmai taí é a nghut, yhang gi, ngùn htùng chùng sù nghut luí, haú má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

<sup>7</sup> Yesuq gi, "Nghut shang gaq; yhang gi, Ngo lé myhup yhum râ buinyi é

‡ 11:47 Yudaq byìn tú wapdoq lé Grik dông gi, San-hedrin gâ lhê.



matú, namngón-xù shí lé hkong to byí é nghut lhê.

<sup>8</sup> Haú myùng bang gi, nungmoq eq rahá hkâ-nhám le nyí râ nghut lhê; nghut kôlhang, Ngò gi, nungmoq eq rahá ayang nyí nyí râ sù a nghut." ga tû taí ri.

<sup>9</sup> Haú u lé, Yudaq byu pé ajùm ayò gi, haú má Yesuq nyí é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng eq shí bê mai lhoq dui toq yu é Lazaruq lé, lé myâng nau kô é yanmai le nghut ri.

<sup>10</sup> Haú mù, haú hkyangjong agyi pé gi, Lazaruq lé le, sat pyám râ matú chòm hpyê lhùm akô.

<sup>11</sup> Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjng bùm kô é yanmai nghut ri.

*Yesuq, Yerusalem Wà Mó Má Wang E Ló É Hkyô*

*Mht 21:1-11; Mrk 11:1-11; Luk 19:28-40*

<sup>12</sup> Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyò bum akô.

<sup>13</sup> Haú mù, yhangmoq gi, byùm-haq pé yu chùng mù, Yhang lé ê tê uchyang, "Hosana!"

Haú Yhumsing é myìng mai jé lé lô Sù gi, hkungsô wó nyí sháng gaq ô! Haú Israelaq byu pé é Hkohkâm gi, hkungsô wó nyí sháng gaq!"<sup>✧</sup>

ga, taí garû bum akô nghut ri.

<sup>14</sup> Haú hkûn, Yesuq gi, logúng zo radu lé myàng luí, doq jí ri;

<sup>15</sup> haú gi, "Zi-un byizo<sup>†</sup> ê, hkâgyuq; wú keq, nungmoq é hkohkâm gi, logúng zo má jí mù lé lo nyí ri."<sup>✧</sup> ga, kê tô é eq rajung za nghut ri.

<sup>16</sup> Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shing kang dan hu huí é htâng má za sheq, haú pé gi, Yhang eq séng luí

kê tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

<sup>17</sup> Haú Yesuq gi, lup hkaú mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkâm byí nyí akô.

<sup>18</sup> Haú mù, byù myo myo gi, Yesuq tûn shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô.

<sup>19</sup> Hau é yanmai, haú Hparishe pé gi, "Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhùm bum akô nghut ri.

*Yesuq, Yhang Shí Râ Hkyô Lé Te Taí É Hkyô*

<sup>20</sup> Haú hkûn, noqkuq râ matú Poí má doq ló é bang má, Grik pé ra-am le bo tô akô.

<sup>21</sup> Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô.

<sup>22</sup> Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

<sup>23</sup> Haú mù, Yesuq gi, "Haú Byu Yhangzo gi, hpungwup shing kang dan hù é hui râ matú, ahkyíng jé bê nghut ri.

<sup>24</sup> Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyí râ nghut lhê. Nghut kôlhang, shi byuq é nghut le gi, ashí myo myo lhoq htoq râ nghut lhê.

<sup>25</sup> Haú yhumsing é asak lé chyt-dap é sù gi, asak sùm byuq râ nghut lhê. Mingkan shí má, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê.

\* **12:13** Hebre dang má, *hosana* gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkya-on dang đông chung é nghut lhê. ✧ **12:13** Hkya-on 118:25-26 † **12:15** Hebre myíng dông *Zi-un byizo* gâ é gi, Yerusalem mâ é byu pé lé gâ é nghut lhê. ✧ **12:15** Zhk 9:9

26 Ngo lé dojaú é sù ó yuq nghut kôle, Ngá htâng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haú Ngo lé dojaú é sù lé, shigyau râ nghut lhê.

27 Ahkuî, Ngò, myit wuîhke nyi ri; Ngò hkâsu nghu tái râ lhi? 'Áwa ê, ahkýing shî mai Ngo lé lhoq lhut yù laq.' nghu tái râ lhu? Nghut kôle, Ngò gi, ahkýing shi é matú za sheq jé lé é ru nghut lhê.

28 Áwa ê, Náng é mying lé hpungwup shing kang dan hu nhâng aq hkoi!" ga taí ri.

Haú hkûn, "Ngò gi, Ngá é mying lé hpungwup shing kang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri.

29 Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

30 Haú hkûn, Yesuq gi, "Danghtê shi gi, Ngá é matú a nghut, nungmoq é matú ru nghut lhê.

31 Ahkuî gi, mingkan shi lé jéyáng râ ahkýing nghut bê; mingkan shi é zau gi, ahkuî hkat htoq pyâm é hui râ nghut lhê.

32 Nghut kôlháng, Ngò gi, myigùng mai tu shap kat é huí é hkûn, byù lhunglhâng bang lé, Ngá chyáng shê yù râ nghut lhê." ga taí ri.

33 Yhang haú su ga taí é gi, Yhang hkâsu kut shi râ nghut é hkyô lé shit é nghut ri.

34 Haú hkûn, haú byù moq mó gi, "Haú tarâ laiká má, Hkrisduq gi, ah-tum abyuq dui nyi râ nghut lhê gâ é lé sheq, ngamoq wó gyo wú é ru nghut le nhing, 'Haú Byu Yhangzo gi, tu shap é hui ra râ nghut lhê.' nghu, Náng hkâsu kut wó taí lhê lhu? Haú Byu Yhangzo gi, ó yuq nghut lhê lhu?" ga, myi akô.

35 Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkýing gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

36 Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjínng keq." ga taí ri. Yesuq gi, dang haú ban tái jáng, yhangmoq chyáng mai htoq ló luí, haq byuq bê nghut ri.

### *Yudaq Byu Pé, A Lumjínng Ru Dut Nyi Kô É Hkyô*

37 Yesuq gi, yhangmoq é hí má, limik kumlhá haú pé banshoq kut shit kôlháng, yhangmoq gi, Yhang lé a lumjínng shi kó nghut ri.

38 Haú gi,  
"Yhumsing ê, nga-nhông é danglù lé, ó yuq wá lumjínng byi wú é lhu?  
Haú Yhumsing é loq<sup>‡</sup> gi, ó yuq lé htoq shit wú é lhu?"<sup>✧</sup>  
ga, myiqhtoí Esai-aq taí tô é dang lo dik é nghut ri.

39 Yhangmoq a wó lumjínng kô é hkyô gi, Esai-aq taí é dang má,

40 "Yhang gi, yhangmoq é myoqjí lé lhoq chít byi luí, yhangmoq é i-myt lé lhoq htan to byi bê nghut ri;

haú mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê."<sup>✧</sup>

ga le bo tô é yanmai nghut lhê.

41 Esai-aq gi, Yesuq é hpungwup shing kang lé myang é yanmai, Yhang eq sêng é hkyô lé, haú su ga taí é nghut ri.

42 Nghut kôlháng, haú uphkâng bang myo myo lháng gi, haú u má, Yesuq lé lumjínng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui

<sup>‡</sup> 12:38 Yhumsing é loq gâ é gi, Yhumsing é hpungwup a-tsam lé gâ é nghut lhê. ✧ 12:38 Esai 53:1

✧ 12:40 Esai 6:10

râ lé, gyuq kô é yanmai, yhangmoq lumjǐng bê hkyô lé a yín yu bùm kô nghut ri.

<sup>43</sup> Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pê chyáng mâ é aróng lé, je ô nau kô é yanmai nghut ri.

<sup>44</sup> Haû mù, Yesuq, htê mó èq taí é gi, "Ngo lé lumjǐng é sù gi, Ngo lé baú lumjǐng é a nghut; haû Ngo lé nhang kat é Sù lé le, lumjǐng é nghut lhê.

<sup>45</sup> Ngo lé myang é sù gi, haû Ngo lé nhang kat é Sù lé le myang é nghut lhê.

<sup>46</sup> Ngò gi, Ngo lé lumjǐng é sù ó yuq le, mauchut hkaû má a nyi sháng gaq nghû, maubó dông mingkan má lé jé é nghut lhê.

<sup>47</sup> Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a nghut; haû mingkan lé hkyi yù râ matú sheq, jé lé é ru nghut lhê.

<sup>48</sup> Ngo lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haû gi, haû jìhtùm buinyi má, haú yuq lé mara byi râ nghut lhê.

<sup>49</sup> Hkâsu mù gâ le, Ngò gi, Ngá é myit dông taí é a nghut; nghut kôlhang, Ngò haí taí râ eq hkâsu nghû taí râ lé gi, haû Ngo lé nhang kat é sù Íwa mai, Ngo lé hkunmó hkyô to bê nghut lhê.

<sup>50</sup> Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luí, Ngò, haí taí kôlé, haû Íwa mai Ngo lé taí kyô é lé za, taí é nghut lhê." gâ ri.

## 13

### *Chángzô Pé É Hkyî Chi Byî É Hkyô*

<sup>1</sup> Haû Lhoqlhai Poí jé râ hí má za, Yesuq gi, Yhang, mingkan shí mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jìhtùm jé shoq Yhâng é chyitdap myit lé shit râ nghut lhê.

<sup>2</sup> Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byî to gû nghut ri.

<sup>3</sup> Yesuq gi, haû lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taû ló râ sù nghut é lé le, sê ri.

<sup>4</sup> Haû mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm èq hpyihit hit tô ri.

<sup>5</sup> Hau htâng, Yhang gi, jirung má uchyam hut kat mù, Yhâng é chángzô pê é hkyî chi byi luí, haû Yhâng é hpyidum má hit tô é hpajet èq sut huí byî ri.

<sup>6</sup> Yhang gi, Simun Petruq chyáng jé jáng, Simun Petruq gi, "Yhumsíng ê, Nang gi, ngá hkyî lé chi byi râ nghut lhê lhú?" ga myí ri.

<sup>7</sup> Haú hkûn, Yesuq gi, "Ngò, haí kut nyi é hkyô lé, ahkuí, nang sê gyo râ a nghut; nghut kôlhang, htâng má sê gyo râ nghut lhê." ga tú taí ri.

<sup>8</sup> Petruq gi, "Ngá hkyî lé, Nang, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byî é nghut jáng, nang gi, Ngò eq séng râ a nghut." ga tú taí ri.

<sup>9</sup> Haú hkûn, Simun Petruq gi, "Yhumsíng ê, haû su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tú taí ri.

<sup>10</sup> Yesuq gi, "Gùng chi bê sù gi, hkyî za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkanmó gi, sanséng é a nghut." ga tú taí ri.

<sup>11</sup> Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

<sup>12</sup> Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi,

ahkuí, ngò kut byí é hkyô lé, sê gyo akô lhú?

<sup>13</sup> Nungmoq, Ngo lé, 'Sará' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê.

<sup>14</sup> Ngò, nungmoq é Sará eq Yhumsîng nghut sù lháng, nungmoq é hkyí lé chi byí é nghut le gi, nungmoq le, rayuq eq rayuq é hkyí lé chi byí lhum râ dut lhê.

<sup>15</sup> Nungmoq gi, Ngò, nungmoq lé kut byí é su kut kó sháng gaq nghû, Ngò, nungmoq lé alik kut shit tô é nghut lhê.

<sup>16</sup> Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut.

<sup>17</sup> Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

### *Yesuq Lé Ap Pyám Râ Lé, Te Taí É Hkyô*

<sup>18</sup> Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhâng, 'Haú ngá é muk lé bo zô é sù gi, ngo lé, yhâng é hkyihtáng lanhik eq nâng htíng râ nghut lhê.'\* gâ é Chyúmdang lé, lhoq dik râ matú ru nghut lhê.

<sup>19</sup> Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq\* nghut é lé, nungmoq wó lumjíng kó râ matú nghut lhê.

<sup>20</sup> Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

<sup>21</sup> Yesuq gi, haú su ga taí é htâng má, myit wúhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

<sup>22</sup> Haú mù, Yhâng é chángzô pé gi, ó yuq lé taí záng nyi é hkyô lé, rago a sé

kô é yanmai, rayuq eq rayuq wú tsuq lhûm bum akô nghut ri.

<sup>23</sup> Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

<sup>24</sup> Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

<sup>25</sup> Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lhú?" ga, Yhang lé myí ri.

<sup>26</sup> Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byí ri.

<sup>27</sup> Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri.

<sup>28</sup> Nghut kôlhâng, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lháng a sé gyo kó nghut ri.

<sup>29</sup> Haú Yudaq gi, ngùn zum sù nghut é yanmai, ra-am gi, haú Poí má râ é hkyô lé, ê wú râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri.

<sup>30</sup> Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

### *Petruq He-ngik Pyám Râ Lé, Yesuq Te Taí É Hkyô*

*Mht 26:31-35; Mrk 14:27-31; Luk 22:31-34*

<sup>31</sup> Haú yuq htoq ló byuq jáng, Yesuq taí é gi, "Ahkuí, haú Byu Yhangzô gi, hpungwup shingkang dan hû é nghut luí, Garai Gasang gi, haú Byu Yhangzô é yanmai, hpungwup shingkang dan hu bê nghut ri.

<sup>32</sup> Garai Gasang gi, haú Byu Yhangzô é yanmai, hpungwup shingkang dan hû é nghut jáng,

\* **13:18** Hkya-on 41:9 \* **13:19** Haú Yuq gâ é gi, Hkrisduq lé gâ é nghut lhê.

Yhang le, Yhang má haú Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

<sup>33</sup> Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôhang, 'Ngò ló é jang má, nungmoq wó jé kó râ a nghut.' nghú, haú Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

<sup>34</sup> Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê.

<sup>35</sup> Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byu lhunghâng bang sé kó râ nghut lhê." gâ ri.

<sup>36</sup> Haú hkûn, Simun Petruq gi, "Yhumsîng ê, Nàng, hká shut ló râ lhú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lhê. Nghut kôhang, htâng má gi, nungmoq châng ra kó râ nghut lhê." ga tû taí ri.

<sup>37</sup> Petruq gi, "Yhumsîng ê, haí mù luí, ahkuí ngò Náng htâng a wó châng é lhú? Ngò gi, Náng é matú, shî hkám râ rì rì nghut lhê." ga taí ri.

<sup>38</sup> Haú mù, Yesuq taí é gi, "Nàng gi, gè gè yhang, Ngá é matú shî hkám râ lhú? Ngò, nàng lé teng za taí lé, woq a tûn shimá, nàng, Ngo lé sum dâm he-ngik pyám râ nghut lhê.

## 14

### *Yesuq, Yhâng É Chángzô Pé Lé Nhkik Tîng É Hkyô*

<sup>1</sup> Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq.

<sup>2</sup> Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo râ nghut lhê. Ngò, haú má ló é gi,

nungmoq é nyi jowò ló hên láng râ matú ru nghut lhê.

<sup>3</sup> Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé shuí yù râ nghut lhê.

<sup>4</sup> Ngò ló é jang má jé é hkyô lé, nungmoq sê lhê." gâ ri.

### *Yesuq Za Hkyô*

<sup>5</sup> Haú hkûn, Htomaq gi, Yhang lé, "Yhumsîng ê, Nàng hká shut ló é lé lháng, ngamoq a sê le nhîng, hkyô haú lé, ngamoq hkâsu kut wó sé râ lhú?" ga myi ri.

<sup>6</sup> Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut.

<sup>7</sup> Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû taí ri.

<sup>8</sup> Haú hkûn, Hpilip gi, "Yhumsîng ê, ngamoq lé, haú Íwâ tûn shit laq, haú hkûn, ngamoq nhik shî râ nghut lhê." ga taí ri.

<sup>9</sup> Yesuq tû taí é gi, "Hpilip ê, Ngò, nungmoq eq shî myáng lháng nyi lò bê le nhîng, nàng, Ngo lé a sé lhú? Ngo lé myang é sù gi, haú Íwâ lé myàng bê nghut ri; haú nghut le nhîng, 'Ngamoq lé, haú Íwâ tûn shit laq.' nghú, nàng hkâsu wó taí lhê lhú?

<sup>10</sup> Ngò gi, haú Íwâ má nghut nyi luí, haú Íwâ gi, Ngò má nghut nyi é hkyô lé, nàng a lumjîng lhú? Ngò, nungmoq lé taí é dang haú pé gi, Ngá é myit mai taí é a nghut; haú Ngò má lúng nyi é Íwâ sheq, Yhâng é mù zuí nyi é ru nghut lhê.

<sup>11</sup> Ngò gi, haú Íwâ má nghut nyi luí, haú Íwâ gi, Ngò má nghut nyi lhê nghú é lé lumjîng keq; haú a nghut jáng, kut shit é limik kumlhá pé dông za lháng, lumjîng keq.

<sup>12</sup> Ngò, nungmoq lé teng za taí kôlé, Ngo lé lumjǐng é sũ gi, Ngò kut é muzó lé kut râ nghut lhê. Ngò gi, haũ Íwâ chyáng ló râ nghut é yanmai, haũ yuq gi, hau htoq je kô é muzó pé lé lháng kut râ nghut lhê.

<sup>13</sup> Haũ Yhangzô é yanmai, Íwâ é hpungwup shingkang wó hũ ló shoq, Ngá é myǐng lé lang luĩ, nungmoq haĩ jung dung kôlhang, Ngò gyo byi râ nghut lhê.

<sup>14</sup> Nungmoq gi, Ngá é myǐng lé lang luĩ, haĩ dung kôlhang, Ngò gyo byi râ nghut lhê.

### *Chyoiyúng Woi-nyí Byi Râ Dang-gidiq*

<sup>15</sup> Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê.

<sup>16</sup> Haũ Íwa gi, nungmoq eq ahtum abyuq nyi nyi râ nghut é, hpaqchyí byi Sũ gotũ rayuq, nungmoq lé byi râ matú, Ngò gi, haũ Íwa lé dung râ nghut lhê.

<sup>17</sup> Haũ yuq gi, tengmán é Woi-nyí nghut lhê. Haũ mingkan gi, Woi-nyí haũ lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luĩ, nungmoq má nyi to râ Sũ nghut é yanmai, nungmoq gi, Yhang lé sê akô.

<sup>18</sup> Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé râ nghut lhê.

<sup>19</sup> Adê myáng má, haũ mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó râ nghut lhê.

<sup>20</sup> Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haũ buinyi má, nungmoq sé kó râ nghut lhê.

<sup>21</sup> Ngá é hkunmó pé lé wó mù, châng kut é sũ ó yuq nghut kôle, Ngo lé chyitdap é sũ nghut ri. Ngo lé chyitdap é sũ lé gi, Ngá Wa chyitdap râ

nghut lhê; Ngò le, haũ yuq lé chyitdap luĩ, Ngá gũng lé yhang, yhang lé shit râ nghut lhê." gâ ri.

<sup>22</sup> Hau htâng, (Yudaq Iskarut a nghut sũ) Yudaq gi, "Yhumsǐng ê, Nàng gi, haũ mingkan lé Náng gũng a shit e za, ngamoq lé shit râ nghut é gi, haĩ mù nghut lhê lú?" ga myí ri.

<sup>23</sup> Haũ hkũn, Yesuq tũ taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haũ yuq lé chyitdap râ nghut luĩ, Ngá hpe gi, haũ yuq chyáng lé mù, yhang eq rahá nyi râ nghut lhê.

<sup>24</sup> Ngo lé a chyitdap é sũ gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haũ pé gi, Ngo lé nhang kat é Sũ, haũ Íwâ é ru nghut lhê.

<sup>25</sup> Ngò gi, shĩ pé banshoq lé, nungmoq eq rahá nyi tô ashĩ u lé taí bê nghut lhê.

<sup>26</sup> Nghut kôlhang, Ngá é myǐng dông, haũ Íwa nhang kat râ nghut é, hpaqchyí byi Sũ nghũ é, haũ Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglhang, nungmoq lé lhoq pun râ nghut lhê.

<sup>27</sup> Ngò gi, nungmoq chyáng, ngu-ingón hkyô tô to byi bê; Ngá é ngu-ingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myit nhiklhum lé, myit wui myit hke é eq gyuq kyũm é hkâdut nhâng kó.

<sup>28</sup> 'Ngò gi, ló byuq luĩ, nungmoq chyáng dum taũ lé râ nghut lhê.' nghũ, Ngò taí é lé, nungmoq wó gyô yũ bê nghut lhê. Nungmoq, Ngo lé chyitdap kô é nghut le gi, haũ Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haũ Íwa gi, Ngá htoq je ko Sũ nghut lhê.

<sup>29</sup> Haũ dut é hkũn, nungmoq lumjǐng kó sháng gaq nghũ, ahkuĩ, haũ a dut shimá, Ngò, nungmoq lé taí kyô é nghut lhê.

<sup>30</sup> Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shì é zau gi, jé lé lo nyi bê nghut ri. Haú yuq gi, Ngo lé up râ ahkáng haí a wó é sù nghut ri.

<sup>31</sup> Nghut kôlhang, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

## 15

### *Tsibiyiq Nuí Eq Akoq Pé É Hkyô*

<sup>1</sup> Ngò gi, haú tsibiyiq nuí akyîng nghut lhê; Ngá Wa gi, tsibiyiq hkyâm yhumsîng nghut lhê.

<sup>2</sup> Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zuí sháng gaq ga, shang pyám byí ri.

<sup>3</sup> Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri.

<sup>4</sup> Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashi wó zuí é a nghut. Haú eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

<sup>5</sup> Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê.

<sup>6</sup> Ngò má a nyi nyi é sù gi, haú dú pyâm é hui luí, kyuq shi byuq é akoq eq wuí ri; haú sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq râ nghut lhê.

<sup>7</sup> Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kôlhang, dung keq; haú hkûn, nungmoq lé byi râ nghut lhê.

<sup>8</sup> Nungmoq gi, haú ashi ga-myhó zuí é dông, Ngá Wâ é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tân shit nyi bekô nghut ri.

<sup>9</sup> Haú Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq.

<sup>10</sup> Ngò gi, Ngá Wâ é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê.

<sup>11</sup> Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê.

<sup>12</sup> Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê.

<sup>13</sup> Haú yhumsîng é luzúm wui é matú, yhumsîng é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri.

<sup>14</sup> Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô.

<sup>15</sup> Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wuí nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri.

<sup>16</sup> Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkûn sheq, Ngá é myîng lé lang mù, haú Íwâ chyáng nungmoq haí jung dung kôle, Yhang byi râ nghut lhê.

<sup>17</sup> Nungmoq yhangchang chyitdap lhum keq; haú gi, Ngá é hkunmó nghut lhê.

*Haú Mingkan Gi, Chángzô Pé Lé A Jú É Hkyô*

<sup>18</sup> Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

<sup>19</sup> Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri.

<sup>20</sup> 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bún nyi keq. Ngo lé lháng, yhangmoq zing-rí yû bekô nghut le gi, nungmoq lé le, zing-ri kó râ nghut lhê. Ngò mhogshit é hkyô lé, yhangmoq cháng kô é nghut le gi, nungmoq mhogshit é lé le, cháng kó râ nghut lhê.

<sup>21</sup> Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluí nghut ri.

<sup>22</sup> Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo.

<sup>23</sup> Ngo lé a jú é sù gi, Ngá Wa lé le a jú é sù nghut ri.

<sup>24</sup> Haû ó yuq lháng a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklaí kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri.

<sup>25</sup> Haû gi, 'Yhangmoq gi, jumgúyô má Ngo lé a jú kut akô nghut ri.'<sup>☆</sup> ga, yhangmoq é tarâ má kâ tô é dang lé lhoq dik é nghut ri.

<sup>26</sup> Haû Íwâ chyáng mâ é, Ngò nhang kat râ nghut é, Íwâ mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô lé saksé hkám byi râ nghut lhê.

<sup>27</sup> Nungmoq le, Ngò eq rahá sâng-hi

mai nyi bekô nghut é yanmai, saksé hkám byi ra kó râ nghut lhê.

## 16

<sup>1</sup> Nungmoq gi, myit lingbat jowò a joq kó sháng gaq nghû, haû pé ban-shoq lé, Ngò, nungmoq lé taí kyo bê nghut lhê.

<sup>2</sup> Yhangmoq gi, nungmoq lé, tara-jong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû dông mai Garai Gasang lé do-jaú nyi lhê ga myit yu é ahkyíng, gè gè yhang, jé râ nghut lhê.

<sup>3</sup> Yhangmoq gi, haû Íwâ lé le, Ngo lé le, a sé kô é yanmai, haû su kut kó râ nghut lhê.

<sup>4</sup> Nghut kôlhang, nungmoq lé, Ngò sidiq byi é hkyô lé, ahkyíng jé jáng nungmoq bún nyi kó sháng gaq nghû, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

### *Chyoiyúng Woi-nyí é muzó*

<sup>5</sup> Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lhú?' ga, Ngo lé a myi kó nghut ri.

<sup>6</sup> Ngò, nungmoq lé, haû hkyô pé taí kyô é yanmai, nungmoq é i-myit unghkaû má iyon hkyô byíng to bekô nghut ri.

<sup>7</sup> Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaqchyí byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê.

<sup>8</sup> Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tún shit râ nghut lhê.

☆ 15:25 Hkya-on 35:19; 69:4



<sup>9</sup> Haû yubak mara wó é eq séng luí ga jang, byu pé gi, Ngo lé a lumjáng kô é yanmai nghut ri.

<sup>10</sup> Haû dingmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri.

<sup>11</sup> Haû tarâ jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

<sup>12</sup> Ngò gi, nungmoq lé taí râ hkyô myo myo wó ashî; nghut kôlhang, ahkuí, nungmoq wó hkâm kó râ a nghut.

<sup>13</sup> Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé râ nghut lhê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luí, dut lò râ hkyô pé lé le, nungmoq chyáng taí pyô râ nghut lhê.

<sup>14</sup> Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hû ló nhâng râ nghut lhê.

<sup>15</sup> Haû Íwâ wó é lhunglhang gi, Ngá é chyat nghut lhê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng râ nghut lhê nghû, Ngò taí é nghut lhê.

<sup>16</sup> Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ ri.

### *Changzô Pê É Iyon Hkyô Gi, Gabú Hkyô Taú Dut Râ*

<sup>17</sup> Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê." gâ é eq 'Ngò gi, Íwâ chyáng ló râ nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhum bum akô.

<sup>18</sup> Hau htoq agó, yhangmoq gi, "Adê myáng má,' gâ é gi, Yhang haí jung gá nau lhê lú? Nga-nhúng gi,

Yhang haí taí nau é lé a sê gyo." ga, taí lhum bum akô nghut ri.

<sup>19</sup> Yesuq gi, yhangmoq myi naû kô é hkyô lé sê ri; haû mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó râ nghut lhê; hau htâng, dum adê myáng má, nungmoq gi, Ngo lé myàng kó râ nghut lhê.' nghû, Ngò taí é lé, haí jung gá nau lhê laq nghû, rayuq eq rayuq myi lhum nyi akô lú?"

<sup>20</sup> Ngò, nungmoq lé teng za taí kôlé, haû mingkan gi, gabú nyi é u lé, nungmoq gi, ngaù é eq iyon yón é hui kó râ nghut lhê. Nungmoq gi, iyon yón é hui kó râ nghut lhê; nghut kôlhang, nungmoq é iyon hkyô gi, gabú hkyô taú dut râ nghut lhê.

<sup>21</sup> Myiwe gi, zoshâng hkû râ nghut jáng, zohkû-nò nò râ ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haû no hpu é hkyô lé a bun byuq lo nghut ri.

<sup>22</sup> Haû eq rajung za, ahkuí gi, nungmoq iyon yôn é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó râ nghut lhê; nungmoq é gabú hkyô haû lé, nungmoq chyáng mai ó yuq èq le wó yu pyám byi râ a nghut.

<sup>23</sup> Haû buinyi má, nungmoq gi, Ngo lé, haí le a dung lo kó râ nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng haí dung kôle, Yhang byi râ nghut lhê.

<sup>24</sup> Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó râ nghut luí, nungmoq é gabú hkyô gi, byíng jup lò râ nghut lhê.

<sup>25</sup> Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chùng lô e za, haû Íwâ eq sêng é hkyô, nungmoq lé san za taí kyô é ahkyíng jé râ nghut lhê.

<sup>26</sup> Haú buinyì má, nungmoq gi, Ngá é myìng lé lang luí dung kó rà nghut lhê. Ngò gi, nungmoq é matú, haú Íwâ chyáng dung byi rà nghû taí nyi é a nghut.

<sup>27</sup> Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjìng kô é yanmai, haú Íwa yhang, nungmoq lé chyitdap é nghut lhê.

<sup>28</sup> Ngò gi, haú Íwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwâ chyáng dum taú ló rà nghut lhê." gâ ri.

<sup>29</sup> Haú hkûn, Yesuq é chángzô pé gi, "Ahkuí, Nàng gi, dangtú a chùng é dông, san za taí kyô nyi é nghut bê!

<sup>30</sup> Nàng gi, lhunglháng lé sê é sù nghut é lé le, Nàng lé, ó yuq èq le dangmyi myi nó a rà é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjìng lhê." ga taí bum akô.

<sup>31</sup> Haú hkûn, Yesuq tû taí é gi, "Nungmoq, ahkuí lumjìng bekô lúh?

<sup>32</sup> Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq rà ahkyíng jé lo nyi bê nghut ri; ahkuí lháng jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

<sup>33</sup> Nungmoq gi, Ngò má nguingón hkyô wó kó sháng gaq nghû, Ngò gi, haú hkyô pé lé taí kyô é nghut lhê. Nungmoq gi, mingkan shí má, wuìhke hkyô hui kó rà nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gâ ri.

## 17

### *Yesuq Kyûdung É Hkyô*

<sup>1</sup> Yesuq gi, haú su ga taí é htâng má, mauhkûng shut tu wú luí, kyûdung é gi, "Áwa ê, ahkyíng jé bê nghut ri;

haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hù ló nhâng laq ô!

<sup>2</sup> Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglháng bang lé up rà ahkáng, Yhang lé byi tô é yanmai nghut ri.

<sup>3</sup> Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê.

<sup>4</sup> Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê.

<sup>5</sup> Áwa ê, haú mingkan lháng a joq shí mai, Ngò, Nàng eq rahá chôm wó é hpungwup shingkang èq, ahkuí, Náng é myoq hí má, Ngo lé hpungwup shingkang dan hu nhâng laq.

### *Chángzô pé matú, Yesuq kyûdung byi é hkyô*

<sup>6</sup> Mingkan mai, Nàng, Ngo lé hkyin htoq yû byi é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri.

<sup>7</sup> Nàng, Ngo lé byi é lhunglháng gi, Náng chyáng mâ é nghut é lé, ahkuí, yhangmoq sé bekô nghut ri.

<sup>8</sup> Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri.

<sup>9</sup> Ngò gi, yhangmoq é matú kyûdung byi lhê. Ngò gi, haú mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu

mù gâ le, yhangmoq gi, Náng é byu pé nghut akô.

<sup>10</sup> Ngò wó é lhungháng gi, Náng é chyat nghut mù, Nàng wó é lhungháng le, Ngá é chyat nghut lhê. Haû mù, Ngò gi, yhangmoq má hpungwup shing kang hû é hui bê nghut lhê.

<sup>11</sup> Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haû Náng myìng é a-tsam èq yhangmoq lé upzúng nyi aq.

<sup>12</sup> Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byi é myìng hau èq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luí, ó yuq le a byuq byuq é nghut lhê.

<sup>13</sup> Ngò gi, ahkuí, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghû, Ngò gi, haû pé lé mingkan má taí é nghut lhê.

<sup>14</sup> Ngò gi, yhangmoq lé, Náng é mungdang byi bê nghut lhê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri.

<sup>15</sup> Ngò kyûdûng é gi, Nàng, yhangmoq lé mingkan mai shuí htoq yû râ matú dúng é a nghut, haû agè ashop su chyáng mai, yhangmoq lé upzúng yû râ matú sheq dúng é ru nghut lhê.

<sup>16</sup> Ngò gi, mingkan mâ é a nghut é su, yhangmoq le, mingkan mâ é a nghut kó.

<sup>17</sup> Yhangmoq lé, haû tengmán hkyo èq lhoq sân-yúng yû laq; Náng é mungdang gi, tengmán hkyô nghut ri.

<sup>18</sup> Nàng, Ngo lé, mingkan má nhang hâng kat é su, Ngò le, yhangmoq lé,

mingkan má nhang hâng kat é nghut lhê.

<sup>19</sup> Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

*Lumjìng Bang Lhunghâng É Matú, Yesuq Kyûdung Byi É Hkyô*

<sup>20</sup> Ngò gi, yhangmoq é matú baú za kyûdung byi é a nghut; Yhangmoq é danglu é yanmai, Ngo lé lumjìng kó râ bâng é matú le, Ngò kyûdung byi é nghut lhê.

<sup>21</sup> Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjìng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq.

<sup>22</sup> Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byi é hpungwup shing kang lé, yhangmoq lé byi bê nghut lhê.

<sup>23</sup> Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

<sup>24</sup> Áwa ê, haû mingkan lhang a joq shi mai, Nàng, Ngo lé chyitdap luí byi tô é hpungwup shing kang haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

<sup>25</sup> Dingmán é Áwa ê, haû mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri.

<sup>26</sup> Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí,

xoq mù sé nhang nyi shirâ nghut lhê." ga ri.

## 18

*Yesuq Chyup Yû Huí É Hkyô*

*Mht 26:47-56; Mrk 14:43-50; Luk 22:47-53*

<sup>1</sup> Yesuq gi, haú su ga kyûdûng é htâng má, Yhâng é chángzô pé eq rahá, Kedron wuìhkung mai lai byit dap ló luí, haú hpoq má joq é hkyâm ralhum má wang e akô nghut ri.

<sup>2</sup> Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám rà sù Yudaq le sê ri.

<sup>3</sup> Haú mù, Yudaq gi, haú hkyangjong agyi pé eq Hparishe pê chyáng mai nhang kat é noqkuq yhùm zúng bang ra-am eq gyezo rajùm lé, haú jowò shut shuí wang lé lo ri. Haú bang gi, myihu, myibung eq sâm lham pé chung lé lo akô.

<sup>4</sup> Yesuq gi, Yhang má dut lò rà hkyô lhungháng lé sé gû nghut mù, htoq é luí, yhangmoq lé, "Nungmoq, ó yuq lé ho akô lhú?" ga myi ri.

<sup>5</sup> Haú hkûn, yhangmoq gi, "Nazaret wà byù Yesuq lé ho lhê." ga tû tai kôjáng, Yesuq gi, "Ngò gi, haú yuq nghut lhê." ga tai ri. (Yesuq lé appyám sù Yudaq le, yhangmoq eq rahá yap tô ri.)

<sup>6</sup> "Ngò gi, haú yuq nghut lhê." ga Yesuq tai kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

<sup>7</sup> Yhang gi, "Nungmoq, ó yuq lé ho akô lhú?" ga, yhangmoq lé dum myi kat jáng, yhangmoq gi, "Nazaret wà byù Yesuq lé ho lhê." ga tai akô.

<sup>8</sup> Haú hkûn, Yesuq gi, "Ngò gi, haú yuq nghut lhê nghû, nungmoq lé tai kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû tai ri.

<sup>9</sup> Haú gi, "Nàng, Ngo lé byi tô é bang rayuq le lhang, Ngò, a lhoq hpyuq pyám." ga, Yhang tai tô é dang dik rá matú nghut ri.

<sup>10</sup> Haú hkûn, Simun Petruq gi, sâm wun tô é nghut luí, sâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byi ri. (Dui-nhâng zoshâng haú yuq é mying gi, Malhku ga ri.)

<sup>11</sup> Haú mù, Yesuq gi, Petruq lé, "Nàng é sâm lé, shambyâng má xâng pyám aq! Haú Íwa, Ngo lé byi é góm\* lé, Ngò a shuq é wó nyi rà lhú?" ga tai kat ri.

*Yesuq Lé, Anna Chyáng Shuí E É Hkyô*

*Mht 26:57-58; Mrk 14:53-54; Luk 22:54*

<sup>12</sup> Hau htâng, gyezo haú jûm eq yhangmoq é gyezau hpó, Yudaq byu pê é mingsuwún wui gi, Yesuq lé chyup yû mù, tui akô nghut ri.

<sup>13</sup> Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri.

<sup>14</sup> Kayahpaq gi, byu pê é matú rayuq shí hkám byi le je gè rà nghut lhê ga, haú Yudaq byu pé lé hpaqchyí byi é sù yuq nghut ri.

*Yesuq Lé, Petruq Sâng-hi Dam Hengik Pyâm É Hkyô*

*Mht 26:69-70; Mrk 14:66-68; Luk 22:55-57*

<sup>15</sup> Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló ri.

<sup>16</sup> Petruq kúm gi, hkúmdong shinggan má lánq yap tô ri. Haú hkyangjong mó lé rago sê é sù, gotú chángzo haú yuq gi, tai htoq ló mù, hkum zúng é myiwe myhi lé tai luí, Petruq lé shuí hâng yu ri.

<sup>17</sup> Haú hkûn, haú hkum zúng é myiwe myhi gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû tai ri.

\* **18:11** Góm lé shuq ga é gi, jamjau hui rà eq shí hkám rà lé, tai nau é nghut lhê.

18 Haú u lé, gyoq é yanmai, dui-nhâng zoshâng wuì eq noqkuq yhûm zúng bang gi, yhangmoq gyoq gâng râ matú myigyè eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

*Yesuq Lé, Hkyangjong Mó Myí Choq Wú É Hkyô*

*Mht 26:59-66; Mrk 14:55-64; Luk 22:66-71*

19 Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

20 Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zîng é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq.

21 Nàng, haí mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tú taí ri.

22 Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghû dang tú lhê lhú?" ga taí ri.

23 Haú hkûn, Yesuq gi, "Ngò taí shut é nghut le gi, shut é hkyô lé saksé tân shit aq. Nghut kôlhang, Ngò gi, têng é đông ru taí le nhîng, nàng, haí mù Ngo lé pyuq lhê lhú?" ga tú taí ri.

24 Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

*Yesuq Lé, Petruq Xoq He-ngik Pyâm É Hkyô*

*Mht 26:71-75; Mrk 14:69-72; Luk 22:58-62*

25 Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

26 Haú Petruq eq nohkyap zân hpyit pyâm byí é huí su é buinùm nghut

é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lhú?" ga taí ri.

27 Haú hkûn, Petruq gi, xoq he pyâm ri; haú u yhang, woq tân bê nghut ri.

*Pilat É Myoq Hí Má, Yesuq Jé Nyi É Hkun Lhê Hkyô*

*Mht 27:1-2, 11-14; Mrk 15:1-5; Luk 23:1-5*

28 Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuí e ló akô. Haú u gi, napsûn noq ashî nghut ri. Yhangmoq gi, agot a-û a dut e za, htûngli đông Lhoqlhai Poí lé wó zo râ matú, yhúmhaú má a wàng kó nghut ri.

29 Haú mù luí, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lhú?" ga myí ri.

30 Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi rá a nghut." ga tú taí akô.

31 Pilat gi, "Yhang lé, nungmoq yhang shuí ló mù, nungmoq é tarâ đông ló jéyáng keq." ga taí jáng, haú Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lhê." ga tú taí akô nghut ri.

32 Haú su dut é hkyô gi, Yesuq, Yhang hká đông shî râ ga taí é dang lé lhoq dik râ matú nghut lhê.

33 Haú mù, Pilat gi, yhúmhaú má taú wang ló mù, Yesuq lé wut yù luí, "Nàng gi, Yudaq byu pé é hkohkâm nghut lhê lhú?" ga myí ri.

34 Haú hkûn, Yesuq gi, "Haú gi, náng é myit đông taí é nghut lhê lhú? A nghut jáng, góbang mai, nang lé, Ngá é hkyô taí kyo luí nghut lhê lhú?" ga taú myí ri.

35 Pilat gi, "Ngò gi, Yudaq byù nghut lhê lhú? Haú Náng é byù myù eq Náng é hkyangjong agyi pé sheq, Nang lé, ngá loq má ap byí é ru nghut lhê. Nàng gi, haí kut é nghut lhê lhú?" ga dum myí ri.

36 Haú hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haú Yudaq byu pé, Ngo lé a wó chypu yu lo shoq, Ngá é dui-nhâng zoshâng wui, Ngo lé chôm hung yù kó râ nghut lhê. Nghut kôlhang, Ngá é mingdán gi, mingkan shî eq a séng é ru nghut lhê." ga taí ri.

37 Haú mù, Pilat gi, "Haú jáng, Nàng gi, hkohkâm nghut bê lhú?" ga myí jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haú tengmán hkyô lé saksé hkám râ matú, Ngò, mingkan htoq má jé lé é nghut lhê. Haú tengmán hkyô eq séng é sù ó yuq le, Ngá é dang lé gyô ri." ga tû taí ri.

38 Haú hkûn, Pilat gi, "Tengmán hkyô gâ é gi, haí jung lhú?" ga myí ri. Yhang gi, haú su ga myí luí, haú Yudaq byu pé chyáng dum htoq ê mù, "Shí yuq chyáng mara hûn râ hkyô, ngò a myàng nghut ri.

39 Nghut kôlhang, haú Lhoqlhai Poí u lé, nungmoq é matú, ngò, htóng byû rayuq nhang htoq kat byi byi kut é htung, nungmoq wó akô. Haú mù, 'Yudaq byu pé é hkohkâm' lé, nhang htoq kat byi râ lé, nungmoq ô nau akô lhú?" ga myí ri.

40 Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

## 19

*Yesuq Lé, Tapzîng Má Jén Sat Râ Matú Doqđân É Hkyô*

*Mht 27:15-31; Mrk 15:6-20; Luk 23:13-25*

1 Haú mù luí, Yesuq lé lêng she yù mù, nhuq bat râ matú, Pilat hkunmó hkyô ri.

2 Haú gyezô pé gi, zujanmaú saí yù kôluí, Yesuq é ulhum má tsung byi kômù, Yhang lé, buhîng nè hut byí akô nghut ri.

3 Hau htâng, yhangmoq gi, Yhâng chyáng dum huí ê ê kut luí, "Yudaq

byu pé é hkohkâm ê! Chyung hîng xê hîng nyí sháng gaq ô!" ga taí kômù, Yhâng é myoqđong má pyuq byí akô nghut ri.

4 Pilat gi, haú Yudaq byu pé chyáng radàm dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byí lhê." ga taí ri.

5 Yesuq gi, haú zumuq tsung tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

6 Haú hkyangjong agyi pé eq yhangmoq é noqkuq yhûm zung bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tû taí ri.

7 Haú hkûn, haú Yudaq byu pé gi, "Ngamoq chyáng tarâ rahkat joq lhê; tarâ haú dông ga jang, Yhang gi, shí gíng bê nghut ri; hkâsu mù gâ le, Yhang gi, Garai Gasâng é Yhangzo haú nghut lhê gâ ri." ga xoq taí akô.

8 Pilat gi, dang haú lé wó gyo jáng, je gyô gyuq luí,

9 yhúmhkaú shut dum wang ló mù, Yesuq lé, "Nàng, hkâmâ é sù nghut lhê lhú?" ga myí ri. Nghut kôlhang, Yesuq gi, dang rahkun lhang a tû taí byi nghut ri.

10 Haú hkûn, Pilat gi, "Nàng, ngo lé a tû taí kut lhê lhú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lhú?" ga myí ri.

11 Yesuq gi, "Nàng lé, haú ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haú mù luí, Ngo lé, náng é loq má ap byí é sù gi, mara je bo é nghut lhê." ga tû taí ri.

12 Haú hkûn mai, Pilat gi, Yesuq lé lhoq lhut kat byi nau nyí bê nghut ri. Nghut kôlhang, haú Yudaq byu pé

gi, "Nàng, haú yuq lé nhang pyâm é nghut jáng, nàng gi, hkoséng Kehta q é luzúm a nghut lo; yhumsing gùng lé, hkohkâm gâ é sù gi, hkoséng Kehta q eq shai lhùm é sù nghut lhê." ga, ru jáng garû nyi bum akô nghut ri.

<sup>13</sup> Haú lé wó gyo jáng, Pilat gi, Yesuq lé shuí htoq ê mù, Hebre myíng dōng Gabahta gâ é Luqgok hkàng myhang to jang ngu é jowò mâ é tarâ jéyáng tanghkuq má zung tô ri.

<sup>14</sup> Haú u gi, Lhoqlhai Poí é matú, Hên Lajâng é Buinyi nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

<sup>15</sup> Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhú?" ga myi jáng, haú hkyangjong agyi pé gi, "Haú hkoséng Kehta q mai lai luí, gotú hkohkâm ngamoq a wó." ga, tû taí akô nghut ri.

<sup>16</sup> Hau htàng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekô nghut ri.

*Tapzîng Má Jén Pyâm É Hkyô*  
*Mht 27:32-44; Mrk 15:21-32; Luk 23:26-43*

<sup>17</sup> Yesuq gi, yhumsing é tapzîng lé waq mù, Hebre myíng dōng Golgahta gâ é, Ugyap joq é Jowò gâ é jang má htoq jé e ri.

<sup>18</sup> Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahyam shut rayuq kut jén to kô é nghut luí, Yesuq gi, gyoro má nghut ri.

<sup>19</sup> Pilat le, masat laiká kê yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÙ YESUQ" gâ tô ri.

<sup>20</sup> Yesuq lé jén tô é jowò gi, myuq eq chyâng lhùm é htoq agó, haú masat laiká gi, Hebre dōng le, Latin dōng le, Grik dōng le, kê tô é yanmai, haú Yudaq byu pé myo myo gi, masat laiká haú lé nghap bum akô nghut ri.

<sup>21</sup> Haú Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghú hkâkâ, 'Ngò gi, Yudaq byu pé é hkohkâm nghut lhê ga, Yhang taí ri.' nghú luí sheq ká aq." ga taí akô.

<sup>22</sup> Haú hkûn, Pilat gi, "Ngò kê é dōng, ngò kê to bê nghut lhê." ga tû taí ri.

<sup>23</sup> Haú gyezô pé gi, Yesuq lé tapzîng má jén tap pyâm é htàng má, Yhâng é mebu pé lé yù mù, myí hkyam gàm luí, rayuq rahyam yu akô; haú ahte bu lé le, gàm râ kê akô; nghut kôlhang, haú gi, hkyupshi a bo e za, awang mai ahpyo hpyot kut woq tô é nghut ri.

<sup>24</sup> Haú mù, yhangmoq gi, "Bu shí lé gi, a lêng cheq e za, ó yuq myang yù ang râ laq, hkyín shosé she wú sháng." ga, rayuq eq rayuq taí lhum akô.

Haú gi,  
"Yhangmoq, Ngá é mebu lé chôm gam yù kó râ; Ngá é ahtê bú é matú, hkyín shosé shê kó râ nghut lhê."\*

gâ é Chyúmdang lé lhoq dik râ matú dut é nghut lhê. Haú mù, gyezô pé gi, haú su kut bekô nghut ri.

<sup>25</sup> Haú Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô.

<sup>26</sup> Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê\* nung zo lé wú aq." ga taí mù,

<sup>27</sup> chángzo haú lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhùm shut shuí ló bê nghut ri.

*Yesuq Soqkâng Byit É Hkyô*  
*Mht 27:45-56; Mrk 15:33-41; Luk 23:44-49*

\* 19:24 Hkya-on 22:18 \* 19:26 Ánu ê, gâ é lé, Grik dōng gi, "myiwe myhí ê" ga bo tô é nghut lhê.

28 Hau htâng, Yesuq gi, ahkuí, muzó bàn bê nghut é lé sé luí, haú Chyúmdang lhoq dik râ matú, "Ngò, wuì shit ri." ga taí ri.

29 Haú má, tsibiyiq wing chyîn rayambú joq tô ri; haú mù, yhangmoq gi, wuìmaù lé tsibiyiq wing chyîn haú má jum yù luí, jàm-yang ahpýo má tuí tap mù, Yhâng é nhutwuí jé shoq yhun byí akò nghut ri.

30 Yesuq gi, tsibiyiq wing chyîn haú lé shuq yù mù, "Mù bàn bê." ga taí ri. Yhang, haú su ga taí eq yhang, ulhum nghuq ló mù, kâng byit bê nghut ri.

31 Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haú mù, Yudaq byu pé gi, Bánno buinyì má, mànq pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mànq pé lé yù hkyô pyám nhâng râ matú, Pilat chyáng dúng tôngbán akò.

32 Haú mù luí, gyezô pé gi, lé mù, Yesuq eq jén huí su nhik má é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akò nghut ri.

33 Nghut kôlhang, yhangmoq gi, Yesuq chyáng jé é hkûn, Yhang shi to lánq bê nghut é lé myàng kômù, Yhâng é hkyí lé a bat hkyuí byí kó nghut ri.

34 Nghut kôlhang, gyezo rayuq gi, Yesuq é namcham má lham eq htau kat byi jáng, radá dâm sui eq wuì yui htoq lo ri.

35 Haú lé myàng é sù gi, saksé hkám byí ri; yhâng saksé hkám é hkyô gi, tengmán ri. Haú yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri.

36 Haú hkyô pé dut é gi, "Yhâng é showui rahkat lháng a lhoq hkyuí râ nghut lhê." ☆ gâ é Chyúmdang haú lhoq dik râ matú nghut lhê.

37 Chyúmdang gotú ralhum má le, "Yhangmoq eq htau htông é sù lé, yhangmoq tu wú kó râ nghut lhê." ☆ gâ é bo tô ashî nghut ri.

*Yesuq Lé, Myhup Yhum É Hkyô*  
*Mht 27:57-61; Mrk 15:42-47; Luk 23:50-56*

38 Hau htâng, Yesuq é chángzo dut nyi é Aramahti myuq byû Yosep gi, haú Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byí kat jáng, yhang gi, gungsôm haú lé, lé yu ló bê nghut ri.

39 Yhang gi, hí hkûn, myín lé, Yesuq lé é huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri.

40 Yhangnhik gi, Yesuq é gungsôm lé yù mù, Yudaq byu pé é mànq yhum htông eq rajung za, namngón jung eq rahá, pán yúng eq htup yup to byí akò.

41 Haú Yesuq lé tapzîng má jén sat pyâm é jowò nám má, hkyâm ralhum joq ri; ó yuq lé le a lheq wú shí é, lup sik ralhum hkyâm hkaú má joq tô ri.

42 Haú nyí gi, Yudaq byu pé é Hên Lajang Buinyì nghut é yanmai le, lup haú le chyâng é yanmai le, yhangnhik gi, Yesuq lé, haú má é lheq tô akò nghut ri.

## 20

### *Lup Akôm*

*Mht 28:1-10; Mrk 16:1-8; Luk 24:1-12*

1 Bánno buinyì htâng, napsûn noq le mau a bó shimá, Magadalaq wà mà é Mariq gi, haú lup má é jé le, lup hkum mà é luqlong huí hpyuq to lánq é lé myang ri.

2 Haú mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haú Yhumsîng lé, lup mai yu htoq ló byuq bekô; hkámá é kat to kô é lé, ngamoq a sé." ga taí ri.

3 Haú mù, Petruq eq chángzo haú gi, lup shut e ló akò.

4 Yhangnhik í yuq é din akò; nghut kôlhang, chángzo haú gi, Petruq htoq má wó dîn luí, lup má hí din jé e ri.



5 Haú mù, yhang gi, ahkaû shut ngóm wú kat é hkûn, haú pán yúng htui leq tô é lé myang ri; nghut kôlhang, yhang gi, a wang ê nghut ri.

6 Hau htâng, Simun Petruq gi, châng jé luí, lup hkaû shut wang e ri; haú hkûn, yhang gi, haú má pán yúng htui joq tô é lé le,

7 haú Yesuq é ulhum má htup é panchoq lé le, myang ri. Panchoq haú gi, pán yúng htui eq rahá a nghut e za htui jup leq tô ri.

8 Haú lup má hí jé é chángzo le, ahkaû má wang ê luí, myàng jáng, lumjúng bê nghut ri.

9 (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.)

10 Hau htâng, haú chángzô nhik gi, yhûm taú ló bekô nghut ri.

*Magadalaq Wà Mâ É Mariq Lé, Yesuq Htoq Shit É Hkyô*

*Mrk 16:9-11*

11 Nghut kôlhang, Mariq gi, lup shinggan má ngau yap tô ri. Yhang gi, ngau uchang lup hkaû má ngóm wú kat ri.

12 Haú hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyi htâng shut rayuq, umhtúng shut rayuq, zung to kô é lé, myang ri.

13 Yhangnhik gi, "Myiwe myhí ê, nàng, haí mù ngau nyi lhê lhú?" ga myi kôjáng, yhang gi, "Ngá é Yhumsing lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tû taí ri.

14 Haú su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

15 Yesuq gi, "Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarâ ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ." ga taí ri.

16 Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haú gi, "Sarâ ê" gâ é lichyúm nghut ri.)

17 Yesuq gi, "Ngo lé hkâzáng shi; hkâsu mù gâ le, Ngò gi, haú Íwâ chyáng a taú doq ló shí é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghû, ló taí kyo aq." ga, yhang lé taí kat ri.

18 Magadalaq wà mâ é Mariq gi, chángzô pê chyáng ló mù, "Yhumsing lé, ngò myàng bê!" ga taí luí, yhang lé shit kat é pé lé, taí kyô ri.

*Yesuq, Yhâng É Chángzô Pé Lé Htoq Shit É Hkyô*

*Mht 28:16-20; Mrk 16:14-18; Luk 24:36-49*

19 Haú nyí, Bánno buinyi htang myin lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri.

20 Yhang gi, haú su ga taí é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haú Yhumsing lé myàng kôjáng, gyai gabú bùm bekô nghut ri.

21 Yesuq gi, "Nungmoq nguingón yuqyo nyi sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri.

22 Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap yù keq.

23 Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lhê; nungmoq a hkyut byí é nghut jáng, mara haú pé gi, hkyut pyám é hui râ a nghut." ga taí ri.

*Htomaq Lé, Yesuq Htoq Shit É Hkyô*

<sup>24</sup> Haû chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haû chángzô pé eq rahá a nyi to nghut ri.

<sup>25</sup> Haû mù luî, gotû chángzô pé gi, yhang lé, "Haû Yhumsîng lé, ngamoq myàng bê." ga taî kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhuî èq jói wú é eq, Yhâng é namcham má, ngá é loq èq myang lap wú é za a nghut jáng, haû lé ngò lumjîng râ a nghut." ga taî ri.

<sup>26</sup> Rabat myáng jáng, chángzô pé gi, haû yhúmhaû má dum nyi tô akô; Htomaq le, yhangmoq eq rahá nghut nyi ri. Haû hkum pé myhî to kôlhang, Yesuq gi, lé jé mù, yhangmoq é agùng má yap to luî, "Nungmoq nguîngón yuqyo nyi sháng gaq!" ga taî ri.

<sup>27</sup> Hau htâng, Yhang gi, Htomaq lé, "Náng é loqnyhui, shî má lé jói mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga taî ri.

<sup>28</sup> Haû hkûn, Htomaq gi, "Ngá é Yhumsîng, ngá é Garai Gasang è!" ga Yhang lé taî ri.

<sup>29</sup> Yesuq gi, yhang lé, "Nàng gi, Ngo lé myang é yanmai, lumjîng é a nghut lú? A myàng kôlhang, lumjîng é bang gi, hkungsô wó nyi ri." ga taî ri.

<sup>30</sup> Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pê hí má kut shit bê nghut ri.

<sup>31</sup> Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng râ matú eq, lumjîng é yanmai, nungmoq Yhâng é myîng má asak wó kó râ matú, shî hkyô pé lé kê tô é nghut lhê.

**21***Ngozo Wó Chyup Yu É Limik Kumhá*

<sup>1</sup> Hau htâng má, Yesuq gi, Tiberi nhông yàm má, Yhâng é chángzô pé lé

dum htoq shit ri. Yhang htoq shit é hkyô gi, a-ô mâ é dông nghut ri.

<sup>2</sup> Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá nyi to bum akô.

<sup>3</sup> Haû hkûn, Simun Petruq gi, yhangmoq lé, "Ngò gi, ngozo kóng è râ." ga taî jáng, yhangmoq gi, "Ngamoq le cháng lé râ." ga taî akô. Haû mù luî, yhangmoq gi, htoq è mù, haû lhaî má wàng bekô nghut ri; nghut kôlhang, haû myîn, radu lháng a wó kóng kó nghut ri.

<sup>4</sup> Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haû chángzô pé gi, Yesuq nghut é lé a wú sé kó nghut ri.

<sup>5</sup> Yesuq gi, yhangmoq lé, "Luzúm wui è, nungmoq, ngozo wó akô lú?" ga, wut myi kat jáng, yhangmoq gi, "A wó." ga tú taî akô.

<sup>6</sup> Haû hkûn, Yhang gi, "Nungmoq é gùn lé, haû lhai é loqyo hkyam shut dú hkyô kat keq; haû jáng, nungmoq wó kóng yù kó râ nghut lhê." ga taî ri. Haû mù, yhangmoq gi, gùn dú hkyô kat é hkûn, ngozo lùm myô é yanmai, haû gùn lé lháng a wó lêng yù lo kó nghut ri.

<sup>7</sup> Haû mù luî, haû Yesuq chyitdap é chángzo gi, Petruq lé, "Yhumsîng ru nghut ri." ga taî ri. Simun Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhîng mó lé, yhâng é gùng má baíyup yù mù, wui hkaû má byam wang ló bê nghut ri.

<sup>8</sup> Haû chángzo góbang gi, wuiyàm eq ngo xê làm kê za wê é yanmai, ngozo byîng tô é gùn lé, wuiyàm shut lhaî mai she jé lo akô nghut ri.

<sup>9</sup> Yhangmoq gi, wuiyàm má jé dap ló kê é hkûn, myigye gyúng é myihkyóm htoq má ngozo nyhîn tô é lé le, muk ratsuí jóq tô é lé le, myang akô.

<sup>10</sup> Yesuq gi, yhangmoq lé, "Haû, ahkaû za nungmoq wó kóng yu é ngozo, ra-am yù lé keq." ga taî ri.

11 Haû mù, Simun Petruq gi, lhai má doq ji luí, kô é ngozo rasho ngó xe sôm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri.

12 Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haû Yhumsîng nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri.

13 Yesuq gi, lé mù, muk lé ê yù luí, yhangmoq lé byí ri; ngozo lé le, haû su kut ri.

14 Yesuq gi, shi é mai lhoq dui toq yù huí é htâng, Yhâng é chángzô pé lé htoq shit é má, shí gi, sum dâm nghû râ dâm nghut ri.

#### *Yesuq Eq Petruq*

15 Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lú?" ga myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tû taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

16 Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsîng ê, ngò, Nàng lé chyitdap é hkyô lé, Nàng sê lhê." ga tû taí ri. Haú hkûn, Yesuq gi, "Ngá é sau pé lé, rém aq." ga taí ri.

17 Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myí ri.

Haú hkûn, Petruq gi, "Nàng gi, ngo lé chyitdap lhê lú?" ga, yhang lé Yesuq eq sùm dam dâm taí é yanmai, yhâng myit nò luí, "Yhumsîng ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haú hkûn, Yesuq gi, "Ngá é sau pé lé, baú aq."

18 Ngò, nàng lé teng za taí lé, nàng, zorâm nghut é hkûn gi, yhumsîng

gùng yhumsîng hpyihit baíyup\* yù mù, ê nau é jowò hkangmó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyuq eq hpyihit baíyup byi mù, nàng a é nau é jowò shut shuí ê râ nghut lhê." ga taí ri.

19 (Yesuq haû su ga taí é gi, haû Petruq, hkâsu kut shi é dông mai, Garai Gasâng é hpungwup shingkang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

20 Haú hkûn, Petruq gi, lhing wú kat le, haû Yesuq chyitdap é chángzo, yhangmoq htâng châng wún é lé myàng ri. Chángzo haû gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lú?" ga, myi wú é sù nghut ri.

21 Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lú?" ga myí ri.

22 Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú? Nàng gi, Ngá htâng cháng aq." ga tû taí ri.

23 Dang hau é yanmai, chángzo haú yuq a shí râ nghut lhê gâ é danglám gi, haû gumang wui chyáng byo myín to bê nghut ri. Nghut kôlhang, Yesuq gi, haú yuq a shí râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú?" ga, taí é ru nghut lhê.

24 Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

25 Yesuq gi, gotû muzó myo myo le kut ashí nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghû, ngò wó myit ri.

\* 21:18 *Hpyihit baíyup* gâ é lichyúm gi, mebu wut luí ri ri kut tô é lé gâ lhê.

## LAGYO Laiká (Acts)

### *Yesuq, Mauhkûng Má Shuî Yù Huî É Hkyô*

<sup>1</sup> Htohpiluoq ê, Yesuq yhang hkyin yu tô é lagyo pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyi jé shoq,

<sup>2</sup> Yhang kut shit é hkyô pé eq, mhogshit é hkyô pé banshoq lé, hí lhê é laiká buk má ngò kê kat bê nghut lhê.

<sup>3</sup> Yesuq gi, shí hkâm é htâng má, Yhang dui toq bê hkyô lé, lumging é saksé myo myô èq yhangmoq lé tân shit mù, buinyi myi xê nyi gyoro má yhangmoq chyáng lé htoq shit shit kut luî, Garai Gasang é mingdán hkyô lé hko kyô ri.

<sup>4</sup> Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byi tô é chyunghuoq lé láng nyi keq.

<sup>5</sup> Hkâsu mù gâ le, Yohan gi, wui èq wui-myhup hkâm byi é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai baptisma wó hkam yu kó râ nghut lhê." gâ ri.

<sup>6</sup> Lagyo pé gi, Yhang eq rahá chôm zup ming tô é hkûn, Yhang lé, "Yhumsing ê, nang, haû Israelaq byu pé lé mingdán dum xuq byi râ gi, ahkuî yhang nghut bê lhú?" ga myi akô.

<sup>7</sup> Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra.

<sup>8</sup> Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yu mù luî,

Yerusalem wà mó eq Yuda mau banshoq, Samariq mau eq maumyî htâng shoq, ngá é saksê pé dut kó râ nghut lhê." ga luî, yhangmoq lé taî ri.

<sup>9</sup> Dang haû ban taî é htâng má, yhangmoq wú nyi le, Yhang gi, mauhkûng shut shuî yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

<sup>10</sup> Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nâm má htoq yap lò mù,

<sup>11</sup> "Galile byu pé ê, haî mù luî mauhkûng shut wú tsuq nyi akô lhú? Nungmoq é hí mai mauhkûng shut shuî yu huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taî akô.

### *Yudaq É Jowò Má, Mahtiaq Lé Hkyin Kat É Hkyô*

<sup>12</sup> Hau htâng má, yhangmoq gi, Tsanlun Bùm mai, Yerusalem wà mó shut taû ló bekô.\* Haû gyoro gi, Bánno buinyi má ge sô é í za wê ri.

<sup>13</sup> Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haû bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

<sup>14</sup> Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyû chôm dung dung kut nyi akô.

<sup>15</sup> Buinyi haû yoq má, Petruq gi, lumjing é gumang gu-nhá† wui rasho í xê yuq kô zup zing tô é gung gung má, toq yap mù,

<sup>16</sup> "Gumang gu-nhá wui é, Yesuq lé chyup é bang lé hkyô shuî hí é sù Yudaq eq séng luî, hí hpyang Dawiq é

\* **1:12** Tsanlun bùm eq Yerusalem gyoro gi, déng rawuí hkup kô we ri. † **1:15** Gumang gu-nhá gâ é lé, Grik má gi, gumang za gâ to lhê.

nhut mai Chyoiyúng Woi-nyí taí tô é Chyúmdang gi, dik byuq bê nghut ri.

<sup>17</sup> Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhàng shí hkyô dut bê nghut ri." ga taí ri.

<sup>18</sup> (Yudaq gi, yhang kut é agè ashop é muzó mai wó é ahpau éq myigùng ratóng wui yu é htàng, haú má yhang, a-nghop dông byit gyó mù wam buq goq luí, û banshoq buq myín byuq bê nghut ri.

<sup>19</sup> Haú hkyô lé Yerusalem wà mó má nyí é lhunglhàng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

<sup>20</sup> Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchuyiui dut byuq sháng gaq; haú má ó le a nyí kó sháng gaq.'<sup>☆</sup>

ga luí le, dum

'Yhang wó é ayá lé byù góyuq wó yu pyám byi sháng gaq.'<sup>☆</sup>

ga luí le, bo tô ri.

<sup>21-22</sup> Haú mù luí, Yohan baptisma byí hi é hkûn mai, Yesuq lé nga-nhúng chyáng mai shuí yu é buinyí jé shoq, Yhumsíng Yesuq nga-nhúng eq rahá htoq htoq wàng wàng kut nyí é buinyí banshoq pé má, nga-nhúng eq yhang zum nyí sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

<sup>23</sup> Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô.

<sup>24-25</sup> Haú mù, yhangmoq kyûdung kô é gi, "Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló râ ga, tô pyám tô é yhâng é lagyo ayá é matú shí nhik mâ é nàng hkyin tô é sù lé tûn shit laq ò." ga akô.

<sup>26</sup> Hau htàng, yhangmoq, byù hkyîn shosé she le, Mahtiaq chyáng ang bê.

Haú mai, Mahtiaq lé gi, haú lagyo raxe rayuq má jat kat bê nghut ri.

## 2

### *Chyoiyúng Woi-nyí Jé Gyó Lo É Hkyô*

<sup>1</sup> Penteko-ti\* buinyí jé jáng, lumjíng bang banshoq gi, jowò ralhum má za, chôm zup míng nyi tô akô.

<sup>2</sup> Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhâm byíng shoq dut to bê nghut ri.

<sup>3</sup> Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri.

<sup>4</sup> Yhangmoq lhunglhàng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

<sup>5</sup> Haú u lé, mauhkûng ô má joq é mingdán hkanmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô.

<sup>6</sup> Haú myíng é htê lé wó gyo kôjáng, byù rajum rayò zíng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí,

<sup>7</sup> maú bùm uchyang taí kô é gi, "Wú keq, ahkuí dang taí nyi é byù shí bang lhunglháng gi, Galile byu pé chyat a nghut kó lú?"

<sup>8</sup> Haú nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lú?"

<sup>9</sup> Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia,

<sup>10</sup> Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htung má lhing wang lò bang,

<sup>11</sup> Kreti zinlóng eq Arabiq mau mâ é bang, nga-nhúng gi, yhangmoq hko

<sup>☆</sup> 1:20 Hkya-on 69:25    <sup>☆</sup> 1:20 Hkya-on 109:8

\* 2:1 Penteko-ti gâ é gi, Lhoqlhai Poi lai é htàng ngo

xê nyí jé é buinyí má, kut é poi lé gâ lhê.

kyô é Garai Gasang é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung." gâ ri.

12 Yhangmoq banshoq bang gi, maú úng-âng byuq kômù, "Shí gi, haí wá nghut lhê lú?" ga le, rayuq eq rayuq myí lhum bum akô.

13 Nghut kôlhang, byù ra-am gi, "Shí bang gi, í shuq wut é bang nghut akô." ga luí, taí jihpoi bum akô nghut ri.

### *Petruq Hko Kyô É Mungdang*

14 Haú hkûn, Petruq gi, lagyo góbang raxe rayuq eq toq yap mù, hté mó eq byù haú bang lé taí é gi, "Yudaq byu pé eq Yerusalem wà mó má nyí nyí é lhunglhang bang ê, rago gyô wú keq! Ngò, nungmoq lé, shí hkyô taí kyo kôlé.

15 Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí.

16 Shí hkyô kúm gi, myiqhtoi Yoelaq taí tô é eq rajung za dut é nghut ri.

17 Yhang taí tô é gi,  
'Garai Gasang ísu gâ ri: Ló htâng é buinyí pé má, Ngò Ngá é Woi-nyí lé byù lhunglhang bâng é ahtoq má hut gyun râ nghut lhê.

Haú mù, nungmoq é yuqzo byizô pé gi, myiqhtoi htoi kó râ; nungmoq é zorâm wui gi, myoqwup shing-rán myàng kó râ; nungmoq é hpaú mâng pé gi, yhupmoq myàng kó râ nghut lhê.

18 Buinyí haú pé má, Ngá é dui-nhang zoshâng hpô pé eq dui-nhang zoshâng myhí pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó râ nghut lhê.

19 Ngò gi, ahtoq mauhkung htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé eq kut mù tân shit râ.

20 Haú Yhumsing é kô hkikhkam é buinyí a jé shimá, buí gi,

mauchut byuq, lhamó gi, sui dut byuq é hí dut râ nghut lhê.

21 Haú hkûn, Yhumsing é myíng lé lhang é bang yuq hkangmó gi, hkyi yu é hui kó râ nghut lhê.'<sup>☆</sup>  
gâ ri.

22 Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri.

23 Shí yuq gi, Garai Gasang myit hpyit tô é hkyô eq, hí te sê é hpaqchyí dông, nungmoq chyáng ap pyám é hui mù, nungmoq gi, agè ashop byu pé é loq eq, Yhang lé tapzîng htoq má jén sat pyám nhang bekô nghut ri.

24 Nghut kôlhang, haú shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri.

25 Dawiq gi, shí yuq eq séng luí taí é má,  
'Haú Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

26 Haú mù, ngá i-myt gi, nguingón nyí luí, ngá nhut shô gabú hkya-ôn nyi ri;

ngá é gungdu le myit myoqbyù jowò má nyi nyi rá nghut lhê.

27 Hkâsu mù gâ le, nàng, ngá é woi-nyí lé mosumhkung má tô pyám to râ a nghut.

Nàng, náng é Chyoiyúng Sù lé bup byuq é hui nhang râ a nghut.

28 Nàng, ngo lé asak dui é hkyô sé nhang bê.

Náng é myoq hí má, nàng, ngo lé gabú hkyô lhoq pyíng byi rá nghut lhê.'<sup>☆</sup>

gâ ri.

29 Gumang wui ê, nga-nhông é îchyi íkê Dawiq kâng byit mù, myhup pyám hui bê hkyô lé le, yhâng é lup gi, hkûnyí jé shoq nga-nhông chyáng joq tô é lé le, ngò, nungmoq lé a gyuq a kyum wám taí lhê.

30 Dawiq gi, myiqhtoi rayuq nghut é yanmai, yhâng é awut ashín má é rayuq lé, yhâng é hkohkâm tanghkuq má zung nhâng râ ga Garai Gasang byi tô é danggidiq lé sê to mù,

31 'Hkrisduq† gi, mosumhkung má pyâm to a hui râ eq, Yhâng é gungsho a bup byuq é za, dum dui toq ló râ nghut lhê.', gâ é hkyô lé te sê to luí taí tô ri.

32 Garai Gasang gi, haú Yesuq lé lhoq dui toq yù bê. Ngamoq banshoq bang gi, haú hkyo é saksê pé nghut nyi ri.

33 Haú mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri.

34-35 Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhang, yhang gi, 'Haú Yhumsîng Garai gi, ngá é Yhumsîng lé,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyi shi aq." gâ ri.†

ga luí, taí ri.

36 Hau é yanmai, Garai Gasang gi, nungmoq èq tapzîng má jén sat pyâm é haú Yesuq lé, Yhumsîng eq Hkrisduq dut nhang é hkyô, Israelaq byu pé lhunghâng bang hkyak sê nyi kó sháng gaq ô." gâ ri.

### Sâng-hi Lumjîng É Bang

37 Yhangmoq gi, haú lé wó gyô bùm kôjáng, yhangmoq é i-myit má záng kô é nghut mù luí, "Gumang wui ê,

ngamoq hkâsu kut lo râ lhú?" ga luí, Petruq eq lagyo góbang lé myí akô.

38 Petruq gi, "Nungmoq yuq hkanmó myit lhîng mù, Yesuq Hkrisduq é myîng mai wui-myhup hkâm yù keq; Haú jáng, nungmoq é yubak hkyut pyám byí é hui kó râ nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yù kó râ nghut lhê.

39 Hkâsu mù gâ le, danggidiq haú gi, nga-nhông é Yhumsîng Garai Gasang jì yù râ bang banshoq nghut é, nungmoq eq nungmoq é yhangzo yhangshú pé eq le, mau we má nyi é lhunghâng bang eq le, sêng lhê." ga luí, yhangmoq lé taí kyô ri.

40 Yhang gi, dang gotû myo myô èq le saksê hkâm mù, "Shí agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri.

41 Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyîng kô jat wàng lo bum bekô nghut ri.

### Lumjîng Bang Zùm Yap É Hkyô

42 Haú bang gi, lagyo pé mhoqshit é hkyô, zùm yap é hkyô, muk hpê gam é hkyô‡ eq akyû dúng é hkyô má, i-myit rahkat za chôm châng nyi akô.

43 Lagyo pé kut shit é mauhpo muzó eq limik kumlhá pé myo myô é yanmai, lhunghâng bang gi, gyuq maú nyi bum akô nghut ri.

44 Lumjîng é lhunghâng bang gi, rawò má za zup zîng to mù, azîng zè banshoq lé chôm chung nyi akô.

45 Yhangmoq gi, yhumsîng é sutzè pé lé, ûng pyám mù, yuq hkanmó lé, yhang râ tô é eq rajung za gàm byí akô.

46 Yhangmoq gi, nyí wui myit rahkat zâ èq noqkuq yhûm wàng má nyi nyi akô. Yhumsîng é yhûm pé má le muk hpê gam é hkûn,

47 Garai Gasang lé hkya-on kungtôn uchyang, gabú é eq myit huí é èq

† 2:31 Grik dong *Hkrisduq* gâ é gi, xû but hui Sû gâ é lichyúm nghut mù, Hebre dong *Mesaia* gâ é eq rajung za nghut lhê. ✨ 2:34-35 Hkya-on 110:1 ‡ 2:42 *Muk hpê gam* hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, *Póido* chôm zô é lé gâ lhê.

chôm zo chô mshuq nyi bum akô; byu banshoq bâng é hí má le myoqdong wó bum akô. Haû Yhumsîng gi, nyi wuî yhangmoq chyáng hkyi yù hui bang jat lò nhang ri.

### 3

#### *Hkyi Hten Sû Rayuq Lé, Petruq Lhoq Gê Byi É Hkyô*

<sup>1</sup> Ahkuî, Petruq eq Yohan gi, my-inhtâng zó sum hkyíng lhê é kyûdung nám má, noqkuq yhûm shut doq e ló akô.

<sup>2</sup> Haû hkûn, înu unghkaû mai hkyi hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yunglho hkum ga myhîng é hkúmdong má nyi hkang nyi mó waq lé lô mù, lé nyhi to to kut akô.

<sup>3</sup> Yhang gi, Petruq eq Yohan, noqkuq yhûm haû má wang e ló é lé, myàng luî, lhom dúng nyi ri.

<sup>4</sup> Petruq eq Yohan kúm gi, yhang lé chô m wú tsuq to mù, "Nga-nhik lé tu wú aq." gâ akô.

<sup>5</sup> Haû mù, yhang, yhangnhik chyáng mai rajung jung wó yû râ lé myit myoqbyù luî, yhangnhik lé rago za saî wú tô ri.

<sup>6</sup> Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taî uchyang,

<sup>7</sup> yhâng é loqyo loq má zui mù lâng toq kat ri; haû hkûn jâng, yhâng é hkyi kochang-chap pé wúm bo lò bê nghut ri.

<sup>8</sup> Haû mù, yhang gi, radá dâm toq yap mù sô kat luî, so uchyang, byâm uchyang Garai Gasang lé hkya-on mù, yhangnhik eq rahá noqkuq yhûm má wang ló ri.

<sup>9</sup> Yhang sô e ló nyi é eq Garai Gasang lé hkya-on kungton nyi é lé, lhunglhang bang chô m myang akô.

<sup>10</sup> Haû yuq gi, noqkuq yhum é Yunglho hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luî,

yhâng chyáng dut lò bê hkyo é yan-mai, maú hong byuq bum akô nghut ri.

#### *Petruq Hkô Kyô É Mungdang*

<sup>11</sup> Petruq eq Yohan chyáng haû dung zo sù byin châng tô é hkûn, shiwa byu pé gi, wú maú uchyang, Sholomon jiro p shut, yhangmoq chyáng din yán wang lé lo bum akô.

<sup>12</sup> Petruq haû lé myàng jâng, shiwa byu pé lé taî é gi, "Israelaq byu pé ê, shí yuq é hkyô lé haî mù luî maú nyi akô lhu? Nga-nhik é dingmán hkyô eq wum-o a-tsâm eq, shí yuq lé wó so nhang é su ngâm luî, ngá-nhik lé wú tsuq bum akô lhu? Haû dong a nghut.

<sup>13</sup> Abraham, Isak eq Yakup pê é Garai Gasang, nga-nhûng é îchyî îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byi é nghut ri; nungmoq kúm gi, Yhang lé sat hui shoq ga ap pyám kômù luî, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri.

<sup>14</sup> Haû chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yû kôluî,

<sup>15</sup> Asak Yhumsîng lé gi, sat pyám bekô. Garai Gasang kúm gi, haû yuq lé shi é mai lhoq dui toq yû bê nghut ri; ngá-nhik gi, haû hkyo é saksé nghut nyi lhê.

<sup>16</sup> Yesuq é myîng lé lumjîng é yan-mai, haû lumjîng myit mai za, shi nungmoq myang é sê é sù lé wum-o lhoq pyîng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

<sup>17</sup> Ahkuî, gumang wuî ê, nungmoq é uphkâng bang kut é su, nungmoq le haû hkyô lé a sé mù kut pyám é hkyô lé ngò sê nyi lhê.

<sup>18</sup> Nghut kôlhang, haû hkyô gi, Garaî é Hkrisduq shî-nò jamjau hui râ nghut lhê ga luî, myiqhtoi banshoq



bang lé hí hí mai taí nhang tô é Garai Gasang yhang, lhoq dik é nghut ri.

<sup>19</sup> Hau é yanmai, haú Yhumsing chyáng mâ é ngingón é ahkyíng yàm yoq jé lô râ matú le,

<sup>20</sup> nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhing mù Garai Gasang chyáng lhing lò keq.

<sup>21</sup> Garai Gasang gi, a-nham pyat mai, Yhâng é chyoiyúng myiqhtoí pé é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkung htoq má nyi nhang to râ nghut lhê.

<sup>22</sup> Hkâsu mù gâ le, Mosheq taí tô é le, 'Haú Yhumsing Garai Gasang gi, nungmoq é yhanggu yhangmâng pé chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut lhê.

<sup>23</sup> Myiqhtoi hau é dang lé a gyo sù ó yuq nghut kôlhang, yhumsing é byù myú mai chung hpyit pyâm é hui râ nghut lhê. ✧ gâ ri.

<sup>24</sup> Gè gè yhang, Samuelaq mai, yhâng é htâng má châng pô htoq lo é myiqhtoí pé banshoq bang hko kyô lo é má le, buinyì shí pé eq séng mù taí to bekô nghut ri.

<sup>25</sup> Nungmoq gi, haú myiqhtoí pé é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myú chângjup hkungsô wó kó râ nghut lhê! ✧ gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô.

<sup>26</sup> Garai Gasang gi, nungmoq yuq hkanmó lé yhumsing agè ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

## 4

### *Petruq Eq Yohan Nhk Chyup Huí É Hkyô*

<sup>1</sup> Hkyangjông pé, noqkuq yhùm zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkûn, htoq lé lô kômù,

<sup>2</sup> yhangnhik, shiwa byu pé lé mhogshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô.

<sup>3</sup> Haú mù, yhangmoq gi, yhangnhik lé chyup yù luí, myinhâng mauchut lô bê nghut é yanmai, htang napkyó jé shoq htóng má lhung tô akô.

<sup>4</sup> Nghut kôlhang, mungdang lé wó gyô yu é bang myo myo gi, lumjing kômù luí, yuqgè ngo hkying kô jé shoq myô jat lò bekô nghut ri.

### *Yudaq Byin Tú Wapdoq Má, Yhangnhik Lé Myi Jep Wú É Hkyô*

<sup>5</sup> Htang nyi, yhangmoq é zau wuí, suwún wuí eq tarâ sará pé gi, Yerusalem wà mó má chôm huí zup akô.

<sup>6</sup> Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô.

<sup>7</sup> Haú mù, yhangmoq gi, Petruq eq Yohan lé gung gung má nyhi to luí, "Nungnhik gi, haí a-tsam, ó yuq é mying mai mù shí lé kut akô lú?" ga myi akô.

<sup>8</sup> Haú hkûn, Petruq gi, Chyoiyúng Woi-nyí bying tô é nghut mù luí, yhangmoq lé taí é gi, "Mingbyu wuí é zaugun suwún wuí é,

<sup>9</sup> hkyí hten sù shí yuq lé lhoq gè byí é jeju yanmai, yhang hkâsu kut lhoq ge yù huí é hkyô lé, hkû-nyí nungmoq ngá-nhik lé myi gôn wú naú kô é nghut le gi,

<sup>10</sup> nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzing má jén sat pyám mù, Garai Gasang eq shi é mai lhoq dui toq yu é, Nazaret wà byù Yesuq Hkrisduq é mying mai, shí yuq

gi, nungmoq é hí má îsu wáng wáng zán zán yap tô é nghut ri.

11 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.'<sup>☆</sup>

gâ é gi, Yesuq lé taí é dông nghut ri.

12 Hkyi yù hkyô gi, Yhang mai lai luí gotû a nyí lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myìng mai lai luí, xângzo byu pé lé byí tô é myìng gotû a joq lo é yanmai nghut ri." gâ ri.

13 Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayû byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri.

14 Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri.

15 Haû mù, yhangnhik lé, haû Yudaq byìn tú wapdoq\* mai lhoq htoq to mù, yhangmoq rayuq eq rayuq hpyê lhum kô é gi,

16 "Shí nhik lé hkâsu kut lé gè râ lhú? Yhangnhik kut shit e laklaí kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haû lé a wó hê lo nghut ri.

17 Nghut kôlhang, mingbyû wuì má shí hkyô je riyhang a byo myín ló sháng gaq, ahkuí mai myìng haû lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

18 Haû mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkúm akô.

19 Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai

Gasâng é hí má gè râ, a gè râ lé, nungmoq yhang doqdân yù keq.

20 Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

21 Haû hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kô é nghut mù luí, yhangnhik lé dum tân kyuq luí nhang pyám bekô nghut ri.

22 Hkâsu mù gâ le, haû laklaí kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

### *Lumjîng Bâng É Kyûdung Dang*

23 Yhangnhik gi, nhang kat pyâm é hui kôjáng, yhangnhik é luzúm wui chyáng taù ló kômù, hkyangjong agyi pé eq suwún wui eq yhangnhik lé hkyîm é dang banshoq lé, ló taí kyo akô nghut ri.

24 Haû hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigùng, wuìshuq lung-aû eq, haû pé má, nyí mi-nyí lé hpan tô é, ahko ahkáng lhunglhang wó é Yhumsîng ê,

25 Nang, nang é dui-nhâng zoshâng, ngamoq é íchyí íké Dawiq é nhut mai, Chyoiyúng Woi-nyí eq taí tô é gi, 'Haí mù luí, tûngbaù amyû pé gi, nhikjum yô akô? haí mù luí, byu pé gi, akôm dâ pyám akô lhú?

26 Haû Yhumsîng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuì eq rahá zup zîng bum akô.'<sup>☆</sup>

gâ ri.

27 Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shí má chôm zîng to kôluí, nang xû but byi é sù,<sup>†</sup> nang é

☆ 4:11 Hkya-on 118:22 \* 4:15 Yudaq byìn tú wapdoq lé Grik dông gi, San-hedrin gâ lhê. ☆ 4:26 Hkya-on 2:1-2 † 4:27 Xû but é hkyô gi, Yudaq byu pé htùng dông xû but byi jáng, rajung jung kut râ matú hkyin masat yu é hkyô nghut lhê. Xû but byi é sù gi, Grik dông Mesaia gâ é nghut lhê.

Choyiyúng dui-nhâng zoshâng Yesuq lé gumlau toq râ dô nyi akô.

<sup>28</sup> Náng é wum-o a-tsam eq nàng ô nau é dông dut râ matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri.

<sup>29</sup> Yhumsîng ê, ahkuî yhangmoq taî kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit eq náng é dang lé taî râ matú wum-o byi laq!

<sup>30</sup> Náng é wum-o bo é loq lhâm kat luî, noli nojàng lé lhoq gê byi mù, náng é Choyiyúng dui-nhâng zoshâng Yesuq é myîng mai, limik kumlhá eq mauhpo muzó pé lé kut shit laq ô!" gâ akô.

<sup>31</sup> Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Choyiyúng Woi-nyí byîng lô luî, Garai Gasâng é mungdang lé a gyuq a kyum é za taî bùm bekô nghut ri.

### *Azîng Zê Lé Chôm Gam Chûng Kô É Hkyô*

<sup>32</sup> Haû lumjîng é lhunglhâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô.

<sup>33</sup> Lagyô pé le, haû Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luî, yhangmoq banshoq bâng é ahtoq má jeju myo myo joq nyi ri.

<sup>34</sup> Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhâm wó é bang ó yuq nghut kôlhang, haû pé lé adàm dàm ûng pyám luî wó yu é ngùn le gi,

<sup>35</sup> lagyô pé é hkyî wang má lé to byî akô. Haû mù luî, a wó a lòm sù ó yuq lé le ra tô é eq rajung za gàm byî akô nghut ri.

<sup>36</sup> Haû hkûn, Barnaba ga luî lagyô pé eq myhîng byi é, Kupru ming mâ é Lewiq byù Yosep le, yhang wó é maumyî ratóng lé ung luî, wó yu é ngùn lé lagyô pé é hkyî wang má, lé to byî ri.

<sup>37</sup> Barnaba gâ é dang lichyúm gi, myit wum byi su é yhangzo gâ é lichyúm nghut lê.

## 5

### *Anani Eq Sahpira Nhik É Hkyô*

<sup>1</sup> Nghut kôlhang, Anani ga sù gi, yhangmyi Sahpira eq rahá, yhâng nhâm wó é maumyî ratóng lé ûng pyám luî,

<sup>2</sup> yhangmyi le bo sê é dông, ngùn haû ra-am lé gi, haq myhit yu to mù, ra-am lé za lagyô pé é hkyî wang má lé to byî akô.

<sup>3</sup> Haû mù luî, Petruq gi, "Anani é, Choyiyúng Woi-nyí lé mhaû pyám râ matú eq, maumyî hpau mâ é ra-am lé haq yu to râ matú, haû mù luî, náng é myit má Tsadán le byîng nhang tô lê lhú?"

<sup>4</sup> Maumyî haû joq tô le, náng é zè nghut lê a nghut lhú? Wó ung é ngùn le náng é zè nghut ashî, a nghut lhú? Haû mù luî, nàng haû dông dô lê lhú? Byù lé mhaû é a nghut, Garai Gasang lé mhaû pyám bê nghut ri." ga taî ri.

<sup>5</sup> Anani gi, dang haû lé wó gyo jáng, lêng mù, shi byuq bê nghut ri. Haû hkyô lé wó gyô é bang banshoq le, gyaî yhang gyuq bùm bekô nghut ri.

<sup>6</sup> Haû hkûn, zorâm wui gi, toq mù, yhâng é mâng lé htup luî, ê waq myhup pyâm akô.

<sup>7</sup> Hau htâng, sum hkyîng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.

<sup>8</sup> Haû hkûn, Petruq gi, "Ngo lé taî kyô wú aq. Nungnhik ûng é maumyî hpau gi, shí gû za nghut lê lhú?" ga myi jáng, yhang gi, "Nghut lê, haû gû za nghut bê." ga tú taî ri.

<sup>9</sup> Petruq gi, "Nungnhik gi, haû Yhumsîng é Woi-nyí lé îsu kut chyam wú râ matú, hkâsu mù chôm myit huî akô lhú? Wú aq, náng é yhumsîng hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lê." ga taî ri.

10 Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haû shi to lánq é lé myàng kôluí, waq é mù, yhanglang é nâm má, é myhup pyám bekô.

11 Hau é yanmai, haú hkun lhê é hpúng byù banshoq bang eq, haû su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

### *Byù Myo Myo Lé, Lagyo Pé Lhoq Gê Byî É Hkyô*

12 Ahkuí, lagyo pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haû lumjínq bang gi, i-myit rahkat zâ èq, Sholumon jiroq má chòm hui hui kut bum akô.

13 Shiwa byu pé gi, yhangmoq lé hkunggâ nyi bùm kôlhang, yhangmoq lé a wám é zum bùm kó.

14 Nghut kôlhang, haú Yhumsîng lé lumjínq é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri.

15 Haú mù luí, byu pé gi, Petruq lai lo é hkûn, yhang é wupzo za lhang rayuq yuq é ahtoq má zang sháng gaq ga, nõhpyo huí é bang lé, wà mâ é hkyô yàm má waq htoq é mù, yhuphpú pé eq taphkang pé má lhez tô akô.

16 Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhungháng gi, lhoq gê lhoq yô byî é huí bum akô nghut ri.

### *Lagyo Pé Zing-ri Huí É Hkyô*

17 Hkyangjong mó eq yhang é luzúm wui, Saduke hpúng mâ é byu pé kúm gi, gyai yhang wú manon bùm kôluí, toq mù,

18 lagyo pé lé chyup yû luí, wà mâ é htóng má lhung tô akô.

19 Nghut kôlhang, haú myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuí htoq yû uchyang,

20 "Nungmoq htoq ló mù, noqkuq yhûm má é yap to luí, dui é asak hkyô sik eq sêng é danglù banshoq, shiwa byu pé lé taí kyo keq." ga taí ri.

21 Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hi ló akô.

Haú u lé, hkyangjong mó eq yhang é luzúm wui gi, Israelaq byu pé é suwún wui lhunghang bang lé ji yù mù, Yudaq byin tú wapdoq chòm zung yù luí, lagyo pé lé é shuí yù rà matú htóng shut byù nhang kat akô.

22 Haú bang kúm gi, htong má jé é hkûn, lagyo pé lé a myàng kôjáng, dum taû lò mù lo taí kyo kô é gi,

23 "Htóng hkum le ging ging myhî to lánq ri, htóng zúng bang le hkum yàm má yap tô akô. Nghut kôlhang, hpông wú le, ahkaú má ó le a nyi to lo nghut ri." gâ ri.

24 Noqkuq yhûm zúng é zau hpó eq hkyangjong agyì wui gi, dang haú lé wó gyo kôjáng, "Shí hkyô haí dut lô rà lhú?" ga, gyai gyuq maú bum akô.

25 Haú hkûn, byù rayuq wang lé lô mù, "Wú keq, nungmoq èq htóng má lhung tô é bang gi, noqkuq yhûm má yap to mù byu pé lé mhoqshit nyi bum akô." ga luí, yhangmoq lé taí kyô ri.

26 Haú mù luí, zau hpó haú gi, yhang é a-ô mâ é bang eq é mù, lagyo pé lé é shuí yu akô. Nghut kôlhang, shiwa byu pé luqgok èq dú lô kó rà lé gyuq kô é yanmai, htân htân a wám kut kó nghut ri.

27 Lagyo pé lé shuí jé lô kôjáng, Yudaq byin tú wapdoq hí má yhangmoq lé nyhi tô akô. Haú hkûn, hkyangjong mó gi,

28 "Yesuq é mying lé lang luí a mhoqshit rà matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi rà dâ nyi akô." ga luí, yhangmoq lé taí akô.

29 Haú hkûn, Petruq eq gotû lagyo pé tû taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê.

30 Nga-nhûng é îchyí îwâ pê é Garai Gasang gi, nungmoq eq tapzîng má lhâng sat pyâm é Yesuq lé, shi e mai lhoq dui toq kat bê nghut ri.

31 Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq\* má waq toq to bê nghut ri.

32 Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byí tô é Chyoiyúng Woi-nyí le, shí pê é saksé nghut lhê." ga akô.

### *Gamalelaq Hpaqchyí Byí É Hkyô*

33 Yhangmoq gi, dang haú lé wó gyo kôjáng, lûm gyo nhik-yo naú kômù, lagyo pé lé sat pyám râ lháng myit akô.

34 Nghut kôlhang, mingbyû ban-shoq bâng é hí má aróng wó é tarâ sará Gamalelaq gâ é Hparishe rayuq, haú Yudaq byìn tú wapdoq má toq yap mù, lagyo pé lé razup zo lhoq htoq to nhâng luí,

35 yhang taí é gi, "Israelaq byu pé é, shí bang lé hkâsu kut râ hkyô, rago za hí myit wú keq.

36 Hkâsu mù gâ le, hí hpyang Htu-daq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunghâng bang le byo myín byuq kômù, haí le a wó kut dut byuq akô nghut ri.

37 Hau htâng, myìng jihpán guq yu é buinyi má, Yudaq gâ é Galile byù rayuq pô htoq mù, mingbyû wui lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunghâng bang le, byo myín byuq bekô nghut ri.

38 Ahkuí le, shí bang lé haí le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dá nyi é hkyô pé gi, byù myit dông kut é nghut jáng, htên byoq byuq râ za nghut lhê.

39 Nghut kôlhang, Garai Gasâng chyáng mâ é nghut le gi, nungmoq wó lhoq hkyîng pyám kô râ a nghut. Garai Gasâng é gyè sheq dut lò kô râ nghut lhê." gâ ri.

40 Dang haú lé yhangmoq gyô htuk bum akô. Haú mù, lagyo pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

41 Lagyo pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haú mai gabú myit eq htoq lô bekô.

42 Hau htâng, yhangmoq gi, nyí wui làng noqkuq yhûm má le, rayhûm htâng rayhûm má le, Yesuq gi, Hkris-duq nghut é hkyô gabú danglù lé mhoqshit hkô kyô nyi akô nghut ri.

## 6

### *Garúm Râ Byù Nyhit Yuq Lé Hkyin Yu É Hkyô*

1 Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myìng mu é Yudaq byu pé lé mara hûn dang taí bum akô.

2 Haú hkûn, lagyo raxe í yuq gi, chángzô pé lhunghâng bang lé wut yù mù, "Ngamoq, Îwa Garai Gasâng é mungdang hko kyô é muzó lé rap pyâm to mù, zangbó amú lé za lajang nyi é nghut le gi, a htuk râ nghut lhê.

3 Haú mù luí, gumang wui é, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng mâ é hkyin to

\* 5:31 *Garai é loqyo loq gâ é gi, hpautap hkungga gíng é jowò lé taí nau é nghut lhê.*

keq. Haú bang lé muzó shí lhum hun to râ nghut lhê.

<sup>4</sup> Ngamoq kúm gi, kyûdûng é hkyô eq mungdang hkô é hkyô lé za, no-qzuq tung kut nyî râ nghut lhê." ga taí akô.

<sup>5</sup> Dang haú lé shiwa byù lhunglhâng bang gyô htuk kômù luí, lumjîng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù Antioku wà mó má é Nikolaq pé lé hkyin yù mù,

<sup>6</sup> lagyô pê chyáng shuí ló akô; lagyô pé gi, kyûdung byi kômù, yhangmoq lé loq ke byî akô nghut ri.

<sup>7</sup> Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjîng hkyô má châng nyi bum akô.

#### *Stehpan Chyup Yû Huí É Hkyô*

<sup>8</sup> Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pê é hí má mauhpo muzó pé eq limik kumlhá mó pé tân shit ri.

<sup>9</sup> Haú hkûn, luthkyô ga bâng é tara-jong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhúm akô.

<sup>10</sup> Nghut kôlhâng, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

<sup>11</sup> Haú mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaú taí nhâng râ byù haq lung tô akô.

<sup>12</sup> Haú mù, yhangmoq gi, ming-byû wui eq nhik bô suwún wui, tarâ sará pé lé, chun htau mù, Stehpan lé chyup yû nhâng luí, Yudaq byin tú wapdoq má shuí nyhi tô akô.

<sup>13</sup> Mhaú é saksé byu pé lé le lhoq hâng kat luí, haú bang gi, "Shí yuq, shí

chyoiyúng jowò\* eq jep é tarâ lé shut shai é dang ru taí nyi ri.

<sup>14</sup> Nazaret wà byù Yesuq ga sù gi, jowò shí lé hpyoq pyám mù, nganhúng lé Mosheq eq byî tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

<sup>15</sup> Haú Yudaq byin tú wapdoq má zung to bang banshoq, yhang lé chôm wú tsuq nyi kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

## 7

### *Stehpan Taí É Dang*

<sup>1</sup> Haú hkûn, hkyangjong mó gi, "Dang haú pé têng lhê lhú?" ga luí, yhang lé myi jáng,

<sup>2</sup> Stehpan tú taí é gi, "Gumang wui eq îwa wui ê, gyô wú keq, nganhúng lhunglhâng bâng é îchyí Abraham gi, Haran wà má a ló nyi shí lé, Mesopotamiaq mau má nyi tô ashí hkûn, hpungwup shing kang bo é Garai Gasang gi, yhâng chyáng lé htoq shit mù,

<sup>3</sup> 'Náng é ming eq náng é amyû mai htoq ló luí, ngò tân shit râ ming shut e ló aq.\* ga luí, yhang lé taí ri.

<sup>4</sup> Haú mù, yhang gi, Hkaldea byu pê é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri.

<sup>5</sup> Garai Gasang gi, shí ming má yhang lé silí wunlí nghû râ, hkyi rahkô nang î é myigùng lháng a byî é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shí byi râ ga danggidiq byî to bê nghut ri.

<sup>6</sup> Hau htoq agó, shí hkyô lé Garai Gasang xoq taí é gi, 'Náng é awut ashín pé, túngbàu ming má bíng nyi mù, haú ming bâng eq myi shô zàn jùn zô é eq zing-rî é lé hui kó râ.

\* **6:13** Shí chyoiyúng jowò gi, Yerusalem noqkuq yhúm lé gâ lhê. ✧ **7:3** Apûn 12:1

<sup>7</sup> Nghut kôlhang, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shí má ngo lé noqkuq kó râ nghut lhê.'\* ga le, Garai Gasang taí ri.

<sup>8</sup> Hau htâng, yhang lé ahpyo-kuq hpyit byi râ hkyô eq sêng é dang-shikaq le, byí ri. Haú mù, Abraham gi, Isak lé hku é htâng shit nyí buinyi má ahpyo-kuq hpyit byí ri; Isak gi, Yakup lé hkû mù, Yakup gi, îchýí îwa achyûng raxe í yuq lé hku kat bê nghut ri.

<sup>9</sup> Haú îchýí îwâ pé gi, Yosep lé manôn kôluí, Egutuq ming shut jùn dông ûng kat akô. Nghut kôlhang, Garai Gasang gi, yhang eq rahá nghut nyi mù luí,

<sup>10</sup> wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egutuq ming eq, yhang é hkohkâm-wâng banshoq lé up nhang ri.

<sup>11</sup> Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhûng é îchýí îwâ pé le zoshuq a myang hô zo lo dut byuq bekô nghut ri.

<sup>12</sup> Ahkuí, Yakup gi, Egutuq ming má guqzo joq é hkyô lé wó gyo jáng, nga-nhûng é îchýí îwâ pé lé sâng-hî dâm é nhang ri.

<sup>13</sup> Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri.

<sup>14</sup> Hau htâng, Yosep gi, yhang wa Yakup eq yhumbyù banshoq nyhit xe ngo yuq lé, yhang chyáng pying yù bê nghut ri.

<sup>15</sup> Yakup le Egutuq ming má jé gyó lô luí, yhang eq nga-nhûng é îchýí îwâ pé gi, banshoq haú ming má shí lô byuq bekô nghut ri.

<sup>16</sup> Yhangmoq é mâng lé gi, Shehkem

wà má yu taú lô mù, Shehkem wà mâ é Hamora é yhangzo yhangshu pê chyáng mai, Abraham eq ngùn byi mù wui hpyit tô é lupdùng má lô myhup tô akô nghut ri.

<sup>17</sup> Abraham lé Garai Gasang byí tô é danggidiq dik râ ahkyíng jé lo nyi é u lé,

<sup>18</sup> nga-nhûng é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

<sup>19</sup> Hkohkâm hpó haú gi, nga-nhûng é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é dông mai nga-nhûng é îchýí îwâ pé lé zing-ri bê nghut lhê.

<sup>20</sup> Haú u má, Mosheq lé hkû to bê. Yhang gi, Garai Gasang é hí má gyai yúnglhô é sù nghut ri; yhang gi, yhangwâ é yhûm má lhamó sum hkyap baú tô é hui mù,

<sup>21</sup> htot tô tô é hui jáng, yhang lé Hpara-uq é byizô eq xe yù mù, zosíng kut yù luí, hku kô ri.

<sup>22</sup> Mosheq gi, Egutuq ming mâ é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

<sup>23</sup> Yhang asak myi xê zàn jé lò jáng, yhang é gumang Israelaq byu pê chyáng ê kûm wú râ matú wó myit htoq kat ri.

<sup>24</sup> Ê jé jáng, zing-ri hui nyi é sù rayuq lé é myâng luí, haú yuq lé búng mù, zing-rí nyi é Egutuq byù lé, loq-choq hpuq é dông sat pyâm ri.

<sup>25</sup> Mosheq gi, yhang é byu pé lé yhang é loq dông Garai Gasang hkyi yù hkyô byi nyi é lé, yhang é amyû pé sê gyo byi nhô ngàm kôlhang, yhangmoq a sê gyo byi kó nghut ri.

<sup>26</sup> Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyîn naù luí, 'Ahkaú nhik ê, gumang yhangchang sheq ru nghut lhê nhing, haí mù rayuq eq rayuq byoq lhum nyi akô lhú?' ga taí ngón wú ri.

\* 7:7 Apûn 15:13-14

27 Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyì kut râ matú, nàng lé ó yuq hkyin tô é lhú?

28 A-nyí nap Egutuq byù lé sat pyâm é su, ngo lé le sat pyâm nau ri lhú?\*

29 Mosheq gi, dang hau é yanmai, hpâng luí Midian ming má é nyi byuq ri. Haù má yuqzo í yuq é wó ri.

30 Haù ming má myi xê zàn lai jáng, Sinaq Bùm yàm, yoso hkaù mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

31 Mosheq gi, haù lé myàng jáng, hau é yanmai maú luí, wú wú râ ga huí e ló le, Yhumsîng é htê htoq lo é gi,

32 'Ngò gi, náng îchyí îwâ pé é Garai Gasang, Abraham, Isak, Yakup é Garai Gasang nghut nyi lhê.\* ga ri. Mosheq kúm gi, gyuq nán luí, a wám tu wú nghut ri.

33 Haù Yhumsîng gi, 'Náng é hkyî-tsung hkyut pyâm aq, nàng yap tô é jowò gi, chyoiyúng é myigúng nghut lhê.

34 Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taù kat râ.\* ga luí, yhang lé dum taí ri.

35 Yhangmoq èq, 'Nang lé zau eq tarâ agyì kut râ matú, ó yuq hkyin tô é lhú?' ga luí he-ngik pyâm é Mosheq lé yhang, mhanpúng má htoq shit é maumang lagyo dòng mai, Garai Gasang gi, yhangmoq é zau eq hkyi yù sù kut nhâng luí, taù nhang kat é nghut ri.

36 Haù Mosheq yhang, Egutuq ming má le, Nhong Nè má le, yoso hkaù pé má le, myi xê zàn gyoro má mauho muzó pé eq limik kumlhá pé

tùn shit uchyang, yhâng é byù myû pé lé Egutuq ming mai shuí htoq ló ri.

37 Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoí rayuq lé, Garai Gasang gi, pô htoq lô nhâng râ nghut lhê.\* ga luí, taí tô é sù le Mosheq yhang nghut ri.

38 Yoso hkaù má nghut nyi ashî hkùn lé, shiwa byù hpúng má, Sinaq Bùm má yhang lé dang taí é mau-mang lagyo eq le, nga-nhông é îchyí îwâ pé eq le rahá nghut sù gi, yhang yhang nghut nyi ri; nga-nhông lé ap byi râ asak dui é mungdang lé lom yu é sù le, yhang nghut nyi ri.

39 Nghut kôlhâng, nga-nhông é îchyí îwâ pé kúm gi, yhâng é dang lé a kâm gyo kômù, yhang lé he pyâm luí, Egutuq ming shut taù nau é myit bo bum akô.

40 Haù mù, Arun lé, 'Egutuq ming mai nga-nhông lé shuí htoq lo é Mosheq gi, haí dut byuq bê hkyô lé, ngamoq a sé lo; haù mù, nga-nhông hí má so byi râ hparà lhô pé saí byi aq.\* ga taí akô.

41 Haù buinyi pé má, yhangmoq gi, nojúng zo lhô saí mù, alhô haù lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô.

42 Haù mù luí, myiqhtoí pé é laiká má kê tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akô lhú?

43 Nungmoq gi, nungmoq noq râ matú saí yu é alhô, Molak é zúm eq Rehpan hpara é kyî lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyâm râ nghut lhê.\* ga luí, bo tô é eq rajung za, Garai Gasang gi, yhangmoq chyâng mai myoqdong lhing pyâm mù, mauhkung htoq mâ é buí, kyí, lhamó pé lé noqkuq râ matú ap pyâm bê nghut ri.

\* 7:28 Htoq Ló 2:14 \* 7:32 Htoq Ló 3:6 \* 7:34 Htoq Ló 3:5, 7-8, 10 \* 7:37 Tarâ Pun 18:15 \* 7:40 Htoq Ló 32:1 \* 7:43 Amo 5:25-27



44 Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haú yoso má nga-nhông é îchyí îwâ pé wó yû bekô nghut ri.

45 Haú mù, nga-nhông é îchyí îwâ pé gi, yhangmoq é myoq hí mai Garai Gasang èq hkat htoq pyám byí é byù myû pé é mau má, Yoshuq eq rahá wang nyi ló kô é hkûn, saksé zúm haú lé yu wang ló akô. Haú gi, Dawiq é pyat jé shoq joq to bê nghut ri.

46 Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí râ ahkáng dung kôlhang,

47 Sholumon èq sheq saí bê nghut ri.

48 Nghut kôlhang, Myhang htáng htum Sù gi, byu é loq èq za saí é yhûm má nyi é a nghut, haú hkyô eq séng luí myiqhtoi wá taí tô é gi,

49 'Mauhkûng gi, ngá é zùng tanghkuq, myigùng gi, ngá é hkyí nang jang nghut nyi lhê;

ngá é matú hkasû é yhûm saí byi shi kó râ lhú? Ngò nô yù râ jang gi, hkâmá nghut kó râ lhú?

50 Haú banshoq lé ngá é loq èq baú saí tô é a nghut kó lhú? ga luí, haú Yhumsîng taí ri.<sup>☆</sup> gâ ri.

51 I-myt htân mù, i-myt eq nohkyap má ahpyo-kuq a hpyit é bang\* é, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô;

52 Nungmoq é îchyí îwâ pé èq a zing-rî wú é myiqhtoi, ó yuq wá nyi lhê lhú? Haú Dìngmán Sù pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuí, nungmoq le, haú Dìngmán Sù lé ap pyâm é bang eq sat pyâm é bang nghut nyi akô.

53 Maumang lagyo èq shit kyo byí é tarâ lé nungmoq wó yû kôlhang, haú lé a cháng kó nghut ri." gâ ri.

☆ 7:50 Esai 66:1-2 \* 7:51 I-myt eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

## Stephan Lé Luqgok Èq Dú Sat É Hkyô

54 Haú hkyô lé yhangmoq wó gyo kôjáng, yhangmoq é nhiklum má lùm htaú záng kô é yanmai, Stephan lé, zui wang ngat kyáng shoq wú nhik-yô nyi akô.

55 Stephan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri.

56 Haú mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

57 Haú hkûn, yhangmoq gi, htê mó o mó garu uchyang, yhumsîng é nohkyap xaú pyám mù, radá dâm yhang lé chôm htím kômù,

58 yhang lé wá mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhîng pé lé hkyut bum tô akô.

59 Luqgok èq dú nyi bùm kô é u lé, Stephan gi, "Yhumsîng Yesuq ê, ngá é woi-nyí lé hap yù laq." ga kyûdûng ri.

60 Hau htâng, yhang gi, hkyihput huq mù, "Yhumsîng ê, yhangmoq kut é mara haú lé hkyut pyám byi laq." ga luí, htê mó èq wut dûng ri; haú ban taí jáng, yhang kâng byit byuq bê nghut ri.

## 8

### Hpúng Byû Lé Sholuq Zing-rî É Hkyô

1 Sholuq gi, haú má nyi to mù, Stephan lé sat pyâm é muzó má myit bo huí ri.

Haú nyí mai, Yerusalem wá mó mâ é noqkuq hpúng gi, zing-ri mó huí lo é nghut mù luí, lagyo pé mai lai luí, lumjîng bang lhunglhang gi, Yuda mau eq Samariq mau jowò hkangmó má byo myín ló bekô.

2 Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri.

3 Sholuq kúm gi, rayhum htâng rayhùm wàng mù, myiwe yuqgè lé she hkyut htoq yû luí, htóng má lhùng tô é dông mai, noqkuq hpúng haú lé lhoq hpyoq ló nyi ri.

### *Samariq Wà Má, Gabú Danglù Hkô Kyô É Hkyô*

4 Byo htoq ló é bang kúm gi, jé é jowò hkanmó má mungdang lé hkô kyô ló akô.

5 Haú hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri.

6 Byù ajùm ayò gi, Hpilip taí kyô é hkyô lé wó gyô é eq, yhang tân shit é limik kumlhá lé myàng kôjáng, i-myt rahkat za eq yhâng é dang chôm gyô nyi bum akô.

7 Nat wang júng é byù myo myô pé chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô.

8 Haú mù luí, haú myuq má gabú hkyô gyai yhang wó bekô nghut ri.

### *Myoqheq Sará Simun É Hkyô*

9 Simun gâ é byù rayuq gi, hí lé haú myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklaí sù nghut lhê gâ ri.

10 Byù tiq ko banshoq le, "Byù shí yuq gi, 'haú a-tsam mó' gâ é, Garaí chyáng mai hpungwup a-tsam wó yû sù nghut ri." ga luí, yhâng é dang lé gyô bum akô.

11 Haú yuq gi, myáng myáng yhâng é myoqheq hpaqchyí èq yhangmoq lé lhoq maú lo é yanmai, yhâng dang lé chôm lum bum akô.

12 Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjìng kôjáng, myiwe yuqgè wui-myhup hkâm yu bum akô.

13 Simun yhang yhang le lumjìng mù luí, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

14 Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyo pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô.

15 Yhangnhik gi, lé jé jáng, byù haú bang Chyoiyúng Woi-nyí wó yû râ matú kyúdung byí akô.

16 Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsìng Yesuq é myìng mai wui-myhup hkâm yu é za ru nghut bùm ashí.

17 Haú mù luí, lagyo nhik yhangmoq é ahtoq má loq ke byi jáng, yhangmoq gi, haú Chyoiyúng Woi-nyí lé wó hkâm yù bekô nghut ri.

18 Lagyo nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù,

19 "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yû râ matú, haú su é a-tsam ngo lé le byi kó laq." ga dung ri.

20 Petruq kúm gi, "Garaí Gasâng é chyunghuq lé ngun èq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq shàng gaq.

21 Nàng gi, Garaí Gasâng é hí má myit a dítng sù nghut é yanmai, shí hkyô má nàng wó bo lhóm râ a nghut.

22 Haú mù luí, shí agè ashop é hkyô mai myit lhíng mù, Yhumsìng Garaí chyáng dúng tóngbán aq. Haú hkûn, náng é unghkaú má myit pyâm é hkyô lé, mara hkyut pyám byi abe.

23 Nàng gi, ladu lai shoq nhikhko zo mù, yubak marâ èq tuí zing to huí é lé, ngò myàng ri." ga yhang lé taí ri.

24 Haú hkûn, Simun gi, "Nungnhik taí é hkyô haí le ngá chyáng a jé

sháng gaq, ngá é matú haú Yhumsing chyáng kyûdung byi kó laq." ga tû taí ri.

<sup>25</sup> Yhangnhik kúm gi, haú Yhumsing é mungdang lé saksé hkám mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

### *Hpilip Eq U-nuk Nhk É Hkyô*

<sup>26</sup> Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haú gi, yoso hkyô nghut lhê." ga taí ri.

<sup>27</sup> Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù,

<sup>28</sup> dum taú lo é hkûn, yhâng é myan-ghlêng má zùng luí, myiqhtoi Esai-aq laiká lé nghap nyi ri.

<sup>29</sup> Woi-nyí gi, Hpilip lé, "Myan-ghlêng shut chyâng e ló aq." ga taí ri.

<sup>30</sup> Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhú?" ga luí, yhang lé myí ri.

<sup>31</sup> Haú yuq gi, "Mhoqshit sù yuq a nyi le, ngò hkâsu kut sê gyo râ lhú?" ga tú taí mù, yhang eq rahá lo doq zùng aq ga Hpilip lé lung ri.

<sup>32</sup> Yhang nghap é Chyúmdang gi, "Sat râ sau lé su, Yhang lé she e ló bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

<sup>33</sup> Yhânggùng lé lhoq shôm pyâm to huí é hkûn, Yhang lé a tara é dông doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lhú?"\*

gâ ri.

<sup>34</sup> Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lhú? Yhânggùng lé taí é nghut lhê lhú? Haú a nghut jáng, góyuq é hkyô lé taí é nghut lhê lhú?" ga myí ri.

<sup>35</sup> Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

<sup>36</sup> Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkám yù râ matú ngo lé hkúm râ jang haí joq ashí lhú?" ga taí ri.

<sup>37</sup> Hpilip gi, "Náng i-mytit banshoq èq, nàng lumjínng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjínng bê." ga tû taí ri.\*

<sup>38</sup> Haú hkûn, yhâng é myan-ghlêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkám byí ri.

<sup>39</sup> Wuí hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôhang, yhang gi, e ló é hkyô shut gabú myit èq xoq sô e ló bê nghut ri.

<sup>40</sup> Hpilip kúm gi, Azutu wà má lo htoq jé kat mù luí, Kesare wà mó jé shoq haú mau má é myuq pé wà pé hkangmó má gabú danglù hkô kyô wún ri.

## 9

### *Sholuq Lhik Wang Lo É Hkyô*

<sup>1</sup> Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luí, hkyangjong mó chyáng é mù,

<sup>2</sup> Yhumsing é Hkyô lé lumjínng é myiwe yuqgè myàng mi-myàng lé chyup yù luí, Yerusalem wà mó shut wó she ló râ matú, Damaskuq myuq

\* 8:33 Esai 53:7-8

\* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

mâ é tarajong pé má byi râ laiká pé lé dũng chũng ri.

<sup>3</sup> Yhang e ló le, Damaskuq myuq eq chyáng ló nyi é hkũn, yhâng é lhĩnghkyuq má mauhkũng mai dân loq tung duqbó htoq ló ri.

<sup>4</sup> Yhang myigũng má lêng ngop tô é u lé, "Sholuq, Sholuq, nàng ngo lé haĩ mù zing-rĩ nyi lhê lhu?" ga luĩ, yhang lé taĩ é htê wó gyô ri.

<sup>5</sup> Haũ hkũn, yhang gi, "Yhumsĩng ê, nàng gi, ó yuq nghut lhê lhu?" ga myi jáng, haũ Yhumsĩng gi, "Nàng zing-rĩ nyi é Yesuq nghut lhê,

<sup>6</sup> toq aq, myuq shut wang ló aq. Nàng zui saĩ râ hkyô lé lhom taĩ kyo râ nghut lhê." ga tũ taĩ ri.

<sup>7</sup> Yhang eq rahá e ló é luzúm wuĩ gi, htê haũ wó gyo kôhang, ó yuq lé le a myàng kô é yanmai, maũ hong yap tô bum akô.

<sup>8</sup> Sholuq toq mù, myoq hpông kat wú le, haĩ lé le a myàng dut byuq mù luĩ, yhangmoq gi, yhang lé loq mai shê mù Damaskuq myuq shut shuĩ wang ló akô.

<sup>9</sup> Sholuq gi, sum nyĩ tup myoqjit byuq mù luĩ, a zo a shuq é nyi byuq ri.

<sup>10</sup> Damaskuq myuq má Anani gâ é chángzo rayuq nyi ri. Yhumsĩng gi, yhang lé, "Anani ê." ga shing-rán dõng wut ri.

Yhang gi, "Yhumsĩng ê, shĩ má nyi lhê." ga tũ taĩ ri.

<sup>11</sup> Haũ Yhumsĩng dum taĩ é gi, "Toq aq, Hkyô-Nyàng gâ é wà hkyô shut ê mù, Yudaq é yhũm má, Tarshu byũ Sholuq lé ê hô aq, yhang gi, kyũdũng nyi ri.

<sup>12</sup> Yhang gi, Anani ga sũ wang lé lô mù, yhâng é myoq dum myàng sháng gaq ga, yhâng é ahtoq má loq ke byĩ é lé, shing-rán dõng myàng bê nghut ri." gâ ri.

<sup>13</sup> Anani kúm gi, "Yhumsĩng ê, shĩ yuq gi, Yerusalem wà mó má, náng é sãn-yũng bang lé a ge é dõng hkâ-myhó kut laĩ lo é hkyanglũ lé ngò myo myo wó gyô wú bê;

<sup>14</sup> Shĩ pé má le, náng é myìng lé lãng é bang banshoq lé chyup râ ga,

hkyangjong agyi pê chyáng mâ é ahko ahkáng wó yu to sũ nghut ri." ga tũ taĩ ri.

<sup>15</sup> Nghut kôhang, Yhumsĩng gi, "Ru ê aq, shĩ yuq gi, tũngbaũ pé eq yhangmoq é hkohkam pê é hí má le, Israellaq byu pê é hí má le, ngá é myìng lé wũn waq râ matú, ngò chũng rá nghũ luĩ hkyin to sũ nghut lhê;

<sup>16</sup> Ngá mying é yanmai hkâ-ĩ hpuzo ra hkyô lé, Ngò, yhang lé tũn shit râ nghut lhê." ga taĩ ri.

<sup>17</sup> Hau htâng, Anani gi, jé ê mù, yhũm haũ má wàng luĩ, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Choyiýung Woi-nyĩ byĩng sháng gaq ga, nàng lé lo é hkyô má, nàng lẽ htoq shit é Yhumsĩng Yesuq eq ngo lé nhang kat é nghut lhê." ga taĩ ri.

<sup>18</sup> Haũ hkũn jáng, Sholuq é myoq mai akyap sũ é wuĩ gyó byuq mù, yhang myoq dum wó myàng bê. Haũ hkũn, yhang gi, toq mù wuĩ-myhup hkãm yũ luĩ,

<sup>19</sup> zoshuq lé zo mù, wum-o dum lhoq pyĩng yũ bê nghut ri.

### *Sholuq, Damaskuq Myuq Má Mungdang Hko É Hkyô*

Hau htâng, yhang gi, Damaskuq myuq mâ é chángzô pé eq rahá rayoq zo zũm yap nyi uchyang,

<sup>20</sup> Yesuq gi, Garai Gasàng é Yhangzo nghut é hkyô, haũ hkũn jáng tarajong pé má hko kyô nyi bê nghut ri.

<sup>21</sup> Sholuq é dang lé wó gyô é lhunglhâng bang gi, maũ byuq bũm kômù, "Shĩ yuq gi, Yerusalem wà mó má myìng haũ lãng é bang lé lhoq hten lhoq hpyoq sũ nghut lhê, a nghut kó lhu? Ahkuĩ, shĩ má le, haũ su é bang lé chyup yũ mù, hkyangjong agyi pê chyáng ló ap râ da luĩ jé lé é sũ a nghut kó lhu?" ga myi bum akô.

<sup>22</sup> Sholuq kúm gi, a-tsam je bo lô mù, Damaskuq myuq má nyi é Yudaq byu pé lé taĩ hpyi kyo luĩ, Yesuq gi, Hkrisduq yhang nghut nyi é hkyô lé saksé tũn shit ri.

<sup>23</sup> Buinyí tsómra myáng é htâng má, Yudaq byu pé gi, yhang lé sat pyám rá matú haq dâ akô.

<sup>24</sup> Nghut kôlhang, yhangmoq dâ é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô.

<sup>25</sup> Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

### *Sholuq, Yerusalem Wà Mó Má Tau Jé Lo É Hkyô*

<sup>26</sup> Hau htâng, yhang gi, Yerusalem wà mó má jé lo é hkûn, chángzô pé eq zùm yap rá matú shikut wú kôlhang, yhang gi, chángzo dut bê hkyô lé a jing kô é yanmai, lhunglhâng bang gi, yhang lé gyuq bum akô.

<sup>27</sup> Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé taí kyô ri.

<sup>28</sup> Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsing é mying mai a gyuq a kyum é za hko kyô nyi ri.

<sup>29</sup> Grik dang nyo é Yudaq byu pé eq le, taí he lhùm nyi akô; nghut kôlhang, yhangmoq gi, yhang lé sat pyám rá dâ akô.

<sup>30</sup> Haú hkyô lé, gumang wui sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

<sup>31</sup> Yuda mau, Galile mau eq Samariq mau jowò hkangmó má é noqkuq hpúng gi, haú yoq pé má, lhoq ging lhoq ting é hkyô wó yù mù, nguingón nyi akô; haú Yhumsing lé gyuq hkunggâ é hkyô má le, Chyoiyung Woi-nyí eq lhoq pun lhoq

kying é hkyô pé má le châng nyi mù, myô jat lo bùm bekô nghut ri.

### *Ainea Ge Byuq É Hkyô*

<sup>32</sup> Haú hkûn, Petruq gi, haú mau pé má hkat kùm wún uchyang, Ludaq wà mó má nyi é sân-yung bang chyáng ê jé ri.

<sup>33</sup> Haú wà má, gùngjum shí luí shit zân tup yhupjang mai a wó toq é Ainea gâ é byù rayuq lé é myang ri.

<sup>34</sup> Haú mù, Petruq gi, "Ainea é, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yhang lé taí ri. Haú hkûn jáng, Ainea wó toq yap bê nghut ri.

<sup>35</sup> Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsing Yesuq chyáng lhing wang lo bum akô.

### *Dorka Ga Sû Dum Dui Lo É Hkyô*

<sup>36</sup> Ahkuí, Yopa myuq má Tabihta gâ é chángzo myiwe rayuq nyi ri; mying haú lé Grik dang dông gi, Dorka\* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byí nyi é sù nghut ri.

<sup>37</sup> Haú u lé, yhang gi, nòhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô.

<sup>38</sup> Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

<sup>39</sup> Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyám gok má shuí hâng yu akô. Chuimó myhí pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashí hkûn Dorka hkyup é buhing eq gotú mebu pé lé tân shit nyi akô.

<sup>40</sup> Petruq kúm gi, lhunglhâng bang lé htoq ló nhâng mù, hkyihput htuoq luí, kyúdung mù, mâng shut lhing wú luí, "Tabihta é, toq aq!" ga taí ri, haú

\* 9:36 Dorka gâ é lichyúm gi, "chochí" gâ é nghut lhê.

hkûn myiwe haû myoq hpóng lô mù, Petruq lé myàng jáng, toq zung lo ri.

<sup>41</sup> Petruq gi, loq lhâm kat mù yhang lé lêng toq yù luí, lumjínq bang eq chuimó myhí pé lé wut yù mù, dui gû ap byí ri.

<sup>42</sup> Haú hkyô lé, Yopa myuq mâ é bang banshoq wó gyô lô kômù luí, byù myo myo gi, haú Yhumsíng Yesuq lé lumjínq bum akô nghut ri.

<sup>43</sup> Haú mù, Petruq gi, shokuq lo-qmú saí é Simun ga sù eq rahá, Yopa myuq má rayoq zo nyi nyi ri.

## 10

### *Koneli É Shing-rán*

<sup>1</sup> Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê.

<sup>2</sup> Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyûdung nyi ri.

<sup>3</sup> Ra-nyí lé, myinhtâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

<sup>4</sup> Haú mù, haú yuq lé wú tsuq to mù, "Yhumsíng ê, hai hkyô nghut lhê lhú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasâng é hí má, hkungga masat dông hkyâng bê nghut ri.

<sup>5</sup> Ahkuí, Yopa myuq shut byù nhang kat mù, Petruq gâ é sù Simun lé ê shuí lò nháng aq.

<sup>6</sup> Yhang gi, wuimau yàm mâ é, shokuq hkyup zô é Simun yhùm má bíng nyi ri." ga taí ri.

<sup>7</sup> Koneli gi, yhang eq dang taí é maumang lagyo lô byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé jì yù mù,

<sup>8</sup> dut lai lo é hkyô banshoq, yhang-moq lé taí kyo luí, Yopa myuq shut nhang kat ri.

### *Petruq É Shing-rán*

<sup>9</sup> Htang nyí nyí-káng u lé, yhang-moq, Yopa myuq jé lô yâm má, Petruq gi, kyûdung râ ga, yhumhkûng shut doq lô ri.

<sup>10</sup> Haú hkûn, yhang gi, zòmut luí rajung jung zô nau nyi ri; nghut kôlháng, zoshuq ru gaí nyi ashí le, yhang moq byuq lô mù myoqwup shing-rán myang é gi,

<sup>11</sup> mauhkûng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri.

<sup>12</sup> Haú hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri.

<sup>13</sup> "Petruq ê, toq mù, sat zo aq." gâ é danghtê le mying htoq lo ri.

<sup>14</sup> Petruq kúm gi, "Yhumsíng ê, haú gi, a wó dut, achau achyut é eq a sansêng é zè lé, ngò hkâ-nhám le a zô wú." ga tû taí ri.\*

<sup>15</sup> Haú hkûn, "Garai Gasang lhoq san lhoq séng bê zè lé, a sanséng hkâ-nghú." ga luí, yhang lé dum taí kat ri.

<sup>16</sup> Haú su ga sum dâm taí é htâng má, zè haú lé radá dâm mauhkûng shut wup yu lô bê nghut ri.

<sup>17</sup> Ahkuí, Petruq gi, yhang myang é shing-rán lé haí wá nghut lhê lhú ga luí, myit maú nyi é hkûn, haú Koneli nhang kat é bang gi, Simun é yhùm lé myang hô kômù, hkumtot má yap to luí,

<sup>18</sup> Petruq gâ é sù Simun, yhùm haú má nyi a nyi é lé, wut myí wú akô.

<sup>19</sup> Petruq gi, shing-rán haú lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó lô aq;

<sup>20</sup> yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo lô aq." ga taí ri.

\* 10:14 Nhong 11 lé wú aq.

21 Haû mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

22 Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoiyúng maumang lagyô èq taí shit kyô é hkyô lé wó yù luí, ngamoq lé nhang kat é nghut lhê." ga akô.

23 Haû mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq má é gumang wui ra-am le châng akô nghut ri.

#### *Koneli Lé Petruq Huí É Hkyô*

24 Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wui eq buinùm jimyi wui lé ji tsíng to mù, yhangmoq lé lánng nyi ri.

25 Petruq wang ló jáng, Koneli gi, te yù mù, yhâng é hkyí wang má paí gop noqkuq ri.

26 Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

27 Haû mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri.

28 Haú hkûn, yhang gi, yhangmoq lé, "Yudaq byù rayuq gi, noqkuq htûng dông tûngbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhâng, ó yuq lé le achayut dut ri, a sanséng dut ri nghû a ge taí é hkyô lé gi, Garai Gasang, ngo lé tûn shit bê.

29 Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haû mù luí, haí ra kô é yanmai, ngo lé ji akô nghû ngò myí nau ri." ga taí ri.

30 Haú hkûn, Koneli gi, "Laí lò bê myi nyí nyí, myinhâng sum hkyíng má, ngá é yhûm má, ngò kyûdûng nyi le, danso loq, duqbó é mebu wut é byù rayuq ngá é hí má yap htoq shit mù,

31 'Koneli é, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri.

32 Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm má é shokuq hkyup zô é Simun yhûm má bíng nyi ri.' ga taí ri.

33 Haû mù luí, haú hkûn jáng ngò náng chyáng byù nhang kat bê nghut lhê. Ahkuí, nàng jé é gi, gyai gè bê nghut ri. Yhumsíng yhang nang lé taí nhang é gû banshoq gyô yù râ matú, ahkuí ngamoq lhunglhâng bang Garai Gasâng é hí má nghut nyi lhê." ga taí ri.

#### *Petruq Hko Kyô É Mungdang*

34 Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê.

35 Byù myû chângjup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri.

36 Nyi mì-nyí, joq mijoq é Yhumsíng, Yesuq Hkrisduq é yanmai, nguínón hkyô eq sêng é gabú danglù lé hko kyo sháng gaq ga, Israelaq byu pè chyáng Garai Gasang hun kat é mungdang eq rajung za,

37 baptisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê.

38 Haû gi, Garai Gasâng èq Chyoiyúng Woi-nyí eq wum-o a-tsam byí to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zingri huí é bang banshoq lé lhoq gè byí wún ri.

<sup>39</sup> Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri.

<sup>40</sup> Garai Gasang kúm gi, sum nyi nghû râ buinyi má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri.

<sup>41</sup> Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê.

<sup>42</sup> Yhang gi, asak dui é bang eq shi bê bâng é tarâ agyi kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri.

<sup>43</sup> 'Yhang lé lumjîng é bang yuq hkanmó gi, Yhâng é myîng é yanmai, yubak hkyut pyám byi é hui kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byi é bang nghut nyi akô." ga taí ri.

### *Chyoiyúng Woi-nyí Lé, Tûngbaù Pé Wó Hap Yu É Hkyô*

<sup>44</sup> Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri.

<sup>45</sup> Tûngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maú bum akô.

<sup>46</sup> Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

<sup>47</sup> Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkâm to râ lhú?" ga taí ri.

<sup>48</sup> Hau htâng, yhang gi, yhangmoq lé Yesuq Hkrisduq é myîng lang luí wui-myhup hkâm yù râ matú pyîng tô

ri. Haú hkûn, yhangmoq gi, Petruq lé buinyi ra-í nyí, nyi gyó shi aq ga chôm hkûm akô.

## 11

### *Petruq, Yhang Kut É Muzó Lé Shit Kyô É Hkyô*

<sup>1</sup> Tûngbaù pé le, Garai Gasâng é mungdang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô.

<sup>2</sup> Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjîng bang gi,

<sup>3</sup> "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

<sup>4</sup> Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé taí sân kyô hi kat é má,

<sup>5</sup> "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri.

<sup>6</sup> Haú lé rago za saí wú le, myigùng htoq má hkyi myi hkyi dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn,

<sup>7</sup> 'Petruq ê, toq mù, sat zo aq.' gâ é danghtê lé, ngò wó gyô ri.

<sup>8</sup> Ngò kúm gi, 'Yhumsîng ê, haú gi, a wó dut, achâq achyut é eq a sansêng é zè, ngá é nhut má hkâ-nhâm le a wang wú.' nghû taí kat é nghut lhê.

<sup>9</sup> Haú hkûn, 'Garai Gasang lhoq san lhoq yúng bê zè lé, a sansêng hkânghû.' ga luí, mauhkûng mai dum taí kat ri.

<sup>10</sup> Haú su ga sum dâm taí é htâng má, haú pé banshoq lé mauhkûng shut dum wup yu ló bê nghut ri.

<sup>11</sup> Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô.



12 Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shí gumang hkyuq yuq le ngò eq rahá é mù, Koneli é yhùm má ngamoq wang é.

13 Haú hkùn, haú yuq gi, yhâng é yhùm má maumang lagyo lé htoq shit é hkùn, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq;

14 nàng eq náng yhumbyù lunglhang bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

15 Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri.

16 Haú hkùn sheq, ngò gi, 'Yohan gi, wui èq wui-myhup hkám byi ri; nungmoq kúm gi, Chyoiyúng Woi-nyí èq wui-myhup hkám byi é hui kó râ nghut lhê.' ga luí, Yhumsíng taí é dang lé bún kat ri.

17 Haú mù luí, Yhumsíng Yesuq Hkrisduq lé lumjíng é hkùn, ngamoq lé Garai Gasâng jeju chyunguq byi é su, Yhang, yhangmoq lé le byi é nghut le gi, ngò gi, hkâsú é byù nghut luí, Garai Gasang lé wó lhom hkúm pyám rá l hú?" ga taí ri.

18 Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak duì râ matú myit lhîng hkyô byi bu-nhung!" ga luí, Garai Gasang lé chôm hkya-ôn akô nghut ri.

### *Antioku Wà Mâ É Noqkuq Hpúng*

19 Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akô nghut ri.

20 Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé ló kômù,

Yhumsíng Yesuq é gabú danglù lé, Grik pé lé le taí kyô bum akô.

21 Haú Yhumsíng é loq gi, yhangmoq eq rahá nghut nyi mù luí, byù myo myo gi, lumjíng mù, Yhumsíng chyáng lhing wang lo bùm bekô nghut ri.

22 Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô.

23 Yhang jé é hkùn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklum banshoq èq haú Yhumsíng má lhumzuí nyi râ matú, lunglhang bang lé myit wum byi ri.

24 Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjíng myit le byíng tô é sù nghut nyi ri. Haú mù, byù myo myo gi, haú Yhumsíng chyáng jat wang lo bùm bekô nghut ri.

25 Hau htâng, Barnaba gi, Sholuq lé é hô râ ga Tarshu myuq shut é mù, yhang lé myàng jáng, Antioku wà mó má shuí lo ri.

26 Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

27 Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô.

28 Haú bang mâ é Agabu gâ é sù gi, toq yap mù, Romaq mingkan tîng má mutmó gyó lô râ nghut é hkyô lé, Woi-nyí èq tûn shit é dông taí kyô ri; (Haú gi, hkohkâm Klodi é pyat má dut bê nghut lhê.)

29 Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akô.

30 Haú eq rajung za kut kômù, yhangmoq gi, chyunguq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

## 12

### *Petruq, Htóng Mai Wó Lut Htoq Lo É Hkyô*

<sup>1</sup> Haú u lé, Herut hkohkâm gi, hpúng byû ra-am lé chyup yû mù, zing-ri râ ga ngantsâ nyi ri.

<sup>2</sup> Haú mù, Yohan é yhangmang Yakuq lé sham èq sat pyám nhang ri.

<sup>3</sup> Haú hkyô lé Yudaq byu pé wú gabú é lé myàng jáng, yhang gi, Petruq lé le, jáng chyup yu ri. Haú dut é gi, mún a kat é muk zo poí u lé nghut ri.

<sup>4</sup> Herut gi, Lhoqlhai Poí lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhúng to mù, yhang lé zúng râ matú, gyè myi yuq yuq kut myi hpúng lé ap tô ri.

<sup>5</sup> Haú mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byi nyi akô nghut ri.

<sup>6</sup> Petruq gi, Herut èq yhang lé jéyáng râ matú she htoq yû râ hí myin lé, shamtoq-tui í hkat èq tui é hui lui, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô.

<sup>7</sup> Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má ê hpuk kat mù, "Myap toq wú aq." ga nhaú ri; haú hkûn, Petruq é loq mâ é toqjâng tui pé le gyut gyó ló bê nghut ri.

<sup>8</sup> Maumang dum taí é gi, "Hpyi-hit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri.

<sup>9</sup> Haú hkûn, yhang gi, htóng mai yhâng htâng châng htoq ló ri; nghut kôhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri.

<sup>10</sup> Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik

htoq lui, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri.

<sup>11</sup> Ahkuí, Petruq gi, dum bûn gyîng lò jáng, "Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyû tô é hkyô banshoq mai, ngo lé hkyi yû bê nghut é lé, ahkuí ngò gè gè sé bê." ga taí ri.

<sup>12</sup> Haú hkyô lé myit sê kat jáng, yhang gi, byû myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri.

<sup>13</sup> Haú mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri.

<sup>14</sup> Yhang gi, Petruq é htê nghut é lé sê gyô kat jáng, lûm gabú lui hkum a hpông byi shî é za, yhúmhkaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

<sup>15</sup> Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

<sup>16</sup> Nghut kôhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjâng, chôm maú byuq bum akô.

<sup>17</sup> Yhang gi, yhangmoq lé zim za nyi keq ga loq lik shit mù, yhang lé Yhumsing èq htóng mai hkâsu kut shui htoq yu é hkyô lé taí kyo lui, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló lui, jowò gó shut e ló bê nghut ri.

<sup>18</sup> Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô.

<sup>19</sup> Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám râ matú hkunmó hkyô ri.

*Herut Hkohkâm Shi Byuq É Hkyô*

Hau htâng, yhang gi, Yuda mau mai Kesare và mó má gyó ló mù ló nyi nyi ri.

<sup>20</sup> Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ èq yhâng chyáng è mù, Blastu gâ é, hkohkâm wa lum tô é suwún hpó lé è lùm hkaú mù, simsaq hkyô è dũng akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaú nyi kô é yanmai nghut ri.

<sup>21</sup> Haú hkûn, ding lhùm tô é buinyi má, Herut gi, hkohkâm hking wut chũng mù, hkohkâm tanghkuq má zũng luí, yhangmoq lé hkohkâm mungdang byi ri.

<sup>22</sup> Haú jáng, mingbyû wuì gi, "Htê shi gi, waxâng byu é htê a nghut, garai wá é htê sheq nghut ri." ga garú bum akô.

<sup>23</sup> Radá dâm, Herut gi, Garai Gasâng é hpungwup shingkang lé a tê byi é yanmai, Yhumsing é maumang lagyo gi, yhang lé dàm byi luí, yhang gi, luq èq hkê é hui mù, shi byuq bê nghut ri.

<sup>24</sup> Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

<sup>25</sup> Barnaba eq Sholuq nhik gi, Yerusalem và mó má yhangnhik sai tím nyi é muzó ban sai jáng, Markuq gâ é Yohan lé shuì chũng mù, Antioku và mó shut taú ló bekô nghut ri.

## 13

### *Barnaba Eq Sholuq, Hkyin Nhang Kat Huì É Hkyô*

<sup>1</sup> Ahkuì, Antioku và mó má é noqkuq hpúng má, myiqhtoì pé eq sará pé le lom nyi akô. Haú bang gi, Barnaba, Niger\* gâ é Simeon, Kuruni byu Luki, (Herut zau hpó eq zum kô lò sù) Manaen eq Sholuq pé nghut akô.

<sup>2</sup> Yhangmoq gi, zoshuq gám luí Yhumsing lé noqkuq dojàu nyi é hkûn, Chyoiyúng Woi-nyí gi, "Ngá é mù wùn waq râ matú ji tô é Barnaba

eq Sholuq nhik lé, hkyin to keq." ga tai ri.

<sup>3</sup> Haú mù luí, yhangmoq gi, zoshuq gám luí kyûdung mù, yhangnhik ah-toq má loq ke byi kô é htâng, yhangnhik lé nhang htoq kat akô nghut ri.

### *Kupru Zinlóng Má Dut É Hkyô*

<sup>4</sup> Haú mù, yhangnhik gi, Chyoiyúng Woi-nyí èq nhang kat é eq rajung za, Seluki và shut gyó ló mù, haú mâ é lhai ji luí, Kupru zinlóng má jé ló luí,

<sup>5</sup> Salami và mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

<sup>6</sup> Yhangmoq gi, haú zinlóng mai lai byit e ló mù Pahpu và mó jé ló kô é hkûn, myiqhtoi pyoq nghut sù Bara-Yesuq gâ é Yudaq byu myoqheq sará rayuq eq htung hui akô.

<sup>7</sup> Haú yuq gi, Sergi Poluq gâ é, myit hpaqchyì kũng é ginwáng zau hpó é byu rayuq nghut lhê. Minggyi hpó haú gi, Garai Gasâng é mungdang gyô yù nàu mù, Barnaba eq Sholuq nhik lé ji yu ri.

<sup>8</sup> Haú hkûn, myoqheq sará gâ é lichyúm dõng myhĩng é Eluma le gâ é Bara-Yesuq kúm gi, ginwáng zau hpó lé haú lumjĩng hkyô má a jau ló nhang nau é nghut mù luí, yhangnhik lé lhom he tang pyâm ri.

<sup>9</sup> Haú hkûn, Poluq le gâ é Sholuq gi, Chyoiyúng Woi-nyí bying mù, yhang lé wú tsuq to luí,

<sup>10</sup> "Myit goi é hkyô eq hpuq lô lhik é hkyô banshoq bying tô é, nat é yhangzo nghut sù, tengmán hkyô hkangmó é gyè hpó è, Yhumsing é tengmán hkyô lé a lhoq hpyoq é a wó nyi lhu?"

<sup>11</sup> Ahkuì, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga tai ri.

Haú hkûn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yhang lé shê râ byu ho sop lĩng wún ri.

\* 13:1 Grik dong Niger gâ é gi, byu noq gâ é nghut lhê.

12 Haú hkyô lé ginwáng zau hpó myàng jáng, Yhumsing eq sêng é mhó-qshit é hkyô lé wú maú luí lumjáng bê nghut ri.

### *Antioku Wà Mó Má Dut É Hkyô*

13 Hau htâng, Poluq eq yhâng luzúm wuî gi, Pahpu wà mó mai lhai ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luí, Yerusalem wà mó shut taú lú byuq bê nghut ri.

14 Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyi má, yhangmoq gi, tarajong má wang zung tô akô.

15 Haú hkún, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuî ê, mingbyû wuî lé myit wum byi dang joq kô é nghut le gi, ahkuí taí lo keq." ga luí, yhangmoq chyáng taí nhang kat ri.

16 Haú hkún, Poluq gi, toq yap mù, zím byuq kó sháng gaq ga loq tú luí, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq.

17 Israelaq byu pé é Garai Gasang gi, ngamoq é íchyí íkê pé lé hkyin yù bê nghut mù luí, Egutuq ming má byùbít dut nyi to ashî hkún, yhangmoq lé kô myhâng nhâng mù, hpungwup a-tsam bo é loq eq haú mau mai shuí htoq ló ri.

18 Dum, myi xê zàn kô, yoso pé má yhangmoq é a-kyang lé jân pyám byi mù,

19 Hkanan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

20 Hau htâng má, Garai Gasang gi, myiqhtoi Samuelaq é pyat jé shoq tarâ agyi pé lé to byí ri.

21 Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi

luí, yhang gi, myi xê zàn up bê nghut ri.

22 Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

23 Garai Gasang gi, Yhâng é dang-gidiq joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri.

24 Yesuq a jé lé shimá, Yohan gi, Israelaq byu pé banshoq lé myit lhîng hkyô eq sêng é baptisma hkyô lé hko kyo bê nghut ri.

25 Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lhú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyí râ lháng ngò a gíng.' ga taí ri.

26 Abraham é yhangzo yhangshû pé eq Garai Gasang lé gyuq hkunggâ é tûngbaù, gumang wuî ê, shî hkyi yù hkyô mungdang lé, nga-nhûng chyáng byi kat bê nghut ri.

27 Yerusalem wà mó mâ é bang eq, yhangmoq é zau suwún wuî gi, Yhang hkyi yù sù nghut é lé le, Bánno buinyi hkanmó nghap é myiqhtoi pé é dang lé le, a sê gyo kô é yanmai, Yesuq lé sat râ doqdân é hkún, myiqhtoi pé é dang lé lhoq dik pyám bekô nghut ri.

28 Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô.

29 Yhangmoq gi, yhang eq séng luí, kê to má kê to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri.

30 Garai Gasang kúm gi, Yhang lé shi é mai lhoq dui toq yù bê nghut lhê.

31 Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhûng

Israelaq byu pê é hí má, Yhâng é saksé dut bekô nghut ri.

<sup>32</sup> Haû mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.'<sup>☆</sup>

ga luí, kê tô é eq rajung za,

<sup>33</sup> Garai Gasang gi, íchyí íwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê.

<sup>34</sup> Hau htoq agó, Yhang htên byoq é hkâ-nhám a hui shoq, shi é mai lhoq dui toq yû râ hkyô eq séng luí, Garai Gasang taí é gi,

'Dawiq lé byí tô é danggidiq eq rajung za, chyoiyúng é eq lumging é jeju lé, ngò nungmoq lé byi râ nghut lhê.'<sup>☆</sup>

gâ ri.

<sup>35</sup> Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng naù râ a nghut.'<sup>☆</sup>

ga taí tô ri.

<sup>36</sup> Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí íwâ pé eq rahá myhup pyám hui mù, htên byoq byuq é hui bê nghut ri.

<sup>37</sup> Garai Gasang lhoq dui toq yu é sù kúm gi, htên byoq huí é a nghut.

<sup>38</sup> Haû nghut é yanmai, gumang wuì ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq.

<sup>39</sup> Hau htoq agó, Mosheq é tarâ èq mara hkyut san byí é a hui kôlhang, haú yuq lé lumjing é bang gi, hkyô lhumjup má mara hkyut san byí é hui râ nghut lhê.

<sup>40</sup> Hau é yanmai, 'Wú keq, jihpoí é bang ê, maú mù luí htum byuq keq;

nungmoq é buinyi pé má ngò rajung jung kut htoq râ nghut lhê;

<sup>41</sup> haú hkyô lé, rayuq yuq, nungmoq lé hkaí kyo kôlhang, jing kó râ a nghut.'<sup>☆</sup>

ga luí, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

<sup>42</sup> Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaí kyo râ matú yhangmoq chôm dúng akô.

<sup>43</sup> Chôm byo htoq ló kô é hkûn, Yudaq byu pé eq Yudaq noqkuq htung má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasâng jeju má gîng nyi râ matú, yhangnhik gi, yhangmoq lé lhoq pun lhoq kyîng akô nghut ri.

#### *Tûngbaù Pê Chyáng Lhing Lo É Hkyô*

<sup>44</sup> Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoí banshoq, lé zup zîng to bum akô.

<sup>45</sup> Yudaq byu pé kúm gi, byù moq mó haú lé myàng jáng, manon myit baú byíng bùm kômù luí, Poluq taí é dang lé taí htîng é eq nhîng pyâm akô.

<sup>46</sup> Poluq eq Barnaba le gyuq myit a bo é dông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuí, ngá-nhik gi, tûngbaù pé shut lhing ló berâ nghut lhê.

<sup>47</sup> Hkâsu mù gâ le, haú Yhumsing gi, 'Hkyi yù hkyô lé maumyî htum shoq wó chûng jé râ matú, Ngò, nàng lé tûngbaù pé é maubó dut nhâng bê.'<sup>☆</sup>

ga luí, ngamoq lé hkunmó hkyó kat bê." gâ ri.

<sup>48</sup> Tûngbaù pé gi, dang haú lé wó gyo kôjáng, gabú é eq Yhumsing é mungdang lé hkya-on kungtôn nyi

☆ 13:32 Hkya-on 2:7 ☆ 13:34 Esai 55:3 ☆ 13:35 Hkya-on 16:10 ☆ 13:41 Hbk 1:5 ☆ 13:47 Esai 49:6

bum akô. Ahtum abyuq é asak lé wó râ matú hkyin to huí é lhunglhang bang le, lumjínq bum akô nghut ri.

<sup>49</sup> Yhumsing é mungdang gi, haú ming gón jam lò bê nghut ri.

<sup>50</sup> Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wui mâ é tarâ hkungga bang eq, haú wà mâ é suwún wui lé, nhik lhoq yo kôluí, yhangnhik lé maukyo mai chôm hkat htoq pyâm akô.

<sup>51</sup> Yhangnhik gi, yhangmoq lé a nau é hkyô tún shit é dông, yhumsing é hkyi mâ é hpuilhaú lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri.

<sup>52</sup> Chángzô pé kúm gi, gabú é htoq agó, Choyiýung Woi-nyí byíng nyi bum akô nghut ri.

## 14

### *Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô*

<sup>1</sup> Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byu eq tûngbaù pé ajùm ayò lumjínq bùm kó shoq, wum kat hko kyô akô.

<sup>2</sup> Nghut kôlhang, a lumjínq é Yudaq byu pé gi, lumjínq é gumang wui lé a ngui râ dông tûngbaù pé lé mhoq hpyoq yú mù, shuí gumlaú akô.

<sup>3</sup> Haú mù luí, yhangnhik gi, tsómra myang shoq haú má nyi mù, haú Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byí nyi ri.

<sup>4</sup> Haú wâ mâ é bang kúm gi, myit byo ló bûm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akô.

<sup>5</sup> Ahkuí, tûngbaù pé le, Yudaq byu eq yhangmoq é uphkâng bang le, yhangnhik lé rhoí mù luqgok eq dú sat râ ga htîm lo bum akô.

<sup>6</sup> Nghut kôlhang, yhangnhik gi, haú hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpang e ló akô.

<sup>7</sup> Haú pé má le, gabú danglù xoq hko kyô wún akô nghut ri.

### *Lustra Wà Mó Má Ló Jé É Hkûn Lhê Hkyô*

<sup>8</sup> Ahkuí, Lustra wà mó má, înu unghkaú mai hkyi hten mù luí, hkânham le hkyô a wó sô wú é sù rayuq zung tô ri.

<sup>9</sup> Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkûn, wó lhoq gè byi hui râ nghut lhê gâ é lumjínq myit yhâng chyáng bo tô é lé, myàng byí ri.

<sup>10</sup> Haú mù, Poluq gi, "Toq yap aq!" ga luí, htê mó eq yhang lé taí kat jáng, yhang gi, byam toq kat mù, wó so bê nghut ri.

<sup>11</sup> Haú mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô.

<sup>12</sup> Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byí akô.

<sup>13</sup> Haú wà yàm mâ é Zeu hparà noqkuq yhûm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi râ hen akô.

<sup>14</sup> Nghut kôlhang, lagyo nhik Barnaba eq Poluq gi, haú lé wó gyo kôjáng, yhumsing é mebu lîng cheq pyám kôluí, shiwa hpong gung gûng shut din wang é kômù, garú taí kô é gi,

<sup>15</sup> "Hkaú pé ê, haí mù haú su kut lo akô lhú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyâm to mù, mauhkûng eq myigùng, wuîshuq lung-aú eq haú pé má nyi mi-nyí, joq mijoq lé hpan to sù, rû dui nyi é Garai Gasâng chyáng lhing wang lò kó sháng

gaq nghû luí sheq, nungmoq lé gabú danglù hko kyô é nghut lhê.

16 Garai Gasang gi, byù myù chângjup lé hí hpyang lhê é pyat bán má ó le ó kâm é đông kut nhâng bê nghut ri.

17 Nghut kôlhang, Yhang gi, mauhkúng mai mau wô nhâng luí, kyôshi zuí nhang é ahkýing yam-yoq byi mù, nungmoq lé zoshuq agùn agó byí é eq, nungmoq lé i-myit ngón nhang nyi é đông, Yhang ge é hkyô lé tân shit mù, Yhang nyi é hkyô lé saksé hkâm nyi ri." ga akô.

18 Haú su ga tái kô le lhang, yhangnhik lé shiwa byu pé mai hkungga nhông byi râ hkyô lé, yhangnhik gi, gyai wuihke luí sheq wó hkùm pyâm akô nghut ri.

19 Hau htâng, Antioku và mó eq Ikoni và mó pé mâ é Yudaq byu pé ram lé jé kômù, shiwa byu pé lé shuí-u luí, Poluq lé luqgok eq chôm dú kômù, yhang lé shi byuq bê su ngâm kô é yanmai, và shinggan shut shê hkyut htoq pyâm akô.

20 Nghut kôlhang, Poluq gi, yhang é lhanghkyuq má chângzô pé yap tô kô é hkùn, toq mù và shut tau wang ló ri. Hau htang nyí, yhang gi, Barnaba eq rahá Derbe và mó shut e ló bekô nghut ri.

### *Antioku Và Mó Má Taú Jé Ló É Hkyô*

21 Haú wâ má yhangnhik eq gabú danglù hkô kyo kô é yanmai, byù myo myo gi, chângzô pé dut lo akô. Hau htâng, yhangnhik gi, Lustra, Ikoni, Antioku và mó hkyô dum taú ló kômù,

22 chângzô pé lé myit lhoq ging byi uchyang, haú lumjín hkyô má ru gín nyi râ matú myit wum byí akô. "Nga-nhúng gi, Garai Gasâng é mingdán má wàng râ matú, wuihke jamjau myo myo hui ra râ nghut lhê." ga le, mhoqshit akô.

23 Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí

kyûdung mù, yhangmoq lumjín nyi é Yhumsing Garaí chyáng ap byi tô akô.

24 Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akô nghut ri.

25 Haú ginwáng mâ é Perga và mó má mungdang hko kyo luí, Atali và mó shut lai gyó ló akô nghut ri.

26 Haú mai, lhai ji mù, ahkuí yhangnhik wùn waq lai ló bê muzó é matú, Garai Gasâng jeju má ap luí yhangnhik lé nhang kat é Antioku và mó má dum jé ló bekô nghut ri.

27 Jé lo é hkùn, yhangnhik gi, hpúng byù wui lé wut tsing yù mù, yhangnhik đông mai Garaí Gasang kut é hkyô banshoq lé le, tûngbau pé lé haú lumjín hkyô hkum hpóng byí é hkyô lé le, shit kyô akô.

28 Haú mù, yhangnhik gi, haú wâ má chângzô pé eq tsómra myang shoq nyi nyi akô nghut ri.

## 15

### *Ahpyo-kuq Hpyit Hkyô Eq Sêng É Manghkáng*

1 Ahkuí, Yuda mau mâ é byù ra-am gi, Antioku và mó má lé jé mù, gumang wui lé, "Nungmoq gi, Mosheq é htungtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô.

2 Hau é yanmai, myit a huí lhùm é hkyô htoq lô mù, Poluq eq Barnaba nhik gi, haú bang eq gyai yhang mying myô lhùm akô; haú mù luí, gumang wui gi, Yerusalem và mó má nyi é lagyo pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô.

3 Haú mù, hpúng byù wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô lai ló uchyang, tûngbau pé lhang wang lò bê hkyô lé tái kyô akô. Haú mâ é gumang wui lé gyai yhang gabú nhang akô nghut ri.

4 Yhangmoq, Yerusalem và mó má jé kô é hkùn, hpúng byù wui, lagyo

pé eq suwún wuî gi, yhangmoq lé lhom hkûlum yù kô é nghut mù luî, yhangmoq gi, yhangmoq dông mai Garai Gasang kut é hkyô lhungháng lé, haú bang lé shit kyô akô.

<sup>5</sup> Haú hkûn, Hparishe hpúng má é lumjínng bang ra-am gi, toq mù luî, "Tungbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lê." ga taí bum akô nghut ri.

### *Yerusalem Wà Mó Má Kut É Byìn Tú Wap Hpong*

<sup>6</sup> Ahkuî, lagyo pé eq hpúng suwún wuî gi, shí hkyô lé chôm myit wú râ ga, zup tô bum akô.

<sup>7</sup> Shí hkyô lé gyai yhang dang rhâng lhûm bùm kô é htâng má, Petruq gi, toq mù luî, "Gumang wuî ê, Garai Gasang gi, ngá nhut mai taí é, haú gabú danglù lé, tungbaù pé gyô yù mù lumjínng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê.

<sup>8</sup> Haú mù, myit nhiklhûm lé sé byi sù Garai Gasang gi, nga-nhúng lé byi é eq rajung za, yhangmoq lé le Chyoiyúng Woi-nyí byi é dông, yhangmoq lé hap yù bê hkyô lé saksé tân shit bê nghut ri.

<sup>9</sup> Garai Gasang gi, yhangmoq lumjínng luî, yhangmoq é myit nhiklhûm lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuî é hkyô a joq nhâng lo nghut ri.

<sup>10</sup> Haú nghut le gi, íchyí íwá pé èq le, nga-nhúng èq le a ung é wòlai lé, haú chángzô pé é lingzing má ke byi é dông mai, haí mù, ahkuî Garai Gasang lé chyam wú nyi akô lhú?

<sup>11</sup> Nghut kôlhang, ngamoq gi, yhangmoq eq rajung za, Yhumsíng Yesuq é jeju mai za hkyi yu é huí é hkyô lé lumjínng é bang nghut lê." ga luî, yhangmoq lé taí ri.

<sup>12</sup> Haú hkûn, zup míng tô é bang lhungháng gi, zim za kut luî, Barnaba eq Poluq nhik mai, tungbaù pé chyáng, Garai Gasang èq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô.

<sup>13</sup> Yhangnhik dang ban taí kôjáng, Yakuq gi, "Gumang wuî ê, ngá dang lé gyô wú keq.

<sup>14</sup> Garai Gasang gi, tungbaù pé chyáng mai Yhâng myíng é matú byù ra-myù hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri.

<sup>15-16</sup> Shí hkyô gi,

'Hau é htâng má gi, ngò dum taú lò mù luî, lêng gyop byuq bê Dawiq é yhûm\* lé dum saí râ nghut lê.

Haú byoq htên tô é pé lé saí saí mù, haú lé dum lhoq toq râ nghut lê.

<sup>17</sup> Haú hkûn sheq, ngá myíng mai ji yu é tungbaù pé eq, myit gyo tô é byù lhungháng bang gi, Yhumsíng Garai lé hô kó râ nghut lê ga,

<sup>18</sup> a-nham mau htoq xâng hkun mai, shí hkyô pé lé sé nhang é Yhumsíng Garai taí ri.\*

ga myiqhtoí pé kê tô é dang eq rajung za nghut ri.

<sup>19</sup> Haú mù luî, ngò taí nau é gi, tungbaù pé chyáng mai Garai Gasang shut lhing lo é bang lé, gotù haí le a lhoq wuî é za,

<sup>20</sup> hparà lhô pé lé kyáng byi é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lê.

<sup>21</sup> Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô ló kômù, Bánno buinyi hkangmó tarajong pé má nghap kyo kyo kut bùm kô é nghut lê." ga taí ri.

\* **15:15-16** Dawiq é yhûm gâ é gi, Dawiq eq yhâng é awut ashín pé up é hkyô lé gâ é nghut lê. ✠ **15:18** Amo 9:11-12



*Lumjǐng É Tungbaù Pê Chyáng Hun  
Kat É Laiká*

<sup>22</sup> Haú hkùn, lagyô pé, suwún wuí eq, hpúng byû wuí lhunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wuí chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

<sup>23</sup> Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tungbaù gumang wuí ê, nungmoq é gumang wuí nghut é, ngamoq lagyô pé eq suwún wuí gi, nuingón dang shit kyô kat lhê.

<sup>24</sup> Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng èq lhoq byok pyám luí, nungmoq é myit lé lhoq nhúng byi nyi é hkyô lé, ngamoq wó gyo bê.

<sup>25</sup> Haú mù, ngamoq lhunglhâng bang gi, byù ra-am lé hkyin yù mù,

<sup>26</sup> nga-nhúng é Yhumsing Yesuq Hkrisduq é matú, yhumsing asak lé lháng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê.

<sup>27</sup> Haú mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó râ nghut lhê.

<sup>28</sup> Nungmoq é matú gi, hparà lhó pé lé tǐng byi é zoshuq eq sui, lingzing mai myhik sat é dusak sho eq ashop é dǒng gungsho zùm yap é hkyô pé lé, koi pyám râ hkyô mai lai luí, gotù wòwùn hùn râ hkyô a joq nghu luí, Choyiyúng Woi-nyí le, ngamoq le, myit huí to bê.

<sup>29</sup> Nungmoq haú pé lé koi pyám nyi kǒjáng gi, gè râ nghut lhê.

Nuingón wángzán nyi kó sháng gaq ô!" ga kê tô ri.

<sup>30</sup> Yhangmoq lé nhang kat kǒjáng, yhangmoq gi, Antioku wà mó má gyó jé lô kǒmù, hpúng byû wuí lé ji tsǐng to kǒluí, haú hùn kat é laiká lé ap byi akô nghut ri.

<sup>31</sup> Hpúng byû wuí gi, laiká haú lé ban nghap kǒjáng, wum-o byi é danglù hau é yanmai, gabú nyi bum akô.

<sup>32</sup> Yudaq eq Sila gi, myiqhtoí nhik le nghut kǒmù luí, gumang wuí lé mungdang myo myô èq lhoq pun lhoq kying kǒmù, wum-o lhoq gǐng to byi akô.

<sup>33</sup> Rayoq zo haú má nyi nyi kô é htâng má, gumang wuí gi, yhangmoq lé nhang kat é bǎng chyáng, ngui ngui ngón ngón dum tau ló nhâng bekô nghut ri.

<sup>34</sup> (Sila kúm gi, yhang ô nau é dǒng nyi gyó tô ri.)†

<sup>35</sup> Poluq eq Barnaba kúm gi, Antioku wà mó má nyi gyó to kǒmù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

*Poluq Eq Barnaba Nhik Gǎng Lhum É Hkyô*

<sup>36</sup> Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap hkgámó mâ é gumang wuí chyáng taú lò luí, yhangmoq hkâsu dut nyi é hkyô lé, ló dum kúm wú lo goq." ga taí ri.

<sup>37</sup> Barnaba gi, Markuq gâ é Yohan lé le shuí chǔng nau ri.

<sup>38</sup> Nghut kǒlhang, Poluq gi, haú yuq lé a kǎm shuí chǔng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kǎm xoq zui nau é sù nghut é yanmai nghut ri.

<sup>39</sup> Hau é yanmai, yhangnhik gi, gyai yhang taí shai lhum kǒmù, rayuq eq rayuq gǎng lhum bekô nghut ri. Barnaba gi, Markuq lé shuí chǔng luí, lhai

† 15:34 Bun zo shí lhum gi, Grik Chyúmlaiká myo myo má a bô nghut lhê.

ji mù Kupru zinlóng shut e ló byuq bê nghut ri.

<sup>40</sup> Poluq kúm gi, Sila lé hkyin yù mù, gumang wui èq yhang lé Yhumsing Garaí é jeju má ap kat kô é htâng má, yhangnhik gi, htoq e ló byuq bekô.

<sup>41</sup> Haû mù, Poluq gi, Suriq mau eq Kiliki mau mai sô lai ló uchyang, haû má é noqkuq hpúng pé lé wum-o lhoq ging byí wún bê nghut ri.

## 16

### *Poluq Eq Sila Nhik Chyang Timohti Châng É Hkyô*

<sup>1</sup> Poluq gi, Derbe wà mó má jé é htâng, Lustra wà mó má dum jé ri. Haû wà má, Timohti gâ é chângzo rayuq nyi ri. Yhâng nu gi, Yesuq lé lumjing é Yudaq myiwe myhí nghut ri; yhâng wa kúm gi, Grik amyû nghut ri.

<sup>2</sup> Timohti gi, Lustra wà mó eq Ikoni wà mó má nyi é gumang wui èq hkyôn é hui sù nghut ri.

<sup>3</sup> Poluq gi, hkyowui má yhang lé shuí chùng naù mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haû má é Yudaq byu pé lhunghâng bang sé kômù, haû bang lé myit tê byí é yanmai nghut ri.

<sup>4</sup> Haû mù, yhangmoq gi, rawa htâng rawà mai lai ló uchyang, Yerusalem wà mó má é lagyo pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé taí kyô akô.

<sup>5</sup> Haû mù luí, hpúng byû wui gi, lumjing hkyô má wum-o bo lò kômù, ra-nyí èq ra-nyí byù du myô jat lo nyi ri.

### *Makedoni Byù Rayuq Lé, Poluq Shing-rán Myang É Hkyô*

<sup>6</sup> Ahkuí, yhangmoq gi, Asia mau má mungdang é hko kyo râ hkyô lé Chyoiyung Woi-nyí èq yhangmoq lé hkùm pyâm é yanmai, Hprugi mau eq Galatiq mau đông sô lai ló mù,

<sup>7</sup> Musi mau kyo má jé ló kôjáng, Bihtuni mau shut wang ló râ dâ akô;

nghut kôlhang, Yesuq é Woi-nyí gi, yhangmoq lé ahkáng a byi nghut ri.

<sup>8</sup> Haû mù, yhangmoq gi, Musi mau mai sô lai ló luí, Troa myuq má gyó jé ló akô.

<sup>9</sup> Haû má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yû laq." ga luí, yhang lé dung wut nyi é shing-rán myang ri.

<sup>10</sup> Shing-rán haû lé Poluq myang é eq, Makedoni byu pé lé gabú danglù hko kyo râ matú, ngamoq lé Garaí Gasang wut yù bê nghut ri nghu myit yù luí, haû hkùn yhang, ngamoq gi, Makedoni mau shut dap ê râ matú rì rì kut ló bê nghut lhê.

### *Ludia Gâ É Myiwe Myhí Hpúng Byù Dut Lo É Hkyô*

<sup>11</sup> Haû mù luí, ngamoq gi, Troa myuq mai Samohtake zinlóng ang ang shut lhai ji é mù luí, htang nyí gi, Neapoli wà má jé bê nghut lhê.

<sup>12</sup> Haû mai lai jáng, Makedoni mau má, Romaq byu pé xuq tô é, haû ginwáng má é ahkyak wà mó nghut é, Hpilipi myuq má ngamoq jé mù, haû má rayoq zo nyi nyi é nghut lhê.

<sup>13</sup> Bánno buinyí jé jáng, ngamoq gi, kyûdung jowò joq nhô ngam mù, wà hkum shinggan má é, wuìlàng yàm shut htoq é luí, haû má zing to lánng é myiwe wui lé, zung gyó mù nyo hi é nghut lhê.

<sup>14</sup> Haû dang gyo nyi é bang má, Garaí Gasang lé noqkuq é, Htuatira myuq byû, pân nê ung zo sù Ludia gâ é myiwe myhí rayuq bo ri; Yhumsing Garaí gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri.

<sup>15</sup> Yhang gi, yhang eq yhâng yhumbyù wui wui-myhup ban hkâm yù kôjáng, "Nungmoq gi, ngo lé haû Yhumsing Yesuq má lumjing bê sù nghut é đông, myit yù byi kô é nghut jáng, ngá yhùm má lé bing keq." ga luí, ngamoq lé zuq zuq ji yu ri.

### *Poluq Eq Sila Nhik Htóng Lúng É Hkyô*

16 Ra-nyí lé, ngamoq gi, haú kyûdûng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhâng yhumsîng wui lé ngunzè gyai yang hô byí é sù nghut lê.

17 Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasâng é dui-nhâng zoshâng wui nghut bum akô ô!" ga wut garú ri.

18 Buinyì myo myo haú su chyat châng garú wún é yanmai, Poluq gi, gyai yang myit hpêbu byuq mù, lhing wú kat luí, nat haú lé, "Yesuq Hkrisduq é myìng lang luí ngò nang lé hkunmó hkyô kat lê, yhâng chyáng mai htoq ló byuq aq." ga luí, nat haú lé, nhik-yô kat ri. Haú hkûn jáng, nat haú gi, yhâng chyáng mai htoq ló byuq bê nghut ri.

19 Ahkuí, myiwe hau é yhumsîng wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gài mâ é suwún wui chyáng she hkyut e akô.

20 Dum, yangmoq gi, yangnhik lé tarâ agyì pé chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é dông,

21 nga-nhûng é myuq lé gunjâng nyi akô nghut ri." ga taí akô.

22 Haú mù luí, shiwa byu pé gi, yangnhik lé chôm htâm akô. Tarâ agyì pé gi, yangnhik é mebu lé lêng hkyut pyám luí, wumchûm hkat èq bat râ matú, hkunmó hkyô kat akô.

23 Yhangmoq gi, yangnhik lé gyai yang nhuq bat yu é htâng, htong má lhung kat mù, rago za wú zúng râ matú htóng suwún lé hkunmó hkyô tô akô.

24 Htóng suwún hpó gi, haú sù é hkunmó lé wó jáng, yangnhik lé hkyi kyum hut luí, htóng mâ é, je ahte gok má lhung tô ri.

### *Htóng Suwún Hpó Hkyi Yù Huí É Hkyô*

25 Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yangnhik é htê lé chôm gyó nyi bum akô.

26 Haú hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkanmó mâ é toqjâng tui pé le gyut gyó byuq bê nghut ri.

27 Htóng suwún hpó gi, yhup bún lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bùm bekô râ nghut lê ga myit yù luí, shâm shê mù, yhanggùng yang sat shí râ dâ ri.

28 Nghut kôlhang, Poluq gi, "Ê, náng gûng yang nàng haú su hkâkut, ngamoq banshoq shí má nyi tô lê." ga luí, htê mó èq wut garu taí kat ri.

29 Haú hkûn, yang gi, duq é myi-bung lé dúng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri.

30 Hau htâng, yang gi, yangnhik lé shuí htoq yù luí, "Sarâ nhik ê, ngò hkyi yu é hui râ matú, haí kut ra râ lú?" ga myi kat ri.

31 Haú hkûn, yangnhik gi, "Yhumsîng Yesuq lé lumjîng jáng, nàng eq náng yhumbyù lhunglhang bang hkyi yu é hui râ nghut lê." ga taí akô.

32 Hau htâng, yangnhik gi, haú htóng suwún hpó eq yhâng yhumbyù lhunglhang lé, Yhumsing é mung-dang hko kyô akô.

33 Haú myín haú u lé yang, htóng suwún hpó gi, yangnhik lé shuí ê mù, yangnhik é dâm pé lé tsing chí pyám byi luí, haú htâng, yang eq yhâng yhumbyù banshoq bang wui-myhup hkâm yù bekô nghut ri.

34 Hau htâng, yang gi, yangnhik lé, yhâng é yhúmkaú má shuí wang ló mù, zoshuq hkan byí ri. Yang eq yhâng yhumbyù banshoq bang

gi, Garai Gasang lé wó lumjǐng bekô nghut é yanmai, gyai gabú nyi bum akô nghut ri.

### *Haq Nhang Pyám Râ Lé A Đông É Hkyô*

<sup>35</sup> Ahkuí, maubó jáng, tarâ agyì wuì gi, "Haú nhik lé nhang pyám aq." ga, htóng suwún hpô chyáng pyata pé lé taí nhang kat akô.

<sup>36</sup> Haú hkún, htóng suwún hpó gi, "Nungnhik lé nhang pyám aq ga, tarâ agyì wuì mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé taí ri.

<sup>37</sup> Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yú kó sháng gaq." ga luí, yhangmoq lé tû taí kat ri.

<sup>38</sup> Pyata pé gi, tarâ agyì wuì lé dang haú pé ló taí kyo kôjáng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí,

<sup>39</sup> yhangmoq yhang, yhangnhik chyáng lé mù, tóngbán luí, shuí htoq yú mù, wà haú mai htoq ló byuq râ matú chôm dưng akô.

<sup>40</sup> Haú mù, Poluq eq Sila nhik gi, htóng mai htoq ló é htâng, Ludia é yhúm má wang ló akô; haú má, gumang wuì eq le hui kômù, yhangmoq lé wum-o byi luí, htoq ló bekô nghut ri.

## 17

### *Htesaloni Wà Mó Má Mungdang Hko Kyô É Hkyô*

<sup>1</sup> Hau htâng, yhangmoq gi, Amhipoli wà mó eq Apolon wà mó mai sô lai ló mù, Htesaloni wà mó má jé akô. Haú wà má gi, Yudaq byu pé é tarajong ralthum joq ri.

<sup>2</sup> Poluq gi, yhang lhaq kut nyi é eq rajung za, tarajong má wàng luí, Bánno buinyì sum nyí yhang, Chyúmdang má bo é eq séng mù,

yhangmoq eq chôm mǐng lhum uchyang,

<sup>3</sup> Hkrisduq wuìhke jamjau hui mù, shí bê mai dum dui toq lô rá hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri.

<sup>4</sup> Yudaq byu pé mâ é ra-am gi, gyô jǐng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuì tsómra myo shoq le, gyô jǐng kômù, lé xoq yu akô.

<sup>5</sup> Nghut kôlhang, a gyô jǐng é Yudaq byu pé gi, manôn kôluí, gài mâ é byùgang jùm ra-am lé lung yù mù, byù moq mó tsǐng yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhúm má htím e ló akô.

<sup>6</sup> Nghut kôlhang, yhangnhik lé a myàng kôjáng, yhangmoq gi, Yason eq gumang wuì ra-am lé, yhangmoq é wà suwún wuì chyáng lâng she é kômù, "Mingkan gón lé atau ahú kut é byù shí nhik, ahkuí shí má jé jáng, Yason gi, yhâng é yhúm má lhom hkûlum yu ri.

<sup>7</sup> Yhangmoq lhunglhâng bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tará lé lhoq shai é đông kut é bang nghut akô." ga taí garú bum akô.

<sup>8</sup> Shiwa byu pé eq wà suwún wuì gi, dang haú lé wó gyo kôjáng, myit wuì myit hke dut nyi bum akô.

<sup>9</sup> Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

### *Beria Wà Mó Bang, Mungdang Lé Lhom Yu É Hkyô*

<sup>10</sup> Haú myín jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri.

11 Haû Beria wà mó byu pé gi, Htesaloni wà mó byu pé htoq má je riyhang nhik bo bum akô; haû mù, danglù haû lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuî Chyúmdang lé chôm nghap wú nyi akô nghut ri.

12 Haû mù luî, Yudaq byu pé myo myo gi, lumjîng bum akô, haû eq rajung za, aróng wó é Grik myiwe wuî eq yuqgè wuî myo myo le, lumjîng bûm bekô nghut ri.

13 Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haû má lé kômù, wà byù wuî lé mhoq hpyoq luî, gabyông lò nhang akô.

14 Haû hkûn, gumang wuî gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyô tô akô nghut ri.

15 Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng lô râ matú pying kat é dang lé wun chûng mù, dum taû lò bekô nghut ri.

### *Poluq, Ahten Myuq Má Nyi É U Lhé Hkyô*

16 Ahkuî, Poluq gi, Ahten myuq má haû nhik lé láng nyi tô é u lé, haû wà má rawa é hparà lhô baú dut tô é lé myàng mù luî, yhâng i-myt gyai yhang a ngón dut byuq ri.

17 Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gai pé má hui mihui bang eq le, nyí wuî taî sân kyô lhûm nyi akô nghut ri.

18 Haû mù luî, Epikuri hpaqchyî eq Sto-i hpaqchyî\* lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haû hkûn, yhang gi, Yesuq é hkyô eq dum dui toq hkyô é gabú danglù lé hko kyô é yanmai, ra-am gi, "Byù pyok shí

yuq gi, haî wá taî nyi lhê lhú?" ga; ra-am gi, "Góming hparà pé é hkyô lé taî kyo sù nghut sam ri." ga, taî bum akô nghut ri.

19 Hau htâng, yhangmoq gi, Aripagu gâ é byìn tú wap shut Poluq lé shuî doq lô mù, "Nang mhoqshit é hkyô asik, ngamoq lé sé nhang le a gè lhú?"

20 Nang èq taî é maú nhô za gâ é hkyô lé ngamoq wó gyô ri; haû é dang kyíng lé ngamoq sé nau ri." ga taî bum akô.

21 (Ahten byu pé eq haû má nyi é góming byu pé lhunglhâng bang gi, dang sik lù sik haû lé taî kún gyô kún mù, yhangmoq é ahkyíng lé lhoq pán nyi bum akô nghut ri.)

### *Poluq, Aripagu Zuphpong Má Mungdang Hko É Hkyô*

22 Haû u lé, Poluq gi, Aripagu zuphpong má toq yap mù, "Ahten byu pé é, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri.

23 Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaî matú.', ga luî, kê tô é hkungga gyap rallhum lé myang záng ri; haû nungmoq a sê é za jaú nyi é Garaî hkyô lé, ngò, nungmoq lé hkaî kyo kôlé.

24 Myidàm htoq eq haû má joq mi-joq lé hpan tô é Garai Gasang gi, mauhkûng eq myigùng é Yhumsîng le nghut lhê mù luî, byu loq èq saî é noqkuq yhûm má nyi râ a nghut.

25 Yhang gi, byù lhunglhâng bang lé asak, soq, ra mira gumjup shoq byî to sù nghut nyi é yanmai, rajung jung râ é sù lé su, byu loq èq dojaú râ sù a nghut.

26 Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luî, yhangmoq é matú hí hí mai ahkyíng yam-yoq eq nyi râ jowô masat to byi bê nghut ri.

\* 17:18 Epikuri hpaqchyî gi, htang pyat a joq, ahkuî ngón yú râ za ahkyak gâ é nghut lhê. Sto-i hpaqchyî gi, haî wá dut kôlhang i-myt zim za kut mù, htang pyat matú chiq a ra gâ é nghut lhê.

27 Yhang gi, nga-nhúng yuq hkanmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri.

28 Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyî, wó dui é eq îsu wó dut é nghut lhê.

29 Haû mù, nga-nhúng gi, Garai Gasâng é yhangzô pé nghut nyi é yanmai, Garaî gùng gi, byu é hpaqchyî loq èq kyûng kâ tô é hîng, ngùn, luqgok pé eq pûng lhê nghû luî hkâ-myt yù kó.

30 Laí lò bê haû myoq a bóng shi é pyat lé, Garai Gasang gi, haî le a ga lhaî pyâm to kôlhang, ahkuî gi, jowò hkanmó mâ é byù lhunghâng bang lé, myit lhîng keq ga hkanmó hkyô to bê nghut ri.

31 Hkâsu mù gâ le, Yhang hkyin to sù mai mingkan gón lé tara é dông jéyáng râ buinyî ra-nyî masat to bê nghut ri. Shí hkyô lé, byù lhunghâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri." ga taí ri.

32 Shí é mai dum dui toq lo é hkyô lé wó gyô bùm kôjáng, ra-am gi, taí hpoî pyâm byî akô; ra-am kúm gi, "Nàng shí hkyô taí é lé ngamoq dum gyô wú nau ashî." ga taí akô.

33 Hau htâng, Poluq gi, haû zuphpong mai htoq ló byuq bê nghut ri.

34 Nghut kôlhang, byù ra-am gi, Poluq é htâng cháng kômù, lumjîng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

## 18

### *Poluq, Korinhtuq Myuq Má Nyi É U Lhê Hkyô*

1 Hau htâng má, Poluq gi, Ahten myuq mai htoq luî, Korinhtuq myuq má jé lo ri.

2 Haû má, yhang gi, Romaq myuq mai Yudaq byù lhunghâng bang htoq ló byuq râ dut lhê ga, hko hkâm Klodi èq hkanmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luî, yhangnhik chyáng é ri.

3 Yhangmoq gi, jonghpang saí zo bang chyat nghut kô é yanmai, muzó pûng kôluî, Poluq gi, yhangnhik eq rahá nyi nyi mù, muzó chôm saí akô.

4 Bánno buinyî hkanmó, Poluq gi, tarajong má Yudaq byù eq, Grik pé lé, taí sân kyo luî, lhoq pun lhoq kyîng yu ri.

5 Ahkuî, Sila eq Timohti nhik Make-doni mau mai châng jé jáng, Poluq gi, mungdang hkô hkyô má za wum kat luî, haû Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri.

6 Nghut kôlhang, Yudaq byu pé gi, lhom he-ngik pyâm kômù, yhang lé rhoî dang taí pyâm akô; haû mù, Poluq gi, yhâng mebu ko shit é dông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haî a séng lo; ahkuî mai, ngò gi, tûngbaù pé chyáng e ló berâ nghut lhê." ga luî, yhangmoq lé taí ri.

7 Hau htâng, yhang gi, tarajong mai htoq luî, jong haû eq yhep nghut é, Garai Gasang lé noqkuq é Titu Yustu ga su é yhûm má wang ló ri.

8 Krispu gâ é tarajong má up sù gi, yhâng yhumbyù lhunghâng bang eq rahá, Yhumsing lé lumjîng akô. Korinhtuq myuq byu pé myo myo le, Poluq é dang lé gyô yù mù, lumjîng luî, wui-myhup hkâm yu bum akô nghut ri.

9 Ra-myìn lé, shing-rán ralhûm má Yhumsîng mai Poluq lé taí é gi, "Hkâgyuq, taí aq, zim za hkâ-nyî.

10 Ngò nàng eq rahá nghut nyi lhê, nàng lé ó yuq èq le haî wó kut râ a nghut, hkâsu mù gâ le, myuq shî má, ngá é byù myo myo nyi bum lhê." gâ ri.

11 Haû mù luî, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

12 Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ eq Poluq lé chôm chyup yû kôluî, tarâ hpyit wap má she háng kômù,

13 "Byù shî yuq gi, jep é tarâ eq shai lhûm é dông, Garai Gasang lé noqkuq râ matú, byu pé lé mhoq hpyoq wún ri." ga mara hûn akô.

14 Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shî gi, tarâ lu lai é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê.

15 Nghut kôlháng, muzó shî gi, nungmoq é tarâ eq séng luî, dang eq séng luî, myìng eq séng luî, taí lhum kô é hkyô nghut é yanmai, nungmoq yhang ru lò hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù,

16 tarâ hpyit wap mai yhangmoq lé hkat htoq pyám nhang ri.

17 Haú hkûn, yhangmoq lhunglhâng bang gi, tarajong má up sù Sositeni lé chyup yû mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

### *Poluq, Antioku Wà Mó Má Dum Taù Jé É hkyô*

18 Poluq gi, Korinhtuq myuq má buinyi tsómra myáng shoq lumjìng bang eq nyi nyi ri. Hau htâng, yhang gi, haú bang lé shi-kyâm to luî, Priskila eq Akula nhik lé byinzùm kut mù, lhai ji luî Suriq mau shut e lò akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.\*

19 Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luî, yhang baú

tarajong má wàng mù, Yudaq byu pé lé taí sân kyo byi ri.

20 Haú mâ é bang gi, yhangmoq eq rahá rayoq zo nyi shi râ dông yhang lé dung kô é nghut kôlháng, yhang gi, a nhô lo nghut ri.

21 Haú mù, yhang gi, Ehpesu myuq mai lhai ji mù htoq lò uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byi tô ri.

22 Ahkuî, Poluq gi, Kesare wà mó má lò jé dap jáng, Yerusalem wà mó shut doq lò mù, noqkuq hpúng lé lò huí tô é htâng, Antioku wà mó má dum gyó lò ri.

23 Yhang gi, haú wà má rayoq zo nyi é htâng, htoq lò mù, Galatiq mau eq Hprugi mau mai sô lai lò uchyang, rawa htâng rawà mâ é chángzô pé lé wum-o lhoq ging byi ri.

### *Apolo Zui Saí É Muzó*

24 Ahkuî, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kûng é sù nghut ri.

25 Yhang gi, Yohan é baptisma hkyô lé za sé sù nghut kôlháng, Yhumsing é hkyô lé mhoq yû bê nghut luî, Yesuq é hkyô pé lé mhoq yu to bê eq rajung za wum zuq tung ga luî, hkyak hkyak mhoqshit byi ri.

26 Ahkuî, yhang gi, gyuq kyûm myit a bo é za tarajong má taí hi lò ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byi akô nghut ri.

27 Apolo gi, Ahkaia mau shut dap e lò nau é hkûn, gumang wuì gi, yhang lé wum saí byi mù, yhang lé lhom hkûlum yù râ matú, chángzô pé chyáng laiká ká byi kat akô; yhang gi, jé jáng, Garai Gasâng jeju mai lumjìng

\* 18:18 Xâm nyhâm pyâm é gi, Yudaq htûng dông rajung jung kut râ matú danggidiq to luî, haú lé ban kut jáng, yhumsing xâm lé nyhâm pyâm é nghut lhê.

bê bang lé, gyai yhang wó garúm sù dut bê nghut ri.

<sup>28</sup> Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tûn shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

## 19

### *Poluq, Ehpesu Myuq Má Nyi U Lhé Hkyô*

<sup>1</sup> Ahkuí, Apolo gi, Korinhtuq myuq má nyi tô é hkûn, Poluq gi, mau káng mai sô laí ló mù, Ehpesu myuq má jé ri. Haú má, yhang gi, chángzô pé ram eq hui luí,

<sup>2</sup> yhangmoq lé, "Nungmoq gi, lumjínq é hkûn, Chyoiyúnq Woi-nyí lé, wó yú bekô lhú?" ga myí ri.

Haú hkûn, yhangmoq gi, "Chyoiyúnq Woi-nyí nyi lhé gâ é lhang, ngamoq a wó gyô wú." ga tû taí akô.

<sup>3</sup> Haú mù, Poluq gi, "Haú nghut jáng, nungmoq gi, haí jung baptisma hkam yú kô é lhú?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhé." ga tû taí akô.

<sup>4</sup> Haú hkûn, Poluq gi, "Yohan é baptisma nghu é gi, myit lhnq mù wui-myhup hkâm yu é hkyô lé gâ lhé. Yohan gi, yhang é htâng má jé lé râ sù, haú Yesuq lé sheq lumjínq râ lhé ga shiwa byu pé lé taí ri." ga taí ri.

<sup>5</sup> Yhangmoq gi, dang haú lé wó gyo kôjáng, Yesuq é myínq lang luí baptisma byí é lé, hkam yu bum akô.

<sup>6</sup> Poluq gi, yhangmoq é htoq má loq ke byi jáng, haú Chyoiyúnq Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoí lo bum akô.

<sup>7</sup> Haú bang lhungháng gi, yuqgè raxe í yuq kó nghut ri.

<sup>8</sup> Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyínq yu ri.

<sup>9</sup> Nghut kôlháng, ra-am gi, myit htan lo bùm kôluí a kâm lumjínq kô é htoq

agó, haú Yhumsing é Hkyô lé byu pé hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chûng mù, Turanu gá su é hpaqchyí mhoq jong má, nyí wuí taí sân kyô lhûm nyi akô.

<sup>10</sup> Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunghâng bang gi, Yhumsing é mungdang lé wó gyô yu bum akô nghut ri.

### *Skewa É Yhangzo Nyhit Yuq É Hkyô*

<sup>11</sup> Garai Gasang gi, Poluq é loq dông laklaí kumlhá kut ri.

<sup>12</sup> Haú mù, Poluq chyáng mâ é hpa-jet eq hpyihit rajung jung lé, nô bang chyáng yu ló mù, ló záng byi jáng lhang, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

<sup>13</sup> Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myínq mai, ngò, nungmoq lé hkat htoq lhé." ga, agè ashop é nat wang júng to bang é ahtoq má, Yhumsing Yesuq é myínq lé lang luí, hkat chyam wú akô.

<sup>14</sup> Skewa gâ é, Yudaq hkyangjong agyí rayuq é yuqzo nyhit yuq le haú su kut wun akô.

<sup>15</sup> Ra-nyí lé, agè ashop é nat gi, yhangmoq lé, "Yesuq lé ngò sê lhé; Poluq é hkyô lé le ngò sê lhé; nghut kôlháng, nungmoq gi, ó pé nghut akô?" ga tû taí mù,

<sup>16</sup> agè ashop é nat haú wang júng é byù gi, yhangmoq htoq má byam doq jí to luí, nhuq bat yú mù yhangmoq lé ung pyâm ri. Yhangmoq gi, yhûm haú mai gùngchín sui nê yang yang hpang htoq ló bekô nghut ri.

<sup>17</sup> Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunghâng bang gi, chôm gyô gyuq bum akô. Yhumsing Yesuq é myínq gi, hkyá-on lhoq toq é hui bê nghut ri.



18 Lumjǎng bê bang myo myo gi, lé mù, yhumsǎng kut shut é agè ashop hkyô lé, myo myô hí má yín yu akô.

19 Myoqheq hpaqchyî kut zô é bang le, yhangmoq é laiká lé yu lé kôluî, shiwa byu pê hí má nyhê hkyô pyâm akô. Mausau haú pê é ahpau lé sôn wú le, ngùn chap ngo mun záng ri.

20 Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

### *Ehpesu Myuq Má Gabyông É Hkyô*

21 Shí pé ban dut laî htâng má, Poluq gi, Makedoni mau eq Ahkaia mau dông sô laî ló mù, Yerusalem wà mó má ló jé râ ga myit hpyit yû luî, "Haú má ló jé tô é htâng má, ngò, Romaq myuq má le, jé wú râ dut ashî." ga taî ri.

22 Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luî, yhang gi, Asia mau má rayoq rabun zo nyi gyó tô ri.

23 Haú yoq lé, haú Yhumsing é Hkyô yanmai gyai yhang gabyông lo bum akô.

24 Demetri gâ é ngùn bat zo sù rayuq gi, Artemi hpara é ngùn yhùm zông zo saí luî, mù saí luzúm wuî lé wó sùt nhang nyi ri.

25 Yhang gi, yhâng é ngùn bat zo luzúm wuî eq haú jung amû kut é góbang lé le jì tsǎng to mù, taî é gi, "Luzúm wuî ê, muzó shí lhùm é yanmai, nga-nhùng nyi ngón yuqyo nyi é hkyô lé, nungmoq sê lhê.

26 Nghut kôle, ahkuî gi, Ehpesu myuq má za le a nghut lo, Asia mau lháng aluq jàm shoq, byu loq èq saí é zè lé, garaí pé a nghut ga, shî Poluq ga sù mai byù myo myo lé mhoq hpyoq yû mù, hkyô shuî lhoq nghoq nyi é hkyô lé, nungmoq wó myâng, wó gyô nyi akô.

27 Haú mù luî, nga-nhùng é muzó shî gi, hpoi byuq râ lé chiq râ é za a nghut, hparà myhí mó Artemi é noqkuq yhùm gi, haí a dut byuq luî, Asia mau gón eq mingkan gón mai noq é hparà myhí é shǎngkang hpoi

byuq râ lé le myit chiq râ dut bê." gâ ri.

28 Yhangmoq gi, dang haú lé wó gyô bùm kôjáng, nhik mó gyô yo kôluî, "Ehpesu myuq byu pê é Artemi gi, kô nyi sháng gaq ô!" ga chôm garû bum akô.

29 Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poî wàng mó shut radá dâm chyîn chyap wang ló bum akô.

30 Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri.

31 Poluq é luzúm wuî nghut é, haú mau mâ é suwún wuî ra-am lháng, yhang lé poî wàng hkaú má a ê râ matú, hkùm pyám nhang akô nghut ri.

32 Zǎng tô é bang gi, hai hû háng le a sé lo dut byuq kômù luî, ra-am rajung ga garû bum akô. Myo mi-myô gi, haí mù luî yhangmoq haú má nyi tô é lé lháng a sê bùm kó nghut ri.

33 Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naú luî, zim byuq râ matú loq tu ri.

34 Nghut kôlhang, Alesander, Yudaq byù nghut é lé sé kôjáng, yhangmoq lhunglhâng bang gi, rahtê za kut kôluî, "Ehpesu myuq byu pê é Artemi gi, kô nyi sháng gaq ô!" ga hkyíng hkum í hkum kô garû bum akô.

35 Haú, myuq chyare hpó gi, shiwa moq mó lé lhoq zim luî taí é gi, "Ehpesu myuq byu pé ê, Ehpesu myuq shî gi, Artemi myhí mó é noqkuq yhùm eq mauhkùng mai byit gyó ló é yhâng é alhò lé, wú zúng nyi é wà nghut é hkyô lé, mingkan má a sê é ó yuq wa nyi lhê lú?"

36 Haú mù luî, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko.

37 Shí nhik gi, noqkuq yhûm lé hpyoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nung-moq shuí lé bekô nghut ri.

38 Demetri eq yhâng é ngùn bat zo luzúm wuí gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyî pé nyi lhê. Haú má yhangmoq é kó sháng gâq.

39 Nungmoq taí nau é gó hkyô ra-jung jung joq é nghut le kúm gi, tarâ wang zuphpong mó má chôm taí pyám râ nghut lhê.

40 Hkû-nyí gabyông é mû shí má, mû htoq wang a bo é yanmai, nga-nhûng lé mara hûn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhûng a wó taí kyo nghut ri." gâ ri.

41 Shí pé ban taí é htâng má, yhang gi, shiwa moq mó lé lhoq pyo kat bê nghut ri.

## 20

### *Makedoni Mau Éq Grik Mau Đông Lai Ló É U Lhê Hkyô*

1 Haú gabyông é hkyô zîm byuq é htâng má, Poluq gi, chángzô pé lé jî yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri.

2 Yhang gi, haú mau mai sô lai ló uchyang, byu pé lé wum byî é dang myo myo taí luí, Grik mau má ló jé bê.

3 Yhang haú má lhamó sum hkyap nyi yù mù, lhai jî luí Suriq mau shut ê râ hen nyi é hkûn, Yudaq byu pé gi, yhang lé gyám nyî kô é yanmai, yhang gi, Makedoni mau đông tau lò râ lé myit hpyit bê nghut ri.

4 Yhang eq rabyìn za châng é bang gi, Beria wà mó mâ é Purú yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô.

5 Yhangmoq gi, hí so lánng luí, ngá-nhik lé Troa myuq má ló lánng nyi akô.

6 Nghut kôlhang, ngá-nhik gi, Azuma Poî\* lai é htâng má, Hpilipi wà mó mai lhai jî ló le, ngo nyí nghû jáng, Troa myuq má yhangmoq lé hui luí, hau má nyhit nyí chôm nyi é nghut lhê.

### *Troa Wà Má, Utuhku Ga Sû Lhoq Tui Toq Huí É Hkyô*

7 Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri.

8 Ngamoq zup zîng nyi é hau ahtoq pyâm wap má, myibung myo myo le duq tô ri.

9 Poluq dang nyo hing nyi é u lé, Utuhku gâ é zorâm zo rayuq gi, hko-hot hkum yâm má yhup muí zung tô ri. Haú yuq gi, yhupmó myi byuq luí, yhûm sum tsáng mai byit gyó mù, yhang lé bún toq wú le shi byuq bê nghut ri.

10 Haú hkûn, Poluq gi, gyó ló mù, po ngop to luí, "Hkâdân ko, yhang soq bo ashí." ga taí ri.

11 Haú mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri.

12 Zorâm zo hau lé duí gù shuí ló kômù, nhik tîng é gyai yhang hui bekô nghut ri.

### *Troa Wà Eq Melitu Wà Gyoro Mâ É Hkyowuì*

13 Poluq gi, myi hkyô ló râ matú hen tô é yanmai, yhang lajang byî é eq rajung za, yhang lé Asu wà má lhai lhom shuí jî râ matú, ngamoq gi, lhai jî mù hí ló lánng bê nghut lhê.

14 Haú mù, yhang gi, Asu wà má ngamoq eq hui luí, ngamoq gi, yhang lé lhai má shuí jî chûng mù, Mitulene myuq shut e ló bê.

15 Htang nyi, ngamoq gi, hau mai lhai jî mù, Kiu zinlóng yâm mai lai ló luí, hau htang nyí gi, Samu zinlóng

\* 20:6 Múnchi a bo é Muk zo Poî lé, Azuma Poî le gâ lhê.

má laí dap ló luí, htang nyí gi, Melitu wà mó má jé ló bê nghut lhê.

16 Poluq gi, wó dut é nghut jáng, Penteko-ti buinyì lé Yerusalem wà mó má wó jé shoq gâ é yanmai, Asia mau má buinyì a kâm lhoq htum naù mù luí, Ehpesu myuq lé lhaí pyâm to râ matú, myit hpyit to bê nghut ri.

*Ehpesu Hpúng Suwún Wuí Lé, Poluq Shi-kyâm Tô É Dang*

17 Poluq gi, Melitu wà mó mai Ehpesu shut byù nhang kat luí, hpúng suwún wuí lé é jì nhang ri.

18 Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le;

19 Yudaq byu pé jeq hô luí, ngò wuîhke jamjau hui zo kôlhang, haú Yhumsing é muzó lé, ngò myit gyai lhoq nyhùm é eq ngaubyi ngaù nhap é èq wùn waq é hkyô lé le;

20 nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhùm htâng rayhùm má ngò nungmoq lé mhogshit é hkyô lé le;

21 ngò gi, Yudaq byu pé eq Grik pé lé, myit lhîng mù Garai Gasâng chyáng lhing lò ra eq, nga-nhûng é Yhumsîng Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akò.

22 Ahkuí, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut râ lé kúm gi, a sé nghut ri.

23 Ngò gi, htóng eq wuîhke jamjau hkyô ngo lé lánng tô ri ga, wà hkanmó má Chyoiyúng Woi-nyí èq lhoq pùn é hkyô lé za sê nyi lhê.

24 Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

25 Garai Gasâng é mingdán hkyô lé hko kyô wún é hkûn, ngò eq huí é nungmoq lhunglhâng bang gi, htâng nùng má ngo lé a myàng lo kó râ nghut é lé, ahkuí ngò sê to bê.

26 Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê.

27 Hkâsu mù gâ le, Garai Gasâng ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê.

28 Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng† lhunglhâng lé le, zúng nyí keq. Garai Gasâng Yhâng suí èq wui tô é noqkuq hpúng lé le, rém zúng nyí keq.

29 Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê.

30 Hau htoq agó, chángzô pé lé wó mhoq hpyoq yû shoq ga, shut é òng taí é byu pé lhang nungmoq chyáng mai htoq lô râ nghut lhê.

31 Haú mù luí, nungmoq yuq hkanmó lé, ngò sum zân tup ngaubyi ngau-nhap eq nyí myín a hkyíng loshoq, lhoq pun lhoq kyíng tô é dang pé lé, nungmoq gi, myit bun mù machya nyi keq.

32 Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê.

33 Ngò gi, ó yuq é hîng, ngùn, mebu pé lé le a myoqnoq wú.

34 Ngá é loq shí í loq gi, ngò eq ngá htâng châng é bang ra chá é lé kut byi bê hkyô lé, nungmoq yhang sé gù nghut lhê.

35 Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhúng gi, wum-o nyhóm bang lé htuq bang

† 20:28 Sau hpúng gâ é gi, lumjîng é bang lé gâ lhê.

luí, 'Lhom yu é htoq má byî é gi, je riyhang hkungsô wó nyi ri.' ga luí, Yhumsîng Yesuq taí é dang lé bún nyi sháng." gâ ri.

<sup>36</sup> Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyûdûng ri.

<sup>37</sup> Yhangmoq lhunglhâng bang gi, yhang lé po to luí, bopuq puq mù, chôm ngaú akô.

<sup>38</sup> Htâng nûng má, yhang lé dum myàng râ a nghut lo gâ é dang yan-mai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

## 21

### *Yerusalem Wà Mó Shut Doq Lô Nyi É U Lhê Hkyô*

<sup>1</sup> Ngamoq gi, yhangmoq lé kang pyâm to luí, lhai jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê.

<sup>2</sup> Haú wâ má Hpinisi mau shut dap lô é lhai lé, ngamoq myàng luí, haú mai chôm jî chûng bê.

<sup>3</sup> Haú hkûn, ngamoq gi, Kupru zinlóng lé myàng jáng, hau é loqyo hkyam đông lai lô luí, Suriq mau shut e lô le, hpugá zê lé hkyó râ matú, Turuq myuq má nô é nghut lhê.

<sup>4</sup> Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzô haú bang gi, Chyoiyûng Woi-nyí èq lhoq pûn é đông Poluq lé Yerusalem wà mó shut a lô râ matú, chôm hkûm akô.

<sup>5</sup> Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq lô bê. Chángzô pé lhunglhâng bang gi, yhangmoq é myi zo wuì eq rahá, ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyâm má hkyihput htuq mù, kyû chôm dung bê nghut lhê.

<sup>6</sup> Hau htâng, rayuq eq rayuq ban shi-kyâm lhum jáng, ngamoq gi, lhai

má wàng bê; yhangmoq gi, yhûm shut dum tau lô byuq bekô nghut ri.

<sup>7</sup> Ngamoq gi, Turuq myuq mai lhai jî chûng mù, Toleme wà má jé lô bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê.

<sup>8</sup> Htang nyí gi, ngamoq haú wâ mai htoq lô mù, Kesare wà mó má dum jé bê. Haú wâ má, haú htuqluq htuqbang nyhit yuq\* má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê.

<sup>9</sup> Yhang gi, yhang hku tô é byizo zomyi myiqhtoi myi yuq wó ri.

<sup>10</sup> Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri.

<sup>11</sup> Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "'Shî hpyihit yhumsîng lé, Yerusalem wà mó má é Yudaq byu pé mai shî su kut lhom tui luí, tûngbaù pé é loq má ap pyám kó râ nghut lhê;' ga luí, Chyoiyûng Woi-nyí taí ri." gâ ri.

<sup>12</sup> Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq lô râ matú, gyai yhang chôm hkûm bê nghut lhê.

<sup>13</sup> Nghut kôlhang, Poluq gi, "Nungmoq gi, hai mù luí ngaubyi ngau-nhap kut é eq, ngo lé myit wum gyui râ đông kut nyi akô lhu? Ngò gi, Yhumsîng Yesuq é yanmai, Yerusalem wà mó má, tuí é hui râ za a nghut, shî hkâm râ matú le rì rì nghut lhê." ga tû taí pyâm ri.

<sup>14</sup> Yhang lé wó taí hkûm râ su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chôm nyi bùm bê.

<sup>15</sup> Hau htâng má, ngamoq gi, zè món chûng mù Yerusalem wà mó shut doq lô bê nghut lhê.

<sup>16</sup> Kesare wà mó má é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é

\* 21:8 Lagyo 6:1-6

chángzo rayuq é yhûm má shuî ló mù, yhang chyáng bíng nhang akô.

*Yerusalem Wà Mó Má, Yakuq Lé Ê Huî É Hkyô*

<sup>17</sup> Yerusalem wà mó má ngamoq jé é hkûn, gumang wuî gi, ngamoq lé gabú tung lhom hkûlum yu akô.

<sup>18</sup> Htang nyí, Poluq eq ngamoq gi, Yakuq lé ê huî le, hpúng suwún wuî le zing nyi to lánng akô.

<sup>19</sup> Poluq gi, yhangmoq eq ban shichyen jáng, yhang wùn waq lai lo é hpúng mú đông mai, Garai Gasang eq tungbaù pé chyáng kut byi bê hkyô pé lé, jhkúm nuqguq shit kyô ri.

<sup>20</sup> Yhangmoq gi, haù lé wó gyo kôjáng, Garai Gasang lé hkya-ôn akô. Hau htang, Poluq lé tai kô é gi, "Âmang ê, Yudaq byu pé má lumjínng é bang hkâ-myhó hkyíng mun nghut bê lé, nàng sê lhê. Haù bang lhunglháng gi, jep é tarâ má myit zuq to bê bang chyat nghut bum akô.

<sup>21</sup> Nghut kôlhang, yhangmoq lhunglháng bang gi, tungbaù pé chyáng nyó lúng tô é Yudaq byù banshoq bang lé, nàng, yhumsing yhangzo yhangshù pé é matú ahpyokuq hpyit a ra nghu é eq nga-nhùng é htung tarâ lé châng nyi a ra nghu luî, Mosheq é tarâ lé tô pyám rã đông mhoqshit ri gâ é dang lé, wó gyô yu bùm bekô nghut ri.

<sup>22</sup> Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo rã lúh?

<sup>23</sup> Haù mù, ngamoq tai é đông kut aq, ngamoq chyáng danggidiq mó byi bê byù myi yuq nyi lhê.

<sup>24</sup> Nàng gi, haù bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù rã matú, ahpau le htoq byi aq. Haù hkûn sheq, byù lhunglháng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyi sù nghut é hkyô lé, sé kó rã nghut lhê.

<sup>25</sup> Lumjínng é tungbaù pé é matú kúm gi, hparà lhô pé lé títng byi é zoshuq,

sui, lingzing mai myhik sat é dusak sho eq ashop é đông gungsho zùm yap é hkyô pé lé, yhangmoq koi pyám rã matú, ngamoq chôm doqdan luî, kã hùn kat bê nghut lhê." ga akô.

<sup>26</sup> Haù mù luî, Poluq gi, hau htang nyí haù bang lé ji yù luî, yhangmoq eq rahá, lhoq san lhoq yúng yù mù, noqkuq yhûm má wàng luî, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, tai kyô ri.

*Poluq Chyup Yù Huî É Hkyô*

<sup>27</sup> Buinyi nyhit nyí haù ngap rã yàm má, Asia mau má é Yudaq byu pé ra-am gi, noqkuq yhûm má Poluq lé myàng kômù, shiwa byu pé lé shuî gabyong luî, yhang lé chyup yù mù, garú tai kô é dang gi,

<sup>28</sup> "Israelaq byu pé ê, garúm yù keq, shí yuq gi, nga-nhùng byuhú lé le, jep é tarâ lé le, jowò shí lé le, shut shai é đông jowò hkangmó má é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuî háng é eq, chyoiyúng jowò shí lé achayut kut é sù nghut ri." gã akô.

<sup>29</sup> (Hkâsu mù gã le, yhangmoq gi, Ehpesu myuq byù Trohpimu ga sù eq Poluq wã hkaù má rahá nghut kô é lé, myàng kômù, haù yuq lé noqkuq yhûm shut shuî háng nhô ngam pyám kô é yanmai nghut ri.)

<sup>30</sup> Rawà gón gabyông lo mù, shiwa byu pé lhínghkyuq mai din lé lô kôluî, Poluq lé chyup zing to uchyang, noqkuq yhûm shinggan shut she hkyut htoq ló akô. Haù hkûn jáng, hkum pé lé myhí pyám akô nghut ri.

<sup>31</sup> Poluq lé yhangmoq sat rã dã nyi kô é hkûn, Yerusalem wã gón gabyông nyi akô gã é hkyô lé, Romaq dap up zaù é no má, lò jé ri.

<sup>32</sup> Haù mù, yhang gi, radá dãm shô up gyezau ra-am eq gyezô pé lé shuî chùng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq

lé nhuq nyi é mai hkyîng byuq akô nghut ri.

<sup>33</sup> Haú hkûn, dap up zau hpó gi, Poluq chyáng ê jé mù, yhang lé chyup yû luí, toqjâng tui í hkat eq tui to nhang ri; hau htâng, yhang ó yuq nghut é hkyô lé le, haí kut shut é hkyô lé le myí wú ri.

<sup>34</sup> Shiwa byu pé kúm gi, rayuq rajung ga garû bum akô. Haú mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri.

<sup>35</sup> Poluq gi, zumhtâng wang má jé lo é hkûn, byù moq mó lûm htím chyîn chyap lô kô é yanmai, gyezô pé gi, yhang lé waq doq ló akô.

<sup>36</sup> Shiwa byu pé gi, "Yhang lé sat pyâm keq." ga châng garû nyi akô nghut ri.

### *Poluq, Yhumsing Gùng Mara A Bo É Lé Taí Sân Kyô É Hkyô*

<sup>37</sup> Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lú?" ga myi jáng, dap up zau hpó gi, "Nàng, Grik myíng dat mu lè lú?"

<sup>38</sup> Nàng gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egutuq byû a nghut lú?" ga tau myí ri.

<sup>39</sup> Haú hkûn, Poluq gi, "Ngò gi, Kiliki mau Tarshu myuq má é Yudaq byû nghut lè; ngò nyi é wà gi, wà chyap wà zo za a nghut, jeju mai, byù shí bang lé ngò dang táí râ ahkáng byi laq." ga dúng ri.

<sup>40</sup> Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkûn, yhangmoq lhunglhang bang zim byuq kômù, Poluq, yhangmoq lé Hebre myíng dông taí é gi,

## 22

<sup>1</sup> "Gumang wuè eq îwa pé ê, ahkuí, ngò mara a bò nghu taí é dang lé gyô wú shi keq." gâ ri.

<sup>2</sup> Yhangmoq gi, yhang Hebre myíng dông taí é dang lé wó gyô bùm kôjáng,

gyai yhang zím byuq bekô. Haú mù, Poluq xoq taí é gi,

<sup>3</sup> "Ngò gi, Yudaq byù rayuq nghut lè. Kiliki mau Tarshu myuq má choq hpyit kôlhang, wà mó shí má nyi kô lò sù nghut lè. Ngò gi, nga-nhông îchyí îwa pé é jep é tarâ lé, Gamalelaq é loq má jihkúm nuqguq mhoq yû luí, hkûnyí lè é nungmoq lhunglhang bang su, Garai Gasang lé gyai myit zìng zuq é sù nghut lè.

<sup>4</sup> Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yû mù htóng má lhung pyâm wú bê sù nghut lè.

<sup>5</sup> Hkyangjong mó eq byìn tú wap suwún wuè lhunglhang bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuè lé byi râ laiká yhangmoq chyáng mai wó yu chùng luí, haú má é bang lé le Yerusalem wà mó má dam byi râ matú, chyup tui ló râ nghú, Damaskuq myuq shut e é nghut lè.

<sup>6</sup> Nyigùng tû zó lé, ngò Damaskuq myuq shut sô chyâng ló nyi é hkûn, maubó gi, ngá é lînghkyuq má mauhkùng mai byodàn tung duqbó to bê nghut ri.

<sup>7</sup> Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lè lú?' gâ ri.

<sup>8</sup> Ngò le, 'Yhumsîng ê, nàng ó nghut lè lú?' nghu myí kat jáng, 'Ngò gi, nàng zing-rí wún é sù, Nazaret wà byù Yesuq nghut lè.' ga luí, Yhang tû taí kat ri.

<sup>9</sup> Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

<sup>10</sup> Dum, ngò gi, 'Yhumsîng ê, ngò haí kut ra râ lú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byi tô é hkyô pé lhunglhang, nang lé haú má lhom taí kyo berâ nghut lè.' ga ngo lé dum taí ri.

11 Haú maubó é shingkâng é yan-mai, ngò myoqjit byuq mù, ngá é by-inzùm wuì gi, Damaskuq myuq shut ngo lé loq mai she wang ló akô.

12 Haú hkùn, Anani gâ é yuqgè rayuq ngá chyáng lé huì ri. Yhang gi, jep é tarâ lé gyuq hkunggâ é eq, haú má nyi é Yudaq byû lhunglhâng bâng é hí má myoqdong gyai wó é sù nghut ri.

13 Yhang gi, ngá nâm má yap to luì, 'Gumang Sholuq ê, náng myoq myàng aq hkoi!' ga taí ri. Haú hkùn jáng yhang, yhang lé ngò wó myang kat bê nghut lhê.

14 Yhang dum xoq taí é gi, 'Nga-nhông íchýí íwa pê é Garai Gasang gi, nang lé, Yhang ô nau é hkyô sé sháng gaq ga luì le; Dingmán Sù lé wó myàng luì, Yhâng é nhut mâ é mungdang lé wó gyo sháng gaq ga luì le, hkyin to bê nghut ri.

15 Haú mù, nàng gi, nàng myang é eq wó gyô yu é hkyô pé lé, byû lhunglhâng bâng é hí má, Yhâng é matú saksé hkám byi râ su dut râ nghut lhê.

16 Ahkuì, nàng haí lé lánng nyi ashí lú? Toq aq, Yhâng é myìng lé lang luì wui-myhup hkám yu é eq, náng é yubak mara pé lé chí sân pyám aq.' gâ ri.

17 Hau htâng, ngò gi, Yerusalem wà mó má dum taú jé ló mù, noqkuq yhùm má kyù ê dúng nyi le, moq byuq ló mù,

18 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rán dông myang ri.

19 Haú mù, ngò gi, 'Yhumsîng ê, tarajong ralhùm htâng ralhum má nang lé lumjîng bang lé, htóng má chyup lhông pyâm é eq, hkat bat lhing wún é hkyô lé, yhangmoq sê bum akô.

20 Náng é saksé Stehpan sat hui luì suí shun u lé, ngò nâm má yhang yap to mù, haú hkyô lé myit bo hui luì, yhang lé sat pyám bâng é mebu lé zúng byí é nghut lhê.' nghû tû taí bê.

21 Haú hkùn, Yhumsîng gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngo lé taí ri." gâ ri.

### *Poluq, Romaq Mingdán Byû Nghut É Hkyô*

22 Shiwa byu pé gi, dang haú hkun jé za gyô yù kômù, "Shí sù é byù gi, myigùng htoq má nyi a gíng, sat pyám keq." ga, htê mó eq garû bum akô.

23 Yhangmoq gi, haú su garu uchyang, yhumsîng buhîng lé hkyut dú pyâm lhê, hpuilhup lé mauhkung shut kyaq tâng lhê, kut nyî kôjáng,

24 dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shí su ga garû bùm kô é hkyô lé wó sé shoq ga, nhuq bat nhâng luì, myî choq nhang ri.

25 Nhuq bat râ matú shokuq tuí eq tui kôjáng, Poluq gi, nâm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lú?" ga taí ri.

26 Rashô up gyezau gi, dang haú lé wó gyo jáng, dap up zau chyáng ló mù, "Nàng haí kut râ dâ nyi lhê lú? Shí yuq gi, Romaq mingdán byû sheq ru nghut ri." ga luì, yhang lé ló taí kyô ri.

27 Haú mù, dap up zau gi, Poluq chyáng ê mù, "Nàng gi, Romaq mingdán byû nghut lhê lú? Taí kyô wú laq." ga myî ri.

Poluq gi, "Ngò, Romaq mingdán byû nghut lhê." ga tû taí ri.

28 Haú hkùn, dap up zau hpó gi, "Ngò lháng ahpau myo myo byí pyám luì sheq, Romaq mingdán byû ru wó dut é nghut lhê." ga tû taí jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga taí ri.

29 Yhang lé myî choq wú râ gâ é bang gi, haú hkùn jáng, yhâng chyáng mai huì zut ló bùm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

*Yudaq Byìn Tú Wapdoq Suwún Wui Gam Hkoq Byuq É Hkyô*

<sup>30</sup> Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wui lhungháng lé ji tsíng to luí, yhangmoq é gung gung má Poluq lé shuí wàng mù, shap to bê nghut ri.

## 23

<sup>1</sup> Haú hkûn, Poluq gi, Yudaq byìn tú wapdoq suwún wui lé wú tsuq to mù, "Ngá gumang wui ê, ngò gi, hkû-nyí jé shoq Garai Gasâng é hí má sansêng é i-myit èq asak dui nyi bê nghut lhê." ga taí ri.

<sup>2</sup> Haú mù luí, hkyangjong mó Anani gi, Poluq nâm má yap to bang lé, yhang nhut má bat byi keq gâ ri.

<sup>3</sup> Haú hkûn, Poluq gi, yhang lé, "But hpyu tô é xewâm\* nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng râ matú shí má zung to luí nhing, haí mù tarâ eq shut shai é dông ngo lé bat nhang lhê lú?" ga taí ri.

<sup>4</sup> Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lú?" ga luí, chôm taí akô.

<sup>5</sup> Poluq gi, "Gumang wui ê, yhang gi, hkyangjong mó nghut é lé ngò a sé pyám mù nghut bê. Chyúmdang má le, 'Náng amyú lé up é sù lé wó rhoi râ a nghut.'\* ga le kê tô é nghut lhê." ga tú taí ri.

<sup>6</sup> Hau htâng, haú zing tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wui lé, "Gumang wui ê, ngò gi, Hparishe awut ashín mâ é, Hparishe rayuq nghut lhê. Shí bê bang dum dui toq lô râ hkyô lé myit myoqbyù é yanmai, ngò jéyáng é huí nyi ri." ga luí, garú taí kat ri.

<sup>7</sup> Yhang haú su ga taí kat jáng, Hparishe pé eq Saduke pé gi, dang jet jet lhùm lò kômù, Yudaq byìn tú wapdoq hpong gi, gam hkoq ló byuq bekô nghut ri.

<sup>8</sup> (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taí bum akô. Hparishe pé kúm gi, haú pé joq lhê ga, lumjínng bang nghut akô.)

<sup>9</sup> Haú mù luí, gyai yhang taí garú bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghu kó râ lú?" ga luí, zuq zuq taí htíng lhùm akô nghut ri.

<sup>10</sup> Haú su kut gyai yhang taí htíng lhùm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó é mù, Poluq lé haú bâng é gung gung mai é lú shuí lò luí, gyewap má shuí wang ló râ matú, gyezô pé lé nhang kat ri.

<sup>11</sup> Haú myîn, Yhumsing gi, Poluq é nâm má yap to luí, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taí ri.

*Poluq Lé Sat Râ Haq Dâ É Hkyô*

<sup>12</sup> Htâng napkyó, Yudaq byu pé gi, Poluq lé sat râ hpaqchyí chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri.

<sup>13</sup> Hpaqchyí shí lé chôm dâ é bang gi, myi xê yuq chyân nghut bum akô.

<sup>14</sup> Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq haí le a zo nghu, chôm dakam yu to bê nghut lhê.

<sup>15</sup> Hau é yanmai, ahkuí nungmoq gi, Yudaq byìn tú wapdoq suwún wui eq rahá kut luí, Poluq é hkyô lé rago

\* 23:3 But hpyu tô é xewâm gâ é gi, gegùn labyoq kut bang lé gâ lhê. ✧ 23:5 Htoq Ló 22:28



za myî gon wú râ nghu mhaû é dông, yhang lé nungmoq chyáng wut yù râ matú, dap up zaû chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taî akô.

<sup>16</sup> Nghut kôlhang, haú lhom haq sat kó râ gâ é hkyô lé, Poluq é yhang nhammó é yhangzo yuqgè zo wó gyô yù luî, yhang gi, gyewap má wang ê mù, Poluq lé é taî kyô ri.

<sup>17</sup> Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaû chyáng shuî é aq, yhang, yhang lé shit kyo râ hkyô rajung joq lhê ga." ga taî ri.

<sup>18</sup> Haú mù luî, shô up gyezau hpó gi, zorâm haú lé dap up zaû chyáng shuî é mù, "Zorâm shî nang lé shit kyo râ hkyô rajung joq lhê gâ ri ga, yhang lé náng chyáng shuî lé râ matú, htóng byû Poluq gi, ngo lé ji yù mù taî ri." ga, yhang lé taî ri.

<sup>19</sup> Haú jáng, dap up zau hpó gi, jauwò má zorâm haú lé yhang loq mai she é mù, "Nàng ngo lé haí jung shit kyó nau ri lhu?" ga, yhang lé baú tsik za myî ri.

<sup>20</sup> Haú hkûn, zorâm haú gi, "Yudaq byu pé gi, Poluq lé rago za saî myî wú râ su kut mhaú mù, napmá, Yudaq byin tú wapdoq má shuî yù râ matú, náng chyáng dung kó râ ga, myit chôm huî to bekô nghut ri.

<sup>21</sup> Haú mù luî, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lánng kó râ nghut lhê. Ahkuî lhang, yhangmoq gi, mù haú kut râ matú rì rì nghut bùm bekô; náng é ahkáng lé za lánng nyi bum akô nghut ri." ga shit kyô ri.

<sup>22</sup> Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

### *Mingzau Hpilik Chyáng Poluq Lé Dé Kat É Hkyô*

<sup>23</sup> Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut é râ matú, gyezô pé í shô, myang ji bang nyhit xê, lhâm chùng bang í shô kut mù, rì rì hen to keq.

<sup>24</sup> Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

<sup>25</sup> Laiká hun kat é le:

<sup>26</sup> "Aróng wó dik é mauzau Hpilik ê, ngò Klodi Lusi gi, nguínngón danglù shit kyô kat lhê.

<sup>27</sup> Shí yuq lé gi, Yudaq byu pé èq chyup yù mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá é wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê.

<sup>28</sup> Haú su mù, haí mù yhang lé mara hùn kô é hkyô lé sé nau é yanmai, yhangmoq é Yudaq byin tú wapdoq má yhang lé shuî jé byi wú bê nghut lhê.

<sup>29</sup> Haú hkûn, yhangmoq é tarâ hkyô eq séng luî za mara hun bùm kô é lé ngò myang ri. Nghut kôlhang, shí gíng é eq htóng lhúng gíng é mara haí le a bò nghut ri.

<sup>30</sup> Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hùn nau é bang lé gi, nang hí má yhang hun lhum keq nghû pying kat bê nghut lhê." gâ ri.

<sup>31</sup> Haú mù luî, gyezô pé gi, haú pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri.

<sup>32</sup> Htang nyí, myang ji bang lé é châng dé nhâng kômù, yhangmoq gi, gyewap shut dum taû lò bekô nghut ri.

† 23:23 Myín sum hkyíng gi, nga-nhúng é myín gau hkyíng nghut lhê.

<sup>33</sup> Myang jí é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri.

<sup>34</sup> Haú hkûn, mauzau hpó gi, laiká haú lé ban nghap jáng, Poluq hká mau má é byù nghut é hkyô lé myí wú luí, Kiliki mau má é byù nghut é lé sé jáng,

<sup>35</sup> "Nang lé mara hûn bang jé jáng sheq, náng mù lé ngò gôn wú rá." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

## 24

### *Poluq, Mara Hûn Huí É Hkyô*

<sup>1</sup> Hau htâng, ngo nyí lai jáng, hkyangjong mó Anani gi, suwún wuí ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taí hun bum akô.

<sup>2</sup> Haú hkûn, Poluq lé hí má ji hâng tô é nghut mù, Tertulu, yhang lé mara hûn dang taí hi é gi, "Aróng wó dik é Hpilik ê, ngamoq gi, nyí-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Náng sê up sê hkang é jeju lé, byù myû shí wó hkâm zô nyí é yanmai,

<sup>3</sup> ngamoq gi, haú lé hkyô hkat hkangmó eq jowò hkangmó má jeju bûn é myit eq hkam yu nyí bê nghut lhê.

<sup>4</sup> Nghut kôlhang, ngò nang lé lhoq hkyik é dông a dut sháng gaq, taí rá dang ratot zo lé, myit hîng hîng to mù gyo byi laq nghû dúng tôngbán lhê ô!

<sup>5</sup> Shí yuq gi, byù lé gunjang sù, mingkan gón má é Yudaq byu pé lhunglhang lé shuí gabyong sù eq, haú Nazaret hpúng má é hkyô-u shê sù nghut é lé, ngamoq myang ri.

<sup>6</sup> Hau htoq agó, yhang gi, noqkuq yhûm lé achaq achyut kut rá dá nyí luí, yhang lé ngamoq chyup yû mù, (ngamoq é tarâ dông jéyáng rá hen nyí é hkûn,

<sup>7</sup> dap up zau Lusi gi, lé lô mù, ngamoq é loq mai yhang lé lé lú shuí yû luí, yhang lé mara hûn bang lé, náng

chyáng jé keq ga hkunmó hkyô tô é nghut lhê.)

<sup>8</sup> Haú mù, náng, yhang lé myí wú jáng, ngamoq yhang lé hun é mara banshoq têng é hkyô lé, náng wó sé rá nghut lhê." gâ ri.

<sup>9</sup> Yudaq byu pé le, haú pé gi, têng lhê ga bo chôm taí akô nghut ri.

### *Poluq, Mara A Bò É Lé Taí Hung É Hkyô*

<sup>10</sup> Mingzau hpó gi, Poluq lé dang taí rá dông loq lik kat jáng, Poluq taí é gi, "Zau ê, shí mau bâng é ahtoq má, náng zanwut myo myo jéyáng byí nyí é hkyô lé, ngò sé é yanmai, ngò gabú myit eq yhumsing matú, mara a bo é hkyô taí bá.

<sup>11</sup> Ngò, Yerusalem wà mó má noqkuq rá matú doq e é buinyí raxe í nyí lhang a chyân shí é gi, náng luí za wó sé rá nghut lhê.

<sup>12</sup> Noqkuq yhûm má ngò ó yuq eq taí htîng lhûm é lé lhang, tarajong, a nghut jáng, wà hkaú hká jowò má le byu pé lé shuí gabyông é lé lhang, ngo lé mara hun é bang gi, a myàng kó.

<sup>13</sup> Ahkuí, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri.

<sup>14</sup> Nghut kôlhang, náng hí má ngò yín yû rá hkyô rahkat gi, yhangmoq eq shut shaí hkyô ga myhîng tô é Hkyô lé cháng luí, ngamoq é îchyí îwâ pé é Garai Gasang lé noqkuq nyí lhê. Jep é tarâ eq myiqhtoí laiká pé má kâ tô é lhunglhang lé le lumjîng lhê.

<sup>15</sup> Ngò gi, dingmán é bang eq a dingmán bâng é dum dui toq lô rá hkyô joq é lé, yhangmoq eq rajung za Garai Gasang má myit myoqbyu nyí é sù nghut lhê.

<sup>16</sup> Haú mù luí, Garai Gasang eq byu é hí má, ngò gi, rá é hkyô a bo é za, myit é hkyô san za wó dut nyí shoq, shikut nyí lhê.

<sup>17</sup> Zanwut tsómra laí é htâng má, ngò gi, ngá é byù myû má é myùng bang lé chyunghuq byi rá eq alu kat rá matú, Yerusalem wà mó shut ló jé bê nghut lhê.

18 Haú su kut nyi é hkûn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô.

19 Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shí náng é hí má yhangmoq lé jé kó ra nghut lhê.

20-21 Haú a nghut jáng, shí má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyí nungmoq ngo lé jéyáng nyi akô.' nghû luí, garú é dang hkûn mai lai luí, ngò má gotû mara myàng shi kô é nghut le gi, yhangmoq yhang taí kyo kó sháng gaq." gâ ri.

22 Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkyíng htot kat byi ri.

23 Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

24 Buinyi rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkris-duq Yesuq lé lumjíng hkyô taí kyô é le gyô yu ri.

25 Poluq gi, dingmán hkyô, yhum-sing gùng lé hkang é hkyô eq, jé lô râ tarâ dara hkyô lé mhoqshit jáng, Hpilik gi, gyô gyuq mù, "Nàng ahkuí wó ló bê, ngò jìn jáng sheq nang lé dum ji yù râ nghut lhê." ga taí ri.

26 Hpilik kúm gi, Poluq eq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

27 Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pé é hí má myoqdong

wó nau é yanmai, Poluq lé htóng má jáng lhûng pyâm to bê nghut ri.

## 25

### *Poluq, Kehtaq Chyáng Jé Râ Matú Dûng È Hkyô*

1 Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri.

2 Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

3 yhangmoq gi, Poluq lé hkyolat má lhom haq sat pyám râ dâ to kômù luí, jeju ralhum kut byi é dông Poluq lé Yerusalem wà mó shut dé kat byi râ matú, Hpestu lé lhom dûng akô.

4 Nghut kôlhang, Hpestu gi, "Poluq lé Kesare wà mó má sheq ru lhûng tô lhê, hkâ-myháng a myáng má, ngò yhang le haú má dum taú ló râ nghut lhê.

5 Haú mù, nungmoq mâ é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hûn kó sháng gaq." ga tâ taí ri.

6 Hau htâng, yhang gi, shit nyi, raxé nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri.

7 Poluq jé jáng, Yerusalem wà mó mai gyó lo é Yudaq byu pé gi, yhâng é lhîngkyuq má yap to kôluí, saksé a wó tûn shit é mara mó myo myo lé, yhâng é ahtoq má chôm taí hun akô nghut ri.

8 Haú hkûn, Poluq gi, "Yudaq byu pé é jep é tarâ eq shai é dông le, noqkuq yhûm lé shut é dông le, Kehtaq\* lé shut é dông le, ngò a kut wú." ga luí, mara a bo é hkyô taí ri.

9 Nghut kôlhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lhê lhú?" ga myi ri.

\* 25:8 Kehtaq gâ é gi, "hkoséng" gâ é nghut lhê.

10 Poluq kúm gi, "Ngò gi, doqdan hui râ nghut jáng, shí doqđân é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé hái lhang a shut wú sù nghut lhê.

11 Laqma mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyâm; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang tái râ nghut lhê." ga tũ tái ri.

12 Haú hkûn, Hpestu gi, yhang é byin tú wap bang eq ban hpyê lhum jáng, "Nàng Kehtaq chyáng wang tái râ ga bê nghut lhê, Kehtaq chyáng wang ló aq hko!" ga tái kat ri.

### *Poluq Lé, Hkohlâm Agripa Hí Má Shuí Hâng Yu É Hkyô*

13 Hau htâng, buinyi hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akò nghut ri.

14 Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq tái kyô lhum é gi, "Hpilik, lhung to lánng é htóng byu rayuq nyi ri.

15 Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé tái kyo kôluí, haú yuq lé mara byi râ matú ngo lé chôm dúng akò.

16 Haú hkûn, ngò gi, mara hun é hui sù, mara hun é bang eq chyung chyog yoq kut lui, yhangmoq hun é mara lé yhumsing matú mara a bo é hkyô a wó tái shí lé, ó yuq lé ap byi pyâm râ le, Romaq htung a joq nghu lui yhangmoq lé tái kyo bê nghut lhê.

17 Yhangmoq ngá htâng châng gyó lô kô é hkûn, ngò gi, a nô yu é za, htang nyi jáng tarâ tanghkuq má zung lui, haú yuq lé shuí wang lò râ matú hkunmó hkyô kat é.

18 Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhun le a hun htoq lô kó nghut ri.

19 Yhangmoq é noqkuq htung hkyô eq, haú dui nyi ri ga Poluq eq tái é, shí byuq bê Yesuq é hkyô lé za dang jet jet lhum bum akò.

20 Haú mù, ngò gi, haú hkyô lé hká dong gon yù râ le a sé lô é yanmai, haú hkyô lé Yerusalem wà mó má doqđân é ló hkam yù râ matú, yhang dong a dong é hkyô lé myí wú le,

21 Poluq yhang sheq, Hkoséng mó chyáng jé râ ga tái é yanmai, Kehtaq chyáng a dé kat shí é u lé, yhang lé zung nyi shirâ matú, ngò hkunmó hkyô kat é nghut lhê." gâ ri.

22 Haú hkûn, Agripa gi, "Ngò le haú yuq é dang gyô wú nau ri." ga, Hpestu lé tái jáng, yhang gi, "Napmá, nàng wó myang gyo râ nghut lhê." ga tũ tái ri.

23 Htâng nyi, Agripa eq Bernike nhiktâng gi, shingkanng bò bò za lé lô mù, dap up zau wuí eq wà mâ é agyi suwún wuí eq rahá, rúng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akò.

24 Haú hkûn, Hpestu tái é gi, "Hkohlâm Agripa eq ahkuí shí má zup zing tô é lhunglhang bang é, Yerusalem wà mó eq shí wà mâ é Yudaq byu pé banshoq bang, ngá chyáng lé tái kôluí, shí yuq lé asak a wó dui nhang to lo ga garú bùm é gi, ahkuí nungmoq myang é shí yuq yhang nghut bê.

25 Nghut kôlhang, shí yuq zui sai é má shí gíng é mara hái lé lhang ngò a myàng nghut ri. Yhang gi, Hkoséng chyáng wâng râ ga tái é yanmai, yhang lé Romaq myuq shut dé kat râ matú ngò myit hpyit to bê.

26 Dé kat bá nghu jáng le, ngá é yhumsing Hkoséng chyáng yhang é hkyô jihkúm nuqguq kâ hun kat râ hái le a bò nghut ri. Haú mù lui, yhang lé ban myí gôn wú jáng sheq, ká râ hkyô rajung jung hkâlhang ngò myàng abe nghu, nungmoq banshoq

bâng é hí má le, je riyhang nàng Hkohlkâm Agripa é hí má le, yhang lé ngò lhoq htoq shit é nghut lhê.

<sup>27</sup> Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luî, ngò myit lhê." gâ ri.

## 26

### *Poluq É Hí Hpyang Lhê É Nyi Yap Hkyô*

<sup>1</sup> Haú hkûn, Agripa gi, Poluq lé, "Nàng, náng matú dang tai râ ahkáng wó bê." ga taí ri.

Haú mù luî, Poluq loq tû kat mù mara a bo é hkyô taí é gi,

<sup>2-3</sup> "Hkohlkâm Agripa ê, nàng gi, Yudaq byu pê é htunghking banshoq eq taí htíng lhûm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luî, ngá dang lé myit hing é eq gyô yù byi laq nghû, dúng tôngbán kat lhê.

<sup>4</sup> Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunghâng bang gi, sé gû nghut akô.

<sup>5</sup> Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mâ é tarâ htan dik é hpúng má bo é Hparishe rayuq nghut é hkyô lé, saksé hkám naú kô é nghut jáng, yhangmoq wó hkâm lhê.

<sup>6</sup> Nghut kôhang, doqdân é hui zo râ matú, ahkuí ngò shí má yap tô é gi, Garai Gasang eq ngamoq é íchyí îwa pé lé byi tô é danggidiq lé myit myoqbyu nyi é yanmai nghut lhê.

<sup>7</sup> Ngamoq é byû myû raxe í hú gi, danggidiq jeju haú lé wó hkam yù shoq ga, Garai Gasang lé nyi myín noqkuq dojaú shikut nyi bum akô; Hkohlkâm wa ê, myit myoqbyu hkyô hau é yanmai, ngo lé Yudaq byu pé mara hun bum akô nghut ri.

<sup>8</sup> Garai Gasang gi, shí bê bang lé dum lhoq tui lhê gâ é hkyô lé, a wó lûm nghû, haí mù myit yu akô lhú?

<sup>9</sup> Ngò le, Nazaret wà byû Yesuq é mying eq shai lhûm é đông myo myo wó kut râ nghut lhê nghû, gè gè yhang myit yu wú bê nghut lhê.

<sup>10</sup> Gè gè haú đông le Yerusalem wà mó má kut wú bê nghut lhê; hkyangjong agyi pê chyáng mâ é ahkáng wó yù luî, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo hui wú bê nghut lhê.

<sup>11</sup> Ngò gi, tarajong banshoq má a lhing lhing yhangmoq lé dam byi luî, Yesuq lé rhoi dang taí kó shoq shikut wú bê nghut lhê; nhik mó góng yo luî, gó mau mâ é wà pé lhang jé shoq, yhangmoq lé châng zing-rî wú bê nghut lhê.

### *Poluq Hpúng Byû Dut Lo É Hkyô*

<sup>12</sup> Haú hkûn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chùng mù, Damaskuq myuq shut e ló nyi le,

<sup>13</sup> Hkohlkâm wa ê, nyigùng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lhinghkyuq má, mauhkung mai duq bó htoq lo é lé myang ri.

<sup>14</sup> Haú hkûn, ngamoq banshoq bang myigùng má lêng gop tô bum le, Hebre mying đông, 'Sholuq, Sholuq, nàng, ngo lé haí mù zing-rî nyi lhê lhú? Zuchûn lé pik le gi, náng é matú gyai yhang wui lhê.' ga luî, ngo lé taí é danghtê lé ngò wó gyô kat ri.

<sup>15</sup> Haú mù, ngò gi, 'Yhumsing ê, nàng gi, ó yuq nghut lhê lhú?' nghû luî, myi jáng, haú Yhumsing tû taí é gi, 'Nàng zing-rî nyi é Yesuq nghut lhê.

<sup>16</sup> Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mú wùn râ byû eq saksé dut nhâng râ đông nang lé hkyin to râ nghû, ngò náng chyáng lé htoq shit é nghut lhê.

17 Náng é amyû pê é loq mai le, tungbaù pê é loq mai le, ngò, nang lé hkyi yù nyi râ nghut lhê.

18 Yhangmoq, yubak hkyut pyám byi é jeju wó yû râ eq, ngo lé lumjínq é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaù mai maubó shut, Tsadán é a-tsam hkaù mai Garai Gasâng shut yhangmoq lhing ló râ matú, ngò, nang lé yhangmoq chyáng nhang kat râ nghut lhê.' gâ ri.

### *Poluq Kut É Muzó Hkyô*

19 Haù mù luí, hkohkâm Agripa ê, ngò gi, mauhkúng mâ é myoqwup shing-rán haù lé a gyô é a wó é nyi nghut lhê.

20 Ngò gi, yhangmoq myit lhing luí, Garai Gasang shut lhing taù lò mù, myit lhing bê hkyô lé, hkyi zó loq zó dòng mai tân shit kó sháng gaq nghû, sânq-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tungbaù pê chyáng má le, hkô kyo bê nghut lhê.

21 Hau é yanmai, Yudaq byu pé gi, ngo lé noqkuq yhúm má chyup yù luí, sat pyám râ da kô é nghut lhê.

22 Nghut kôlháng, ngò gi, hkû-nyí jé shoq Garai Gasâng eq garúm é lé wó yù luí, ahkuí shí má yap to mù, tiq ko banshoq bang lé saksé wó hkâm kyô é nghut lhê.

23 Ngò taí é má, Hkrisduq gi, hpuzo luí, shí bê bang mai sânq-hi dui toq lô mù, Yhâng é amyû eq tungbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotù haí le a taí é nghut lhê." gâ ri.

24 Yhang haù su ga mara a bo é hkyô taí é lé, Hpestu gi, "Poluq ê, nang na bê! Lúm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

25 Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê.

26 Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê.

27 Hkohkâm Agripa ê, nang gi, myiqhtoí pê é dang lé lumjínq lhê lú? Nang lumjínq é hkyô lé ngò sê lhê." ga tû taí ri.

28 Haù hkûn, Agripa gi, Poluq lé, "Razup za má, nang, ngo lé Hkristan rayuq wó dut nhâng nhô ngam ri lú?" ga taí ri.

29 Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nang za a nghut, hkû-nyí ngò taí é dang lé gyô nyi é lhunglhâng bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

30 Haù hkûn, hkohkâm wa gi, ginwáng zau hpó eq Bernike le mù, haù má zùng tô é bang eq rahá toq yap ri.

31 Yhangmoq htoq ló kô é hkûn, "Shí yuq gi, sat gíng é mara eq htóng lhung gíng é mara haí le a kut shut nghut ri." ga, rayuq eq rayuq taí lhum bum akô nghut ri.

32 Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

## 27

### *Poluq, Romaq Myuq Shut Wuí-sanghpo Mai E Ló É Hkyô*

1 Ahkuí, ngamoq lé Itali ming shut wuí-sanghpo mai gù dap ló nhâng râ matú myit hpyit to kôluí, yhangmoq gi, Poluq eq htongbyú góbang ra-am lé, Augustuq Hkosêng é gyewap mó mâ é, Yuliu gâ é shô up gyezaù é loq má ap byi kat akô.

<sup>2</sup> Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó má é Aristakuq gâ é Makedoni byù rayuq le ngamoq eq rahá nghut lhê.

<sup>3</sup> Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng rá é hkyô lé yhâng é buinùm wuì mai lhom lajang byi kó sháng gaq ga, yhangmoq eq ê hui rá matú ahkáng byi kat ri.

<sup>4</sup> Haú mai dum toq ló é hkûn, lai tau mut é yanmai, Kupru zinlóng lé lai hkaú uchyang ji lai ló mù,

<sup>5</sup> Kiliki eq Pamhpuli mau mâ é wuimau đông lai byit ló le, Laiki mau mâ é Mura myuq má jé bê nghut lhê.

<sup>6</sup> Haú má, shô up gyezau hpó gi, Itali ming shut dap e ló é, Alesandru myuq má é wuì-sanghpo lé myang hkyup luí, ngamoq lé haú má ji nhâng bê nghut ri.

<sup>7</sup> Haú mai buinyi myo myo yhó yhó lé za ji e ló luí, awui ahke yhang Kidu wà mó eq ang má wó jé ló jáng, lai tau mut é yanmai, hí shut a wó lai ló lo mù, ngamoq gi, lai lé cháng luí, Kreti zinlóng lé lai hkaú mù, Salamone kongzô é tû tap âng é mai lai ló é nghut lhê.

<sup>8</sup> Haú má é wuiyàm mai awui ahke ji ló lé, Lasea wà eq a wê lhùm é Yuqyo é Guhkan gâ é jowò má jé ri.

<sup>9</sup> Ahkuí, buinyi tsómra lhoq lhai pyám luí, haú Zoshuq gám poí lai bê nghut é yanmai, wuì-sanghpo mai sô wún le gi, gyuq chiq rá nám jé bê nghut ri. Haú mù, yhangmoq lé Poluq taí pun taí kyîng é gi,

<sup>10</sup> "Âhkaú pé ê, shí dàm lhê é wuì hkyô gi, wuìhke mó hui luí, wuì-sanghpo eq zè pé sùm pyám rá htoq agó, nga-nhông é asak lhang sum rá dut é hkyô lé, ngò byu myang ri." gâ ri.

<sup>11</sup> Nghut kôlhang, shô up gyezau hpó gi, Poluq é dang lé gyo rá malaí,

wuì-sanghpo hkâng sù eq wuì-sanghpo yhumsing é dang lé, je lum ri.

<sup>12</sup> Guhkan haú gi, gyoqmyò\* wó lhoq lhai rá su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi lhai rá matú chôm myit huí akô. Guhkan haú gi, Kreti zinlóng má maupyí buiwàng hkyam eq mautsung buiwàng hkyam shut hu tô é jowò nghut ri.

### *Wuimau Má, Laidun Mó Htông Hui É Hkyô*

<sup>13</sup> Maupyí shut má é lai yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yù kômù, Kreti zinlóng yâm đông ji e ló bê nghut lhê.

<sup>14</sup> Nghut kôlhang, hkâ-myháng a myáng má, Buihtoq mautsung lai gâ é laidun mó gi, haú zinlóng mai mut lò luí,

<sup>15</sup> wuì-sanghpo lé lo mut htông é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê.

<sup>16</sup> Ngamoq gi, Koda gâ é zinlóng zo lé lai hkaú uchyang yông ló nyi é hkûn, haú sakhkyí lhai lé gyai shikut é eq wó llang yù luí,

<sup>17</sup> wuì-sanghpo ahtoq má llang toq to bê. Wuì-sanghpo lé gi, a byoq lo shoq tuí eq tuí kîng to bê nghut lhê. Dum, yhangmoq gi, Surti gâ é semuí bùm má ló kê gyâm to rá lé chiq kô é yanmai, wuì-sanghpo má é panlong pé lé lhoq nyhum hkyô yù mù, châng yông ló bekô nghut ri.

<sup>18</sup> Laidun mó lùm htan é yanmai, htang nyí yhangmoq gi, hpugá zè pé lé hkyom dú hkyó pyám bekô nghut ri.

<sup>19</sup> Sum nyí nghu é nyí má, yhangmoq gi, wuì-sanghpo zè pé lé yhumsing é loq eq yhang hkyô pyám bekô.

<sup>20</sup> Buinyi myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut rá nghu

\* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

myit myoqbyu tô é hkyô lé, ngamoq tô pyám bê nghut lhê.

21 Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shî su htên byoq é marop hui zo râ a nghut.

22 Ahkuí nghut kôlhang, ngò taí é dang lé gyô yù mù myit wum yù keq; nungmoq má é hká yuq lé asak sum râ a nghut, wuì-sanghpo za sheq htên byoq byuq râ nghut lhê.

23 Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi,

24 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shî má nàng eq rahá ji tô é lhunglhang bâng é asak lé, Garai Gasang gi, nàng é yanmai, láí láí byi râ nghut lhê.' gâ ri.

25 Hau é yanmai, âhkaú pé ê, myit wum yù keq, ngo lé taí kyô é eq rajung za dut lò râ nghut lhê nghû luí, Garai Gasang lé ngò lumjínng nyi lhê.

26 Nghut kôlhang, nga-nhúng gi, zinlóng ralhum lhum má ló htung chyap to râ nghut lhê." ga luí, yhangmoq lé i-myt taí tîng ri.

27 Buinyi raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô.

28 Haú su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri.

29 Haú mù luí, luqmó má ló záng htung râ lé chiq kômù, yhangmoq gi, wuì-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdûng nyi bum akô nghut ri.

30 Wuì-sanghpo hkâng bang gi, wuì-sanghpo lé tô pyâm to luí hpâng râ dâ

é myit eq, wuì sanghpo-u shut mâ é shamtoq goknghe pé lé lhoq hkyô râ su kut mhaú luí, sakhkyilhaí lé wuì má lhoq hkyô nyi bum akô.

31 Haú mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga taí ri.

32 Haú hkûn, gyezô pé gi, sakhkyilhaí lé tuí tô é tui lé zân hpyit kat kôluí, sakhkyilhaí gi, byit gyó byuq bê nghut ri.

33 Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê.

34 Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lhang byuq râ a nghut." gâ ri.

35 Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri.

36 Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri.

37 Wuì-sanghpo haú mâ é byuì lhunglhang gi, í sho nyhit xe hkyuq yuq nghut lhê.

38 Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

### *Wuì-Sanghpo Htên Gyop Byuq É Hkyô*

39 Myoq san za myàng jáng, yhangmoq gi, jowò haú lé a sé kôlhang, semuì-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyan râ matú chôm doqdân yu akô nghut ri.

40 Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luí, wuì-sanghpo ulhum mâ é panlong lé lhoq toq yù mù, lai



hkyô cháng luí wuiyàm shut mut ló bê nghut ri.

<sup>41</sup> Nghut kôlhang, semuî lo bum tô é jowò ralhum má, wui-sanghpo ló htông chyap byuq luí, sanghpo u gi, a wó duí lo mù, sanghpo htâng lé gi, wuìheng èq lò bat hkyop myha pyám bê nghut ri.

<sup>42</sup> Haú hkûn, gyezô pé gi, htongbyú pé wuili lí hfang byuq kó râ lé gyuq kô é yanmai, yhangmoq lé sat pyám râ chôm dâ akô.

<sup>43</sup> Nghut kôlhang, shô up gyezau hpó gi, Poluq lé hkyi yù naù luí, yhangmoq dâ é hkyô lé hkûm pyám mù, wuili dat li bang gi, wuì má byam gyó luí wuiyàm shut hí li dap ló kó sháng ga luí le,

<sup>44</sup> góbang gi, siklong eq wui-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haú dông mai lhunglhang bang gi, wuiyàm shut rago wó jé dap ló bekô nghut ri.

## 28

### *Malata Zinlóng Má Jé Nyi Tô É U Lhé Hkyô*

<sup>1</sup> Ngamoq wó lut dap ló jáng sheq, zinlóng haú gi, Malata gâ é lé sê ri.

<sup>2</sup> Zinlóng byu pé gi, ngamoq lé shogyo myit gyai lhom tûn shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô.

<sup>3</sup> Haú hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri.

<sup>4</sup> Zinlóng byu pé gi, Poluq é loq má lhangmuì haú htê lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wuì mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri.

<sup>5</sup> Poluq kúm gi, lhangmuì haú lé myihkyóm má ko hkyô kat luí, haí le a dut é za nyi tô ri.

<sup>6</sup> Yhangmoq gi, yhânggùng wâm lò berâ, haú a nghut jáng, byodàn ratung shi hkyaq lêng ló berâ, ga myit lánq nyi bum akô. Nghut kôlhang, myáng myáng lánq wú nyi bum le, yhang má haí le a dut lo é lé myàng kôjáng, yhangmoq é i-myit dum htaí pyám kôluí, shí yuq gi, hparà rayuq sheq nghut ri ga dum taí bum akô nghut ri.

<sup>7</sup> Hau é nàm má, zinlóng agyì hpó Popli sing é maumyí pé joq tô ri. Haú yuq gi, ngamoq lé lhom te yù mù, yhâng yhûm má sum nyí yhang lalúm la-nye lhom hkûlum yu ri.

<sup>8</sup> Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gê byi ri.

<sup>9</sup> Haú su dut é yanmai, zinlóng mâ é nò byù góbang banshoq le, lé luí lhoq gê byi é hui bekô nghut ri.

<sup>10</sup> Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

### *Romaq Myuq Má, Poluq Jé É Hkyô*

<sup>11</sup> Lhamó sum hkyap lai jáng, Alessandro myuq mâ é, "Hparà zozûm nhiktâng" gâ é alhò dap é wui-sanghpo má, ngamoq wang jî htoq ló bê nghut lhê. Wui-sanghpo haú gi, gyoqmyò lé zinlóng haú má joq lai é nghut ri.

<sup>12</sup> Surakusa wà mó má jé jáng, haú má ngamoq sum nyí nô yu é nghut lhê.

<sup>13</sup> Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê.

<sup>14</sup> Haú mâ é gumang wui ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê.

15 Haù mâ é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bing Yhûm Sûm Lhum gâ é wà jé shoq lé akô. Poluq gi, haù bang lé lhom myàng jáng, Garai Gasang lé hkya-on kungtôn mù, myit wum wó yû bê nghut ri.

16 Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotú san nyi râ matú, ahkáng wó ri.

*Poluq, Romaq Myuq Má, Mungdang Hko Kyô É Hkyô*

17 Buinyì sum nyí laí é htâng má, Poluq gi, haù mâ é Yudaq suwún wuì lé ji yu ri. Yhangmoq jé lé bûm kôjáng, yhang gi, "Gumang wuì ê, ngò gi, nganhûng é amyû lé le, íchýí îwa pé é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byí kat é hui bê nghut lhê.

18 Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri.

19 Nghut kôlhang, haù lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haù nghut kôle, ngá amyû lé mara hûn râ jowò joq é yanmai gi, a nghut.

20 Haù mù luí, Israelaq amyû é myit myoqbyù hkyô\* é yanmai, shí shamtoq-tuì èq tuì é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé taí ri.

21 Haù hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yû nghut ri. Haù mai lé é gumang wuì ó yuq le, nàng eq séng é a ge é luhkyang lé shit kyô é a bò kô nghut ri.

22 Nghut kôlhang, shí nàng lom é hpúng gi, jowò hkangmó má taí he pyâm é huí é hkyô lé, ngamoq sê é

yanmai, nàng byu myang é hkyô lé ngamoq gyô wú nau ri." ga tû taí akô.

23 Yhangmoq gi, yhang eq huí kún râ buinyì ding to kôluí, yhang bíng é yhûm má byù myo myo lé zíng bum akô. Haù hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pé é dang má cháng mù, yhangmoq lé shikut luí, Yesuq é hkyô taí pun taí kyíng ri.

24 Yhang taí é hkyô lé, ra-am gi, lumjíng bum akô; ra-am kúm gi, a lumjíng kó nghut ri.

25 Yhangmoq rayuq eq rayuq haù su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoi Esai-aq é nhut mai nungmoq é íchýí îwâ pé lé taí é dang gi, gyai yhang têng ri. Dang haù gi,

26 "Byù haù hú chyáng é mù, "Nungmoq gyô tsuq to kôlhang, sê gyo kó râ a nghut;

wú tsuq to kôlhang, wú sé kó râ a nghut.", nghû é taí aq.

27 Hkâsu mù gâ le, amyû shí é i-myit gi, htan byuq luí,

yhangmoq é nohkyap gi, htu byuq bê nghut ri;

yhangmoq é myoq gi, chûm byuq bê nghut ri;

haù a nghut le gi, yhangmoq é myoq èq myàng mù,

yhangmoq é nohkyap èq wó gyo luí,

yhangmoq é i-myit má sê hkyâng kômù,

ngá chyáng lhing lò kôluí, ngò yhangmoq lé lhoq gê byi berá nghut lhê.✠

gâ ri.

28 Haù mù luí, shí Garai Gasâng é hkyi yù hkyô lé, tûngbaù pé chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haù taí kat é htâng má, yhangmoq gi, htoq ló byuq bùm bekô nghut ri.

29 (Poluq haù su ga taí é htâng má, Yudaq byu pé gi, yhangmoq

\* 28:20 Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

✠ 28:27 Esai 6:9,10

yhangchang dang jet jet lhum  
uchyang ló byuq bekô nghut ri.)

<sup>30</sup> Poluq gi, yhang nghô lúng é yhûm  
má í zân tup nyi é u lé, yhâng chyáng  
lé má lé é bang lé lhom hkûlum yu ri.

<sup>31</sup> Haû mù, a gyuq a kyum é za,  
Garai Gasâng é mingdán hkyô lé hko  
taî kyô é eq, Yhumsîng Yesuq Hkris-  
duq eq sêng é hkyô lé mhoqshit byî ri;  
yhang lé, ó le a hkûm zing to kó nghut  
ri.

## ROMAQ Pê Chyáng Hun Kat é Laiká (Romans)

<sup>1</sup> Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má,

<sup>2</sup> Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú jî yu é bang banshoq lé, dang kyô kat lhê.

<sup>3</sup> Yhâng é Yuqzo haû gi, byù hkyam dông ga jáng, Dawiq é awut ashín nghut ri;

<sup>4</sup> Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhûng é Yhumsîng Yesuq Hkrisduq nghut ri.

<sup>5</sup> Yhang dông mai le, Yhâng myîng é matú le, ngamoq gi, byù myû chângjup mai byù ji yù mù, lumjîng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê.

<sup>6</sup> Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

<sup>7</sup> Nga-nhûng é Îwa Garai Gasang eq Yhumsîng Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô!

*Poluq, Romaq Myuq Má Ló Kum  
Nau É Hkyô*

<sup>8</sup> Nungmoq é lumjîng hkyô lé, mingkan gón má tai pyo ló bê nghut é yanmai, sân-hi má, ngò gi, Yesuq Hkrisduq é myîng mai, nungmoq

banshoq bâng é matú, ngá é Garai Gasang lé, jeju hkya-on lhê.

<sup>9</sup> Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhikhum banshoq eq dojaú é Garai Gasang gi, ngá é saksé nghut lhê;

<sup>10</sup> Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyûdung lhê.

<sup>11</sup> Ngò gi, nungmoq lé, woi-nyí hkyô eq sêng é chyunhuq wó gâm byi mù, nungmoq lé wum-o wó lhoq kîng byi râ matú, nungmoq lé gyai yhang myàng nau nyi ri.

<sup>12</sup> Haû su nghu é gi, nga-nhûng rayuq eq rayuq é lumjîng hkyô dông mai, nungmoq eq ngò, myit wum byí é hui râ matú nghut lhê.

<sup>13</sup> Gumang wui ê, ngò gi, haû tûngbaù pé chyáng mai ashi wó yu é eq rajung za, nungmoq chyáng mai le ashi wó yû râ matú, nungmoq chyáng lé jé râ nghû adàm dâm dâ wú é nghut kôhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

<sup>14</sup> Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê.

<sup>15</sup> Haû nghut é yanmai, ngò gi, Romaq myuq mâ é bang nungmoq lé le, haû gabú danglù gyai yhang hko kyo nau nyi é nghut lhê.

<sup>16</sup> Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sân-hi má Yudaq byu pé, hau htâng tûngbaù pé má, lumjîng é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê.

<sup>17</sup> Hkâsu mù gâ le, lumjîng myit mai wó yû luí, lumjîng myit má gîng nyi é, Garai Gasâng chyáng má é dingmán hkyô lé gi, gabú danglù haû má hpông shit bê nghut ri. Haû gi, "Haû dingmán sù gi, lumjîng myit mai

asak duì rã nghut lhê."✱ ga kã tô é eq rajung za nghut ri.

*Xângzo Byu Pê Htoq Má Garai Nhkmo-yô É Hkyô*

<sup>18</sup> Haû tengmán hkyô lé, yhumsing é agè ashop hkyô èq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri.

<sup>19</sup> Haî mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri.

<sup>20</sup> Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù lui, byu pé gi, mara mai wó he lut rá hkyô a joq lo nghut ri.

<sup>21</sup> Haî mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kô nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklum gi, chut byuq bê nghut ri.

<sup>22</sup> Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri.

<sup>23</sup> Haû mù, htên byoq a sê é Garai Gasâng é hpungwup shingkang lé, htên byoq sê é byù zòng, nghoq lhô, dusak lhô eq yê jung dusak lhô pê èq, htaî lhik pyâm bekô nghut ri.

<sup>24</sup> Hau é yanmai, Garai Gasang gi, yhangmoq é gungdu lé rayuq eq rayuq hpau a tap lum kó rá matú, a sansêng é gungsho zùm-yap hkyô kut rá nghut é, yhangmoq é yut yut ô nau é i-myit má, yhangmoq lé ap pyâm bê nghut ri.

<sup>25</sup> Yhangmoq gi, haû Garai Gasâng é tengmán hkyô lé, mhaû é hkyô èq htaî lhik pyâm kômù, hpân Sû lé noqkuq dojaú rá malaî, mhaû hkyô nghut é

hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

<sup>26</sup> Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyâm bê nghut ri. Yhangmoq é myiwe wui lhang gi, htung akying lé tô pyâm kômù, haû eq shai é dông htaî lhik pyâm nyi akô nghut ri.

<sup>27</sup> Haû eq rajung za, yuqgè wui le, myiwe wui eq zum é htung akying lé tô pyâm kômù, rayuq eq rayuq, myi su nyé shoq yut yut ô nau lum kômù, yuqgè yhangchang rayuq eq rayuq agot a-û hkyô kut shut lum kôluî, yhangmoq kut shut é eq gingdán é yubak dam lé, yhumsing gung yhumsing hkam yù nyi bekô nghut ri.

<sup>28</sup> Hau htoq agó, haû Garai Gasang lé sê é hkyô gi, akyú bo é a nghut ga yhangmoq myit yù kô é yanmai, a kut âng é hkyô kut nhâng rá matú, Garai Gasang gi, yhangmoq lé, htên byoq sê é myit má ap pyâm é nghut lhê.

<sup>29</sup> Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lum é hkyô pé byíng jup tô é bang dut bekô nghut ri; manon é, byù sat é, mabyoq jishum htoq é, mhaú zô é eq myit goi bo é pé le byíng bum ri.

<sup>30</sup> Yhangmoq gi, lumu é bang, gansang é bang, Garaî lé a jú é bang, byù rhoi é bang, nghutbun é bang, gyáng é bang, agè ashop kut rá hkyô lhoq htoq é bang, mó wui é jino a gyô é bang nghut akô.

<sup>31</sup> Yhangmoq gi, a gyíng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô.

<sup>32</sup> Haû pé lé kut é bang gi, shí gíng lhê gâ é, Garaî Gasâng é dingmán tará joq é lé, yhangmoq sê to kôlhang, haû pé lé, yhangmoq xoq kut nyi kô é htoq agó, haû hkyô lé kut é bang lé le, hkya-on waq toq akô nghut ri.

## 2

*Garai Gasang Tarâ Jéyáng É Hkyô*

<sup>1</sup> Haû mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gà le, nàng yhang jéyáng nyí luí, mù haú pé lé, nàng kut nyi é yanmai, byù góbang lé jéyáng é hkûn, nàng gûng nàng mara byí nyi bê nghut ri.

<sup>2</sup> Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê.

<sup>3</sup> Haû mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hfang lut râ su ngam nyi lhê lú?

<sup>4</sup> Haû a nghut jáng, nàng gi, Garai Gasâng é ge é hkyo eq nang lé myit wó shuí lhîng nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lú?

<sup>5</sup> Nghut kôlháng, nàng é myit htân hkyô eq myit a lhîng é nhiklhûm é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gûng yhang hkong tô nyi bê nghut ri.

<sup>6</sup> Garai Gasang gi, yuq hkanmó lé, ó le ó kut é má châng luí, hkâm zo nhâng râ nghut lhê.

<sup>7</sup> Jân shirâng mù, ge é hkyô kut nyi é dông, hpungwup shingkang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê.

<sup>8</sup> Nghut kôlháng, haû yhumsing wuízat hkyô za hô luí, tengmán hkyô lé he-ngik pyám mù, agè ashop hkyô lé châng bâng é matú gi, nhikmo-yo hkyô eq nhikjum yo hkyô jé râ nghut lhê.

<sup>9</sup> Wuíhke hkyô eq iyon yon hkyô gi, agè ashop kut é xângzo byù yuq hkanmó chyáng jé râ nghut lhê; sâng-hi má Yudaq byu pé chyáng jé

mù, tûngbaù pé chyáng le jé râ nghut lhê.

<sup>10</sup> Nghut kôlháng, hpungwup shingkang, aróng eq ngingón hkyô gi, haû ge é hkyô kut é bang yuq hkanmó chyáng jé râ nghut lhê: sâng-hi má Yudaq byu pé chyáng jé mù, tûngbaù pé chyáng le jé râ nghut lhê.

<sup>11</sup> Hkâsu mù gà le, Garai Gasang gi, myoqdong a hkyin é Sù nghut lhê.

<sup>12</sup> Haû jep é tarâ lé a sê é mara kut shut é bang lhunglháng gi, jep é tarâ dông a nghut é za htên byoq kó râ nghut lhê. Haû jep é tarâ hkaû má mara kut shut é bang lhunglháng gi, jep é tarâ dông jéyáng é hui zo kó râ nghut lhê.\*

<sup>13</sup> Hkâsu mù gà le, haû jep é tarâ lé wó gyô é bang lé, Garai Gasâng é hí má dingmán bang gà é a nghut é za, jep é tarâ lé châng kut é bang za sheq, dingmán bang gà é hui râ nghut lhê.

<sup>14</sup> Haû jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlháng, yhumsing gûng yhumsing é matú tarâ dut bekô nghut ri.

<sup>15</sup> Yhangmoq gi, haû jep é tarâ hkyô pé lé, yhangmoq é i-myt unghkaû má kê to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byí nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri.

<sup>16</sup> Haú hkyô gi, ngò taí pyo é gabú danglù eq rajung za, byu pé é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

*Yudaq Byu Pé Eq Jep É Tarâ*

<sup>17</sup> Nghut kôlháng, nàng gi, nàng gûng nàng Yudaq byù rayuq nghut lhê ga mù, haû jep é tarâ lé lumhkaû nyi é eq Garai Gasang lé xoq é hkyô má nghutbûn nyi é sù;

\* **2:12** Haû jep é tarâ lé a sê bang gà é gi, tûngbaù pé lé gà é nghut luí, haû jep é tarâ hkaû má é bang gà é gi, Yudaq byu pé lé gà é nghut lhê.

18 Yhâng ô nau é hkyô lé sê é eq haù jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù;

19 haù jep é tarâ má, hpaqchyî eq tengmán hkyo é alik wó sù nghut é yanmai, haù myoqjit bâng é matú hkyô-u shê sù eq mauchut hkaù mâ é bâng é matú maubó nghut sù;

20 byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

21 nàng, góbang lé mhoq byi sù nhîng, yhumsing gùng yhumsing a mhoq yû lú? A wó hkau ga hko taí luî nhîng, nàng gi, hkaù lhê a nghut lú?

22 Su-myi sulàng lú hkyô a wó kut ga byu pé lé taí luî nhîng, nàng gi, su-myi sulàng lú hkyô kut lhê a nghut lú? Hparà lhô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lú?

23 Jep é tarâ eq séng luî nghutbun sù nàng gi, haù jep é tarâ lé lu laí é dông, Garai Gasang lé a hkungga kut lhê a nghut lú?

24 Haù gi, "Garai Gasâng é myîng gi, nungmoq é yanmai, tungbaù pè chyáng lhoq hpoî pyâm é huî ri."\* ga kê tô é eq rajung za nghut ri.

25 Haù jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laí é nghut jáng, a hpyit é eq rajung za dut bê nghut ri.

26 Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge sôn byi lhê a nghut kó lú?

27 Kê tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

28 Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

29 Ahte myit hkaù má Yudaq byù nghut sù za, Yudaq byù kyîng nghut lhê. Kê tô é tarâ dông a nghut é za, Woi-nyî èq myit má ahpyo-kuq hpyit é gi, ahpyo-kuq hpyit kyîng nghut bê. Haù yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

### 3

#### *Garai É Lhumzui Hkyô*

1 Haù dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú?

2 Hkyô hkangmó má gyai akyû bò lhê! Je hí má gi, haù Garai Gasâng é mungdang lé yhang, yhangmoq lé ap byi bê nghut ri.

3 Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú?

4 Hká dông le a wó dut!

"Haù mù, nàng dang taí é hkûn, dingmán é hkyô wó lhoq htoq râ eq,

nàng jéyáng huî é hkûn, ûng râ nghut lhê."\*

ga kê tô é eq rajung za, byù yuq hkangmó gi, byù-mhaù dut kôlhang, Garai Gasang gi, tengmán nyi sháng gaq.

5 Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haù nghut jáng, nga-nhûng hkâsu nghû taí râ lú? Nga-nhûng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dông taí htîng é nghut lhê.)

6 Ratsuí lháng a nghut! Haù su ru nghut le gi, haù mingkan lé, Garai Gasang hkâsu wó jéyáng râ lú?

7 Rayuq yuq, "Ngò mhaù é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é

nghut le nhîng, haî mù luî, ngò, yubak byù rayuq dông mara byî é hui zô nyi ra shirâ lhú?" ga taî dang-rháng râ nghut lhê.

<sup>8</sup> "Ge é hkyô htoq sháng gaq, nga-nhúng, agè ashop hkyô kut sháng." nghû haî mù a taî kô é lhú? Dang haû lé ngamoq taî é nghut lhê ga luî, ngamoq lé lumù gansang é dông byù ra-am taî akô. Haû bang gi, mara dam byî é hui zo gîng bang nghut akô.

### *Dingmán Byù A Nyi*

<sup>9</sup> Haû jáng, hkâsu nghû lo râ lhú? Nga-nhúng gi, je gè bang nghut lhê lhú? Ratsuí lháng a nghut. Yudaq byù nghut nghut, tûngbaù pé nghut nghut, yubak mara hkaû mâ é bang chyat nghut lhê nghû, ngamoq taî san kyô wú bê nghut lhê.

<sup>10</sup> Chyúmdang má kâ tô é le, "Dingmán é byù a nyi, rayuq lháng a nyi nghut ri;

<sup>11</sup> Sê gyô é byù rayuq le a nyi, Garai Gasang lé ho é byù le a nyi nghut ri;

<sup>12</sup> Lhunglháng bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lháng a nyi nghut ri."✧

gâ ri.

<sup>13</sup> "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."✧

"Yhangmoq é nhutwuî pé má gi, shîduq bò lhangmuî é duq dap bum ri."✧

gâ tô ri.

<sup>14</sup> "Yhangmoq é nhut pé gi, nhing myíng nhing htê eq myit nô danghko baú byíng zan tô ri."✧

gâ tô ri.

<sup>15</sup> "Yhangmoq é hkyî pé gi, byù sat sui lhoq htoq râ matú, lawán nau akô;

<sup>16</sup> Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

<sup>17</sup> nguingón é hkyô lé gi, yhangmoq a sé kó nghut ri."✧

gâ tô ri.

<sup>18</sup> "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✧

gâ tô ri.

<sup>19</sup> Byù yuq hkangmó é nhut gi, tû taî jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haû jep é tarâ má taî é lhunglháng gi, jep é tarâ ô má nyi é bang lé taî é nghut é hkyô lé, nga-nhúng sê lhê.

<sup>20</sup> Haû mù luî, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lhê.

### *Lumjínng Jáng, Dingmán Sù Wó Dut É Hkyô*

<sup>21</sup> Ahkuî kúm gi, jep é tarâ dông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri.

<sup>22</sup> Garai Gasâng chyáng mâ é dingmán hkyô haû gi, Yesuq Hkrisduq lé lumjínng é dông mai nghut mù, lumjínng bang banshoq htoq má jé é nghut lhê. Gamhkuî é hkyô a joq.

<sup>23</sup> Hkâsu mù gâ le, lhunglhâng bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri.

<sup>24</sup> Ahkuî kúm gi, Hkrisduq Yesuq mai lo é hkyi yù hkyô dông, Garai Gasâng é jejû èq, mara hkyut san byî é laí laí wó hui bê nghut ri.

<sup>25</sup> Garai Gasang gi, Yesuq é sui lé lumjínng bâng matú, shîhtaí gunglik hkungga ralhum dông, Yesuq lé byî pyám bê nghut ri. Haû gi, laî lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri.



26 Garai Gasang haû su kut é gi, Yhanggùng yhang dingmán Sû nghut é eq, Yesuq lé lumjǐng é sù lé mara hkyut san byî é Sû nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

27 Haû su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjǐng hkyo é yanmai sheq a joq dut byuq é nghut lhê.

28 Hkâsu mù gâ le, byù gi, haû jep é tarâ châng é dông a nghut é za, lumjǐng luî, mara hkyut san byi huî é hkyô lé, ngamoq lum nyi lhê.

29 Garai Gasang gi, Yudaq byu pê é Garai Gasang za nghut lhê lhú? Tûngbaù pê é Garai Gasang le a nghut lhú? Nghut lhê, tûngbaù pê é Garai Gasang le nghut lhê.

30 Hkâsu mù gâ le, Garai Gasang gi, rayuq za nghut é yanmai, rajung za lumjǐng luî, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê.

31 Haû nghut jáng, nga-nhúng gi, lumjǐng myit hau èq, jep é tarâ lé lhoq hpoî pyám râ lhú? Ratsuí lháng a nghut! Nga-nhúng gi, jep é tarâ haû lé lhoq ging tǐng é bang ru nghut lhê.

## 4

### *Abraham, Mara Hkyut San Huî É Hkyô*

1 Haû su nghut jáng, nga-nhúng é îchyí îwa Abraham gi, haú hkyô mai haí wó sê yu ri nghú, taí râ lhú?

2 Abraham gi, zui saî é dông mai, mara hkyut san byi huî é ru nghut le gi, yhang nghutbun jang joq râ nghut lhê; nghut kôlhang, Garai Gasâng é hí má gi, yhang haú dông a nghut.

3 Chyúmdang má hkâsu gâ tô ri lhú gâ le, "Abraham gi, Garai Gasang lé lumjǐng bê nghut mù, yhang lé, dingmán sù ga són byi bê nghut ri."\* gâ ri.

4 Zui saî é sù gi, yhâng é zuihpau lé, chyunghuq dông wó yu é a nghut é za, wó yu gǐng luî, wó yu é ru nghut lhê.

5 Nghut kôlhang, zui saî é hkyô dông a nghut é za, haû agè ashop hkyô lé mara hkyut san byî é Garai Gasang lé lumhkau é sù gi, yhâng é lumjǐng myit é yanmai, dingmán sù ga són byi huî é nghut lhê.

6 Haû eq rajung za, yhang zui saî é hkyô dông a nghut é za, Garai Gasâng èq dingmán sù ga són byi huî é, Garai Gasâng chyáng mâ é shimân jeju wó é sù eq séng luî, Dawiq taí é gi,

7 "Tarâ lu laî é lé mara hkyut pyám byi huî é eq yubak mara lé nghop pyám byi huî é bang gi, hkungsô wó nyi ri.

8 Bo tô é mara lé, Yhumsing èq mara a són byî é hui sù gi, hkungsô wó nyi ri."\*

gâ ri.

9 Haû sù é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gâ le, Abraham é lumjǐng myit lé, dingmán sù ga són byi bê nghut lhê nghú, ngamoq taí nyi bê nghut lhê.

10 Haû su són byî é gi, hkâ-nhám nghut lhê lhú? Ahpyo-kuq hpyit hkâm é htâng má lhú? A nghut jáng, hí má lhú? Haû gi, ahpyo-kuq hpyit hkâm é htâng má a nghut é za, hí má ru nghut lhê.

11 Hau htoq agó, Abraham gi, yhang, ahpyo-kuq hpyit a hkam yù shî é hkûn mai, lumjǐng luî wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjǐng é lhunglhâng bang lé dingmán bang ga són byî é wó hui râ matú, haú bâng é îwa dut bê nghut ri.

12 Haû ahpyo-kuq hpyit hkâm é za a nghut, nga-nhúng é îwa Abraham, ahpyo-kuq hpyit a hkam yù shi má wó é lumjǐng hkyo é hkyî-kám lé

\* 4:3 Apûn 15:6,22    ✧ 4:8 Hkya-on 32:1-2

cháng luí ahpyo-kuq hpyit bâng é îwa le, yhang nghut ri.

<sup>13</sup> Míngkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjínng hkyô mai lo é dingmán hkyô dông ru nghut lhê.

<sup>14</sup> Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê.

<sup>15</sup> Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

<sup>16</sup> Haû mù luí, danggidiq gi, Abraham é awut ashín lhungháng bâng chyáng, jeju mai za lo é eq gingtíng nyi é dut sháng gaq ga, lumjínng hkyô mai lo é nghut lhê. Haû gi, jep é tarâ má lôm bâng é matú baú za a nghut, Abraham é lumjínng hkyô má lôm bâng é matú le nghut lhê. Abraham gi, nga-nhúng lhunghâng bâng é îwa nghut ri.

<sup>17</sup> "Ngò gi, nang lé, byù myû myo myô é îwa dut nhâng bê."\* ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínng é sù Garai Gasâng hí má, Abraham gi, nga-nhúng é îwa nghut lhê.

<sup>18</sup> "Náng é awut ashín pé le, haû eq rajung za myô lò râ nghut lhê."\* ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumjínng luí myoqbyu nyi é nghut mù, byù myû myo myô é îwa dut bê nghut ri.

<sup>19</sup> Yhang gi, rashô zàn kê jé byuq bê nghut mù, yhânggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjínng myit a yom byuq nghut ri.

<sup>20</sup> Hau htoq agó, Garai Gasâng é danggidiq eq séng luí, a lumjínng a dut é eq hê myit mhô myit a dut é za, yhâng é lumjínng myit lé saí lhoq

ging títng mù, Garai Gasang lé hkya-on kungtôn luí,

<sup>21</sup> Garai Gasang gi, Yhang byi tô é danggidiq eq rajung za wó kut râ a-tsam bò sù nghut é lé, yhang myit zing nyi ri.

<sup>22</sup> Hau é yanmai, "Yhang lé, dingmán sù ga són byi bê nghut ri."\* gâ tô é nghut lhê.

<sup>23</sup> "Yhang lé, són byi bê." ga, kê tô é dang gi, yhang é matú za a nghut,

<sup>24</sup> nga-nhúng é Yhumsíng Yesuq lé, shi é mai lhoq dui toq yû sù Garai Gasang lé lumjínng luí, Yhang èq dingmán bang ga són byi râ nghut é, nga-nhúng é matú le nghut lhê.

<sup>25</sup> Yhumsíng Yesuq gi, nga-nhúng é yubak marâ é matú, shi hkám byi râ dông ap pyâm é hui luí, nga-nhúng, mara hkyut san byi é hui râ matú, lhoq dui toq é hui bê nghut ri.

## 5

### *Nguingón Hkyô Eq Gabú Hkyô*

<sup>1</sup> Haû mù luí, nga-nhúng gi, lumjínng é dông mai mara hkyut san byi é hui bê nghut é yanmai, nga-nhúng é Yhumsíng Yesuq Hkrisduq dông, Garai Gasang eq buinùm wó xoq yû bê nghut lhê.

<sup>2</sup> Yesuq é yanmai, nga-nhúng gi, ahkuí wó yu to bê jeju shi má, lumjínng luí wó wâng bê nghut mù, Garai Gasâng é hpungwup shingkang lé myoqbyù luí gabú gumrong nyi lhê.

<sup>3</sup> Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri;

<sup>4</sup> hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê.

<sup>5</sup> Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chytidap myit lé, Yhang mai, nga-nhúng lé byi tô é Chyoiyúng

Woi-nyí dông, nga-nhúng é i-myt unghkaû má hut kat byi bê nghut ri.

<sup>6</sup> Hkâsu mù gâ le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkám byi bê nghut ri.

<sup>7</sup> Gè gè ga jáng, dingmán su é matú shí hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shí hkám é byù nyi sê lhê.

<sup>8</sup> Nghut kôlhang, nga-nhúng gi, yubak dap bang nghut nyi ashí hkûn, nga-nhúng é matú Hkrisduq shí hkám byí é má, Garai Gasang gi, Yhâng é chyitdap myit, nga-nhúng lé shit byi bê nghut ri.

<sup>9</sup> Nga-nhúng gi, ahkuí, Yhâng é sui mai mara hkyut san byí é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê.

<sup>10</sup> Hkâsu mù gâ le, nga-nhúng gi, Garai Gasâng é gye pé nghut nyi ashí u le, Yhâng Zo shí hkám byí é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lhê.

<sup>11</sup> Haû su za a nghut, nga-nhúng gi, nga-nhúng é Yhumsíng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

*Shi É Gi, Adam É Yanmai, Dui É Asak Gi, Hkrisduq É Yanmai*

<sup>12</sup> Byù rayuq dông mai, yubak mara gi, mingkan má jé wâng bê nghut luí, shí-nò hkyô gi, yubak marâ é yanmai châng jé bê nghut ri; haû dông mai, byù lhunglhang bang gi, yubak dap bang chyat nghut byuq mù, shí-nò hkyô gi, byù lhunglhang bang chyáng jé bê nghut ri.

<sup>13</sup> Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shí é hkûn gi,

yubak mara lé mara su a ngàm shí é nghut lhê.

<sup>14</sup> Haû su ga kôlhang, Adam su hkunmó lé lu lai é dông mara a kut shut bâng é ahtoq má lhang, shí-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.

<sup>15</sup> Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung!

<sup>16</sup> Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê.

<sup>17</sup> Hau htoq agó, byù rayuq tarâ lu lai luí, haû rayuq é yanmai, shí-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duí hkyô má uphkanq nyi kó râ nghut lhê.

<sup>18</sup> Haû mù luí, tarâ lu lai é hkyô ralhùm é yanmai, byù lhunglhang bang gi, mara dam byí é hui zo kô é su, dingmán hkyo é muzó ralhùm é yanmai, byù lhunglhang bang gi, asak duí hkyô eq sêng é mara hkyut san byi hkyô lé wó bê nghut ri.

<sup>19</sup> Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lhê.

<sup>20</sup> Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é

hkûn, jeju gi, je riyhang myô jat lo é nghut lhê.

<sup>21</sup> Haû mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsîng Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lhê.

## 6

### *Hkrisduq Eq Rading Ralhum*

<sup>1</sup> Haû nghut jáng, nga-nhúng gi, hkâsu nghû tái râ lú? Jeju myô jat lò sháng gaq nghû, nga-nhúng, yubak mara kut xoq nyi râ lú?

<sup>2</sup> Haû su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lú?

<sup>3</sup> Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkâm hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú?

<sup>4</sup> Haû mù luí, Hkrisduq gi, Íwâ é hpungwup shingkâng eq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

<sup>5</sup> Nga-nhúng gi, Yhang shî hkâm é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lhê.

<sup>6-7</sup> Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

<sup>8</sup> Haû mù, nga-nhúng gi, Yhang eq rahá shî hkâm bê nghut jáng, Yhang eq rahá dui nyi râ nghut lhê nghû, lumjínghê.

<sup>9</sup> Hkâsu mù gâ le, Hkrisduq gi, shî bê mai lhoq dui toq é hui bê nghut

mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo.

<sup>10</sup> Yhang shî hkâm é shî-nò hkyô gi, banshoq bâng é matú, yubak mara eq séng luí radàm za shî hkâm byi bê nghut ri; nghut kôhang, Yhang dui nyi é asak gi, Garai Gasâng hí má dui nyi é nghut lhê.

<sup>11</sup> Haû eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lhê nghû, sôn yù keq.

<sup>12</sup> Haû mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê.

<sup>13</sup> Nungmoq é gungdu showui showang pé lé, agè ashop hkyo é chùng zè pé dông yubak mara má hkâ-ap byî pyám kó, shî bê mai lhoq dui toq yù huí é bang su, yhumsîng gùng yhumsîng, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chùng zè pé dông, Garai Gasâng chyáng ap byi keq.

<sup>14</sup> Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyi bekô yanmai, yubak mara gi, nungmoq lé sîng sù wó dut râ a nghut lo.

### *Dingmán Hkyo É Jùn Pé*

<sup>15</sup> Haû jáng gi, hkâsu kó lú? Nga-nhúng gi, jep é tarâ hkaû má a nghut lo é za, jeju hkaû má nghut nyi bekô yanmai, mara wó kut shut kó râ lú? Haû su a wó kut!

<sup>16</sup> Nungmoq gi, rayuq yuq é jìno gyo râ matú, yhumsîng gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôhang, dingmán hkyô wó râ nghut é jìno gyo hkyô nghut kôhang, nungmoq châng nyi é nghut le gi, nungmoq, haû é jùn dut bê lé, a sé kó lú?

17 Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasang lé jeju hkyâ-on sháng.

18 Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

19 Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ đông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn đông lhang ap byí wú bekô nghut é su, ahkuí gi, chyoiyúng hkyô wó yû râ matú, haú pé lé, dingmán hkyô má jùn đông ap byi keq.

20 Nungmoq gi, yubak marâ é jùn dut nyi kô é hkún, dingmán hkyo èq uphkan é mai lut nyi kô é nghut lhê.

21 Ahkuí, nungmoq hoqjung nghu wú htoq é pé gi, haú u lé, hai akyû wó yû kô é lhú? Hau pé gi, shi byuq é má htâm é chyat nghut ri.

22 Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê.

23 Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhung é Yhumsing Hkrisduq Yesuq é yanmai, ahtum abyuq é asak nghut ri.

## 7

### *Tarâ Mai Lut É Hkyô*

1 Gumang wui ê, ngò gi, tarâ lé sê é bang nungmoq lé tái nyi lhê: haú tarâ gi, byù rayuq lé, yhang, asak dui nyi é u lé za wó uphkan é lé, nungmoq a sé kó lhú?

2 Dangké, ikun wàng bê myiwe myhí rayuq gi, yhang é yhumsing hpó

asak dui nyi é ahkying má, tarâ èq up zing tô é hui ri; nghut kôlhang, yhang é yhumsing hpó shi byuq é nghut jáng gi, haú ikun wàng tarâ mai, yhang wó lut bê nghut ri.

3 Haú nghut é yanmai, yhang é yhumsing hpó asak dui nyi ashî u lé, yuqgè góyuq eq hâng lhúm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haú mai lut bê nghut lui, yuqgè góyuq eq hâng lhum kôlhang, sulàng lú sù a nghut lo.

4 Haú mù lui, ngá é gumang wui ê, nungmoq le, haú shi byuq é mai lhoq dui toq yù hui bê sù Yuqgè chyáng wó xox mù, nga-nhung gi, Garai Gasang lé ashî wó zui byi sháng gaq ga, Hkrisduq é gungdu đông mai, jep é tarâ eq shi gang bê nghut lhê.

5 Hkâsu mù gâ le, nga-nhung, yubak gungsho má nghut nyi é hkún, nga-nhung gi, shî-nò hkyo é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhung é gungdu pé má mù zui nyi é nghut lhê.

6 Nghut kôlhang, ahkuí gi, nga-nhung lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau đông a nghut é za, Woi-nyí é hkyô sik đông nga-nhung dojaú nyi é nghut lhê.

### *Jep É Tarâ Eq Yubak Mara*

7 Haú jáng, nga-nhung hkâsu tái râ lhú? Jep é tarâ gi, yubak mara nghut lhê lhú? Ratsui lhang a nghut! Gè gè ga jáng, haú jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"☆ ga jep é tarâ má a tái tô é nghut jáng, myoqnoq é hkyô lé, ngò sé rà a nghut.

8 Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byí ri; hkâsu mù gâ le, jep

☆ 7:7 Htoq Ló 20:17

é tarâ hkaû má a nghut jáng, yubak mara gi, shi é za nghut lhê.

<sup>9</sup> Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shi bê nghut lhê.

<sup>10</sup> Haû mù luí, asak dui nhâng rá matú nghut é hkunmó haû gi, shi-nò hkyô dut byuq é lé, ngò wó sê é nghut lhê.

<sup>11</sup> Hkâsu mù gâ le, yubak mara gi, hkunmó é ahkáng lé chûng mù, ngo lé mhaû yù luí, hau eq ngo lé shi nhang ri.

<sup>12</sup> Hau pé lé wú jáng, jep é tarâ gi, chyoyúng ri; haû hkunmó gi, chyoyúng, dingmán é eq ge é nghut ri.

<sup>13</sup> Haû nghut jáng, ge é hkyô haû gi, ngá é matú shi-nò hkyô dut byuq bê lú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rá matú, haû ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

<sup>14</sup> Hau htoq agó, jep é tarâ gi, woi-nyí eq sêng é hkyô nghut é lé, nganhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê.

<sup>15</sup> Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê.

<sup>16</sup> Ngò a kut nau é lé kut é nghut jáng gi, haû jep é tarâ ge é lé, ngò myit hui é nghut lhê.

<sup>17</sup> Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê.

<sup>18</sup> Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri.

<sup>19</sup> Hau é yanmai, ngò kut nau é ge é hkyô lé gi, a kut é za, ngò a kut nau é

agè ashop hkyô lé gi, ngò xoq kut nyi ri.

<sup>20</sup> Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

<sup>21</sup> Haû mù, ge é hkyô lé ngò kut nau é hkún, ngò má agè ashop hkyô htoq lô lô mù é tarâ lé, ngò myang ri.

<sup>22</sup> Hkâsu mù gâ le, ngò gi, Garai Gasâng é tarâ lé, ngá é i-myit unghkaû má myit nguì gabú nyi lhê.

<sup>23</sup> Nghut kôlhang, ngá é gungdu showui showang pé má bo é gotú tarâ gi, ngá é i-myit tarâ eq majan zân lhúm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyú dut nhang é lé, ngò myang ri.

<sup>24</sup> Ngò gi, shogyo rayhup dut sù nghut ri-nhung! Shí nhang é gungdu shí mai, ó yuq wá, ngo lé wó hkyi yù rá lú?

<sup>25</sup> Nga-nhúng é Yhumsing Yesuq Hkrisduq đông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

## 8

### *Haû Woi-nyí Mai Asak Dui É Hkyô*

<sup>1</sup> Haû mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê.

<sup>2</sup> Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shi-nò hkyô é tarâ mai, ngo lé lhoq lhut yù bê nghut lhê.

<sup>3</sup> Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng rá matú, yubak byu é gunghkyâng đông, Yhang Zo sîng lé nhang kat é đông kut pyám bê nghut ri.

<sup>4</sup> Haû mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqdân pyám bê nghut ri.

<sup>5</sup> Haû yubak gungsho đông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí đông asak dui é bang kúm gi, Woi-nyí ô nau é hkyô pé lé myit zuq nyi akô nghut ri.

<sup>6</sup> Haû yubak byu é myit gi, shi é hkyô nghut ri; haû Woi-nyí eq hkgang to huí su é myit kúm gi, asak eq ngu-ingón hkyô nghut ri.

<sup>7</sup> Haû yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyè nghut ri.

<sup>8</sup> Haû yubak gungshô eq hkgang tô é hui bang gi, Garai Gasang lé a wó gabú nhâng kó nghut ri.

<sup>9</sup> Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô eq hkgang to huí é bang a nghut lô é za, Woi-nyí eq hkgang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

<sup>10</sup> Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shi kôlhang, náng é woi-nyí gi, dingmán hkyo é yanmai dui nyi ri.

<sup>11</sup> Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí đông mai, nungmoq é, shi sê é gungdu pé lé le, asak dui nhâng râ nghut lhê.

<sup>12</sup> Haû mù luí, Gumang wui ê, nga-nhúng gi, yubak gungsho đông asak dui râ matú, wò wó é bang a nghut.

<sup>13</sup> Hkâsu mù gâ le, haû yubak gungsho đông asak dui kô é nghut jáng,

nungmoq gi, shi râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê.

<sup>14</sup> Garai Gasâng é Woi-nyí eq shuî u é hui bang gi, Garai Gasâng é yhangzô pé nghut lhê.

<sup>15</sup> Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,\* Áwa ê" nghu wut é nghut lhê.

<sup>16</sup> Nga-nhúng gi, Garai Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri.

<sup>17</sup> Ahkuî, nga-nhúng gi, zo wui nghut bê yanmai, Hkrisduq eq rahá, Garai Gasâng é amyû hkúngxoq pé wó dut é nghut lhê. Nga-nhúng gi, Hkrisduq é wuîhke jamjau pé lé, gè gè yhang bo hui zô é nghut jáng, Yhâng é hpungwup shinggang lé le, bo myang hkam yù râ nghut lhê.

### *Htângnùng Lhê É Hpungwup Shinggang*

<sup>18</sup> Nga-nhúng é ahkuí lhê é wuîhke jamjau hkyô pé gi, nga-nhúng lé shit râ nghut é hpungwup shinggang eq whuí râ a gingdán nghu, ngò wó myit ri.

<sup>19</sup> Haû hpan to huí é lhunglhang gi, Garai Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri.

<sup>20</sup> Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsîng hkyin yu é đông a nghut é za, haû s dut nhâng Sû ô nau é đông kut é nghut ri.

<sup>21</sup> Haû hpan to huí é lhunglhang gi, htên byoq byuq râ matú shum dut é mai lhoq lhut é hui luí, Garai Gasâng é yhangzô pé é hpungwup bo é luthkyô

\* **8:15** *Aba* gâ é gi, Aramaik dang đông "áwa" gâ é lichyúm nghut lhê.

má wó wâng râ matú, myoqbyu tô é nghut lhê.

<sup>22</sup> Haû hpan to huí é lhungháng gi, ahkuí hkyíng jé shoq, zohkû-nò no é su nò-kying kyíng nyí kô é lé, nga-nhúng sê lhê.

<sup>23</sup> Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé dông yín yu é jeju lé láng uchyang, i-myt unghkaû má nò-kying kyíng é nghut lhê. Zo pé dông yín yu é jeju haû gi, nga-nhúng é gungdu hkyi xe yù hkyô nghut lhê.

<sup>24</sup> Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyù shirâ lhú?

<sup>25</sup> Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut láng é nghut lhê.

<sup>26</sup> Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haî dung râ é lé a sé kôlhang, haû Woi-nyí yhang gi, dang mai a wó taí htoq é nò-kying htê dông, nga-nhúng é matú bo dúng xoq byí ri.

<sup>27</sup> Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

### *Banshoq Lé Je Wó Ung Pyám Râ Hkyô*

<sup>28</sup> Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lhungháng lé ge é dông chyat kut é hkyô lé, nga-nhúng sê lhê.

<sup>29</sup> Hkâsu mù gâ le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó

pûng nhâng râ matú, hí mai masat to bê nghut ri.

<sup>30</sup> Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shing kang bò nhang ri.

<sup>31</sup> Haû jáng gi, shí hkyô eq séng luí, nga-nhúng haî taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut râ lhú?

<sup>32</sup> Yhumsing é Yhangzo lé lháng a ha bûn é za, nga-nhúng banshoq bâng é matú ap byí pyâm é Sû gi, Yhang lé le, lhungháng lé le, rahá laí laí byí râ a nghut lhú?

<sup>33</sup> Garai Gasang eq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byí Sû nghut ri.

<sup>34</sup> Hkrisduq Yesuq gi, shí hkâm luí, shí hkâm é htoq agó, shí é mai lhoq dui toq yu é hui mù, Garai Gasang é loqyo hkyam má nghut nyí luí, nga-nhúng é matú bo dúng xoq byí nyí bê nghut é yanmai, ó yuq wá mara wó byí râ lhú?

<sup>35</sup> Hkrisduq é chyitdap myit mai, nga-nhúng lé, hai eq wá wó lhoq kang râ lhú? Gunjang huí é hkyo eq luq? Wuîhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chîn dut huí é hkyo eq luq? Gyuq jung eq luq? Sham eq luq?

<sup>36</sup> Haû gi,  
"Náng é yanmai, ngamoq, nyí wui sat pyâm é huí nyi ri;  
sat râ matú nyhi tô é sau pé lé su, ngamoq lé myit pyâm akô."<sup>\*</sup>

ga kê tô é eq rajung za nghut ri.

<sup>37</sup> A wó lhoq kang; nga-nhúng lé chyitdap Su é yanmai, nga-nhúng gi, haû pé banshoq lé je wó ung pyâm é nghut lhê.

<sup>38</sup> Hkâsu mù gâ le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang,

† 8:23 Woi-nyí é sâng-hi ashi gâ é gi, Woi-nyí gi, Garai Gasang byí é chyunghuq pé mâ é sâng-hi lhum nghut lhê. \* 8:36 Hkya-on 44:22



htang pyat nghut kôlhang, haí jung a-tsam pé nghut kôlhang,

<sup>39</sup> htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú haí nghut kôlhang, nga-nhúng é Yhumsîng Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyám râ a nghut nghú, ngò gi, hkyak wó sê yu ri.

## 9

### *Garai Gasang Hkyin Yu É Israelaq Byu Pé*

<sup>1</sup> Ahkuí, ngò gi, Hkrisduq má tengmán é dang taí râ; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri.

<sup>2</sup> Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê.

<sup>3</sup> Hkâsu mù gâ le, ngò gi, ngá é byuhú, ngá é gumang wui é matú, nhîng é hui luí Hkrisduq eq gang le lháng gè râ su gâ ri.

<sup>4</sup> Haú bang gi, Israelaq byu pé nghut lhê. Zo yín yû huí é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri.

<sup>5</sup> Haú myîng hû é îchyí îwâ pé gi, yhangmoq é îchyí îwâ pé nghut luí, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhunglháng lé up é, ahtum abyuq hkya-on huí é Garai Gasang nghut ri! Amen.

<sup>6</sup> Haú gi, Garai Gasâng é danggidiq akôm dut byuq bê nghú nau é a nghut. Hkâsu mù gâ le, Israelaq byu pé ban-shoq bang gi, Israelaq byù akying chyat a nghut kó nghut ri.

<sup>7</sup> Abraham é awut ashín banshoq bang gi, yhâng é zo wuî akying chyat nghú a wó taí é nghut lhê. Hau é malaî, "Isak dông mai lo é lé, náng

é awut ashín nghú són byi râ nghut lhê."✧ gâ tô ri.

<sup>8</sup> Radông taí sháng ga jáng, gungsho mai hku é zo wuî gi, Garai Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông són byí é nghut lhê.

<sup>9</sup> Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkû râ nghut lhê."✧ ga taí tô é danggidiq é yanmai nghut lhê.

<sup>10</sup> Haú za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê.

<sup>11-12</sup> Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haú zozûm nhik a hku lé shî é htoq agó, ge é eq a ge é muzó haí lháng a kut shimá, "Haú ko sù yuq gi, tiq sù yuq lé dojaú râ nghut lhê."✧ ga, Rebeka lé taí kyô tô é nghut lhê.

<sup>13</sup> Haú gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."✧ ga kâ tô é eq rajung za nghut ri.

<sup>14</sup> Haú nghut é yanmai, nga-nhúng hkâsu nghú taí râ? Garai Gasang gi, a tarâ é sù nghut lhê lhú? Ratsuí lháng a nghut!

<sup>15</sup> Hkâsu mù gâ le, "Ngò, shogyo nhikmyin nau sù lé, shogyo nhikmyin râ nghut lhê; Ngò, jeju byi nau sù lé, jeju byi râ nghut lhê."✧ ga, Mosheq lé Yhang taí ri.

<sup>16</sup> Haú mù luí, haú hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyin é yanmai za nghut lhê.

<sup>17</sup> Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é myîng lhoq pyo é hui râ matú sheq, Ngò, nang lé lhoq toq kat é nghut lhê."✧ ga, Hpara-uq lé taí ri.

18 Haû mù luî, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

19 Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê.

20 Nghut kôlhang, Garai Gasang lé dang tu sù byù nàng gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó taí râ lhú?

21 Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?

22 Garai Gasang gi, Yhâng é nhikmo-yo hkyô tûn shit luî, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haî joq ashî lhú?

23 Hpungwup shingkâng é matú noq mai hen to bang nghut é, Yhang shogyo nhikmyin hui é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí râ haî joq ashî lhú?

24 Haû bang gi, Yudaq byu pé mai za a nghut, tûngbaù pé mai le jí yù hui é bang nga-nhúng nghut lhê.

25 Haû eq rajung za, Hosea laiká má Yhang taí tô é gi,

"Ngá é byù myû a nghut é bang lé,  
'Ngá é byù myû' nghû;

Ngò a chyt é byizo lé 'Ngò chyt sù' nghû wut râ nghut lhê."✠

gâ ri.

26 Haû mù,

"Nungmoq gi, ngá é byù myû pé a nghut.' nghû yhangmoq lé taí é jowò má yhang,

yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê."✠

gâ ri.

27 Esai-aq le, Israelaq byu pé eq séng luî garu taí é gi,

"Israelaq yhangzo yhangshû pé gi, wuìshuq lung-aû yàm mâ é se-muî su myo kôlhang,

myit gyó tô é bang za sheq hkyi yu é hui kó râ nghut lhê.

28 Hkâsu mù gâ le, haû Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê."✠

gâ ri.

29 Haû eq rajung za, hí lé Esai-aq taí tô é gi,

"A-tsam dik shoq bò sù haû Yhumsîng za, nga-nhúng lé, awut ashín a myhit to byi é nghut jáng,

nga-nhúng gi, Sodom wà su dut byuq luî, Gomoraq myuq eq pung byuq râ nghut lhê."✠

gâ ri.

### *Israelaq Byu Pé A Lumjîng Kô É Hkyô*

30 Haû mù, nga-nhúng hkâsu nghû taí râ lhú? Dingmán hkyô lé a châng hkat é tûngbaù pé gi, haû lé wó yù bekô; haû gi, lumjîng hkyo é yanmai wó yu é dingmán hkyô nghut ri.

31 Nghut kôlhang, tarâ eq séng é dingmán hkyô lé châng hkat é Israelaq byu pé gi, haû lé a wó yù kó nghut ri.

32 Haî mù a wó yù kô é lhú? Yhangmoq gi, lumjîng myit eq châng hkat kô é a nghut é za, muzó pé eq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htûng leng bekô nghut ri.

33 Haû,

"Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luî,

Yhang lé lumhkaû sù gi, hkâ-nhám le hoq hpu é hui râ a nghut."✠

ga kâ tô é eq rajung za nghut ri.

## 10

<sup>1</sup> Gumang wuê ê, ngò gi, haû Israe-laq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byi nyi lhê.

<sup>2</sup> Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó.

<sup>3</sup> Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó nghut ri.

<sup>4</sup> Hkrisduq gi, lumjîng bang yuq hkanmó, dingmán é má wó jé kó sháng gaq ga, jep é tarâ ló htum jang dut bê nghut ri.

<sup>5</sup> Mosheq gi, "Haú pé dông châng é sù gi, haú pé mai asak duì râ nghut lhê."\* ga, jep é tarâ eq sêng é dingmán hkyô lé kâ sân kyô tô é nghut lhê.

<sup>6</sup> Nghut kôlhang, lumjîng hkyô eq sêng é dingmán hkyô gi, "Náng é myit nhiklhum má, 'Mauhkûng má, ó yuq doq ló râ lhú?'"\* (Haû gi, Hkrisduq lé shuí gyó lò râ gá nau é nghut lhê),

<sup>7</sup> haû a nghut jáng, 'Nik é jang má, ó yuq gyó wâng râ lhú?'"\* (Haû gi, Hkrisduq lé, shi é mai dui toq nhâng râ gá nau é nghut lhê.), nghû hkâtaí kó."\* gâ tô ri.

<sup>8</sup> Haû jáng, hkâsu gâ tô ri lhú? "Haû mungdang gi, nâng eq chyâng nyi ri; nâng é nhut má le, nâng é myit nhiklhum má lé nghut nyi ri."\* gâ tô ri. Haû gi, ngamoq hko taí é lumjîng hkyô eq sêng é mungdang nghut lhê.

<sup>9</sup> Haû mù, "Yesuq gi, Yhumsîng nghut ri." nghû nâng é nhut eq yín yû mù, Garai Gasang gi, Yhang lé, shi é mai dui toq nhâng bê nghut lhê nghû, nâng é myit nhiklhum má lumjîng é nghut jáng, nâng gi, hkyi yu é hui râ nghut lhê.

<sup>10</sup> Hkâsu mù gâ le, byù gi, myit nhiklhum má lumjîng jáng, mara hkyut san byi é hui mù, nhut mai yín yû jáng, hkyi yù hui é nghut lhê.

<sup>11</sup> Haû Chyúmdang taí é gi, "Yhang lé lumhkau é sù ó yuq le, hkâ-nhám lháng hoq hpû é hui râ a nghut."\* gâ ri.

<sup>12</sup> Hkâsu mù gâ le, Yudaq byù eq tûngbaù pê é gyoro má gam hkoq é hkyô haí le a joq é za, haû Yhumsîng gi, banshoq bâng é Yhumsîng nghut lhê mù, Yhang lé wut dung bang lunglháng lé, agùn agó shimân byi ri.

<sup>13</sup> Hkâsu mù gâ le, "Haû Yhumsîng é myîng lé lêng é bang yuq hkanmó gi, hkyi yu é hui râ nghut lhê."\* gâ tô ri.

<sup>14</sup> Haû nghut lé gi, yhangmoq a lumjîng é sù lé nhîng, hkâsu wó wut dung kó râ lhú? Yhangmoq a wó gyô wú é sù lé nhîng, hkâsu wó lumjîng kó râ lhú? Hko kyô é sù a nyi le nhîng, hkâsu wó gyo kó râ lhú?

<sup>15</sup> Nhang kat é a hui le gi, yhangmoq hkâsu kut wó hko kyo kó râ lhú? Haû eq rajung za, "Gabú danglù pé hko kyo bâng é hkyi-kám pé gi, hkâ-í yhang yúng ri myhi-nhung!"\* ga kâ tô ri.

<sup>16</sup> Nghut kôlhang, Israe-laq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsîng ê, ngamoq é danglù lé ó yuq wá lumjîng é lhú?"\* ga taí ri.

<sup>17</sup> Haû nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

<sup>18</sup> Nghut kôlhang, ngò myi kó lé: yhangmoq gi, a wó gyô wú kô é nghut lhê lhú? Yhangmoq gi, wó gyo gù za nghut lhê, haû eq rajung za,

"Yhangmoq é htê gi, myidàm htoq banshoq má jam bê nghut ri; yhangmoq é mungdang pé gi, mîngkan htungchyûn hkanmó má jé bê nghut ri."\* gâ tô ri.

\* 10:5 Nhong 18:5 \* 10:6 Tarâ Pun 30:12 \* 10:7 Tarâ Pun 30:13 \* 10:8 Tarâ Pun 30:14 \* 10:11 Esai 28:16 \* 10:13 Yol 2:32 \* 10:15 Esai 52:7 \* 10:16 Esai 53:1 \* 10:18 Hkya-on 19:4

19 Ngò dum myi kó lé: Israelaq byu pé gi, a sê gyo kô é nghut lhê lhú? Mosheq sâng-hi má taí é gi,

"Byù rahú lháng a nghut bang èq, Ngò, nungmoq lé manôn nhâng râ; sê gyo nyan a bo é amyù èq, Ngò, nungmoq lé wú nhik-yo nhâng râ nghut lhê."<sup>☆</sup>

gâ ri.

20 Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri; Ngá hkyô lé a myí é bang lé, Ngò htoq shit bê nghut lhê."<sup>☆</sup>

gâ ri.

21 Nghut kôlháng, Israelaq byu pé eq séng luí, Yhang taí é gi,

"Ngò gi, jìno a gyô é eq ngegáng-htu é byù myú lé, nyí wuí Ngá loq lham mù ji nyi lhê."<sup>☆</sup>

gâ ri.

## 11

### *Israelaq Byu Pé Lé A He-ngik Pyám*

1 Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lhú? Ratsuí lháng a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú má é sù nghut lhê.

2 Garai Gasang gi, Yhang te sê to gù nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lhú? Garai Gasâng é hí má, yhang, Israelaq byu pé lé mara hùn é gi,

3 "Yhumsîng ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri."<sup>☆</sup> gâ ri.

4 Garai Gasang gi, yhang lé, hkâsu ga tû taí é nghut lhê lhú? Haù gi, "Balaq hpara é hí má hkyihput a htuq

shî é byù nyhit hkyíng lé, Ngá é matú myhit to lhê."<sup>☆</sup> gâ é nghut lhê.

5 Haù eq rajung za, ahkuí gi, jeju yanmai hkyin yù huí é bang za myit gyó tô é nghut lhê.

6 Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

7 Haù nghut jáng, hkâsu lhú? Israelaq byu pé gyai ho shikut kôlháng, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é hui akô nghut ri;

8 haù gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."<sup>☆</sup>

ga kâ tô é eq rajung za nghut ri.

9 Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

10 Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkûng gi, ayang wòlai wun goí nhang é hui sháng gaq."<sup>☆</sup>

gâ ri.

### *Tûngbaù Pé Lé Hkyi Yu É Hkyô*

11 Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pè chyáng jé byuq é nghut lhê.

12 Nghut kôlháng, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyám é hkyô gi, tûngbaù pè é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

13 Nungmoq tûngbaù pé lé ngò taí nyi lhê: ngò gi, tûngbaù pê é lagyo nghut nyi é u má, ngá é hpungmù lé hpautap nyi lhê.

14 Haù gi, ngá é amyû pé lé manôn myit wó bô nhâng mù, yhangmoq ram lé wó hkyi yù rà lé myit myoqbyu é hkyô nghut lhê.

15 Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi?

16 Hau htoq agó, sâng-hí ashi dông nhông byî é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

17 Haù tsanlun akoq pé\* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng,

18 akoq haù pé lé hkâwú tiq pyâm kó. Nungmoq haù su kut é nghut jáng, nungmoq gi, haù amyit lé htuoq é a nghut é za, amyit haù sheq nungmoq lé htuoq é hkyô lé, nungmoq myit sé keq.

19 Nungmoq kúm gi, "Ngò, haù má xoq é hui rà matú sheq, akoq haù pé gi, lhoq hkyui pyâm é hui é ru nghut lhê." ga taí rà nghut lhê.

20 Haù su gi, nghut lhê. Nghut kôhang, yhangmoq gi, a lumjínng é yanmai, lhoq hkyui pyâm é hui kômù, nungmoq kúm gi, lumjínng é yanmai, wó ging tîng nyi é nghut lhê. Hká gumrong nyi, gyuq kyum nyi keq.

21 Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun rà a nghut.

22 Haù mù luí, Garai Gasang é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyâm kôhang, nungmoq gi, Yhâng é shogyo

nhikmyin hkyô má xoq nyi nyi é myháng, nungmoq lé gi, shogyo nhikmyin nyi rà nghut lhê. Haù a nghut jáng, nungmoq le, zân hpyit pyâm é hui rà nghut lhê.

23 Yhangmoq gi, a lumjínng hkyô lé tô pyâm kô é nghut jáng, dum xoq yu é hui kó rà nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê.

24 Haì mù gâ le, yosô tsanlun gàm akoq nghut gù nungmoq lé hpyit yù mù, htûng a nghut é dông, hô é tsanlun agàm má xoq é nghut le gi, haù akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang hui rà nghut lhê ô!

### *Israelaq Byu Pé Hkyi Yu É Hui Râ Hkyô*

25 Haù mù, gumang wuì ê, nungmoq a nghutbun kó sháng gaq ngû, zau tô é hkyô shí lé, nungmoq a sé dut rà lé, ngò a ô nau é nghut lhê: haù gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê.

26 Hau htâng sheq, Israelaq amyû banshoq bang hkyi yu é hui rà nghut lhê. Haù gi,

"Hkyi yù Sù gi, Zi-un bùm mai htoq lô rà nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyâm byi rà nghut lhê.

27 Ngò, yhangmoq é yubak mara lé huí sêng pyâm byi jáng, haù gi, yhangmoq lé Ngò byî tô é Ngá é dangshikaq nghut lhê."☆ ga kê tô é eq rajung za nghut ri.

28 Haù gabú danglù eq séng luí ga jang, yhangmoq gi, nungmoq é matú gyè nghut akô; nghut kôhang, hkyin htoq yù hkyô eq séng luí ga jang, yhangmoq gi, myíng hû é îchyí îwa pé é yanmai, chyitdap é huí akô nghut ri;

\* 11:17 Tsanlun akoq pé gi, Israelaq byu pé lé taí nau é nghut lhê. † 11:17 Yosô tsanlun a-nyuq gi, tûngbaù pé lé taí nau é nghut lhê. ☆ 11:27 Esai 59:20-21; 27:9

29 hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut.

30 Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuî kúm, shogyo nhikmyin hkyô wó hkam yù bekô nghut é su,

31 ahkuî, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuî, jìno a gyo bang dut bekô nghut ri.

32 Hkâsu mù gâ le, Garai Gasang gi, byù lhunglhang bang lé, shogyo nhikmyin hkyô wó tûn shit shoq ga, lhunglhang bang lé, jìno a gyo hkyo é shúm dut nhang to bê nghut ri.

### *Hkya-on Kungtôn Dang*

33 Ô! Garai Gasâng é agùn agó é sùt nghut é, hpaqchyî byéng-yá eq nyan hpaqchyî gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

34 "Haû Yhumsing é myit lé, ó yuq wá ung sê lhê lhu? Yhâng é hpaqchyî byi sù gi, ó yuq wá dut wú é lhu?"<sup>☆</sup> gâ ri.

35 "Garai Gasâng èq jeju dum tau byi râ dut shoq, ó yuq wá, Garai Gasang lé byi wú é lhu?"<sup>☆</sup> gâ ri.

36 Hkâsu mù gâ le, joq mijoq gi, Yhâng chyáng mai nghut mù, Yhang đông mai nghut luî, Yhâng é matú chyat nghut ri. Haû hpungwup shing kang gi, Yhâng chyáng ahtum abyuq ru joq nyí sháng gaq ô! Amen.

## 12

### *Dui É Hkungga Pé Dut Râ Hkyô*

1 Haû mù luî, gumang wuî ê, nungmoq é gungdu pé lé, Garai Gasang myit nguî ô nau é eq chyoyúng é, dui é hkungga đông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haû gi, woi-nyí hkyô đông nungmoq noqkuq dojaú é hkyô nghut lhê.

2 Mingkan shí lhûm é sâmlai đông a cháng lo é za, myit sik wó yù râ đông nungmoq é a-kyang lé htaî pyám byi nhâng keq. Haû hkûn sheq, Garai Gasâng é ge é, myit nguî é eq gumjup é ô nau hkyô lé, nungmoq wó chyâm, wó sê gàm hkoq yù kó râ nghut lhê.

3 Hkâsu mù gâ le, ngo lé byí tô é jeju yanmai, nungmoq yuq hkan gmó lé ngò taí kôlé: nungmoq gi, yhumsing gung lé lai shoq a nghutbûn é za, ó le ó lé, Garai Gasâng èq lumjîng myit tsing gàm byí to bê eq rajung za, myit yù gîng é í za myit yù keq.

4 Nga-nhúng yuq hkan gmó é gungdu ralhum má gi, gungdu showui showang pé myo myo bo é nghut luî, gungdu showui showang haû pé banshoq gi, jai chûng jang a pung é nghut lhê.

5 Haû eq rajung za, myo myo nghut é nga-nhúng le, Hkrisduq má gungdu ralhum za dut luî, yuq hkan gmó gi, rayuq eq rayuq gungsho sêng lhûm é bang chyat nghut lhê.

6 Nga-nhúng lé byí tô é jeju yanmai, nga-nhúng wó é chyunghuq gi, gotú tû nghut lhê. Byù rayuq é chyunghuq gi, myiqhtoi htoî é nghut jáng, yhâng é lumjîng hkyô eq rajung za htoî sháng gaq;

7 dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

8 myit wum byí é nghut jáng, myit wum byi sháng gaq; ra châ é bang lé garúm byí é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

*Chyitdap Myit*

<sup>9</sup> Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq.

<sup>10</sup> Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq.

<sup>11</sup> Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyi mù, haù Yhumsing lé dojaú nyi keq.

<sup>12</sup> Myit myoqbyù hkyô má gabú keq; wuìhke hkyô má hkam jan keq; kyùdung hkyô má lhumzui keq.

<sup>13</sup> Ra châ tô é Garai Gasâng é byu pé lé gàm byi keq. Bìng hkulum é lé rago kut keq.

<sup>14</sup> Nungmoq lé zing-rî é bang lé shimân byi keq; shimân byi keq, hkâ-nhing kó.

<sup>15</sup> Gabú é bang eq rahá bo gabú keq; yón é bang eq rahá bo yón keq.

<sup>16</sup> Rayuq eq rayuq byìn hpyé gohut huí nyi keq. A nghutbùn é za, nyi yap hkyô nyhùm bang eq zùm yap keq. Hpaqchyì bo é sù su hkâ-myit ngàm kó.

<sup>17</sup> Ó yuq lé le, agè ashop é yanmai, agè ashop é dông lató hkâhpuc kó. Yuq hkangmó é myoq hí má ge é lé kut râ rago myit keq.

<sup>18</sup> Wó dut é nghut jáng, nungmoq wó dut é í, yuq hkangmó eq nguingón shoq nyi keq.

<sup>19</sup> Ngá é buinùm wuì ê, lató a hpuc é za, Garai Gasâng é nhikmo-yo hkyô lé sheq lánng nyi keq. Hkâsu mù gà le, "Ngò sheq lató hpuc râ sù nghut lhê; ngò lató hpuc râ."\* ga, haù Yhumsing taí ri ga kâ tô ri.

<sup>20</sup> Haù mù, "Nungmoq lé gyè kut sù zòmut é nghut le gi, byi tso keq; yhang wuìshit é nghut le gi, rajung jung byi huq keq.

Haù dông kut jáng, nàng, yhâng é ulhum htoq má gyúng é myigye bum to byi é nghut lhê."\* ga le kâ tô ri.

<sup>21</sup> Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

**13***Ahkáng Ayá Wó Bàng Ô Má Nyi Râ É Hkyô*

<sup>1</sup> Yuq hkangmó gi, up é ahkáng ayá wó bàng é a-ô má nyi ra râ nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê.

<sup>2</sup> Hau é yanmai, up é ahkáng ayá lé gumlau toq é sù gi, Garai Gasâng byi tô é up é ahkáng ayá lé gumlau toq é sù nghut ri; haù su kut é bang gi, tarâ jéyáng é hui zo râ hkyô lé ho yù nyi é bang nghut akô.

<sup>3</sup> Hkâsu mù gà le, uphkan é bang gi, ge é hkyô kut bàng é matú gyuc nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuc é mai lut nau lhê a nghut lí? Haù jáng, ge é hkyô kut aq, haù hkùn, yhang, nang lé hkya-on râ nghut lhê.

<sup>4</sup> Hkâsu mù gà le, yhang gi, náng é matú ge é akyù kut byi râ nghut é, Garai Gasâng é dui-nhâng zoshâng nghut lhê. Nghut kôlháng, nàng, shut shaí hkyô kut é nghut le gi, gyuc nán nyi aq; haù mù gà le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi râ matú nhikmo-yo Su é gunglik nghut lhê.

<sup>5</sup> Haù mù luì, dam byi râ lé chiq é yanmai za a nghut, yhumsing nhik bò râ é yanmai le, haù up é ahkáng ayá wó bàng é a-ô má nyi râ dut lhê.

<sup>6</sup> Nungmoq hkansê kat râ é gi, hau é yanmai le nghut lhê; hkâsu mù gà le, haù up é ahkáng ayá wó bang gi, Garai Gasâng é dui-nhâng zoshâng wuì nghut lhê mù, uphkan é mù lé, ahkýng byíng shoq wùn waq nyi akô nghut ri.

<sup>7</sup> Yuq hkanmó lé byi âng é eq ra-jung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

*Rayuq Eq Rayuq Chyitdap Lhum Râ Hkyô*

<sup>8</sup> Rayuq eq rayuq chyitdap lhûm é chyîn mai lai luî, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri.

<sup>9</sup> "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"<sup>\*</sup> gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."<sup>\*</sup> gâ é tarâ má lo jup to bê nghut lhê.

<sup>10</sup> Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

<sup>11</sup> Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bûn gyíng râ ahkyíng jé bê; haî mù gâ le, nga-nhúng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri.

<sup>12</sup> Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehking lé wut to sháng.

<sup>13</sup> Ye lhaî é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng.

<sup>14</sup> Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

## 14

*Gumang Wuî Lé A Jéyáng Râ Hkyô*

<sup>\*</sup> 13:9 Htoq Ló 20:13-15    <sup>\*</sup> 13:9 Nhong 19:18

<sup>1</sup> Lumjíng myit má wum nyhóm sù lé, myíng myo nhô zâ é hkyô pé lé a jéyáng byi é za hap yù keq.

<sup>2</sup> Byù rayuq é lumjíng myit gi, jung hkanmó zô ri; nghut kôlhang, lumjíng myit nyhóm sù gotû rayuq gi, mhan-haq hpoqnoq za zô ri.

<sup>3</sup> Jung hkanmó zo sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri.

<sup>4</sup> Nàng gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap ging kôlhang, leq-bat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsíng gi, yhang lé wó yap ging nhâng Sù nghut lhê.

<sup>5</sup> Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkanmó gi, yhumsíng myit yu é lé a úng-âng nyi sháng gaq.

<sup>6</sup> Buinyi ra-nyí lé, ahkyak lhê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsíng lé bun luî zô nyi ri; a zo sù le, haû Yhumsíng lé bun luî Garai Gasang lé jeju hkya-ôn nyi ri.

<sup>7</sup> Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

<sup>8</sup> Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsíng eq sêng é bang nghut lhê.

<sup>9</sup> Hau su mù, Hkrisduq gi, shi byuq bang eq asak dui bâng é Yhumsíng dut sháng gaq ga, shi hkám mù dum dui toq é nghut lhê.

<sup>10</sup> Haû mù, nàng gi, haî mù náng é gumang hpó lé jéyáng nyi lhê lhú? Haî mù náng é gumang hpó lé wú tiq



nyi lê lhu? Nga-nhung lunglhang bang gi, Garai Gasang é tarâ jéyang tangkuq hí má yap râ bang chyat nghut lê.

<sup>11</sup> Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hky-ihput hkanmó htuq râ nghut lê;

Garai Gasang lé, shô hkanmó èq yin yû kó râ nghut lê.' ga tai ri."☆

ga kê tô ri.

<sup>12</sup> Haû mù luî, nga-nhung yuq hkanmó gi, yhumsing kut lai lo é hkyô lé, Garai Gasang chyáng shit ra râ nghut lê.

<sup>13</sup> Haû nghut mù, nga-nhung gi, rayuq eq rayuq tarâ jéyang lhum é hkyô lé tô pyám sháng. Ó yuq nghut kôlhang, yhumsing é gumang é hkyowuî má, myit leqbat jowò eq htung htê jowò a to byi râ matú, myit sidiq keq.

<sup>14</sup> Haû Yhumsing Yesuq má nghut nyi é sù ngò gi, hai jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jing nyi lê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lê.

<sup>15</sup> Nang zô é zoshuq yanmai, nang é gumang hpó myit a ngón é nghut le gi, nang, chyitdap myit mai sô nyi é sù a nghut lo. Hkrisduq shî hkám byi bê sù nghut é, nang é gumang hpó lé, nang zoshuq é dong mai hkâlhoq hten pyám.

<sup>16</sup> Nang, ge ri nghû myit yu é hkyô lé, agè ashop é dong hkâtai pyám nhâng.

<sup>17</sup> Hkâsu mù gâ le, Garai Gasang é mingdán gi, zo zo shuq shuq hkyô a nghut é za, dingmán hkyô, nguóng hkyô eq Chyoiyung Woi-nyí má gabú é hkyô ru nghut lê.

<sup>18</sup> Hai mù gâ le, shí hkyô dong mai Hkrisduq lé dojaú é sù gi, Garai

Gasang ô nau é sù eq byu pê èq hkyá-ôn é hui sù nghut ri.

<sup>19</sup> Haû mù luî, nguóng hkyô má nyi râ eq, rayuq eq rayuq wum byi lhum râ hkyô lé, shikut nyi keq.

<sup>20</sup> Zoshuq é yanmai, Garai Gasang é muzó lé hkâlhoq hten pyám. Zoshuq lunglhang gi, sansêng é chyat nghut lê; nghut kôlhang, góyuq lé myit leqbat nhang é jung lé zô é sù gi, shut é nghut lê.

<sup>21</sup> Tsibiyiq wing shuq é eq sho zô é hkyô má nghut kôlhang, gotû hai jung kut é nghut kôlhang, nang é gumang hpó lé myit leqbat nhang é nghut le gi, a kut le je ge lê.

<sup>22</sup> Haû mù, haú pé eq séng luî, nang lumjing é hai nghut kôle, nang eq Garai Gasang gyoro má za joq nyi sháng gaq. Yhumsing ge lê gâ é èq, yhumsing gung yhumsing mara byi jang a joq é sù gi, hkungsô wó nyi ri.

<sup>23</sup> Nghut kôlhang, úng-âng é myit èq zô é nghut le gi, mara byi é hui ri, hai mù gâ le, yhang zô é gi, lumjing myit mai a nghut; lumjing myit mai a kut é hai nghut kôlhang, mara nghut ri.

## 15

### *Góyuq Lé Myit Ngón Nhâng Râ Hkyô*

<sup>1</sup> Lumjing hkyô má wum-o bo é nga-nhung gi, yhumsing myit ngón râ hkyô lé a ho é za, wum-o a bò bang é wum nyhóm hkyô lé, hkam jan byi nyi râ dut lê.

<sup>2</sup> Nga-nhung yuq hkanmó gi, yhumsing é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byi nyi sháng.

<sup>3</sup> Hkâsu mù gâ le, Hkrisduq lhang gi, Yhânggung yhang lhoq ngón é a nghut; haû gi, "Nang lé rhoi bang é dang gi, Ngá chyáng gyó ke bê nghut ri."☆ ga, kê tô é eq rajung za nghut ri.

<sup>4</sup> Hkâsu mù gâ le, lai lò bê hkûn kê tô é lunglhang gi, nga-nhung lé mhoq byi râ matú chyat kê tô é nghut lê; haû gi, Chyúmdang mâ é hkam jan hkyô eq myit wum byi hkyô dong mai,

nga-nhúng myit myoqbyù hkyô wó rá matú nghut lhê.

<sup>5</sup> Haù hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq;

<sup>6</sup> haù jáng sheq, nungmoq gi, i-myt rahkat eq nhut htê ralhum eq za, nga-nhúng é Yhumsîng Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó rá nghut lhê.

<sup>7</sup> Haù mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shíngkang lé lhoq htoq shit rá matú, nungmoq le, rayuq eq rayuq hap yu lhum keq.

<sup>8</sup> Hkâsu mù gà le, ngò, nungmoq lé taí kôlé, haù myìng hù é íchyí íwâ pé lé byî tô é danggidiq pé lé lhoq gíng rá matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri.

<sup>9</sup> Haù mù, Garai Gasâng é shogyo nhikmyin hkyo é yanmai, haù tûngbaù pé, Garai Gasang lé wó hkyá-on kungtôn kó rá nghut lhê. Haù hkyô gi,

"Haù mù luí, tûngbaù pé chyáng má, Nang lé, ngò hkyá-on rá nghut lhê;

Náng é myìng lé, ngò hkyá-on mahkôn rá nghut lhê."✧

ga kâ tô é eq rajung za nghut ri.

<sup>10</sup> Dum,

"Tûngbaù pé ê, Yhâng é byu pé eq rahá gabú nyi keq."✧

gâ tô ri.

<sup>11</sup> Dum,

"Nungmoq tûngbaù pé lhunglhâng bang ê, haù Yhumsîng lé hkyá-on keq, byù myû lhunglhâng bang ê, Yhang lé hkyá-on mahkôn hkôn keq."✧

gâ tô ashí nghut ri.

<sup>12</sup> Hau htoq agó, Esai-aq taí é gi,

"Yese é Amyít gi, yuq htoq lô luí, Yhang gi, byù myû chângjup é ahtoq má up rá sù nghut lhê;

tûngbaù pé gi, Yhang má myit myoqbyù kó rá nghut lhê."✧

gâ ri.

<sup>13</sup> Haù myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguingón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm eq, myit myoqbyù hkyô wó byíng mui nyi kó rá nghut lhê.

### *A Gyuq A Wam É Za, Poluq Laiká Kâ É Hkyô*

<sup>14</sup> Ngá é gumang wuì ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhúm é má kûng é bang nghut é lé, ngá gûng ngò yhang hkyak lumjíng lhê.

<sup>15</sup> Ngò gi, nungmoq lé dum lhoq pûn é dông, ahkyak é pé ra-am lé a gyuq a wám kâ kat bê nghut lhê.

<sup>16</sup> Hkâsu mù gà le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng eq hap yù gíng é hkungga wó dut kó sháng gaq ga, Garai Gasâng é gabú danglù lé hkô rá hkyangjong é wò dông, tûngbaù pé chyáng, Hkrisduq Yesuq é hpungmû wùn sù dut rá matú, Garai Gasang, ngo lé jeju byî é yanmai nghut lhê.

<sup>17</sup> Haù mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbùn nyi lhê.

<sup>18</sup> Ngò gi, ngò taí é eq zui saí é muzó dông le, haù Woi-nyí é a-tsam chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jino gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotû haí lé le wám taí é a nghut.

<sup>19</sup> Haù mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê.

20 Ngò hkâ-nhám le myit tuî nyi é hkyô gi, góyuq hi tô é apûn awang má dum a puq saî pyâm é za, Hkrisduq lé a sé shi é jowò má gabú danglù hko kyo rá hkyô nghut lhê.

21 Haû gi,

"Yhâng é hkyô lé, taî kyô é a hui shi é bang, myàng kó rá nghut luí, a wó gyô wú é bang, sê gyo kó rá nghut lhê."<sup>☆</sup>

ga kâ tô é eq rajung za nghut ri.

22 Haû mù luí, ngò, nungmoq chyáng lé jé rá lé, anum num hkyikyo luqlhum dut nyi é gi, muzó hau é yanmai nghut lhê.

### *Romaq Myuq Lé Ló Kum Râ Sôn É Hkyô*

23 Nghut kôlhang, ahkuí gi, shí mau pé má ngò zui saí rá jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

24 ngò, Sipin ming shut ló é hkûn, nungmoq chyáng wàng rá sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haû mai htugbang kat rá lé, ngò myoqbyu tô lhê.

25 Ahkuí, ngò kúm gi, Yerusalem wà mó má é sân-yúng bang lé dojaú rá matú, haû wâ shut e ló é hkyolat má nghut nyi lhê.

26 Hkâsu mù gâ le, Makedoni eq Ahkaia mau má é bang gi, Yerusalem wà mó má é sân-yúng bang chyáng má é myùng bang é matú, garúm chyunghuq hkyui tsing nau bùm bekô nghut ri.

27 Yhangmoq gi, haû su kut nau bùm bekô nghut ri, gè gè ga jáng, haû gi, yhangmoq chyín dap tô é dông ru nghut lhê. Hkâsu mù gâ le, haû Yudaq byu pé é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng rá chyín dap tô é dông nghut lhê.

☆ 15:21 Esai 52:15

28 Haû mù luí, ngò gi, muzó shí lhum ban kut mù, garúm chyunghuq shi lé, yhangmoq wó hap yù bê lé hkyak sê é htâng má, Sipin ming shut ló rá nghut mù, lai ló uchyang, nungmoq chyáng lé sô kum rá nghut lhê.

29 Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé rá nghut é lé, ngò sê lhê.

30 Gumang wui ê, ngá é matú Garai Gasâng chyáng kyûdung byí é dông, ngò wum kat yhang shikut é hkyô má nungmoq bo wàng lòm rá matú, nganhûng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum taî tsuq kat lhê.

31 Yuda mau má é a lumjîng bang chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haû má é sân-yúng bang hap yù gíng é wó dut rá matú kyû bo dung byi keq.

32 Haû jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yù rá nghut lhê.

33 Haû nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

## 16

### *Shi-kyám Dang*

1 Ngò gi, Kenhkrea noqkuq hpúng má é hpungtê, nga-nhûng é gu-nhá Hpobe lé, nungmoq chyáng shichyen byi kat lhê.

2 Nungmoq gi, sân-yúng bang kut gíng é eq rajung za, haû Yhumsîng má yhang lé hap yù luí, yhang rá tô é hkyô haî nghut kôle, yhang lé htugbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

3 Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

<sup>4</sup> Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé ban-shoq le, yhangnhik lé jeju bún lhê.

<sup>5</sup> Yhangnhik é yhûm má chôm huì zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

<sup>6</sup> Nungmoq é matú gyai yhang shikut wú bê sù nghut é Mariq lé bo shi-kyám byi keq.

<sup>7</sup> Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

<sup>8</sup> Haù Yhumsîng má, ngò chyitdap é sù, Ampliatu lé bo shi-kyám byi keq.

<sup>9</sup> Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

<sup>10</sup> Hkrisduq má chyam é hui mù, wó lúm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

<sup>11</sup> Ngá é buinùm Herudion lé bo shi-kyám byi keq.

Haù Yhumsîng má nghut nyi bê bang, Narkiso é yhumbyù wuì lé bo shi-kyám byi keq.

<sup>12</sup> Haù Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

<sup>13</sup> Haù Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

<sup>14</sup> Asunkritu, Hpelegon, Herme, Patroba, Herma eq yhangmoq eq rahá

nyi é gumang wuì lé, bo shi-kyám byi keq.

<sup>15</sup> Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

<sup>16</sup> Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé ban-shoq gi, nungmoq lé shi-kyám dang sang kat akô nghut ri.

<sup>17</sup> Gumang wuì ê, nungmoq é lumjîng hkyô má, nungmoq mhoq hkam yù bê nghut é mhoqshit hkyô eq shai lhûm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taí tsuq kat lhê. Yhangmoq lé koi pyám keq.

<sup>18</sup> Hkâsu mù gâ le, haù sù é bang gi, nga-nhûng é Yhumsîng Hkrisduq lé dojaù é bang a nghut é za, yhumsîng é wamdaù matú dojaù é bang nghut akô. Yhangmoq gi, myit nú-nhâm é bang lé, dang ngón dang nguì dông mhaù zô akô nghut ri.

<sup>19</sup> Nungmoq, jìno gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luí gi, nungmoq hpaqchyî bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

<sup>20</sup> Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyi sháng gaq ô.

<sup>21</sup> Ngá é mù zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wuì Luki, Yason eq Sosipata pé le, shi-kyám dang sang kat akô nghut ri.

<sup>22</sup> Laiká shî lé bo ká sù ngò Tertiu gi, haù Yhumsîng má nungmoq lé shi-kyám kat lhê.

<sup>23</sup> Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô.

<sup>24</sup> Nga-nhông é Yhumsîng Yesuq Hkrisduq é jeju gi, nungmoq lhunghâng bang eq rahá nghut nyî sháng gaq. Amen.\*

<sup>25</sup> Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôhang,

<sup>26</sup> ahkuî, ahtum abyuq é Garai Gasâng é hkunmó é yanmai, myiqh-toi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é,

<sup>27</sup> rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyî sháng gaq ô! Amen.

---

\* **16:24** Chyúmding ra-am má chyúmbun 24 shî a bo é nghut lhê.

## KORINHTUQ Pê Chyáng Hî Dàm Hun Kat é Laiká (1 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi,

<sup>2</sup> jowò hkangmó má nga-nhông é Yhumsîng Yesuq Hkrisduq é myîng lé lîng é bang eq rahá, chyoiyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq nguîngón hkyô gi, nungmoq chyáng ru joq nyî sháng gaq ô.

### *Hkrisduq É Yanmai Wó É Jeju*

<sup>4</sup> Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

<sup>5</sup> Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri.

<sup>6</sup> Haû gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

<sup>7</sup> Haû mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu lîng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut.

<sup>8</sup> Nga-nhông é Yhumsîng Yesuq Hkrisduq é buinyi má, nungmoq lé mara hûn râ hkyô a bò shoq, Hkrisduq gi, nungmoq lé, htáng shoq gingtîng nhang nyi râ nghut lhê.

<sup>9</sup> Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

### *Noqkuq Hpúng Má Gam Hkoq Lhûm É Hkyô*

<sup>10</sup> Gumang wui ê, nungmoq hkaû má gam hkoq lhûm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhang bang rayuq eq rayuq byin hpyé gohut huí nyi keq nghú, ngò, nungmoq lé, nga-nhông é Yhumsîng Yesuq Hkrisduq é myîng mai dúng tôngbán kat lhê.

<sup>11</sup> Ngá é gumang wui ê, Hkloe é yhûm byù wui gi, nungmoq hkaû má mabyoq htoq hkyô joq é lé, ngo lé hkyáng lo shit akô.

<sup>12</sup> Ngò haû su nghû taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

<sup>13</sup> Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é myîng mai wui-myhup hkâm yù kô é lhú?

<sup>14</sup> Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai,

<sup>15</sup> nungmoq ó yuq le, ngá é myîng mai wui-myhup hkâm yù bê nghû a wó taí é nghut mù, ngò, Garai lé jeju hkya-ôn lhê.

<sup>16</sup> (Stehpana é yhumbyù wui lé le, ngò wui-myhup hkâm byí é nghut lhê, haû mai lai luí gotú ó lé hkâm byí záng ashî laq, ngò a myit bun lo nghut ri.)

<sup>17</sup> Hkâsu mù gâ le, Hkrisduq, ngo lé nhang kat é gi, wui-myhup hkâm byi râ matú a nghut, gabú danglù hko kyo râ matú sheq nhang kat é ru nghut lhê; nghut kôhang, waxâng zô wui é hpaqchyî byéng-yá dang dông

hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

*Garai É A-tsam Eq Hpaqchyî Byéng-yá Gi, Hkrisduq*

<sup>18</sup> Hkâsu mù gà le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, dang-gang dut byuq ri; nghut kôlhang, hkyi yu é huî nyi bang nga-nhông é matú gi, Garai Gasâng é a-tsam nghut ri.

<sup>19</sup> Hkâsu mù gà le, Chyúmdang má kê tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."<sup>☆</sup>

ga ri.

<sup>20</sup> Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú?

<sup>21</sup> Hkâsu mù gà le, Garai Gasâng é hpaqchyî byéng-yá mai ga jang, mingkan zo wuî gi, yhumsing é hpaqchyî byéng-yá dông mai Garai Gasang lé a wó sé kê é yanmai, dang-gang gà pyám byi kê é mungdang lé hko kyô é dông lumjîng bang lé hkyi yù râ matú, Garai Gasang myit hpyit é nghut lhê.

<sup>22</sup> Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri.

<sup>23</sup> Nghut kôlhang, ngamoq gi, tapzîng má jén sat huî é Hkrisduq é hkyô lé hko kyô lhê. Haû gi, Yudaq byu pé é matú myit leqbat jowò eq tûngbaù pé é matú danggang dut byuq ri.

<sup>24</sup> Nghut kôlhang, Garai Gasâng eq ji yù huî é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri.

<sup>25</sup> Hkâsu mù gà le, Garai Gasâng é ngok hkyô gà é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gà é lháng gi, byu é wum-o htoq má je gyaú ri.

<sup>26</sup> Gumang wuî ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê.

<sup>27</sup> Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gà é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gà é lé hkyin yu é nghut lhê.

<sup>28</sup> Yhang gi, mingkân eq ahkyak tô é lé lhoq htên pyám râ matú, haî a nghut é lé le, mingkan mâ é aróng a bo é eq wú tiq pyám huî é lé le, hkyin yu é nghut lhê.

<sup>29</sup> Haû gi, ó yuq le, Yhâng é hí má a ge nghutbun râ matú nghut ri.

<sup>30</sup> Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyî byéng-yá dut bê nghut ri. Haû gi, nga-nhông é dingmán hkyô, chyoiyúng hkyô eq hkyi yù hkyô nghut ri.

<sup>31</sup> Haû mù luî, "Gumrong é sù gi, haû Yhumsîng má gumrông sháng gaq."<sup>☆</sup> ga kê tô é eq rajung za nghut ri.

## 2

*Woi-nyí Mai Lo É Garai Gasâng É Hpaqchyî Byéng-yá*

<sup>1</sup> Gumang wuî ê, ngò gi, Garai Gasang eq sêng é saksé hkyô lé nungmoq chyáng tái pyô râ matú jé lé é hkûn, dang tái kung é eq hpaqchyî byéng-yá mó bo é dông lé é a nghut.

<sup>2</sup> Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkanmó lé tô-myhí pyám râ nghú myit hpyit yú bê nghut lhê.

<sup>3</sup> Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê.

<sup>4</sup> Ngá é danglù eq ngò hko kyô é hkyô gi, hpaqchyí bo é eq mhuí yu é dang pé đông a nghut é za, Woi-nyí é a-tsâm eq nungmoq lé shit é đông ru nghut mù,

<sup>5</sup> nungmoq é lumjîng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

<sup>6</sup> Nghut kôlhang, ngamoq gi, myit ðing bê bang lé hpaqchyí byéng-yá đông nyo lhê; shí pyat lhê é hpaqchyí byéng-yá eq htên byoq nyi huí é shí pyat má é zaú wui é hpaqchyí byéng-yá đông kúm a nghut.

<sup>7</sup> Ngamoq taí é gi, haq tô é eq, ahkyíng nghu é lhang a joq shi mai nga-nhúng é hpungwup shingkang é matú Garai Gasang tô to byí é hpaqchyí byéng-yá nghut é, Garai Gasâng é zaú tô é hpaqchyí byéng-yá lé taí é ru nghut lhê.

<sup>8</sup> Shí pyat lhê é zau wui gi, hpaqchyí byéng-yá haú lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut.

<sup>9</sup> Nghut kôlhang, Chyúmdang má, "Ó yuq eq le a myang wú, ó yuq eq le a wó gyô wú, ó yuq eq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."\*

ga kê tô é eq rajung za nghut ri.

<sup>10</sup> Nghut kôlhang, Garai Gasang gi, haú hkyô lé, Yhâng é Woi-nyí đông nga-nhúng lé hpông shit bê nghut ri.

Woi-nyí haú gi, jung hkanmó lé ho gôn wú é nghut luí, Garai Gasâng é

zaú tô é hkyô lé lhang ho gôn wú é sù nghut ri.

<sup>11</sup> Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lhú? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut.

<sup>12</sup> Nga-nhúng gi, mingkân é woi-nyí lé hap yu tô é a nghut é za, Garai Gasâng eq nga-nhúng lé byí to bê jeju lé, ngamoq wó sê gyo râ matú, Garai Gasâng chyáng má é Woi-nyí lé sheq hap yu tô é ru nghut lhê.

<sup>13</sup> Haú mù luí, ngamoq gi, waxâng zô wui é hpaqchyí byéng-yá eq mhoq byí é dang đông taí é a nghut, Garaí é Woi-nyí eq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lhê.

<sup>14</sup> Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haú mù gâ le, haú pé gi, yhâng é matú ngok é hkyô nghut luí, woi-nyí hkyô đông mai haú hkyô lé a wú é yanmai, yhang gi, haú pé lé a wó sê gyo nghut ri.

<sup>15</sup> Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq eq le wó jéyáng é a nghut.

<sup>16</sup> Chyúmdang má, "Hkâsu mù gâ le, ó yuq wá, haú Yhum-sing é myit lé sé mù, Yhang lé wó mhoqshit wú é lhú?"\* ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

### 3

#### *Noqkuq Hpúng Má Gam Hkoq Lhâm É Hkyô*

<sup>1</sup> Gumang wui ê, hí hkûn, ngò gi, nungmoq lé, Woi-nyí eq sêng é bang lé đông wó taí é a nghut; mingkân eq sêng é bang đông nghut kômù, Hkrisduq má zonú su dut bang lé đông sheq taí wú é nghut lhê.



<sup>2</sup> Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.\* Ahkuí lháng, nungmoq gi, zoshuq apat lé a wó zo shi kó nghut ri.

<sup>3</sup> Nungmoq gi, mingkan eq sêng é bang ru nghut nyi ashî kó nghut ri. Hkâsu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wuî su nyi yap bum lhê a nghut kó luq?

<sup>4</sup> Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bùm kô é nghut jáng, nungmoq gi, mingkan zo wuî nghut nyi bum lhê a nghut kó luq?

<sup>5</sup> Apolo gi, ó wá nghut lhê? Poluq gi, ó wá nghut lhê? Nga-nhik gi, Garai é dui-nhâng zoshâng za nghut luí, ó le ó lé, haú Yhumsing èq hun tô é muzó eq rajung za wùn waq é nghut luí, nungmoq gi, ngá-nhik dông mai wó lumjúng kô é ru nghut lhê.

<sup>6</sup> Ngò gi, gabú danglù amyui lé hô kat, Apolo gi, wuî hpyun byi, nghut kôlhang, yuq kô lò nhang é gi, Garai Gasang za ru nghut lhê.

<sup>7</sup> Haú mù, amyui hô kat sù eq wuî hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê.

<sup>8</sup> Amyui hô kat sù eq wuî hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó râ nghut lhê.

<sup>9</sup> Hkâsu mù gà le, ngamoq gi, Garai Gasâng é mù zui luzúm wuî nghut lhê; nungmoq gi, Garai Gasâng é yò, Garai Gasâng é yhùm nghut nyi akô.

<sup>10</sup> Garai Gasang, ngo lé byi to bê jeju eq rajung za, yhùm saí kung sù rayuq dông, ngò gi, yhùm apûn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhang, yuq hkangmó gi, yhumsing

saí é má rago sidiq râ lhê.

<sup>11</sup> Hkâsu mù gà le, hi to gù nghut é, Yesuq Hkrisduq nghu é yhùm apûn awang mai lai luí, ó yuq le, gotû yhùm apûn awang lé wó saí é a nghut.

<sup>12</sup> Yhùm apûn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chùng mù saí jat kô é nghut jáng,

<sup>13</sup> yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haí mù luí gà le, haú Yesuq é Buinyi gi, haú lé byu-myàng nhâng mù, haú buinyi lé gi, myí èq lhoq htoq shit râ nghut lhê. Haú myí gi, yuq hkangmó saí é muzó hkasû é nghut é lé chyâm râ nghut lhê.

<sup>14</sup> Rayuq yuq saí é yhùm gi, ru gîng nyi é nghut jáng, haú yuq gi, yhang é shigyaú chyunghuq wó yú râ nghut lhê.

<sup>15</sup> Nghut kôlhang, yhùm haú nyé gyó byuq é nghut jáng, yhang gi, yhùm sùm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

<sup>16</sup> Nungmoq gi, Garai Gasâng é noqkuq yhùm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lú?

<sup>17</sup> Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haú yuq lé lhoq htên pyám râ nghut lhê. Hkâsu mù gà le, Garai Gasâng é noqkuq yhùm gi, chyoiyúng lhê; nungmoq gi, noqkuq yhùm haú nghut akô.

<sup>18</sup> Nungmoq gi, yhumsing gùng yhumsing hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng dông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê.

<sup>19</sup> Hkâsu mù gà le, mingkan shí mâ é hpaqchyí byéng-yá gi, Garai Gasâng é hí má ngok é hkyô nghut ri. Haú gi, "Garai Gasang gi, hpaqchyí byéng-yá bò bang lé, yhangmoq é hpaqchyí má

\* 3:2 Nungmoq lé naú byi huq é, gà é gi, lui é hkyô pé lé hí mhoq byi é lé gà lhê. ✧ 3:19 Yob 5:13

yhang myí to nhang ri."✧ ga kê tô é eq rajung za nghut ri.

<sup>20</sup> Hau htoq agó, "Haù Yhumsîng gi, hpaqchyí byéng-yá bò bang myit é hkyô pé akôm nghut é lé sê lhê."✧ ga le kê tô ri.

<sup>21</sup> Haù mù luí, ó yuq le, byù eq sêng é hkyô má gyáng é dang a tai kó sháng gaq! Lhunglhang gi, nungmoq é chyat nghut lhê.

<sup>22</sup> Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng má é hkyô le, banshoq gi, nungmoq é chyat nghut ri.

<sup>23</sup> Nungmoq gi, Hkrisduq é nghut akô; Hkrisduq gi, Garai Gasâng é nghut ri.

## 4

### *Hkrisduq É Lagyô Pé*

<sup>1</sup> Haù mù luí, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé tai pyô râ matú ap byí tô é hui bang dông sôn yù râ lhê.

<sup>2</sup> Haù dông nghut jáng, ap byí tô é hui bang gi, yhumsîng lhumzui hkyô lé saksé shit râ dut lhê.

<sup>3</sup> Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê.

<sup>4</sup> Haù mù gâ le, ngá gûng ngò mara a bò bûn é nghut kôlhang, haù gi, ngo lé wó lhoq sân-yúng byí é a nghut. Ngo lé jéyáng é sù gi, haù Yhumsîng nghut lhê.

<sup>5</sup> Haù mù, masat tô é ahkyíng a jé shimá haì lé le a jéyáng é za, haù Yhumsîng jé lé shoq, lánng nyí keq. Yhang gi, mauchut hkaù má haq tô é pé lé byu-myàng nhâng mù, byu pé é myit nhiklhum má lúng é hkyô lé lhoq htoq shit râ nghut lhê. Haù hkûn, yuq hkanngmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

<sup>6</sup> Gumang wui ê, ngò gi, "Kê tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghú, nungmoq é akyu é matú, ngò eq Apolo má haù pé lé yù mù dangtú kut é nghut lhê. Haù hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kô râ nghut lhê.

<sup>7</sup> Ó yuq wá, nang lé, góyuq eq shaí shoq kut lhê lhú? Nàng hap yu é a nghut le gi, wó râ lhú? Nàng, hap yu é nghut le gi, a hap yu é dông haì mù nghutbûn nyi lhê lhú?

<sup>8</sup> Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô!

<sup>9</sup> Nghut kôlhang, sat râ matú doq-dan huí é shúm byú pé lé su, Garai Gasang gi, lagyô pé nghut é ngamoq lé de de kut htoq shit bê nghú, ngò wó myit ri. Ngamoq gi, nyí mi-nyí, joq mijoj, maumang lagyô pé eq waxâng zô wui é hí má, wú kûn jung dông dut nhang é huí nyi gù bê nghut lhê.

<sup>10</sup> Ngamoq gi, Hkrisduq é yan-mai ngok é bang dông sôn yu é hui kôlhang, nungmoq kúm gi, Hkrisduq má hpaqchyí gyaí bo é bang dông dut bekô hung! Ngamoq gi, wum nyhôm é bang dông sôn yu é hui kôlhang, nungmoq kúm gi, wúm bo é bang dông dut bekô hung! Nungmoq gi, hkunggâ é huí akô; ngamoq kúm gi, hkunggâ é a hui hung!

<sup>11</sup> Shí hkyíng shí u jé shoq, ngamoq gi, zòmut wuìshit huí é, mebu ajeq amyhâ dut huí é, nhuq bat huí é, yhumsîng é nyi jowò a wó é bang nghut nyi lhê.

<sup>12</sup> Ngamoq gi, yhumsîng loq eq yhang mù zui wum kat nyi lhê. Ng-

amoq gi, nhing pyâm é hui jáng, shimân byi, zing-rî é hui jáng, jân pyám kut lhê.

<sup>13</sup> Ngamoq gi, lumù gansang é hui jáng, dang ngón dang nguî tû nyo lhê. Ngamoq gi, ahkuî jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huî nyi lhê.

<sup>14</sup> Ngò gi, nungmoq lé hoq lhoq hpu râ matú haú pé lé kâ é a nghut, ngá é chyitdap zo wuî lé dông lhoq pûn kying râ matú ru nghut lhê.

<sup>15</sup> Nungmoq gi, Hkrisduq má mhogshít bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haú gabú danglù dông mai, Hkrisduq Yesuq má nungmoq é îwa dut é nghut lhê.

<sup>16</sup> Haú mù luî, ngò kut é su cháng keq nghû, ngò, nungmoq lé lung kat lhê.

<sup>17</sup> Hau é yanmai, ngò gi, haú Yhumsîng má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byî é eq rajung za, nungmoq lé lhoq pun byi râ nghut lhê.

<sup>18</sup> Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri.

<sup>19</sup> Nghut kôlhang, haú Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haú hkûn, ngò gi, nghutbùn é byù haú bang haî taî é hkyô lé za a nghut, yhangmoq hai a-tsam wó é hkyô lé lé gôn htoq râ nghut lhê.

<sup>20</sup> Hkâsu mù gâ le, Garai Gasâng é mingdán gi, taî é dang má bo é a nghut, a-tsam má sheq ru nghut lhê.

<sup>21</sup> Nungmoq hkâ dông ô nau akô

lhú? Ngò gi, nungmoq chyáng, nuichûm hkat èq, a nghut jáng, chyitdap é eq nú-nhâm é myit mai lé lô ra râ lhú?

## 5

*Ashop É Dông Gungsho Zùm Yap É Hkyô Kut É Sù Lé Lhoq Htoq Pyám Râ Hkyô*

<sup>1</sup> Nungmoq chyáng, ashop é dông gungsho zùm yap é hkyô joq é lé, hkyak taî hû lò bekô; haú gi, a lumjîng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhûm nyi é hkyô nghut ri.

<sup>2</sup> Nghut kôle, nungmoq gi, nghutbùn nyi bum akô nhung! Haú dông a nghut é za, nungmoq gi, yón é myit tûn shit mù, haú su kut é byù lé, nungmoq é hpúng mai lhoq htoq pyâm le, a gè kó lhú?

<sup>3</sup> Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyî luî, gungdu jé nyi tô é dông mai, haú hkyô kut é sù lé jéyáng doqdan gù nghut lhê.

<sup>4</sup> Nungmoq gi, nga-nhûng é Yhumsîng Yesuq é myîng mai zup zing mù, ngá é i-myit gi, nungmoq eq rahá nghut nyî luî, nga-nhûng é Yhumsîng Yesuq é a-tsam le, nungmoq eq rahá nghut nyi é hkûn,

<sup>5</sup> byù haú yuq lé, Tsadán é loq má ap byî pyám keq.\* Haú jáng, Yhumsîng é buinyî má, yhang é woi-nyî gi, hkyi yu é hui râ matú, yhang é yubak gungsho gi, lhoq htên pyâm é hui râ nghut lhê.

<sup>6</sup> Nungmoq é nghutbùn hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lhú?

<sup>7</sup> Nungmoq gi, múnchi a bo é bang nghut nyî kô é eq rajung za, múnchi a bo é muk htung asik su wó dut kô sháng gaq, múnchi axau lé lhuî pyám keq. Hkâsu mù gâ le, nga-nhûng

\* **5:5** Tsadán é loq má ap byî pyám keq gâ é gi, hpúng byù wuî eq a zùm yap nhâng lo râ lé taî é nghut lhê.

† **5:6** Mún gâ é gi, yubak mara lé taî nau é nghut lhê. Lhoqlhai Poî jé jáng, Israelaq byu pé gi, yhangmoq wó é múnchi banshoq lé lhuî pyám mù, múnchi a bo é muk sai kô é nghut lhê.

é Lhoqlhai Poî sauzo, Hkrisduq gi, hkungga nhong é hui bê nghut lhê.

<sup>8</sup> Haû mù luî, nga-nhúng gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyô é muk nghut é, múnchi a bo é muk èq, Poî haû lé kut nyî sháng.

<sup>9</sup> Ashop é đông gungsho zùm yap é bang eq hkâzûm kó nghû, ngò, nungmoq lé, ngá é laiká má kâ kat byi bê nghut lhê.

<sup>10</sup> Nghut kôlhang, mingkan shî eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haû su ru nghut le gi, mingkan htoq shî mai nungmoq htoq ló byuq ra kô râ nghut lhê.

<sup>11</sup> Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuî, ngò, nungmoq lé kâ kat nau é nghut lhê. Haû sù é byù eq gi, rahá lhang hkâzo kó.

<sup>12</sup> Haû noqkuq hpúng shinggan mâ é bang lé jéyáng râ gi, ngò eq haî sêng lhê lhú? Nghut kôlhang, hpúng ahkaû mâ é bang lé nungmoq jéyáng râ dut lhê.

<sup>13</sup> Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haû agè agaú é sù lé, nungmoq chyáng mai lhoq htoq pyám keq."\* gâ tô ri.

## 6

### *Lumjîng Bâng Hkaû Má Jéyáng Lhûm É Hkyô*

<sup>1</sup> Nungmoq mâ é rayuq yuq gi, gumang góyuq eq dang-rhâng lhûm tô é nghut jáng, haû hkyô lé jéyáng nhâng râ matú, haû sân-yúng bâng é hí má taí râ malaí, Garai a wó bâng é hí má wám taí râ lhú?

<sup>2</sup> Haû sân-yúng bang gi, mingkan lé jéyáng râ nghut é hkyô lé, nungmoq a

sé kó lhú? Nungmoq gi, mingkan lé jéyáng râ bang nghut kôle nhîng, tiq é mù pé lé wó jéyáng é bang a nghut kó lhú?

<sup>3</sup> Nga-nhúng gi, maumâng pé lé jéyáng râ nghut é hkyô lé, nungmoq a sé kó lhú? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô!

<sup>4</sup> Haû mù luî, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kô râ lhú?

<sup>5</sup> Ngò, haû su nghû taí é gi, nungmoq lé hoq hpu nhâng râ matú nghut lhê. Lumjîng bâng chyáng dang-rhâng lhûm é hkyô lé wó jéyáng râ hpaqchyî luq shoq bo é byù, nungmoq chyáng rayuq lhang a nyì dut kô râ lhú?

<sup>6</sup> Nghut kôlhang, nungmoq gi, gumang yhangchang rayuq eq rayuq, a lumjîng bâng é hí má lhang rûng shok lhum akô nhung!

<sup>7</sup> Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lhang rû ge lhê a nghut kô lhú? Mhaú zô é huî le lhang rû gè lhê a nghut kô lhú?

<sup>8</sup> Nghut kôle, nungmoq yhang gi, mhaú zo kô é eq shut kô é nghut luî, haû gi, nungmoq é gumang wuî lé kut é nghut lhê.

<sup>9</sup> Agè agaú é bang gi, Garai Gasâng é mingdân mâ é shimân jeju a myang hkam yù kô râ nghut é hkyô lé, nungmoq a sé kó lhú? Hkâ-nâ nyì kó. Ashop é đông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le,

<sup>10</sup> hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdân mâ é shimân jeju lé myang hkam yù kô râ a nghut.

<sup>11</sup> Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é

\* 5:13 Tarâ Pun 17:7

Garai Gasâng é Woi-nyí eq Yhumsîng Yesuq Hkrisduq é myîng mai, mara hkyut san byî é, lhoq sân-yúng é eq chí sân pyám byî é hui bekô nghut ri.

### *Ashop É Đông Gungsho Zùm Yap É Hkyô*

<sup>12</sup> "Jung hkanmó kut râ ahkáng ngò wó lhê." Nghut kôlhang, jung hkanmó gi, akyû byî é a nghut. "Jung hkanmó kut râ ahkáng ngò wó lhê." Nghut kôlhang, haí jûng eq le ngo lé wó sing pyám râ a nghut.

<sup>13</sup> "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haû í jûng é lé lhoq htên pyám râ nghut lhê. Gungdu gi, ashop é đông gungsho zùm yap hkyô é matú a nghut é za, haû Yhumsîng é matú nghut mù, haû Yhumsîng gi, gungdû é matú nghut ri.

<sup>14</sup> Garai Gasang gi, Yhâng é a-tsâm èq, haû Yhumsîng lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê.

<sup>15</sup> Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haû nghut le nhîng, Hkrisduq é gungsho showui showang pé lé yû mù, shiwa myhî pé eq rading ralhûm za kut pyám nhâng kô râ lú? Hkânám le a ge dut nhâng!

<sup>16</sup> Shiwa myhî eq gungsho zum é sù gi, yhang eq gungsho ralhûm za dut bê hkyô lé, nungmoq a sé kô lú? Hkâsu mù gâ le, "Yhangnhik gi, gungsho ralhûm za dut kô râ nghut lhê."\* ga taí tô ri.

<sup>17</sup> Nghut kôlhang, haû Yhumsîng eq rading ralhûm za dut é sù gi, woi-nyí má Yhang eq ralhûm za dut bekô nghut ri.

<sup>18</sup> Ashop é đông gungsho zùm yap é hkyô lé koi pyám keq. Byû rayuq kut shut é gotû mara pé banshoq gi, yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù

gi, yhumsîng gùng lé mara shut é sù nghut ri.

<sup>19</sup> Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyí é Chyoiyúng Woi-nyí é noqkuq yhûm nghut é lé, nungmoq a sé kô lú? Nungmoq gi, yhumsîng gùng lé sing é bang a nghut.

<sup>20</sup> Hkâsu mù gâ le, nungmoq gi, ah-pau ralhûm byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggâ é hkyô shit nyí keq.

## 7

### *Myî Yu É Eq Sêng É Hkyô*

<sup>1</sup> Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri.

<sup>2</sup> Nghut kôlhang, ashop é đông gungsho zùm yap é hkyô gyai myô é yan-mai, yuqgè hkanmó gi, yhumsîng é myiwe wó râ lhê; myiwe hkanmó gi, yhumsîng é yuqgè wó râ lhê.

<sup>3</sup> Haû yhumsîng hpó gi, wò joq é eq rajung za, yhâng yhumsîng myhí eq zùm sháng gaq; haû đông za, yhumsîng myhí le, yhâng yhumsîng hpó eq zùm sháng gaq.

<sup>4</sup> Haû yhumsîng myhî é gungdu gi, yhânggùng yhang za sêng é a nghut, yhâng é yhumsîng hpó eq le sêng lhê. Haû eq rajung za, yhumsîng hpô é gungdu gi, yhânggùng yhang za sêng é a nghut, yhâng é yhumsîng myhí eq le sêng lhê.

<sup>5</sup> Nungmoq myit huí lhum luí, kyûdûng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsîng gùng lé a wó hkan é yanmai, Tsadán èq gunglaú é a hui kô sháng gaq, ahkyíng ayoq haû lai jáng, rahá dum zùm keq.

<sup>6</sup> Ngò, haû su nghû taí é gi, hkunmó hkyô é đông a nghut, ahkáng byî kat é đông ru nghut lhê.

<sup>7</sup> Byû banshoq bang gi, ngò su nyí râ lé ô nau ri. Nghut kôlhang, yuq

\* 6:16 Apûn 2:24

hkanqmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

<sup>8</sup> Ahkuí, myiwe a yù lô é bang eq chuimó pé lé ngò taí kôlé, ngò su, haú dông jâng nyi pyám kô é nghut le, yhangmoq é matú ge é hkyô nghut ri.

<sup>9</sup> Nghut kôlhang, yhumsing gùng lé a wó hkâng kô é nghut le gi, yhangmoq, myi yù myi ló râ lhê; hkâsu mù gâ le, myi su nyé luí ô nau nyi râ malaí, myi yu myi ló le je ge lhê.

<sup>10</sup> Myi yù bê bang lé, ngò, hkunmó hkyó kôlé, shí gi, ngò dông hkyô é a nghut, Yhumsing chyáng mâ é ru nghut lhê: Yhumsing myhí gi, yhâng é yhumsing hpô chyáng mai a ge gang râ nghut lhê.

<sup>11</sup> Nghut kôlhang, yhang gâng é nghut jáng, myi a dum ló é za nyi râ lhê, haú a nghut jáng, yhâng é yhumsing hpó eq dum xoq yù râ lhê. Yhumsing hpó le, yhâng é yhumsing myhí lé a ge kâng pyám râ nghut lhê.

<sup>12</sup> Góbang lé ngò shí su nghú taí kôlé, shí gi, Yhumsing chyáng mâ é a nghut, ngò dông mai taí é ru nghut lhê. Gumang rayuq yuq gi, lumjínq sú a nghut é yhumsing myhí wó é nghut le, myiwe haú, yhang eq rahá nyi nau é nghut jáng, yhang lé a ge kâng pyám râ nghut lhê.

<sup>13</sup> Myiwe rayuq gi, lumjínq sú a nghut é yhumsing hpó wó é nghut le, yuqgè haú, yhang eq rahá nyi nau é nghut jáng, yhang eq a ge gang râ nghut lhê.

<sup>14</sup> Hkâsu mù gâ le, haú a lumjínq sú yhumsing hpó gi, yhâng yhumsing myhí dông mai lhoq sân-yúng é hui bê nghut mù, a lumjínq sú yhumsing myhí le, lumjínq sú nghut é yhâng é yhumsing hpó dông mai lhoq san lhoq yúng é hui bê nghut ri. Haú a nghut jáng, nungmoq é zo wui gi, a sanséng dut kô râ nghut lhê; nghut kôlhang, yhangmoq gi, haú dông mai, chyoiyúng bekô nghut ri.

<sup>15</sup> Nghut kôlhang, haú a lumjínq sú gâng ló naú jáng gi, gâng ló sháng gaq. Lumjínq é yuqgè nghut nghut, myiwe nghut nghut, haú sú é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nuingón shoq nyi sháng gaq ga ji yù bê nghut lhê.

<sup>16</sup> Yhumsing myhí ê, náng é yhumsing hpó lé wó hkyi yù râ nghú, hkâsu wó sé râ lhú? Yhumsing hpó ê, náng é yhumsing myhí lé wó hkyi yù râ nghú, hkâsu wó sé râ lhú?

<sup>17</sup> Hká dông nghut kôlhang, yuq hkanqmó gi, Garai Gasang, yhang lé ji yu tô é hkûn, haú Yhumsing mai yhang lé nyi nhang tô é dông asak dui nyi râ lhê. Haú gi, noqkuq hpúng pé banshoq má ngò tô to byí é tarâ nghut lhê.

<sup>18</sup> Byù rayuq gi, ji yu é hui é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sú dông a dut byuq sháng gaq. Byù rayuq gi, ji yu é hui é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq.

<sup>19</sup> Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lhê.

<sup>20</sup> Yuq hkanqmó gi, yhang lé Garai Gasâng èq ji yu é hkûn lhê su xoq nyi nyi râ lhê.

<sup>21</sup> Nàng gi, ji yù hui é hkûn jùn dut nyi é lhú? Haú hkyô lé hkâ-myit chiq. Nghut kôlhang, náng gi, luthkyô wó yu é nghut jáng, haú dông nyi aq.

<sup>22</sup> Hkâsu mù gâ le, haú Yhumsing èq ji yu é hui é hkûn, jùn dut nyi é sú gi, haú Yhumsing èq lhoq lhut yu é byù nghut bê. Haú eq rajung za, ji yu é hui é hkûn, luthkyô wó é sú gi, Hkrisduq é jùn nghut ri.

<sup>23</sup> Nungmoq gi, Garai Gasâng èq ah-pau byi mù wui hpyit yu é hui bê bang nghut akô. Haú mù, byu pé é jùn hkâdut kó.

<sup>24</sup> Gumang wui ê, yuq hkanqmó gi, yhumsing lé Garai Gasâng èq ji yu é

huí to bê dông, Yhâng é hí má xoq nyi nyi râ lhê.

<sup>25</sup> Ahkuí, zomyi zorâm wui é hkyô taí kôlé. Haû Yhumsing chyáng mã é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sù rayuq nghut nyi é dông, ngò, nungmoq lé hkyô shít râ nghut lhê.

<sup>26</sup> Ahkuí hui zô é wuîhke hkyo é yanmai, nungmoq gi, yhumsîng nyi to é su xoq nyi nyi le je ge ri nghú, ngò wó myit ri.

<sup>27</sup> Nàng, myiháng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhò lo.

<sup>28</sup> Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haû mai hkyi yù nau ri.

<sup>29</sup> Gumang wui ê, ngò taí nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq.\*

<sup>30</sup> Yón ngaû huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su;

<sup>31</sup> haû mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gà le, shí mingkân é ahkui lhê é azòng isâm gi, laí ló nyi é nghut lhê.

<sup>32</sup> Ngò gi, nungmoq lé a myit myo nhâng nau. Myi a yù shí é sù gi, haû Yhumsîng lé hkâsu wó gabú nhâng râ matú, haû Yhumsing é muzó lé myit chiq nyi ri.

<sup>33</sup> Nghut kôlhang, myi yû bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri.

<sup>34</sup> Haû mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq

woi-nyí má haû Yhumsîng lé rago wó ap nóng râ matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri.

<sup>35</sup> Ngò, haû su nghú taí é gi, nungmoq é matú ge é hkyô nghut lhê; nungmoq lé tara eq zuí zing é a nghut é za, myit a byò lo shoq Yhumsîng lé wó ap nóng râ matú, jô é dông asak wó duí kô sháng gaq nghu é hkyô ru nghut lhê.

<sup>36</sup> Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngàm jáng, myiwe haû asak kô lo nyi mù, hâng yù râ dut bê nghú myit é nghut le gi, yhang ô nau é dông kut sháng gaq. Yhang mara kut é a nghut. Yhang-nhik gi, hâng lhum râ lhê.

<sup>37</sup> Nghut kôlhang, yhang gi, haú hkyô lé yhâng é myit mai wó lhoq zîm pyâm é nghut mù, yut yut ô nau hkyo é ahkaû má a nghut é za, yhumsîng ô nau é hkyô lé wó hkûm zing pyâm é sù nghut luí, haû zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri.

<sup>38</sup> Haû mù luí, zomyi gyíng haû lé hâng yu é sù gi, jô é hkyô kut bê nghut ri; nghut kôlhang, zomyi gyíng haû lé a hâng yu é sù gi, je ge é hkyô kut bê nghut ri.

<sup>39</sup> Myiwe rayuq gi, yhâng é yhumsîng hpó rú dui nyi nyi, yhang eq xoq tô ashí nghut lhê. Nghut kôlhang, yhâng é yhumsîng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haú yuq gi, Yhumsîng eq séng é sù dut râ lhê.

<sup>40</sup> Ngò jéyáng é dông ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghú wó myit ri.

\* 7:29 A wó é bang dông nyi kó sháng gaq gà é gi, Garaí mù lé je myit zuq nyi sháng gá nau é nghut lhê.

## 8

*Hparà Lhò Lé Tíng Byî É Zoshuq*

<sup>1</sup> Ahkuî, hparà lhò pé lé tíng byî é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê.

<sup>2</sup> Byù rayuq yuq gi, rajung jung lé sé bún é nghut le, yhang sé âng é lé lhang a sé shi nghut ri.

<sup>3</sup> Nghut kôlhang, Garai Gasang lé chyitdap é sù gi, Garai Gasang eq sé é sù nghut ri.

<sup>4</sup> Haú mù luí, hparà lhò pé lé tíng byî é zoshuq lé zô é eq séng luí gi: hparà lhò gi, mingkan má haí lhang a nghut é hkyô lé le, Garai Gasang gi, Yhang rayuq mai lai luí gotû a nyi é lé le, nga-nhúng sê lhê.

<sup>5</sup> Hkâsu mù gà le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang

<sup>6</sup> nga-nhúng é matú gi, Íwa nghut é Garai Gasang rayuq za nyi é nghut mù, lunglhang gi, Yhang mai hpan é nghut luí, nga-nhúng gi, Yhang é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

<sup>7</sup> Nghut kôlhang, yuq hkanmó gi, haú hkyô lé sê gam hkoq yu é a nghut. Ra-am gi, ahkuî jé shoq hparà lhò pé má mán byuq kô é yanmai, haú sù é zoshuq lé yhangmoq zô é hkûn, hparà lhò lé tíng byî é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bún akô nghut ri.

<sup>8</sup> Nghut kôlhang, zoshuq gi, nga-nhúng lé, Garai Gasang shut shuí chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

<sup>9</sup> Haú su ga kôlhang, nungmoq a htung a htê zô é hkyô gi, lumjing myit wum nyhôm bang é matú myit leqbat jowò a dut shoq sidiq keq.

<sup>10</sup> Hkâsu mù gà le, sumsé hpaqchyî wó é bang nungmoq gi, hparà lho é noqkuq yhôm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jang, hparà lhò pé lé tíng byî é zoshuq lé, yhang wám zo rá lé wum byî é a dut kô rá lú?

<sup>11</sup> Haú mù, Hkrisduq shí hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî eq lhoq htên pyâm é hui berâ nghut lhê.

<sup>12</sup> Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô.

<sup>13</sup> Haú mù luí, ngò zô é gi, ngá é gumang hpó lé mara kut shut nhang é nghut jang, yhang lé myit a leqbat nhang shang gaq, ngò, hkâ-nhám le, sho lé a zo lo rá nghut lhê.

## 9

*Lagyo Rayuq É Ahko Ahkáng*

<sup>1</sup> Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhúng é Yhumsing Yesuq lé myang wú bê sù, a nghut lú? Nungmoq gi, haú Yhumsing má, ngò zui sai é muzó é ashi pé chyat, a nghut kô lú?

<sup>2</sup> Ngò gi, góbang chyáng lagyo a nghut kôlhang, nungmoq chyáng gè gè nghut lhê! Hkâsu mù gà le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

<sup>3</sup> Ngá ahtoq má jéyang bang lé, ngá gùng ngò tai hung kat kôlé.

<sup>4</sup> Ngamoq gi, zo rá shuq rá ahko ahkáng a wó é bang nghut lhê lú?

<sup>5</sup> Gotû lagyo pé eq Yesuq é yhanggu yuqzô pé eq Kehpa kut é su, lumjing sù nghut é yhumsing myhí shuí chùng



râ, ngamoq, ahko ahkáng a wó é nghut lhê lú?

<sup>6</sup> Ngò eq Barnaba baú za, asak dui hkyô é matú mù zui ra râ lú?

<sup>7</sup> Ó yuq wá, yhumsing zoshuq wùn luí, gyè mù wùn waq râ lú? Ó yuq wá, tsibiyiq hkyâm saí mù, haú mâ é tsibiyiq shi a zo kut râ lú? Ó yuq wá, sau rêm mù, sau naú a shuq kut râ lú?

<sup>8</sup> Ngò gi, shí hkyô pé lé xângzo hkyam đông za taí é nghut lhê lú? Haú tarâ má le, rajung za taí tô lhê, a nghut lú?

<sup>9</sup> Hkâsu mù gâ le, haú Mosheq é tarâ má, "Guq nâng nyi é no lé nhuttsung hkâ-tsûng to byi." ✧ ga kê tô ri. Garai Gasang gi, no eq séng luí za chiq é nghut lhê lú?

<sup>10</sup> Gè gè yhang, yhang gi, nga-nhûng é matú taí é a nghut kô lú? Nghut lhê, haú gi, nga-nhûng é matú kê to byi é nghut lhê. Haí mù gâ le, yò hpuq sù, yò hpuq é eq, guq bat sù, guq bat é gi, kyô chòm shù yù râ lé myoqbyù luí, kut kô é nghut lhê.

<sup>11</sup> Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shù yu é nghut jáng, lûm myô é dut byuq bekô lú?

<sup>12</sup> Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kô lú?

Nghut kôlháng, ngamoq gi, ahko ahkáng haú lé a yu é nghut lhê. Haú yù râ malaí, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê.

<sup>13</sup> Haú noqkuq yhûm má mù zui é bang gi, yhangmoq é zoshuq lé haú noqkuq yhûm maí wó é hkyô eq, hkungga gyap má dojaú é bang gi, hkungga gyap má nhông byi é ra-am lé myàng zô é hkyô lé, nungmoq a sé kô lú?

<sup>14</sup> Haú eq rajung za, gabú danglù hko kyô é bang gi, gabú danglù hkyô

mai yhangmoq é asak baú râ lhê ga, haú Yhumsing hkunmó hkyô to bê nghut ri.

<sup>15</sup> Nghut kôlháng, ngò gi, ahko ahkáng haú pé haí lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kê é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyâm byi râ htoq má, ngò shi byuq le lháng je ge ri.

<sup>16</sup> Nghut kôlháng, gabú danglù lé ngò hko kyô é hkûn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó râ nghut lhê.

<sup>17</sup> Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lûm luí ap tô é lé, agon za wùn waq nyi é dut râ nghut lhê.

<sup>18</sup> Haú mù luí, ngá é shigyaú chyunghuq gi, haí nghut lhê lú ga jang, haú gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

<sup>19</sup> Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê.

<sup>20</sup> Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaú má nyi sù a nghut kôlháng, tarâ hkaú mâ é bang lé shuí lhing yù râ matú, tarâ hkaú má nyi bâng chyáng nghut nyi é hkûn, tarâ hkaú mâ é byù rayuq đông dut nyi lhê.

<sup>21</sup> Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lhê. Nghut kôlháng, gè gè ga jáng, Garai Gasang é tarâ mai a lut htoq é za, Hkrisduq é tarâ hkaú má nyi sù nghut lhê.

<sup>22</sup> Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lê. Ngò gi, wó dut é hkyô dông mai byù ra-am lé wó hkyî sháng gaq nghû, byù lhunglhang bâng chyáng, byù ajà jà dông nyi nyi lê.

<sup>23</sup> Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yan-mai haú pé banshoq lé kut é nghut lê.

<sup>24</sup> Din shingjóng poí má din râ bang banshoq din kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú din keq.

<sup>25</sup> Sup poí má shingjóng lhûm é bang yuq hkangmó gi, yhumsing gùng yhumsing tarâ htan é dông lhoq mhân yù râ lê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gingting nyi râ nghut é janmaú wó râ matú shikut é nghut lê.

<sup>26</sup> Haú mù luí, ngò gi, jum dân din é byù rayuq su din é sù a nghut. Ngò gi, lai lé bat é byù rayuq su, akôm má bat é sù le a nghut.

<sup>27</sup> Ngò gi, góbâng chyáng mungdang hko é htâng má, ngá gûng ngò, shigyaú chyunghuq eq a gingdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lê.

## 10

### *Israelaq Pé É Labaú Mai Sidiq Byî É Hkyô*

<sup>1</sup> Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lê; hí hkûn, nga-nhúng é íchý íwa pé banshoq bang gi, mhutdûm ô má nyi mù, Nhões Nè mai wó lai byit kô é nghut lê.\*

<sup>2</sup> Yhangmoq banshoq bang gi, mhutdûm eq Nhões Nè má, Mosheq

é chángzô pé dông baptisma hkam yu é bang chyát nghut bekô.

<sup>3</sup> Yhangmoq banshoq bang gi, rajung zâ é woi-nyí zang zo kô é eq,

<sup>4</sup> rajung zâ é woi-nyí wui shuq kô é nghut lê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lê; luqbum mó haú gi, Hkrisduq nghut bê.

<sup>5</sup> Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

<sup>6</sup> Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri.

<sup>7</sup> "Byu pé gi, zùng mù, zo luí shuq luí, a lumjîng bang kut é dông, toq mù, ye bum akô."\* ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kô.

<sup>8</sup> Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lê.

<sup>9</sup> Yhangmoq mâ é ra-am gi, haú Yhumsing lé chyâm luí, lhangmui pé eq hte sat é huí bùm kô é su, haú Yhumsing lé, nga-nhúng gi, a ge chyâm râ nghut lê.

<sup>10</sup> Yhangmoq mâ é ra-am gi, nhutluq shô-myo kôluí, lhoq htên é maumâng eq sat pyâm é hui kô é su, nungmoq gi, nhutluq shô-myo hkâkut kô.

<sup>11</sup> Yhangmoq chyáng wú yú râ azòng dông haú pé dut htoq luí, ló htáng râ ipyat pé má nyi âng to bang nga-nhúng é matú sidiq byi râ dông kâ to bê nghut ri.

<sup>12</sup> Haú mù luí, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq!

\* **10:1** Bun zo ralhûm mai raxê lhûm gi, Htoq Lô Laiká má bo é Mosheq htâng cháng bâng é hkyô lé kâ tô é nghut lê. ✨ **10:7** Htoq Lô 32:6

13 Byu chyáng htoq sê é gunглаú hkyô za nungmoq hui râ nghut lhê. Garai Gasang gi, lhumzui sê nghut lhê mù, nungmoq a wó jân é gunглаú hkyô lé hui nhâng râ a nghut. Nghut kôlhang, nungmoq gunглаú hui é hkûn, Yhang gi, haû lé nungmoq wó jan râ matú, hkyô htong byi râ nghut lhê.

### *Hparà Lhô Noq Hkyô Lé Koi Pyám Râ Hkyô*

14 Haû mù luî, ngò chyitdap é luzúm wui ê, hparà lhô noq hkyô lé koi pyám keq.

15 Nhik gying bang lé ngò taî lhê; ngò haî taî nyi é hkyô lé nungmoq gùng myit sôn yù keq.

16 Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lhú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kó lhú?

17 Haî mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haû rahtung zâ é muk lé chôm gàm zô é bang chyat nghut lhê.

18 Israelaq byu pê é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lhú?

19 Hparà lhô, a nghut jáng, hparà lhô lé tîng byi é hkungga gi, rajung jung nghut lhê nghû, ngò taî é lhú?

20 Haû su taî é a nghut, a lumjîng bâng é hkungga gi, Garai Gasang lé nhông byi é a nghut, nat gâng pé lé tîng byi é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê.

21 Nungmoq gi, haû Yhumsing é góm lé le, nat gâng pé é góm lé le, ge shuq râ a nghut; nungmoq gi, haû Yhumsing é zangbó má le, nat gâng pé é zangbó má le, rahá ge bo lôm râ a nghut.

22 Nga-nhúng gi, haû Yhumsing lé manôn nhâng nau é bang dut râ a nghut kó lhú? Nga-nhúng gi, Yhâng htoq je wúm bo é bang nghut lhê lhú?

### *Lumjîng Su É Luthkyô*

23 "Jung hkangmó kut râ ahkáng wó lhê." nghut kôlhang, jung hkangmó gi, akyû wó é a nghut. "Jung hkangmó kut râ ahkáng wó lhê." nghut kôlhang, jung hkangmó gi, byù lé wó kô làm nhang é a nghut.†

24 Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

25 Sho ùng gài má ùng é haî lé lé, ùng-âng é myit èq a myi gôn é za zo keq.

26 Hkâsu mù gâ le, "Myidàm htoq eq haû má joq é jung hkangmó gi, Yhumsing é chyat nghut lhê."☆ gâ tô ri.

27 A lumjîng bang ra-am, nungmoq lé zang zo jì mù, nungmoq ê nau é nghut jáng, ùng-âng é myit èq a myi gôn é za, nungmoq hí má to byi é gû lé zo keq.

28 Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit ùng-âng é yanmai le, haû lé hkâzo kó.

29 Ùng-âng é myit haû gi, nungmoq é a nghut, góyuq é ùng-âng é myit lé taî nau é ru nghut lhê. Ngá é luthkyô lé, haî mù góyuq é ùng-âng é myit èq jéyáng é hui nhang lhê lhú?

30 Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

31 Haû mù luî, nungmoq zo kôlhang, shuq kôlhang, haî kut kôlhang, Garai Gasang é hpungwup shingkâng é matú chyat kut keq.

32 Ngò gi, yuq hkangmó lé, hkyô hkangmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik

† 10:23 Bun zo 23 mã é danggho gi, Korinhtuq byu pé lhaq taî é dang nghut lhê. ☆ 10:26 Hkya-on 24:1

byu pé lé nghut nghut, Garai Gasâng é noqkuq hpúng má é byù lé nghut nghut, ó yuq lé le myit hkâleqbat nhâng kó.

<sup>33</sup> Hkâsu mù gâ le, ngò gi, yhang-moq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

## 11

<sup>1</sup> Ngò gi, Hkrisduq é alik châng é su, nungmoq gi, ngá é alik cháng keq.

### *Noqkuq É Má Htap Htuk Râ Hkyô*

<sup>2</sup> Nungmoq gi, hkyô hkanmó má ngo lé bûn nyi kô é yanmai le, nungmoq lé ngò lhai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

<sup>3</sup> Ahkuí, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

<sup>4</sup> Yuqgè hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoi pyâm é nghut bê.

<sup>5</sup> Myiwe hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoi pyâm é nghut bê. Haû gi, yhâng é ulhum lé wuq pyâm é eq rajung za nghut ri.

<sup>6</sup> Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra râ nghut lhê.

<sup>7</sup> Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqge é hpungwup shingkang nghut ri.

<sup>8</sup> Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.\*

<sup>9</sup> Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê.

<sup>10</sup> Haû nghut é yanmai le, mau-mang lagyo pê é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

<sup>11</sup> Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê.

<sup>12</sup> Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkanmó gi, Garai Gasang mai lo é nghut lhê.

<sup>13</sup> Myiwe rayuq, ulhum a nghop é za Garai Gasang lé kyûdûng é gi, htuk kô râ lú? Nungmoq, yhumsing gung é matú doqdân yù keq.

<sup>14</sup> Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle,

<sup>15</sup> myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglí eq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop râ zè đông yhang lé byi tô é nghut lhê.

<sup>16</sup> Rayuq yuq, haû hkyô lé taî dang-rháng nau é nghut jáng, ngamoq chyáng le, Garai Gasâng é noqkuq hpung pê chyáng le, gotû htûngli a joq é nghut lhê.

### *Yhumsing É Myinzang*

<sup>17</sup> Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

<sup>18</sup> Sâng-hi má, noqkuq hpúng ralhum đông nungmoq zup zîng é hkûn, nungmoq hkaû má gam hkoq hkyô

\* 11:8 Apûn 2:21-23

joq é lé wó gyô é nghut luî, têng é le bò râ nghû, ngò lumjínghê.

<sup>19</sup> Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê.

<sup>20</sup> Nungmoq rahá zup zing kô é hkûn, nungmoq gi, haû Yhumsing é myinzang zô é a nghut kó.

<sup>21</sup> Hkâsu mù gâ le, nungmoq zô é hkûn, góyuq lé le a lángh é za, ó le ó hí yù zô akô. Haû mù, rayuq gi, zo mut huî nyì, góyuq gi, shuq wut to dut akô nghut ri.

<sup>22</sup> Nungmoq gi, zo jang shuq jang yhûm a wó bang nghut akô lhú? Garai Gasang é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû tai kó râ lhú? Haû pé é yanmai, ngò, nungmoq lé hkyon râ lhú? Ratsui lhang a wó dut!

<sup>23</sup> Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê: Haû Yhumsing Yesuq gi, Yhang lé ap pyám huî é myin má, muk lé yù mù,

<sup>24</sup> jeju hkyâ-ôn é htang má, haû lé myhik hpé mù, tai é gi, "Shi gi, nungmoq é matú Ngá é gungsho nghut lhê; Ngo lé bûn nyì râ matú, shi su kut nyi keq." gâ ri.

<sup>25</sup> Haû eq rajung za, myinzang bàn zô é htang má, Yhang gi, góm lé le yù mù, "Góm shi gi, Ngá é sui mâ é dangshikaq asik nghut lhê; hkâ-nhám le, nungmoq shi shuq é hkûn, Ngo lé bûn nyì râ matú shi su kut keq." gâ tai ri.

<sup>26</sup> Hkâsu mù gâ le, nungmoq gi, muk shi lé zo luî, góm shi lé shuq é hkangmó, haû Yhumsing shi hkâm é hkyô lé, Yhang jé lé shoq, shit kyô nyi râ lhê.

<sup>27</sup> Haû mù luî, ó yuq nghut kôle, a gingdán é đông Yhumsing é muk haû lé zo mù, góm haû lé shuq é nghut jang, haû Yhumsing é gungdu eq sui lé shut é mara wó bê nghut lhê.

<sup>28</sup> Haû mù, ó yuq le, muk zo góm shuq râ hí má, yhumsing gung

yhumsing jep wú ra râ nghut lhê.

<sup>29</sup> Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jang, yhanggung yhang mara zô bò shuq bo yu é nghut lhê.

<sup>30</sup> Haû nghut é yanmai, nungmoq mâ é byù myo myo gi, wum nyhôm é, nõhpyo huî é nghut bum akô. Ra-am gi, shi ló byuq bekô nghut ri.

<sup>31</sup> Nghut kôhang, nga-nhung gi, yhumsing gung yhumsing hí sôn sê yu é nghut jang tarâ jéyang é hui râ a nghut.

<sup>32</sup> Nga-nhung gi, mingkan eq rahá, mara byi é a hui zo shang gaq ga, nga-nhung lé haû Yhumsing eq jéyang é hkûn, nga-nhung gi, mhoqshit é huî nyi gù bê nghut lhê.

<sup>33</sup> Haû mù luî, ngá é gumang wui ê, nungmoq gi, zo râ nghû rahá zup zing é hkûn, rayuq eq rayuq lángh lhum keq.

<sup>34</sup> Nungmoq rahá zup zing é hkûn, jéyang é a hui zo kó shang gaq, rayuq yuq zòmut é nghut jang, yhûm má zô chûng râ lhê.

Gotu myit tô é hkyô pé gi, ngò jé lé é hkûn sheq shit kyo râ nghut lhê.

## 12

### *Woi-nyí Hkyô Eq Sêng É Chyunghuq Pé*

<sup>1</sup> Gumang wui ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

<sup>2</sup> Nungmoq gi, a lumjíngh bang nghut nyi kô é hkûn lé, dang a nyo é hparà lhô noq râ matú hkyô shui nghoq é hui kô é hkyô lé, nungmoq sê lhê.

<sup>3</sup> Haû mù luî, "Yesuq gi, nhing pyám é hui shang gaq." ga, Garai Gasang é Woi-nyí mai tai é byù ó yuq le a nyi é eq, haû Chyoiyung Woi-nyí mai za a nghut jang, "Yesuq gi, Yhumsing nghut lhê." ga, ó yuq le a wó tai é nghut lhê nghû, ngò, nungmoq lé tai kyô é nghut lhê.

<sup>4</sup> Woi-nyí hkyô eq sêng é chyunghuq ajung jung joq lhê; nghut

kôlhang, Chyoiyúng Woi-nyí mai chyat nghut lhê.

<sup>5</sup> Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê.

<sup>6</sup> Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haú pé banshoq lé kut é nghut lhê.

<sup>7</sup> Woi-nyí é hpông shit hkyô gi, byù pé é gè hkyô matú, yuq hkanmó lé byi bê nghut ri.

<sup>8</sup> Rayuq lé gi, Woi-nyí haú mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri;

<sup>9</sup> góyuq lé gi, Woi-nyí hau èq, lumjínng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri;

<sup>10</sup> dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri.

<sup>11</sup> Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkanmó lé haú pé tsing gàm byí é nghut ri.

### *Gungbun Myo Kôlhang, Ra Gùng Za*

<sup>12</sup> Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú dông nghut ri.

<sup>13</sup> Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

<sup>14</sup> Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

<sup>15</sup> Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

<sup>16</sup> Dum, haú nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

<sup>17</sup> Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú?

<sup>18</sup> Nghut kôlhang, Garai Gasang gi, gungsho showui showang hkanmó lé, Yhang dut nhâng nau é eq rajung za, gungdu má kut to bê nghut ri.

<sup>19</sup> Gungsho showui showang gi, ra bun za nghut é nghut jáng, gungdu gi, hkâmá nghut râ lhú?

<sup>20</sup> Hkyak ga jang, gungsho showui showang pé myo kôlhang, gungdu gi, ragùng za nghut ri.

<sup>21</sup> Haú myoqjí gi, loq lé, "Ngò, nang lé a ra!" nghú a ge taí. Haú ulhum gi, hkyí lé, "Ngò, nang lé a ra!" nghú a ge taí.

<sup>22</sup> Haú za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê.

<sup>23</sup> Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap râ lhê. Haú a shit é jung gungsho pé lé, nga-nhúng hpautap é dông rago nghop râ lhê.

<sup>24</sup> Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri.

<sup>25</sup> Haú mù, gungdu má gamhkuí lhûm é hkyô a bo é za, gungsho showui showang pé ralhum eq ralhum, rajung za kut wó myit tê byí

lhum kó râ nghut lhê.

<sup>26</sup> Haû gungsho showui showang ralhum jamjau huî é nghut jáng, lhum hkanmó bo jamjau râ nghut lhê. Ralhum hpautap huî é nghut jáng, lhum hkanmó bo gabú é nghut lhê.

<sup>27</sup> Ahkuî, nungmoq gi, Hkrisduq é gungdu nghut kôluî, nungmoq yuq hkanmó gi, haû é gungsho showui showang pé nghut akô.

<sup>28</sup> Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoî pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang ahú hú ge taí é bang lé, masat to bê nghut ri.

<sup>29</sup> Banshoq bang gi, lagyô pé nghut lhê lhú? Banshoq bang gi, myiqhtoî pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú?

<sup>30</sup> Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang hau pé é lichyúm ge taí sân kyô lhê lhú?

<sup>31</sup> Nghut kôlhang, nungmoq gi, je gyaú é chyunghuq lé gyai yhang ô nau nyi keq.

### *Chyitdap Myit*

Hau htoq agó, ahkuî, ngò, nungmoq lé, je gyaú dik é hkyô ralhum shit kôlé.

## 13

<sup>1</sup> Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, myíng hung htê bo é ut eq myíng tui htê bo é chapchéng su za dut byuq râ nghut lhê.

<sup>2</sup> Ngò gi, myiqhtoî htoî é chyunghuq, zaú tô é hkyô pé banshoq lé sê gyô é nyan, sumsé hpaqchyî banshoq lé wó é eq, bùm pé lé wó

htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê.

<sup>3</sup> Ngò gi, wó é sutzè banshoq myùng bang lé byî pyâm é eq, ngá é gungdu lé nyhê pyám râ matú ap pyâm é nghut kôlhang, chyitdap myit a bo é nghut le gi, hai akyú a bò nghut ri.

<sup>4</sup> Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbún é nghut lhê.

<sup>5</sup> Chyitdap myit gi, hpau a dap é hkyô a kut, yhumsíng é akyú baú za a hô, lui za nhikjum a yo, shut é mara a matsíng é nghut lhê.

<sup>6</sup> Chyitdap myit gi, agè ashop é má a gabú é za, haû tengmán hkyô má gabú nyi ri.

<sup>7</sup> Chyitdap myit gi, hkâ-nhâm le wú magum ri, hkâ-nhâm le lumhkau ri, hkâ-nhâm le myit myoqbyu ri, hkâ-nhâm le hkam jân ri.

<sup>8</sup> Chyitdap myit gi, hkâ-nhâm le htúm byuq é a nghut. Myiqhtoî htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyî hkyô gi, laí ló byuq râ nghut lhê.

<sup>9</sup> Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoî htoî é gi, ra-am rahtâng ru nghut lhê.

<sup>10</sup> Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê.

<sup>11</sup> Ngò, zoshâng nghut ashî hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê.

<sup>12</sup> Ahkuî, nga-nhúng gi, myoqjâm hkaû mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myàng râ nghut lhê. Ahkuî, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo

lé gumjup shoq sê é su, ngò le, htâng má, gumjup shoq sé râ nghut lhê.

<sup>13</sup> Ahkuí, lumjínq myit, myit myoqbyù hkyô, chyitdap myit shi sùm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

## 14

### *Myiqhtoi Htoi É Chyunghuq Pé Eq Laklaí Dang Nyo É Chyunghuq Pé*

<sup>1</sup> Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq.

<sup>2</sup> Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri.

<sup>3</sup> Nghut kôlhang, myiqhtoi htoi é sù yuq hkangmó gi, byu pé lé wum byi dang eq nhik tíng dang taí ri.

<sup>4</sup> Laklaí dang rahú nyo é sù gi, yhumsing gùng lé htuqbang byí ri, nghut kôlhang, myiqhtoi htoi é sù gi, noqkuq hpúng lé htuqbang byí ri.

<sup>5</sup> Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

<sup>6</sup> Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhogshít dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú?

<sup>7</sup> Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat

myhíng é htê hai nghut é lé, hkâsu wó sé râ lhú?

<sup>8</sup> Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lhú?

<sup>9</sup> Nungmoq chyáng le haú đông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyi kó râ nghut lhê.

<sup>10</sup> Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

<sup>11</sup> Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê.

<sup>12</sup> Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

<sup>13</sup> Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung râ dut lhê.

<sup>14</sup> Hkâsu mù gâ le, laklaí dang ahú hú đông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyân é matú, hai akyû a wó nghut ri.

<sup>15</sup> Haú mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê.

<sup>16</sup> Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lhú?

<sup>17</sup> Nungmoq gi, ge dik shoq jeju hkya-on kô é abe, nghut kôlhang, góbang gi, htuqbang é a hui kó nghut ri.



18 Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri.

19 Nghut kôlhang, noqkuq hpúng má, laklaí dang rahû dông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

20 Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

21 Haû jep é tarâ má kê tô é gi,  
"A wó gyô wú é dang dông mai le,  
góming byu pê é nhutwuì dông mai le, byù shí bang lé ngò taí râ nghut lhê;  
nghut kôlhang, yhangmoq gi, ngá dang gyo kó râ a nghut."

ga Yhumsíng taí ri."✧

22 Haû mù, laklaí dang ahú hú nyo é hkyô gi, lumjíng bâng matú kumlhá a nghut é za, a lumjíng bâng matú sheq ru nghut lhê. Myiqhtoi dang kúm gi, a lumjíng bâng matú a nghut é za, lumjíng bâng matú sheq ru nghut lhê.

23 Haû nghut mù, noqkuq hpúng gón chôm zing mù, yuq hkanmó laklaí dang ahú hú nyò kô é nghut jáng, a sê gyô é bang nghut nghut, a lumjíng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú?

24 Nghut kôlhang, yuq hkanmó, myiqhtoi dang taí nyi é u má, a lumjíng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyîng é hui râ eq, banshoq èq jéyáng é hui râ nghut é htoq agó,

25 yhâng é i-myit má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

### *Shuq Shuq Tap Tap Za Noqkuq Râ Hkyô*

26 Haû jáng, gumang wuì ê, nganhung hai taí râ lhú? Nungmoq rahá lé chôm zing é hkûn, yuq hkanmó gi, Garai hkyá-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haû pé banshoq gi, noqkuq hpúng lé wum-o byi râ matú chyat kut é dut râ lhê.

27 Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê.

28 Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

29 Myiqhtoi í yuq nghut nghut, sum yuq nghut nghut taí kyo râ dut lhê; góbang gi, hai taí é lé rago gyô chyam wú râ dut lhê.

30 Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê.

31 Hkâsu mù gâ le, yuq hkanmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoi é nghut lhê.

32 Haû myiqhtoi pé é woi-nyí pé gi, myiqhtoi pé uphkan é a-ô má nghut nyi ri.

33 Hkâsu mù gâ le, Garai Gasang gi, atau ahú dut é Garai Gasang a nghut é za, nguínón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za,

34 myiwe wuì gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq.

35 Yhangmoq gi, rajung jung sé naû kô é nghut jáng, yhùm má yhangmoq

é yhumsing hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahî hkyô nghut ri.

<sup>36</sup> Haû Garai Gasâng é mungdang gi, nungmoq chyáng mai htoq lo é nghut lhê lhú? Haû gi, nungmoq chyáng za lé jé bê nghut lhê lhú?

<sup>37</sup> Rayuq yuq, yhang gi, myiqhtoi, a nghut jáng, woi-nyí chyunghuq byî é hui sù nghut lhê ga myit é nghut jáng, ngò, nungmoq lé ká byî é pé gi, haû Yhumsing é hkunmó nghut é lé, yhang sê yù sháng gaq.

<sup>38</sup> Yhang gi, haû lé haî su a ngàm kut é nghut jáng, yhânggùng le, haî su a ngàm kut é hui zo râ nghut lhê.

<sup>39</sup> Haû mù luî, ngá é gumang wuî ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó.

<sup>40</sup> Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut râ lhê.

## 15

### *Hkrisduq É Dui Toq Hkyô*

<sup>1</sup> Gumang wuî ê, ngò, nungmoq lé hko kyo bê nghut mù, nungmoq le hap yù luî, nungmoq yap gîng tô é jowò nghut é gabú danglù hkyô lé, ahkuî, ngò, nungmoq lé lhoq pûn kat nau ri.

<sup>2</sup> Ngò, nungmoq lé hko kyo bê é mungdang lé, nungmoq gîng gîng myhik zîng nyi kô é nghut jáng, nungmoq gi, gabú danglù hau é yanmai hkyi yù huî é nghut akô. Haû a nghut jáng, nungmoq lumjîng é gi, akôm dut bê nghut lhê.

<sup>3</sup> Ngò hap yu tô é pé lé, sâng-hi ahkyak é đông, ngò, nungmoq lé hai byi bê nghut lhê. Haû pé gi: Chyúmdang eq rajung za, Hkrisduq gi, nga-nhúng é yubak marâ é matú shí hkám byi bê gâ é nghut ri;

<sup>4</sup> Yhang gi, myhup yhûm é hui luî, Chyúmdang eq rajung za sum nyi nghu é nyí má lhoq dui toq é hui bê nghut mù,

<sup>5</sup> Petruq lé htoq shit luî, haû lagyo raxe í yuq lé le htoq shit ri.

<sup>6</sup> Hau htâng má, Yhang gi, ra-u má za, gumang wuî ngo shô yuq chyân lé htoq shit ri. Haû bang má é myo hpyang gi, ahkuî jé shoq asak dui nyi bum akô; ra-am kúm gi, shi ló byuq bekô nghut ri.

<sup>7</sup> Hau htâng, Yhang gi, Yakuq lé htoq shit mù lagyo pé banshoq bang lé htoq shit ri.

<sup>8</sup> Ló htâng má, Yhang gi, hkû buinyi a jé shî é má hku é đông nghut sù ngo lé le htoq shit bê nghut ri.

<sup>9</sup> Hkâsu mù gâ le, ngò gi, lagyo pé mâ é tiq dik sù nghut lhê. Haû Garai Gasâng é noqkuq hpúng lé zîng-ri sù nghut é yanmai, ngò gi, lagyo rayuq nghu râ lháng a gîngdán é sù nghut lhê.

<sup>10</sup> Nghut kôlhang, ngò ahkuî îsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê.

<sup>11</sup> Haû mù luî, ngò nghut nghut, yhangmoq nghut nghut, ngamoq hko kyô é gi, haû hkyô chyat nghut lui, nungmoq lumjîng é le, haû hkyô nghut ri.

### *Shi Byuq Bâng É Dui Toq Hkyô*

<sup>12</sup> Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghu, hkâsu wó taí kó râ lhú?

<sup>13</sup> Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut.

<sup>14</sup> Hau htoq agó, Hkrisduq gi, lhoq dui toq é a huî é ru nghut le gi, ngamoq hko kyô é hkyô eq, nungmoq é lumjîng hkyô gi, akôm dut byuq râ nghut lhê.

<sup>15</sup> Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám

bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut.

<sup>16</sup> Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berá a nghut.

<sup>17</sup> Hkrisduq gi, lhoq dui toq é a huí é nghut jáng, nungmoq é lumjîng hkyô gi, akôm dut lui, nungmoq gi, nungmoq é yubak mara hkaû má ru nyi nyi shi kó râ nghut lhê.

<sup>18</sup> Haû nghut jáng, Hkrisduq má shi ló byuq bê bang le, htên byoq byuq râ za nghut lhê.

<sup>19</sup> Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

<sup>20</sup> Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri.

<sup>21</sup> Hkâsu mù gâ le, shî-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê.

<sup>22</sup> Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rad-ing ralhum za nghut é yanmai lhoq dui toq é hui râ nghut lhê.

<sup>23</sup> Nghut kôlhang, yuq hkanmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê.

<sup>24</sup> Hau htâng, jîhtûm jé râ nghut lhê; haû hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haû Îwa nghut sù Garai Gasang lé mingdán ap

byi râ nghut lhê.

<sup>25</sup> Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê.

<sup>26</sup> Haû lhoq htên pyâm é hui râ nghut é ló htâng é gye gi, shî-nò hkyô nghut ri.

<sup>27</sup> Hkâsu mù gâ le, "Garai Gasang gi, jung hkanmó lé, Yhâng é hkyî wang ô má tô pyâm bê nghut ri."\* gâ Chyúmdang má kê tô ri. "Jung hkanmó lé" Yhâng é a-ô má tô pyâm bê ga taí é hkûn, jung hkanmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri.

<sup>28</sup> Yhang gi, haû hkyô ban kut é htâng má, haû Zo yhang le, jung hkanmó lé Yhâng é a-ô má to byi bê sù Garai Gasâng é a-ô má nyi sù dut nhang é hui râ nghut mù, Garai Gasang gi, lhunglhang htoq má gyaú sù nghut lui, lhunglhang lé sîng sù nghut râ nghut lhê.

<sup>29</sup> Dui toq hkyô a joq é ru nghut le gi, shi byuq bê bâng é matú wui-myhup hkám byî bùm kê é gi, hai akyû bò kó râ lú? Haû shi byuq bang lhoq dui toq é a hui kê é ru nghut le gi, yhangmoq matú haí mù byu pé wui-myhup hkâm yù kó râ lú?

<sup>30</sup> Ngamoq gi, ngamoq é matú, hkyîng hkanmó haí mù chiq râ jowò má nyi râ lhê lú?

<sup>31</sup> Gumang wui ê, ngò gi, nyí wui aluq shoí shoí shi é hui zô é nghut lhê. Haû su nghú é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê.

<sup>32</sup> Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lú? Shi byuq bang lhoq dui toq é a huí é ru nghut le gi,

"Nga-nhúng gi, napmá shî râ nghut é yanmai,

\* 15:27 Hkya-on 8:6 \* 15:32 Esai 22:13 \* 15:32 Dang ngho shî gi, a lumjîng bang taí é dang nghut lhê.

zo sháng, shuq sháng.<sup>\*†</sup>  
 nghû râ za nghut lhê.\*

<sup>33</sup> "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuî nghoq é hkâhui zo kó!

<sup>34</sup> Nungmoq gi, tau bûn gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lhê.

### *Dui Toq É Gungdu*

<sup>35</sup> Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lúh? Yhang-moq gi, hkasû é gungdu nghut kó râ lúh?" ga myi râ nghut lhê.

<sup>36</sup> Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhai.

<sup>37</sup> Nàng, kyô hkyô é hkûn, yuq lò râ nghut é agâm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê.

<sup>38</sup> Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byi ri.

<sup>39</sup> Gungsho lhunglhang gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê.

<sup>40</sup> Mauhkûng gùng pé le joq é nghut luî, myidam gùng pé le joq ri; nghut kôlhang, mauhkûng gùng pé é shingkang gi, rajung, myidam gùng pé é shingkang gi, gó jung ru nghut lhê.

<sup>41</sup> Haû bui má bo é shingkang gi, rajung, lhamó mâ é gi, gó jung, kyî pé mâ é gi, gó jung ru nghut lhê; kyî racham eq rachâm é shingkang le gotû tû shai lhum lhê.

<sup>42</sup> Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên

byoq sê é nghut luî, lhoq dui toq huî é gungdu kúm gi, htên byoq a sê é nghut lhê.

<sup>43</sup> Hô hkyô kat é hkûn gi, aróng a bò, lhoq dui toq huî é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri.

<sup>44</sup> Gungsho gungdu gi, hô hkyô é hui mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê.

<sup>45</sup> Haû nghut mù, "Haû sâng-hi yuq byù Adam gi, asak dui é xângzo dut bê nghut ri."<sup>\*</sup> ga kê tô ri. Haû ló htâng é Adam kúm gi, asak byî é woi-nyí nghut ri.<sup>†</sup>

<sup>46</sup> Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

<sup>47</sup> Haû sâng-hi yuq byù gi, myidàm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri.

<sup>48</sup> Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô.

<sup>49</sup> Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

<sup>50</sup> Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yû râ a nghut, htên byoq sê é le, htên byoq a sê é silí wunlí lé wó yû râ a nghut.

<sup>51</sup> Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê.

<sup>52</sup> Haû gi, ló htâng é tut htê mying é hkûn, ralhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haû hkûn, shi

<sup>\*</sup> 15:45 Apûn 2:7 † 15:45 Ló htâng é Adam gi, Yesuq lé taí nau é nghut lhê.

byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê.

<sup>53</sup> Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù rá dut é nghut lhê.

<sup>54</sup> Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng eq myui pyâm é hui bê nghut ri."✧ ga kâ tô é eq,

<sup>55</sup> "Shî-nò hkyô ê, náng é ûng budang gi, hkâmá lú? Shî-nò hkyô ê, náng é nyin gi, hkâmá lú?"✧

gâ tô é sanghkyang gi, dik râ nghut lhê.

<sup>56</sup> Haû shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri.

<sup>57</sup> Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsîng Yesuq Hkrisduq dông mai, nga-nhúng lé ûng budang byî é nghut ri.

<sup>58</sup> Haû mù luî, ngá é chyitdap gumang wui é, yap gingtîng nyi keq. Hai eq le, nungmoq lé hkâlhoq dui nún nhâng kó. Nungmoq gi, haû Yhumsîng má nungmoq wùn waq é muzó akôm a nghut é lé sé kô é nghut lhê yanmai, haû Yhumsîng é muzó lé ayang wùn waq shikut nyi keq.

## 16

### *Yerusalem Wà Mó Mâ É Lumjîng Bâng É Matú Alu Hkyuî Râ Hkyô*

<sup>1</sup> Ahkuî, Garai Gasâng é byu pê é matú alu hkyuî râ hkyô eq séng luî gi, haû Galatiq mau mâ é noqkuq hpûng pé lé ngò kut nhang é su kut keq.

<sup>2</sup> Ngò jé lé é hkûn, alu hkyuî râ hkyô a kut ra râ dông, bat hkangmó mâ é sâng-hi nyi má, yuq hkangmó gi, yhumsîng wó ho é má cháng mù, gam tô to láng keq.

<sup>3</sup> Ngò jé lé é hkûn, ngò gi, nungmoq hkyin tô é byu pé lé, shit kyô é laiká

pé byi mù, nungmoq é chyunghuq lé, Yerusalem wà mó má é dé nhâng râ nghut lhê.

<sup>4</sup> Ngò le é ang râ dut é nghut jáng, yhangmoq gi, ngá é byinzùm kut râ nghut lhê.

### *Poluq Lum Kat É Hkyô Pé*

<sup>5</sup> Ngò gi, Makedoni mau laî byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laî byit râ za nghut lhê.

<sup>6</sup> Ngò hkâmá é kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyi abe.

<sup>7</sup> Ngò gi, laî ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dông é nghut jáng, nungmoq eq rahá rayoq nyi râ lé myit myoqbyu lhê.

<sup>8</sup> Nghut kôlhang, ngò gi, Penteko-ti poî buinyi jé shoq Ehpesu myuq má nyi râ nghut lhê.

<sup>9</sup> Haî mù gâ le, ngo lé htuq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

<sup>10</sup> Timohti jé lé jáng, yhang, nungmoq eq rahá nyi é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsîng é muzó lé, ngò su wùn waq wún é sù nghut lhê.

<sup>11</sup> Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowuî má nuingón é dông nhang kat keq. Haû gumang wui eq rahá lò kó râ lé, ngò myit láng nyi lhê.

<sup>12</sup> Ahkuî, nga-nhúng é gumang Apolo é hkyô eq séng luî ga jang: yhang gi, haû gumang wui eq rahá nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

<sup>13</sup> Machya nyî keq; lumjîng hkyô má ging ging tíng tíng yap nyî keq; gyuq kyum myit hkâbô kó; wum bo nyî keq.

<sup>14</sup> Jung hkanmó lé, chyitdap myit eq zui saí keq.

<sup>15</sup> Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luì, yhangmoq gi, yhumsîng gùng lé, haù sâ-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taì tsuq kat kôlé,

<sup>16</sup> haù sù é bâng é a-ô má le, haù muzó má bo wang lòm mù, mù zui shikut bang yuq hkanmó é a-ô má le, nyî keq.

<sup>17</sup> Ngò gi, Stehpana, Hportunatu eq Ahkaiku pé jé lo é hkùn, gyai gabú é nghut lhê, haì mù gâ le, yhangmoq gi, nungmoq a kut byí é hkyô lé, lhoq pyíng byi bekô nghut ri.

<sup>18</sup> Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haù sù é bang lé, hpautap nyí keq.

### *Ló Htâng É Shi-kyám Dang*

<sup>19</sup> Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhúm má chôm huì é noqkuq hpúng lé, haù Yhumsîng má nungmoq lé gyai yhang shi-kyâm kat akô.

<sup>20</sup> Shí má nyi é gumang wuì ban-shoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

<sup>21</sup> Ngò, Poluq gi, shi-kyám dang shí lé, ngá é loq èq yhang ká é nghut lhê.

<sup>22</sup> Rayuq yuq, haù Yhumsîng lé a chyitdap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

<sup>23</sup> Haù Yhumsîng Yesuq é jeju gi, nungmoq eq rahá nghut nyí sháng gaq.

<sup>24</sup> Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

## KORINHTUQ Pê Chyáng Htang Dàm Hun Kat é Laiká (2 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhùng é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê:

<sup>2</sup> Nga-nhùng é Îwa nghut é Garai Gasang eq haû Yhumsîng Yesuq Hkrisduq chyáng mâ é jeju eq ngu-ingón hkyô gi, nungmoq chyáng ru joq nyî sháng gaq.

*Nhik tíng hkyô banshoq é Garai Gasang*

<sup>3</sup> Nga-nhùng é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyo é Îwa eq nhik tíng hkyô banshoq é Garai Gasang gi, hkyo-on kungton é huî nyî sháng gaq.

<sup>4</sup> Garai Gasâng chyáng mai ngamoq wó yû bê nghut é nhik tíng hkyo èq, hkasû é wuîhke hkyô hui bang lé le nga-nhùng wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri.

<sup>5</sup> Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê.

<sup>6</sup> Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yû hkyo é matú nghut nyi ri; ngamoq, nhik tíng é huî é nghut jáng, nungmoq é nhik tíng hkyo é matú nghut luî, haû gi, ngamoq jamjaû é eq rajung za nghut é jamjau hkyô lé, myit hing é dông mai wó jân pyám rà a-tsam, nungmoq chyáng lhoq htoq byî é nghut lhê.

<sup>7</sup> Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le

nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

<sup>8</sup> Gumang wuî ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luî, ngamoq gi, asak duì lo rà lhang a myit myoqbyu lô é nghut lhê.

<sup>9</sup> Gè gè yhang, ngamoq gi, sat hui berâ nghû, ngamoq é i-myt má lumjîng pyâm é nghut lhê. Nghut kôlhang, haû gi, ngamoq gùng ngamoq a lumhkaú é za, shî bê bang lé lhoq duì toq sù Garai Gasang lé lumhkaû rà matú dut é nghut lhê.

<sup>10</sup> Garai Gasang gi, haû sù é shî rà hkyô mai hkyi yû bê nghut mù, ngamoq lé hkyi yû rà za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yû rà za nghut lhê nghû, ngamoq gi, Yhang lé myit myoqbyu to bê nghut luî,

<sup>11</sup> myo myo kyûdung byî é lé gyo byî é má ngamoq shimân jeju wó mù, byû myo myo gi, ngamoq wó é shimân jeju é yanmai Garai Gasang lé jeju hkyo-on kó rà nghut lhê.

*Poluq, Hen Tô É Muzó Htaî Pyâm É Lé Tai Hung É Hkyô*

<sup>12</sup> Ngamoq nghutbùn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê.

<sup>13</sup> Hkâsu mù gâ le, ngamoq gi, nungmoq a dat nghap é eq a sê gyô é haî le a ká byî kat é nghut lhê. Ngò, myit myoqbyu kat é gi,

<sup>14</sup> nungmoq gi, ngamoq é hkyô ram lé wó sê gyô yû bê eq rajung za, haû Yhumsîng Yesuq é buinyi má

nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

<sup>15</sup> Haú hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê.

<sup>16</sup> Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taû lò luí, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê.

<sup>17</sup> Ngò gi, haú hkyô hen é hkûn, agon za hen hkyut é nghut lhê lhú? Haú a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí râ matú, mingkan myit đông hen é nghut lhê lhú?

<sup>18</sup> Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut.

<sup>19</sup> Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê.

<sup>20</sup> Hkâsu mù gâ le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasang é hpungwup shingkâng é matú, Yhâng đông mai, nga-nhúng gi, "Amen" nghû taí é nghut lhê.

<sup>21</sup> Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xû but byi mù,

<sup>22</sup> Yhang sing lhê gâ é dizik, nga-nhúng lé htùng tap byi luí, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-

nhùng é i-myt unghkaû má kat byi bê nghut ri.

<sup>23</sup> Ngò gi, nungmoq hkyamsa râ matú, Korinhtuq myuq má a dum taû lé é hkyô têng é lé, ngá é saksé dut râ đông Garai Gasang lé wut dúng lhê.

<sup>24</sup> Haú gi, nungmoq é lumjíng hkyô lé ngamoq sing pyám byi é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haí mù gâ le, lumjíng myit mai za nungmoq wó yap gíng nyi bùm kô é ru nghut lhê.

## 2

<sup>1</sup> Haú mù luí, ngò gi, nungmoq lé myit nò nhâng é dut râ đông, lé dum kúm é a kut râ nghû, myit hpyit to bê nghut lhê.

<sup>2</sup> Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lhú?

<sup>3</sup> Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kê kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê.

<sup>4</sup> Hkâsu mù gâ le, ngò gi, nungmoq lé laiká kê é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kê kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

### *Mara Hkyut Byi Lhum Râ Hkyô*

<sup>5</sup> Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luí, ngò gyai wá yhang zuq zuq a taí nau é nghut lhê.

<sup>6</sup> Nungmoq myo hpyâng èq yhang lé mara dam byi é hkyô gi, yhâng é matú gé bê nghut ri.



<sup>7</sup> Nghut kôlhang, ahkuî, nungmoq gi, yhang a wó jan loshoq myit yón é a huí zo râ matú, yhang lé mara hkyut pyám byi mù, nhik tíng byi keq.

<sup>8</sup> Haû mù luî, nungmoq é chyitdap myit gi, yhang é ahtoq má dum lhoq gíng shit nyî keq nghû, nungmoq lé ngò wum taî tsuq kat lhê.

<sup>9</sup> Ngò, nungmoq lé haî mù laiká ká byî kat é hkyô gi, nungmoq chyam wú huí é hkyô lé wó jân é hkyô eq jung hkanmó má jino gyo hkyô bò a bo é lé, wó sé râ matú le nghut lhê.

<sup>10</sup> Nungmoq, rayuq yuq lé mara hkyut byî é nghut le gi, ngò le, haú yuq lé mara hkyut byî lhê. Mara hkyut râ rajung jung joq é nghut jáng, ngò mara hkyut é gi, Tsadán èq nganhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê.

<sup>11</sup> Hkâsu mù gâ le, Tsadán hen é hkyô pé lé nga-nhúng a sê é a nghut.

### *Dangshikaq Asik Mâ É Hpungmû Wùn Bang*

<sup>12</sup> Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsîng gi, ngo lé hkum hpóng byî é lé, ngò myang ri.

<sup>13</sup> Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luî, Makedoni mau shut xoq e ló é nghut lhê.

<sup>14</sup> Nghut kôlhang, Hkrisduq má, ngamoq lé hkâ-nhám le ùng budang hkyô shut shuî-û yù mù, Hkrisduq lé sê é sumsé hpaqchyi é nam ngón shôm lé, ngamoq dông mai jowò hkanmó má taî pyo é sù, Garai Gasang gi, jeju hkya-ôn é huí nyi sháng gaq.

<sup>15</sup> Hkâsu mù gâ le, ngamoq gi, hkyi yu é huí nyi bâng chyáng le, htên byoq ló é huí nyi bâng chyáng le, Garai Gasâng é matú Hkrisduq é nam ngón shôm nghut nyi lhê.

<sup>16</sup> Ngamoq gi, htên byoq nyi bâng é matú shî-nò hkyo é shôm dut mù, hkyi yù huí nyi bâng é matú nghut jáng, asak hkyo é nam ngón shôm dut

é nghut lhê. Haû mù, ó yuq wá muzó shî eq htuk râ lhú?

<sup>17</sup> Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taî é nghut lhê.

## 3

<sup>1</sup> Ngamoq gi, yhumsîng gùng yhumsîng dum owaq hi ló é nghut lhê lhú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq?

<sup>2</sup> Nungmoq gùng yhang gi, ngamoq é myit nhiklhum má kâ tô é, yuq hkanmó èq nghap luî sê yu é laiká gùng pé nghut akô.

<sup>3</sup> Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kâ jung chí èq kâ tô é dông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é dông a nghut é za, xângzo byu é myit nhiklhum long pé má kâ tô é ru nghut lhê.

<sup>4</sup> Haû su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê.

<sup>5</sup> Ngamoq gi, yhumsîng gùng haî lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê.

<sup>6</sup> Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byî é nghut lhê.

### *Dangshikaq Asik É Hpungwup Shingkanq*

<sup>7</sup> Ahkuî, haû Mosheq é myoqdong mâ é hpungwup shingkâng é yanmai,

haû Israelaq byu pé gi, yhâng é myoqdong lé a wó wú tsuq to kó nghut ri. Hpungwup shing kang haû shûm lo byuq sê é nghut kôlhâng, luqlong má dok kê tô é, shî-nò hkyô lhoq htoq é tarâ muzó gi, hpungwup shing kang eq rahá jé lé é nghut lhê.

<sup>8</sup> Haû su nghut jáng, haû Woi-nyí é muzó gi, hpungwup shing kang je riyhang dut râ a nghut kó lhú?

<sup>9</sup> Gè gè yhang, haû byù lé mara byí é tarâ muzó lháng, hpungwup shing kang bo é nghut le gi, dingmán nhang é hkyô sik gi, je riyhang hpungwup shing kang bo é nghut lhê ô!

<sup>10</sup> Hkâsu mù gâ le, hpungwup shing kang bo é tarâ muzó gi, hpungwup shing kang je bo é dangshikaq asik eq whuí é hkûn, hpungwup shing kang a bò lo dut byuq bê nghut ri.

<sup>11</sup> Shum byuq ló é tarâ lháng gi, hpungwup shing kang eq rahá lé jé bê nghut le gi, ru gíng nyi é dangshikaq asik é hpungwup shing kang gi, je riyhang gyaú râ nghut lhê ô!

<sup>12</sup> Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê.

<sup>13</sup> Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haû lé a wú tsuq râ matú, yhâng é myoqdong lé myoqgo èq nghop pyâm é sù nghut ri.

<sup>14</sup> Nghut kôlhâng, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashî nghut ri. Haû gi, huí sêng pyâm é a hui shi, haî mù gâ le, Hkrisduq dông za haû lé wó yu pyâm é nghut lhê.

<sup>15</sup> Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklum má myoqgò èq nghop tô é nghut ri.

<sup>16</sup> Nghut kôlhâng, ó yuq le, Yhumsing chyáng hká u lhíng lò

kôlhâng, haû hkûn jáng, myoqgò gi, hî pyám byí é hui râ nghut lhê.

<sup>17</sup> Yhumsing gi, haû Woi-nyí nghut mù, Yhumsing é Woi-nyí nyi é jowò má, luthkyô le joq lhê.

<sup>18</sup> Haû Yhumsing é hpungwup shing kang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shing kang lhoq htoq byi hkyô nghut é, Yhâng é isâm shut htaî lhik wang é huí nyi bê nghut lhê. Haû hkyô gi, haû Woi-nyí nghut sù Yhumsing chyáng mai lo é nghut lhê.

## 4

### *Tseyam Pé Má Bo É Sutzè*

<sup>1</sup> Ngamoq gi, Garai Gasâng jeju mai muzó hkyô haû wó é nghut mù, myit wum a gyuí é nghut lhê.

<sup>2</sup> Ngamoq gi, zaú tô é eq hoq htoq é hkyô pé lé tô pyám luí, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkingmó é myit sôn sê é hkyô má, yhumsing gùng yhumsing htuk shoq nyi lhê.

<sup>3</sup> Ngamoq é gabú danglù gi, myoqgo èq nghop pyâm é huí é nghut jáng, haû gi, htên byoq nyi bâng chyáng za nghop pyám huí é ru nghut lhê.

<sup>4</sup> Haû Garai Gasâng é azòng isâm nghut sù, Hkrisduq é hpungwup shing kang bo é gabú danglù é maubó lé, a lumjínng bang a wó myâng kó sháng gaq ga, ipyat shi é garai\* gi, yhangmoq é myit lé lhoq chit byi bê nghut ri.

<sup>5</sup> Haû nghut é yanmai, ngamoq gi, yhumsing gùng eq séng luí hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê!

\* 4:4 Ipyat shi é garai gâ é gi, Tsadán lé gâ é nghut lhê.

<sup>6</sup> Hkâsu mù gâ le, "Mauchut hkaû mai maubó htoq lô sháng gaq."\* ga taî é Garai Gasang gi, Yesuq Hkrisduq é myoqdong mà é Garai Gasâng é hpungwup shingkâng é maubó lé sê gyô é nyan lé, nga-nhúng lé byî é dông, Yhâng é maubó lé, nga-nhúng é i-myit unghkaû má duqbó nhâng bê nghut ri.

<sup>7</sup> Nghut kôlhang, ngamoq gi, sutzê haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mà é a nghut é za Garai Gasâng chyáng mà é nghut é hkyô lé tún shit râ matú nghut lhê.

<sup>8</sup> Ngamoq gi, wuîhke hkyo èq lhîngkhyuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a htúm byuq é nghut lhê;

<sup>9</sup> zing-rî é hui kôlhang, kâng pyám huî é a nghut; bat lhêng pyâm é hui kôlhang, htên byoq huî é a nghut.

<sup>10</sup> Haû Yesuq é asak duî hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê.

<sup>11</sup> Hkâsu mù gâ le, Yesuq é asak duî hkyô gi, nga-nhúng é shî sê é gungdu má lhoq htoq shit é hui sháng gaq nghû, asak duî nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huî nyi ri.

<sup>12</sup> Haû mù luî, shi byuq hkyô gi, ngamoq má mù zuî nyi ri; asak duî hkyô kúm gi, nungmoq má mù zuî nyi é nghut ri.

<sup>13</sup> "Ngò gi, lumjîng bê nghut lhê, haû mù, ngò taî é nghut lhê."\* ga kâ tô é eq rajung za, ngamoq le, lumjîng hkyô hau èq yhang, lumjîng bê nghut mù taî é nghut lhê.

<sup>14</sup> Haî mù gâ le, haû Yhumsîng Yesuq lé shi é mai lhoq duî toq é Sû gi, ngamoq lé le, Yesuq eq rahá lhoq duî

toq mù, nungmoq eq rahá, ngamoq lé Yhâng é hí má shuî jé râ nghut é lé, ngamoq sê lhê.

<sup>15</sup> Haû jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byîng mui nyi sháng gaq ga, haû pé banshoq gi, nungmoq é akyu é matú nghut nyi ri.

<sup>16</sup> Haû mù luî, ngamoq gi, myit wum a gyuî é nghut lhê. Ngamoq é shinggan gungdu gi, htên byoq ló nyi kôlhang, i-myit unghkaû gi, ra-nyí eq ra-nyí asik dut nhang é huî nyi ri.

<sup>17</sup> Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haû pé htoq gyai hkik é ahtum abyuq é hpungwup shingkang lé, wó yû nhang ri.

<sup>18</sup> Haû mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

## 5

### *Mauhkûng Htoq Mâ É Yhûm*

<sup>1</sup> Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq èq saî é a nghut é za, mauhkûng htoq má joq é ahtum abyuq é yhûm\* nghut é, Garai Gasâng chyáng mà é yhûm lé, nga-nhúng wó é hkyô lé, nga-nhúng sê lhê.

<sup>2</sup> Nghut kôlhang, ahkuî, nga-nhúng gi, nga-nhúng é mauhkûng yhûm lé tû hut byî é lé gyai yhang hui naû mù, nò-kying su kyîng nyi lhê.

<sup>3</sup> Haî mù gâ le, nga-nhúng gi, hut byî é hui jáng, gungdu a bò bang a dut lò râ nghut lhê.

<sup>4</sup> Hkâsu mù gâ le, nga-nhúng gi, zúm shî má lúng nyi é u lé, wôlai wùn mù, nò-kying su kyîng nyi lhê; haû gi, shî byuq sê é lé, asak duî é èq wó htaî lhik pyám sháng gaq nghû, nga-nhúng gi,

\* 4:6 Apûn 1:3 † 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê. \* 4:13

Hkya-on 116:10 \* 5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

a hut byî é hui râ lé a ô nau é za, nga-nhông é mauhkông yhôm lé tû hut byî é hui râ lé ô nau é yanmai nghut lê.

<sup>5</sup> Ahkuî kúm, jeju haû hkam yù râ matú, nga-nhông lé lajâng to byî é sù gi, Garai Gasang nghut mù, jé lô râ hkyô gi, hkyak joq lê nghû é masat zè dông, nga-nhông lé haû Woi-nyí byi bê nghut ri.

<sup>6</sup> Haû mù luí, ngamoq gi, hkâ-nhám le hkyak lum tô lê. Gungdu shî má yhôm dông ru lúng nyî nyî gi, haû Yhumsing eq wê gâng nyi ashî nghut é lé ngamoq sê nyi lê.

<sup>7</sup> Ngamoq gi, byu-myang é dông mai a nghut é za, lumjîng myit mai asak dui é ru nghut lê.

<sup>8</sup> Ngamoq gi, hkyak myit lum tô lê nghû, ngò taí lê, haû mù, gungdu shî mai wê gang luí, haû Yhumsing eq rahá nyi râ lé ngamoq je riyhang ô nau é nghut lê.

<sup>9</sup> Haû mù, ngamoq gi, gungdu shî má yhôm dông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lê.

<sup>10</sup> Hkâsu mù gâ le, yuq hkangmó gi, gungdu shî má yhôm dông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyâng tanghkuq hí má, nga-nhông banshoq bang htoq shit ra râ nghut lê.

### *Nguingón Hkyô Xoq É Muzó*

<sup>11</sup> Haû mù, Yhumsing lé gyuq hkungga râ hkyô haí nghut é lé ngamoq sê é nghut luí, ngamoq gi, byu pé lé taí pún kyîng shikut lê. Ngamoq haí nghut é gi, Garai Gasang chyáng san za nghut nyi mù, nungmoq é myit sôn sê é hkyô má le san za nghut râ lé, ngò myit lum lê.

<sup>12</sup> Haû myit nhiklum má bo é lé gumrông râ malaí, byu-myang é lé gumrong é bang lé, nungmoq wó tû taí kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó

gumrông râ ahkáng, nungmoq lé byî é ru nghut lê.

<sup>13</sup> Ngamoq a gyîng é dông nghut le gi, Garai Gasang é matú a gyîng é nghut lê; ngamoq gyîng é dông nghut le gi, nungmoq é matú gyîng é nghut lê.

<sup>14</sup> Hkâsu mù gâ le, Hkrisduq é chyitdap myit eq ngamoq lé kut nhang nyi é nghut lê. Haû gi, banshoq bâng é matú rayuq shî hkám byi bê nghut mù, banshoq bang shi é dông nghut bê nghû, ngamoq hkyak sê gyô é yanmai nghut lê.

<sup>15</sup> Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shî hkám byi luí, lhoq dui toq é huí Su é matú dui kó sháng gaq ga, banshoq bâng é matú shî hkám byi bê nghut ri.

<sup>16</sup> Haû mù, ngamoq gi, ahkuî mai, ó yuq eq séng luí le, mingkan hkyam dông mai a wú lô é nghut lê. Ngamoq gi, hí hkûn Hkrisduq lé haû dông wú é nghut kôhang, haû su hkâ-nhám le a kut lô é nghut lê.

<sup>17</sup> Haû nghut mù luí, rayuq yuq gi, Hkrisduq má nghut nyi é nghut jâng, yhang gi, asik hpân hui sù dut bê nghut ri; haû axau gi, byuq byuq mù, lunglhang asik dut bu-nhung!

<sup>18</sup> Haû pé banshoq gi, Garai Gasang chyáng mâ é chyat nghut lê. Yhang gi, Hkrisduq dông mai nga-nhông lé Yhânggùng eq nguingón hkyô xoq yû luí, nguingón hkyô xoq é muzó ngamoq lé byi bê nghut ri.

<sup>19</sup> Haû gi, Garai Gasang gi, byu pé é mara lé a matsîng byî é za, Hkrisduq dông mingkan lé Yhânggùng eq nguingón hkyô xoq yû bê nghut luí, Yhang gi, nguingón hkyô xoq yu é mungdang haû lé, ngamoq lé ap byî to bê nghû nau é nghut lê.

<sup>20</sup> Haû mù luí, ngamoq gi, Hkrisduq é gunglik pé nghut lê mù, Garai Gasang gi, ngamoq dông mai nungmoq lé lhoq pún kyîng nyi é nghut lê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik dông nungmoq lé dúng

tôngbán nyi lhê.

<sup>21</sup> Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

## 6

<sup>1</sup> Ngamoq gi, Garai Gasâng é mù zui byinzùm wuì nghut nyi é eq rajung za, Garai Gasâng jeju lé akyû a bo é dông hkâhap yù kó nghû, nungmoq lé wum taì tsuq kat lhê.

<sup>2</sup> Hkâsu mù gâ le, "Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyì má, nang lé ngò garúm bê nghut lhê."\*  
ga luì, Yhang taì ri. Ngò, nungmoq lé taì kyo kôlé, ahkuì gi, Garai Gasang ô nau é ahkyíng, ahkuì gi, hkyi yu é buinyì nghut ri.

### *Poluq É Wuìhke Hkyô Pé*

<sup>3</sup> Ngamoq é hpungmû gi, taì hpoi pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê.

<sup>4</sup> Haù kut rà malaì, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkangmó má yhumsing gùng yhumsîng shit nyi lhê. Gyai hkam jân é hkyô má le, jamjau hkyô pé má le, wuìhke hkyô pé má le, myit myo uhkyí hkyô pé má le shit nyi lhê.

<sup>5</sup> Nhuq bat huì é pé má le, htóng lhúng huì é eq toq gabyông é má htîm é huì é má le, mù zui shikut é má le, a myang yhup é myín pé má le, zòmut huì é má le, shit nyi lhê.

<sup>6</sup> Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyì eq chyitdap myit akyíng má le,

<sup>7</sup> tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé dông le, shit nyi lhê.

<sup>8</sup> Hpungwup shingkang byi é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taì kôle, shit nyi lhê. Ngamoq gi, tengmán kôlhang, mhaù zo bang dông sôn yu akô nghut ri.

<sup>9</sup> Ngamoq lé sé kôlhang, a sê é dông kut akô nghut ri; shi ló nyi kôlhang, rû dui nyi é bang nghut lhê; nhuq bat é hui kôlhang, sat pyâm é a hui shi é bang nghut lhê.

<sup>10</sup> Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haì le a wó kôlhang, jung hkangmó lé sing é dông nghut lhê.

<sup>11</sup> Korinhtuq bang ê, ngamoq gi, nungmoq lé san za taì bê nghut luì, ngamoq é myit nhiklhum lé, nungmoq é matú làm shoq hpông to byi bê nghut lhê.

<sup>12</sup> Ngamoq gi, ngamoq é chyitdap myit lé, nungmoq chyáng mai lêng taù yu nyi é a nghut, nungmoq sheq, ngamoq chyáng mai lêng taù yu nyi kô é ru nghut lhê.

<sup>13</sup> Nungmoq le, myit nhiklhum lé làm shoq dum taù hpóng keq nghû, ngò gi, ngá zô pé lé dông taì lhê.

### *A Lumjìng Bang Eq A Nhungkut Râ Hkyô*

<sup>14</sup> A lumjìng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haì sêng lhum lhê lú? Maubó eq mauchut gi, hkâsu wó zùm yap kó râ lú?

<sup>15</sup> Hkrisduq eq Beliala\* gi, hkâsu kut myit wó huì lhum kó râ lú? Lumjìng sù rayuq eq a lumjìng sù gi, hkâsu wó pung lhum kó râ lú?

<sup>16</sup> Garai Gasâng é noqkuq yhûm eq hparà lhô pé gi, hkâsu wó hùm râ lú? Hkâsu mù gâ le, nga-nhúng gi, rû dui nyi é Garai Gasâng é noqkuq yhûm nghut lhê. Haù gi, "Ngò gi, yhangmoq eq rahá nyi mù, yhangmoq chyáng sô nyi râ nghut luì, Ngò gi, yhangmoq é

\* 6:2 Esai 49:8 \* 6:15 Beliala gâ é gi, Tsadán é myìng rajà nghut lhê. \* 6:16 Nhung 26:12; Yer 32:38; Ezk 37:27

Garai Gasang dut mù, yhangmoq gi, Ngá é byu pé dut kó rá nghut lhê."<sup>✧</sup> ga Garai Gasang taí tô é eq rajung za nghut ri.

17 "Haû mù luí, yhangmoq chyáng mai htoq lô mù, gotû san za nyi keq. A sansêng é zè lé hkâzáng kó, haú hkûn, Ngò, nungmoq lé lhom hap yù rá nghut lhê."<sup>✧</sup> ga haû Yhumsing taí ri.

18 "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó rá nghut lhê."<sup>✧</sup> ga haû wum-o a-tsam dik shoq bò Sû Yhumsing taí ri.

## 7

1 Chyitdap é luzúm wui ê, nganhúng gi, danggidiq haú pé lé wó tô é bang nghut é yanmai, gungdu eq woi-nyí lé agot a-û dut nhang é jung hkangmó mai, yhumsing gung yhumsing lhoq sân-yúng yû luí, Garai Gasang lé gyuq hkunggâ é myit èq chyoiyúng hkyô má lhoq gumjup yu nyi sháng.

### *Poluq É Gabú Hkyô*

2 Nungmoq é i-myit unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

3 Ngò gi, nungmoq lé mara byi rá matú haû su taí é a nghut. Ngamoq gi, asak duí kôle, shí kôle, nungmoq eq rahá wó dut shoq, nungmoq gi, ngamoq é i-myit unghkaû má lúng nyi é nghut lhê nghû, hí hkûn ngò taí wú bê nghut lhê.

4 Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byi é gyai yhang huí ri; jamjau hkyô pé myo myo ngamoq huí kôlhang, ngò, gyai yhang gabú nyi lhê.

5 Hkâsu mù gâ le, ngamoq gi, Make-doni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq

wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê.

6 Nghut kôlhang, nhik ngê bang lé nhik títng é Garai Gasang gi, Tituq lé jé lé nhang é dông mai, ngamoq lé nhik títng byi bê nghut ri.

7 Yhang jé lé é dông mai za a nghut, yhang lé nungmoq nhik títng byi é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byi é hkyô pé lé, ngamoq lé taí kyo bê nghut ri.

8 Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

9 Nghut kôlhang, ngò gi, ahkuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lhing nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq èq hai akyû le a lhoq yôm byi é nghut lhê.

10 Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lhing nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri.

11 Garai o é dông, nungmoq chyáng akyû lhoq htoq byi é yón kuq hkyô lé wú wú keq! Haû gi, gyai yhang myit zuq é hkyô, yhumsing gung mara a bo é lé tún shit rá lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byi é hkyô, tengmán hkyô kut rá rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkangmó má saksé tún shit

bekô nghut ri.

<sup>12</sup> Haû mù luî, ngò, nungmoq lé kâ kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byî é hkyô lé, Garai Gasâng hí má nungmoq gùng nungmoq wó myâng râ matú kâ kat é sheq ru nghut lhê.

<sup>13</sup> Haû pé banshoq dông mai, ngamoq gi, myit wum byî é huî ri.

Ngamoq myit wum byi huî é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haî mù yhang gabú é gâ lé, nungmoq banshoq bâng eq yhâng é myit lé lhoq nguingón byi kô é yanmai nghut ri.

<sup>14</sup> Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taî é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

<sup>15</sup> Nungmoq banshoq bang jìno gyo kômù, gyuq nán é myit mai yhang lé lhom hap yù kô é lé, yhang myitbùn é hkûn, yhang nungmoq lé chyitdap é myit gi, je riyhang kô dik nyi ri.

<sup>16</sup> Ngò gi, nungmoq lé banshoq wó lum to bê lé sê é yanmai, gabú nyi lhê.

## 8

### *Byî É Hkyô*

<sup>1</sup> Gumang wuî ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî é jeju eq sêng é hkyô, nungmoq lé sé nhâng nau ri.

<sup>2</sup> Yhangmoq gi, wuîhke jamjau hkyô myo myô eq chyam lik é huî é nghut kôlhang, yhangmoq é a ung taî loshoq gabú é hkyô eq yhangmoq é gyai yhang myung é hkyô gi, agùn agó byi nau é myit bò nhang ri.

<sup>3</sup> Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkâm lhê. Yhangmoq gi, yhangmoq é

myit hkaû mai yhang haû su kut kô é nghut ri.

<sup>4</sup> Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri.

<sup>5</sup> Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsîng lé ap byi pyám kômù, hau htâng sheq ngamoq lé ap kô é nghut ri.

<sup>6</sup> Haû mù luî, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê.

<sup>7</sup> Nungmoq gi, lumjîng myit má, dang nyo é hkyô má le, sumsé hpaqchyî hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byi nau é jeju shî má le agùn agó dut râ lé, bûn nyi keq.

<sup>8</sup> Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú nau luî sheq ru nghut lhê.

<sup>9</sup> Hkâsu mù gâ le, nungmoq gi, nganhung é Yhumsîng Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkangmó wó sù nghut kôlhang, nungmoq é matú é yanmai, myùng sù dut bê nghut ri.

<sup>10</sup> Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sân-hi, byi hí kô é za a nghut, haû su kut nau é myit bo é bang le nghut akô.

<sup>11</sup> Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pán keq.

<sup>12</sup> Hkâsu mù gâ le, byi nau é myit bo é nghut jáng, chyunghuq haû gi, yhang a wó é má cháng luî a nghut é

za, yhang wó é má cháng luí, hap yù gíng é nghut lhê.

<sup>13</sup> Nungmoq é matú gi, wòlai dut, góbang gi, hkyamsâ nyì râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

<sup>14</sup> Nungmoq haí râ tô é lé, yhangmoq agùn agó wó é mâ é wó dum taú htuqbang byi kó sháng gaq, ahkuí lhê é ahkyíng má, yhangmoq haí râ tô é lé, nungmoq agùn agó wó é mâ é htuqbang byi keq. Haú jáng sheq, wuí wuí za wó dut kó râ nghut lhê.

<sup>15</sup> Haú gi, "Myo myo tsíng yu é sù gi, lûm myo shoq wó é a nghut, shau za tsíng yu é sù gi, lûm shau shoq wó é a nghut." ✧ ga kê tô é eq rajung za nghut ri.

### *Tituq Lé Korinhtuq Myuq Shut Nhang Kat É Hkyô*

<sup>16</sup> Nungmoq é matú ngò myit chiq byí é eq rajung zâ é myit lé, Tituq é i-myit má kat byí é Garai Gasang lé, ngò jeju hkya-ôn lhê.

<sup>17</sup> Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhanggùng yhang myit hpyit yú luí, nungmoq chyáng lé lô gù za nghut ri.

<sup>18</sup> Ngamoq gi, haú gabú danglù lé dojaú é má noqkuq hpûng pé ban-shoq èq hkya-on huí é gumang hpó haú lé le, yhang eq rahá nhang kat lhê.

<sup>19</sup> Hau htoq agó, ngamoq garúm râ myit bo nyi é hkyô lé tân shit mù, haú Yhumsíng lé hkungga râ matú ngamoq wú gôn nyi hkyô nghut é, alu lé ngamoq yu chung é hkûn, ngamoq é byinzùm kut râ matú, noqkuq hpûng pé èq hkyin yu é sù le yhang nghut lhê.

<sup>20</sup> Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê.

<sup>21</sup> Hkâsu mù gâ le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pé é myoq hí má le nghut lhê.

<sup>22</sup> Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotù gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri.

<sup>23</sup> Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhûng é gumâng nhik é hkyô ga jáng, yhangnhik gi, noqkuq hpûng pé é gunglik eq Hkrisduq é aróng nghut akô.

<sup>24</sup> Haú mù luí, haú noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tân shit keq.

## 9

<sup>1</sup> Ngò gi, haú sân-yúng bang lé htuqbang râ hkyô eq séng luí, nungmoq lé kê kat râ a ra nghut ri.

<sup>2</sup> Hkâsu mù gâ le, nungmoq gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú toq byi bê nghut ri.

<sup>3</sup> Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuí lé nhang kat é nghut lhê.

<sup>4</sup> Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê.



<sup>5</sup> Haû mù luî, nungmoq danggidiq byî to bê nghut é, chyunghuq lé rago wó lajâng pân to râ matú, gumang wuì lé wum taì tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é dông byî é a nghut é za, byî nau é chyunghuq dông hen tô é dut râ nghut lhê.

### *Agùn Agó Byî É Hkyô*

<sup>6</sup> Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ nghut lhê gâ é dang lé, myitbûn nyi keq.

<sup>7</sup> Yuq hkanmó gi, a kâm byî é eq byî nhang é dông a nghut é za, yhum-sing myit má byî nau é myhó lé myit hpyit yû mù byî é dông dut râ lhê. Hkâsu mù gâ le, Garai Gasang gi, gabú myit eq byî sù lé chyitdap ri.

<sup>8</sup> Haû mù, ahkyíng hkanmó jung hkanmó má, nungmoq râ é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byî é sù nghut lhê.

<sup>9</sup> Haû gi,  
"Yhang gi, a ha bûn é za myùng bang lé yhang é chyunghuq tsing gâm byî bê nghut ri; Yhang é dingmán hkyô gi, ahtum abyuq gîng nyi ri."<sup>☆</sup>  
ga kê to eq rajung za nghut ri.

<sup>10</sup> Kyô hkyó sù lé kyôshi, zoshuq matú muk byî é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyo é ashi lé myô lò nhâng râ nghut lhê.

<sup>11</sup> Nungmoq gi, ayoq abun hkanmó má agùn agó byî é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byî é hkyô lé, ngamoq lai byi mù, Garai Gasang lé jeju hkya-ôn é hkyô dut râ nghut lhê.

<sup>12</sup> Nungmoq dojaú é hkyô shî gi, Garai Gasang é byu pé râ é hkyô lé lajang byî é za a nghut, Garai Gasang lé jeju bûn é dang byíng mui nyi nhang é le nghut lhê.

<sup>13</sup> Dojaú hkyô hau é yanmai, nungmoq lhumzui hkyô saksé tûn shit bekô nghut mù, byu pé gi, Hkrisduq é gabú danglù lé nungmoq yín yû luî jino gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkya-on kó râ nghut lhê.

<sup>14</sup> Hau htoq agó, Garai Gasang gi, nungmoq lé jeju lai shoq byî tô é yanmai nungmoq é matú yhangmoq kyûdung byî é u má, yhangmoq é myit nhiklhum gi, nungmoq chyáng htoq jé râ nghut lhê.

<sup>15</sup> A ung htoq taí é Garai Gasang é chyunghuq é yanmai, jeju hkya-on hkyô gi, Yhang chyáng ru nghut nyi sháng gaq ô!

## 10

### *Poluq, Yhang É Hpungmû Lé Tai Hung É Hkyô*

<sup>1</sup> Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê.

<sup>2</sup> Shî mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê.

<sup>3</sup> Hkâsu mù gâ le, ngamoq gi, mingkan shî má asak dui nyi kôlhang mingkan byu pé kut é dông majan zân é a nghut.

<sup>4</sup> Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gingtîng é gyedap pé lé lhoq htên pyám râ matú Garaí é a-tsam byíng é laknak ru nghut lhê.

<sup>5</sup> Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shaí shoq yhumsing

<sup>☆</sup> 9:9 Hkya-on 112:9

gùng yhumsing lhoq myhang mhaû é hkyô hkanqmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkanqmó lé shúm kut yu é nghut lhê.

<sup>6</sup> Nungmoq é jìno gyo hkyô gi, gumjup é hkûn, jìno a gyô é hkyô hkanqmó lé ngamoq dam byi râ rì rì dut râ nghut lhê.

<sup>7</sup> Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq.

<sup>8</sup> Hkâsu mù gà le, nungmoq lé lêng hkyó râ nó gi, nungmoq lé kô myhâng nhâng râ matú, ngamoq lé haû Yhumsing byi é ahko ahkáng lé gyai gumrong le lháng, ngò gi, hoq hpû é hui râ a nghut.

<sup>9</sup> Ngò gi, ngá é laiká pè èq nungmoq lé kyuq é su a dut nhâng nau é nghut lhê.

<sup>10</sup> Hkâsu mù gà le, ra-am gi, "Yhâng é laiká pé gi, gàng bo é eq wum-o bo é nghut rì; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô.

<sup>11</sup> Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haû sù é bang sê gyo râ dut lhê.

<sup>12</sup> Ngamoq gi, haû yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhúm wú é eq yhangmoq gùng yhangmoq whuí lhúm wú kô é hkûn, hpaqchyí a bo é bang dut bekô nghut rì.

<sup>13</sup> Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byi é, nungmoq chyáng lháng hkyit jé shoq nghut é maukyo hkaû má za gumrông râ nghut lhê.

<sup>14</sup> Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gà le, ngamoq gi, Hkrisduq é gabú danglù chùng mù, nungmoq chyáng lháng lé jé bê nghut lhê.

<sup>15</sup> Dum, ngamoq gi, góbang kut é muzó lé le, âng é mai lai lui gumrong hai é a nghut. Ngamoq myoqbyu é hkyô gi, nungmoq é lumjing myit kô myhang jat nyi jáng sheq, nungmoq chyáng ngamoq zui saí é jowò gyai wó lhoq lâm râ nghut lhê.

<sup>16</sup> Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gà le, ngamoq gi, góyuq èq zui saí to bê loqzó eq séng lui, gumrông nau é a nghut.

<sup>17</sup> Nghut kôlhang, "Gumrong é sù gi, haû Yhumsing má gumrông sháng gaq."\* ga kê tô rì.

<sup>18</sup> Hkâsu mù gà le, yhumsing gùng yhumsing owaq é sù gi, hap yù huí é a nghut é za, haû Yhumsing èq owaq byi é sù sheq, hap yù huí é ru nghut lhê.

## 11

### *Lagyo Apyoq Pé Eq Poluq*

<sup>1</sup> Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyi gù nghut bekô.

<sup>2</sup> Haí mù gà le, ngò gi, Garai Gasang mai nungmoq lé magum é myit èq, nungmoq é matú magum byi lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghú, Hkrisduq nghut é yhumsing hpô chyáng za nungmoq lé byi zo râ nghú, danggidiq byi to bê nghut lhê.

<sup>3</sup> Nghut kôlhang, Ewaq gi, lhangmuì hpaqchyí dâ é èq mhaû zô é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myit ap nóng é hkyô mai shuí ngoq ló byuq é hui râ lé, ngò myit chiq rì.

\* 10:17 Yer 9:24

<sup>4</sup> Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haû lé lui lui za lhom hap yu é dut bekô nghut ri.

<sup>5</sup> Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sù a nghut nghu myit ngam é nghut lhê.

<sup>6</sup> Ngò gi, dang táí hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkangmó má, nungmoq lé haû hkyô hkyâng shoq sé nhâng bê nghut lhê.

<sup>7</sup> Ngò, nungmoq lé, Garai Gasâng é gabú danglù lé ahpau a yu é za hko kyô é dông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú?

<sup>8</sup> Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haû bâng chyáng mai ngò zik lú yu é dông dut bê nghut lhê.

<sup>9</sup> Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haî râ é lé htuqbang byi kô é yanmai nghut lhê. Hká dông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq lui le haû dông kut nyí râ nghut lhê.

<sup>10</sup> Haû Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haû su gumrong é hkyô lé wó hkûm zìng râ a nghut.

<sup>11</sup> Haî mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê.

<sup>12</sup> Ngò gi, yhangmoq zui saî é lé gumrong é hkyô pé má ngamoq eq rawuí za són byi râ ahko ahkáng ô nau

é bang lé ahkáng a byi râ matú, ngò kut nyi é su xoq lui kut shi râ nghut lhê.

<sup>13</sup> Hkâsu mù gâ le, haû sù é bang gi, lagyo apyoq pé, mhaû zô é mù zui bang, Hkrisduq é lagyo pé dông kut mhaû é bang nghut akô.

<sup>14</sup> Haû gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq dông kut mhaû é sù nghut lhê.

<sup>15</sup> Haû mù, Tsadán é dui-nhâng zoshâng wui gi, dingmán hkyô é dui-nhâng zoshâng wui dông kut mhaû é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

#### *Yhâng É Wuîhke Jamjau Hkyô Eq Séng Lui, Poluq Gumrong É Hkyô*

<sup>16</sup> Ngò puq táí kôlé, ó yuq le, ngo lé byù gò dông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrong sháng gaq, byù gò lé nungmoq hap yu é su, ngo lé hap yù kó laq.

<sup>17</sup> Ngò, haû su gumrong é hkyô gi, haû Yhumsîng o é dông ngò taî nyi é a nghut, byù gò rayuq dông taî nyi é ru nghut lhê.

<sup>18</sup> Byù myo myo gi, mingkân é hkyô dông gumrong nyi bum lhê nghut mù, ngò le gumrong râ nghut lhê.

<sup>19</sup> Nungmoq gi, hpaqchyí lûm bo kô é nghut mù, byù go pé lé gabú myit eq jân nyi akô nhung!

<sup>20</sup> Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

<sup>21</sup> Ngamoq gi, nungmoq lé haû hkyô kut râ má wum gyai nyhôm lhê nghu yín yû râ lé, ngò, hoq ri!

Rayuq yuq, haî lé wám gumrong é nghut jáng, ngò le, haû lé wám gumrong lhê nghu, byù gò rayuq dông ngò taî nyi é nghut lhê.

22 Yhangmoq gi, Hebre byu pé nghut akô lúhú? Ngò le nghut lhê. Yhangmoq gi, Israelaq byu pé nghut akô lúhú? Ngò le nghut lhê. Yhangmoq gi, Abraham é awut ashîn pé nghut akô lúhú? Ngò le nghut lhê.

23 Yhangmoq gi, Hkrisduq é dui-nhâng zoshâng wui nghut akô lúhú? (Ngò gi, myit a gyîng é sù dông haû su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shî râ î é adàm dàm huí wú bê nghut lhê.

24 Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lhíng hui zô wú é nghut lhê.

25 Ngò gi, dumbáng èq nhuq huí é sum dàm, shî sháng gaq ga luqgok èq dú huí é radàm, wui-sanghpo byoq huí é sum dàm, wuimau má myú byôm é ra-nyí ra-myìn hui zô wú bê nghut lhê.

26 Ngò gi, xoq xoq hkyowui htoq e ló é hkún, wui gû é gyuq chiq jung, damyaq huí é gyuq chiq jung, ngá é amyû wui chyáng mâ é gyuq chiq jung, tûngbaù pé chyáng mâ é gyuq chiq jung, myuq hkaù pé mâ é gyuq chiq jung, yoso pé mâ é gyuq chiq jung, wuimau má é gyuq chiq jung eq gumang apyoq pé chyáng mâ é gyuq chiq jung pé hui zô wú bê nghut lhê.

27 Ngò gi, mù lé zui nú zui hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí laí lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê.

28 Haú pé lhunglhâng htoq má, no-kuq hpûng pé banshoq é matú ngò myit chiq byí é hkyô gi, nyí wui ngò má wòlai dut nyi ri.

29 Rayuq yuq wum nyhóm le, ngò le wum a nyhóm râ lúhú? Rayuq yuq mara shuí kut shut é hui le, ngò myit a nyé râ lúhú?

30 Ngò gumrông râ dut é nghut le gi, ngò wum nyhóm é hkyô lé tûn shit é

pé lé gumrông râ nghut lhê.

31 Ngò a mhaû nyi é hkyô lé pyat dedu hkya-on huí é sù, haû Yhumsîng Yesuq é Íwa eq Garai Gasang sê lhê.

32 Damaskuq myuq má, Hkohlâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê.

33 Nghut kôlhâng, ngò gi, manghkoq má lúng mù, myuq xêwâm mâ é hko-hot dong mai lhoq hkyô kat é hui luí, yhâng é loq mai wó lut é nghut lhê.

## 12

### *Poluq É Myoqwup Shing-rán Pé*

1 Ngò gi, rû gumrông nyi râ za nghut lhê. Akyû wó râ a nghut kôlhâng, haû Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê.

2 Ngò gi, laí lò bê raxe myi zân hkún, mauhkûng sum tsáng nghu é má shuí toq yu huí é, Hkrisduq mâ é byù rayuq\* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhâng, Garai Gasang gi, sê lhê.

3 Yhang hparadisú má shuí toq yû huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhâng, Garai Gasang gi, sê lhê.

4 Yhang gi, byu pé taí kyô htoq râ ahkáng a wó é hkyô pé nghut é, a wó taí sân kyô é hkyô pé lé wó gyô ri.

5 Ngò gi, haú yuq sù é byu é hkyô eq séng luí gumrông râ nghut lhê; nghut kôlhâng, ngò gi, ngá é wum nyhóm hkyô eq séng luí, gumrông é mai lai luí, ngá gûng ngò gumrông râ a nghut.

6 Ngò gi, gumrông hkyô lé hkyin yù râ dut é nghut jáng lháng, byù gò dut râ a nghut, haí mù gâ le, ngò gi, tengmán hkyô taí nyi râ nghut lhê. Nghut kôlhâng, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyi lhê.

\* 12:2 Hkrisduq má é byù rayuq gâ é gi, Poluq yhânggùng yhang lé taí nyi é nghut lhê.

<sup>7</sup> Haû laklaí dik é dông ngo lé hpông shit é shing-rán mó pê é yanmai, ngo a nghutbûn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byí to bê nghut ri.

<sup>8</sup> Haû lé ngá chyáng mai yu pyám byi râ matú, ngo, Yhumsing lé sum dâm dúng tôngbán wú bê nghut lhê.

<sup>9</sup> Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé taí ri. Haû mù luí, Hkrisduq é a-tsam gi, ngo má wó joq nyi sháng gaq nghû, ngo gi, ngá é wum nyhôm é hkyô pé eq séng luí, gabú myit mai je riyhang gumrông râ nghut lhê.

<sup>10</sup> Haû nghut mù luí, ngo gi, Hkrisduq é yanmai, wum nyhôm é hkyô pé má le, rhoí huí é hkyô pé má le, wuîhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngo wum nyhôm é hkûn sheq, ngo wúm bo é nghut lhê.

### *Poluq Chiq Byí É Hkyô*

<sup>11</sup> Ngò gi, ngá gûng ngò byù gò lhoq kut yú bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngo gi, haí a nghut kôlhang, "Ahkyak lagyo pé" ga bâng é htoq má ratsuí lhang gyamgyi gyó sù a nghut.

<sup>12</sup> Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngo gi, gyai yhang hkam jan mù nungmoq chyáng kut bê nghut lhê.

<sup>13</sup> Ngò gi, nungmoq é matú, hkânhám le wòlai a dut é nhîng, nungmoq gi, hkâsu mù, gotû noqkuq hpûng pé htoq má gyamgyi gyó nyi akò lú? Ngò, haû hkyô má shut é nghut jáng, mara hkyut pyám byi kó laq!

<sup>14</sup> Ahkuí, ngò gi, nungmoq lé, sum lîng nghû râ dâm, lé kum râ rì rì nghut bê mù, nungmoq é matú wòlai gi, a dut râ nghut lhê. Haí mù gâ le,

ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dông nghut kôle, zo wuî gi, mó wui é matú sutzè hkong to byi râ dut é a nghut, mó wuî sheq, zô wuî é matú hkong to byi râ dut é nghut lhê.

<sup>15</sup> Haû mù luí, ngò gi, gyai yhang gabú é myit mai, ngo wó é jung hkangmó lé nungmoq é matú chung jai râ nghut mù, ngá gûng lé lhang chûng jai râ nghut lhê. Ngò, nungmoq lé myô chyitdap é yanmai, nungmoq gi, ngo lé shaû chyitdap kó râ lú?

<sup>16</sup> Ngò gi, nungmoq chyáng wòlai a dut é hkyô têng lhê. Nghut kôlhang, ngo gi, hpaqchyí haq da sù dut mù, mhaû lhik é dông nungmoq lé chyup yú sù dut byuq bê ga nungmoq ra-am myit akò myhi-nhung!

<sup>17</sup> Ngò gi, nungmoq chyáng nhang kat byí é byù dông, nungmoq chyáng amyat kut zô yù bê nghut lhê lú?

<sup>18</sup> Ngò gi, Tituq lé nungmoq chyáng lé râ matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nga-nhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lú?

<sup>19</sup> Ngamoq gi, nungmoq hí má ngamoq gûng ngamoq taí hung yu nyi ri nghû, ahkuí jé shoq myit nyi akò lú? Ngamoq gi, Hkrisduq má é byu pé dông, Garai Gasâng hí má taí nyi é nghut lhê. Chyitdap é gumang wui ê, ngamoq kut é jung hkangmó gi, nungmoq é akyu matú chyat nghut lhê.

<sup>20</sup> Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngo a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri.

<sup>21</sup> Ngò dum lé jé é hkûn, ngá é Garai

Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é đông nyi zô lhum nau é i-myt, gungsho zùm yap é yubak mara eq a sân-yúng é hkyô kut shut é mai myit a lhung bang myo myô é yanmai, yón kuq é hui zo râ lé, ngò myit chiq ri.

## 13

### *Ló Htáng Má Sidiq Byi É Dang Pé*

<sup>1</sup> Ahkuî, ngò, nungmoq chyáng lé kum râ gi, sum lhung nghû râ dàm nghut lhê. Haû gi, "Mara hun é hkyô hkanmó lé, í yuq sum yuq saksé hkâm é eq lhoq teng ra râ nghut lhê."\* ga kê tô é eq rajung za nghut lhê.

<sup>2</sup> Ngò gi, í lhung nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuî le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê.

<sup>3</sup> Haû gi, ngò đông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri.

<sup>4</sup> Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haû eq rajung za, ngamoq gi, Yhang su wum nyhôm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

<sup>5</sup> Nungmoq gi, lumjîng hkyô má nghut nyi lhê luq, yhumsîng gùng yhumsîng myi wú keq. Yhumsîng gùng yhumsîng chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lhê.

<sup>6</sup> Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê.

<sup>7</sup> Ahkuî, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lhê. Haû gi, ngamoq chyam hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê.

<sup>8</sup> Hkâsu mù gâ le, ngamoq gi, haû tengmán hkyô eq shaí é đông haí le a ge kut é za, tengmán hkyô é matú za kut râ dut é nghut lhê.

<sup>9</sup> Ngamoq wum nyhôm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê.

<sup>10</sup> Ngò gi, wê gâng tô é hkûn, haû hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsîng ngo lé byi é sheq ru nghut lhê.

### *Ló Htâng É Shi-kyám Dang*

<sup>11</sup> Ló htáng má ngò taí nau é gi, gumang wui ê, nguîngón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguîngón shoq asak dui nyi keq. Haû hkûn, chyitdap hkyô eq nguîngón hkyô é Garai Gasang gi, nungmoq eq rahá nyi nyi râ nghut lhê.

<sup>12</sup> Chyoiyúng é bopuq puq é eq, rayuq eq rayuq shi-kyâm lhum keq.

<sup>13</sup> Sân-yúng bang banshoq gi, nungmoq lé shi-kyâm kat akô.

<sup>14</sup> Haû Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyi é zùm yap hkyô gi, nungmoq banshoq bâng chyáng ru joq nyi sháng gaq ô.

\* 13:1 Tarâ Pun 19:15

## GALATIQ Mau Bâng Chyáng Hun Kat é Laiká (Galatians)

<sup>1</sup> Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shî bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi,

<sup>2</sup> ngò eq rahá nyi é gumang wuì banshoq bang le mô, Galatiq mau mâ é noqkuq hpúng pê chyáng dang kyô kat lhê.

<sup>3</sup> Nga-nhông é Íwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô.

<sup>4</sup> Haù Hkrisduq gi, nga-nhông é Íwa Garai Gasang ô nau é eq rajung za, agè ashop é ipyat shî mai, nga-nhông lé xe yù râ ga, nga-nhông é yubak mará é matú yhanggùng lé Yhang byi pyám bê nghut ri.

<sup>5</sup> Haù hpungwup shingkang gi, Garai Gasang chyáng pyat dedu ahtum abyuq ru joq nyi sháng gaq ô. Amen.

### *Gotú Gabú Danglù A Joq É Hkyô*

<sup>6</sup> Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kang pyâm to kôluí, shaí é gabú danglù shut lhing ló nyi kô é hkyô lé, gyai yhang maú nyi ri.

<sup>7</sup> Danglù haù gi, gabú danglù rat-suí lhang a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shaí nhang pyâm nyi kô é hkyô za nghut lhê.

<sup>8</sup> Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkung htoq mâ é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haù

yuq gi, ahtum abyuq dam byi é hui zo sháng gaq ô!

<sup>9</sup> Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byi é hui zo sháng gaq ô!

<sup>10</sup> Haù su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lhú? Haù a nghut jáng, Garai Gasang é hí má myoqdong wó râ matú shikut nyi é nghut lhê lhú? Byù lé gabú nhâng râ matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

### *Poluq Lé, Garai Gasang Ji Yu É Hkyô*

<sup>11</sup> Gumang wuì ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri.

<sup>12</sup> Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é đông wó hap yu é ru nghut lhê.

<sup>13</sup> Ngò, Yudaq noqkuq htung má nghut nyi ashî hkûn, Garai Gasang é noqkuq hpúng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak duì hkyô lé, nungmoq wó gyô wú bekô râ nghut lhê.

<sup>14</sup> Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htung lé je cháng sù nghut é htoq agó, ngá é íchýí íwa pê é htungli lé ladu lai shoq myit zing zuq sù nghut lhê.

<sup>15</sup> Nghut kôlhang, ngá nú é unghkaù mai yhang hkyin to luí, Yhang é jeju yanmai ngo lé ji yu é Garai Gasang gi,

<sup>16</sup> haù Yhang Zô é hkyô gabú danglù lé, ngò mai tungbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù,

17 Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taú ló bê nghut lhê.

18 Sum zân lai é htâng má, ngò gi, Yerusalem wà mó má doq ló mù, Petruq\* lé ló hui luí, yhang eq raxe ngo nyí, ló nyi nyi é nghut lhê.

19 Haú má, Yhumsing é yhanggu Yakuq mai lai luí, lagyo góbang lé ngò a myàng nghut ri.

20 Nungmoq lé ngò ká byí kat é má, mhaú é hkyô a bò nghú luí, Garai Gasâng hí má, hkyak, ngò taí lhê.

21 Hau htâng má, ngò gi, Suriq mau eq Kiliki mau má ê jé é nghut lhê.

22 Haú hkûn, haú Hkrisduq má nghut é, Yuda mau má é noqkuq hpúng byú wuì gi, ngo lé myoqno a shú kó nghut ri.

23 Yhangmoq gi, "Hí hkûn, nganhúng lé zing-ri sù gi, yhang mai lhoq hten rá matú radâm shikut wú é lumjǐng hkyô haú lé, ahkuí hko nyi ri." gâ é hkyanglù lé wó gyô wú kôluí za,

24 ngá é yanmai, Garai Gasang lé hkyá-ôn bum akô nghut ri.

## 2

### *Poluq Lé Lagyô Pé Lhom Hap Yu É Hkyô*

1 Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê.

2 Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tûngbaù pé chyáng ngò hko kyô nyi é gabú danglù lé, haú suwún dut bâng é hí má za shap kyô é nghut lhê.

3 Nghut kôlhang, ngò eq rahá nghut é Tituq gi, Grik byú nghut kôle, yhang lé ahpyo-kuq a hpyit nhâng kó nghut ri.

4 Haú hkaú wang lo é mhaú é gumang wuì gi, Hkrisduq Yesuq má ngamoq wó é luthkyô má jowú luí, nganhúng lé jùn dut nhâng rá dá kô é yanmai, haú hkyô gabyông htoq lo é nghut ri.\*

5 Nghut kôlhang, haú gabú danglù é tengmán hkyô gi, nungmoq chyáng joq gǐng nyi sháng gaq nghú, razup za lháng, yhangmoq é dang lé ngamoq gyo byí é a nghut.

6 Ahkyak é byú su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byú haú bang gi, ngá é mungdang má haí le a jat kat e za,

7 Petruq gi, Yudaq byu pé<sup>†</sup> lé, haú gabú danglù hko kyo rá mù má lum tô é hui bê eq rajung za, ngò gi, tûngbaù pé<sup>‡</sup> lé, haú gabú danglù hko kyo rá mù má lum tô é hui bê hkyô lé za, yhangmoq myang akô nghut ri.

8 Hkâsu mù gâ le, Yudaq byu pé é matú Petruq lé lagyo ayá dǎng byí é sù Garai Gasang gi, tûngbaù pé matú ngo lé le lagyo ayá dǎng byi bê nghut lhê.

9 Haú hkungmó-zǐng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pé shut ê rá lhê ga, myit hui bekô nghut ri.

10 Yhangmoq gi, ngá-nhik mai myùng bang lé ru bún nyi rá matú za pying kat akô; haú gi, ngò gyai yhang kut nau nyi é hkyô nghut lhê.

### *Petruq Lé Poluq Htuq Htǐng É Hkyô*

11 Antioku wà mó má Petruq jé lé é hkûn, yhang lé mara hún rá hkyô joq é yanmai, ngò gi, byu hí má yhang, yhang lé lhom htuq htǐng é nghut lhê.

12 Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm

\* 1:18 Petruq lé Kehpa le gâ lhê. \* 2:4 Yudaq byu pé ra-am gi, hpúng asik wang é bang lé Yudaq htùng tará cháng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri.

‡ 2:7 Grik má ahpyo-kuq hpyit a hkam é bang ga bo tô ri.



shuq lhaq kut ri. Nghut kôlhang, haú bang jé é hkûn, yhang gi, ahpyo-kuq hpyit râ lê gê é hpúng má lom é bang lé gyuq é yanmai, tûngbaù pê chyáng mai htoq gang luí, yhang baú nyi tô ri.

<sup>13</sup> Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lhang yhangmoq kut é gegùn labyoq hkyô má bo châng ngoq ló bê nghut ri.

<sup>14</sup> Haú gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tûngbaù rayuq đông nyi luí nhîng, tûngbaù pé lé Yudaq byu pê é htûngli hkâsu kut wó cháng nhâng râ l hú?

<sup>15</sup> Ngamoq gi, yubak dap bang gê é tûngbaù pé a nghut e za, hkû é buinyi mai yhang, Yudaq byù nghut gû bê nghut lê.

<sup>16</sup> Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lê. Haú mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng é yanmai, mara hkyut sân pyám byi é hui sháng gaq nghû, Yesuq Hkrisduq lé lumjîng bê nghut lê; hkâsu mù gê le, ó yuq le, jep é tarâ lé châng é yanmai, mara hkyut san byi é hui râ a nghut.

<sup>17</sup> Ngamoq gi, Hkrisduq má ngamoq é mara hkyut san byi é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lê l hú? Ratsuí le a nghut.

<sup>18</sup> Ngò gi, ngò hpyoq pyám bê hkyô lé dum saí kut é nghut jáng, tarâ lu laí é byù ngò nghut é lé tûn shit ri.

<sup>19</sup> Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó dui nyi râ nghut lê.

<sup>20</sup> Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lê. Ahkuí, ngò gungsho má asak dui nyi é gi, ngo lé chyitdap luí, ngá é matú yhânggûng lé Yhang byi pyám é, haú Garai Gasâng é Yhangzo lé lumjîng é yanmai ru nghut lê.

<sup>21</sup> Ngò gi, Garai Gasâng é jeju lé tô pyám é a nghut, hkâsu mù gê le, dingmán é hkyô lé, jep é tarâ đông wó yu é ru nghut le gi, Hkrisduq shî hkâm é gi, akôm dut byuq râ nghut lê." nghû taí é nghut lê.

### 3

#### *Lumjîng Myit L hú? Jep É Tarâ L hú?*

<sup>1</sup> Galatiq mau mâ é byùbâm pé é! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq eq wá nungmoq lé lêng ngoq yû bekô l hú?

<sup>2</sup> Nungmoq gi, haú Woi-nyí lé, jep é tarâ cháng luí wó yû kô é nghut lê l hú? A nghut jáng, nungmoq wó gyô yu é gabú danglù lé lumjîng luí wó yû kô é nghut lê l hú? Haú rahkat lé za, ngò sê yû nau ri.

<sup>3</sup> Nungmoq gi, haú-í yhang bâm akô l hú? Haú Woi-nyí lé lumhkaù mù kut hí kôluí nhîng, ahkuí, gungsho wum-o lé lumhkaù mù, yhumsîng myit tô é hkyô lé lhoq pán râ matú shikut nyi akô l hú?

<sup>4</sup> Nungmoq, myo myo hpuzô pyám é gi, akôm nghut akô l hú? Gè gè yhang, haú gi, akôm nghut byuq bekô l hú?

<sup>5</sup> Garai Gasang, nungmoq lé Yhâng é Woi-nyí byi é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô l hú? A nghut jáng, nungmoq wó gyô é gabú danglù lé, nungmoq lumjîng é yanmai nghut akô l hú?

<sup>6</sup> "Abraham gi, Garai Gasang lé lumjîng luí, yhang lé dingmán sù ga sôn yu é hui bê nghut ri."☆ ga, Abraham eq séng luí taí tô é lé myit wú keq.

☆ 3:6 Apûn 15:6

7 Haû mù luî, lumjínq myit bo é bang gi, Abraham é yhangzô pé\* yhang dut bê nghut é hkyô lé sé keq.

8 Lumjínq myit é yanmai, tûngbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luî, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kó râ nghut lhê."✧ ga ri.

9 Haû mù luî, lumjínq myit bo é bang gi, lumjínq myit bo é Abraham eq rahá, shimân jeju lé myang hkam yû kó râ nghut lhê.

10 Jep é tarâ châng é hkyô má nègè hkau é lhunglhâng bang gi, nhîng pyâm é hui bang chyat nghut lhê. Hkâsu mù gà le, "Tarâ laiká má kê tô é lhunglhâng lé a xoq kut é sù, ó yuq nghut kôle, nhîng pyâm é hui kó râ nghut lhê."✧ ga luî, kê tô ri.

11 Hau htoq agó, "Haû dingmán sù gi, lumjínq myit mai asak duì râ nghut lhê."✧ ga kê tô é yanmai, ó yuq nghut kôle, Garai Gasâng é hí má jep é tarâ lé châng luî, mara hkyut san byi é a huì é hkyô gi, san za nghut bê nghut ri.

12 Haû jep é tarâ gi, lumjínq myit eq hai a sêng é nghut luî, "Haú pé dông châng é sù gi, haú pé mai asak duì râ nghut lhê."✧ ga kê tô ri.

13 Haû Chyúmdang má, "Sik zîng má jén lhâng to huì é sù ó yuq nghut kôle, nhîng pyâm é hui sù nghut ri."✧ ga kê tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ mâ é nhîng é hkyô mai nga-nhûng lé hkyi yù bê nghut ri.

14 Haû Abraham lé byi tô é shimân jeju gi, Hkrisduq Yesuq é yanmai tûngbaù pé chyáng le jé sháng gaq ga, Yhang nga-nhûng lé hkyi yu é nghut ri; haû mù, nga-nhûng gi, danggidiq byi tô é Woi-nyí haû lé, lumjínq myit mai wó yû râ nghut lhê.

### Jep E Tarâ Eq Danggidiq

15 Gumang wui ê, nyí wui é asak duì hkyô mâ é lé dangtú yù mù, ngò nungmoq lé taí kôlé, byù mai chôm tô tô é dangshikaq lé, ó yuq èq le wó lhoq hpyoq pyám râ a nghut, ó yuq èq le haû má wó jat kat râ a nghut.

16 Abraham eq yhâng é awut ashín lé byi tô é danggidiq le haû eq rajung za nghut ri. "Awut ashín pé lé" gà é dang gi, byù myo myo lé gà lhê; nghut kôlhâng, haû Chyúmdang má, haû lé taí nau é a nghut e za, "náng é awut ashín lé"✧ ga taí nau é ru nghut lhê, haû é lichyúm gi, byù rayuq lé za taí é nghut lhê, haû gi, Hkrisduq nghut ri;

17 haû mù luî, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, danggidiq lé le wó lhoq htên pyám râ a nghut.

18 Hkâsu mù gà le, haû silí wunlí gi, jep é tarâ eq sêng lhûm é nghut jáng, danggidiq eq gi, hai le a sêng lhum lo nghut ri; nghut kôlhâng, Garai Gasang gi, Yhâng é jeju yanmai, Abraham lé danggidiq dông silí wunlí haû byi to bê nghut ri.

19 Haû su nghut jáng, haû jep é tarâ gi, hai akyû bò râ lhú? Haû gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, maumang lagyô pé mai gyoro sô xoq byi sù† é loq dông byi tô é ru nghut lhê.

20 Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhâng, Garai Gasang gi, rayuq za nghut lhê.

21 Haû mù luî, jep é tarâ gi, Garai Gasâng é danggidiq pé eq htuq htîng lhûm lhê lhú? Ratsuí le a nghut. Hkâsu mù gà le, dui é asak wó byi é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê.

\* 3:7 Abraham é yhangzô pé gà é gi, Garai Gasâng é yhangzô pé lé gà é nghut lhê. ✧ 3:8 Apûn 12:3 ✧ 3:10 Tarâ Pun 27:26 ✧ 3:11 Hbk 2:4 ✧ 3:12 Nhung 18:5 ✧ 3:13 Tarâ Pun 21:23 ✧ 3:16 Apûn 12:7; 13:15; 24:7 † 3:19 Gyoro so xoq byi sù gi, Mosheq nghut ri.

22 Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luî, haû byî to bê danggidiq lé gi, Yesuq Hkrisduq lé lumjínq é bang lé byi râ nghut lhê.

23 Lumjínq hkyô haû a jé shimá, nga-nhúng gi, haû jep é tara èq htongbyu dông lhúng tô é hui luî, lumjínq hkyô haû htoq shit é hkûn jé shoq myhî lhúng tô é hui wú bê nghut lhê.

24 Haû mù luî, nga-nhúng gi, lumjínq é yanmai mara hkyut san byî é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê nghut ri.

25 Ahkuî kúm gi, haû lumjínq hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

#### *Garai Gasâng É Yhangzô Pé*

26 Nungmoq lhunglhâng bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê;

27 Hkrisduq má wui-myhup hkám bê é bang nungmoq banshoq gi, Hkrisduq lé mebu sù wut to bekô nghut ri.

28 Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghû é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri.

29 Nungmoq gi, Hkrisduq eq séng bekô nghut jáng, Abraham é awut ashîn pé le, haû danggidiq eq rajung za silí wunlí hkam yù bang le, nghut akô nghut ri.

## 4

1 Ngò taí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhang, yhang, zoshâng nghut ashî hkûn gi, jùn hpó eq haî a shaî nghut ri.

2 Yhang gi, yhâng wa masat tô é ahkyíng jé shoq, yhang lé zúng é sù

eq yhúm lé up su é a-ô má ru lúng nyi ashî nghut ri.

3 Haû eq rajung za, nga-nhúng le zoshâng\* nghut é hkûn gi, mingkan uphkâng tarâ ô má jùn dut nyi é bang nghut lhê.

4 Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yù sháng gaq ga, Garai Gasang gi, jep é tarâ hkaû má é byu pé lé hkyi yù râ matú,

5 jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri.

6 Hkâsu mù gâ le, nungmoq le, zo wuî nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaû má kat byi bê nghut ri.

7 Haû mù luî, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

#### *Galatiq Mau Bang Lé Poluq Myit Chiq Byî É Hkyô*

8 Hí hkûn, Garai Gasang lé nungmoq a sé shí é u lé, nungmoq gi, nat hparâ lháng a nghut bâng é a-ô má jùn dut é bang nghut ri.

9 Ahkuî kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhíng, nungmoq gi, hkâsu mù, haû wum nyhôm é eq akyû a byî é, mingkan uphkang é tarâ shut dum lhing taû ló nyi akô lhú? Nungmoq gi, haû pê èq jùn zô é dum hui zó nau akô lhú?

10 Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashî kó nhung!

11 Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

12 Gumang wui ê, ngò gi, nungmoq su dut bê nghut é yanmai, nungmoq

\* 4:3 Bun zo shí má, zoshâng gâ é lichyúm gi, Yesuq lé a lumjínq shî é bang lé gâ lhê.

le ngò su dut keq<sup>†</sup> nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê.

<sup>13</sup> Sâng-hî dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê.

<sup>14</sup> Ngá é nòhpyo gi, nungmoq é matú wuîhke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê.

<sup>15</sup> Haú sù é nhîng, nungmoq é gabú hkyô banshoq gi, haí dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yû mù, ngo lé wám byí pyám kó râ í dut laí lò bê hkyô lé, ngò saksé wó hkâm lhê.

<sup>16</sup> Ahkuí, ngò gi, nungmoq lé haú tengmán hkyô taí kyô é yanmai, nungmoq é gye dut to bê nghut lhê lhú?

<sup>17</sup> Haú byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haí a bò; yhangmoq ô nau é hkyô gi, yhangmoq lé nungmoq taú shirông kó abe ga, nungmoq lé ngamoq chyáng mai lhoq kâng yù rá matú ru nghut lhê.

<sup>18</sup> Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haú su shirong le ge lhê.

<sup>19</sup> Ngò chyitdap é zo wuí ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí,

<sup>20</sup> nungmoq é hkyô lé myit wuîhke tô é yanmai, ahkuí, nungmoq eq rahá myang nyi mù, ngò taí é danghtê wó htaí rá matú, gyai yhang myoqbyu nyi lhê ô.

### *Hagara eq Sarah Nhik É Hkyô*

<sup>21</sup> Haú jep é tarâ ô má nyi nau é bang ê, nungmoq gi, jep é tarâ má taí

é hkyô lé a sê gyo kô é nghut lhê lhú? Ngo lé taí kyô wú kó laq.

<sup>22</sup> Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri.

<sup>23</sup> Haú jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

<sup>24</sup> Haú hkyô pé gi, dangtú ru nghut lhê, myiwe haú í yuq gi, dangshikaq í lhum eq wuí lhê; dangshikaq ralhum gi, Sinaq Bùm mâ é<sup>‡</sup> nghut luí, jùn dut râ nghut é zo wuí lé hku kat é Hagara lé taí nau é nghut ri.

<sup>25</sup> Hagara haú gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuí nyi ri. Hkâsu mù gâ le, Yerusalem haú gi, yhang zô pé eq rahá, jep é tara é jùn dut nyi kô é yanmai nghut lhê.

<sup>26</sup> Nghut kôlhang, ahtoq mâ é Yerusalem gi, jùn myhí a nghut sù nghut luí, nga-nhông é înu nghut ri.

<sup>27</sup> Hkâsu mù gâ le,  
"Zoshâng a hku é baùdung myhí ê, gabú nyi aq. Zo hkû nò a no wú shí é myiwe gi, gabú luí, gabú garû nyi aq;

hkâsu mù gâ le, haú chamchuyiyuì dut é myiwe myhí gi, làng wó é myiwê htoq má zo wuí je myô wó bê nghut ri."

ga kâ tô ri.<sup>☆</sup>

<sup>28</sup> Gumang wuì ê, ahkuí, nungmoq gi, Isak su, danggidiq byí tô é zo wuí nghut bê nghut ri.

<sup>29</sup> Haú hkûn lé, haú gungsho dông hku lé lo é sù gi, Woi-nyí wum-o dông hku lé lo é sù lé zing-rî ri. Haú eq rajung za, ahkuí le dut nyi ri.

<sup>30</sup> Nghut kôlhang, Chyúmdang má hkâsu ga kâ tô ri lhú gâ le, "Haú jùn myhí eq yhangzo yuqzo lé hkat htoq pyám aq; hkâsu mù gâ le, haú jùn myhí é yhangzo yuqzo gi, jùn myhí

<sup>†</sup> 4:12 Ngò su dut keq gâ é lichyúm gi, nungmoq le ngò su jep é tarâ mai lut htoq keq gá nau é nghut lhê.

<sup>‡</sup> 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. <sup>☆</sup> 4:27 Esai 54:1

<sup>☆</sup> 4:30 Apùn 21:10

a nghut su é yhangzo yuqzo eq rahá, silí wunlí lé wó chôm hkam yù rá a nghut."\* gâ ri.

<sup>31</sup> Haû mù luí, gumang wuì ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

## 5

### *Hkrisduq Mã É Luthkyô*

<sup>1</sup> Nga-nhúng luthkyô wó rá matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gíng nyì mù, yhumsing gùng lé jun é wòlai hkaû má hkâtaû bainaì nyì kó.

<sup>2</sup> Ngá dang lé matsing yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó rá a nghut.

<sup>3</sup> Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhungláng lé châng kut rá lhê nghû, ngò kyô kat lhê.

<sup>4</sup> Jep é tarâ châng shikut é đông mara hkyut san byí é hui naû bang, nungmoq gi, Hkrisduq eq gâng lhùm to bekô nghut luí, haû Garaí jeju mai le byit gyó byuq bekô nghut ri.

<sup>5</sup> Ngamoq kúm gi, myit myoqbyu tô é dîngmán hkyô lé, haû Woi-nyí é yanmai lumjîng myit èq gyai yhang lánng nyì é bang nghut lhê.

<sup>6</sup> Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjîng myit za sheq, akyû bo lhê.

<sup>7</sup> Nungmoq gi, rago din wú bekô\* nghut é wá, haû tengmán hkyô lé a cháng sháng gaq ga, nungmoq lé ó yuq èq hkùm zing pyám kô é lhú?

<sup>8</sup> Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut.

<sup>9</sup> "Mún ratsuí zo gi, muk long gón lé wó lhoq daù lhê."† gâ é dang joq lhê.

<sup>10</sup> Nghut kôlhang, nungmoq gi, gotû hkyô đông a lhom yù kó rá nghut lhê nghû, Hkrisduq má hkyak ngò myit lum nyì lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo rá nghut lhê.

<sup>11</sup> Gumang wuì ê, ahpyo-kuq hpyit é hkyô lé, ngò rû hko nyì ashî nghut le gi, haî mù luí, zing-rí é lé ngò hui zô nyì rá lhú? Haû su kut é nghut jáng, haû tapzîng eq séng luí, manghkáng joq rá a nghut lo.

<sup>12</sup> Nungmoq lé lhoq byok nyì é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghû, ngò wó myit ri.

<sup>13</sup> Gumang wuì ê, nungmoq gi, luthkyô wó rá matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaú lhùm nyì keq.

<sup>14</sup> Hkâsu mù gâ le, "Náng gûng lé náng chyitdap é su, náng é chyangnâm mã é bang lé le chyitdap aq."\* gâ é hkunmó má za, jep é tarâ banshoq lo bo to bê nghut lhê.

<sup>15</sup> Nungmoq, rayuq eq rayuq ngat lhum myui lhùm nyì kô é nghut le gi, rayuq eq rayuq lhoq htên pyâm lhum kó rá nghut é lé, sidiq nyì keq.

### *Woi-nyí Èq Asak Dui Râ Hkyô*

<sup>16</sup> Nghut kôlhang, ngò taí kôlé, Woi-nyí shuí ù é đông asak dui nyì keq; haû hkùn, nungmoq gi, yubak gungsho ô nau é hkyô cháng kó rá a nghut.

<sup>17</sup> Hkâsu mù gâ le, yubak gungsho ô nau hkyô gi, Woi-nyí eq shai lhùm nyì; Woi-nyí gi, yubak gungsho ô nau hkyô eq shai lhùm nyì, dut ri. Haû í lhum gi, gyè dut lhùm ri; haû mù, nungmoq gi, yhumsing ô nau é đông hkâkut kó.

\* **5:7** Rago din wú bekô gâ é gi, woi-nyí hkyô má kô myhang lai lò bê lé taí nau é nghut lhê. † **5:9** Shut é đông mhoqshit é hkyô ratsuí gi, muk long gón lé mún èq wó lhoq daù é su, nungmoq banshoq lé wó lhoq nghoq yu pyâm lhê. ✨ **5:14** Nhung 19:18

<sup>18</sup> Nghut kôlhang, nungmoq lé Woi-nyí eq hkyô hî é nghut jáng, nungmoq gi, jep é tarâ ô má a nghut lo nghut ri.

<sup>19</sup> Yubak gungsho é muzó gi, de de yhang nghut lhê; haú pé gi, ashop é dông gungsho zùm yap é hkyô, a sân-yúng é hkyô, shut é dông nyí zô lhum nau é myit,

<sup>20</sup> hparà noq hkyô, myoqheq mù kut é hkyô, a jú é hkyô, byoq lhum é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô,

<sup>21</sup> ningsú é hkyô, î shuq wut é hkyô, zo yê shuq yê mù achaq achyut kut é hkyô pé eq haú pé su kut é gotû hkyô pé nghut ri; haú su kut nyí yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé tai wú bê eq rajung za, ahkuí lé, nungmoq lé ngò sidiq byí nyí lhê.

<sup>22</sup> Nghut kôlhang, Woi-nyí é ashi gi, chytidap hkyô, gabú hkyô, nguingón hkyô, myit hîng hkyô, nhik-u nú é hkyô, ge é hkyô, lhumzui hkyô,

<sup>23</sup> nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyám râ tarâ haí le a joq nghut ri.

<sup>24</sup> Hkrisduq Yesuq eq séng bê bang kúm gi, yubak gungsho ô naù hkyô lé le, hau é yut yut ô naù myit eq shirong é hkyô pé lé le, tapzîng má jén sat pyám bekô nghut ri.

<sup>25</sup> Nga-nhúng gi, Woi-nyí mai asak ùi bê nghut mù, haú Woi-nyí htâng châng nyí sháng.

<sup>26</sup> Nga-nhúng gi, akôm gyáng dang tái luí, rayuq eq rayuq jeq ho lhum é eq manon lhum é bang, a dut nyí sháng gaq.

## 6

### *Lhunglhang Bang Lé, Ge É Hkyô Kut Byi Râ Hkyô*

<sup>1</sup> Gumang wuì ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit eq haú yuq lé lhoq pun lhoq kyíng yù keq. Nghut kôlhang, nàng gi,

gunglaú é a hui sháng gaq, sidiq nyí aq.

<sup>2</sup> Rayuq eq rayuq é wòlai lé tê byí lhum nyí keq; haú dông mai, nungmoq gi, Hkrisduq é tarâ lé wó lhoq dik kó râ nghut lhê.

<sup>3</sup> Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri.

<sup>4</sup> Yuq hkangmó gi, yhumsing nyí yap é hkyô lé tai myit wú keq; haú hkûn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê.

<sup>5</sup> Hkâsu mù gâ le, yuq hkangmó gi, ó le ô wò lé wùn waq ra râ dut lhê.

<sup>6</sup> Haú mungdang lé mhoq yu é sù gi, mhoqshit byí sù lé, ge é zè banshoq gàm byi sháng gaq.

<sup>7</sup> Garai Gasang lé gi, wó rhoí râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê.

<sup>8</sup> Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê.

<sup>9</sup> Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyû myang hkam yù râ nghut lhê.

<sup>10</sup> Haú mù luí, nga-nhúng gi, kut râ ahkyíng wó tô é u lé, byù lunglhang bang lé ge é hkyô kut byi sháng, haú lumjîng hkyô eq sêng é ikun byu pé lé, je riyhang kut byi sháng.

### *Ahpyo-kuq Hpyit É Hkyô A Nghut E Za, Byù Sik Hpân Huí É Hkyô*

<sup>11</sup> Ngò, nungmoq lé, ngá é loq eq hkâ-í kô é laiká cham kâ kat byí é lé, wú wú keq!

<sup>12</sup> Ahtoq pyâm za ge é hkyô lé kut shit nau é bang gi, ahpyo-kuq hpyit

kó sháng gaq ga, nungmoq lé zik shikut nyi é bang nghut akô; yhangmoq haû su kut é hkyô gi, Hkrisduq é tapzing é yanmai zing-ri huí é hkyô lé, koi pyám râ matú za nghut ri.

<sup>13</sup> Hkâsu mù gâ le, haû ahpyo-kuq hpyit é bang lháng jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri.

<sup>14</sup> Ngò kúm gi, nga-nhông é Yhumsîng Yesuq Hkrisduq é tapzîng eq séng luí gumrong é mai lai luí, hai má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê.

<sup>15</sup> Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê.

<sup>16</sup> Tarâ haû lé châng é lhunglháng bâng é ahtoq má le, haû Garai Gasâng é Israelaq byu pé\* é ahtoq má le, nguingón hkyô eq shogyo nhikmyin hkyô gi, ru joq nyí sháng gaq ô.

<sup>17</sup> Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

<sup>18</sup> Gumang wui ê, nga-nhông é Yhumsîng Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

\* **6:16** Bun zo shí lhum mâ é *Israelaq byu pé* gâ é gi, hpúng byû wui banshoq lé taí nau é nghut lhê.

## EHPESU Pê Chyáng Hun Kat é Laiká (Ephesians)

<sup>1</sup> Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

<sup>2</sup> Nga-nhung é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

*Hkrisduq Mâ É, Woi-nyí Hkyô Shimân Jeju Pé*

<sup>3</sup> Mauhkûng htoq tsáng myhâng má, woi-nyí hkyô eq sêng é shimân jeju jung hkanmó lé, Hkrisduq má nga-nhung lé shimân byi sù, nga-nhung é Yhumsîng Yesuq Hkrisduq é Yhângwa, Garai Gasang gi, hkungsô wó nyi sháng gaq.

<sup>4</sup> Hkâsu mù gâ le, nga-nhung gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhung lé hkyin yu to bê nghut ri.

<sup>5</sup> Hau htoq agó, Yhang, nga-nhung lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhung lé masat to bê nghut ri.

<sup>6</sup> Haû mù, Yhang chyitdap é Sû\* má, nga-nhung lé láí láí byi bê nghut é, hpungwup shingkang bo é jeju chyunghuq lé, chôm hkya-on sháng.

<sup>7</sup> Garai Gasâng é agùn agó é jeju yanmai, nga-nhung mara hkyut byí é hui luí, Yhang Zô é sui đông mai, nga-nhung gi, Yhang má hkyi yù hkyô wó yu é nghut lhê.

<sup>8</sup> Jeju haû lé gi, hpaqchyí byéng-yá eq sê gyô é nyan banshoq le kut,

\* **1:6** *Yhang chyitdap é Sû gâ é gi, Yesuq lé tái nau é nghut lhê.*

Yhang, nga-nhung lé agùn agó byi bê nghut lhê.

<sup>9</sup> Garai Gasang gi, Yhang myit ngui é eq rajung za, Hkrisduq đông mai kut râ matú hen to bê nghut é, Yhâng é zaú tô é hkyô lé, nga-nhung lé shit bê nghut ri.

<sup>10</sup> Sê gyo wuî é hkyô haû gi, lhoq dik râ ahkyíng jé jáng, mauhkûng htoq eq myigùng htoq mâ é lhunglhang lé, Hkrisduq má rading ralhum za kut râ nghut é hkyô nghut lhê.

<sup>11</sup> Hkrisduq má sân-hi myit my-oqbyù bang nghut é nga-nhung gi, Yhâng é hpungwup shingkang lé hkya-on kungtôn sháng gaq ga,

<sup>12</sup> Garai Gasang gi, Yhang myit sôn tô é lhunglhang lé ban kut mù, Yhâng ô nau é đông, hí mai myit hpyit doqđân to bê eq rajung za, nga-nhung lé le, Hkrisduq má hkyin yu to bê nghut ri.

<sup>13</sup> Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjîng bekô nghut é yanmai, haû gidiq byi tô é Chyoiyúng Woi-nyí dizik htùng tap byi é hui bekô nghut ri.

<sup>14</sup> Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huí é hkyíng jé shoq, Chyoiyúng Woi-nyí haû gi, nga-nhung é muizè lé hkyak wó yù râ nghu é masat nghut ri.

*Poluq Kyûdung Byí É Hkyô*

<sup>15</sup> Haû mù luí, Yhumsîng Yesuq lé nungmoq lumjîng é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai,

<sup>16</sup> ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê.

<sup>17</sup> Nga-nhung é Yhumsîng Yesuq Hkrisduq é Garai Gasang nghut é, hpungwup shingkang bò sù haû Îwa gi, Yhang lé nungmoq je sé râ matú,



hpaqchyî byéng-yá wó byî é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê.

<sup>18</sup> Hau htoq agó, Yhang, nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shing kang bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjín bang nga-nhúng é matú nghut é lé le,

<sup>19</sup> nungmoq wó sé râ matú, nungmoq é myit myoqjí lhoq gyeng byî é hui sháng gaq nghû, ngò kyúdung byî nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù,

<sup>20</sup> mauhkúng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri.

<sup>21</sup> Hkrisduq gi, uph kang é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhíng é myìng lhunghâng é htoq má le, je gyaú é sù nghut lhê.

<sup>22</sup> Hau htoq agó, Garai Gasang gi, lhungháng lé Yhâng é hkyiwa ô má tô to luí, haû noqkuq hpúng é matú, Yhang lé, jung hkan gmó é ushuq dut râ dông masat to bê nghut ri.

<sup>23</sup> Noqkuq hpúng haû gi, Hkrisduq é gungdu nghut luí, hkyô hkan gmó má jung hkan gmó lhoq byíng jup é Hkrisduq byíng nyi é nghut ri.

## 2

### *Hkrisduq Má Asak Dui É Hkyô*

<sup>1</sup> Laí ló bê hkûn, nungmoq gi, tarâ lu laí é eq mara kut shut é hkyô pé é yanmai, shi tô é bang dut kô é nghut lhê.

<sup>2</sup> Haú hkûn, nungmoq gi, mingkan ngón hkyô pé má lhaq châng nyi kô é htoq agó, haû tarâ a cháng bâng é myit má ahkuí mù zú nyi é sobyô nghut é, maulat lé up sù htâng châng nyi kô é bang nghut lhê.

<sup>3</sup> Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô naú gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haû mù, góbang eq rajung za, nga-nhúng gi, Garai Gasang é nhikmo-yo hkyô eq gingdán wú é bang chyat nghut lhê.

<sup>4</sup> Nghut kôlháng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlháng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri.

<sup>5</sup> Haû mù, nungmoq gi, Garaí jejú èq za hkyi yu é hui bekô nghut ri.

<sup>6</sup> Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga,

<sup>7</sup> nga-nhúng lé, Hkrisduq eq rahá lhoq dui toq yû mù, mauhkúng htoq tsáng myhâng má, Yhang eq rahá zùng nhang to bê nghut ri.

<sup>8</sup> Hkâsu mù gâ le, nungmoq gi, lumjín é dông mai Garaí jejú èq za hkyi yu é hui bekô nghut ri. Haû gi, nungmoq chyáng má é a nghut, Garai Gasang jeju chyunghuq za ru nghut lhê.

<sup>9</sup> Haû gi, yhumsing é muzó mai wó é a nghut é yanmai, ó yuq le nghut-bun râ hkyô a joq.

<sup>10</sup> Hkâsu mù gâ le, nga-nhúng gi, Garai Gasang é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

### *Hkrisduq Má Rading Ralhum*

<sup>11</sup> Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq

lé, "ahpyo-kuq hpyit a hkâm bang" ga byi kô é hkyô lé le, myitbun keq.

<sup>12</sup> Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq.

<sup>13</sup> Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

<sup>14</sup> Hkâsu mù gâ le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi pyám byi luí, haú í myû\* dut nyi é lé, rahú za dut nhâng bê nghut ri.

<sup>15</sup> Haú hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htúm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byû sik ra-myû za hpan to rá matú nghut ri; haú dông, simsaq hkyô kut byi bê nghut ri.

<sup>16</sup> Yhang gi, a naù a wôm lhûm é hkyô lé, haú tapzîng má lhoq htúm pyám byi mù, haú tapzîng dông mai, byû myu í myu é lé ragùng za kut luí, Garai Gasang eq xoq byi bê nghut ri.

<sup>17</sup> Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri.

<sup>18</sup> Hkâsu mù gâ le, nga-nhúng í myû gi, Yhang dông mai, Woi-nyí ralhum zâ èq, haú Íwâ chyáng wàng rá hkyô dong bê nghut ri.

<sup>19</sup> Hau é yanmai, nungmoq gi, tûngbaù pé eq byû bíng pé a nghut lô é za, Garaí é byu pé eq rahá, mingbyû wuì eq yhumbyû wuì chyat nghut bekô nghut luí,

<sup>20</sup> haú lagyô pé eq myiqhtoí pé, hi tô é apûn awang htoq má xuq tô

é bang chyat nghut akô; Hkrisduq Yesuq yhang, haú mâ é ahkyak é htungchyûn luqgok dut bê nghut ri.

<sup>21</sup> Yhang má, wahpang lhum gón xoq lhûm bùm é nghut mù, haú Yhumsîng má chyoiyúng noqkuq yhûm ralhum dut lò bê nghut ri.

<sup>22</sup> Woi-nyí dông mai, Garai Gasang nyi rá jang dut rá matú, nungmoq le, Yhang má, wahpang su tsuq é chôm huí nyi bùm bekô nghut ri.

### 3

#### *Poluq, Tûngbaù Pé É Tarâ Hkô Sará*

<sup>1</sup> Haú su nghut mù, Hkrisduq Yesuq é hkyô lé, nungmoq tûngbaù pé chyáng hko kyo é yanmai, htongbyû dut sù, ngò Poluq gi, nungmoq é matú kyûdung byi lhê.

<sup>2</sup> Nungmoq lé dojaú rá é matú, ngo lé byi tô é Garai Gasâng jeju ayá shí lé, nungmoq gè gè wó gyô wú bekô rá nghut lhê.

<sup>3</sup> Haú gi, hí hkûn, ngò, tot é dông kê tô wú bê eq rajung za, haú zaú tô é hkyô lé, shîng-rán dông ngo lé sé nhang é nghut ri.

<sup>4</sup> Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sé é lé, nungmoq wó sé kó rá nghut lhê.

<sup>5</sup> Haú lé, laí lò bê ipyat pé mâ é byu pé lé a sé nhang é nghut kôlhang, ahkuí gi, Garai Gasâng é chyoiyúng é, lagyô pé eq myiqhtoí pé lé, haú Woi-nyí èq hpông shit bê nghut ri.

<sup>6</sup> Zaú tô é hkyô haú gi, gabú danglù dông mai, Hkrisduq Yesuq má, Israelaq byu pé eq rahá, tûngbaù pé le, hkûng xoq bang wó dut luí, gungdu ralhûm é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

<sup>7</sup> Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú

\* **2:14** *I myû gâ é gi, Israelaq byu pé eq tûngbaù pé lé gâ lhê.* † **2:17** *Wê gâng nyi é bang gâ é gi, tûngbaù pé lé gâ lhê.* ‡ **2:17** *Chyâng htep nyi é bang gâ é gi, Israelaq byu pé lé gâ lhê.*

danglù shî taí râ dui-nhâng zoshâng dut é nghut lhê.

<sup>8</sup> Ngò gi, haù Garai Gasâng é byu pé mâ é tiq dik sù htoq má lháng je tiq sù nghut kôlhâng, haù Hkrisduq é a ung htoq taí é wó sùt hkyô lé, tungbaù pé chyáng hko kyo râ matú le,

<sup>9</sup> haù lhunglháng lé hpan é Garai Gasang má, laí lò bê ipyat pé má zaú tô é, zaú tô é hkyô haù lé hkâsu kut tô é lé, yuq hkangmó lé taí sân kyo râ matú le, jeju shî, ngo lé byi bê nghut ri.

<sup>10</sup> Haù gi, nga-nhông é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

<sup>11</sup> haù Garai Gasâng é hpaqchyí mó góng lé, noqkuq hpúng dông mauhkông htoq tsáng myhâng mâ é uphkâng bang eq ahkâng ayá wó bang lé, ahkuí sé nhâng râ matú nghut lhê.

<sup>12</sup> Nga-nhông gi, nga-nhông é Yhumsing Hkrisduq Yesuq eq rading ralhum za nghut é yanmai le, Yhang lé lumjínng é yanmai le, Garai Gasang chyáng, wám é myit eq a gyuq a wám é myit eq wó htep ê é nghut lhê.

<sup>13</sup> Haù mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haù gi, nungmoq é matú akyù bò râ hkyô nghut lhê.

#### *Ehpesu Myuq Byu Pé Lé Kyûdung Byí É Hkyô*

<sup>14</sup> Haù pé é yanmai, ngò gi, haù Íwá é hí má hkyihput htuq luí kyûdung é nghut lhê.

<sup>15</sup> Mauhkông eq myigùng htoq mâ é Yhâng é ikun byù lhunglháng gi, Yhâng chyáng mai mying wó yu é chyat nghut lhê.

<sup>16</sup> Nungmoq é lumjínng myit mai, nungmoq é i-myit unghkaù má Hkrisduq wó nyi nyi sháng gaq nghû,

<sup>17</sup> Yhang é hpungwup shingkang bo é agùn agó wó sùt é mai, nungmoq é i-myit unghkaù mâ é sù lé, Yhâng é Woi-nyí dông, hpungwup a-tsâm èq wum-o lhoq kóng byi râ matú, ngò

kyûdung byi lhê. Hau htoq agó, nungmoq gi, chyitdap myit má amyit chin to luí, awang hi to mù,

<sup>18</sup> sân-yúng bang eq rahá, hau é apyí, a-tsung, myhâng, nik, hkâ-í nghut é lé, rago wó sé kôluí,

<sup>19</sup> Garai Gasâng é gumjup é hkyô lhunglhâng èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

<sup>20</sup> Ahkuí, nga-nhông é hkaù má mù zuí nyi é, Yhâng é wum-o a-tsâm é yanmai, nga-nhông dúng é banshoq eq myit é hkyô lhunglháng htoq je wó kut byí é Su chyáng,

<sup>21</sup> haù noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rû bo nyi sháng gaq ô! Amen.

## 4

### *Hkrisduq É Gungdu Má Rading Ralhum Za*

<sup>1</sup> Haù mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haù Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê.

<sup>2</sup> Hkyô hkat hkangmó má i-myit lhoq nyhum é eq i-myit nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq.

<sup>3</sup> Haù Woi-nyí èq byí é myit hui hkyô lé, nguínngón hkyô dông mai châng nyi râ matú, wó dut é í shikut nyi keq.

<sup>4</sup> Nungmoq gi, wut yù hui kô é hkún, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri.

<sup>5</sup> Yhumsing rayuq za, lumjínng hkyô rahkat za, bapisma ralhum za nghut nyi ri.

<sup>6</sup> Banshoq bâng é Íwa nghut sù Garai Gasang le, rayuq za nghut nyi ri;

Yhang gi, banshoq bâng é ahtoq má nghut luí, lhunglhang dông mai mô kut é eq lhunglhang é ahkaú má lúng nyí sù nghut ri.

<sup>7</sup> Nghut kôlhang, nga-nhúng yuq hkanmó gi, jeju chyunghuq lé, Hkrisduq mai ké byí é dông wó yu é nghut lhê.

<sup>8</sup> Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gàm byí ri."<sup>\*</sup>

ga, Chyúmdang má tái tô é nghut lhê.

<sup>9</sup> Haú "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naú é a nghut lhi?

<sup>10</sup> Haú gyó lé é Sù gi, jungkhankang jungmó lé lhoq byíng jup râ matú, mauhkûng banshoq é ahtoq má doq ló é Sù yhang nghut lhê.

<sup>11</sup> Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byí to bê nghut ri.

<sup>12</sup> Haú bang gi, Garai Gasâng é byu pé lé wùn waq âng é muzó pè é matú, hen lajâng é bang nghut ri. Haú hkûn sheq, Hkrisduq é gungdu gi,

<sup>13</sup> haú lumjíng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô dîng bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyí râ nghut lhê.

<sup>14</sup> Haú mù, nga-nhúng gi, wuibaú pè eq hí shut htâng shut bat myhú é su dut é eq, byu pè é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkanmó eq, shí shut hé shut mut tâng é su dut é lé hui zô é zoshâng wui su a nghut lô é za,

<sup>15</sup> chyitdap myit mai tengmán é dang lé tái nyí jáng, Hkrisduq nghu é ulhum má hkyô hkanmó kô myhang lò râ nghut lhê.

<sup>16</sup> Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zui saí nyí é nghut jáng, gungdu haú gi, chyitdap myit má, yhânggùng yhang kô lò myhang lò râ nghut lhê.

### *Byù Sik Dông Asak Dui Râ Hkyô*

<sup>17</sup> Haú mù luí, haú Yhumsing é ahko ahkáng mai ngò nungmoq lé tái nau é hkyô gi, haú tûngbaú pé gi, akyû a bo é lé myit mù, asak dui kô é su, nungmoq gi, hkâkut kó.

<sup>18</sup> Yhangmoq gi, sê gyô é nyan chut byuq bekô nghut é eq yhangmoq myit htan nyí kô é nghut mù, haí le a sé kô é yanmai, Garai Gasang byí é asak eq wê gâng byuq bekô nghut ri.

<sup>19</sup> Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkanmó lé je wó kut xoq nyí shoq ga, yhumsing gùng lé, gungsho ô naú gadaú é hkyô má ap pyám bekô nghut ri.

<sup>20</sup> Nungmoq kúm gi, Hkrisduq é hkyô lé haú dông mhoq yú kô é a nghut.

<sup>21</sup> Nungmoq gi, Yesuq chyáng mâ é tengmán hkyô dông, Yhâng é hkyô lé wó gyô wú é eq mhoq yu wú bekô nghut lhê.

<sup>22</sup> Haú mù, nungmoq gi, hí hpyang lhê é nungmoq é nyí yap sâmlai nghut é, ô naú gadaú luí, yhumsing gùng yhumsing mhaú pyám é dông htên byoq ló nyí é nungmoq é byù xau lé tô pyám râ matú mhoq yú bê eq rajung za,

<sup>23</sup> nungmoq é i-myt lé asik htaí pyám nhâng keq;

<sup>24</sup> hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

<sup>25</sup> Haú mù, nga-nhúng banshoq bang gi, gungdu ralhum é gungsho showui showang pé chyat nghut é

<sup>\*</sup> 4:8 Hkya-on 68:18

yanmai, nungmoq yuq hkanmó gi, mhaú é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê.

<sup>26</sup> "Nungmoq nhikjum yô é hkûn, mara hkâkut kó."✠ nungmoq gi, buí wàng shoq nhikjum hkâyô nyí kó.

<sup>27</sup> Nat Tsadán lé le, jowò hkâbyi kó.

<sup>28</sup> Hkau sù gi, a dum hkau lo sháng gaq; râ nyí é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyí luí, muzó zuí shikut ra râ nghut lhê.

<sup>29</sup> Nungmoq é nhut mai agè agáu é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq.

<sup>30</sup> Haú hkyí yù râ buinyi é matú, dizik dông nungmoq lé tap to byí é Garai Gasâng é Chyoiyúng Woi-nyí lé hkâlhoq yón kó.

<sup>31</sup> Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agáu é hkyô pé banshoq lé, nungmoq tô pyám keq.

<sup>32</sup> Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhùm nyí keq.

## 5

<sup>1</sup> Haú mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq.

<sup>2</sup> Hkrisduq gi, Yhânggùng lé namngón jung hkungga eq shigu hkungga dông, nga-nhùng é matú Garai Gasâng chyáng Yhânggùng yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyí keq.

<sup>3</sup> Hau htoq agó, ashop é dông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq taí lhang hkâtaí kó; hkâsu

mù gâ le, nungmoq gi, Garai Gasâng é chyoyúng byu pé nghut lhê.

<sup>4</sup> Haú eq rajung za, a taí gíng é, ahoq ahí dang, dangsôm eq hkunchoq dông gyá é dang pé lé a taí é za, jeju hkya-on dang za taí nyí keq.

<sup>5</sup> Hkâsu mù gâ le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyí keq.

<sup>6</sup> Ó yuq nghut kôle, dangsôm\* dông mai nungmoq lé a wó mhaú kó sháng gaq; hkâsu mù gâ le, haú hkyô pê é yanmai, Garai Gasâng é nhikmo-yo hkyô gi, haú jìno a gyo bâng é ahtoq má jé râ nghut lhê.

<sup>7</sup> Haú mù luí, haú bâng chyáng hkâbo wang lòm kó.

<sup>8</sup> Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsing má maubó pé nghut bekô nghut ri.

<sup>9</sup> Haú Yhumsing ô nau é hkyô haí nghut é lé ho htoq yù mù, maubó é yhangzô pé dông asak dui keq.

<sup>10</sup> Hkâsu mù gâ le, haú maubó é ashi gi, ge é hkyô banshoq, dingmán é hkyô eq tengmán hkyô chyat nghut ri.

<sup>11</sup> Haú ashi a zuí é mauchut tuq muzó má a bo wang lom é za, yhangmoq é mara lé tân shit keq.

<sup>12</sup> Hkâsu mù gâ le, haú jìno a gyo bang haq zaú kut é hkyô lé gi, taí htoq le lhang hoq hpo nghut ri.

<sup>13</sup> Nghut kôlhang, junghkang jungmó lé, haú maubó èq tân shit jáng gi, wó byu-myang é chyat dut râ nghut lhê.

<sup>14</sup> Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyí sù è, toq aq, haú shi é mai dui toq aq hkoí; haú jáng,

✠ 4:26 Hkya-on 4:4 \* 5:6 Dangsôm gâ é gi, Garai Gasâng é nhikmo-yo hkyô a jé râ ga taí é dang nghut lhê. † 5:14 Dang ngho shí gi, hí lhê é noqkuq hpúng pé taí gyó lo é dang nghut lhê.

Hkrisduq gi, nang lé duqbó byi  
râ nghut lhê."<sup>†</sup>  
ga luî taî tô é nghut lhê.

<sup>15</sup> Haû mù luî, nungmoq hkâsu kut  
asak dui é hkyô má gyai sidiq nyi keq;  
hpaqchyî a bò bang su a nghut é za,  
hpaqchyî bò bang su kut nyi keq.

<sup>16</sup> Buinyi ahkyíng shí pé gi, agè  
ashop é yanmai, wó é ahko ahkáng  
banshoq lé ge dik é dōng chung jai  
keq.

<sup>17</sup> Hau é yanmai, byù ngok pé a dut  
é za, haû Yhumsing ô nau é hkyô gi,  
haî nghut é lé, sê gyô yu nyi keq.

<sup>18</sup> Haû achaq achyut é yubak hkyô  
lhoq htoq é í lé hkâshuq wut kó; Woi-  
nyí lé kúm byíng nhang nyi keq.

<sup>19</sup> Nungmoq gi, hkya-on kungtôn  
dang dōng le, hkya-on mahkôn dang  
dōng le, woi-nyí eq sēng é mahkôn  
dōng le, rayuq eq rayuq dang nyo  
lhum luî, nungmoq é i-myit unghkaû  
mai, haû Yhumsing lé mahkôn hkôn  
mù, lhoq ngón nyi keq.

<sup>20</sup> Nga-nhūng é Yhumsing Yesuq  
Hkrisduq é myìng lé lang luî, jung  
hkanmó é matú, haû Íwa Garai  
Gasang lé, hkâ-nhám le jeju hkya-ôn  
nyi keq.

<sup>21</sup> Hkrisduq lé hkungga hpautap  
é myit èq, rayuq eq rayuq hpautap  
lhūm nyi keq.

### *Myi Eq Làng*

<sup>22</sup> Ikun myhî pé ê, haû Yhumsing  
uphkan é dōng chāng é su, nungmoq  
é ikun hpô pé uphkan é dōng chāng  
nyi keq.

<sup>23</sup> Hkâsu mù gâ le, Hkrisduq gi,  
haû noqkuq hpūng é ulhum nghut  
é su, haû ikun hpó gi, ikun myhî é  
ulhum nghut nyi ri; Hkrisduq gi, haû  
Yhāng gungdu nghut é noqkuq hpūng  
lé hkyi yù Sū nghut ri.

<sup>24</sup> Haû noqkuq hpūng gi, Hkrisduq  
uphkan é dōng chāng é su, ikun myhî  
pé le, hkyô hkat hkanmó má, yhang-  
moq é ikun hpô pé uphkan é dōng  
chāng nyi râ lhê.

<sup>25</sup> Ikun hpô pé ê, Hkrisduq gi, haû  
noqkuq hpūng lé chyitdap luî, hau é

matú Yhānggūng lé Yhang ap pyâm é  
su, nungmoq é ikun myhî pé lé chyit-  
dap nyi keq.

<sup>26</sup> Yhang haû su kut é gi, haû no-  
qkuq hpūng lé, mungdang dōng wui  
má chî pyâm luî, lhoq sân-yūng yû râ  
eq.

<sup>27</sup> haû noqkuq hpūng gi, agè agaú é  
eq a-ká akōng é hkyô haî le a bo é za,  
mara hūn râ hkyô a bo é eq chyoiyūng  
é, hpungwup shingkan bo é noqkuq  
hpūng dōng, Yhānggūng lé wó ap byi  
râ matú nghut lhê.

<sup>28</sup> Haû eq rajung za, ikun hpô pé gi,  
yhangmoq é ikun myhî pé lé, yhum-  
sing gungdu lé su chyitdap râ dut lhê.  
Yhumsing é ikun myhî lé chyitdap é  
sū gi, yhumsing gūng lé le, chyitdap é  
sū nghut bê.

<sup>29</sup> Ó yuq le, yhumsing gūng lé a  
chyitdap a kut é za, Hkrisduq gi, haû  
noqkuq hpūng lé kut byi nyi é su,  
yhumsing gūng lé byi tso byi huq luî,  
rago wú zūng nyi é nghut lhê.

<sup>30</sup> Hkâsu mù gâ le, nga-nhūng gi,  
Yhāng é gungdu é gungsho showui  
showang pé chyat nghut lhê.

<sup>31</sup> Haû mù, "Hau é yanmai, yuqgè  
gi, înu îwa eq gang luî, yhangmyi  
eq zùm-yap mù, yhangnhik í yuq gi,  
gungsho ralhum za dut kó râ nghut  
lhê."<sup>✧</sup> gâ tô ri.

<sup>32</sup> Haú hkyô gi, gyai yhang zaú tô  
é hkyô nghut ri. Nghut kōlhang, ngò  
gi, haû Hkrisduq é hkyô eq noqkuq  
hpūng é hkyô lé taî nyi é nghut lhê.

<sup>33</sup> Haû mù, nungmoq yuq hkanmó  
gi, yhumsing gūng lé chyitdap é su,  
yhumsing é ikun myhî lé le chyitdap  
râ dut lhê; haû ikun myhî le, yhāng é  
ikun hpó lé hkungga râ dut lhê.

## 6

### *Zo Wuî Eq Mó Wui É Hkyô*

<sup>1</sup> Zoshāng wui é, haû Yhumsing má,  
nungmoq é mó wui é jino gyo keq;  
hkâsu mù gâ le, haû gi, kut gīng é hkyô  
nghut ri.

<sup>2</sup> "Náng é înu îwa lé hkungga aq.

✧ 5:31 Apûn 2:24

<sup>3</sup> Haû jáng, nàng, nyì ngón yuqyò mù, myidàm htoq má náng é asak chyungxe hing nyì râ nghut lhê."☆ gâ é dang gi, danggidiq lom é sâng-hî lhum hkunmó nghut ri.

<sup>4</sup> Îwa pé ê, nungmoq é zo wuî lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyì keq.

#### *Jùn Pé Eq Junsing Pé É Hkyô*

<sup>5</sup> Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzuî é myit mai, nungmoq é myidàm htoq má é junsing pé é jìno gyo keq.

<sup>6</sup> Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaû mai châng kut nyi keq.

<sup>7</sup> Byù lé za dojaú é dông a nghut é za, haû Yhumsing lé dojaú nyi é dông le, shirông myit eq dojaú nyi keq.

<sup>8</sup> Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsing gi, yuq hkangmó lé shigyaú râ nghut é lé, nungmoq sê nyi lhê.

<sup>9</sup> Junsing pé ê, nungmoq le, nungmoq é jùn pé lé haû eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkung htoq má nyi é nghut luî, Yhang gi, myoqdong hkyin é hkyô a bo é sù nghut lhê.

#### *Garai Gasâng É Gyè Hking*

<sup>10</sup> Ló htâng má, taí nau é hkyô gi, haû Yhumsing eq Yhâng é hpungwup a-tsam mó má wum-o bo nyi keq.

<sup>11</sup> Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq.

<sup>12</sup> Hkâsu mù gâ le, nga-nhúng gi, gungsho eq sui lé htuq htíng é bang a nghut é za, haû uphkâng bang, ahkáng ayá wó bang, mauchut tuq

dut é mingkan shi é a-tsam pé eq mauhkung htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê.

<sup>13</sup> Haû mù luî, Garai Gasâng é gyè hking banshoq lé wut to keq; haû hkun sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkangmó lé ban kut jáng, wó yap gíng tíng nyi kó râ nghut lhê.

<sup>14</sup> Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî,

<sup>15</sup> nungmoq é hkyi má gi, haû sim-saq hkyô byi é gabú danglù hkô râ rì rì kut to mù, gíng gíng yap nyi keq.

<sup>16</sup> Hau htoq agó, haû agè ashop su é myiduq é myoshi lhunglhang lé wó sat ung pyám râ matú, lumjìng hkyô nghu é golong lé chung to keq.

<sup>17</sup> Hkyi yù hkyô shamtoq muq lé tsung to luî, Garai Gasâng é mung-dang nghut é, haû Woi-nyì é shâm lé wun chùng keq.

<sup>18</sup> Ahkyíng hkangmó má, kyûdung dang eq dúng tôngbán é dang ajung jùng eq, haû Woi-nyì má kyûdung nyi luî, machya nyi uchyang, sânyúng bang banshoq é matú, hkâ-nhám le, xoq xoq kyûdung byi nyi keq.

<sup>19</sup> Haû gabú danglù é yanmai, shamtoq-tui hut huî é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taí kyo luî,

<sup>20</sup> ngò taí râ dut é lé, a gyuq a wàm wó taí sâny kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyû bo dung byi nyi keq.

#### *Shi-kyám Dang*

<sup>21</sup> Haû Yhumsing má, chyitdap é gumang eq lhumzuî é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luî, ngò hkâsu nghut nyi é hkyô eq haî kut nyi é hkyô lé, nungmoq wó sé kó râ nghut lhê.

<sup>22</sup> Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

<sup>23</sup> Íwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chyitdap myit eq nguingón hkyô gi, haû gumang wui chyáng ru joq nyî sháng gaq ô!

<sup>24</sup> A dat htûm é chyitdap myit mai, nga-nhûng é Yhumsîng Yesuq Hkrisduq lé chyitdap é lhunghâng bang chyáng, Garaî jeju gi, ru joq nyî sháng gaq ô!



## HPILIFI Pê Chyáng Hun Kat é Laiká (Philippians)

<sup>1</sup> Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhungháng eq, hpúng-up, hpungte pé lé, dang kyô kat lhê.

<sup>2</sup> Nga-nhông é Îwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô.

### *Jeju Hkya-ôn É Hkyô*

<sup>3</sup> Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê.

<sup>4</sup> Ngò gi, kyûdung hkangmó, hkâ-nhám le nungmoq banshoq bâng é matú gabú myit eq dung byi nyi lhê.

<sup>5</sup> Hkâsu mù gâ le, nungmoq gi, sâng-hi nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê.

<sup>6</sup> Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán rá nghut lhê nghû, ngò hkyak myit lum tô lhê.

<sup>7</sup> Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí hûng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê.

<sup>8</sup> Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

<sup>9</sup> Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

<sup>10</sup> Garai Gasang é hpungwup shingkang eq hkya-on kungtôn hkyo

é matú, Yesuq Hkrisduq é yanmai lo é dingmán hkyo é ashi wó byíng nyi sháng gaq nghû le;

<sup>11</sup> nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyi lhê.

### *Dui Nyi Le Gi, Hkrisduq É Matú*

<sup>12</sup> Gumang wuì ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri.

<sup>13</sup> Hau é yanmai, haû hkohkâm-wâng zúng é lhunghâng bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri.

<sup>14</sup> Hau htoq agó, ngò htóng lúng é yanmai, haû Yhumsing Yesuq má gumang wuì nghut é myo mi-myo gi, myit wum wó yû kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

<sup>15</sup> Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

<sup>16</sup> Ge é myit mai hko é bang gi, gabú danglù lé hûng rá matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô.

<sup>17</sup> Haû góbang chyaú gi, sanséng é i-myit eq a nghut é za, ngò kyum wut é hkyô má wuìhke jamjau jat byi rá matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri.

<sup>18</sup> Nghut kôlhang, haû gi, haí rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê.

19 Hkâsu mù gâ le, nungmoq kyûdung byî é eq Yesuq Hkrisduq é Woi-nyí garúm é yanmai, ngò má dut laí lò bê hkyô gi, ngò wó luthkyô dut rá nghut é lé ngò sê lhê.

20 Ngò myit láng tô é eq myit myoqbyù tô é má, ngò gi, hoq nó haí a rá é za, hí hkun lhê su, ahkuí le, dui nyí kôlhang, shi byuq kôlhang, gyuq kyum myit a bo é hkyô lé wó yú mù luí, Hkrisduq gi, ngá gûng má hkya-on waq toq é hui rá nghut lhê.

21 Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri.

22 Nghut kôlhang, ngò gi, gungsho má rû dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè rá lú?

23 Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi rá lé gi, ngò ô nau ri, hkâsu mù gâ le, haú gi, je ge é hkyô nghut ri.

24 Nghut kôlhang, ngò gungsho má dui nyi le gi, nungmoq é matú akyû je bò rá nghut lhê.

25 Haú mù, ngò gi, shí hkyô lé hkyak myit lum to luí, lumjínng hkyô má nungmoq kô jat lo é eq gabú nyí rá matú, nyi gyó luí, nungmoq lhunglhang bang eq nyi nyi rá hkyô lé, ngò sê lhê.

26 Haú mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò rá nghut lhê.

27 Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haú jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gíng to mù, haú gabú danglù lé lumjínng hkyô má, i-myit rahkat zâ èq shikut nyi kô é hkyô lé le;

28 nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé rá nghut

lhê. Haú gi, yhangmoq é matú htên byoq hui rá kumlhá dut lò bê nghut lhê; nghut kôlhang, nungmoq gi, hkyi yù hui rá nghut lhê. Haú gi, Garai Gasang kut é nghut lhê.

29 Hkâsu mù gâ le, Hkrisduq má wó lumjínng rá é jeju za a nghut, Yhang é matú wuîhke jamjau hui rá jeju le, nungmoq hkam yù bekô nghut ri.

30 Haú gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

## 2

### *Yesuq, Myit Lhoq Nyhum É Hkyô*

1 Hkrisduq eq rading ralhum za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhik-myî é hkyô rajung jung lé, nungmoq wó yu é nghut le gi,

2 nungmoq gi, haú i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq.

3 Yhumsing é wuizat é dông le, akôm gyáng pyâm é dông le, haí le a kut é za, myit lhoq nyhum nyi mù, góbang gi, nungmoq htoq má je gyaú lhê nghú myit yu nyi keq.

4 Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi rá lhê.

5 Hkrisduq Yesuq má bo é myit yhang, nungmoq chyáng bò rá dut lhê.

6 Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi rá matú a myit é za,

7 Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

- 8 Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haú tapzîng htoq má lháng tap sat pyâm é hui shoq jîno gyô ri.
- 9 Haú mù luí, Garai Gasang gi, Yesuq é myîng lé mauhkûng htoq mâ é hkyihput, myidàm htoq mâ é hkyihput eq moming mâ é hkyihput hkanmó htuq paí luí,
- 10 haú Íwa Garai Gasâng é hpungwup shîngkâng é matú, Yesuq Hkrisduq gi, Yhumsîng nghut lhê nghû, nhut shô hkanmó yín yû sháng gaq ga,
- 11 myhang htâng é jowò má Yhang lé lhoq toq tô é eq, myîng lhunghâng é htoq má gyaú é myîng haú, Yhang lé byî to bê nghut ri.

*Kyî Pé Su Duqbó Nyî Râ Hkyô*

12 Haú mù luí, ngò chyitdap é luzúm wuî ê, nungmoq gi, hkâ-nhám le jîno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyî yû hui bê hkyô lé, gyai gyuq hkunggâ é myit eq je riyhang lhoq htoq nyî keq.

13 Hkâsu mù gâ le, Garai Gasang gi, Yhang ô nau é hkyô lé, kut naú râ myit èq wó kut râ hkyô lé nungmoq má lhoq htoq byî nyi é sù nghut lhê.

14 Haú kut kôlhâng, taí put lhûm é dông, haú a nghut jáng, dang jet jet lhûm é dông hkâkut kó.

15 Haú jáng sheq, myit goí é, agè ashop é pyat hkaú má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê.

16 Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyî kó râ nghut lhê. Haú hkûn, ngò gi, ajè a din pyâm

é, a nghut jáng, muzó lé akôm a zui pyâm é yanmai, Hkrisduq é buinyî má gumrông jowò wó berâ nghut lhê.

17 Nghut kôlhâng, ngò gi, shuq jung hkungga\* ralhum su, nungmoq é lumjîng myit mai nhongjaú byî é shigu hkungga ahtoq má hut gyûn pyâm é hui le lháng, gabú luí, nungmoq banshoq bang eq rahá chôm gabú nyi lhê.

18 Haú eq rajung za, nungmoq le gabú luí, ngò eq rahá chôm gabú nyi râ dut lhê.

*Timohti Eq Epahprodi Nhik Lé Nhang Kat Râ Gâ É Hkyô*

19 Ngò gi, nungmoq chyáng Timohti lé hân za wó nhang kat râ lé, haú Yhumsîng Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

20 Nungmoq é hkyô lé, yhang su hkyak za ge myit chiq byî é byù gotû rayuq le ngò a wó.

21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri.

22 Yhang kúm gi, zo rayuq mai íwa lé htuqbâng é su, haú gabú danglù hkyô má ngò eq rahá dojaú é yanmai, yhâng lumluq é hkyô tûn shit é lé, nungmoq sê nyi lhê.

23 Haú mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê.

24 Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haú Yhumsîng má hkyak lum nyi lhê.

25 Nghut kôlhâng, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq

\* 2:17 Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tûn shit é nghut lhê. Bun zo shí má shí hkâm é hkyô lé taí nau é nghut lhê.

chyang dum nhang taû kat byi râ lê nghû, ngò myit hpyit to bê nghut lê.

<sup>26</sup> Hkâsu mù gâ le, yhang gi, nungmoq lhunghâng bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

<sup>27</sup> Gè gè yhang, yhang gi, aluq shoî shî shoq no pyâm é nghut lê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri.

<sup>28</sup> Haû mù luî, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom lô byuq râ matú le, yhang lé ngò hân hân nhang kat byi nau ri.

<sup>29</sup> Nungmoq gi, gyai yhang gabú é myit eq, haû Yhumsîng má yhang lé lhom hkûlum yù mù, yhang su dut é bang lé hkungga keq.

<sup>30</sup> Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haû Hkrisduq é muzó é yanmai, aluq shoî shoî shî é hui zô ri.

### 3

#### *Gungsho Má Lumhkaû Râ Hkyô A Joq*

<sup>1</sup> Hau htoq agó, ngá é gumang wui ê, haû Yhumsîng má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haî a joq, nungmoq é matú akyû dut râ matú sheq ru nghut lê.

<sup>2</sup> Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.\*

<sup>3</sup> Hkâsu mù gâ le, Garai Gasâng é Woi-nyí eq noqkuq é bang, Hkrisduq Yesuq má gabú gumrong nyi é bang, gungsho má a lumhkaû é bang, nganhung gi, ahpyo-kuq hpyit hkam yu é bang akying† nghut lê.

<sup>4</sup> Ngò kúm gi, gungsho má lumhkaû râ hkyô wó ang sù nghut lê.

Góbang rayuq yuq, haû gungsho má lumhkaû râ hkyô wó âng lê ga myit é nghut le gi, ngò gi, je riyhang wó sù nghut lê.

<sup>5</sup> Ngò gi, hkû lé é htâng shit nyi nghû râ nyi má ahpyo-kuq hpyit bê sù; Israelaq amyû mâ é, Ben-yamyin é awut ashín nghut sù, Hebre byù mâ é Hebre rayuq nghut lê; jep é tarâ dông ga jang, ngò gi, Hparishe rayuq nghut lê;

<sup>6</sup> shirong é hkyô eq séng luî ga jang, ngò gi, haû noqkuq hpung lé zing-rî wú bê nghut lê; jep é tarâ mâ é dingmán hkyô eq séng luî ga jang, ngò gi, shut é hkyô a bo wú sù nghut lê.

<sup>7</sup> Nghut kôlhang, ngá é amyat nghu é pé lhungháng gi, ahkuî, Hkrisduq é yanmai sùm byuq é chyat nghut bê nghû myit yù bê nghut lê.

<sup>8</sup> Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhungháng lé ngò tô pyâm é gi, Yhang é yanmai nghut lê.

<sup>9</sup> Ngò gi, Hkrisduq lé wó yû râ eq, Yhang eq rahá wó nghut nyi râ matú, haû jung hkangmó lé buzaq nghû myit yu pyâm bê. Garai Gasâng chyang mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lê; haû gi, lumjîng myit mai wó é nghut lê.

<sup>10</sup> Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri.

<sup>11</sup> Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lê.

#### *Myit Myoqbyu Tô É Jowò Shut Din Nyi Râ Hkyô*

\* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lê. † **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lê.

12 Ngò gi, haú pé banshoq lé wó gù bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haú lé wó lhom yù sháng gaq nghû, châng hkat nyi lhê.

13 Gumang wuì ê, ngò yhang ngò gi, haú lé wó hap yù bê nghû a myit; nghut kôlhang, ngò kut é muzó ralhum gi, nunghtáng mã é lé tô-myhí pyám mù, myoq hí mã é lé wó yù shoq nghû shikut luí,

14 Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

15 Gumjup bê bang nga-nhúng lhunglhang gi, haú sù é myit bò râ lhê. Rajung jung má nungmoq myit é hkyô shai nyi kô é nghut le gi, haú lé le, Garai Gasang gi, nungmoq lé san za tân shit râ nghut lhê.

16 Hká đông nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi sháng.

17 Gumang wuì ê, nungmoq gi, ngò kut é đông chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq.

18 Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byí eq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri.

19 Yhangmoq é jhtâm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri.

20 Nghut kôlhang, nga-nhúng é yhummau gi, mauhkûng mingdán mã nghut lhê. Nga-nhúng gi, haú mã é Yhumsîng Yesuq Hkrisduq gâ é hkyi yù Sù lé, myoqbyu láng nyi é bang nghut lhê.

21 Yhang gi, jung hkangmó lé,

Yhang uphkang é a-ô má wó kut tô é Yhâng é a-tsâm eq nga-nhúng é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

#### 4

1 Haú mù luí, chyitdap é luzúm wuì le nghut mù, ngò chyitdap bûn nghâm nyi é, ngá é gabú jowò eq janmaú nghut nyi é, ngá é gumang wuì ê, haú gi, Yhumsîng má nungmoq hkâsu kut yap gîng nyi râ hkyô nghut lhê.

#### *Lhoq Pun Lhoq Kyîng É Hkyô*

2 Ngò gi, Uodia eq Suntuki nhik lé, haú Yhumsîng má rayuq eq rayuq myit huí lhúm nyi râ matú, gyai yhang pying kat lhê.

3 Ngá é mù wùn luzúm kyîng ê, ngò gi, myiwe shí nhik lé garúm yù laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wuì góbang eq le, haú gabú danglù hkyô má ngò eq rahá gyai shikut wú bê sù nhik nghut lhê.

4 Haú Yhumsîng má hkâ-nhám le gabú nyi keq! Ngò dum taí lhê, gabú nyi keq!

5 Nungmoq nú-nhâm é hkyô, byù banshoq bang lé sé nhâng keq. Haú Yhumsîng gi, chyáng bê nghut ri.

6 Haí eq séng luí le, myit hkâ-myô hkâchiq kó; hkyô hkangmó má jeju hkya-on uchyang, kyûdúng é eq dúng tôngbán é đông, nungmoq dúng é hkyô pé lé, Garai Gasâng chyáng shit kyô nyi keq.

7 Haú hkûn, sé gyô é nyan banshoq htoq má gyaú é, Garai Gasâng é nuingón hkyô gi, nungmoq é myit nhikhum eq nungmoq myit é hkyô lé, Hkrisduq Yesuq má upzúng byí nyi râ nghut lhê.

8 Jhtâm mã, gumang wuì ê, tengmán é, hpautap gîng é, dingmán é, sansêng é, wó chyitdap é, hkungga gîng é, haí mã nghut kôlhang, aróng wó dik é hkyô rajung jung, a nghut jáng, hkya-on gîng é hkyô rajung jung

bo é nghut le gi, haû sù é hkyô pé lé myit nyi keq.

<sup>9</sup> Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haî lé le châng kut nyi keq. Haû hkûn, ngu- ingón hkyô byi é Garai Gasang gi, nungmoq eq rahá nyi nyi râ nghut lhê.

### *Jeju Bùn É Hkyô*

<sup>10</sup> Ahkuî kúm gi, ngá é hkyô lé nung- moq dum myit chiq byi kô é yanmai, ngò gi, haû Yhumsîng má gyai yhang gabú nyi lhê; gè gè yhang, nungmoq myit chiq byi nyi kôhang, haû lé tân shit râ ahkáng a wó kó nghut ri.

<sup>11</sup> Ngò îsu nghû taî nyi é gi, ngò má râ é hkyô bo tô é yanmai taî é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê.

<sup>12</sup> Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lhum jup má, wam gyi kôhang, zòmut kôhang, agùn agó wó tô nyi kôhang, ra châ to kôhang, myit dik nyi râ hpaqchyî lé ngò wó mhoq yù bê nghut lhê.

<sup>13</sup> Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

<sup>14</sup> Nghut kôhang, ngò wuîhke jam- jau huî nyi é hkûn, nungmoq garúm yù kô é gi, ge é hkyô kut bekô nghut ri.

<sup>15</sup> Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyi pé má, ngò Make- doni mau mai htoq ló râ hkûn, haû byi é hkyô eq lhom yu é hkyô má, nungmoq mai lai luî, noqkuq hpúng gotû ralhûm lháng, ngo lé garúm kat é hkyô a bo é nghut lhê.

<sup>16</sup> Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dàm hûn byi bekô nghut ri.

<sup>17</sup> Ngò gi, chyunghuq chyunghtâng lé ho nyi é a nghut, nungmoq mai ashî

je myo zuî jat râ matú lé za sheq ho nyi é nghut lhê.

<sup>18</sup> Ngò gi, haî le gúm shoq myang yu é htoq agó, chyân shoq lháng nghut bê. Ahkuî, haû nungmoq hun kat é chyunghuq lé, Epahprodi chyáng mai ngò lhom myang yù luî, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhûm nghut ri.

<sup>19</sup> Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

<sup>20</sup> Hpungwup shingkang gi, nga- nhûng é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

### *Shi-kyám Dang*

<sup>21</sup> Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri.

<sup>22</sup> Sân-yúng bang banshoq gi, nung- moq lé shi-kyâm kat akô; Kehtaq é yhûm mâ é sân-yúng bang gi, je riy- hang shi-kyâm kat akô nghut ri.

<sup>23</sup> Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

## KOLOSE Pê Chyáng Hun Kat é Laiká (Colossians)

<sup>1</sup> Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi,

<sup>2</sup> Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng mâ é jeju eq nguingón hkyô gi, nungmoq chyáng ru joq nyi sháng gaq.

### *Jeju Hkya-ôn É Eq Kyûdung É Dang*

<sup>3</sup> Ngamoq gi, nungmoq é matú kyûdung byí é hkûn, nga-nhông é Yhumsing Yesuq Hkrisduq é Íwa nghut é Garai Gasâng lé ayang jeju hkya-ôn lhê.

<sup>4</sup> Haí mù gà le, Hkrisduq Yesuq má nungmoq lumjínng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê.

<sup>5</sup> Lumjínng myit eq chyitdap myit haú gi, nungmoq é matú mauhkúng htoq má hkong to byí é myit myoqbyù hkyô\* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gù nghut lhê.

<sup>6</sup> Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri.

<sup>7</sup> Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é

lhumzuí é hpúng mù wùn sù nghut lhê.

<sup>8</sup> Yhang gi, haú Woi-nyí eq nungmoq lé byí tô é chyitdap hkyô lé, ngamoq lé taí kyo sù le nghut ri.

<sup>9</sup> Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byí nyi lhê. Garai Gasâng ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghù, Yhâng chyáng kyûdung byí nyi lhê.

<sup>10</sup> Haú su kut kyûdung byí é gi, haú Yhumsing ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkangmó má ashi zuí nyi luí, Garai Gasâng lé sê é hpaqchyí má kô myhang nyi kó râ nghut lhê.

<sup>11</sup> Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kíng byí é huí nyi kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yu kó râ nghut lhê.

<sup>12</sup> Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haú Íwa lé le, jeju wó hkya-on kó râ nghut lhê.

<sup>13</sup> Hkâsu mù gà le, Íwa haú gi, nga-nhông lé, mauchut eq up é hkaú mai hkyi htoq yu luí, Yhang chyitdap é Yhang Zô é mingdán má shuí hâng é Sù nghut lhê.

<sup>14</sup> Nga-nhông gi, haú Yhang Zo dông mai, hkyi xe yu é hui mù, yubak mara hkyut pyám byí é hui bê nghut lhê.

### *Jung Hkangmó É Ushuq, Hkrisduq*

<sup>15</sup> Hkrisduq gi, myoq eq a byu-myàng é Garai Gasâng é gungghyâng isâm nghut luí, zomún dông hpan tô é

\* 1:5 Bun zo shí má bo é myit myoqbyù hkyô gi, Yesuq lé taí é nghut lhê.

lhunglhâng htoq má gyaú é sù nghut ri.

<sup>16</sup> Hkâsu mù gâ le, mauhkûng eq myigùng htoq má joq é azíng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng eq hpan to huí é chyat nghut lhê. Lhunglháng gi, Yhâng é matú, Yhâng eq hpan to huí é chyat nghut ri.

<sup>17</sup> Yhang gi, lhunglhâng é hí mâ é nghut mù, lhunglháng gi, Yhâng é yanmai joq gíng bum é chyat nghut lhê.

<sup>18</sup> Yhang gi, noqkuq hpúng nghu é gungdú é ulhum nghut ri; Yhang gi, jung hkanmó má gyaú dik é ushuq dut sháng gaq ga, sâng-hi awang nghut sù eq shí é bang má é hí dui toq é zomún dut sù nghut ri.

<sup>19</sup> Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit nguí ô nau é nghut mù,

<sup>20</sup> haú tapzíng má htoq byí é Yhang Zô é sui dông mai nuingón hkyô kut byí é eq, myigùng htoq má é azíng zê nghut nghut, mauhkûng má é azíng zê nghut nghut, lhunglháng lé, Yhang Zo dông mai, Yhang eq nuingón simsaq hkyô xoq yú bê nghut ri.

<sup>21</sup> Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlái é yanmai, nungmoq i-myt má, Yhâng é gyè dut wú bekô nghut lhê.

<sup>22</sup> Nghut kôlháng, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoiyúng é dông Yhâng é hí má shit râ matú, Hkrisduq é gungsho gungdu shí hkâm é dông, nungmoq eq nuingón simsaq hkyô xoq yú bê nghut ri.

<sup>23</sup> Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtíng nyi mù, nungmoq é lumjíng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkûng

ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

### *Noqkuq Hpúng É Matú Poluq Wùn Waq É Hkyô*

<sup>24</sup> Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzô é hkyô lé, ngá é gùng má ngò lhoq gumjup yu nyi lhê.

<sup>25</sup> Ngò gi, Garai Gasang é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê.

<sup>26</sup> Mungdang haú gi, gohkûn mai apyat pyat haq tô gyó lo é zaú tô é hkyô nghut kôlháng, ahkuí gi, haú sânyúng bang lé hpông shit bê nghut ri.

<sup>27</sup> Garai Gasang, haú su kut é gi, zaú tô é hkyô hau é agùn agó hpungwup shingkang, tûngbaù pê chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haú gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

<sup>28</sup> Hkrisduq má gumjup é dông, byù yuq hkanmó lé wó shuí jé sháng gaq nghú, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá banshoq eq taí pun taí kyíng é eq mhoqshit nyi é nghut lhê.

<sup>29</sup> Ngò, haú-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq eq wùn waq shikut nyi é ru nghut lhê.

## 2

<sup>1</sup> Ngò gi, nungmoq é matú le, Ladoki wá mó bâng é matú le, ngò eq myoqdong hkyúm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri.

<sup>2</sup> Haú su awui ahke shikut é hkyô gi, yhangmoq, myit má wum-o byí



é hui râ eq chyitdap myit má rad-  
ing ralhüm za wó dut râ matú nghut  
lê. Haú hkûn, yhangmoq gi, Garai  
Gasâng é zaú tô é hkyô nghut é, Hkris-  
duq lé wó sé râ matú, sê gyô é nyan  
lhunglhâng é isut byíng shoq lé wó yú  
kó râ nghut lê.

<sup>3</sup> Haú Hkrisduq má kúm gi,  
hpaqchyí byéng-yá eq sumsé  
hpaqchyí gâ é sutzè lhunglhâng lé  
tsíng tô ri.

<sup>4</sup> Nungmoq lé ngò haú hkyô taí kyô  
é gi, ó yuq le, dang ngón dang ngui èq  
mhoq hpyoq é dông, nungmoq lé a wó  
mhaú zo râ matú nghut lê.

<sup>5</sup> Hkâsu mù gâ le, ngá gungdu nung-  
moq eq rahá a nyi kôlhâng, ngá é myit  
gi, nungmoq eq rahá nghut nyi luí,  
nungmoq shuq shuq tap tap za nghut  
nyi kô é eq Hkrisduq lé lumjíng é má  
hkâ-í gingtíng nyi kô é lé myàng mù,  
ngò gabú nyi lê.

#### *Hkrisduq Dông Mai Wó É Gumjup É Asak Dui Hkyô*

<sup>6</sup> Haú mù luí, nungmoq gi, Hkris-  
duq Yesuq lé Yhumsíng nghû hap yù  
bekô nghut é eq rajung za, Yhang má  
asak xoq dui nyi keq.

<sup>7</sup> Yhang má apûn amyit chin gíng  
nyi mù, kô myhâng lò luí, nungmoq  
mhoq yù bê eq rajung za, lumjíng  
hkyô má wum-o lhoq kíng mù, jeju  
hkya-ôn é hkyô byíng zan nyi keq.

<sup>8</sup> Hkrisduq chyáng mâ é a nghut é  
za, mingkan shí mâ é uphkâng tarâ  
pé eq xângzo wui é htúngli cháng luí,  
mhaú zô é myit sôn hpaqchyí eq akyû  
a bo é dang dông, ó yuq èq le, nung-  
moq lé a wó shuí nghoq yú kó sháng  
gaq, sidiq nyi keq.

<sup>9</sup> Hkâsu mù gâ le, Garai Gasâng é  
gumjup hkyô banshoq gi, Hkrisduq é  
gungdu hkyangmân má lúng nyi mù,

<sup>10</sup> nungmoq gi, a-tsam bo é ban-  
shoq eq ahkáng ayá wó é banshoq  
é ushuq nghut é Hkrisduq eq sêng é

bang nghut kômù, gumjup é bang dut  
bekô nghut ri.

<sup>11</sup> Yhang má, nungmoq gi, byu loq  
èq kut é ahpyo-kuq hpyit hkyô dông  
a nghut é za, ahpyo-kuq hpyit é su,  
Hkrisduq èq yubak gungsho mara lé  
hkyut sêng pyâm é hkyô lé hkam yù  
bekô nghut ri.

<sup>12</sup> Nungmoq gi, wui-myhup hkâm é  
hkûn Hkrisduq eq rahá myhup yhûm  
é hui bekô nghut mù, Yhang lé shi é  
mai lhoq dui toq yu é, Garai Gasâng  
é a-tsam lé nungmoq lumjíng kô é  
yanmai, Yhang eq rahá lhoq dui toq  
yu é hui bekô nghut ri.

<sup>13</sup> Nungmoq é yubak mara pê é  
yanmai le, nungmoq é yubak gung-  
sho mara lé huí sêng pyâm é a hkam  
yu é yanmai le, nungmoq shi tô é  
hkûn, Garai Gasâng gi, nungmoq lé,  
Hkrisduq eq rahá asak dui nhâng  
bê nghut ri. Yhang gi, nga-nhúng  
é yubak mara lhunglhâng lé hkyut  
pyâm byi luí,

<sup>14</sup> nga-nhúng eq shai lhum mù, nga-  
nhúng lé htuq htíng é, tarâ pé bo é  
jéyáng râ jihpán lé huí sêng pyâm byi  
bê nghut ri. Yhang gi, haú lé tapzíng  
htoq má dok tap pyâm é dông yu pyâm  
byi bê nghut lê.\*

<sup>15</sup> Haú dông mai, a-tsam bò bang  
eq ahkáng ayá wó bâng a-tsam lé lang  
hkyut hkyô pyâm mù, Yhang gi, tapz-  
íng èq yhangmoq lé ung pyâm é dông,  
byù pê é hí má yhangmoq lé de de kut  
to bê nghut ri.

<sup>16</sup> Haú mù luí, nàng haí zo haí shuq  
é yanmai le, noqkuq htúng eq sêng é  
poí buinyi, Lhoxan Lhosik poí, Bánno  
buinyi eq séng luí le, nungmoq lé, ó  
yuq èq le a wó jéyáng kó sháng gaq.

<sup>17</sup> Haú pé gi, dut lò râ hkyô pê  
é wupzo chyat nghut lê; haú gùng  
gyíng gi, Hkrisduq yhang nghut nyi ri.

<sup>18</sup> Myit lhoq nyhum mhaú é eq  
maumang lagyô pé lé noqkuq é lé  
myit ngui é sù ó yuq èq le, nung-  
moq lé, chyunghuq eq a gingdán râ

\* **2:14** Yhang gi, haú lé tapzíng htoq má dok tap pyâm é dông yu pyâm byi bê nghut lê gâ é gi, Hkrisduq tapzíng má shí hkâm byi é hkûn, nga-nhúng é yubak mara banshoq lé, Garai Gasâng èq hkyut pyâm byi é lé taí nau é nghut lê. † **2:18** Byu-myang é lé gâ é gi, yhang myit htoq é shíng-rán lé gâ lê.

dông hkâkut nhâng kó. Haû su é yuq gi, yhumsing byu-myang é lé† za taî shikut mù, yhumsing é gungsho myit mai, akôm yhang nghut é lé gyáng dang taî é sù nghut ri.

19 Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuoqbang byi mù rahá lãng tsing tô é haû ulhum nghut é Hkrisduq eq xoq é hkyô lé byoq lô nhâng bê nghut ri.

20-21 Nungmoq gi, Hkrisduq eq rahá, mingkan shî mâ é tarâ pé eq shî gang bekô nghut le nhîng, haí mù, haû eq sêng lhum nyi ashî kó lhú? "Hkâzui, hkâchyâm, hkâzàng." gâ é tarâ ô má nyi nyi ashî kó lhú?

22 Haû pé gi, waxâng zô wui é hkunmó pé eq mhooqshit hkyô pé nghut é yanmai, jai chung é hkûn, htên byuq râ chyat nghut lhê.

23 Haû sù é tarâ pé gi, yhumsing yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

### 3

#### *Chyoiyúng É Đông Asak Duì Râ Hkyô*

1 Haû mù luî, nungmoq gi, Hkrisduq eq rahá lhoq duì toq é hui bekô nghut jáng, Garai Gasâng é loqyo hkyam\* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq.

2 Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq.

3 Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri.

4 Nungmoq é asak nghut sù, Hkrisduq htoq shit é hkûn, nungmoq le,

Yhang eq rahá, hpungwup shingkan hkaû má htoq shit kó râ nghut lhê.

5 Haû mù luî, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyi zô lhûm é hkyô, ye lhai nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq.

6 Haû hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê.

7 Laí lò bê hkûn, nungmoq le, haû hkyô pé đông sô wú kô é nghut lhê.

8 Nghut kôlhang, ahkuî, nungmoq gi, nhikjum yô é, nhikmo-yô é, agè ashop é đông nò shoq kut é, lumù gansang é eq, nungmoq é nhutwuî mai hkunchoq taî é hkyô shí pé ban-shoq lé, yhumsing gùng yhumsing tô pyám râ dut lhê.

9 Rayuq eq rayuq hkâ-mhaû lhum kó; hkâsu mù gâ le, nungmoq gi, nungmoq é byù xau eq byù xaû é nyi yap hkyô lé hkyut pyám mù,

10 byù sik lé tû wut yû kô é nghut lhê; byù sik haû gi, sumsé hpaqchyî đông mai, yhang lé hpân Su é gungdu isâm má asik jat lò nhang é huî nyi ri.

11 Byù sik má gi, Grik eq Yudaq byù ngu é, ahpyo-kuq hpyit hkâm bang eq a hkâm bang ngu é, byù bíng eq byù jum ngu é, jùn eq jùn a nghut sù ngu é a nyi lô é za, Hkrisduq gi, banshoq nghut mù, banshoq má nyi nyi ri.

12 Haû mù luî, Garai Gasâng èq hkyin yù huî é bang, Yhâng èq gyai yhang chyitdap é huî é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhum-sing gùng yhumsing mebu su wut to keq.

13 Nungmoq yhangchang mara kut shut é hkyô joq é nghut jáng, hkam jan byî lhum luî, rayuq eq rayuq mara hkyut byî lhum keq. Haû

\* 3:1 Loqyo hkyam nghû é gi, ahko ahkáng wó é jowò lé gâ é nghut lhê. † 3:6 jìno a gyo bâng é ahtoq má, gâ é dang, chyúmding ra-am má a bò nghut lhê.

Yhumsing gi, nungmoq é mara hkyut pyám byí é su, nungmoq le mara hkyut byi keq.

<sup>14</sup> Haú ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chytidap myit lé puq wut to keq.

<sup>15</sup> Nungmoq gi, nguingón hkyô wó râ matú ji yu é hui bekô nghut mù, gungdu ralhum mâ é bang chyat nghut bekô yanmai, Hkrisduq é ngu-ingón hkyô lé, nungmoq é myit má up nhang nyi keq. Haú mù, jeju hkya-ôn nyi keq.

<sup>16</sup> Nungmoq, rayuq eq rayuq, hpaqchyí byéng-yá banshoq eq mho-qshit é eq lhoq pun lhoq kyíng lhúm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkûn le, haú Hkrisduq é mungdang lé, nungmoq é myit nhiklhum má agùn agó bò nhang nyi keq.

<sup>17</sup> Nungmoq haí wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é myíng mai kut é hkûn, haú Íwa nghut é Garai Gasang lé Yhang dông mai jeju hkya-on keq.

*Hkristan Ikun Byu Pé Nyi Yap Râ Hkyô*

<sup>18</sup> Ikun myhí pé ê, ikun hpô pé uphkan é ahkaú má nyi keq. Haú gi, Yhumsing é hí má kut gíng é hkyô nghut lhê.

<sup>19</sup> Ikun hpô pé ê, ikun myhí pé lé chytidap nyi keq. Yhangmoq lé dang htân hkâ-nyô kó.

<sup>20</sup> Zo wuí ê, jung hkanmó má nungmoq é mó wuí é jino gyo keq; hkâsu mù gâ le, haú gi, Yhumsing ô nau é hkyô nghut lhê.

<sup>21</sup> Íwâ pé ê, nungmoq é zo wuí lé myit hkâ-nô nhâng kó, nô nhâng jáng gi, yhangmoq, myit wum gyuí byuq kó râ nghut lhê.

<sup>22</sup> Jùn pé ê, hkyô hkanmó má nungmoq é myidàm htoq mâ é jùn sîng bang uphkan é ahkaú má nyi

nyi keq; yhangmoq é myoq hí má za zui saí luí, myoqdong ho é dông a nghut é za, haú Yhumsing lé gyuq hkunggâ é eq lhuzuí é myit mai zui saí nyi keq.

<sup>23</sup> Nungmoq haí wá kut kôle, byu é matú kut é a nghut, haú Yhumsing é matú kut nyi é dông, nungmoq é myit nhiklhum banshoq eq zui saí nyi keq.

<sup>24</sup> Haí mù gâ le, nungmoq gi, haú Yhumsing chyáng mai, muizè lé chyunghuq dông wó yú kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsing Hkrisduq ru nghut lhê.

<sup>25</sup> Kut shut sù gi, yhang kut shut é marâ matú dam byí é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

## 4

<sup>1</sup> Jùn sîng bang ê, nungmoq é jùn pé lé, tengmán é eq gíng âng é dông lajang byí nyi keq; haí mù gâ le, nungmoq le, mauhkûng htoq má Yhumsing rayuq wó é lé sé kô é yanmai nghut lhê.

*Xoq Lui Pying Kat É Hkyô*

<sup>2</sup> Nungmoq gi, kyûdûng é má myit zìng zuq nyi mù, machyâ luí, jeju hkya-ôn nyi keq.

<sup>3</sup> Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq.

<sup>4</sup> Haú Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq.

<sup>5</sup> Nungmoq gi, a lumjîng bang eq zùm yap é hkûn hpaqchyí bo nyi keq; wó yu é ahkyíng hkanmó lé rago yhang chung jaí keq.

<sup>6</sup> Nungmoq gi, yuq hkanmó lé hkâsu tù taí râ hkyô wó sé kó shoq, dáng nyo é má, xô èq nghám nhang é su, hkâ-nhám le jeju byíng é dang bo nyi sháng gaq.

*Ló Htâng É Shi-kyám Dang*

<sup>7</sup> Tuhkiku gi, ngá hkyô eq sêng é danglù banshoq, nungmoq lé tai kyo rá nghut lhê. Yhang gi, ngá é chyitdap gumang, haû Yhumsing má, lhumzui é hpúng mù wùn sù eq byinzùm nghut lhê.

<sup>8</sup> Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rá eq, nungmoq lé myit wum wó byi rá matú nghut lhê.

<sup>9</sup> Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shi má dut nyi é hkyô jung hkanmó lé tai kyo kó rá nghut lhê.

<sup>10</sup> Ngò eq rahá htóng lúng sù Aris-takuq gi, nungmoq lé shi-kyâm kat ri. Barnaba é yhang za-aû Markuq le, nungmoq lé shi-kyâm kat ri. (Markuq eq séng luî pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.)

<sup>11</sup> Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haû bang za Yudaq byu pé nghut kômù, yhangmoq gi, ngo lé nhik tíng byi é bang nghut akô.

<sup>12</sup> Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhungháng má hkyak lùm to mù, gumjup luî wó gíngtíng nyi sháng gaq ga, Yhang gi, ayang nungmoq é matú kyûdung shikut byi nyi ri.

<sup>13</sup> Nungmoq é matú le, Ladoki wà mó eq Herapoli wà mó bang é matú le, yhang gi, gyai yhang mù zui shikut byi é hkyô lé, yhang é matú ngò saksé hkâm lhê.

<sup>14</sup> Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri.

<sup>15</sup> Ladoki wà mó mâ é gumang wui lé le, Numhpa eq yhang yhûm mâ é noqkuq hpúng lé le, bo shi-kyâm byi keq.

<sup>16</sup> Laiká shi lé, nungmoq lé nghap kyô é htâng má, Ladoki byu pê é noqkuq hpúng má le nghap nhâng mù, Ladoki wà bang chyáng hùn kat é laiká lé le, nungmoq nghap wú keq.

<sup>17</sup> "Haû Yhumsing chyáng mai nàng hap yù to bê é muzó lé rago za lhoq pán pyám aq." nghû, Arhkipò lé tai kyo keq.

<sup>18</sup> Ngò, Poluq gi, ngá é loq eq yhang shi-kyâm dang shi lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

## HTESALONI Pê Chyáng Hî Dàm Hun Kat é Laiká (1 Thessalonians)

<sup>1</sup> Ngò Poluq, Sila\* eq Timohti pé gi, Íwa Garai Gasang eq Yhumsing Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nuingón hkyô gi, nungmoq chyáng ru joq nyî sháng gaq.

### *Jeju Hkya-ôn É Hkyô*

<sup>2</sup> Ngamoq gi, hkâ-nhám le, nungmoq banshoq bâng é matú, Garaî Gasang lé jeju hkya-on luî, ngamoq é kyûdung dang má nungmoq lé bo dúng lhom nyi lhê.

<sup>3</sup> Nungmoq é lumjín myit mai zui saî é nungmoq é muzó lé le; chyt-dap myit é yanmai, nungmoq shikut é hkyô lé le; nga-nhúng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhúng é Íwa Garaî Gasang é hí má, ngamoq ru bûn nyi lhê.

<sup>4</sup> Garaî Gasang chyt-dap é gumang wuî ê, Yhang nungmoq lé hkyin yù bê lé, ngamoq sê lhê.

<sup>5</sup> Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o atsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut lai lo é hkyô lé, nungmoq sé gù nghut lhê.

<sup>6</sup> Nungmoq gi, wuîhke jamjau myo myo hui zo kôlhang, Chyoiyúng Woi-nyí byî é gabú myit mai, danglù haû lé lhom yù kôluî, ngamoq lé le, haû Yhumsing lé le, alik kut yu é bang dut bekô nghut ri.

<sup>7</sup> Haû mù, Makedoni mau eq Ahkaia mau mâ é lumjín bang

banshoq é alik, nungmoq dut bekô nghut ri.

<sup>8</sup> Nungmoq chyáng mai, Makedoni mau eq Ahkaia mau má, haû Yhumsing é mungdang hû htoq ló e za a nghut, Garaî Gasang má nungmoq lumjín hkyô gi, jowò hkangmó jâm ló bê nghut luî, ngamoq gi, haî le taí nó a ra lo nghut ri.

<sup>9</sup> Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luî, Garaî Gasang shut hkâsu kut lhing lò mù, rû dui nyi é eq tengmán é Garaî Gasang lé dojaú nyi é hkyô lé le;

<sup>10</sup> mauhkûng mâ é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang èq shi é mai lhoq dui toq yu é hui luî, jé lô râ nhikmó yo hkyô mai nga-nhúng lé hkyi yù sù, Yesuq nghut ri.

## 2

### *Poluq, Htesaloni Wà Mó Má Garaî Mû Wùn Waq É Hkyô*

<sup>1</sup> Gumang wuî ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê.

<sup>2</sup> Nungmoq sê é eq rajung za, ngamoq gi, hí hkûn, Hpilipi wà mó má wuîhke jamjau eq rhoî é hui wú bê nghut lhê; nghut kôlhang, nga-nhúng é Garaî Gasang garúm é yanmai, gyaí lhom htuoq htíng é hui kôle, Garaî Gasang é gabú danglù lé, a gyuq a kyum nungmoq lé wám taí kyô é nghut lhê.

<sup>3</sup> Hkâsu mù gâ le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myit đông eq nungmoq lé mhaú zô é đông a nghut e za,

<sup>4</sup> haû gabú danglù lé chùng gíng é bang ga, Garaî Gasang chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garaî Gasang

\* 1:1 Sila lé gi, Salwanu le gâ lhê.

lé, gabú nhâng râ matú shikut é ru nghut lhê.

<sup>5</sup> Hkâsu mù gâ le, nungmoq sê é eq rajung za, ngamoq gi, lhoq ngón mhaù é dang le hkâ-nhám a chùng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê.

<sup>6</sup> Ngamoq gi, byu pé mai le, nungmoq mai le, gotú ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hùn naù jáng wó hun lhê; nghut kôhang,

<sup>7</sup> Ìnu rayuq, yhang é zoshâng zô pé lé hku baù é su, nungmoq chyáng nú-nhâm é đông nyi laì lò bê nghut lhê.

<sup>8</sup> Ngamoq gi, nungmoq lé gyai yhang chyitdap luí, Garai Gasâng é gabú danglù za a nghut, ngamoq é asak pé nungmoq lé byi pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê.

<sup>9</sup> Gumang wuì ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghù, ngamoq gi, nyí lé, myín lé, mù zuí é nghut lhê.

<sup>10</sup> Ngamoq gi, lumjǐng bê bang nungmoq é hí má, hkâsu chyoiyúng é eq dingmán é, mara hùn râ a bo é bang dut laì lo é hkyô lé, nungmoq le, Garai Gasang le, saksé nghut lhê.

<sup>11</sup> Hkâsu mù gâ le, ngamoq gi, ìwa rayuq mai yhumsing yhangzô pé lé kut byi é su, nungmoq yuq hkanmó lé, myit wum byi nyi é hkyô lé le, nhik taì tǐng nyi é hkyô lé le,

<sup>12</sup> Yhang é mingdán eq hpungwup shingkang má, nungmoq lé wut yu é Garai Gasang eq gingdán é đông, nungmoq asak wó dui nyi sháng gaq nghù, nungmoq lé wum byi nyi é hkyô lé le, nungmoq yhang sê nyi lhê.

<sup>13</sup> Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é

hkùn, byu é dang lé lhom yu é đông a nghut e za, lumjǐng é bang nungmoq má mù zuí nyi é, haù Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê.

<sup>14</sup> Gumang wuì ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haù pé gi, Yudaq byu pé zing-rí é lé hui zô é su, nungmoq le, yhumsing mau má é byu pé zing-rí é lé hui zô akô nghut ri.

<sup>15</sup> Yudaq byu pé gi, haù Yhumsing Yesuq eq myiqtoì pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô.

<sup>16</sup> Tǔngbaù pé hkyi yù hui râ matú, ngamoq hko kyô é hkyô lé, yhangmoq hkùm akô; yhangmoq gi, hkâ-nhám le, yhumsing é mara lé dik shoq haù đông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

### *Htesaloni Byu Pé Lé Poluq Huí Nau Nyi É Hkyô*

<sup>17</sup> Gumang wuì ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghù, ngamoq gyai yhang shikut nyi lhê.

<sup>18</sup> Nungmoq chyáng ngamoq jé lé naù mù luí, ngò Poluq yhang, adàm dàm shikut wú bê; nghut kôhang, Tsadán gi, ngamoq lé hkùm tang pyâm ri.

<sup>19</sup> Hkâsu mù gâ le, nga-nhùng é Yhumsing Yesuq Hkrisduq é hí má, Yhang jé lé é hkùn, ngamoq é myit myoqbyù hkyô, gabú hkyô eq gumrông râ janmaù gi, haì jung wá nghut lhê gâ le, nungmoq yhang nghut nyi lhê a nghut kó lhu?

<sup>20</sup> Gè gè yhang, nungmoq gi, ngamoq é gumrông jowò eq gabú hkyô nghut nyi ri.

### 3

<sup>1</sup> Haû mù luí, ngamoq gi, haû lé a wó jân nyi lo jáng, Ahten myuq má ngamoq baú nyi gyó le je gè râ nghut lhê nghû, myit hpyit yû mù,

<sup>2</sup> wuîhke jamjau shí pè é yanmai, ó yuq le, myit a hten kó sháng gaq nghû, nungmoq é lumjínng hkyô má, nungmoq lé wum-o byi râ eq myit wum byi râ matú,

<sup>3</sup> Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhúng gi, wuîhke jamjau pé hui zo râ matú, hkyin to huí é bang nghut é lé, nungmoq yhang rago sê nyi lhê.

<sup>4</sup> Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri.

<sup>5</sup> Hau é yanmai, ngò a wó jân nyi lo jáng, haû gunглаú sù mai nungmoq lé gunглаú yû luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjínng hkyô lé wó sé râ matú, yhang lé ngò nhang kat é nghut lhê. Gunглаú sù gi, nat Tsadán nghut lhê.

#### *Timohti Lo Shit Kyô É Wum Byi Dang*

<sup>6</sup> Ahkuí kúm, Timohti gi, nungmoq é lumjínng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri.

<sup>7</sup> Haû mù luí, gumang wuì ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjínng hkyo é yanmai, nungmoq eq séng luí myit wum byí é hkyô lé ngamoq wó yû bê nghut lhê.

<sup>8</sup> Ahkuí, ngamoq gi, haû Yhumsîng má nungmoq yap gîng nyi kô é yanmai, gè gè nyi ngón bê nghut lhê.

<sup>9</sup> Nga-nhúng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on râ lhú?

<sup>10</sup> Ngamoq gi, nungmoq lé dum myàng râ matú eq, nungmoq é lumjínng myit má langhpyut é hkyô lé wó lhoq hkúm byi râ matú, nyí, myín, gyai yhang lhumzui luí kyûdûng nyi lhê.

<sup>11</sup> Nungmoq chyáng ngamoq lé râ matú, nga-nhúng é Yhumsîng Yesuq eq nga-nhúng é Íwa Garai Gasang yhang ngamoq lé hkyô hpóng byi sháng gaq.

<sup>12</sup> Nungmoq lé ngamoq chyitdap nyi é su, haû Yhumsîng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq.

<sup>13</sup> Nga-nhúng é Yhumsîng Yesuq gi, Yhâng é chyoiyúng bang banshoq eq rahá lé é hkûn, nga-nhúng é Íwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhikhum má, haû Yhumsîng mai wum-o lhoq kîng byí nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí zâng lhê.

### 4

#### *Garai Gasang Ô Nau É Dông Asak Dui Râ Hkyô*

<sup>1</sup> Xoq luí taí nau é gi, gumang wuì ê, ngamoq gi, ahkuí nungmoq cháng nyi é eq rajung za, nungmoq hká dông nyi yap luí, Garai Gasang lé gabú nhâng râ hkyô nungmoq lé mhòqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat râ matú, Yhumsîng Yesuq má nungmoq lé dúng tôngbán luí, myit wum byi kat lhê.

<sup>2</sup> Hkâsu mù gâ le, nungmoq gi, haû Yhumsîng Yesuq é ahko ahkáng dông, ngamoq mai, nungmoq lé mhoqshit to byî é hkyô pé lé, sê akô nghut ri.

<sup>3</sup> Garai Gasang ô nau é hkyô gi, haû nungmoq sân-yúng é hui râ matú le, ashop é dông gungsho zùm yap é hkyô lé koi pyâm râ matú le;

<sup>4</sup> nungmoq yuq hkanmó gi, haû Garai Gasang lé a sê é, a lumjîng bang kut é su, gungsho yut yut ô nau é hkyô a châng e za,

<sup>5</sup> haû chyoiyúng é eq hkungga gíng é sù wó dut shoq, yhumsing gùng lé wó hkang é hkyô mhoq yû râ matú le;

<sup>6</sup> shí hkyô eq séng luí, ó yuq le, yhumsing é gumang lé, a ge shut, a ge lhúngzo râ matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haû Yhumsîng gi, haû hkyô shut é banshoq lé, dam byi râ nghut lhê.

<sup>7</sup> Hkâsu mù gâ le, Garai Gasang gi, nga-nhúng lé a sân-yúng é bang dut râ matú wut yu é a nghut, chyoiyúng é dông asak dui nyi râ matú sheq wut yu é ru nghut lhê.

<sup>8</sup> Haû mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haû nungmoq lé, Yhâng é Chyoiyúng Woi-nyí byî tô é sù, Garai Gasang lé he-ngik pyâm é sheq ru nghut lhê.

<sup>9</sup> Rayuq eq rayuq chyitdap lhum râ matú, nungmoq yhang, Garai Gasang eq mhoqshit é hui bekô nghut é yanmai, gumang yhangchang chyitdap lhúm é hkyô eq séng luí, ngamoq gi, nungmoq chyáng kâ kat byi a ra lo nghut ri.

<sup>10</sup> Haû eq rajung za, nungmoq gi, Makedoni mau gón mâ é gumang wui banshoq lé chyitdap nyi akô nghut ri. Nghut kôlhang, gumang wui é, haû su je myo kut râ matú nungmoq lé ngamoq wum byî lhê.

<sup>11-12</sup> Nungmoq é nyí wui lhê é asak dui hkyô má, gotú byu pê eq hkunggâ é wó yû luí, ó yuq lé le, lumhkaû a ra wó dut sháng gaq, hí hkûn nungmoq lé ngamoq taí kyô tô é eq rajung

za, num num byù zè râ hkyô lé le, yhumsîng eq a séng é hkyô a kut wún râ lé le, yhumsing loq eq zui saí mù nyi râ lé le, nungmoq é myit myoqbyù jowò kut yû keq.

### *Haû Yhumsîng Gyó Lé Râ Hkyô*

<sup>13</sup> Gumang wui é, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haû yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjîng luí shi ló byuq é bang lé gâ é nghut lhê.

<sup>14</sup> Hkâsu mù gâ le, Yesuq shí luí, dum dui toq bê hkyô lé nga-nhúng lumjîng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghû, nga-nhúng lumjîng é nghut lhê.

<sup>15</sup> Haû Yhumsîng taí é dang eq rajung za, nungmoq lé ngamoq taí kyo kôlé, haû Yhumsîng dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut.

<sup>16</sup> Hkâsu mù gâ le, haû Yhumsîng yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkûng mai gyó lé lô luí, haû Hkrisduq má shi ló bê bang hí dui toq râ nghut lhê.

<sup>17</sup> Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haû Yhumsîng eq hui râ nghut lhê. Haû hkûn, nga-nhúng gi, haû Yhumsîng eq ahtum abyuq nyi nyi berâ nghut lhê.

<sup>18</sup> Haû mù luí, nungmoq gi, dang shí pé mai rayuq eq rayuq myit wum byî lhúm nyi keq.

## 5

<sup>1</sup> Nghut kôlhang, gumang wui é, ahkyíng buinyi eq séng luí, nungmoq lé ngamoq kâ hûn byi a ra lo nghut ri.

<sup>2</sup> Hkâsu mù gâ le, haû Yhumsing é buinyi gi, myín lé hkau sù wang é su jé lé râ nghut é hkyô lé, nungmoq rago



za sê akô nghut ri. Yhumsing é buinyi gi, Yesuq dum jé lé râ buinyi lé taí nau é nghut lhê.

<sup>3</sup> Byu pé gi, 'Nguingón yuqyo ri.' ga taí nyi bùm kô é u lé, gùng lai é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká đông lé yhangmoq wó hfang lut kó râ a nghut.

<sup>4</sup> Nghut kôlhang, gumang wui ê, nungmoq gi, mauchut hkaû má nyi é bang a nghut é yanmai, buinyi haû gi, hkau sũ lé é su, nungmoq é matú byodàn tung dut rá a nghut.

<sup>5</sup> Nungmoq lhunglhâng bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaû eq sêng é bang a nghut.

<sup>6</sup> Haû mù luí, nga-nhúng gi, byu góbang su a yhup nyi e za, machyâ luí, gyíng gyíng kut nyí sháng.

<sup>7</sup> Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô.

<sup>8</sup> Nghut kôlhang, nga-nhúng gi, nyi eq sêng lhê nghut é yanmai, gyíng gyíng kut nyí luí, lumjíng myit eq chyitdap myit lé gi, wànggô-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng.

<sup>9</sup> Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê.

<sup>10</sup> Yesuq gi, nga-nhúng yhup bân nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkám byi bê nghut ri.

<sup>11</sup> Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byi lhum mù, htuqluq htuqbáng kut lhùm nyi keq.

*Ló Htâng Lhê É Mhoqshit Hkyô*

<sup>12</sup> Gumang wui ê, nungmoq mâ é muzó shikut luí, haû Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le;

<sup>13</sup> yhangmoq zui saí é muzó jizó é yanmai, yhangmoq lé chyitdap myit đông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguingón lhùm nyi keq.

<sup>14</sup> Gumang wui ê, nungmoq lé ngamoq wum byi kat nau é gi, lagôn é bang lé lhoq pun lhoq kyíng keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myit hîng byi nyi keq;

<sup>15</sup> ó yuqlé nghut kôlhang, a ge é hkyo é yanmai, a ge é đông a taû kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byi lhum nyi keq.

<sup>16</sup> Hkâ-nhám le, ru gabú nyi keq;

<sup>17</sup> abyit alan kyûdûng nyi keq;

<sup>18</sup> hkyô hkat hkangmó má jeju hkya-ôn nyi keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

<sup>19</sup> Haû Woi-nyí lé hkâlhoq jôm pyám kó;

<sup>20</sup> myiqhtoi htoí é lé, haí su a ngàm hkâkut kó.

<sup>21</sup> Jung hkangmó lé, chyam wú luí, ge é hkyô lé zui zing nyi mù,

<sup>22</sup> agè ashop é hkyô hkangmó lé, koi pyám keq.

<sup>23</sup> Nguingón hkyo é apûn awang nghut é Garai Gasang yhang, nungmoq lé, lhunglháng lhoq sân-yúng pyám byi sháng gaq; nga-nhúng é Yhumsing Yesuq Hkrisduq dum lé é hkûn, nungmoq é woi-nyí, myit nhikhum, gungdu gi, mara hûn râ hkyô a bò sháng gaq.

<sup>24</sup> Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut râ nghut lhê.

<sup>25</sup> Gumang wuì ê, ngamoq é matú kyû bo dung byi kó laq.

<sup>26</sup> Gumang wuì banshoq bang lé, chyoyúng é chyitpuq puq é dông bo shi-kyám byi kó laq.

<sup>27</sup> Gumang wuì banshoq bang lé, hun kat é laiká shî nghap kyo râ matú, haû Yhumsing é myìng mai, ngò, nungmoq lé pying kat lhê.

<sup>28</sup> Nga-nhûng é Yhumsîng Yesuq Hkrisduq é jeju gi, nungmoq chyáng ru joq nyî sháng gaq ô!

## HTESALONI Pê Chyáng Htang Dàm Hun Kat é Laiká (2 Thessalonians)

<sup>1</sup> Ngò Poluq eq Sila, Timohti pé gi, nga-nhùng é Íwa Garai Gasang eq Yhumsing Yesuq Hkrisduq má nghut nyi bê bang, haù Htesaloni wà mó byu pé é noqkuq hpúng lé dang kyô kat lhê.

<sup>2</sup> Haù Íwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô!

### *Jeju Hkya-on É Eq Kyûdùng É Hkyô*

<sup>3</sup> Gumang wui ê, ngamoq gi, hkâ-nhâm le, nungmoq é matú Garai Gasang lé jeju hkya-on râ dut ri; haù gi, gíng lhê; hkâsu mù gâ le, nungmoq é lumjिंग myit gi, je je kô jat lo nyi lui, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

<sup>4</sup> Haù mù lui, ngamoq gi, nungmoq zing-ri huí é hkyô pé eq wuihke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjिंग hkyô lé, Garai Gasang é noqkuq hpúng pé é hí má gumrong nyi lhê.

<sup>5</sup> Shí hkyô banshoq gi, haù Garai Gasang dingmán é đông jéyáng é hkyô lé saksé tân shit é nghut lhê; haù mù lui, nungmoq gi, Garai Gasang é mingdán é matú wuihke jamjau hui zo bekô nghut é yanmai, mingdán haù eq gingdán é bang gâ é hui kó râ nghut lhê;

<sup>6</sup> Garai Gasang gi, tengmán Sù nghut lhê; haù mù, nungmoq lé jamjau byi é bang lé, Yhang mai jamjau byi râ eq,

<sup>7</sup> jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglù lé a gyo a châng é bang lé, jéyáng râ matú,

<sup>8</sup> haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê.

<sup>9</sup> Yesuq jé lé lô mù, Yhâng é chyoiyung bang má hpungwup shing kang wó yu é eq lumjिंग bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê.

<sup>10</sup> Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjिंग bekô nghut é yanmai, haù lumjिंग bang má nungmoq le lòm bekô nghut lhê.

<sup>11</sup> Haù mù lui, nga-nhùng é Garai Gasang gi, nungmoq lé, Yhang ji yu é hkyô eq gingdán ri ga râ le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjिंग myit eq sêng é muzó lhumjup lé, lhoq dik byi sháng gaq nghu le, nungmoq é matú, hkâ-nhâm le, ngamoq kyûdung byi nyi lhê.

<sup>12</sup> Ngamoq haù su dung byi nyi é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

## 2

### *A Tara É Sù*

<sup>1</sup> Gumang wui ê, haù nga-nhùng é Yhumsing Yesuq Hkrisduq dum lé râ hkyô, Yhang eq nga-nhúng rahá zup nyi to râ hkyô eq séng lui, nungmoq lé ngamoq pying kat nau é gi,

<sup>2</sup> haù Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng má é nghut lhê ga nungmoq chyáng jé é nghut jáng, nungmoq é myit lui za hkâdui kó, hkâgyuq dàn kó.

<sup>3</sup> Hkâsu mù gâ le, haû htên byoq é yhangzo nghut é a tarâ Sû htoq shit luí, haû gumlau toq é hkyô hí a htoq htoq gi, buinyì haû jé râ a nghut, haû mù luí, nungmoq lé, ó yuq èq, hká dông mai mhaû kôlhang hkâjîng kó.

<sup>4</sup> Haû yuq gi, Garai ga noqkuq huí é zè lhunghâng lé htuq htíng luí, haû pé banshoq é htoq má yhânggùng yhang lhoq gyaú yû râ nghut lhê; haû mù luí, Garai Gasâng é noqkuq yhûm má zung to luí, yhânggùng yhang Garai Gasang nghut lhê ga taí râ nghut lhê.

<sup>5</sup> Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lhú?

<sup>6</sup> Haû yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê.

<sup>7</sup> Haû a tara é hkyo é haq dâ é a-tsam gi, mù zui nyi gù nghut bê; nghut kôlhang, haû lé hkûm zing nyi sù gi, hui htot pyám huí é hkûn jé shoq, haû lé hkûm zing nyi shirá nghut lhê.

<sup>8</sup> Haû hui htot pyám huí é hkûn, a tarâ Sû htoq shit râ nghut lhê; haû Yhumsîng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê.

<sup>9</sup> Haû a tarâ Sû lé lo é gi, Tsadán a-tsam dông laklaí kumlhá pé, kumlhá pé, mauhpo muzó pé ajung jung kut mhaû é eq,

<sup>10</sup> htên byoq huí nyi é bang lé mhaû zo râ agè ashop é hkyô jung hkangmó lé tûn shit râ nghut lhê. Yhangmoq htên byoq é gi, haû tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri.

<sup>11</sup> Hau é yanmai, Garai Gasang gi, haû tengmán hkyô lé a lumjîng e za agè ashop hkyô má ô nau é lhunghâng bang mara byí é hui kó sháng gaq ga,

<sup>12</sup> mhaû é dang lé jîng kó râ matú, a-tsam mó bo é lum shut râ hkyô

lé, yhangmoq chyáng nhâng byi bê nghut ri.

*Mhoqshit é hkyô má gîng nyi râ hkyô*

<sup>13</sup> Nghut kôlhang, haû Yhumsîng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haû Woi-nyì èq lhoq sân-yúng nyi é muzó dông le, tengmán hkyô lé lumjîng é dông le, hkyi yù hui râ matú, Garai Gasang gi, nungmoq lé, sân-hi mai hkyin yù bê nghut ri.

<sup>14</sup> Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lóm shoq ga, ngamoq é gabú danglù dông nungmoq lé shí hkyô má ji yù bê nghut lhê.

<sup>15</sup> Haû mù luí, gumang wui ê, nhutdang dông nghut nghut, laiká dông nghut nghut, nungmoq lé ngamoq hai byí é mhoqshit hkyô lé zui gîng nyi luí, gîng gîng yap nyi keq.

<sup>16</sup> Yhâng é jeju yanmai, nga-nhûng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhûng lé chyitdap é, nga-nhûng é Îwa Garai Gasang eq nga-nhûng é Yhumsîng Yesuq Hkrisduq gi,

<sup>17</sup> nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

### 3

*Kyû Dung Byi Râ Matú Lung Kat É Hkyô*

<sup>1</sup> Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq.

<sup>2</sup> Yuq hkangmó gi, lumjîng myit bo é a nghut é yanmai, haû achayut agè ashop é byu pé chyáng mai ngamoq wó lut râ matú le, kyû bo dung byi kó laq.

<sup>3</sup> Nghut kôlhang, haû Yhumsîng gi, lhumzui é sù nghut é yanmai, Yhang nungmoq lé wum-o lhoq kîng byi mù, haû agè ashop su chyáng mai nungmoq lé hung yù râ nghut lhê.

<sup>4</sup> Nungmoq gi, ngamoq pying tô é dang pé lé kut nyi mù, xoq lui le kut nyi râ nghut lhê nghû, haû Yhumsîng má ngamoq hkyak myit lum tô lhê.

<sup>5</sup> Haû Yhumsîng gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shui wàng sháng gaq ô!

### *Mû Zui Shikut Râ É Hkyô*

<sup>6</sup> Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é mying mai nungmoq lé hkunmó hkyô kat lhê.

<sup>7</sup> Hkâsu mù gâ le, ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó,

<sup>8</sup> Ó yuq é zoshuq lé le, ngùn a byi é a zo wú é nghut lhê. Nungmoq má ó yuq lé le wôlai a byi sháng gaq nghû, ngamoq gi, muzó shikut hkyô eq wuihke hkyô má, nyi lé, myin lé, zui saî é nghut lhê.

<sup>9</sup> Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê.

<sup>10</sup> Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

<sup>11</sup> Hkâsu mù gâ le, nungmoq chyáng mâ é byù ra-am lagon lui, haî mù le a zui e za, mù châng lhoq gyô byi wún akô gâ é hkyô lé, ngamoq wó gyô é yanmai nghut lhê.

<sup>12</sup> Ngamoq gi, haû su kut é bang lé, zim za nyi mù zui saî lui, yhumsing é zoshuq ho nyi kó sháng gaq nghû, haû

Yhumsîng Yesuq Hkrisduq é mying lé lang lui, hkunmó hkyô kat mù, wum byi kat lhê.

<sup>13</sup> Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

<sup>14</sup> Byù rayuq yuq gi, laiká shi má ngamoq mhoqshit é hkyô lé, a châng é nghut jáng, haû yuq lé rago chôm matsing yù mù, yhang hoq bun sháng gaq, yhang eq hkâzûm yap kó.

<sup>15</sup> Nghut kôlhang, yhang lé gyê rayuq dông a sôn e za, gumang rayuq dông lhoq pun lhoq kyíng nyi keq.

### *Ló Htâng Lhê É Shi-kyám Dang*

<sup>16</sup> Haû nuingón hkyô é Yhumsîng yhang gi, ahkyíng hkyám mó eq hkyô hkat hkyám mó má, nungmoq lé nuingón hkyô byi nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

<sup>17</sup> Ngò, Poluq gi, ngá é loq mai yhang shi-kyám dang shi lé kê kat lhê; shi gi, ngò kê é laiká banshoq má kumlhá nghut lhê. Ngò kê é gi, shi dông chyat nghut lhê.

<sup>18</sup> Nga-nhông é Yhumsîng Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

## **TIMOHTI** **Chyáng Hî Dàm Hun Kat é** **Laiká** **(1 Timothy)**

<sup>1</sup> Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi,

<sup>2</sup> haù lumjínng hkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyîn hkyô, nguínngón hkyô gi, náng chyáng ru joq nyî sháng gaq ô.

### *Sará Pyoq Pé Lé Sidiq Râ Hkyô*

<sup>3</sup> Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shî aq; haù hkûn sheq, náng gi, shut shai é mhoqshit hkyô lé mhoqshit é bang a mhoq xoq lo râ matú le,

<sup>4</sup> myit htoq mhô-myi dang eq a dat htûm é byù xik labaú má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjínng myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi é nghut lhê.

<sup>5</sup> Haù hkunmó hkyó luî myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myit, mara a bò bûn é myit eq lumjínng myit akying mai lo é nghut lhê.

<sup>6</sup> Byù ra-am gi, haù hkyô pé mai htoq ló kôluî, dangsôm taî é hkyô shut lhing ló byuq bekô nghut ri.

<sup>7</sup> Haù bang gi, jep é tarâ sará pé dut naù kôlhang, yhangmoq haî taî nyi é hkyô lé le, hkyak, haî lé mhoqshit é hkyô lé le, a sé kó nghut ri.

<sup>8</sup> Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê.

<sup>9</sup> Haù jep é tarâ gi, dingmán bâng é matú tô tô é a nghut e za, tarâ lu laî é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjínng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú,

<sup>10</sup> ashop é đông gungsho zùm yap é bang eq yuqgè yhangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhông sê lhê.

<sup>11</sup> Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

### *Poluq Chyáng Yhumsing É Jeju Joq Nyi É Hkyô*

<sup>12</sup> Ngò gi, ngo lé wum-o byi é, nga-nhông é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq đông sôn yù luî, Yhâng é muzó jizó má hkyîn kat yu é yanmai nghut lhê.

<sup>13</sup> Hí hkûn, ngò gi, Garai Gasang lé taî hpoi sù, zing-ri sù eq byù rhoî sù nghut wú kôlhang, a sé shi mù lumjínng myit a bo e za kut é yanmai, shogyo nhikmyîn yu é hkyô lé ngò wó yu é nghut lhê.

<sup>14</sup> Nga-nhông é Yhumsîng é jeju lé le, Hkrisduq Yesuq eq sêng é lumjínng myit eq chyitdap myit lé le, ngá chyáng agùn agó hut hkyô kat byi bê nghut ri.

<sup>15</sup> Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjínng é mungdang nghut luî, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê.

<sup>16</sup> Nghut kôlhang, Hkrisduq Yesuq gi, Yhang lé lumjínng luî ahtum abyuq é asak lé wó yù râ bâng é alik dut râ

matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunghâng wó tân shit sháng gaq ga, Garai Gasang gi, ngo lé shogyo nhikmyîn yu ri.

<sup>17</sup> Haû mù, haû aróng eq hpung-wup shing kang gi, ahtum abyuq é, a dat htên byoq é, myoq èq a byu-myang é Hkohkâm nghut sù, rayuq zâ é Garai Gasâng chyáng pyat dedu ahtum abyuq ru joq nyî sháng gaq ô! Amen.

<sup>18</sup> Ngá zo Timohti ê, nàng eq séng luî myiqhtoi dang joq wú é eq rajung za, ngò gi, nang lé haû dông mhoqshit kat lhê; haû mù, nàng gi, haû pé lé chung nyî luî, ge é majan zan mù,

<sup>19</sup> lumjîng myit eq mara a bò bûn é myit bo nyî sháng gaq. Byù ra-am gi, haû hkyô pé lé he-ngik pyám kô é nghut luî, yhangmoq é lumjîng myit gi, wuî-sanghpo htên byoq ló é su htên byoq byuq bekô nghut ri.

<sup>20</sup> Haû bang má, Humenu eq Alexander le bò kômù, Garai Gasang lé taî hpoî é dang a taî râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

## 2

### *Noqkuq Hkyô Eq Séng Luî Mhoqshit Byî É Hkyô*

<sup>1</sup> Haû mù luî, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó nguingón yuqyo nyî sháng gaq, hkohkâm pé eq ahkáng ayá wó bang banshoq é matú le,

<sup>2</sup> yuq hkan gmó é matú le, dúng tôngbán byi, kyûdung byi, dúng xoq byi, jeju hkya-on byi, kut aq nghû nau ri.

<sup>3</sup> Haû gi, ge é hkyô nghut mù, nga-nhúng é hkyi yù Sù Garai Gasang ô nau é hkyô nghut ri.

<sup>4</sup> Yhang gi, byù lhunghâng bang hkyi yu é hui mù, tengmán é mung-dang lé sê gyo râ lé, ô nau nyi ri.

<sup>5</sup> Hkâsu mù gâ le, Garai Gasang gi, rayuq za nghut luî, Garai Gasang eq

byu é gyoro má sô xoq byi sù le rayuq za nghut lhê; haû yuq gi, xângzo byù nghut é Hkrisduq Yesuq nghut ri.

<sup>6</sup> Yhang gi, byù lhunghâng bâng é matú shîhtai gunglik hkungga dông Yhânggùng lé byî pyám bê nghut ri; haû gi, ahkyíng yam-yoq jé é hkûn, saksé htoq shit bê nghut lhê.

<sup>7</sup> Ngò gi, tûngbaù pé lé, tengmán é lumjîng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haû su taî é gi, mhaû taî é a nghut, têng é hkyô lé za taî nyi é ru nghut lhê.

<sup>8</sup> Yuqgè wuî gi, nhikjum yô é hkyô eq dang htíng htíng lhúm é hkyô a bo e za, jowò hkan gmó má chyoiyúng é loq tú mù kyûdung râ lé, ngò ô nau ri.

<sup>9</sup> Myiwe wuî gi, xâm nik nik é, hîng zè, palhé, hpaû jung mebù èq a mhôn chung e za, siri bo é mebu wut chûng mù, tap tap za, shuq shuq za kut luî,

<sup>10</sup> Garai Gasang lé noqkuq é myiwe wuî eq gíng shoq, ge é muzó èq yhum-sing gùng lé mhôn nyi râ lé le, ngò ô nau ri.

<sup>11</sup> Myiwe gi, uphkang tô é dông châng nyi mù, zim za mhoq yù kó sháng gaq.

<sup>12</sup> Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê.

<sup>13</sup> Hkâsu mù gâ le, Adam lé hí hpan to mù, Ewaq lé hpan é ru nghut lhê.

<sup>14</sup> Hau htoq agó, Adam gi, mhaû é hui zo sù a nghut; haû myiwe sheq mhaû é hui zo luî, mara kut shut é ru nghut lhê.

<sup>15</sup> Nghut kôhang, myiwe wuî gi, lumjîng myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.\*

## 3

### *Hpúng-up Eq Hpungtê Kut Râ Bâng É Hkyô*

\* 2:15 Apûn 3:16

<sup>1</sup> Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri.

<sup>2</sup> Haú mù luí, hpúng-up rayuq gi, mara hún râ hkyô a bo é sù, myiwe rayuq za wó é sù, dat sidiq é sù, yhum-sing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù,

<sup>3</sup> Íhpê é jùn a dut é sù, byoq lhum byoq cheq a kut e za nùm é sù, mabyoq jishùm a lhoq htoq é sù, ngunzè lé a chyitdap é sù, nghut râ lhê.

<sup>4</sup> Yhang gi, yhang é ikun lé rago dat uphkang luí, yhang zô pé mai hkungga myit bo é èq yhang dang lé gyo byí é sù le, nghut râ lhê.

<sup>5</sup> Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon rá lhú?

<sup>6</sup> Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe.

<sup>7</sup> Hpúng-up rayuq gi, tûngbaù pé hí má ge é myíng wó é sù le dut râ lhê; haú jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

<sup>8</sup> Haú eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut râ lhê.

<sup>9</sup> Yhangmoq gi, lumjíng hkyô mâ é nik é mauhpo tengmán hkyô pé lé, sansêng é i-myit èq châng nyi ra râ nghut lhê.

<sup>10</sup> Yhangmoq gi, chyam é lé hí huí wú kó sháng gaq, hau htâng, yhangmoq lé mara hún râ hkyô haí a bò lo jáng, hpungtê mù lé wùn kó sháng gaq.

<sup>11</sup> Haú eq rajung za, yhangmoq é yhumsing myhí pé le, myit no nhang é dang a taí e za, dat sidiq é eq hkyô hkangmó má lumgíng luí, hkungga gíng é myiwe wuì, nghut ra râ dut lhê.

<sup>12</sup> Hpungtê rayuq gi, myiwe rayuq za wó é sù, yhangzô pé eq yhang ikun lé rago za dat wùn waq é sù, dut ra râ nghut lhê.

<sup>13</sup> Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akò nghut ri.

<sup>14</sup> Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyíng du myáng pyâm le,

<sup>15</sup> Garai Gasâng é ikun hkaú má, byu pé hká dông nyi yap râ é hkyô lé, nàng sé sháng gaq nghù, pying kat é dang shi pé lé ká byí kat lhê; ikun haú gi, rû dui nyi é Garai Gasâng é noqkuq hpúng nghut luí, tengmán hkyo é hkungmó-zíng eq apùn awang nghut ri.

<sup>16</sup> Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haú gi, Yhang, byù gungsho má htoq shit mù, haú Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhang é hkyô lé hko kyo mù, Yhang lé mingkan byu pé lumjíng luí, hpungwup shingkang eq Yhang lé mauhkûng shut shuí toq yû bê nghut ri.

## 4

### *Timohti Lé Mhoqshit É Hkyô*

<sup>1</sup> Jihtùm buinyi pé má, byù ra-am gi, lumjíng hkyô mai htak htoq ló luí, mhaú zô é woi-nyí pé htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haú Woi-nyí gi, san za taí ri.

<sup>2</sup> Haú sù é mhoqshit hkyô pé gi, gegùn labyoq kut é byù-mhaú pé chyáng mai lo é nghut lhê; haú bâng é myit nhiklhum gi, nyhê nhe tô é shamtoq èq nyhê man tô é su dut byuq bê nghut ri.



<sup>3</sup> Haú bang gi, hâng lhúm é hkyô lé hkyô tang é hkyô lé le, haú lumjínng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri.

<sup>4</sup> Garai Gasang hpan tô é lhunglhang gi, ge é chyat nghut ri; Garai Gasang é mungdang eq kyûdûng é dang đông haú pé lé lhoq sân-yúng nyi é nghut é yanmai,

<sup>5</sup> jeju hkya-on luí hap yu é nghut le gi, haí jung lé lhang he-ngik pyám râ hkyô a bò nghut ri.

<sup>6</sup> Haú gumang wui lé, nang haú hkyô pé lhoq pun lhoq kyíng é nghut le gi, nang gi, haú nang châng bê ge é mhoqshit hkyô eq lumjínng hkyô mâ é tengmán hkyô má, kô myhâng sù nang nghut râ htoq agó, Hkrisduq Yesuq é ge é hpungmû wùn sù le dut râ nghut lhê.

<sup>7</sup> Garai a bo é myit htoq mhô-myi dang eq hpô-myhí mâng pé é mhô-myi dangsôm lé koi pyám luí, tarâ hkunggâ é hkyô má yhumsing gùng lé lhoq kung yù aq.

<sup>8</sup> Hkâsu mù gâ le, gungsho lé lhoq kung é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkyô má é matú akyû bo lhê nghut mù luí, shí ipyat má le, htang pyat má le, akyû bo nyi ri.

<sup>9</sup> Haú gi, banshoq hap yù gíng é, lumgíng é mungdang nghut lhê.

<sup>10</sup> Haú mù luí, xângzo byù banshoq bâng é hkyi yù Sù nghut é, je riyhang, lumjínng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

<sup>11</sup> Haú pé lé, hkunmó hkyó luí mhoqshit byí nyi aq.

<sup>12</sup> Náng é zorâm pyat lé, ó yuq èq le a wú tiq pyám sháng gaq, dang tai é má le, nyi yap é hkyô má le, chyitdap é hkyô má le, lumjínng hkyô má le, sansêng é hkyô má le, lumjínng bâng é matú alik kut shit nyi aq.

<sup>13</sup> Náng chyáng ngò jé lé é buinyi jé shoq, nang gi, Chyúmdang nghap kyô é má le, hko kyô é má le, mhoqshit é má le, ap nóng nyi aq.

<sup>14</sup> Nang gi, hpúng suwún wui nang é ahtoq má loq ke byí é hkùn, myiqhtoi dang đông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

<sup>15</sup> Haú hkyô pé lé, myit zìng zuq luí zui saí nyi aq; nang kô myhang lo é hkyô lé, yuq hkyô má byu-myàng kó sháng gaq, nang gùng banshoq haú pé má ap nóng nyi aq.

<sup>16</sup> Náng é asak dui hkyô má le, nang mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, nang haú su kut é nghut jáng, nang é asak lé le, nang chyáng mai gyô yu é bang lé le, nang wó hkyi yù râ nghut lhê.

## 5

### *Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô*

<sup>1</sup> Asak kô sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wui lé gi, gumang wui lé su,

<sup>2</sup> asak kô é myiwe wui lé gi, înu pé lé su zùm yap luí, zomyi wui lé gi, nhammó wui lé su sansêng é i-myit banshoq èq zùm yap nyi aq.

<sup>3</sup> Gè gè yhang garúm râ dut é chuimó myhí pé lé, hkunggâ nyi keq.

<sup>4</sup> Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é đông, yhangmoq é lumjínng hkyô lé, zui saí é má lhoq mhán nhâng râ lé hí mhoq yù ra râ nghut lhê; hkâsu mù gâ le, haú gi, Garai Gasang ô nau é hkyô nghut ri.

<sup>5</sup> Haú lùm râ ó yuq le a wó mù, gè gè yhang râ tô é chuimó myhí gi, Garai Gasang chyáng myit myoqbyu nyi luí, nyi, myín xoq xoq kyûdung mù, Garai Gasang garúm râ hkyô lé dúng nyi ri.

6 Nghut kôlhang, ngón hkyô za cháng luí asak dui é chuimó myhí gi, asak dui nyì kôlhang, shî gù nghut bê nghut ri.

7 Yhangmoq lé, ó yuq eq le mara a hùn kó sháng gaq, haú hkyô pé lé le mhoqshit byí nyí aq.

8 Rayuq yuq, yhâng é buinùm ji-myi wuì lé a baú é htoq agó, je luí yhum-sing é ikun byù lé a baú é nghut le gi, haú lumjínng hkyô lé he-ngik pyám bê nghut luí, a lumjínng su htoq má je ashop é sù dut bê nghut ri.

9 Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù;

10 zoshâng wuì lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuìhke huí tô é bang lé garúm luí, ge é muzó junghkang jungmó má yhum-sing gùng yhang ap nóng nyí ri ga, yhang kut é ge é muzó má myíng hú é sù le, nghut râ lhê.

11 Asak tiq é chuimó myhí pé lé, jihpán haú má hkâkat. Hkâsu mù gà le, gungsho ô nau é hkyo eq Hkrisduq chyáng yhangmoq ap nóng tô é hkyô lé ung pyâm é hkûn, yhangmoq gi, myí ló nau kó râ nghut lhê.

12 Haú mù, yhangmoq gi, sân-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lhê.

13 Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsíng eq a sêng é mù má châng wang nyo wún é bang le, dut kó râ nghut lhê.

14 Haú mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhí pé gi, myí ló mù, zoshâng hkû luí, yhangmoq

é ikun lé gôn lajang râ matú, ngò, yhangmoq lé hpaqchyí byí kat lhê.

15 Hkâsu mù gà le, ra-am gi, lhing taú ló kôluí, Tsadán é htâng châng nyí lugù nghut bekô nghut ri.

16 Lumjínng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yú ra râ nghut lhê; haú hkûn sheq, noqkuq hpúng gi, gè gè yhang râ tô é chuimó myhí pé lé wó garúm râ nghut lhê.

17 Haú noqkuq hpúng lé rago za shuí ú é hpúng suwún wuì gi, akyú í tú hkam yù gíng lhê; haú mungdang hko é hkyô eq mhoqshit é hkyô má shikut é suwún wuì gi, je riyhang hkam yù gíng lhê.

18 Hkâsu mù gà le, "Guq nâng nyi é no lé, nhuttsung hkâ-tsúng to byi."\* ga le, "Mù zui sù gi, yhâng é zuihpau wó yú gíng lhê."\* ga le, Chyúmdang má taí tô ri.

19 Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù.

20 Nghut kôlhang, lhoq pun lhoq kyíng é hkyô lé góbang wó yú kó sháng gaq, mara kut shut é bang lé, shiwa byu pé hí má tân mhoqshit aq.

21 Pyíng kat é dang shi pé lé, gamhkui myit a bo e za châng nyí râ eq, myoqdong hkyín luí haí le a kut râ matú, Garai Gasang eq Hkrisduq Yesuq é hí má le, hkyin yù huí é maumang lagyô pê é hí má le, ngò, nang lé pyíng kat lhê.

22 Ó yuq é ahtoq má le loq ke\* byi râ lé hkâhân; góbang é mara hkaú má le hkâbo lóm. Yhumsíng yhang yhumsíng sân-yúng shoq kut nyí aq.

23 Náng é wamdau ra luí, anum num no lò lò dut é yanmai, nâng gi, wuì za shuq é hkyô lé nô pyám luí, tsibiyiq wing le ratsuí tsuí shuq byi aq.

24 Byù ra-âm é mara pé gi, de de dut é nghut mù luí, tarâ jéyáng é jang má

\* 5:18 Tarâ Pun 25:4    \* 5:18 Luk 10:7    \* 5:22 Haú hkun lhê bang gi, hpúng suwún kut râ matú hkyin to bê bang lé, loq ke kyúdung byí é nghut lhê.

hí ló jé ri; ra-âm é mara kúm gi, hau é htâng má châng byông htoq lo ri.

<sup>25</sup> Haû eq rajung za, ge é muzó pé gi, de de nghut nyí luí, haû su de de a nghut é pé lé le, wó zaú to râ a nghut.

## 6

<sup>1</sup> Jùn dut é wòlai hkaû má nyi é lhunglhang bang gi, yhangmoq é yhumsing wui lé gyai yhang hkungga gíng lhê nghû, myit yù râ dut lhê; haû hkûn sheq, Garai Gasâng é myìng eq nga-nhung é mhoqshit hkyô gi, lumù gansang é a hui râ nghut lhê.

<sup>2</sup> Lumjìng é yhumsing wui é jùn gi, gumang wui nghut é yanmai, yhangmoq lé a wú myuq é za, yhangmoq dojaú luí akyû myang hkâm zô é bang gi, lumjìng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nàng gi, yhangmoq lé mhoq byí nyi é eq lhoq pun lhoq kying byí nyi aq.

### *Ngùn Lé Chyitdap É Hkyô*

<sup>3</sup> Rayuq yuq gi, shut é lumjìng hkyô lé mhoqshit luí, nga-nhung é Yhumsing Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huí é nghut jáng,

<sup>4</sup> haû yuq gi, nghutbùn é sù eq haí lé le a sé gyô é sù nghut ri. Yhang gi, htuq htíng lhùm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq,

<sup>5</sup> haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myit lhoq htên pyám bê bâng é gyoro má, byìn a huí é hkyô pé lé, lhoq htoq kat ri.

<sup>6</sup> Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

<sup>7</sup> Hkâsu mù gâ le, nga-nhung gi, mingkan htoq má haí jung le a yu

wang lé, haû mai le haí wó yu htoq ló râ a nghut.

<sup>8</sup> Haû mù luí, nga-nhung gi, wutbu wutmè eq zoshuq wó é nghut jáng, hau eq nhik dik nyi sháng.

<sup>9</sup> Wó naû sùt nau é byu pé gi, gungláu hkyô eq tuihkyó má le, haû byoq yeq hkyô eq htên byoq hkyô má, byu pé lé myup shí nhang é, nga é hkyô myo myo eq myit nò nhang nau é hkyô má le, byit gyó wâng kó râ nghut lhê.

<sup>10</sup> Hkâsu mù gâ le, ngùn lé chyitdap é hkyô gi, agè ashop hkyô ajung jùng é apùn awang nghut nyi ri. Byù ram gi, ngùn lé ô naû luí, haû lumjìng hkyô mai sô nghoq ló mù, yhumsing gùng lé yhumsing, haû yón kuq hkyô eq htaû rot pyám bekô nghut ri.

### *Timohti Lé Pying Kat É Dang*

<sup>11</sup> Nghut kôlhang, Garai Gasâng é byù nàng gi, haû pé banshoq lé koi pyám luí, dingmán hkyô, tarâ hkungga hkyô, lumjìng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq.

<sup>12</sup> Lumjìng hkyô eq sêng é ge é ma-jan le zân nyi aq. Hap yù lumjìng bê ga, saksé myo myô pé é hí má, ge é dông nàng yín yu é hkûn, wut yu é hui luí wó é ahtum abyuq é asak lé, zui zing nyi aq.

<sup>13</sup> Haû lhunglhang lé asak byí é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq Yesuq é hí má le, ngò, nang lé pying kat lhê:

<sup>14</sup> Yhâng é ahkyíng yam-yoq jé jáng, Garai Gasang htoq shit nhang râ nghut é sù, nga-nhung é Yhumsing Yesuq Hkrisduq htoq shit é buinyi jé shoq,

<sup>15</sup> nàng gi, agot a-u é hkyô eq mara hùn râ hkyô a bo e za, hkunmó shí lé châng nyi aq. Garai Gasang gi, hkungsô wó sù, Yhang za up sù, hkohkam pé é Hkohkâm, yhumsing pé é Yhumsing,

<sup>16</sup> Yhang za ahtum abyuq dui nyi sù, a ge chyâng htep e é maubó má dui nyi sù, ó yuq èq le a myang wú é, a

wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyî sháng gaq ô! Amen.

<sup>17</sup> Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhúng nguingón yuqyo nyi râ matú junghkang jungmó lé agùn agó byî é sù, Garai Gasâng chyáng za, yhangmoq myit myoqbyu nyi râ matú, hkunmó hkyó aq.

<sup>18</sup> Ge é hkyô kut luí, ge é muzó má wó sùt nyi mù, a chum e za, gam chûng nau é myit bò râ matú, yhangmoq lé hkunmó hkyó aq.

<sup>19</sup> Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haú le wó zuî zing to kó râ nghut lhê.

<sup>20</sup> Timohti ê, nang lé ap to bê hkyô lé, zúng nyî aq. Tarâ a hkunggâ é poming ming bâng èq hpaqchyî nghut lhê ga myhîng shut é htuq htîng lhum lhum kut é hkyô lé, koi pyám aq.

<sup>21</sup> Byù ra-am gi, haú lé hpaqchyî nghut lhê ga yín yû kôluí, haú lumjîng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyî sháng gaq ô.

## TIMOHTI Chyáng Htang Dàm Hun Kat é Laiká (2 Timothy)

<sup>1</sup> Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

<sup>2</sup> Haù Íwa Garai Gasang eq nga-nhông é Yhumsing Hkrisduq Yesuq chyáng mâ é jeju eq shogyo nhikmyin hkyô, nguingón hkyô gi, ru joq nyí sháng gaq ô!

### *Lumlug Râ Matú Myit Wum Byi É Hkyô*

<sup>3</sup> Ngò gi, ngá é kyûdung dang má, nyí, myín, abyit alan nang lé bûn nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkya-ôn nyi lhê.

<sup>4</sup> Ngò gi, ngò má gabú hkyô bying jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri.

<sup>5</sup> Ngò gi, nang é gyíng é lumjing myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjing myit, ahkuí, náng chyáng le bo ri nghû, hkyak myit lum nyi lhê.

<sup>6</sup> Hau é yanmai, ngò loq ke byí é dông, náng má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pûn kat lhê.

<sup>7</sup> Hkâsu mù gâ le, Garai Gasang gi, gyuq sê é myit nga-nhông lé a kat byi e za, a-tsam bo é myit, chyitdap sê é myit, yhumsing gùng lé dat hking é myit sheq kat byi tô é ru nghut lhê.

<sup>8</sup> Haù mù luí, náng gi, nga-nhông é Yhumsing eq séng luí saksé hkâm é hkyô má le, Yhang é yanmai htóng byu dut to sù ngá é hkyô má le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuîhke jamjau chòm hui goq.

<sup>9</sup> Garai Gasang gi, nga-nhông zui sai é muzó dông a nghut e za, Yhanggùng yhang myit sôn tô é hkyô eq Yhang é jeju yanmai za, nga-nhông lé, hkyi yù luí chyoiyung é asak duí hkyô má ji yù bê nghut ri. Ahkying nghu é lhang a joq shi mai yhang, jeju haù gi, Hkrisduq Yesuq má nga-nhông lé byi to gù nghut bê.

<sup>10</sup> Nghut kôhang, nga-nhông é hkyi yù Sù, Hkrisduq Yesuq pô htoq é dông, ahkuí, haù lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haù gabú danglu dông mai, asak lé le, a dat htên byoq é hkyô lé le, lhoq htoq shit bê nghut ri.

<sup>11</sup> Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê.

<sup>12</sup> Hau é yanmai, ngò gi, wuîhke jamjau shî lé huí nyi é nghut lhê. Nghut kôhang, ngò gi, ó yuq lé lumjing bê nghut é hkyô lé, sê é htoq agó, Yhang lé ngò ap tô é pé lé, haù buinyi jé shoq, Yhang wó zúng râ nghut lhê nghû hkyak myit lum tô é yanmai, ngò a hoq.

<sup>13</sup> Náng gi, ngá chyáng mai wó gyô yu é tengmán dang pé lé, Hkrisduq Yesuq má, lumjing myit eq chyitdap myit mai alik kut yu nyi aq.

<sup>14</sup> Nang lé ap byi to bê, haù ge é mungdang lé, nga-nhông chyáng bo tô é Chyoiyung Woi-nyí é wum-o mai zúng nyi aq.

<sup>15</sup> Asia mau mâ é bang yuq hkangmó gi, ngo lé pyám to kô é hkyô lé, náng sê lhê; haù bang má, Hpugelu eq Heramoge nhik le bo akô nghut ri.

<sup>16</sup> Haù Yhumsing gi, Onesihpurú é yhumbyù lé shogyo nhikmyin é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoqtú é yanmai, a hoq e za,

<sup>17</sup> yhang, Romaq myuq má jé nyi é hkûn, ngo lé myang hui shoq, ho shikut é sù nghut ri.

<sup>18</sup> Haù Yhumsing gi, haù buinyi má, yhang lé haù Yhumsing é shogyo

nhikmyin hkyô byi sháng gaq! Eh-pesu myuq má, yhang ngo lé hkâm-yhó garúm bê nghut é gi, nàng rago yhang sê lhê.

## 2

<sup>1</sup> Haû mù, ngá zo ê, nàng gi, Hkrisduq Yesuq mâ é jeju hkaû má, wúm bo nyi aq.

<sup>2</sup> Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

<sup>3</sup> Hkrisduq Yesuq é ge é gyezo rayuq su, wuîhke hkyô lé chôm jan nyi sháng.

<sup>4</sup> Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê.

<sup>5</sup> Haû eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yù rà a nghut.

<sup>6</sup> Yo-mû zui shikut é sù gi, kyôshi lé sâng-hi myang hkam yù rà sù nghut lhê.

<sup>7</sup> Haû Yhumsîng gi, shí pé banshoq lé wó sê é nyan nang lé byi rà nghut é yanmai, ngò taî é hkyô pé lé myit wú aq;

<sup>8</sup> Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê.

<sup>9</sup> Gabú danglù hau é yanmai, mara bò sù rayuq lé su, ngò gi, kyum hut é hui luî, hpuzô nyi é nghut lhê. Nghut kôlhang, Garai Gasâng é mungdang gi, kyum hut huî é a nghut.

<sup>10</sup> Haû mù luî, ngò gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkang lé wó yù kó sháng gaq nghû, haû hkyin yù hui bâng é matú, jung hkangmó lé hkam jân nyi lhê.

<sup>11</sup> A-ô mâ é dang gi, lumgíng é dang nghut lhê:

Nga-nhúng gi, Yhang eq rahá shî bê nghut jáng, Yhang eq rahá dui rà nghut lhê.

<sup>12</sup> Nga-nhúng gi, hkam jân é nghut jáng, Yhang eq rahá up rà nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm rà nghut lhê.

<sup>13</sup> Nga-nhúng gi, lhumzui myit a bò kôlhang, Yhang gi, lhumzui nyi rà nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

### *Garai Gasâng Hí Má Myoqdong Wó É Mû Zui Sù*

<sup>14</sup> Nàng gi, yhangmoq lé, shí hkyô pé xoq luî lhoq pûn nyi aq. Dang pé eq séng luî, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê.

<sup>15</sup> Nàng gi, haû tengmán é mungdang lé jo shoq chung jai é eq, hoq nó a rà é mù zui sù rayuq dông Garai Gasâng hí má myoqdong wó shoq, wó dut é myhó shikut aq.

<sup>16</sup> Tarâ a hkunggâ é po-ming ming bang lé koi pyâm aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó rà nghut lhê.

<sup>17</sup> Yhangmoq é mhoqshit hkyô gi, mong ana su byo myín ló rà nghut lhê; haû bang má Humenu eq Hpilitu nhik le bò kôluî,

<sup>18</sup> haû tengmán hkyô mai sô nghoq ló byuq akô. Yhangnhik gi, haû dum dui toq hkyô dut lai bê ga taí kômù, ramâm é lumjíng hkyô lé lhoq htên pyâm byi akô nghut ri.

<sup>19</sup> Nghut kôlhang, "Haû Yhumsîng gi, Yhang eq séng é bang lé sê lhê."\* ga luî le, "Haû Yhumsîng é myíng lé yín yu é bang yuq hkangmó gi, agè ashop hkyô mai lhing tau ra kó rà nghut lhê." ga luî le, dizik haû htung tap

\* 2:19 Gyung So 16:5

tô é, Garai Gasâng é ging tîng é apûn awang gi, gîng nyî ri.

<sup>20</sup> Yhûm mó ralhum má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

<sup>21</sup> Haû mù luî, haú pé mai yhumsing gùng lé lhoq sansêng pyâm é sù gi, chyoyúng luî, haû Yhumsing chung jài gîng é sù, ge é muzó hkgangmó kut râ hen tô é sù nghut é yanmai, aróng hkyo é matú chungzè dut râ nghut lhê.

<sup>22</sup> Zoram é agè ashop é ô naù hkyô lé koi pyâm mù, haû sân-yúng é myit mai, Yhumsing lé wut dîng é bang eq rahá, dingmán hkyô, lhumzui hkyô, chyitdap hkyô, nguingón hkyô pé lé, châng hkat nyî aq.

<sup>23</sup> Go é eq ngok é dông dang jet jet lhûm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haú hkyô lé koi pyâm aq.

<sup>24</sup> Haû Yhumsing é dui-nhâng zoshâng gi, mabyoq a lhoq htoq é za, yuq hkgangmó lé dat myit tê byî é, wó mhoqshit é, a dat nhik-yô é su dut ra râ nghut lhê.

<sup>25</sup> Yhang gi, yhang lé htuq htîng é bang lé, nú-nhâm é dông mhoqshit byi ra râ nghut lhê; haú hkûn, Garai Gasang gi, yhangmoq lé myit lhîng hkyô byi mù, tengmán hkyô lé sê gyo nhâng luî,

<sup>26</sup> yhangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huî é, nat Tsadán é tuihkyó mai wó hfang lut ló kó abe nghû, myit lum kat lhê.

### 3

#### *Jihûm Buinyî Pé Má Dut Lò Râ Hkyô*

<sup>1</sup> Jihûm buinyî pé má, wuîhkê é ahkyíng pé joq lò râ nghut é lé, nàng matsîng to aq.

<sup>2</sup> Hkâsu mù gâ le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong

é bang, nghutbûn é bang, góbang lé taî hpoî é bang, înu îwa nyo é lé a gyô é bang, jeju a dat bûn é bang, a chyoyúng é bang,

<sup>3</sup> chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuî pé, ge é hkyô lé a ngui é bang,

<sup>4</sup> haq gumlaû é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaî ngón kún hkyô lé za chyitdap é bang, dut bùm kó râ nghut lhê.

<sup>5</sup> Yhangmoq gi, tarâ hkunggâ é bang su dut kôlhang, haú pé é a-tsam lé he-ngik pyâm akô nghut ri; haû sù é bang lé, nàng koi pyâm nyî aq.

<sup>6</sup> Yhangmoq gi, hpaqchyî da mù yhûm pé má wàng kôluî, mara wòlai lé wun é, agè ashop é ô naù hkyô ajung jung má sô nghoq ló byuq é,

<sup>7</sup> hkâ-nhám le mhoq yu nyî kôlhang, haû tengmán hkyô lé a sê gyô é, myit nyhôm é myiwe wuî lé wó lîng nghoq yu é bang nghut akô.

<sup>8</sup> Yanne eq Yambre nhik gi, Mosheq lé htuq htîng é su, haú bang le, haû tengmán hkyô lé htuq htîng akô nghut ri; yhangmoq gi, myit é hkyô htên byuq kôluî, haû lumjîng hkyô má lhum a zuî é bang nghut akô.

<sup>9</sup> Nghut kôlhang, haú nhik é hkyô byông htoq lo é su, yuq hkgangmó é hí má, yhangmoq ngok é hkyô byông htoq lô râ nghut mù, haû mai lai luî yhangmoq wó kut jat kó râ a nghut.

#### *Timohti Lé Pying Kat É Dang*

<sup>10</sup> Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô,

<sup>11</sup> zing-ri huî é hkyô eq wuîhke jam-jau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haû Yhumsing gi, haú

pé banshoq mai ngo lé xe yù bê nghut ri.

<sup>12</sup> Gè gè yhang, agè ashop é byu pé eq mhaù kut é bang gi, mhaù zô nyi bum é eq mhaù zô é huì nyi bùm kôluì, a ge é hkyô shut je riyhang myô jat lò kô é hkùn,

<sup>13</sup> Hkrisduq Yesuq má tarâ hkunggâ é asak dông nyiyap nau é bang yuq hkangmó gi, zing-rî é hui kó râ nghut lhê.

<sup>14</sup> Nghut kôlhang, nang gi, ô pé chyáng mai nang mhoq yù bê hkyô lé le, Hkrisduq Yesuq lé lumjínng jáng hkyi yu é hui shoq,

<sup>15</sup> nang lé hpaqchyí byéng-yá wó byí é chyoiyúng Chyúmdang pé lé, zoshâng hkùn mai nang sê to bê hkyô lé le, nang sê é yanmai, nang mhoq yu to bê hkyô eq hkyak lumjínng to bê hkyô má, xoq kut nyí aq.

<sup>16</sup> Chyúmdang hkangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byí é hkyô eq dingmán hkyô lé tân shit byí é hkyô pé é matú, akyû bo ri;

<sup>17</sup> haù mù luì, haù Garai Gasâng é byù gi, ge é muzó jizó hkangmó lé kut rá matú, wó gumjup râ nghut lhê.

## 4

<sup>1</sup> Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi,

<sup>2</sup> haù mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyí aq.

<sup>3</sup> Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naù yut yut é hkyô cháng luì, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayò lé lnhghkyuq má lhoq tsing to kó râ nghut lhê.

<sup>4</sup> Yhangmoq gi, haù tengmán hkyô mai yhangmoq é nohkyap lé lhing pyám mù, myit htoq mhô-myi dang shut lhing lò kó râ nghut lhê.

<sup>5</sup> Nghut kôlhang, nang gi, dut tô é hkyô banshoq má rago sidiq nyi aq; wuìhke jamjau hkyô lé hkam jân nyi aq; gabú danglù hko kyô é muzó kut nyí aq; nang é hpungmû banshoq lé wùn waq nyi aq.

<sup>6</sup> Hkâsu mù gâ le, ngò gi, shuq jung hkungga ralhum dông hut pyâm é huì nyi gù nghut mù luì, mingkan mai ngò htoq lò râ ahkyíng jé bê nghut ri.

<sup>7</sup> Ngò gi, haù ge é majan le zan bê; din shingjóng lhùm é hkyô le bàn bê; haù lumjínng hkyô le chang bê nghut lhê.

<sup>8</sup> Ahkuì, haù tengmán é tarâ Agyì nghut sù, Yhumsíng gi, haù buinyi má ngo lé ap byi râ nghut é, haù dingmán hkyô é janmaù lé, ngá matú tô to byi bê nghut lhê. Haù gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

### *Timohti Lé Jì Kat É Hkyô*

<sup>9</sup> Nang gi, ngá chyáng wó dut é í hân hân lé lò aq.

<sup>10</sup> Hkâsu mù gâ le, Demaq gi, mingkan shí lé chyitdap é yanmai, ngo lé pyám to luì, Htesaloni wà mó shut; Krezen gi, Galatiq mau shut; Tituq gi, Dalamati mau shut, e lò byuq bekô nghut é yanmai nghut lhê.

<sup>11</sup> Lukaq za ngò eq rahá nghut nyi lhê. Markuq lé, nang eq rahá shuì lé lò aq; yhang gi, ngá é hpungmû má wó htuqáng râ sù nghut lhê.

<sup>12</sup> Ngò gi, Tuhkiku lé Ehpesu myuq shut nhang kat bê nghut lhê.

<sup>13</sup> Nang gi, lé lo é hkùn, Troa myuq má, Karpu chyáng ngò tô tô é buhíng haù lé le, ngá é chyúmding lé le, je luì eq haù shokuq chyúmding pé lé le, yù lé lô byi aq.

<sup>14</sup> Haù ningdup hpó Alesander gi, ngo lé a ge é myo myo kut bê nghut ri; haù Yhumsíng gi, yhang kut é eq rajung za, yhang lé dam byi râ nghut lhê.



<sup>15</sup> Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

<sup>16</sup> Sâng-hî dàm, ngá gûng lé ngò tái hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhang-moq ahtoq má mara a dut sháng gaq.

<sup>17</sup> Nghut kôlhang, ngò dông mai danglù haû lé rago wó hko pyo kat luî, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byí é nghut lhê. Hau htoq agó, ngò gi, hkanghkyí é nhut mai le hkyi yù hui bê nghut lhê.\*

<sup>18</sup> Haû Yhumsîng gi, ngo lé agè ashop é hkyô hkangmó mai hkyi yù luî, Yhang é mauhkûng mingdán má ngón za shuí jé râ nghut lhê. Hpung-wup shingkang gi, Yhâng chyáng ah-tum abyuq ru joq nyí sháng gaq ô. Amen.

### *Shi-kyám Dang*

<sup>19</sup> Priskila eq Akula nhik lé le, One-sihpuru yhumbyù wuì lé le, bo shi-kyám byi laq.

<sup>20</sup> Erastu gi, Korinhtuq myuq má nyi gyó to bê; Trohpimu lé gi, nô luî, Melitu và mó má ngò nyhi pyâm to bê nghut lhê.

<sup>21</sup> Nàng gi, wó dut é í, gyoqmyò a wàng shi lé, shí má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuì banshoq bang gi, nàng lé shi-kyâm kat akô nghut ri.

<sup>22</sup> Haû Yhumsîng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyi sháng gaq ô.

\* **4:17** Haú hkûn lé, Romaq byu pé, byù sat lé gi, hkanghkyi lé tsô pyâm lhê.

## TITUQ

### Chyáng Hun Kat é Laiká (Titus)

<sup>1</sup> Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yan-mai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê.

<sup>2</sup> Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí,

<sup>3</sup> nga-nhùng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

<sup>4</sup> Nga-nhúng chòm lumjínq é hkyô đông mai, ngá zo sîng nghut é Tituq lé laiká kê kat lhê. Íwa Garai Gasang eq nga-nhùng é hkyi yù Sù Hkrisduq Yesuq chyáng mâ é jeju eq nguínqón hkyô gi, náng chyáng ru joq nyí sháng gaq ô.

#### *Kreti Zinlóng Má, Tituq Wùn Waq Râ Muzó*

<sup>5</sup> Ngò, nang lé Kreti zinlóng má nyhi hkyô tô é gi, ngò, nang lé pyíng tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê.

<sup>6</sup> Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hùn râ jowò a joq é lumjínq bang nghut é sù, nghut râ lhê.

<sup>7</sup> Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lûm tot; îhpê é jùn a dut; mabyoq jishûm a kut; a

sansêng é ngùn hîng lé a myit ô nau é sù nghut râ lhê.

<sup>8</sup> Yhang gi, byù bíng lé dat hkulûm sù; ge é hkyô lé chyitdap sù; nûm é sù, dingmán sù; chyoiyúng sù; yhumsing gùng lé wó hkang é sù;

<sup>9</sup> mhoq yu to bê hkyô eq rajung za, lumjínq é mungdang lé gîng gîng zúí zing nyi é sù nghut râ lhê. Haù hkûn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tûn shit râ nghut lhê.

<sup>10</sup> Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô.

<sup>11</sup> Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzê lé wó yù shoq ga luí, mhoqshit a gîng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri.

<sup>12</sup> Kreti byù mâ é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri.

<sup>13</sup> Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pyíng tô é dang pé lé le, a gyo kô é za,

<sup>14</sup> haù lumjínq hkyô má gîng tîng nyi kó sháng gaq, yhangmoq lé htân htân tân mhoqshit byí nyi aq.

<sup>15</sup> Sân-yúng bâng é matú gi, azíng zê lhunglháng sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri.

<sup>16</sup> Yhangmoq gi, Garai Gasang lé sê lhê ga kôlhang, yhumsing zui saí é loq zó đông, Yhang lé he-ngik pyâm é bang nghut akô. Yhangmoq gi, achayut é bang, jìno a gyô é bang eq, ge

é mù joq mijoq eq a htuk é bang nghut akô nghut ri.

## 2

### *Hká Đông Nyi Yap Râ Hkyô*

<sup>1</sup> Nang kúm gi, tengmán é mhoqshit hkyô eq wui é đông mhoqshit nyi râ dut lhê.

<sup>2</sup> Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkâng râ hkyô eq, lumjìng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

<sup>3</sup> Haù eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí rá hkyô; íhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq.

<sup>4</sup> Haù hkùn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é,

<sup>5</sup> yhumsing gùng lé wó hkang é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkang é đông dat châng é bang dut râ matú, ge mhoqshit é hpô-myhí mâng pé dut râ nghut lhê.

<sup>6</sup> Haù eq rajung za, zorâm wui lé le, yhumsing gùng lé wó hkang nyi kó sháng gaq, lhoq pun lhoq kyíng nyi aq.

<sup>7</sup> Hkyô hkat hkangmó má, yhangmoq lé nang yhang ge é muzó alik tân shit nyi aq.

<sup>8</sup> Nang lé lhom htuq htíng é bang gi, nga-nhúng é hkyô má mara a wó hùn kômù hoq hpû nyi kó sháng gaq, nang mhoqshit é hkyô má, taí pyám rá hkyô a bò shoq, têng é, siri bo é, eq sansêng é dang taí nyi aq.

<sup>9-10</sup> Nga-nhúng é hkyi yù Sù Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ;

wó lum tô é bang dut râ hkyô pé lé, mhoqshit byi aq.

<sup>11</sup> Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shingkang eq htoq shit râ hkyô lé láng nyi é hkùn,

<sup>12</sup> tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq,

<sup>13</sup> nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri.

<sup>14</sup> Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhànggùng yhang sing é byuhú rahú dut râ matú wó lhoq sân-yúng yù shoq ga, nga-nhúng é matú Yhànggùng lé ap byi pyám bê nghut ri.

<sup>15</sup> Nang lé ó yuq eq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

## 3

### *Ge É Muzo Zui Saí Râ Hkyô*

<sup>1</sup> Nang gi, lumjìng bang lé, zau wui eq ahko ahkáng wó bâng é a-ô má nyi mù, jìno gyô nyi râ eq, hkâ-nhám le ge é muzó hkangmó zui saí râ lé hen nyi uchyang,

<sup>2</sup> ó yuq lé le lù a mù râ; nguìngón hkyô hô râ; myit tê byi é hkyô tân shit râ eq; byù banshoq lé nùm é i-myt tân shit nyi kó sháng gaq, lhoq pun lhoq kyíng nyi aq.

<sup>3</sup> Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jùng eq jùn kut é hui bang, dut mù luí, agè ashop é eq manon

lhûm é hkyô kut nyî mù, rayuq eq rayuq a jú lhûm é dông nyi lai lò bê nghut lhê.

<sup>4</sup> Nghut kôlhang, nga-nhûng é hkyi yù Sû Garai Gasâng jeju eq chyitdap myit htoq shit é hkûn,

<sup>5</sup> nga-nhúng yhang kut é dîngmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri.

<sup>6</sup> Yhang gi, nga-nhûng é hkyi yù Sû Yesuq Hkrisduq é yanmai, nga-nhûng é ahtoq má agùn agó hut hkyó byi é Chyoiyúng Woi-nyî èq nga-nhúng lé chí san chí sêng pyám byi mù, woi-nyî má dum hku é hui nhâng luî, myit sik htaí byi é hkyô dông nga-nhúng lé hkyi yù bê nghut ri.

<sup>7</sup> Haû mù luî, Yhâng é jeju mai mara hkyut san byi é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê.

<sup>8</sup> Dang shí pé gi, lungíng é dang nghut lhê mù luî, Garai Gasang lé lumjíng é bang gi, ge é muzó lé myit lòm luî rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

<sup>9</sup> Nghut kôlhang, ana apâ ga luî taí htíng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri.

<sup>10</sup> Gam hkuî é myit bò sù lé gi, í dâm mhoqshit wú mù, a wó jáng, yhang lé baú tô pyám aq.

<sup>11</sup> Haû su kut sù gi, yhang kut é muzó má mara wó to bê nghut mù, yhumsing gùng lé yhumsíng mara hun é sù nghut é lé, nàng sê to lo aq.

### *Je Htâng Má Pying É Dang*

<sup>12</sup> Ngò gi, Nikopoli wà má gyoqmyò lhoq lai râ dông myit hpyit tô é yanmai, Artima lé, a nghut jáng Tuhkiku

lé, nàng chyáng nhang kat byi râ, jé eq yhang, nàng gi, shikut luî, haû wà shut ngá chyáng lé lô aq.

<sup>13</sup> Nàng gi, tarâ sê é sù Zena eq Apolo nhik lé, yhangnhik é hkyowuî má râ é hkyô banshoq, shikut luî garúm kat aq.

<sup>14</sup> Nga-nhúng é byu pé gi, nyí wuî râ é hkyô lé wó htuq é eq ashí zuí é bang dut kó sháng gaq, ge é muzó lé myit lòm mù zui saí nyi râ hkyô lé mhoq yù râ lhê.

<sup>15</sup> Ngò eq rahá nyi é bang yuq hkangmó gi, nang lé shi-kyâm kat akô. Lumjíng hkyô má ngamoq lé chyitdap é bang lé, bo shi-kyâm byi aq.

Garaí é jeju gi, nungmoq eq rahá joq nyi sháng gaq ô!

## HPILEMON Chyáng Hun Kat é Laiká (Philemon)

<sup>1</sup> Hpilemon ê, Hkrisduq Yesuq é yanmai htóng lúng nyî sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le,

<sup>2</sup> ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyî sháng gaq ô!

### *Jeju Hkya-ôn É Hkyô Eq Kyûdung Dang*

<sup>4-5</sup> Ngò gi, Yhumsîng Yesuq lé nàng lumjîng é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkûn, nang lé myit bûn nyî luí, hkâ-nhám le ngá é Garai Gasang lé jeju hkya-ôn nyî lhê.

<sup>6</sup> Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjîng hkyô lé, nàng saksé hkâm é má akyû htoq râ matú, kyûdung byî nyî lhê.

<sup>7</sup> Náng é chyitdap myit gi, ngo lé gyai gabú nhang é eq wum-o wó yû nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yû bekô nghut ri.

### *Onesimu É Matú Tôngbán Byî É Hkyô*

<sup>8</sup> Haû su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haû wó kut nhang lhê nghut kôlhang, chyitdap myit dông za nang lé pying kat lhê.

<sup>9</sup> Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí,

<sup>10</sup> ngò kyum hut huí nyi é u lé ngá zo dut lo é Onesimu é matú nang lé ngò dúng tôngbán kat lhê.

<sup>11</sup> Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

<sup>12</sup> Ngò nhik htông é Onesimu lé náng chyáng dum taû nhang kat lhê.

<sup>13</sup> Haû gabú danglu é yanmai, ngò htóng lúng nyi é má náng é malaí ngo lé garúm râ matú, yhang lé ngò shuí nyi to naû kôlhang,

<sup>14</sup> ngò gi, nàng myit a huí le haí le a kâm kut. Hau é yanmai, ngò, nang lé kut nhang é dông a nghut e za, nàng ô nau é dông kut é san za nghut sháng gaq.

<sup>15</sup> Hkâsu mù gâ le, náng chyáng mai yhang rayoq rabun zo gâng nyi é gi, yhang dum taû lò mù hkâ-nhám le nàng eq rahá dum wó nyi nyi râ matú nghut lhê abe.

<sup>16</sup> Yhang gi, htâng hpyang, jùn rayuq dông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq dông le, Yhumsîng Yesuq má gumang hpó rayuq dông le, je riyhang chyitdap râ sù dut bê nghut ri.

<sup>17</sup> Haû mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq.

<sup>18</sup> Yhang, nang lé rajung jung shut pyâm é nghut le le, chyín dap tô é nghut le le, haû gi, ngá chyáng dap é chyín nghû sôn yù aq.

<sup>19</sup> Ngò, Poluq gi, chyín haû xap râ nghû luí, ngá loq eq yhang kê kat kôlhang, nàng yhang lhang, ngo lé asak chyín xap râ sù nghut é lé bûn nghan aq.

<sup>20</sup> Nghut bê, gumang hpó ê, nang é yanmai, haû Yhumsîng má ngò gabú é hkyô wó yu nyi sháng gaq, Hkrisduq má ngá é i-myit lé lhoq ngui lhoq ngón

byî é dông, shî, ngò pying kat é dang lé gyo byi laq.

<sup>21</sup> Nàng gi, ngò taî kat é htoq má je lhom kut rà nghut é lé, hkyak za sé luî, ngò kê kat é nghut lhê.

<sup>22</sup> Hau htoq agó, ngá é matú nyî râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

<sup>23</sup> Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri.

<sup>24</sup> Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

<sup>25</sup> Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

## HEBRE Pê Chyang Hun Kat é Laiká (Hebrews)

*Garai Yhangzo Gi, Maumang  
Lagyô Pê Htoq Je Gyaú É Hkyô*

<sup>1</sup> Laí ló bê ipyat pé má, Garai Gasang gi, nga-nhung é íchýí íwâ pé lé myiqhtoí pé dông alhîng lhîng eq adông dông mai dáng nyo wú bê nghut lhê.

<sup>2</sup> Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhung lé dang nyò bê nghut ri; Yhang gi, lhungháng lé sîng sũ dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri.

<sup>3</sup> Haú Zo gi, Garai Gasâng é hpung-wup shing kang duqbó é hkyô eq Yhâng é gunghkyâng isâm roq nghut nyì mù, lhungháng lé Yhâng é a-tsam byíng é dâng eq zuí zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sũ Garai Gasâng é loqyo hkyam má zung to bê nghut ri.

<sup>4</sup> Haú mù luí, Yhang gi, maumang lagyô pé é myìng htoq gyaú é myìng lé wó sing yù bê nghut é eq rajung za, yhangmoq htoq je riyhang gyaú sũ dut bê nghut ri.

<sup>5</sup> Hkâsu mù gâ le, Garai Gasang gi, "Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê."☆

ga le, dum,

"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."☆

ga le, maumang lagyo hká yuq lé hkâ-nhám wá taí wú é nghut lhê lú?

<sup>6</sup> Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."☆

ga taí ri.

<sup>7</sup> Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé laí su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."☆

gâ ri.

<sup>8</sup> Nghut kôlhang, haú Zo eq séng luí, Yhang gi,

"Garai Gasang é, Náng é hkohkâm-tanghkuq gi, pyat dedu ahtum abyuq gîng nyì mù,

Náng é dingmán hkyô gi, Náng é mingdán lé uphkang é hkyô dut râ nghut lhê.

<sup>9</sup> Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xũ but byí é dông, Náng é luzúm wui htoq je lhoq gyaú to bê nghut ri."☆

ga taí ri.

<sup>10</sup> Hau htoq agó, Yhang gi,

"Yhumsîng é, Nàng gi, a-nham sân-hi má myidàm é apûn awang lé hi tô é nghut mù,

mauhkûng pé gi, Náng é loqmú chyat nghut ri.

<sup>11</sup> Haú pé gi, htên byoq byuq râ nghut lhê; nghut kôlhang, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

<sup>12</sup> Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htúm râ a nghut."☆

ga le taí ri.

13 Garai Gasang gi,  
 "Ngò, náng é gye pé lé, náng é hkyi  
 nang tanghkuq kut pyám byí é  
 hkyíng jé shoq,  
 Ngá é loqyo hkyam shut zung nyi shi  
 aq."✧  
 ga maumang lagyo hká yuq lé hkâ-  
 nhám wá taí wú é lhú?  
 14 Maumang pé banshoq gi, hkyi yù  
 hkyô lé hkam yù râ nghut é bang lé  
 dojaú râ matú, nhang kat huí é mù  
 wùn woi-nyí pé chyat za nghut akô, a  
 nghut kó lhú?

## 2

### *Sadiq Byí É Hkyô*

1 Haú mù luí, nga-nhúng gi, châng  
 nghoq ló byuq é a hui zo sháng gaq,  
 haú nga-nhúng wó gyô yu to bê hkyô  
 lé je riyhang rago châng nyi râ dut lhê.

2 Hkâsu mù gâ le, maumang lagyo  
 pê eq taí bê mungdang gi, gíng nyi mù,  
 shut shaí lu laí é hkyô eq jino a gyô é  
 hkyô hkangmó kut é sù gi, yhumsíng  
 eq gíng é mara dam byí é hui zo kô é  
 nghut le gi,

3 nga-nhúng gi, haú-í yhang gyaú  
 é hkyi yù hkyô lé haí su a ngám kut  
 é nghut jáng, nga-nhúng hkâsu wó  
 hpanq lut râ lhú? Hkyi yù hkyô haú  
 gi, haú Yhumsing eq hí taí pyo htoq  
 é nghut mù, Yhâng chyáng mai wó  
 gyô yu é bang gi, haú hkyô têng é  
 lé, ngamoq chyáng saksé shit bekô  
 nghut ri.

4 Garai Gasang le, kumlhá pé,  
 mauhpo muzó pé, laklaí kumlhá myo  
 myo eq, Yhang ô nau é eq rajung za  
 Chyoiyúng Woi-nyí chyunghuq pé lé  
 gám byí é dông mai, haú hkyô lé saksé  
 shit bê nghut ri.

### *Hkyi Yù Hkyô Hpóng Byi Sù*

5 Garai Gasang gi, maumang lagyo  
 pé lé, ngamoq taí nyi é jé lô râ  
 mingkan lé, uphkâng nhâng râ a  
 nghut.

6 Rayuq yuq mai, rawò má saksé  
 hkâm tô é gi,

"Byù gi, haí wá nghut mù, Nàng,  
 yhang lé bûn nyi lhê lhú?

Byu Yhangzo gi, haí wá nghut  
 mù, Nàng, yhang lé wú gôn nyi  
 lhê lhú?

7 Nàng gi, yhang lé, maumang lagyo  
 pê htoq ratsuí lhoq nyhum to  
 bê nghut ri.

Nàng gi, yhang lé, hpungwup  
 shingkang eq aróng bò nhâng  
 mù,

8 jung hkangmó lé, yhâng é  
 hkyiwa ô má tô to bê nghut  
 ri."✧

gâ ri. Jung hkangmó lé yhâng é a-  
 ô má tô to bê gâ é gi, Garai Gasang,  
 haí lháng a myhit to loshoq yhang  
 uphkâng é a-ô má tô to bê nghut é lé  
 gâ lhê. Nghut kôlhâng, yhang é a-ô má  
 tô tô é jung hkangmó lé, ahkuí, nga-  
 nhúng a myàng shí é za nghut lhê.

9 Nghut kôlhâng, nga-nhúng gi, mau-  
 mang lagyo pê htoq ratsuí zo lhoq  
 nyhum huí é sù Yesuq lé myang é  
 nghut lhê. Yhang gi, Garai Gasang  
 jeju mai, yuq hkangmó é matú shí  
 hkâm byí é hui zo sháng gaq ga, shí-  
 nò jamjau hkyô lé hkâm zo bê nghut  
 é yanmai, ahkuí, Yhang lé hpung-  
 wup shingkang eq aróng bò nhâng bê  
 nghut ri.

10 Zo wuí myo myo lé hpungwup  
 shingkang wó hkam yù nhâng sháng  
 gaq ga, jung hkangmó lé Yhang é  
 matú chyat eq Yhang dông mai chyat  
 joq nyi nhang é Garai Gasang gi,  
 wuîhke jamjau hui nhang é dông,  
 yhangmoq é hkyi yù Sù lé lhoq  
 gumjup byi râ matú htuk âng nyi ri.

11 Haú byu pé lé chyoiyúng nhang  
 é Sù eq lhoq chyoiyúng huí é bang  
 gi, ikun ralhú za mâ é bang chyat  
 nghut lhê. Haú mù, Yesuq gi, yhang-  
 moq lé, gumang wuî nghú râ lé a hoq  
 é nghut lhê.

12 "Ngò gi, Náng myíng lé, Ngá gumang  
 wui chyáng taí pyô râ nghut  
 lhê;

Ngò gi, shiwa hpông é myoq hí  
 má, Nang lé hkya-on mahkôn



hkôn râ nghut lhê."<sup>☆</sup>  
ga, Yhang taî ri.

<sup>13</sup> Yhang gi,

"Ngò gi, Yhang lé lumhkau nyì râ  
nghut lhê."<sup>☆</sup>

ga le dum taî ri. Hau htoq agó,

"Ngò gi, Garai Gasang ngo lé byî é  
zoshâng wuì eq shî má nyì nyi  
lhê."<sup>☆</sup>

ga, Yhang dum taî ri.

<sup>14</sup> Haû zoshâng wuì gi, sui sho eq  
nghut é yanmai, Yhang le, yhangmoq  
é xângzo gùng bo hkam yù bê nghut  
ri. Hau é yanmai, Yhang gi, Yhâng  
é shî-nò hkyô dông mai, shî-nò hkyô  
é a-tsam lé zuì zìng é sù nghut é nat  
Tsadán lé wó lhoq htên pyám râ eq,

<sup>15</sup> yhangmoq é shî-nò hkyô lé gyuq  
é èq, yhangmoq é asak gón lé jùn dông  
zuì zìng to huì é bang lé, wó lhoq lhut  
râ nghut lhê.

<sup>16</sup> Gè gè yhang, Yhang gi, maumang  
lagyô pé lé garúm é a nghut é za,  
Abraham é awut ashín pé lé garúm é  
sheq ru nghut lhê.

<sup>17</sup> Haû nghut é yanmai, Yhang gi,  
Garai Gasang lé dojaú é má shogyo  
nhikmyîn é eq lhumzuì é hkyangjong  
mó wó dut râ eq, byu pé é yubak  
marâ é matú shîhtaí gunglik hkungga  
wó kut râ matú, hkyô hkangmó má  
Yhâng é gumang wuì eq dù shoq kut  
é huì râ dut é nghut lhê.

<sup>18</sup> Yhang gi, gunglaú huì é hkûn,  
Yhânggùng yhang jamjau huì zo bê  
nghut é yanmai, gunglaú huì nyi é  
bang lé wó garúm yu é nghut lhê.

### 3

#### *Yesuq Gi, Mosheq Htoq Gyaú É Hkyô*

<sup>1</sup> Haû mù luí, mauhkûng mai wut  
yù huì é, chyoiyúng é gumang wuì è,  
lagyo eq hkyangjong mó nghû nga-  
nhúng yín yu é Yesuq é hkyô lé rago  
myit wú keq.

<sup>2</sup> Mosheq, Garai Gasâng é yhûm gón  
má lhumzuì é su, Yesuq le, Yhang

lé masat yù sù Garai Gasâng chyáng  
lhumzui sù dut bê nghut ri.\*

<sup>3</sup> Yhûm kut sù gi, yhûm htoq je gyaú  
é aróng lé wó é su, Mosheq htoq,  
Yesuq gi, je gyaú é aróng lé wó gíng é  
lé myàng ri.

<sup>4</sup> Hkâsu mù gâ le, yhûm hkangmó  
gi, rayuq yuq èq saí é chyat nghut ri.  
Nghut kôlhang, Garai Gasang gi, jung  
hkangmó lé saí é sù nghut lhê.

<sup>5</sup> Mosheq gi, Garai Gasâng é yhûm  
gón má dui-nhâng zoshâng rayuq  
dông lhumzui mù, Garai Gasang taî  
râ nghut é lé saksé hkám bê nghut ri.

<sup>6</sup> Nghut kôlhang, Hkrisduq gi,  
lhumzuì é zo rayuq dông Garai  
Gasâng é yhûm lé up ri. Nga-nhúng  
kúm gi, nga-nhúng lé wám é myit bò  
nhang é hkyô eq nga-nhúng gumrong  
nyi é myoqbyù hkyô lé myhik zing nyi  
é nghut jáng, Yhâng é yhûm nghut nyi  
bê.

#### *A Lumjîng Bang Lé Sidiq Byî É Hkyô*

<sup>7</sup> Haû mù luí, haû Chyoiyúng Woi-  
nyí taî é eq rajung za,

"Hkû-nyí, nungmoq gi, Yhâng é dan-  
ghtê lé wó gyo kô é nghut jáng,

<sup>8</sup> yoso má Yhang lé chyâm kô é u lé,  
gumlau toq é hkûn nungmoq é îchyí  
îwâ pé kut kô é su, nungmoq é  
i-myt lé hkâlhoq htan to kó.

<sup>9</sup> Nungmoq é îchyí îwâ pé gi, myi xê  
zàn yhang Ngò kut é muzó lé  
myàng kôle, yoso haú má Ngo  
lé chyam lik bekô nghut ri.

<sup>10</sup> Haû nghut é yanmai, Ngò gi, ipyat  
haû lé nhikjum yo mù,

'Yhangmoq é myit nhiklum gi,  
hkâ-nhám le hkyô ngoq byuq  
akô;

yhangmoq gi, ngá é hkyô pé lé a  
sé kômù nghut ri.' nghû taî é  
nghut lhê.

<sup>11</sup> Haû mù, 'Ngá é bánno jowò má  
yhangmoq hkâ-nhám le wó  
wâng kó râ a nghut.' nghû, Ngò,  
nhikjum yô é eq dakâm dang  
taî bê nghut lhê."<sup>☆</sup>

☆ 2:13 Esai 8:17 ☆ 2:13 Esai 8:18 \* 3:2 Bun zo shî eq bun zo 5, 6 lhum mâ é Garai Gasâng é yhûm  
gâ é gi, Garai Gasâng é byu pé lé gâ é nghut lhê. ☆ 3:11 Hkya-on 95:7-11

gâ ri.

<sup>12</sup> Gumang wui ê, nungmoq mâ é ó yuq le, haú rû dui nyi é Garai Gasâng chyáng mai, lhing taú ló byuq sê é, yubak mara byíng é, a lumjíng é i-myit a bò sháng gaq, sidiq nyi keq.

<sup>13</sup> Nungmoq gi, ó yuq le, yubak marâ é mhaú zô é hkyo èq i-myit lhoq htan pyâm é a hui kó sháng gaq, "hkû-nyí" nghû ru wó taí nyi nyi gi, nyí wui, rayuq eq rayuq myit wum byí lhum nyi keq.

<sup>14</sup> Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri.

<sup>15</sup> Haú gi,  
"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myit lé hkâlhoq htan to kó."✧  
ga taí é eq rajung za nghut ri.

<sup>16</sup> Wó gyô yù mù, gumlau toq é bang gi, ô pé nghut akô lú? Haú bang ban-shoq gi, Egotuq ming mai Mosheq èq shuí htoq lo é bang nghut bum lê, a nghut kó lú?

<sup>17</sup> Myi xê zàn yhang Garai Gasang lé nhikjum yó nhang é bang gi, ô pé nghut akô lú? Haú bang gi, mara kut shut mù, yoso má shi leq byuq é bang nghut bum lê, a nghut kó lú?

<sup>18</sup> Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lú?

<sup>19</sup> Haú mù, yhangmoq a lumjíng kô é yanmai, a wó wâng kô é lé, nga-nhúng myang é nghut lê.

## 4

*Garai Gasâng É Byu Pé É Matú Bánno Buinyi Đông Nghut É Bánno Jowò*

<sup>1</sup> Haú nghut mù luí, Garai Gasâng é bánno jowò má wàng râ danggidiq ru

gíng nyi ashî nghut é yanmai, nungmoq mâ é ó yuq le, haú má a hkyit hkap é a dut râ matú, nga-nhúng sidiq nyi sháng.

<sup>2</sup> Hkâsu mù gâ le, yhangmoq lé gabú danglù haú hko kyo bê su, ngamoq lé le hko kyo bê nghut lê; nghut kôlhang, yhangmoq wó gyô é mungdang gi, yhangmoq é matú akyú a bò, haí mù gâ le, haú wó gyô é bang gi, lumjíng myit mai a lhom hap yù kô é yanmai nghut ri.

<sup>3</sup> Nga-nhúng lumjíng bê bang za, bánno jowò haú má wó wang é nghut lê. Haú hkyô gi,

"Haú mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é èq dakâm dang taí bê nghut lê."✧

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lê.

<sup>4</sup> Hkâsu mù gâ le, "Garai Gasang gi, nyhit nyí nghû râ buinyi má Yhâng é muzó banshoq mai bánno bê nghut ri."✧ gâ é dang pé má, haú nyhit nyí nghû râ buinyi eq sêng é hkyô lé rawò má Yhang taí tô ri.

<sup>5</sup> Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó râ a nghut."✧ gâ ri.

<sup>6</sup> Bánno jowò haú má wàng râ bang ra-am nyi é danggidiq joq tô ashî nghut ri; hí hkûn, gabú danglù haú wó gyô wú bê bang kúm gi, yhangmoq jìno a gyo kô é yanmai, a wàng kô é nghut lê.

<sup>7</sup> Haú mù luí,  
"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myit lé hkâlhoq htan kó."✧

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkûn, "Hkû-nyí" gâ é buinyi ra-nyí dum masat to bê nghut ri.

8 Hkâsu mù gâ le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotû buinyi eq séng luí tai rá a nghut lo.

9 Haû mù luí, Garai Gasâng é byu pê é matú gi, Bánno buinyi đông nghut é bánno jowò ru joq tô ashî nghut lhê.

10 Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno rá nghut lhê.

11 Haû nghut mù, yhangmoq é jino a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haú má wó wâng shoq, a-tsam bo é í shikut sháng.

12 Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê.

13 Hpan tô é lhunglhang gi, Garai Gasâng é hí mai wó haq pyâm é haí le a joq é nghut lhê. Jung hkanmó gi, nga-nhúng, jihpán shit ra rá Su é myoq hí má a wó nghop tô é hkyô, de de dut é nghut lhê.

### *Je Gyaú É Hkyangjong Mó Yesuq*

14 Haû mù luí, nga-nhúng gi, Garai Gasâng é Yhangzo Yesuq nghut sù, mauhkûng pê shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjín hkyô lé ging ging myhik zing nyi sháng.

15 Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkanmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê.

16 Haû mù luí, nga-nhúng gi, shogyo nhikmyín é hkyô wó yú rá eq, nga-nhúng ra châ é u má nga-nhúng le

wó garúm rá jeju lé myang hô sháng gaq, hkyak lum é myit mai Garaí jeju tanghkuq shut chyâng htep é sháng.

## 5

1 Hkyangjong mó yuq hkanmó gi, byu pê chyáng mai hkyin htoq yú huí é nghut mù, mara pê é matú, chyunghuq pé eq hkungga pé nhông byi hkyô nghut é, Garai Gasang eq séng é muzó pé má, yhangmoq é gunglik đông, hkyin masat to huí é bang nghut akô.

2 Yhânggùng yhang gi, wum nyhôm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é đông wó shuí-û é nghut lhê.

3 Wum nyhôm é yanmai, yhang gi, byu pê é marâ é matú le, yhânggùng yhâng é marâ é matú le, hkungga nhông byi rá dut é nghut lhê.

4 Ó yuq le, yhumsing gùng yhumsing aróng haú lé wó yu é a nghut; Arun lé su, Garai Gasâng eq wut yu é hui jáng sheq wó é nghut lhê.

5 Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkyô-nyí Náng Wa dut bê nghut lhê."\*

ga taí é nghut lhê.

6 Hau htoq agó,

"Nàng gi, Melahkizedek wó é hkyangjong ayá hkyô đông mai ahtum abyuq hkyangjong rayuq nghut nyi ri."\*

ga, gó wô má le, Yhang taí to ashî nghut ri.

7 Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yú Su chyáng, ngaubyi ngau-nhap eq wut garú é eq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri.

\* 5:5 Hkya-on 2:7    \* 5:6 Hkya-on 110:4

<sup>8</sup> Yhang gi, Zo rayuq nghut to kôle, Yhang hui zô é wuîhke jamjau hkyô mai jîno gyo hkyô wó mhoq yû bê nghut ri.

<sup>9</sup> Yhang gi, lhoq gumjup huî é hkûn, Yhang é jîno gyo bang banshoq é matú, ahtum abyuq é hkyi yû hkyo é awang dut byuq bê nghut é eq,

<sup>10</sup> Melahkizedek wó é hkyangjong ayá hkyô dông mai hkyangjong mó dut rá matú, Garai Gasâng eq hkyin masat é hui bê sù nghut ri.

### *Woi-nyí Má Wáng Ra Bê Hkyô*

<sup>11</sup> Ngamoq gi, shí hkyô eq séng luí taí rá gyai joq lhê; nghut kôlhang, nungmoq gi, ra luí za a sê gyô é bang nghut kô é yanmai, taí sân kyo wuî ri.

<sup>12</sup> Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq eq nungmoq lé dum taû mhoq byi rá ru dut nyi akô nghut ri. Nungmoq gi, htan é zoshuq rá é bang a nghut, naú wing rá é bang ru nghut nyi ashí kó myhi-nhung!

<sup>13</sup> Naú wing shuq rá é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri.

<sup>14</sup> Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lhê.

## 6

<sup>1</sup> Haû mù luí, nga-nhúng gi, Hkris-duq eq séng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shî-nò hkyô shut shuî jé é muzó mai myit lhîng hkyo é, Garai Gasang lé lumjîng hkyo é,

<sup>2</sup> baptisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apûn awang dum hî nó a ra lô é nghut lhê.

<sup>3</sup> Garai Gasang gyô é nghut jáng, nga-nhúng gi, myit kô dîng hkyô shut xoq so rá nghut lhê.

<sup>4</sup> Myoq lhoq bóng é radàm hui bê bang, mauhkûng chyunghuq lé myang hap yû bê bang, haû Chy-oiyúng Woi-nyí lé chôm hkam yû bê bang,

<sup>5</sup> Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang,

<sup>6</sup> yhangmoq hpuq lhik ló byuq é nghut le gi, hká dông lé myit lhîng dum ge wó rá a nghut lo, haî mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyám kô é nghut lhê.

<sup>7</sup> Yhâng ahtoq má wo gyûn é mau wuî lé shuq yû mù, yò mù saí bâng é matú akyû bo é hôwa nuqhpyí lhoq htoq byi é maumyí gi, Garai Gasâng é shimân jeju myang hap yu é nghut ri.

<sup>8</sup> Nghut kôlhang, zu gâm eq myoq gâm yuq htoq nhang é maumyí gi, akyû a bò mù, nhîng pyâm é hui zo rá lé chiq rá ri. Haû gi, ló htáng má nyhê hkyô pyâm é hui rá nghut lhê.

<sup>9</sup> Nghut kôlhang, chyitdap é gumang wuî é, ngamoq gi, haû su nghû taí é nghut kôlhang, nungmoq é hkyi yû hkyô eq séng é je ge é jung pé, nungmoq wó bekô rá nghû hkyak myit lum tô lhê.

<sup>10</sup> Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí rá nghut lhê.

<sup>11</sup> Ngamoq gi, nungmoq é i-myyit myoqbyù hkyô wó byíng jup rá matú, nungmoq yuq hkangmó ipyat htum shoq xoq shikut nyi kó rá lé gyai ô nau ri.

<sup>12</sup> Ngamoq gi, nungmoq lagon bang dut byuq rá lé a ô nau é za, Garaí danggidiq byi to bê é lé, lumjîng myit eq myit hîng hkyô dông mai hkam yu é bang su châng kut kó rá lé ô nau é ru nghut lhê.

*Garai Gasâng É Danggidiq Gîng Nyi É Hkyô*

<sup>13</sup> Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggùng lé Yhang lang luí dakam é gi,

<sup>14</sup> "Ngò gi, nang lé teng yhang shimân byi mù, nang lé awut ashîn myo myo byi râ nghut lhê." ✧ gâ ri.

<sup>15</sup> Haû mù, Abraham gi, myit hîng hîng láng yu é htâng má, byî tô é danggidiq lé wó yû bê nghut ri.

<sup>16</sup> Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri.

<sup>17</sup> Garai Gasang gi, Yhang myit hpyit tô é hkâ-nhám le a htaî lhik é hkyô lé, danggidiq byî tô é lé hkam yù râ bâng chyáng san za shit nau ri; haû mù luí, dakâm dang eq lhoq gîng to bê nghut ri.

<sup>18</sup> Garai Gasang gi, mhaú a ge é yan-mai, hkâ-nhám le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhûng hí má tô to byî é myit myoqbyù hkyô lé myhik zîng râ matú gaú é jowò shut hpang wàng bê bang nga-nhûng lé wum mó byî é dut râ matú nghut lhê.

<sup>19</sup> Nga-nhûng gi, myit nhiklhûm é shamtoq goknghe dông myit myoqbyù hkyô haû lé wó é nghut mù, haû gi, gîngtîng é eq gaú é hkyô nghut ri. Myit myoqbyù hkyô haû gi, mauhkûng noqkuq yhûm mâ é pân-gyang ahkaú mâ é sân-yúng gok má jé wang é nghut ri.

<sup>20</sup> Jowò haû gi, nga-nhûng é akyu é matú, nga-nhûng é hí má wàng byî é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

**7**

*Hkyangjong Melahkizedek É Hkyô*

<sup>1</sup> Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat úng pyám luí dum taú lo é Abraham lé hui mù, shimân byi bê nghut ri.

<sup>2</sup> Haû mù, Abraham gi, wó lo é jung hkanmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é myîng lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguîngón hkyo é hkohkâm" gâ é nghut lhê.

<sup>3</sup> Yhâng é înu îwa é hkyô eq byùxik labaú le, hi é buinyi eq asak htúm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

<sup>4</sup> Yhang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung!

<sup>5</sup> Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô.

<sup>6</sup> Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byi ri.

<sup>7</sup> Shimân byi sù gi, shimân byi é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê.

<sup>8</sup> Hkyangjong pé eq séng luí ga jang, shi byuq sé é byu eq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taî pyô byi é hui su eq hkyui yu é nghut lhê.

<sup>9</sup> Xê gambùm mâ é ragambùm hkyui yù sù, Lewiq lháng gi, Abraham

dông mai xê gambùm mã é ragambùm byi bê nghũ wó taí ri.

<sup>10</sup> Haí mù gâ le, Melahkizedek gi, Abraham lé huí é hkûn, Lewiq gi, yhâng é íchyí íké é gungdu hkaû má ru bo tô ashî nghut ri.

*Melahkizedek Eq Dù É Yesuq*

<sup>11</sup> Haû Lewiq hkyangjong amyû pê é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yû kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lúh?

<sup>12</sup> Hkâsu mù gâ le, hkyangjong amyû htaí é hkûn gi, tarâ le htaí yhang htaí râ dut é nghut lhê.

<sup>13</sup> Haû su nghũ taí é hkyô pé eq sêng é Sû gi, gotû byuhú mã é sù nghut mù, byuhú haû mai gi, ó yuq le hkungga gyp má dojaú wú é a nghut.

<sup>14</sup> Hkâsu mù gâ le, nga-nhông é Yhumsîng gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haû eq sêng é hkyô má, hkyangjong pé eq séng luí haí lé a taí é nghut lhê.

<sup>15</sup> Melahkizedek eq dù é gotû hkyangjong rayuq pô htoq bê nghũ, ngamoq taí bê hkyô gi, je riyhang san za dut bê nghut ri.

<sup>16</sup> Yhang gi, îwa rayuq é awut ashín pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê.

<sup>17</sup> Hkâsu mù gâ le, "Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."✧

ga Yhang eq séng luí taí pyo tô é nghut lhê.

<sup>18</sup> Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê.

<sup>19</sup> Hkâsu mù gâ le, haû jep é tarâ gi, gumjup hkyô haí a wó kut byí é nghut

lhê. Haû mù, je ge é myit myoqbyù hkyô lajang byí é nghut luí, nga-nhông gi, myit myoqbyù hkyô haû mai Garai Gasâng chyáng wó chyâng htep é é nghut lhê.

<sup>20</sup> Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri.

<sup>21</sup> Nghut kôlhang, Yesuq kúm gi, "Nàng gi, ahtum abyuq hkyangjong rayuq nghut lhê."

ga haû Yhumsîng dakâm bê nghut mù, Yhang myit é hkyô htaí râ a nghut."✧

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri.

<sup>22</sup> Dakâm dang hau é yanmai, Yesuq gi, je ge é dangshikaq é pahkâm wò yù sù dut bê nghut ri.

<sup>23</sup> Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri.

<sup>24</sup> Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyi râ nghut lhê.

<sup>25</sup> Haû mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tôngbán byi nyi râ matú, rû dui nyi é sù nghut lhê.

<sup>26</sup> Yesuq gi, chyoiyúng é sù, mara hûn râ hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkûng pê ahtoq má lhoq toq lhoq gyaú yu huí é sù nghut ri. Haû sù é hkyangjong mó gi, nga-nhông râ é lé lajang byi râ htuk ang ri.

<sup>27</sup> Nyí nyí bui bui, yhumsing é marâ é matú hí hkungga nhông byi mù, byu pê é mara matú le hkungga nhông byí é gotû hkyangjong mó pé su, Yhang gi, a kut râ é sù nghut lhê. Yhang gi, Yhânggùng lé Yhang nhông byí é hkûn,

yhangmoq é yubak marâ é matú ban-shoq radàm za hkungga nhông byi pyám bê nghut ri.

<sup>28</sup> Hkâsu mù gâ le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

## 8

### *Dangshikaq Asik É Hkyangjong Mó Yesuq*

<sup>1</sup> Ngamoq taî nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sù Garaî é hkoîkâm-tanghkuq é loqyò hkyam shut zùng to mù,

<sup>2</sup> byu èq saî é a nghut é za, haû Yhumsing èq saî é saksé zúm akying hkaû mâ é, sân-yúng dik gok má dojaú é sù nghut ri.

<sup>3</sup> Hkyangjong mó hkangmó gi, chyunghuq pé eq hkungga pé lé nhông byi rá matú wò hun to huî é chyat nghut lhê. Haû mù luî, hkyangjong mó shí yuq le, rajung jung nhông byi ra rá nghut lhê.

<sup>4</sup> Yhang gi, mingkan htoq má nyi tô é ru nghut le gi, hkyangjong dut rá a nghut; hkâsu mù gâ le, jep é tarâ dông ga jang, chyunghuq nhông jaú é byu pé nyi to gù bê nghut lhê.

<sup>5</sup> Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saî rá nghut é hkûn, "Nang lé, bùm má tân shit é azòng eq rajung za jung hkangmó wó saî shoq kut aq."\* ga sidiq byi huî é nghut lhê.

<sup>6</sup> Nghut kôlhang, Yesuq, gyoro sô xoq byî é dangshikaq gi, axaû lhûm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut

lhê. Haû mù, dangshikaq haû gi, je ge é danggidiq pê htoq má awang hí tô é nghut lhê.

<sup>7</sup> Hkâsu mù gâ le, sân-hi lhê é dangshikaq má rá é hkyô haî a bo é ru nghut le gi, gotû ra rá a nghut lo.

<sup>8</sup> Nghut kôlhang, Garai Gasang gi, byu pé chyáng mara bo é myàng mù, taî é gi,

"Haû Israelaq é yhumbyù wuî eq le, Yudaq é yhumbyù wuî eq le, Ngò, dangshikaq asik to rá ahkyíng jé lo nyi ri ga haû Yhumsing taî pyo ri.

<sup>9</sup> Haû gi, Ngò, yhangmoq é îchyí îwâ pé lé loq èq zui mù, Egutuq ming mai shuî htoq lo é hkûn, yhangmoq eq tô tô é dangshikaq su dut rá a nghut.

Haî mù gâ le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsing taî pyo ri.

<sup>10</sup> Shí gi, ahkyíng haû laî é htâng má, Israelaq é yhumbyù wuî eq Ngò to rá nghut é dangshikaq nghut lhê ga haû Yhumsing taî pyo ri.

Ngò gi, Ngá é tarâ pé lé, yhangmoq é i-myit má kat byi mù, yhangmoq é myit nhiklhum má kê to byi rá nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó rá nghut lhê.

<sup>11</sup> 'Haû Yhumsing lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhòqshit é byù nyi rá a nghut lo,

haî mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó rá nghut lhê.

<sup>12</sup> Hkâsu mù gâ le, Ngò gi, yhangmoq é agè ashop hkyô lé mara hkyut pyám byi mù, yhangmoq

é mara pé lé dum a bun byi lo  
râ nghut lhê."☆  
gâ ri.

<sup>13</sup> Dangshikaq haû lé, Yhang "asik"  
gâ é gi, sâng-hi lhum lé, axau kut pyâm  
é nghut ri; xau ló byuq é haî le, hkâ-  
myhâng a myáng má byuq ló byuq râ  
nghut lhê.

## 9

### *Myidàm Saksé Zúm Má Noqkuq É Hkyô*

<sup>1</sup> Sâng-hi lhê é dangshikaq gi, no-  
qkuq râ htûngtarâ pé eq noqkuq râ  
myidàm sâng-yúng dik gok bo é nghut  
ri.

<sup>2</sup> Saî tô é saksé zúm é sâng-hi gok má  
gi, haû myibung tsûng jang, siboî eq  
haû nhông byî é muk joq mù, haû gok  
lé gi, Chyoiyúng Jowò ga myhâng ri.

<sup>3</sup> Í dang nghû râ gok pân-gyang é  
ahkaû mâ é gok lé gi, Chyoiyúng  
Htâng é Jowò gâ é nghut lhê.

<sup>4</sup> Gok haû má gi, namngón jung  
nyhê é hîng hkungga gyap eq hîng  
shup dangshikaq sidek joq ri. Dang-  
shikaq sidek haû má gi, mannaq muk  
bo é hîng yam, ahaq nyún tô é, Arun é  
dumbáng eq, dangshikaq luqlong pé  
bo tô ri.

<sup>5</sup> Dangshikaq sidek é ahtoq má gi,  
shîhtaî gunglik hkungga byi jang htoq  
má wup tô é, Hpungwup shingkang  
bò Sû é hkerubim\* pé joq tô ri. Nghut  
kôlhang, ngamoq gi, ahkuî haû pé lé  
jihkúm nuqguq a wó taî san kyo é  
nghut lhê.

<sup>6</sup> Haû dông jung hkanmó ban  
lajang tô é hkûn, hkyangjông pé  
gi, ayang sâng-hi gok má wàng mù,  
yhangmoq é dojaú muzó lé wùn waq  
bekô nghut ri.

<sup>7</sup> Nghut kôlhang, ahkaû gok má gi,  
hkyangjong mó za, yhânggùng é matú  
le, a sê é za byu pé kut shut é marâ é  
matú le, nhông byi râ sui chùng mù,  
razàn má radàm za wang é nghut lhê.

<sup>8</sup> Haû Chyoiyúng Woi-nyí gi, haû pé  
dông mai, sâng-hi é saksé zúm ru joq

nyì nyì, haû Chyoiyúng Htâng é Jowò  
wàng hkyô a hpông shit shi é lé, tân  
shit nyi ri.

<sup>9</sup> Haû gi, ipyat shi é matú tân  
shit é azông nghut mù, nhông byî é  
chyunghuq pé eq shigu hkungga pé  
gi, dojaú sù é i-myt lé a wó lhoq sâng-  
yúng byî é hkyô lé taî nau é nghut lhê.

<sup>10</sup> Haû pé gi, zojung, shuqjung eq  
chî san chî séng hking ahú hú eq za  
sêng é nghut mù, htûngli asik, lé joq é  
ahkýng jé shoq za tô tô é gungsho eq  
sêng é tarâ pé nghut ri.

### *Hkrisduq É Sui*

<sup>11</sup> Hkrisduq gi, shî má joq to gù  
nghut é gè hkyô pé é hkyangjong mó  
dông lé jé é hkûn, hpan tô é má a lom  
nghû nau é, byu èq saî é a nghut é,  
je kô é eq je gumjup é saksé zúm mai  
wang lai bê nghut lhê.

<sup>12</sup> Yhang gi, Chyoiyúng Htâng é  
Jowò má wang é hkûn, bainám eq  
nojûng zo pé é sui lé chùng mù wang  
é a nghut é za, Yhâng é suî èq yhang  
banshoq é matú radàm za ahtum  
abyuq é hkyi yù hkyô wó yù bê nghut  
ri.

<sup>13</sup> Htûngli dông agot a-û dut é bang  
lé lhoq sâng-yúng râ matú, bainám  
eq nohtó zo pé é sui eq no-pyâ é  
myi-mhop lé, yhangmoq é ahtoq má  
hpyun gyun é hkûn, yhangmoq gi,  
ahtoq gungsho pyâm wó lhoq sansêng  
é hui kô é nghut lhê.

<sup>14</sup> Haû nghut jáng, Garai Gasâng é  
hí má ra a bo é Yhânggùng lé, ah-  
tum abyuq é Woi-nyí dông mai nhông  
byî é Hkrisduq é sui gi, rû dui nyi é  
Garai Gasang lé nga-nhúng wó dojaú  
sháng gaq ga, shi é hkyô shut shuî jé é  
nyì yap sâmlai mai nga-nhông é myit  
sôn sê é hkyô lé, je riyhang wó lhoq  
sanséng yu ri-nhung mhaî!

<sup>15</sup> Haû nghut é yanmai, Hkrisduq  
gi, danggidiq byi tô é ahtum abyuq  
é muizé lé, jì yù huî é bang wó hap  
yù kó sháng gaq ga, dangshikaq asik  
é gyoro sô xoq byi sù nghut nyi ri.

\* **9:5** Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.



Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yû râ matú, yubak chyín xap zê ralhúm dông, Yhang shî hkâm byi yanmai nghut ri.

16 Madat dang eq séng luí ga jang, madat dang tái sù haû shî bê hkyô saksé shit râ lhê.

17 Haí mù gâ le, madat dang gi, rayuq yuq shî jáng za sheq lichyúm htoq é nghut lhê. Madat dang tái sù rû dui nyi nyi, haû gi, hkâ-nhám le lichyúm htoq râ a nghut.

18 Haû nghut é yanmai, sâng-hi lhê é dangshikaq lhang gi, sui a bo lóm jáng lichyúm a htoq é nghut lhê.

19 Mosheq gi, haû jep é tarâ má bo é hkunmó hkangmó lé, shiwa byù banshoq bang lé ban tái pyo é hkún, zam zam ne é saumaú eq jâm kyâng lé yù mù, nojúng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyûn é nghut ri.

20 Yhang gi, "Sui shî gi, nung-moq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê."✧ ga tái ri.

21 Yhang gi, saksé zúm eq dojaú é má chung é zè pé má le, haû eq rajung za sui haû hpyûn gyûn ri.

22 Gè gè gi, haû jep é tarâ má bo é dông ga jang, azíng zê aluq banshoq gi, suí eq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

23 Haû mù, mauhkúng zè pé é azòng pé gi, hkungga haú pé eq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haú pé htoq je ge é hkungga pé eq lhoq sân-yúng é hui râ dut é nghut lhê.

24 Hkâsu mù gâ le, akyíng lhúm é azòng za nghut é, byu eq saí é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byi nyi é nghut lhê.

25 Yhang gi, haû hkyangjong mó mai yhumsíng é sui a nghut é sui lé chùng mù, Chyoiyúng Htâng é Jowò má zàn wuì wàng luí kut é su, yhânggùng lé dum nhông byi byi kut râ matú mauhkúng má wang é le a nghut.

26 Haú dông ru nghut le gi, Hkrisduq gi, mau htoq xâng hkún mai shî hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí sêng pyám byi râ matú, yhânggùng lé hkungga nhông byi râ ga ipyat pé ló htâng ló nyi é má, banshoq é matú radàm za htoq shit bê nghut ri.

27 Byù gi, radá za shî râ nghut mù, hau htâng má tarâ jéyáng é hui râ nghut é eq rajung za,

28 Hkrisduq gi, byù myo myô é yubak mara lé yu pyám byi râ matú, radá za hkungga nhông é hui bê nghut ri. Haû mù, Yhang gi, yubak mara wun pyám byi râ a nghut lo é za, Yhang lé lánng nyi é bang lé hkyi yù hkyô yu lé byi râ matú, htâng má í dâm nghú râ dâm htoq shit râ nghut lhê.

## 10

### *Hkrisduq É Gùng Lé, Banshoq É Matú Radàm Za Nhông Byi É Hkyô*

1 Haû jep é tarâ gi, jé lô râ nghut é gè hkyô pé é akyíng a nghut é za, wupzo za nghut ri. Haû nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut.

2 Tarâ haû wó lhoq gumjup byi é ru nghut le gi, yhangmoq nhông byi é hkyô nô pyám kó râ a nghut lí? Hkâsu mù gâ le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lhê.

✧ 9:20 Htoq Ló 24:8

<sup>3</sup> Nghut kôlhang, shigu hkungga haú pé gi, zàn wuì yubak mara pé lé lhoq pun byi é zè nghut ri.

<sup>4</sup> Haí mù gà le, nohtó pé eq bainám pé é sui gi, yubak mara lé huì sêng pyâm é hkyô wó dut é a nghut.

<sup>5</sup> Haú mù luí, Hkrisduq, mingkan má lé jé é hkûn, Yhang taí é gi, "Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

<sup>6</sup> Myi nyhé hkungga pé eq mara hkyut hkungga pé gi, Nang lé gabú nhang é a nghut.

<sup>7</sup> Hau htâng, Ngò gi, 'Garai Gasang ê, Ngò eq séng luí chyúmding má kâ tô é eq rajung za,

Nàng ô nau é hkyô kut râ matú, Ngò, shí má nyi lhê.' nghû taí é."\*

gâ ri.

<sup>8</sup> Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haú jep é tarâ dông haú pé lé kut râ dut kôlhang taí é nghut ri.

<sup>9</sup> Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haú gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri.

<sup>10</sup> Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byi é dông mai, nga-nhúng gi, lhoq chyoiyúng é hui bê nghut ri.

<sup>11</sup> Hkyangjong hkangmó gi, nyí nyí buì buì, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huì séng pyám byi é, rajung zâ é shigu hkungga lé, dum nhông byi byi kut é nghut lhê.

<sup>12</sup> Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za,

ahkyíng banshoq é matú ban nhông byi é hkûn jáng, Garai Gasâng é loqyo hkyam shut zung to bê nghut ri.

<sup>13</sup> Haú hkûn mai, Yhang gi, Yhâng é gyè pé lé, Yhâng é hkyí nang jang kut byi râ lé lánng nyi é nghut ri.

<sup>14</sup> Haí mù gà le, Yhang gi, lhoq chyoiyúng é huì nyi bang lé, hkungga ralhum eq za, pyat dedû é matú lhoq gumjup byi bê nghut ri.

<sup>15</sup> Haú Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

<sup>16</sup> "Haú Yhumsíng taí ri, shí gi, ahkyíng haú lai htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaú má kat byi mù, yhangmoq é i-myt má kâ to byi râ nghut lhê."\*

gâ ri.

<sup>17</sup> Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."\*

gâ ri.

<sup>18</sup> Haú mù, mara haú pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

### *Hkam Jan Râ Hkyô*

<sup>19</sup> Haú mù luí, gumang wuì ê, nga-nhúng gi, Yesuq é suí èq, haú Chyoiyúng Htâng é Jowò má wàng râ matú hkyak wó lum to bê nghut lhê.

<sup>20</sup> Haú gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê.

<sup>21</sup> Haú nghut é yanmai le, Garai Gasâng é yhûm lé up é gyaú é hkyangjong lé nga-nhúng wó é yanmai le,

<sup>22</sup> nga-nhúng gi, gingtúng é lumjúng hkyô mai sansêng é i-myt èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé

lhoq sanséng râ matú nga-nhúng é imyt lé hpyun gyûn é hui nhâng luî, nga-nhúng é gungdu gi, sân-yúng wui èq chi byî é hui yù sháng.

<sup>23</sup> Nga-nhúng gi, nga-nhúng yín yu é myit myoqbyu hkyô lé zuî gingtíng nyi sháng; hkâsu mù gà le, danggidiq byî to bê Sû gi, lhumzui Sû nghut lhê.

<sup>24</sup> Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû toq byî lhum râ hkyô lé, dat myit nyi sháng.

<sup>25</sup> Chôm huî zup lhûm nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byî lhûm nyi sháng.

<sup>26</sup> Nga-nhúng gi, tengmán hkyô lé sê yu é htâng má, shi-ngé ngé mara dum kut shut shut kut é nghut jáng, mara hkyut byi râ hkungga a joq lo.

<sup>27</sup> Tarâ jéyáng hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit mai láng nyî râ dut bê nghut lhê.

<sup>28</sup> Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huî é za sat pyâm é hui bê nghut lhê.

<sup>29</sup> Haû jáng, Garai Gasâng é Yhangzo lé hkyiwa ô má nâng pyeq bê sù, yhumsíng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byî é Woi-nyí lé rhoi é sù gi, hkâ-í yhang gyaú é mara dam byî é hui gíng râ nghut lhê nghû, nungmoq wó myit akô lhú?

<sup>30</sup> Hkâsu mù gà le, "Lató hpuq râ gi, Ngò ru nghut lhê; Ngò lató hpuq râ."\* ga le, "Haû Yhumsíng gi, Yhâng é byu pé lé tarâ jéyáng râ nghut lhê."\* ga le, taí é Sû lé, nga-nhúng sê lhê.

<sup>31</sup> Haû rû dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

<sup>32</sup> Nungmoq, haû maubó lé hap yu é\* htâng, wuîhke jamjau huî é má gyai

yhang shikut kôluî wó jân pyám bê nghut é, hí lhê buinyi pé lé myit bun keq.

<sup>33</sup> Ra-u u má, nungmoq gi, byu pé hí má de de rhoi shit é eq zing-rî é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri.

<sup>34</sup> Nungmoq yhang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byî é bang lé, gabú myit eq jân pyám bekô nghut ri.

<sup>35</sup> Haû mù luî, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó râ nghut lhê.

<sup>36</sup> Nungmoq gi, Garai Gasâng é ô naû hkyô lé kut é hkûn, Yhâng danggidiq byî tô é lé wó hap yù râ matú, nungmoq hkam jan râ dut é nghut lhê.

<sup>37</sup> Hkâsu mù gà le, razup zo nghut jáng,

"Haû lé lô râ Sû gi, jé lé râ nghut mù, ahkyíng lhoq myáng râ a nghut.

<sup>38</sup> Nghut kôlhang, Ngá é dingmán sù gi, lumjíng myit mai asak duì râ nghut lhê.

Yhang nungzut zut é nghut le gi, Ngò, Yhang lé myit nguì râ a nghut."\*

ga tô ri.

<sup>39</sup> Nghut kôlhang, nga-nhúng gi, nungzut zut mù htên byoq huî é bang a nghut é za, lumjíng mù hkyi yù huî é bang ru nghut lhê.

## 11

### *Lumjíng Myit Mai*

1 Lumjíng myit ngu é gi, nga-nhúng myit myoqbyu tô é lé hkyak wó râ ngu é eq nga-nhúng a myàng shí é lé joq lhê nghû hkyak sê é hkyô nghut lhê.

\* 10:30 Tarâ Pun 32:35 \* 10:30 Tarâ Pun 32:36 lé sâng-hi wó hap yu é lé gà lhê. \* 10:38 Hbk 2:3-4

\* 10:32 Haû maubó lé hap yu é gà é gi, gabú danglù

<sup>2</sup> A-nham lhê bang gi, lumj́ing myit haû mai Garaî èq owaq é hui kô é nghut lhê.

<sup>3</sup> Lumj́ing myit mai, nga-nhúng gi, nyi mi-nyì, joq mijoq lhunglháng lé Garaî Gasâng é hkunmó èq hpan tô é hkyô sê gyô é nghut lhê. Haû mù, myoq èq wó myang é pé gi, byu-myang é pé mai saî htoq tô é a nghut.

<sup>4</sup> Lumj́ing myit mai, Abelaq gi, Ka-in kut é htoq je ge é hkungga, Garaî Gasang lé nhông byì é nghut ri. Lumj́ing myit mai, yhang gi, yhâng é hkungga eq séng luî Garaî Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumj́ing myit mai, yhang gi, shi byuq bê nghut kôhang, dang rû nyo nyi ashî nghut lhê.

<sup>5</sup> Lumj́ing myit mai, Enuq gi, shi é a hui zo shoq, asak shî mai mauhkúng shut shuí yu é hui bê. Yhang lé, Garaî Gasang shuí ló byuq bê nghut é yan-mai, yhang lé a wó myâng lo nghut ri. Hkâsu mù gâ le, yhang gi, shuí yu é a hui shî é hí má, Garaî Gasang lé nguì nhâng sù rayuq dông owaq é hui sù nghut ri.

<sup>6</sup> Lumj́ing myit a bo é nghut le gi, Garaî Gasang lé a wó nguì nhang é nghut lhê. Haî mù gâ le, Yhâng chyáng shikut luî lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumj́ing râ dut é nghut lhê.

<sup>7</sup> Lumj́ing myit mai, Noaq gi, a myang wú shî é hkyô pé eq séng luî sidiq byi huì é hkûn, yhâng é yhumbyù wuì lé hkyî râ matú, gyuq hkunggâ é dông mai wuì-sanghpo saî bê nghut ri. Yhâng é lumj́ing myit mai, mingkan lé mara byì é nghut mù, lumj́ing myit mai lo é dingmán hkyo é jeju lé hkam yù sù dut bê nghut ri.

<sup>8</sup> Lumj́ing myit mai, Abraham gi, yhâng é muizè dông, htâng má yhang hap yù râ nghut é, Garaî Gasang byì é jowò shut e ló râ matú ji yu é huì é hkûn, jìno gyo mù, yhang hká shut e ló é a sé kôhang, ê bê nghut ri.

<sup>9</sup> Lumj́ing myit mai, yhang gi, gó ming má nyi é byù bíng rayuq su, danggidiq byì tô é mau má nyì bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri.

<sup>10</sup> Hkâsu mù gâ le, Abraham gi, Garaî Gasâng èq azòng hên mù saî tô é, gíng é apûn awang pé eq mu é myuq lé myit myoqbyu nyi é nghut ri.

<sup>11</sup> Lumj́ing myit mai, Abraham gi, yhâng é asak ipyat laí ló byuq é eq, Sarah le baùdung nghut to kôhang, haû danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri.

<sup>12</sup> Haû mù luî, yhang gi, shî gùng dông nghut kôle, yhang rayuq mai lo é awut ashín pé gi, mauhkúng mâ é kyî pé eq wuimau yàm mâ é a ung nghap é semuì myhó myô lò bê nghut ri.

<sup>13</sup> Byù haú bang banshoq gi, yhang-moq shi é hkûn jé shoq lumj́ing myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôhang, haû pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri.

<sup>14</sup> Haû su yín yu é byu pé gi, yhang-moq yhumsing é ming lé ho nyi é bang nghut é lé tûn shit é nghut akô.

<sup>15</sup> Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê.

<sup>16</sup> Ahkuì kúm, yhangmoq gi, je ge é ming nghut é, mauhkúng mingdán lé myit tui nyi akô nghut ri. Haû mù luî, Garaî Gasang gi, yhangmoq é Garaî Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhummajàng to byi bê yanmai nghut ri.

<sup>17</sup> Lumj́ing myit mai, Abraham gi, Garaî Gasâng èq yhang lé chyam é hkûn, Isak lé hkungga ralhummajàng dông nhông byi bê nghut ri. Haû gi, danggidiq pé lé hap yu to bê sù gi, yhâng é

yuzo zote lé nhông byi râ dâ é nghut lhê.

<sup>18</sup> Garai Gasang gi, "Isak đông mai lo é lé, náng é awut ashín nghũ sôn byi râ nghut lhê." ✱ ga yhang lé danggidiq byi to bê nghut kôle, yhang haû su kut é nghut ri.

<sup>19</sup> Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

<sup>20</sup> Lumjínng myit mai, Isak gi, Yakup eq Eso nhik é htângnùng lhê é matú, shimân byi bê nghut ri.

<sup>21</sup> Lumjínng myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má ngè luí, noqkuq bê nghut ri.

<sup>22</sup> Lumjínng myit mai, Yosep gi, yhâng asak htôm ló râ u lé, Israelaq byu pé Egotuq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pyíng to bê nghut ri.

<sup>23</sup> Lumjínng myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.\*

<sup>24</sup> Lumjínng myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

<sup>25</sup> Yhang gi, yubak marâ é ngón hkyô má rayoq zo ngón kún râ malaí Garai Gasâng é byu pé eq rahá hpuzô é hui râ lé sheq hkyin yù bê nghut ri.

<sup>26</sup> Yhang gi, haû Hkrisduq é matú rhoí huí é lé, Egotuq ming mâ é sutzê htoq má je riyhang hpaudap lhê ga myit sôn yu ri. Haí mù gâ le, yhang gi, yhâng é shigyaú chyunghuq lé myit myoqbyu nyi sũ nghut ri.

<sup>27</sup> Lumjínng myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq ló byuq

bê nghut ri. Yhang gi, myoq èq a wó myang é sũ Garai lé wó myang é sũ đông, hkam jân é nghut ri.

<sup>28</sup> Lumjínng myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poí eq sui hpyûn é hkyô le kut hî bê nghut ri.

<sup>29</sup> Lumjínng myit mai, haû shiwa byu pé gi, Nhông Nè lé kyuq huí é myigùng htoq mai su laí byit bekô nghut ri; nghut kôhang, Egotuq byu pé le, haû đông laí shikut wú kô é hkûn, yhangmoq gi, myup shi byuq bekô nghut ri.

<sup>30</sup> Lumjínng myit mai, shiwa byu pé, Yerihko myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

<sup>31</sup> Lumjínng myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

<sup>32</sup> Haû htoq lai luí, ngò haí taí jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoí pé é hkyô lé taí râ ahkyíng ngò a wó.

<sup>33</sup> Haú bang gi, lumjínng myit mai mingdán pé lé wó zân ung yù bekô, tengmán hkyô lé chung jai bekô, danggidiq byi to bê lé wó hap yù bekô, hkanghkyi pé é nhut lé wó myhí pyám bekô,

<sup>34</sup> myiduoq myishâm lé wó sat pyám bekô, shamsó mai le wó hpanq lut bekô nghut ri. Yhangmoq é wum nyhóm hkyô gi, wum taú bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê.

<sup>35</sup> Myiwe wui gi, yhangmoq eq séng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyám kômù, zing-rí é gyai yhang hui zo bekô nghut ri.

✱ 11:18 Apûn 21:12 \* 11:23 Haú-u lé, hkohkâm hpó gi, Israelaq pé é yuzo zonú wui lé sat pyám rá hkunmó hkyô tô é nghut lhê.

<sup>36</sup> Ra-am gi, wuizui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhúng é hui bekô nghut ri.

<sup>37</sup> Yhangmoq gi, luqgok eq dú sat é, í túm dut shoq yik hpyit é, sham èq sat pyám é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rí é eq rhoi pyám é hui bekô nghut ri.

<sup>38</sup> Yhangmoq lhumsuzi nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyung pé eq myidong pé má nyi lhing wún bekô nghut ri.

<sup>39</sup> Haú bang banshoq gi, yhangmoq é lumjínng myit é yanmai, owaq é hui bê nghut kôle, yhangmoq ó yuq le, danggidiq byí tô é lé a myang hkam yù kó nghut ri.

<sup>40</sup> Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

## 12

### *Garai Gasang, Zo Wuí Lé Mhoqshit É Hkyô*

<sup>1</sup> Haú mù luí, nga-nhúng gi, haú myhò é saksé pé mhutdúm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, luí za lhoq nhúng byí é yubak mara lé dú pyám mù, nga-nhúng din rá matú tô tô é hkyô lé, hkam jan luí din e ló sháng.

<sup>2</sup> Nga-nhúng gi, nga-nhúng é lumjínng hkyo é apûn awang lé hí sù eq lhoq gumjup byi sù nghut é Yesuq lé wú tsuq nyí sháng. Yhang gi, Yhâng é hí má joq tô é gabú hkyo é yanmai, hoq hpú é hkyô lé haí su a ngam é za, tapzing má shí hkâm é hkyô lé jân pyám luí, Garai Gasang é hkohkâm-tanghkuq é loqyo hkyam shut zung to bê nghut ri.

<sup>3</sup> Nungmoq gi, a ngu byuq rá eq myit wum a gyuí byuq kó sháng gaq, yubak dap bâng chyáng mai haú su htuq htíng é hkyô lé jân pyám é Yesuq chyáng mai myit wum yù keq.

<sup>4</sup> Nungmoq gi, yubak mara lé htuq htíng shikut é hkyô má, nungmoq é sui shun pyám shoq yhang a kut shi kó nghut ri.

<sup>5</sup> Hau htoq agó, nungmoq gi, zo wuí lé dông Garai Gasang nungmoq lé wum byí é dang lé tô-myhí pyám bekô lhú? Wum byi dang haú gi,

"Ngá zo ê, haú Yhumsing mhoqshit é hkyô lé agya alhá hkâkut pyám, Yhang, nang lé tân é hkûn, myit wum hkâgyui,

<sup>6</sup> haí mù gâ le, haú Yhumsing gi, Yhang chyitdap é bang lé mhoqshit mù, zo rayuq lé dông,

Yhang hap yu é bang yuq hkangmó lé dam byí é nghut lhê."<sup>\*</sup>

gâ é nghut ri.

<sup>7</sup> Mhoqshit huí é hkyô má, wuíhké é lé hkam jan keq. Garai Gasang gi, nungmoq lé, zo wuí lé dông kut é ru nghut lhê. Hkâsu mù gâ le, yhumsing é yhângwâ èq a mhoq é zo gi, ó wá nyi lhê lhú?

<sup>8</sup> Nungmoq gi, yuq hkangmó huí lái é mhoqshit hkyô lé, a hui kô é nghut jáng, dezô pé dông nghut byuq mù, zo sîng wuí a nghut lo kó.

<sup>9</sup> Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haú nghut jáng, je riyhang, nga-nhúng é woi-nyí eq sêng é Íwâ é a-ô má nyi mù, asak duí rá dut ri myhi-nhung!

<sup>10</sup> Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyung hkyô má nga-nhúng wó bo lôm shoq, nga-nhúng é gè hkyô é matú, nga-nhúng lé mhoqshit ri.

<sup>\*</sup> 12:6 Sânghkyang 3:11-12

11 Mhoqshit é hkyô hkangmó gi, mhoqshit u lé ngón hkyô a nghut é za, nô hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, ngu-ingón hkyô eq dingmán hkyô é ashi lhoq htoq byi ri.

12 Haû mù luí, myûng byuq é nung-moq é loq pé eq wum nyhôm byuq é nungmoq é hkyihput pé lé wum-o lhoq kîng keq.

13 Hkyi hten bang a wó sô é a dut shoq, lhoq gê byi é wó hui kó sháng gaq, nungmoq so râ matú, hkyô lhoq nyhang nyi keq.

### *Garai Lé He-ngik Bang Dàm Byi Hui Râ Hkyô*

14 Byù banshoq bang eq nguingón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut.

15 Ó yuq le, Garai Gasâng jeju lé a tô pyâm râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuî hko su, ó yuq lé le hkâdut nhâng kó.

16 Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq.

17 Nungmoq sê é eq rajung za, Eso gi, htâng má, shimân jeju haû lé hkam yù nau é hkún, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang kut é hkyô lé a wó htaí byi lo nghut ri.

18 Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyi dut é eq laidun lo é má le,

19 tut htê mying é eq, dang taí htê mying é má le, a jé ê kó nghut ri. Dang htê haû lé wó gyô é bang gi,

yhangmoq lé, dang a taí jat lo râ matú dung tôngbán akô nghut ri.

20 Haî mù gâ le, yhangmoq gi, "Bùm haû má dusak pé záng jáng lhang, luq-gok èq dú sat râ dut lhê."\* ga Garai Gasang hkyô tô é hkunmó lé a wó hkâm kô é yanmai nghut ri.

21 Haû byu-myàng hkyô gi, lûm wú gyuq hpo dut é yanmai, Mosheq lhang gi, "Ngò, gyuq nán ri."\* ga taí é nghut ri.

22 Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayô gabú ratung zup zîng é jang eq,

23 mauhkûng htoq má myîng kê to huí é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyi nghut sù Garai Gasâng chyáng le, lhoq gumjup huí é dingmán bâng é woi-nyi pé chyáng le,

24 dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.\*

25 Nungmoq gi, dang nyô Sù lé a gyo a kut râ matú, sidiq keq. Myidàm htoq má sidiq byi é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byi é Su chyáng mai, nga-nhúng lhing lô byuq é ru nghut le gi, je riyhang nga-nhúng a wó lut râ a nghut kó lí?

26 Haû Garaî dang taí é u má, Yhâng é htê gi, mingkan lé lhoq nhûn kat ri, ahkuî kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê."\* ga Yhang danggidiq byi to bê nghut ri.

27 "Radàm dum" gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyâm râ lé gâ é nghut lhê.

28 Haû mù luí, nga-nhúng gi, a wó lhoq nhûn é mingdán lé hap yu to

\* 12:20 Htoq Lô 19:12-13    \* 12:21 Tarâ Pun 9:19    \* 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byi ri.    \* 12:26 Hagi 2:6

bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq sháng.

<sup>29</sup> Hkâsu mù gâ le, nga-nhông é "Garai Gasang gi, nyhê jôm é myi nghut ri".✧

## 13

### *Ló Htáng Má Lhoq Pun Kyîng É Hkyô*

<sup>1</sup> Rayuq eq rayuq, gumang yhangchang dông chyitdap lhum nyi keq.

<sup>2</sup> Byù bíng pé lé hkulûm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri.

<sup>3</sup> Nungmoq gi, htóng lúng bang eq rahá htóng lúng luzúm wuî dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

<sup>4</sup> Myiháng hkyô gi, lunglhang bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dông gungsho zùm yap é bang ban-shoq lé jéyáng râ nghut lhê.

<sup>5</sup> Nungmoq é asak duì hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haî mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."✧  
ga taî é nghut lhê.

<sup>6</sup> Haû mù, nga-nhông gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haî wó kut râ lhú?"✧  
nghû taî é nghut lhê.

<sup>7</sup> Nungmoq lé Garai Gasâng é mungdang taî kyô é, nungmoq é hkyô-u shê bang lé, myit bun keq.

Yhangmoq asak htum shoq nyi laî lo é sâmlai lé myit wú mù, yhangmoq é lumjîng myit lé alik kut yù keq.

<sup>8</sup> Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

<sup>9</sup> Maú nhô zâ é mhoqshit hkyô ajung jung maî eq shuí nghoq huí é bang hkâdut kó. Zo bang lé hai akyû a byí é, htûngli zoshuq èq a nghut é za, Garaî jejú èq nga-nhông é myit nhiklhum lé wum-o lhoq kîng yu é gi, gè hkyô nghut lhê.

<sup>10</sup> Nga-nhông gi, saksé zúm má do-jaú é hkyangjong pé zo râ ahkáng a wó é hkungga gyap ralhum wó é nghut lhê.

<sup>11</sup> Haû hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri.

<sup>12</sup> Haû eq rajung za, Yesuq le, Yhâng é sui dông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shî hkám bê nghut ri.

<sup>13</sup> Haû mù luí, nga-nhông gi, byù nyi jowò shinggan má Yhâng chyáng è mù, Yhang hui zô é rhoi hkyô lé è bo hui zo sháng.

<sup>14</sup> Hkâsu mù gâ le, nga-nhông gi, mingkan shî má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

<sup>15</sup> Haû mù luí, nga-nhông gi, Garai Gasâng é myîng lé yín yu é nhutwui é ashi nghut é, hkya-on hkungga lé, Yesuq dông mai, Garai Gasâng chyáng xoq xoq nhông byí nyi sháng.

<sup>16</sup> Ge é hkyô kut râ eq góbang lé shuí gam chûng râ hkyô lé, hkâtô-myhí kó; hkâsu mù gâ le, Garai Gasang gi, haû sù é hkungga pé lé ô ngui nyi ri.

<sup>17</sup> Nungmoq é hkyô-u shê bâng é jîno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê.



Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyì keq.

<sup>18</sup> Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duì râ lé ô nau lê nghû, hkyak wó myit ri.

<sup>19</sup> Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taì tsuq kat lê.

<sup>20</sup> Sau hpúng pê é sau zúng Sû mó nghut é, nga-nhúng é Yhumsíng Yesuq lé, haù ahtum abyuq é dangshikaq é sui dông, shî bê mai dum lhoq dui toq é sù, nguingón hkyo é Garai Gasang gi,

<sup>21</sup> Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyì sháng gaq. Hpungwup shingkang gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.

<sup>22</sup> Gumang wuì ê, ngò lhoq pùn kyíng é dang lé nungmoq wó hkam jan kó sháng gaq nghû, wum taì tsuq kat lê; hkâsu mù gâ le, ngò gi, nungmoq lé, laiká ratot za kê kat é nghut lê.

<sup>23</sup> Ngò gi, nga-nhúng é gumang Tim-ohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lê.

<sup>24</sup> Nungmoq lé shuí-u bang ban-shoq eq Garai Gasâng é byu pé ban-shoq lé bo shi-kyám byi keq. Itali ming mâ é gumang wuì gi, nungmoq lé shi-kyâm kat akô nghut ri.

<sup>25</sup> Jeju gi, nungmoq banshoq bâng chyáng ru joq nyì sháng gaq ô.

## YAKUQ Hun Kat é Laiká (James)

<sup>1</sup> Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngu- ingón dang shit kyô kat lhê.

*Lumjîng Myit Lé Chyam É Hkyô Eq Hpaqchyí Byéng-yá*

<sup>2</sup> Ngá gumang wuî ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù,

<sup>3</sup> wuîhke jamjau ajung jung lé htûng huî é hkûn, gaù jowò mó nghut nyi lhê nghû luî myit yù keq.

<sup>4</sup> Hau htoq agó, nungmoq banshoq gúm gumjup jup dut mù luî, haî le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq.

<sup>5</sup> Nungmoq má rayuq yuq hpaqchyí byéng-yá langhpyut tô é nghut le gi, haû banshoq bang lé, mara a hun é za, agùn agó byî nyi é Garai Gasang chyáng dúng nyi sháng gaq, haû jáng, Garai gi, yhang lé byi râ nghut lhê.

<sup>6</sup> Nghut kôlhang, lum shut é myit a bo é za, lumjîng é myit eq dúng nyi sháng gaq, hkâsu mù gâ le, lum shut é sù gi, laidûn eq hik luî toq lo é nhông mâ é wuîlhêng eq wuî nyi ri.

<sup>7</sup> Haú yuq gi, Yhumsing Garaî chyáng mâ é haî le wó yû râ su a ngam nyi sháng gaq.

<sup>8</sup> Yhang gi, myit-kó xan sù nghut luî, yhang é hkyô hkat hkangmó má, mú htâng a nyang é sù nghut nyi ri.

*Myùng Sù Eq Wó Sù*

<sup>9</sup> Myung é gumang hpó gi, waq toq huî é má, wó sù gi, lhoq nyhûm huî é má, gabú gumrong nyi sháng gaq.

<sup>10</sup> Hkâsu mù gâ le, wó sù gi, wàhu banbó su woî byuq lô râ nghut lhê.

<sup>11</sup> Bui gi, nyé é lai eq toq lô jáng, haû wàhu nyhuî byuq lô mù, abó le yoq gyó byuq é eq, hau é yúng sâm pé gi, htên byuq é su; wó sù le haû eq rajung za, yhang kut nyi é muzó má woî byuq lô râ nghut lhê.

*Gunglaú É Hkyô*

<sup>12</sup> Wuîhke jamjau huî le, wó shikut shirang nyi sù gi, hkungsô wó nyi ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lhê.

<sup>13</sup> Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghû luî, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut.

<sup>14</sup> Nghut kôlhang, ó yuq nghut le le, yhumsing é gungsho ô nau é dông, shuî láng nghoq lô é nghut le gi, agúng alaú hui bê.

<sup>15</sup> Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

<sup>16</sup> Ngò chyitdap é gumang wuî ê, i-myit hkyô nghoq hkâ-nghoq nyi kó.

<sup>17</sup> Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pê\* é Yhângwa Garaî chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut.

<sup>18</sup> Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luî, haû tengmán é mungdang mai, nga-nhúng lé hkû to bê nghut ri.

*Gyo Yu É Eq Cháng Kut É Hkyô*

<sup>19</sup> Ngò chyitdap é gumang wuî ê, shí hkyô lé nungmoq sê nyi akô. Byù ó yuq nghut kôlhang, gyô yû râ lé han nyi sháng; dang taí râ lé a hân sháng gaq; nhik-yo râ lé le hkâhân kó.

\* **1:17** Maubó gung pé gâ é gi, bui, kyî, lhamó lé gâ lhê.

20 Hkâsu mù gâ le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut.

21 Haû mù luí, achâq achyut é ban-shoq eq ladu laî agè ashop é pé lé lhoq san lhoq sêng pyám luí, nung-moq é i-myt lé wó hkyi yù râ matú, i-myt unghkaû má Garai Gasang hô tô é mungdang lé, nú-nhâm é myit èq hkam yu nyi keq.

22 Nungmoq gi, yhumsing gùng lé a mhaû pyám sháng gaq, haû mung-dang lé wó gyô yu é bang za a nghut, haû dông châng kut é bang le nghut nyi sháng gaq.

23 Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuí ri.

24 Yhang gi, yhâng é gungdu lé wú yù mù, myoqdong lhik é eq, yhum-sing gungdu hkâsu dut é lé tô-myhî pyâm ri.

25 Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó èq tân shit é sù nghut é yanmai, haû yuq gi, yhang châng kut é muzó má shimân jeju wó râ nghut lhê.

26 Byù rayuq yuq, "Ngò gi, noqkuq htûng lé lhoq dik sù nghut lhê." ga luí, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htûng gi, akôm za nghut nyi ri.

27 Îwa Garai Gasâng é hí má sansêng é eq, râ é hkyô a bo é noqkuq htûng gi, wuîhke jamjau huí é chuimó chuizô pé lé, châng wú garúm é hkyô eq, mingkan htoq mâ é achâq achyut é hkyô lé koi pyâm é hkyô nghut ri.

## 2

### *Myoqdong A Wó Hkyin Lhum*

1 Ngá é gumang wuí ê, hpung-wup shingkan bo é nga-nhúng é Yhumsing Yesuq Hkrisduq lé

✧ 2:8 Nhung 19:18 ✧ 2:11 Htoq Lô 20:14

lumjîng hkyô má, byu é myoqdong lé hkâhkyin lhum kó.

2 Dangké, hîng loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le,

3 haû réng é mebu wut é sù lé, nung-moq lhom wú mù je hkunggâ é èq, "Shî aróng wó é jowò má zùng aq." dum, haû asho awuí é sù lé nghut jáng gi, "Mhó má yap to aq." haû su a nghut jáng, "Ngá é hkyî htâng má zùng aq." ga taí kô é nghut le gi,

4 nungmoq rayuq eq rayuq gamhkuí lhum luí, a ge é i-myt èq doqdân é bang dut lò bekô a nghut kó l hú?

5 Ngò chyitdap é gumang wuí ê, gyô yù keq, lumjîng hkyô má wó sùt nyi luí, gidiq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang lé hkyin yù bê a nghut kó l hú?

6 Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tarâ tingnyâng shut she hkyut ló bekô, a nghut kó l hú?

7 Nungmoq eq sêng é kô dik é myìng lé l háng, yhangmoq yhang rhoi dang taí bum akô, a nghut kó l hú?

8 Haû mù luí, Chyúmdang má, "Náng gûng lé náng chyitdap é su, náng é chyagnâm mâ é bang lé le chyitdap aq." ✧ ga luí, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê.

9 Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gû nghut bê yanmai, haû tarâ lé shut é bang lé su tarâ jéyáng é huí nyi bekô râ nghut lhê.

10 Byù ó yuq nghut le le tarâ ban-shoq lé châng kôlhang, haû mâ é ral-hum lhum lé shut pyám jáng gi, tarâ ban-shoq lé shut pyám sù dut byuq râ

nghut lhê.

<sup>11</sup> Hkâsu mù gâ le, "Su-myi sulàng hkâlú."\* ga luí, hkang tô é sú gi, "Byù lé hkâsat."\* ga luí le, taí tô ashí. Nàng su-myi sulàng a lú kôlhang, byù sat é sú nghut le gi, tarâ lé shut é sú nghut bê.

<sup>12</sup> Haû su mù luí, nungmoq lé lhoq lhut kat é tarâ dông jéyang doqdân é hui râ bang su, ru taí nyi keq; ru châng kut nyi keq.

<sup>13</sup> Hkâsu mù gâ le, shogyo myit a bò sú gi, a shogyô é dông jéyang doqdân é hui râ nghut lhê. Shogyo nhikmyîn é hkyô kúm gi, jéyang doqdân é hkyô lé wó ông lut râ nghut lhê.

### *Lumjín Myit Eq Zui Saí É Hkyô*

<sup>14</sup> Ngá gumang wuì ê, byù rayuq yuq, "Ngò gi, lumjín myit bo lhê." ga taí nyi kôlhang, muzó a bo lom é nghut le gi, haí akyû bò râ lhú? Lumjín myit haû gi, yhang lé wó hkyi yù râ lhú?

<sup>15</sup> Gumang, gu-nhá rayuq yuq a chín dut nyi é eq, nyi wui é zoshuq langhpyut tô é nghut le,

<sup>16</sup> nungmoq chyáng mâ é rayuq yuq gi, yhangmoq é gungsho má râ é hkyô haí le a byi é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lhú?

<sup>17</sup> Haû eq rajung za, lumjín myit má muzó a bo é nghut le gi, shi é eq rajung za nghut nyi ri.

<sup>18</sup> Dum rahkyô gi, "Nàng gi, lumjín myit bo ri, ngò gi, muzo bo lhê. Muzó a bo é náng é lumjín myit ngo lé tân shit wú aq, haú hkûn, ngá muzó èq ngá lumjín myit lé, nang lé ngò tân shit râ nghut lhê." ga luí, rayuq yuq taí râ nghut lhê.

<sup>19</sup> Garai Gasang rayuq za nghut é lé nàng lumjín ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjín mù gyuq nán nyi akô nghut ri.

<sup>20</sup> Kyoq a bo é byù bam ê, lumjín myit má muzó a bo le akôm za nghut é hkyô lé, nàng sé nau lhê a nghut lhú?

<sup>21</sup> Nga-nhúng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sú gâ é lé wó yû bê a nghut lhú?

<sup>22</sup> Haû mù luí, yhâng é lumjín myit gi, yhâng é muzó eq rahá za e ló é yanmai, lumjín myit gi, jup byíng lo é lé, nàng wó myâng bê nghut ri.

<sup>23</sup> Haû su mù, "Abraham gi, Garai Gasang lé lumjín é nghut mù luí, yhang lé dingmán sú ga són byi bê."\* ga luí, kê tô é Chyúmdang gi, dik to bê. Dum, yhang lé Garai Gasang é buinùm hpó ga luí le myhíng byi bê.

<sup>24</sup> Haû mù luí, byù gi, lumjín é myit eq baú za a nghut, zui saí é muzó eq mara hkyut san byi huí é lé, nungmoq bûn sê nyi akô.

<sup>25</sup> Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sú gâ é wó yû bê a nghut lhú?

<sup>26</sup> Haû su mù, gungdu má woi-nyí a bo le gi, shi é eq rajung za, haû lumjín myit má muzó jizó a bo le gi, shí gû nghut bê nghut ri.

## 3

### *Mhé Wuí É Shô*

<sup>1</sup> Ngá é gumang wuì ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyang doqdân é hui zo râ nghut lhê.

<sup>2</sup> Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dang èq a lingbat é nghut le gi, yhang gi, jup byíng sú eq yhumsing é gùng lé wó hkang é sú nghut ri.

<sup>3</sup> Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê.

<sup>4</sup> Haû mai gotû, wuì-sanghpo pé lé wú wú keq, haû-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é dông, haú pé lé wó hkang yu ri.

<sup>5</sup> Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung.

<sup>6</sup> Shô haû gi, myi eq wuì nyi ri. Nga-nhûng é gungsho má, shô haû gi, agè ashop é mingkan dut lò mù, nga-nhûng é gungsho asak lé achayut dut nhâng luí, gungsho asak lé nyhê tuq kat ri. Haû gi, ngaraí myí èq nyhê tuq kat é nghut bê.

<sup>7</sup> Dusak ajung jung, nghoq ahú hú, myí má yê é jung eq wuì hkaû má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akô.

<sup>8</sup> Nghut kôlhang, shô lé kúm gi, byu ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

<sup>9</sup> Nga-nhúng gi, shô hau èq nga-nhûng é Yhumsîng eq Íwa Garai lé hkya-on nyi lhê; hau èq za, Garai Gasâng é gunglhô dông hpan tô é waxâng zo wuì lé le nhîng pyâm nyi ri.

<sup>10</sup> Nhut ralhum za mai, hkya-ôn é dang eq nhîng é dang htoq lo ri. Ngá é gumang wuì ê, haû su kut é gi, a gè.

<sup>11</sup> Wuìbúm radong za mai, chuí nghâm é wuì eq hkô é wuì wó htoq râ lhú?

<sup>12</sup> Ngá gumang wuì ê, maihpáng gâm mai tsanlun shi, tsibiyiq nuí mai maihpáng shi, wó zui râ lhú? Haû eq rajung za, xô ngam é wuì gi, chuí nghâm é wuì lé wó lhoq htoq byi râ a nghut.

### *Ahtoq Mai Lo É Hpaqchyí*

<sup>13</sup> Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsîng zui

saí é ge é muzó dông tún shit nyí sháng gaq.

<sup>14</sup> Nghut kôlhang, nungmoq é myit má ladu laí é manon é i-myit eq, lú lhum bat zik é i-myit bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó.

<sup>15</sup> Haû sù é hpaqchyí byéng-yá kúm gi, mauhkûng htoq mai gyó lo é hpaqchyí byéng-yá a nghut, haû gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri.

<sup>16</sup> Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

<sup>17</sup> Mauhkûng htoq mâ é hpaqchyí byéng-yá kúm gi, sâng-hi awang má sansêng nyi ri; hau htâng má gi, ngu-ingón hkyô lé ô nau é, myit nûm é, jîno gyô é, shogyo nhikmyin sê é eq ge é ashi zui nyi mù luí, gamhkuí a bò, ahpuq alik a dut é eq, kut mhaú a sê é hpaqchyí byéng-yá nghut nyi ri.

<sup>18</sup> Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yù kó râ nghut lhê.

## 4

### *Yhumsîng Gùng Lé, Garai Gasâng Chyáng Ap To Râ Hkyô*

<sup>1</sup> Nungmoq má gyè dut lhûm é eq mabyoq jishûm gi, hkâmai htoq lo é lhú? Nungmoq ahkaû má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lhú?

<sup>2</sup> Nungmoq yut yut myit ô nau nyi kôlhang, haí le a wó yù kó. Nungmoq sat nyi é eq manon nyi kôlhang, a wó yù kó. Nungmoq byoq lhûm nyi é eq majan htoq lhûm nyi kôlhang, haí le a wó yù kó; hkâsu mù gâ le, nungmoq, Garai Gasâng lé a dung kô é yanmai nghut ri.

<sup>3</sup> Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chûng

langsâ pyám râ matú, shut é dông dúng nyi kô é yanmai nghut ri.

<sup>4</sup> Su-myi sulàng lú é bang su gidiq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haú mù luí, mingkan ô nau é hkyô eq buinùm dù nau sù ó nghut kôlhang, Garai Gasâng é gyè nghut nyi ri.

<sup>5</sup> Dum ralhum, nga-nhúng má Garai Gasang kat lhung tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghû, nungmoq myit ngam nyi akô lú?

<sup>6</sup> Nghut kôlhang, Yhang gi, je kô é jeju ru byí nyi lhê. Haú eq rajung za, Chyúmdang má,

"Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byí ri."✧  
ga taí tô ri.

<sup>7</sup> Haú mù, Garai uphkan é a-ô má ru nyi nyi keq; Nat Tsadán lé hkûm tang pyám keq; haú hkûn, yhang nungmoq chyáng mai hpang byuq râ nghut lhê.

<sup>8</sup> Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoí lhoq yúng to keq. Yudaq htúng dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyâm é lé gâ lhê.

<sup>9</sup> Nungmoq gi, myit yón é, iyon yôn é eq ngaubyi ngau-nhap é kut nyí keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq.

<sup>10</sup> Haú Yhumsîng Garaí é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

<sup>11</sup> Gumang wui ê, nungmoq yhangchang a ge é dông hkâtaí hpoi

lhum kó. Yhumsing é yhanggu yhangmang lé a ge é dông taí hpoi nyi é sù, haú a nghut jáng, jéyáng é sù gi, haú tarâ lé a ge é dông taí hpoi nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri.

<sup>12</sup> Garai Gasang za tarâ byí tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

### *Gyáng Dang A Taí Râ Hkyô*

<sup>13</sup> "Ngamoq, hkû-nyí napmá ra-nyí nyí, wà rawà wà shut é mù, haú má razàn kô é nyí luí, hpugá wuiloq gá mù amyat wó myang yù râ." ga taí nyi é bang ê, gyô wú keq.

<sup>14</sup> Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lú? Haú gi, razup rahtâng za htoq shit luí dum byuq byuq ló mù é, nghansoq eq rajung za nghut nyi ri.

<sup>15</sup> Haú mù luí, nungmoq haú su ga taí nyi râ malaí gi, "Yhumsîng Garaí dông é nghut le gi, ngamoq le ru wó dui nyi mù, shí le, mhô le, wó kut râ nghut lhê." nghû luí, wó taí râ nghut lhê.

<sup>16</sup> Ahkuí kúm gi, nungmoq é gyáng é dang dông gumrong nyi akô; haú su gumrong é hkyô banshoq gi, agé ashop é jung chyat nghut nyi ri.

<sup>17</sup> Haú mù luí, ge é mù sê kut to luí, a kut é sù gi, mara kut sù dut bê nghut ri.

## 5

### *Sùt Wó Bang Lé Sidiq Byí É Dang*

<sup>1</sup> Sùt wó é bang ê, gyo keq, nungmoq chyáng jé lé lô râ é wuihke jamjau hkyo é yanmai, ngau garû nyi keq.

<sup>2</sup> Nungmoq é sutzè gi, htên bup byuq bê nghut ri; nungmoq é wutbu wutmè le manot eq zô pyám bê nghut ri.

3 Nungmoq é hîng eq ngùn má lháng, jogyik zuî byuq mù luí, haû jogyik gi, nungmoq é mara hkyam shut saksé dut byî é eq, nungmoq é gungsho lé myi su zô pyám râ nghut lhê. Nungmoq gi, jîhtûm buinyi shí pé má, sutzè lé za hkong to bekô nhung!

4 Wú keq, nungmoq é yohtung dùng yò yam nhâng mù luí, ahpau a byî é za, nungmoq mhaú zô tô é ahpau pé garû nyi é htê pé eq, mù zui bang garû é htê pé lé gi, haû a-tsam dik shoq bo é Garai wó gyo byi bê nghut ri.

5 Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri.

6 Haû dingmán é sù\* lé, nungmoq mara hûn mù, sat pyám bekô. Yhang kúm gi, nungmoq lé a lhom hkâm zìng nghut ri.

### *Myit Hîng Hîng Hkam Jan Ra Râ Hkyô*

7 Haû mù luí, gumang wuî ê, haû Yhumsîng dum jé lé é buinyi jé shoq myit hîng é èq lánng nyî keq ô! Hkyâm saí sù lé wú wú keq, yhang gi, myîhpún mai ahpau dán é ashi lé wó yû shoq ga mau mún eq wò htáng htâng é mau wo gyûn é jé shoq myit hîng hîng lánng nyi ri.

8 Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hîng é èq, i-myt lé lhoq ging lhoq tîng to keq.

9 Gumang wuî ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

10 Gumang wuî ê, haû Yhumsîng Garaî é myîng eq hko kyô é myiqh-toî pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yû keq.

11 Wú keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garaî gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garaî gi, gyai shogyo nhik-myîn é sù nghut nyi ri.

12 Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luí le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, tai keq.

### *Lumjîng Myit Eq Kyûdung Râ Hkyô*

13 Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkon nyi sháng gaq.

14 Nungmoq má rayuq yuq nõhpyo huî é nghut le gi, nõkquq hpúng mâ é nhik bô suwún wuî lé ji yù mù, haû bang gi, Yhumsîng Yesuq é myîng mai yhang lé xû but byi luí, kyûdung byi kó sháng gaq.

15 Haû su mù, lumjîng myit èq kyûdung é dang gi, haû nõ sù lé lhoq gê luí, Yhumsîng Garaî gi, haú yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê.

16 Haû mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

17 Eliyaq gi, nga-nhúng su i-myt unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

\* 5:6 Dingmán é sù gâ é danghkun lé, Chyúmlaika ra-am má gi, dingmán é bang gâ ri.

18 Kyû dum dúng kat jáng,  
mauhkúng gi, maú wo hkyô kat byi  
mù, myigúng gi, yhâng é kyô shi mui  
shi lé lhoq htoq byi wú bê nghut lhê.

19 Ngá é gumang wui ê, nungmoq  
chyang mâ é rayuq yuq, haú tengmán  
hkyô mai nghoq ló byuq é hkûn,  
rayuq yuq gi, yhang lé tengmán hkyô  
shut dum wó shuí taû lo é nghut le  
kúm gi,

20 haú shuí taû yù sù gi, yubak  
mara kut é sù lé, shut shai é hkyô  
mai tengmán hkyô shut shuí taû yù  
mù, myit woi-nyí lé shi é mai hkyi yù  
bê nghut é yanmai, yubak mara myo  
myo lé shuí nghop pyám byi é sù dut  
berâ lé, bûn nyi keq ô!



## PETRUQ

### Hî Dàm Hun Kat é Laiká (1 Peter)

<sup>1</sup> Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyún gyún é hui\* râ matú le, haû Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyí má cháng luí, hkyin yù huí é bang nghut é,

<sup>2</sup> Garai Gasâng èq hkyin htoq yù luí, mingkân é byùbínq dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

#### *Dui Nyi É Myit Myoqbyù Hkyô*

<sup>3</sup> Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó,

<sup>4</sup> nungmoq é matú mauhkûng htoq má tô to byi bê nghut é, hkâ-nhám le, a hten a byoq é, agot a-û a dut é, a hpoí byuq é muí lé le wó nhang é nghut lhê.

<sup>5</sup> Nungmoq gi, lumjínq kô é yanmai, ló htâng é ahkyínq má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akô.

<sup>6</sup> Haû mù, nungmoq gi, ahkuí razup zo, wuîhke hkyô junghkang jungmó má yón hpuzô é hui kó râ nghut kôlháng, gyai yhang gabú nyi keq.

<sup>7</sup> Wuîhke hkyô haú pé mai, nungmoq é lumjínq myit gi, jet é hkyô lé wó chyam htoq mù, myi mai jên yù

kôlháng htên byoq sê é hîng htoq je gyaú luí, Yesuq Hkrisduq htoq shit é hkûn, hkya-on kungtôn hkyô, hpungwup shingkang eq aróng sitang lé, nungmoq wó kó râ nghut lhê.

<sup>8</sup> Nungmoq gi, Yesuq lé a myang wú kôlháng, Yhang lé chyitdap bum akô; Ahkuí, nungmoq, Yhang lé a myàng kôlháng, Yhang lé lumjínq kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi ri.

<sup>9</sup> Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínq myit é akyû lé wó yu nyi kô é nghut ri.

<sup>10</sup> Hkyi yù hkyô haû eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit èq jí jí chyun chyun ho gon wú bekô nghut ri.

<sup>11</sup> Yhangmoq gi, Hkrisduq wuîhke jamjau hui luí, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri.

<sup>12</sup> Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haû hkyô pé lé gyai wú nau bum akô nghut ri.

#### *Chyoiyúng Nyi Râ Hkyô*

<sup>13</sup> Haû mù luí, zui saí râ matú nungmoq é i-myt lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq.

<sup>14</sup> Jìno gyô é zoshâng wuì su, myoq a bóng shí é pyat má nungmoq nyi tô

\* **1:1** Yhâng é suí èq hpyún gyún é hui gâ é gi, Yhâng é suí èq mara chí sân pyám byí é lé gâ lhê.

é hkûn, nungmoq é agè ashop ô naù hkyô lé a châng kut é za,

<sup>15</sup> haù nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyí keq.

<sup>16</sup> Hkâsu mù gâ le, "Ngò gi, chyoiyúng Sû nghut é yanmai, nungmoq le chyoiyúng nyí keq."✱ ga kê tô ri.

<sup>17</sup> Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbítng dông shí má nyi é u lé, Garai lé gyuq hkunggâ é myit mai asak duì keq.

<sup>18</sup> Hkâsu mù gâ le, nungmoq gi, nungmoq é íchyí íwâ pè chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za,

<sup>19</sup> gumjup é eq mara a bo é sauzo nghut sù, Hkrisduq é hpaù dik é suí èq sheq hkyi yù huí é ru nghut é lé, nungmoq sê lhê.

<sup>20</sup> Yhang gi, mau htoq xâng hkun mai hkyin yu é hui bê nghut kôlhâng, jìhtùm ahkyíng shí pé má sheq, nungmoq é matú htoq shit nhang é hui bê nghut ri.

<sup>21</sup> Yhang lé, shi é mai lhoq dui toq yù mù, hpungwup shing kang bò nhang é Garai Gasâng lé, nungmoq gi, Hkrisduq dông mai lumjítng kô é nghut luí, nungmoq é lumjítng myit eq myit myoqbyù hkyô gi, Garai Gasâng chyáng nghut nyí bekô nghut ri.

<sup>22</sup> Ahkuí kúm, nungmoq gi, haù tengmán hkyô lé châng é dông mai, yhumsing gùng yhumsing lhoq sânyúng yù bekô nghut mù, nungmoq é gumang wui lé, lhumzui é dông chyitdap bekô nghut luí, myit nhikhum mai, rayuq eq rayuq gyai yhang chyitdap lhum keq.

<sup>23</sup> Hkâsu mù gâ le, nungmoq gi, htên byoq sê é amyui mai dum hkû huí é a nghut é za, Garai Gasâng é, rû dui nyi é eq ru gítng nyi é mungdang dông,

htên byoq a sê é amyui mai dum hku é hui bang ru nghut lhê.

<sup>24</sup> Hkâsu mù gâ le,

"Byù lhunglhâng bang gi, wàhu mhan eq pung ri, yhangmoq banshoq bâng é hpungwup shing kang gi, yò mâ é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

<sup>25</sup> nghut kôlhâng, haù Yhumsing é mungdang gi, ahtum abyuq gítng nyi lhê."✱

gâ tô ri. Haù gi, nungmoq lé hko kyo bê mungdang nghut lhê.

## 2

<sup>1</sup> Haù mù luí, i-myit dû é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkangmó pé lé tô pyám keq.

<sup>2</sup> Asik hku é zonú pé naù lé ô naù gadaù é su, woi-nyí eq sêng é jet é naù\* lé ô naù gadaù nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê.

<sup>3</sup> Hkâsu mù gâ le, haù Yhumsing gi, gè sù nghut é lé, nungmoq chyam wú bekô nghut ri.

### *Rû Dui Nyi É Luqgok Eq Hkyin Yù Huí É Byù Myù*

<sup>4</sup> Byu pé mai hkyin htoq pyám kôlhâng, Garai Gasâng é matú hpau-dap luí, Yhâng èq hkyin yù huí é, rû dui nyi é Luqgok nghut sù, haù Yhumsing chyáng nungmoq jé lé é hkûn,

<sup>5</sup> nungmoq le, rû dui nyi é luqgok pé su, woi-nyí eq sêng é yhùm† saí nyi é hui luí, Yesuq Hkrisduq dông mai, Garai èq hap yù gítng é, woi-nyí eq sêng é hkungga nhông byi râ matú, chyoiyúng é hkyangjong amyù dut bekô nghut ri.

<sup>6</sup> Hkâsu mù gâ le, Chyúmdang má,

✱ **1:16** Nhung 11:44-45; 19:2; 20:7 ✱ **1:25** Esai 40:6-8 \* **2:2** Woi-nyí eq sêng é jet é naù gâ é gi, Garai Gasâng é mungdang lé taí é nghut lhê. † **2:5** Woi-nyí eq sêng é yhùm gâ é gi, noqkuq hpúng lé taí nau é nghut lhê.

"Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é hui râ a nghut."✧  
ga taí tô ri.

<sup>7</sup> Haû mù, lumjîng bang nungmoq é matú gi, luqgok haû hpaudap é nghut lhê. Nghut kôlhang, a lumjîng bâng é matú gi,

"Haû yhûm saí bang hkyin htoq pyâm é luqgok gi, htungchyûn mâ é ahkyak dik é luqgok† dut bê nghut ri."✧

ga le,

<sup>8</sup> "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."✧

ga le, taí tô ri. Yhangmoq gi, mung-dang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

<sup>9</sup> Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyû, chyoiyûng é byù myû, Garai Gasang eq sêng é byu pé nghut akô nghut ri.

<sup>10</sup> Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

<sup>11</sup> Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô naù gadaú hkyô lé koi pyâm keq nghû, gó ming byu pé eq byùbîng pé dông mingkan htoq má nyi é bang nungmoq lé, ngò, wum taí tsuq kat lhê.

<sup>12</sup> Haû a lumjîng shî é byu pé gi, nungmoq shut nyi ri ga, nungmoq lé mara hun bùm kôle, nungmoq é ge

é muzó lé myàng kômù, nga-nhúng lé Garai Gasâng èq lé kûm é buinyi má Garai lé shigyaú kó sháng gaq, a lumjîng shî é byu pé é ahkaû má haû su ge é asak duì hkyô dông nyi yap keq.

### *Uphkâng Bang Eq Yhumsîng Wui Ê A-ô Má Nyi Râ Hkyô*

<sup>13</sup> Haû Yhumsîng é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle,

<sup>14</sup> shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng èq nhang tô é mauzaû pé é a-ô má nghut kôle, nyi nyi keq.

<sup>15</sup> Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zîm pyâm é gi, Garai Gasang ô nau é hkyô nghut lhê.

<sup>16</sup> Lut bê bang dông nyi keq, nghut kôlhang, agè ashop é hkyô lé nghop pyâm râ matú nungmoq é luthkyô lé hkâchûng kó; Garai Gasâng é dui-nhâng zoshâng wui dông nyi keq.

<sup>17</sup> Yuq hkangmó lé rago za hkunggâ é hkyô shit keq; lumjîng é gumang wui lé chyitdap keq; Garai Gasang lé gyuq hkunggâ nyi keq; hkosêng lé hkungga keq.

<sup>18</sup> Dui-nhâng zoshâng wui ê, hkungga myit banshoq èq, nungmoq é yhumsîng wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq.

<sup>19</sup> Hkâsu mù gâ le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê.

<sup>20</sup> Nghut kôlhang, nungmoq gi, mara kut shut é yanmai, nhuq bat é hkâm zo luí, haû lé jân nyi é nghut le gi, hai aróng wó kó râ lhú? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é

✧ 2:6 Esai 28:16 † 2:7 Ahkyak é luqgok gâ é gi, Hkrisduq lé taí é nghut lhê. ✧ 2:7 Hkya-on 118:22

✧ 2:8 Esai 8:14

nghut jáng, haû gi, Garai Gasâng hí má hkyá-on gíng é hkyô nghut lhê.

<sup>21</sup> Nungmoq gi, haú hkyo é matú ji yù huí é nghut lhê; haí mù gâ le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyî-kám pé lé cháng râ dut lhê.

<sup>22</sup> "Yhang gi, hai mara le a kut shut, Yhâng é nhut mai mhaû é lé a myàng."✠

<sup>23</sup> Yhang gi, rhoi é huí é hkûn, yhangmoq lé a dum taû rhoi; wuîhke hkyô huí é hkûn, kyuq é dang a taí. Haû kut râ malaî, tengmán é dông jéyáng é Su chyáng, Yhânggùng lé ap pyâm ri.

<sup>24</sup> Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhânggùng èq yhang, nga-nhúng é yubak mara lé Yhânggùng má wun pyâm byi bê nghut ri; Yhâng é dàm pé é yanmai, nungmoq gi, lhoq gê byî é hui bekô nghut ri.

<sup>25</sup> Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuî, nungmoq gi, haû sau zúng Sû eq nungmoq é asak woi-nyí lé upzúng Su chyáng lhing taû lò bekô nghut ri.

### 3

#### *Ikun Myhî Pé Eq Ikun Hpô Pé*

<sup>1</sup> Ikun myhî pé ê, haû eq rajung za, yhumsing é ikun hpó uphkan é a-ô má nyi keq; haú hkûn, yhangmoq má é rayuq yuq, haû mungdang lé a lumjîng kôlhang,

<sup>2</sup> yhumsing é asak duí hkyô má é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhî é nyi yap é sâmlai dông mai yhang lé wó lhoq lhik yû râ nghut lhê.

<sup>3</sup> Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut.

<sup>4</sup> Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myt unghkaû má é su é yúng hkyô sheq dut râ lhê.

<sup>5</sup> Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haû dông mhôn yù yù kut kô é nghut lhê.

<sup>6</sup> Sarah gi, Abraham é jîno gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

<sup>7</sup> Ikun hpô pé ê, haû eq rajung za, yhumsing é ikun myhî eq rahá nyi yap e lô é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haú hkûn, nungmoq é kyûdung dang lé a he-ngik pyâm byi râ nghut lhê.

#### *Ge É Kut Luí, Jamjau Hkam É Hkyô*

<sup>8</sup> Dang htâng sat é má, nungmoq banshoq bang gi, rayuq eq rayuq myit huí lhúm nyi keq; myit wú nô mù, gumang nhiktâng wui su chyitdap lhúm nyi keq; shogyo nhikmyin myit bò luí, i-myt nyhum nyi keq.

<sup>9</sup> Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gâ le, nungmoq gi, haú pé é matú, shimân jeju muí wó hkam yù kó sháng gaq ga, ji yu é hui kô é ru nghut lhê.

<sup>10</sup> Hkâsu mù gâ le, "Asak duí râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuí lé, mhaú dang taí é mai, lhoq kâng pyâm ra râ nghut lhê.

<sup>11</sup> Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguínón simsaq

✠ 2:22 Esai 53:9

hkyô lé hô mù, châng hkat nyi ra râ nghut lhê.

12 Hkâsu mù gâ le, haû Yhumsing é myoqjî gi, dingmán bang lé wú nyi é nghut luî, yhangmoq é kyûdung dang lé, Yhâng é nohkyap èq gyo byî ri;

nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyâm ri."✧

gâ tô ri.

13 Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lúh?

14 Nghut kôlhang, dingmán hkyo é matú, nungmoq wuîhke jamjau huî le lhâng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dân kó."✧

15 Nungmoq kúm gi, myit nhiklhú má, Hkrisduq lé, Yhumsing dông jowò byi keq. Nang wó é myit myoqbyù hkyô lé myî é sù yuq hkangmó lé, haî mù wó é hkyô tû tai kyo râ matú, ayang hen to aq. Nghut kôlhang, núnhâm é eq hkunggâ é dông haû lé kut nyi aq;

16 nungmoq é unghkaû myit san za dut nyi keq, haû hkûn, Hkrisduq dông mai nungmoq wó é ge é a-kyang lé rhoi dang tai é bang gi, yhangmoq lumù gansang é yanmai hoq hpû é hui kó râ nghut lhê.

17 Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê.

18 Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pê é yubak marâ é yanmai, radàm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byî é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri.

19 Yhang gi, Woi-nyí dông, htóng lúng tô é woi-nyí pé lé ê hko kyô ri.

20 Woi-nyí haû pé gi, a-nham lé, Noaq é ipyat má wuî-sanghpo lé Noaq tsuq nyi é hkûn Garai Gasang myit hîng hîng láng nyi é u lé, jîno a gyô é bang nghut akô. Wuî-sanghpo má wàng mù, wuî mai hkyi yù huî é byù shau luî, shit yuq za nghut akô.

21 Wuî haû gi, ahkuî nungmoq lé le hkyi yu é nghut é baptisma é azông nghut ri; haû gi, gungdu mâ é agot a-û lé huî sêng pyám byî é a nghut é za, sansêng é unghkaû myit mai Garai Gasâng é hí má gidiq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luî, hkyi yu é hui kô é nghut lhê.

22 Yesuq Hkrisduq gi, mauhkûng má doq ló luî, Garai Gasâng é loqyò hkyam má nyi tô é nghut mù, mau-mang lagyô pé, ahkáng ayá pé eq a-tsam pé gi, Yhâng uphkan é a-ô má nghut nyi bum akô.

## 4

### *Garai Gasâng É Matú Asak Dui Râ Hkyô*

1 Haû mù luî, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau èq yhumsing gùng má gyehking dông wut to keq, haî mù gâ le, yhâng é gungdu má hpuzo bê sù gi, mara eq gang bê nghut ri.

2 Haû nghut é yanmai, yhang gi, yhang nyi tûm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê.

3 Hkâsu mù gâ le, nungmoq gi, lai lò bê ahkyíng má, a lumjîng shî é byu pé hkyin kut nau é hkyô nghut é, shut é dông nyi zô lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye lhai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi lai lò bê bang nghut akô.

<sup>4</sup> Nungmoq gi, ladu lai shoq achay kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri.

<sup>5</sup> Nghut kôlhang, yhangmoq gi, dui nyi é bang eq shí bê bang lé tarâ jéyáng rã rì rì nghut to Sû lé jihpán shit kyo ra kó rã nghut lhê.

<sup>6</sup> Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù dông mai tarâ jéyáng é hui rã eq, woi-nyí eq séng luí ga jang, Garai Gasang dông mai asak wó duí rã matú nghut lhê.

<sup>7</sup> Lhunglhang htum rã ahkyíng gi, chyáng bê nghut ri. Haú mù luí, nungmoq kyú wó dung kó sháng gaq, bûn gyíng luí, yhumsíng gùng yhumsíng hkang nyí keq.

<sup>8</sup> Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gà le, chyitdap myít gi, yubak mara myo myo lé wó nghop pyâm é nghut lhê.

<sup>9</sup> Rayuq eq rayuq, taí nyung nyâng é hkyô a bo é za, rago hkulum lhum keq.

<sup>10</sup> Yuq hkangmó gi, yhumsíng wó hkam yù bê chyunghuq eq rajung za, góbang lé dojaú rã lhê; Garai Gasang jeju chyunghuq ajung jung lé, lhumzui é èq rago chung jai rã lhê.

<sup>11</sup> Rayuq yuq taí é nghut jáng, Garai Gasang é mungdang haú eq yhang rajung za taí ra rã nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra rã nghut lhê. Haú hpungwup shing kang eq a-tsam gi, Yesuq Hkrisduq chyáng pyat dedu ahtum abyuq joq nyí sháng gaq ô. Amen.

*Hkristan Dut É Yanmai Jamjau Huí É Hkyô*

✧ 4:18 Sângkyang 11:31

<sup>12</sup> Chyitdap é luzúm wuí ê, wuíhke hkyô dông chyam é lé nungmoq hkâm zô nyi é hkûn, nungmoq chyáng maú nhô zã é hkyô dut htoq bê dông, hkâgyuq dàn kó.

<sup>13</sup> Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shing kang eq rahá Yhang htoq shit é hkûn, nungmoq gi, gabú dik é hui kó rã nghut lhê.

<sup>14</sup> Hkrisduq é myíng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gà le, hpungwup shing kang bo é Woi-nyí nghu é, Garai Gasang é Woi-nyí gi, nungmoq chyáng nyi nyi ri.

<sup>15</sup> Nungmoq mã é rayuq yuq jamjau huí é nghut le gi, byù sat sù, hkau sù, gotú agè ashop kut sù, góbang é mù mã cháng gunjang sù dông jamjau huí é a dut sháng gaq.

<sup>16</sup> Nghut kôlhang, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, myíng hau é yanmai hkya-ôn nyí keq.

<sup>17</sup> Hkâsu mù gà le, tarâ jéyáng rã ahkyíng gi, jé bê nghut luí, Garai Gasang é ikun byu pé mai hî rã nghut lhê; haú gi, nga-nhung mai hi é nghut jáng, Garai Gasang é gabú danglù lé a châng é bang gi, hkâsu wá dut lò rã nghut lhê lhú?

<sup>18</sup> "Haú dingmán sù, hkyi yù hui rã wuí é nghut le gi, tarã a hkunggã é eq yubak dap é sù gi, hkâsu wá dut rã nghut lhê lhú?"✧

gã tô ri.

<sup>19</sup> Haú nghut mù luí, Garai Gasang ô nau é dông jamjau huí é bang gi, yhumsíng gùng lé, lhumzui é Hpân Su chyáng ap byi mù, ge é lé xoq kut nyi ra rã nghut lhê.

## 5

*Suwún Wuí Éq Zorâm Wuí*

<sup>1</sup> Nungmoq mã é hpúng suwún wuí lé, ngò, nungmoq é byinzùm suwún,

Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shingkang lé bo hkâm râ nghut sù dông mai sang kat kôlé:

<sup>2</sup> Nungmoq lé ap to bê nghut é Garai Gasâng é sau hpúng\* lé zúng rém bang dut mù, shuî u bang dông dojaú nyî keq; zúng rém é hkûn, a kut a ge luî kut é a nghut é za, Garai Gasang, nungmoq lé dut nhâng nau é su, yhumsîng kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê.

<sup>3</sup> Nungmoq é loq má ap byî to bê bang lé a up zô é za, yhangmoq é hí má alik dut nyî keq.

<sup>4</sup> Haû jáng, Sau zúng Agyî mó† htoq shit é hkûn, nungmoq gi, hpungwup shingkang bo é, hkâ-nhâm le a shum a byuq é janmaú lé myang hap yù kó râ nghut lhê.

<sup>5</sup> Zorâm wuî ê, nungmoq le, nungmoq htoq ipyat ko bâng é a-ô má nyî keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyî keq, hkâsu mù gâ le,

"Garai Gasang gi, nghutbûn é bang lé hkûm zîng pyám kôlhâng, myit lhoq nyhum é bang lé jeju byî ri."\*

ga tô ri.

<sup>6</sup> Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsîng myit lé yhumsîng lhoq nyhum nyî keq.

<sup>7</sup> Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyî sù nghut lhê.

<sup>8</sup> Yhumsîng gùng lé yhumsîng hkâng mù, machya nyî keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, myíng wún é hkanghkyi su hkat gadaú jón wún ri.

<sup>9</sup> Yhang lé htuq htîng pyám mù, lumjîng myit má gingtîng nyî keq, haî mù gâ le, mingkan gón mâ é nungmoq é gumang wuî le, rajung zâ é jamjau hkyô pé hui zô nyî kô é lé, nungmoq sê lhê.

<sup>10</sup> Haû mù, jeju banshoq é Garai Gasang gi, Hkrisduq má ahtum abyuq joq nyî é Yhâng é hpungwup shingkang matú nungmoq lé jì yù bê nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luî, ging ging tíng tíng dut nhâng râ nghut lhê.

<sup>11</sup> Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

### *Ló Htâng É Shi-kyám Dang*

<sup>12</sup> Lhumzuî é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

<sup>13</sup> Babelon má nyî é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri.

<sup>14</sup> Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyî é nungmoq banshoq bâng chyáng ru joq nyî sháng gaq ô.

\* 5:2 Sau hpúng gâ é gi, lumjîng bang lé gâ lhê. † 5:4 Sau zúng Agyî mó gâ é gi, Hkrisduq lé gâ é nghut lhê. ✨ 5:5 Sânghkyang 3:34

## PETRUQ Htang Dàm Hun Kat é Laiká (2 Peter)

<sup>1</sup> Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

<sup>2</sup> Garai Gasang eq nga-nhông é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

### *Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô*

<sup>3</sup> Yhông é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkangmó lé byi bê nghut ri.

<sup>4</sup> Haú pé dông mai, Yhang gi, Yhông é kô dik, hpaû dik é danggidiq pé nga-nhông lé byi bê nghut ri; haú hkûn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

<sup>5</sup> Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô lé jat yù keq; ge é hkyô má sumsé hpaqchyí lé,

<sup>6</sup> sumsé hpaqchyí má yhumsing gùng yhumsing hkang é hkyô lé, yhumsing gùng yhumsing hkang é hkyô má jân shirang é hkyô lé, jân shirang é hkyô má tarâ hkunggá é hkyô lé,

<sup>7</sup> tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù keq.

<sup>8</sup> Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut.

<sup>9</sup> Nghut kôlhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, lai lò bê yhông é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

<sup>10</sup> Haú mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut;

<sup>11</sup> hau htoq agó, nga-nhông é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

### *Chyúmdang Mâ É Myiqhtoi Dang*

<sup>12</sup> Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtíng nyi kô é nghut kôlhang, ngò, nungmoq lé hkâ-nhám le hau pé lé ru lhoq pún nyi râ nghut lhê.

<sup>13</sup> Shí gungdu má ngò rû dui nyi nyi gi, nungmoq lé lhoq pún kying byí le ge ri nghû, ngò wó myit ri;

<sup>14</sup> haí mù gâ le, nga-nhông é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to râ nghut é lé sê lhê.

<sup>15</sup> Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

<sup>16</sup> Nga-nhông é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkûn, ngamoq gi, kut htoq yu é labyoq mhô-myi lé a châng é za, Yhông



é kô làm hkikhkâm hkyô lé myoq èq myang é saksé pé nghut lhê.

<sup>17</sup> Hkâsu mù gà le, haû Kô Làm Hkikhkâm Hkyo é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."✧ ga taî é htê, Yhâng chyáng jé é hkûn, haû Îwa Garai Gasâng chyáng mâ é aróng eq hpungwup shingkang lé Yhang wó hap yù bê nghut ri.

<sup>18</sup> Ngamoq yhang, chyoiyúng bùm má Yhang eq rahá nyi tô é hkûn, htê haû mauhkûng mai htoq lo é lé wó gyô é nghut lhê.

<sup>19</sup> Haû mù luî, myiqhtoî pé dang lé je lhoq ging bê hkyô, ngamoq wó é nghut lhê; haû mù, maubó lô luî, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haû lé, nungmoq gyo mù rago châng kut râ dut lhê.

<sup>20</sup> Banshoq htoq má, Chyúmdang mâ é myiqhtoi dang gi, haû myiqhtoi pé mai ó le ó lichyúm lhoq htoq yu é dông a nghut é lé, nungmoq sê to râ dut lhê.

<sup>21</sup> Hkâsu mù gà le, myiqhtoi dang gi, byù ô nau é dông hkâ-nhám lé a htoq wú é za, haû Chyoiyúng Woi-nyí èq shuí u huí é bang mai, Garai Gasâng chyáng mâ é dang taî é ru nghut lhê.

## 2

### *Sará Apyoq Pé É Hkyô*

<sup>1</sup> Nghut kôlhang, myiqhtoi pyoq pé gi, Israelaq byù haû bâng é ahkaû má nyi wú bê nghut lhê, haû eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó râ nghut lhê. Haû mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô râ nghut lhê.

✧ 1:17 Mht 17:5; Mrk 9:7; Luk 9:35

<sup>2</sup> Byù myo myo gi, haû bâng é ahoq ahî hkyô má cháng kó râ eq, tengmán hkyô lé taî hpoî pyám nhâng kó râ nghut lhê.

<sup>3</sup> Sará apyoq haû bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaû zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

<sup>4</sup> Hkâsu mù gà le, Garai Gasang gi, mara kut shut é maumâng pé lé lhang a ha bûn é za, ngaraî ming má hkyô pyám luî, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê.

<sup>5</sup> Yhang gi, tarâ a hkunggâ é byu pé lé dowui tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri;

<sup>6</sup> Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luî, tarâ a hkungga bâng chyáng dut lò râ hkyô é azông kut tô é nghut ri;

<sup>7</sup> nghut kôlhang, tarâ a chûng bâng é achaq achyut asak duì hkyo é yanmai myit wui myit hke huí é, haû dingmán sù Lot lé hkyi htoq yu é nghut ri;

<sup>8</sup> (hkâsu mù gà le, dingmán sù haû gi, nyí hkangmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.)

<sup>9</sup> Haû su nghut é nghut jáng, Yhumsing gi, tarâ hkunggâ é byu pé lé, wuihke hkyô mai hkâsu kut hkyi htoq yù râ eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zuî zing to râ lé sê lhê.

<sup>10</sup> Haû yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng,

haú hkyô hkyak dut râ nghut lhê.

Byù haú bang gi, ngegáng-htu é eq nghutbùn é bang nghut kôluí, mauhkúng bang lé lumù gansângrâ lé a gyuq kó nghut ri;

<sup>11</sup> nghut kôlhang, maumang lagyô pé lhang gi, wum je bo é eq a-tsam je bo é nghut kôle, haú Yhumsing é hí má, haú mauhkúng bang lé mara hun é đông lumù gansâng hkyô a wám kut kó nghut ri.

<sup>12</sup> Nghut kôlhang, haú sará apyoq pé gi, yhumsing a sê gyô é hkyô pé lé rhoi dang taí akô. Yhangmoq gi, haú chyup yu é hui luí, lhoq htên pyâm é hui râ matú za hku lé lo é, nhik a bo é tân jung dusak đông nghut akô; dusak haú pé su, yhangmoq le, htên byoq byuq kó râ nghut lhê.

<sup>13</sup> Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poí kut kô é hkún, mhaú é lé yhangmoq é ngón hkyô kut kômù, agè agáu é eq achayut é bang nghut akô.

<sup>14</sup> Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kúng é bang nghut kômù, nhíng pyâm é hui bang nghut akô.

<sup>15</sup> Yhangmoq gi, haú dítng é hkyô lé tô pyâm to kômù, Beora é yhangzo nghut é, agè ashop hkyo é ahpaú lé chyitdap sú Balam é hkyô má châng yông wún bekô nghut ri.

<sup>16</sup> Nghut kôlhang, Balam gi, yhang kut shut é hkyo é yanmai, logúng èq tân mhoqshit é hui ri; dang a dat nyo é logúng haú gi, byu é htê đông dang taí lò mù, myiqhtoí hpó a gyíng é hkyô lé hkúm tang pyâm ri.

<sup>17</sup> Byù hau bang gi, wui a bo é wuihtung eq, laidùn èq mut tâng ló é

ngansoq eq púng kômù, yhangmoq é matú gi, tuq tuq chut é mauchut hkaú lé lajang to bê nghut ri.

<sup>18</sup> Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô đông mai, haú shut shai é hkyô má asak dui nyi é mai asik za hpanq htoq lo é bang lé, mhoq hpyoq yu akô nghut ri.

<sup>19</sup> Yhangmoq gi, haú bang lé luthkyô byi râ gidíq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haí mù gâ le, byù rayuq gi, yhumsing lé hai èq up síng le, hai é jùn nghut lhê.

<sup>20</sup> Byu pé gi, nga-nhúng é Yhumsing eq hkyi yu Sú nghut é Yesuq Hkrisduq lé sê é đông mai, mingkân é agè ashop hkyô mai wó hpanq lut htoq bê nghut kôle, yhangmoq lé hau èq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wui byuq kó râ nghut lhê.

<sup>21</sup> Haú dingmán é hkyô lé yhangmoq sé luí, yhangmoq lé ap byí to bê nghut é chyoiyúng hkunmó lé tô pyâm to mù lhing taú ló byuq kô é htoq má, haú hkyô lé a sê é gi, yhangmoq é matú je gè kó râ nghut lhê.

<sup>22</sup> "Hkui gi, yhang hpat tô é lé dum taú zô lhê." gâ é eq, "Waq gi, chí pyám byí é htâng, yhâng é galhu htum má dum taú lhú lhê." ✠ gâ é sanghkyang gi, yhangmoq chyáng dik bê nghut ri.

### 3

#### *Haú Yhumsing Jé Lé Râ Buinyi*

<sup>1</sup> Chyitdap é luzúm wui ê, shi gi, nungmoq lé ngò í dá nghú râ dàm ká byí kat é laiká nghut lhê. Laiká shi í lhum má, nungmoq é sansêng é i-myit lé lhoq toq râ matú taí pún kat é laiká nghut lhê.

<sup>2</sup> Haú gi, chyoiyúng myiqhtoí pé mai lai lò bê hkún taí tô é dang pé eq, nga-nhúng é Yhumsing eq hkyi yu Sú mai, nungmoq é lagyô pé đông byí to bê nghut é hkunmó lé, ngò, nungmoq lé bun nhâng nau luí nghut lhê.

<sup>3</sup> Sâng-hi má, ló htâng é buinyì pé má yhumsing é agè ashop ô nau hkyô má cháng luí taí hpoi bang htoq lô râ nghut é lé, nungmoq sê gyô to ra râ nghut lhê.

<sup>4</sup> Haú bang gi, "'Dum jé lé râ' ga Yhang gidiq byí é gi, hkâmá lú? Nga-nhông é íchý íwâ pé gi, shi byuq ló bekô nghut mù, jungkhong jungmó gi, mau htoq xâng hkun mai dut é su roq dut nyi ri." ga taí kó râ nghut lhê.

<sup>5</sup> Nghut kôlhang, yhangmoq gi, a-nham lé, Garai Gasâng é hkunmó mai, mauhkông pé joq é eq, myigùng gi, wui mai dut htoq nhâng mù, wui đông hpan tô é hkyô lé, a sé gùn kut pyâm akô nghut ri.

<sup>6</sup> Wui hau èq sheq, haú hkun lhê é mingkan lé dowuí títg mù, lhoq htên pyâm é nghut lhê.

<sup>7</sup> Ahkui lhê é mauhkông pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau èq Yhang hkong to bê nghut ri.

<sup>8</sup> Nghut kôlhang, chyitdap é luzúm wui ê, haú Yhumsing é hí má, ra-nyí gi, zanwut rahkyíng đông, zanwut rahkyíng gi, ra-nyí đông nghut é hkyô shí lé, hkâtô-myhí kó.

<sup>9</sup> Haú Yhumsing gi, Yhâng é dang-gidiq lé hân a lhoq dik ga byù ra-am myit ngam pyâm é su, nyhâm é Sù a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhing râ lé za ô nau mù, nungmoq lé myit hng byí nyi é nghut lhê.

<sup>10</sup> Nghut kôlhang, haú Yhumsing é buinyì gi, hkau sù su a bân nùng má jé râ nghut lhê. Haú buinyì má, mauhkông pé gi, mying hum htê eq byuq byuq râ nghut lhê; duqbó-gùng pé gi, myí èq lhoq htên pyâm é hui luí, myigùng eq haú mâ é joq mijoq gi, nyé gyó byuq râ nghut lhê.

<sup>11-12</sup> Joq mijoq gi, haú hkyô đông lhoq htên pyâm é hui râ nghut é yanmai, nungmoq gi, hkasú é byu pé dut ra râ lú? Nungmoq gi, haú Garai

Gasâng é buinyì lé ho nyi é eq buinyì haú hân za jé râ lé ô nau nyi é hkun, chyoiyúng é eq tarâ hkungga é asak duí hkyô đông nyi ra râ nghut lhê. Buinyì haú gi, mauhkông pé lé, myí èq lhoq htên pyâm luí, duqbó-gùng pé le, lùm nyé luí, nyé yui pyâm é buinyì dut râ nghut lhê.

<sup>13</sup> Nghut kôlhang, nga-nhông gi, Garaí é danggidiq nghut é, dingmán hkyô é yhâm, mauhkông asik eq myigùng asik lé, myoqbyu nyi é bang nghut lhê.

<sup>14</sup> Haú nghut mù luí, chyitdap é luzúm wui ê, nungmoq gi, haú hkyô lé myoqbyu é bang nghut kô é yanmai, Yhang é hí má achaq achyut a dut é eq mara hân râ hkyô a bo é za, Yhang eq nguóngón nyí râ hkyô lé gyai yhang shikut nyi keq.

<sup>15</sup> Nga-nhông é chyitdap gumang Poluq gi, yhang lé, Garaí Gasang byí tô é hpaqchyí byéng-yá èq, nungmoq chyáng ká byi bê eq rajung za, nga-nhông é Yhumsing é myit hng hkyô gi, hkyi yù hkyô nghut é lé matsing to keq.

<sup>16</sup> Poluq gi, yhang kâ é laiká pé banshoq má, haú hkyô pé eq séng luí rajung za kâ shit tô ri. Yhang é laiká hkaú pé má, ra-am gi, sê gyo wui é hkyô pé bo é yanmai, a mhoq wú é bang eq a gingtítg é bang gi, gotú Chyúmdang pé lé lichyúm htaí lhik pyâm kô é su, yhangmoq lichyúm htaí lhik pyâm kômù, yhumsing htên byoq hkyô kut yu nyi akô nghut ri.

<sup>17</sup> Haú mù luí, chyitdap é luzúm wui ê, nungmoq gi, shí hkyô lé sê to gù nghut é yanmai, tarâ a chùng bâng é shut shaí hkyo èq nungmoq lé a wó shuí nghoq yù râ eq, nungmoq é gaú é jowò mai a wó byit gyó byuq sháng gaq, yhumsing gùng yhumsing upzúng nyí keq.

<sup>18</sup> Nga-nhông é Yhumsing eq hkyi yù Sù nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpung-wup shingkhong gi, Yesuq Hkrisduq chyáng, ahkuí le, ahtum abyuq le, ru

joq nyî sháng gaq ô! Amen.

## YOHAN Hî Dàm Hun Kat é Laiká (1 John)

### *Asak Mungdang*

<sup>1</sup> Ngò gi, haû sâng-hi mai joq nyi mù, ngamoq wó gyô wú bê é, ngamoq é myoq èq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê.

<sup>2</sup> Asak haû gi, htoq shit bê nghut mù, ngamoq gi, haû lé myang wú luí, saksé hkám bê; haû Íwa eq rahá nyi wú é, ngamoq chyáng htoq shit bê nghut ê ahtum abyuq é asak haû lé nungmoq lé taí kyô lhê.

<sup>3</sup> Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haû Íwa eq le, Yhâng zo Yesuq Hkrisduq eq le, zùm yap nyi é bang nghut lhê.

<sup>4</sup> Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

### *Maubó Hkaû Má Sô Nyi Râ Hkyô*

<sup>5</sup> Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê.

<sup>6</sup> Nga-nhúng gi, Yhang eq zùm yap nyi lhê nghû taí kôlhang, mauchut hkaû má ru sô nyi bum é nghut jáng, nga-nhúng gi, mhaû é bang dut mù, haû tengmán hkyô dông asak a dui é bang nghut ri.

<sup>7</sup> Nghut kôlhang, Yhang gi, maubó má nghut nyi é eq rajung za, nga-nhúng le haû maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sâng-yúng pyám byi râ nghut lhê.

<sup>8</sup> Mara a bò nghû nga-nhúng taí é nghut le gi, yhumsing gùng yhumsing mhaû pyám luí, haû tengmán hkyô gi, nga-nhúng chyáng a bò nghut ri.

<sup>9</sup> Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sâng-yúng byi râ nghut lhê.

<sup>10</sup> Nga-nhúng gi, mara a kut shut nghû taí é nghut jáng, nga-nhúng mai Yhang lé mhaû sù nghû chyo pyám é nghut luí, Yhâng é mungdang gi, nga-nhúng má a bò nghut ri.

## 2

### *Hkrisduq Gi, Nga-nhúng Lé Garúm Sù*

<sup>1</sup> Ngò chytidap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haû Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê.

<sup>2</sup> Yhang gi, nga-nhúng é yubak marâ é matú, shíhtaí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

<sup>3</sup> Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri.

<sup>4</sup> Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haû yuq gi, byù mhaû nghut luí, tengmán hkyô gi, yhang má a bò nghut ri.

<sup>5</sup> Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chytidap é myit gi, haû yuq má gè gè byíng jup bê nghut ri.

<sup>6</sup> Yhang má asak dui nyi lhê ga taí é sù ó yuq nghut kôlhang, Yesuq kut bê

eq rajung za, châng kut râ lhê. Haù hkûn sheq, nga-nhúng gi, Yhang má nghut nyi bê hkyô lé, wó sê lhê.

### *Hkunmó Asik*

<sup>7</sup> Chyitdap é luzúm wuî ê, ngò gi, nungmoq lé hkunmó asik ká byî kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shî gi, nungmoq wó gyô wú bê mungdang nghut nyi ri.

<sup>8</sup> Nghut kôlhang, ngò gi, nungmoq lé hkunmó asik ká byî kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haù mauchut gi, laí ló byuq luí, haù tengmán é maubó gi, duq nyi gù bê nghut ri.

<sup>9</sup> Ngò gi, maubó hkaù má nghut nyi lhê ga luí, yhumsing é gumang lé a jú é sù ó yuq nghut kôlhang, haù mauchut hkaù má ru nghut nyi ashî.

<sup>10</sup> Yhumsing é gumang lé chyitdap é sù ó yuq nghut kôlhang, haù maubó má asak dui nyi é nghut mù luí, yhang má myit leqbat nhâng râ hkyô haí le a bò nghut ri.

<sup>11</sup> Nghut kôlhang, yhumsing é gumang lé a jú é sù kúm gi, haù mauchut hkaù má nghut nyi luí, haù má sô lhing jón wún ri; haù mauchut gi, yhang lé myoq lhoq chit to byî é yanmai, yhang gi, hká shut e ló nyi é hkyô lé a sé nghut ri.

<sup>12</sup> Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

<sup>13</sup> Íwâ pé ê, nungmoq gi, haù sâng-hi mai nyi é Sù lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, haù agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuî ê, nungmoq gi, haù Íwâ lé sé bekô nghut é yanmai,

nungmoq lé ngò kê kat é nghut lhê.

<sup>14</sup> Íwâ pé ê, nungmoq gi, haù sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, wum-o bo é eq, haù Garai Gasâng é mungdang nungmoq chyáng dui nyi é nghut mù, haù agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

### *Mingkan Lé A Chyitdap Râ Hkyô*

<sup>15</sup> Mingkan eq mingkan htoq mâ é haí le lé, hkâchyitdap kó. Byù rayuq yuq, mingkan lé chyitdap é nghut le gi, haù Íwâ lé chyitdap é myit, yhâng chyáng a bò nghut ri.

<sup>16</sup> Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haù gi, Íwâ chyáng mai htoq lo é a nghut, haù mingkan mai htoq lo é ru nghut lhê.

<sup>17</sup> Mingkan eq mingkan ô nau hkyô pé gi, laí ló byuq râ nghut lhê; nghut kôlhang, haù Garai Gasang ô nau é hkyô lé kut é sù gi, ahtum abyuq dui nyi râ nghut lhê.

### *Hkrisduq É Gye Pé*

<sup>18</sup> Chyitdap é zo wuî ê, shî gi, ló htâng é ahkyíng nghut bê; haù anti-hkrisduq\* gi, lé lo nyi ri gâ é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri.

<sup>19</sup> Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló

\* **2:18** Anti-hkrisduq nghù é lichyúm gi, Hkrisduq lé gye kut é sù lé gâ lhê

byuq bekô nghut é yanmai, yhang-moq rayuq lháng nga-nhúng eq a sêng é hkyô lé tân shit bê nghut ri.

<sup>20</sup> Nghut kôlhang, nungmoq gi, haû Chyoiyúng Sû mai xû but byî é hui† bekô nghut mù luî, nungmoq ban-shoq bang haû tengmán hkyô lé sê akô nghut ri.

<sup>21</sup> Haû tengmán hkyô lé nungmoq a sé kôluî, nungmoq lé ngò kê kat é a nghut; haû hkyô lé nungmoq sé gù nghut luî le, haû mhaú é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kê kat é nghut lhê.

<sup>22</sup> Mhaû é sù gi, ó yuq nghut lhê lú? Haû Yesuq gi, Hkrisduq a nghut ga he pyâm é sù nghut ri. Haû Îwa eq Yhangzo lé he-ngik é sù gi, anti-hkrisduq yhang nghut nyi ri.

<sup>23</sup> Haû Yhangzo lé he-ngik sù ó yuq nghut kôle, haû Îwa lé sé sù a nghut. Haû Yhangzo lé hap yu é sù kúm gi, haû Îwa lé le sé bê sù nghut lhê.

<sup>24</sup> Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haû nghut jáng, nungmoq gi, haû Yhangzo eq Îwâ chyáng nyi nyi râ nghut lhê.

<sup>25</sup> Haû gi, nga-nhúng lé Yhang byî tô é ahtum abyuq é asak wó yû râ gâ é danggidiq nghut ri.

<sup>26</sup> Ngò gi, nungmoq lé hkyô shuí nghoq shikut nyi bâng é hkyô eq séng luî, nungmoq lé shí gû kê kat é nghut lhê.

<sup>27</sup> Nungmoq chyáng kúm gi, Yhâng chyáng mai xû but jeju lé nungmoq wó yù bekô nghut mù luî, mhoqshit râ góyuq a ra lo nghut ri. Nghut kôlhang, haû Yhâng é xû but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luî, mhaû é hkyô haî le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

<sup>28</sup> Chyitdap é zo wuî ê, nga-nhúng gi, Yhang jé lé mù htoq shit é hkûn,

Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

<sup>29</sup> Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

### 3

#### *Garai Gasâng É Yhangzô Pé*

<sup>1</sup> Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Îwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri.

<sup>2</sup> Chyitdap é luzúm wuî ê, ahkuî, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tân shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut é hkyô lé roq yhang, nga-nhúng myàng râ nghut lhê.

<sup>3</sup> Myit myoqbyù hkyô shî lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

<sup>4</sup> Mara kut é sù ó yuq nghut kôle, tarâ lu laî é sù nghut ri; gè gè ga jang, mara gi, tarâ lu laî é hkyô nghut nyi ri.

<sup>5</sup> Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri.

<sup>6</sup> Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

<sup>7</sup> Chyitdap é zo wuî ê, nungmoq lé ó yuq èq le hkyô a shuí nghoq kó sháng

† 2:20 Xû but byi é hui gâ é lichyúm gi, Hkrisduq chyáng mai, Chyoiyúng Woi-nyî lé myang hap yu é lé gâ lhê.

gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

<sup>8</sup> Mara kut nyi é sù gi, nat Tsadán chyáng mâ é nghut nyi ri; hkâsu mù gà le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq lé é nghut lhê.

<sup>9</sup> Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haú yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut.

<sup>10</sup> Ó yuq nghut kôle, dingmán é hkyôa kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhung wó sê yu ri.

### *Rayuq Eq Rayuq Chyitdap Lhum Râ Hkyô*

<sup>11</sup> Nga-nhung rayuq eq rayuq chyitdap lhum râ lhê gà é hkyô haû gi, sâng-hi mai nungmoq wó gyô yù bê danglù nghut ri.

<sup>12</sup> Haû agè ashop sù eq le sêng é, yhanggu lé sat pyâm é Ka-in su a ge kut. Yhang gi, haî mù luí yhanggu lé sat pyâm lhê lhú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✧

<sup>13</sup> Ngá é gumang wui ê, nungmoq lé mingkân eq a ngui a jú kut kôlhang, hkâmaú kó.

<sup>14</sup> Nga-nhung gi, nga-nhung é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri.

<sup>15</sup> Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum

abyuq é asak a bo é hkyô lé, nungmoq sê nyi akô.

<sup>16</sup> Yesuq Hkrisduq gi, nga-nhung é matú Yhâng é asak byi pyám bê lé wú jáng, chyitdap myit hkâsù é nghut é hkyô lé, nga-nhung wó sê ri. Nga-nhung le, gumang wui é matú, nga-nhung é asak lé byi pyám gíng ri.

<sup>17</sup> Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haû Garai Gasâng é chyitdap myit gi, yhâng chyáng hkâsu wó bò râ lhú?

<sup>18</sup> Chyitdap é zo wui ê, nga-nhung gi, dang nhut shô mai za a nghut, muzó eq tengmán é đông le chyitdap nyi sháng.

<sup>19</sup> Haú hkûn, nga-nhung gi, tengmán hkyô eq séng bê bang nghut é lé wó sê é eq, nga-nhung é i-myit mai nga-nhung lé mara hun lò hkangmó, Garai Gasâng é hí má nga-nhung i-myit wó ngón nyi bê nghut ri.

<sup>20</sup> Hkâsu mù gà le, Garai Gasang gi, nga-nhung myit é htoq má je kô é sù nghut mù, jung hkangmó lé sê nyi ri.

<sup>21</sup> Chyitdap é luzúm wui ê, nga-nhung é i-myit mai nga-nhung lé mara a hun é nghut le gi, Garai Gasâng hí má nga-nhung gyuq kyûm râ hkyô a joq lo nghut ri.

<sup>22</sup> Nga-nhung gi, Yhang hkyô tô é hkunmó pé lé châng kut é eq Yhang lé gabú nhang é hkyô haî lé le kut é yanmai, nga-nhung dúng é hkyô lunglhang lé, Yhâng chyáng mai wó yû râ nghut lhê.

<sup>23</sup> Yhang hkunmó hkyô tô é eq rajung za, Yhâng zo Yesuq Hkrisduq é mying má lumjín é eq, rayuq eq rayuq chyitdap lhum é hkyô gi, Yhang hkyô tô é hkunmó yhang nghut bê.

<sup>24</sup> Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bang chyáng dui nyi bê nghut ri. Yhang nga-nhung chyáng dui nyi bê hkyô lé, nga-nhung lé Yhang byi tô é Woi-nyí đông nga-nhung wó sê yu é nghut lhê.



## 4

*Woi-nyí Pé Lé Gôn Wú Râ Hkyô*

<sup>1</sup> Chyitdap é luzúm wuî ê, woi-nyí hkanmó lé hkâlumjîng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri.

<sup>2</sup> Garai Gasâng é Woi-nyí lé nungmoq wó sê yù râ hkyô gi, shí dông nghut lhê: haú Yesuq Hkrisduq gi, gungsho dông jé lé bê ga, yín yu é woi-nyí hkanmó gi, Garai Gasâng chyáng mâ é nghut lhê.

<sup>3</sup> Nghut kôlhang, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuî lhang mingkan htoq má nyi to gù nghut é anti-hkrisduq é woi-nyí nghut ri.

<sup>4</sup> Chyitdap é zo wuî ê, nungmoq gi, Garai Gasâng chyáng mâ é nghut mù luî, yhangmoq lé ung pyám bekô nghut ri. Hkâsu mù gâ le, nungmoq má lúng to Sû gi, mingkan má nyi to su htoq je kô ri.

<sup>5</sup> Yhangmoq gi, mingkan eq sêng é bang nghut lhê mù luî, mingkan hkyam dông taî bum akô; mingkan zo wuî le yhangmoq é dang lé gyo byî akô nghut ri.

<sup>6</sup> Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yû bê nghut ri.

*Garai Gasang Gi, Chyitdap Myit*

<sup>7</sup> Chyitdap é luzúm wuî ê, nga-nhúng gi, rayuq eq rayuq chyitdap lhûm nyi sháng; hkâsu mù gâ le, chyitdap myit gi, Garai Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luî, Garai Gasang lé sé sù nghut ri.

<sup>8</sup> Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê.

<sup>9</sup> Garai Gasang gi, Yhang Zô é yanmai nga-nhúng asak wó dui sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tûn shit é hkyô nghut ri.

<sup>10</sup> Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luî, nga-nhúng é yubak marâ é matú, shíhtaî gunglik hkungga dut sháng gaq ga, Yhang Zo lé nhang kat byi é nghut ri; haú gi, chyitdap myit yhang nghut bê.

<sup>11</sup> Chyitdap é luzúm wuî ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhûm râ dut lhê.

<sup>12</sup> Garai Gasang lé ó yuq èq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhûm nyi é nghut jáng, Garai Gasang gi, nga-nhúng má nyi nyi bê nghut luî, Yhâng é chyitdap myit gi, nga-nhúng má gumjup râ nghut lhê.

<sup>13</sup> Garai Gasang gi, nga-nhúng lé, Yhâng é Woi-nyí byi to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri.

<sup>14</sup> Haú Îwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luî, saksé hkâm lhê.

<sup>15</sup> Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luî, yhang le Garai Gasâng chyáng dui nyi bê nghut ri.

<sup>16</sup> Nga-nhúng gi, Garai Gasâng èq nga-nhúng lé chyitdap é hkyô lé, sé luî lumjîng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle,

Garai Gasâng chyáng dui nyi bê nghut luí, Garai Gasang le haú yuq má nyi nyi bê nghut ri.

<sup>17</sup> Haú dông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi má a gyuq a kyum é myit wó yú râ nghut lhê; hkâsu mù gâ le, nga-nhúng gi, mingkan shí má Yhang su dut nyi bê nghut ri.

<sup>18</sup> Chyitdap myit má gyuq é hkyô a bò nghut ri; gyuq é hkyô gi, mara dam byi é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.

<sup>19</sup> Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê.

<sup>20</sup> Byù rayuq yuq gi, "Ngò, Garai Gasang lé chyitdap lhê." ga tái kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsing byu-myang é gumang lé lhang a chyitdap é sù gi, a byu-myang é Garai Gasang lé wó chyitdap râ a nghut.

<sup>21</sup> Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haú gi, nga-nhúng é matú, Yhang mai hkyô tô é hkunmó nghut lhê.

## 5

### *Garai Gasâng É Yhangzo Lé Lumjینگ Hkyô*

<sup>1</sup> Yesuq gi, haú Hkrisduq nghut ri ga lumjینگ é sù ó yuq nghut kôle, Garai Gasâng chyáng mai hku kat bê sù nghut ri; îwa lé chyitdap é sù ó yuq nghut kôle, yhang zo lé le chyitdap é nghut bê.

<sup>2</sup> Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai,

<sup>3</sup> Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut.

<sup>4</sup> Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjینگ myit gi, mingkan lé nga-nhúng ung pyâm é ongdang hkyô nghut ri.

<sup>5</sup> Yesuq gi, Garai Gasâng é Yhangzo nghut é lé lumjینگ é sù mai lai luí, mingkan lé wó ung pyâm é sù gi, ó yuq wá nghut lhê lhú?

<sup>6</sup> Haú yuq gi, wuì eq sui\* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byi ri.

<sup>7</sup> Hkâsu mù gâ le, Woi-nyí le, wuì le, sui le, haú sùm lhùm é saksé hkâm akô nghut ri;

<sup>8</sup> haú sùm lhum gi, rajung za nghut akô.

<sup>9</sup> Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byi é yanmai nghut ri.

<sup>10</sup> Garai Gasâng é Yhangzo lé lumjینگ é sù gi, saksé haú lé yhâng é i-myit má wó bê nghut ri; Garai Gasang lé a lumjینگ é sù kúm gi, Yhang lé byù mhaú rayuq ga chyo pyâm bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjینگ é yanmai nghut ri.

<sup>11</sup> Nga-nhúng lé, Garai Gasang byi é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri.

<sup>12</sup> Garai Gasâng é Yhangzo lé wó sù gi, asak haú lé wó bê; Yhang Zo lé a wó sù gi, asak haú lé le a wó nghut ri.

### *Ahtum Abyuq Asak*

\* **5:6** Wuì eq sui ngu é gi, Yesuq baptisma hkam yu é hkyô eq shí hkâm é hkyô lé tái nau é nghut ri.

<sup>13</sup> Garai Gasang é Yhangzô é myìng lé lumjìng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé ngò ká byí kat é nghut lhê.

<sup>14</sup> Nga-nhúng haì dúng le le, Garai Gasang ô nau é dông nghut jáng gi, Yhang gyo byi râ nghut lhê; haù gi, Yhâng é hí má nga-nhúng a gyuq a kyum wó wâng râ matú nghut ri.

<sup>15</sup> Haù mù, nga-nhúng haì dung kôlhang, Yhang gyo byí é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

<sup>16</sup> Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haù yuq é matú kyûdung byi râ lhê. Haù hkûn, Garai Gasang gi, haù yuq lé asak byi râ nghut lhê. Haù gi, shí a gíng é mara wó bâng é matú taì é nghut lhê. Shí gíng é mara le joq lhê; nghut kôlhang, hau é matú dung râ lhê nghû, ngò taì nyi é a nghut.

<sup>17</sup> A dîngmán é hkyô lhunglhang gi, mara nghut lhê; nghut kôlhang, shí a gíng é mara le joq lhê.

<sup>18</sup> Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haù Garai Gasâng é Yhangzo gi, haù yuq lé wú zúng nyi é nghut mù luí, haù agè ashop sù gi, haù yuq lé wó záng htung râ a nghut.

<sup>19</sup> Nga-nhúng gi, Garai Gasâng é yhangzô pé nghut é lé le, mingkan gón lé haù agè ashop su èq up tô é hkyô lé le, sê lhê.

<sup>20</sup> Hau htoq agó, Garai Gasâng é Yhangzo jé lé luí, haù tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyí bê eq rajung za, haù tengmán Sù má le nyi nyi bê nghut lhê. Yhang gi, haù tengmán é Garai Gasang eq ahtum abyuq é asak nghut nyi lhê.

<sup>21</sup> Chyitdap é zo wuî ê, hparà lhó pé lé koi pyâm nyi keq.

## YOHAN Htang Dàm Hun Kat é Laiká (2 John)

<sup>1</sup> Ngò suwún hpó gi, tengmán hkyô má ngò chytđap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haù nga-nhùng chyáng lúng to luí,

<sup>2</sup> nga-nhúng eq ahtum abyuq ru joq nyí râ nghut é tengmán hkyô é yanmai, haù tengmán hkyô lé sê é lhunglhang bang le, nungmoq lé chytđap nyi lhê.

<sup>3</sup> Haù Íwa Garai Gasang eq Íwâ é Yhangzo Yesuq Hkrisduq chyáng mâ é jeju, shogyo nhikmyin hkyô eq ngu-ingón hkyô gi, haù tengmán hkyô eq chytđap hkyô má, nga-nhúng eq rahá joq nyi sháng gaq.

<sup>4</sup> Haù Íwa mai nga-nhúng lé hkunmó hkyô tô é eq rajung za, nung zô pé ra-am gi, haù tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê.

<sup>5</sup> Chytđap é hpô-myhí ê, nga-nhúng rayuq eq rayuq chytđap lhum sháng nghú, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut.

<sup>6</sup> Yhang hkyô tô é hkunmó eq rajung za, nga-nhúng cháng kut é nghut jáng gi, chytđap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chytđap myit bo nyi râ matú nghut lhê.

<sup>7</sup> Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haù sù é byù gi, haù mhaú zo sù eq anti-hkrisduq đút râ nghut lhê.

<sup>8</sup> Nungmoq zui saí bê muzó é akyû lé a lhoq hpyuq é za, gumjup é shi-gyaú chyunghuq lé, nungmoq wó

hkam yù kó sháng gaq, yhumsing gùng sidiq nyi keq.

<sup>9</sup> Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haù mhoqshit é dang lé ru châng nyi é sù kúm gi, haù Íwa lé le, Yhangzo lé le, wó bê sù nghut ri.

<sup>10</sup> Mhoqshit é dang haù lé a wun é byù rayuq yuq, nungmoq chyáng jé lé é nghut le gi, haù yuq lé nungmoq é yhúmhaù má hkâwâng nhâng kó; yhang lé hkâhom xoq yù kó.

<sup>11</sup> Hkâsu mù gâ le, haù yuq lé lhom xoq yu é sù gi, yhâng é agè ashop é muzó má lòm bê sù nghut ri.

<sup>12</sup> Ngò gi, nungmoq lé ká byí kat râ hkyô myo myo joq kôlhang, laiká hkyap eq kajung-chi lé a kâm chúng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum râ lé myit myoqbyu nyi lhê.

<sup>13</sup> Hkyin yù huí é náng nhâ é yhangzô pé gi, nang lé shi-kyâm kat akô nghut ri.

## YOHAN Súm Dam Dàm Hun Kat é Laiká (3 John)

<sup>1</sup> Ngò suwún hpó gi, haú tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

<sup>2</sup> Chyitdap é luzúm hpó ê, ngò gi, haú náng é asak woi-nyí nyì-ngón yuqyo nyi é eq rajung za, nàng nguìngón wángzán rá eq hkyô hkat hkgámó má, nyì-ngón yuqyo nyi sháng gaq nghû, kyûdung byi kat lhê.

<sup>3</sup> Hkâsu mù gâ le, ngò gi, gumang wui ra-am, ngá chyáng lé jé mù, haú tengmán hkyô má náng lhumzui é hkyô lé le, haú tengmán hkyô má náng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê.

<sup>4</sup> Haú tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

<sup>5</sup> Chyitdap é luzúm hpó ê, haú gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri.

<sup>6</sup> Yhangmoq gi, haú noqkuq hpúng má é bang lé, nàng é chyitdap myit eq séng lui taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm lui, dé kat é nghut jáng, ge é muzó jizó kut é nghut bê.

<sup>7</sup> Hkâsu mù gâ le, yhangmoq gi, Hkrisduq é myìng hau é matú htoq ló kôlui, a lumjìng bâng chyáng mai haí lháng a hap yù kó nghut ri.

<sup>8</sup> Haú mù lui, nga-nhúng gi, haú tengmán hkyô é matú rahá za wó chôm zui saí sháng gaq, haú sù é byu pé lé lhom hkûlum yù rá lhê.

<sup>9</sup> Ngò gi, haú noqkuq hpúng lé laiká ká byi kat bê nghut lhê; nghut kôlhang, haú ushuq kut nau é sù Diotrehpi gi, ngamoq lé a lhom hap yù nghut ri.

<sup>10</sup> Haú mù lui, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyi kyo rá nghut lhê; yhang gi, haú hkyô lé myit a dik shi é nghut mù lui, yhang yhang le gumang wui lé a lhom hkûlum yù, lhom hkûlum yù naú bang lé le, yhang mai hkûm zing pyám lui, yhangmoq lé haú noqkuq hpúng mai hkat htoq pyám ri.

<sup>11</sup> Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasâng lé a myàng shi é sù nghut ri.

<sup>12</sup> Demetri ge é hkyô lé, yuq hkgámó mai le, haú tengmán hkyô èq le, saksé hkám byi akô nghut ri; ngamoq le, yhang ge é hkyô lé saksé hkám byi lhê; haú ngamoq hkâm é saksé gi, têng é hkyô nghut é lé, nàng sê lhê.

<sup>13</sup> Ngò gi, nang lé kâ kat ra hkyô myo myo joq kôlhang, kâjung eq kâjung-chi dông a kâ kat naú lo.

<sup>14</sup> Ngò gi, a myáng má, nàng eq myang hui lhum rá lé myit myoqbyu tô lhê. Haú hkûn sheq, ngá-nhik myoqdong hkyûm myang nyo lhum rá nghut lhê.

<sup>15</sup> Nàng nguìngón yuqyo nyi sháng gaq; shi má é luzúm wui gi, nang lé shi-kyâm kat akô nghut ri. Nàng le, haú má é luzúm wui lé, myìng du htau lui bo shi-kyám byi laq.

## YUDE Hun Kat é Laiká (Jude)

<sup>1</sup> Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng eq ji yù mù, chytidap é hui luí, Yesuq Hkrisduq eq upzúng é hui bâng chyáng dang kyô kat lhê.

<sup>2</sup> Shogyo nhikmyin hkyô, nguingón hkyô eq chytidap hkyô gi, nungmoq chyáng agùn agó joq nyi sháng gaq ô!

### *Garai A Wó Bâng É Yubak Mara*

<sup>3</sup> Chytidap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kâ kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjíng hkyo é matú nungmoq htuq htíng râ dut é lé, myit wum byi râ hkyô ká râ dut é lé, ngò byu-myang ri.

<sup>4</sup> Hkâsu mù gâ le, haù mara dam byí é hui zo râ hkyô lé, a-nham pyat mai kâ matsíng tô é hui bê bang ram gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

<sup>5</sup> Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhang, a lumjíng é bang lé gi, htâng má dum lhoq htên pyám é nghut lhê.

<sup>6</sup> Hau htoq agó, haù yhumsíng é ayá lé tô pyám luí, yhumsíng é nyi jowò

lé pyám tô é maumâng pé lé, Yhang gi, haù tarâ jéyáng é hui râ Buinyi mó jé shoq, ahtum abyuq é toqjâng tuí eq tui luí, mauchut hkaù má lhúng tô é nghut lhê.

<sup>7</sup> Haù eq rajung za, Sodom eq Gomoraq myuq eq hau é awui ayàm mâ é wà pé mâ é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyi zô lhùm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

<sup>8</sup> Haù eq rajung za yhang, yhupmoq moq é byù shí bang gi, yhumsíng é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri.

<sup>9</sup> Nghut kôlhang, haù maumang lagyo agyì Mihkelaq lháng gi, Mosheq é gùng eq séng luí, haù nat zau eq dang rhâng lhùm é hkún, yhang lé rhoi é dông mara hùn dang a wám taí é za, "Nang lé, haù Yhumsíng nhik-yo sháng gaq!" ga za taí ri.

<sup>10</sup> Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsíng myit mai sê gyô é hkyô pé má lháng, yhumsíng gùng lé lhoq htên yu akô nghut ri.

<sup>11</sup> Yhangmoq gi, dingnyé wó râ! Hkâsu mù gâ le, yhangmoq gi, Ka-in\* kut é agè ashop é hkyô dông cháng kô é yanmai le, akyû wó râ matú, Balam† shut é dông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

<sup>12</sup> Yhangmoq gi, nungmoq é chytidap zoshuq poí má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkún, yhumsíng gùng lé za yhumsíng lhoq gyí yu é sau

\* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoí nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

zúng bang nghut akô; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sikhâm pé su nghut akô.

<sup>13</sup> Yhangmoq gi, yhumsing é hoq jung lé, tsû-myup su htoq nhang é, haû wuimau mâ é kô é wuìlhêng pé eq, tuq tuq chut é mauchut hkaû má tarâ jéyáng hui râ matú, ahtum abyuq tô to huí é, yông wún é kyí pé su nghut akô.

<sup>14</sup> Byù haû bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haû Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri.

<sup>15</sup> Yhang gyó lé lo é gi, yuq hkgangmó lé tarâ jéyáng râ matú eq, haû tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi râ matú nghut lhê." gâ ri.

<sup>16</sup> Byù haû bang gi, put dang taí é bang eq mara hûn dang taí é bang nghut akô; yhangmoq gi, yhumsing ô nau é agè ashop hkyô cháng kô é htoq agó, yhumsing gùng yhumsing nghutbûn é dang taí é eq yhumsing maiwáng zat é dông, góbang lé owaq é bang nghut akô.

### *Hkam Jân Râ Hkyô*

<sup>17</sup> Nghut kôlhang, ngò chyitdap é luzúm wuì ê, nungmoq gi, haû nga-nhông é Yhumsing Yesuq Hkrisduq é lagyô pé mai te taí tô é dang lé, bûn nyi keq.

<sup>18</sup> Hkâsu mù gâ le, yhangmoq gi, "Haû ló htâng é ahkyíng pé má, tarâ a hkunggâ é yhumsing ô nau é hkyô dông châng é, rhoijap-dap dang taí é byu pé nyi to râ nghut lhê." ga, nungmoq lé taí wú kô é nghut lhê.

<sup>19</sup> Byù haû bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.

<sup>20</sup> Nghut kôlhang, ngò chyitdap é luzúm wuì ê, nungmoq gi, haû Chyoiyúng Woi-nyí má kyûdông é dông, nungmoq é chyoiyúng é lumjíng hkyô má, yhumsing gùng yhumsing lhoq kô yu nyi keq.

<sup>21</sup> Ahtum abyuq é asak lé wó yû râ matú, haû nga-nhông é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

<sup>22</sup> Lumjíng hkyô má úng-âng é bang lé, shogyo nhikmyin nyi keq;

<sup>23</sup> góbang lé gi, myi mai she htoq yû mù, hkyi yù keq; dum, góbang lé gi, sidiq myit èq shogyo nhikmyin hkyô tân shit mù, haû gungshô é achaq achyut dap é yhangmoq é mebu lé chaq nyi keq.

### *Hkya-on Kungtôn Dang*

<sup>24-25</sup> Nungmoq lé, a lingbat shoq wó upzúng luí, nungmoq lé, mara hûn râ hkyô a bo é za, gabú dik é dông mai Yhang é hpungwup shingkan bo é myoq hí má wó shuí shit é, nga-nhông é hkyi yù Sû, rayuq za nghut é Garai Gasâng chyáng, hpungwup shingkan, hkikhkam hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq dông mai, laí lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

## YOHAN É SHING-RÁN Laiká (Revelation)

### *Dang-hi Hpóng*

<sup>1</sup> Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wuì lé tún shit nhâng râ matú, Garai Gasâng èq Yesuq Hkrisduq Yhang lé byí tô é nghut lhê. Yhang gi, Yhâng é mau-mang lagyo lé nhang kat luí, Yhâng é dui-nhâng zoshâng Yohan lé, shing-rán haû sé nhang ri.

<sup>2</sup> Yohan gi, Garai Gasâng é mung-dang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri.

<sup>3</sup> Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sú eq, gyô yù luí, haû má kâ tô é gû lé châng kut é bang gi, hkungsô wó nyi akô.

### *Noqkuq Hpúng Nyhit Lhum Lé Dang Kyô Kat É Hkyô*

<sup>4</sup> Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le,

<sup>5</sup> lhumzuí é saksé nghut sú, shi byuq é mai sâng-hi dui toq é zomún dut sú, myidàm htoq mâ é hkohkam pé lé up sú, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chytidap luí, Yhâng é suí eq, nga-nhúng lé, nga-nhúng é mara pé mai lhoq lhut byí é eq,

<sup>6</sup> Yhâng é Garai Gasang eq Íwa lé do-jaú râ matú, nga-nhúng lé, mingdán byu pé eq hkyangjông pé\* dut nhang

é Su chyáng, duqwup shingkang eq hpungwup a-tsam gi, pyat dedu ah-tum abyuq ru joq nyí sháng gaq ô! Amen.

<sup>7</sup> Wú keq, Yhang gi, mhut mai lé lo nyi é nghut luí, myoqjí hkangmó gi, Yhang lé myàng kó râ nghut lhê;

haû Yhang lé htaû rot bang† lháng, myàng kó râ nghut lhê;

haû myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haú dông nghut sháng gaq! Amen.

<sup>8</sup> "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sú nghut lhê." ga, haû Yhumsing Garai Gasang taí ri.

### *Byu Yhangzo Su Dut Su É Hkyô*

<sup>9</sup> Yesuq é, wúhke jamjau hkyô má le, mingdán má le, jân shirang é hkyô má le, nungmoq é byinzùm nghut sú, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zínlong má nyi nyi é nghut lhê.

<sup>10</sup> Haû Yhumsing é Buinyi§ má, ngò gi, Woi-nyí èq shuí moq byuq ló é nghut mù, "Nàng myang é eq rajung za, chyúmding ralhú má ká luí, Eh-pesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

<sup>11</sup> noqkuq hpúng nyhit lhùm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

<sup>12</sup> Haû ngo lé nyo nyi é htê yhumsing lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hìng myi-kok tsungjang nyhit lhum lé le,

<sup>13</sup> myi-kok tsungjang haú pé é agùng má, byu yhangzo su dut é Sú

\* **1:6** Htoq Ló 19:6 † **1:7** Htau rot bang gâ é gi, Yesuq tapzìng má jén to huí é hkûn, Yhâng é namcham má lham eq htaû é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hí cham eq ló htàng cham nghut lhê; haû taí nau é gi, rû dui nyi sú gâ é nghut lhê. § **1:10** Yhumsing é Buinyi gâ é gi, yuban nyí lé gâ lhê.



rayuq nyi tô é lé le, myang kat ri; hau yuq gi, hkyigoq htoq jé é buhîng wut to luî, wànggàng má hîng wànggò le wut tô ri.

<sup>14</sup> Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri.

<sup>15</sup> Yhâng é hkyî gi, myi bungghkyûng má jên yu é jet é gyi su dut ri; Yhâng é htê gi, wuî myo myo mying hûm é htê su gâ ri.

<sup>16</sup> Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

<sup>17</sup> Yhang lé myang é hkûn, ngò gi, shî gùng su, Yhâng é hkyî wang má lêng leq tô é nghut lhê. Hau hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê.

<sup>18</sup> Ngò gi, dui nyi Sû le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shî hkyô eq momîng é zoqshi pé lé chûng Su nghut lhê.

<sup>19</sup> Hau mù, nàng myang é lé le, ahkuî dut é hkyô eq htàngnùng le dut lò râ hkyô lé le, kê to aq.

<sup>20</sup> Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhûm é zaú tô é hkyô é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhûm gi, noqkuq hpúng nyhit lhûm nghut ri.

## 2

### *Ehpesu Myuq Mâ É Noqkuq Hpúng Lé Kâ Kat É Laiká*

<sup>1</sup> Ehpesu myuq mâ é noqkuq hpúng é maumang lagyo lé isu nghû kê kat aq:

Hau yhâng é loqyo loq má kyî nyhit cham chûng luî, hîng myi-kok tsungjang nyhit lhûm é gyoro má sô nyi Su é dang gi,

<sup>2</sup> 'Ngò gi, nàng é a-kyang, nàng shikut é hkyô, nàng hkam jân é hkyô pé lé, sê lhê. Agé ashop é byu pé lé, nàng a jân pyâm é hkyô lé le, hau lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê.

<sup>3</sup> Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

<sup>4</sup> Nghut kôlhang, nàng gi, nàng é sâng-hi lhê é chyitdap myit lé tô pyâm é yanmai, ngò, nang lé mara hûn râ hkyô joq ri.

<sup>5</sup> Nàng hká mai byit gyó é lé, myit bun aq! Myit lhîng luî, sâng-hi nàng kut é muzó pé lé, kut aq. Nàng myit a lhîng é nghut jáng, ngò, nàng chyáng lé jé mù, nàng é myi-kok tsungjang lé, hau é jowò mai huî pyâm byi râ nghut lhê.

<sup>6</sup> Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, nàng chyáng ge é hkyô ralhum bo ashî nghut ri.

<sup>7</sup> Gyo râ nohkyap dap sù gi, hau Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, hau Garai Gasâng é hparadisû má joq é asak siggâm mâ é ashi zo râ ahkáng, Ngò byi râ nghut lhê.' gâ ri.

### *Samurna Myuq Mâ É Noqkuq Hpúng Lé Kâ Kat É Laiká*

<sup>8</sup> Samurna myuq mâ é noqkuq hpúng é maumang lagyo lé isu nghû kê kat aq:

Hau Sâng-hi eq Jihtûm nghut é eq, shi byuq luî, asak dum dui Su é dang gi,

<sup>9</sup> 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luî, Yudaq byu pé a nghut kôlhang, Yudaq byù nghut lhê gâ é bang taí hpoi é hkyô lé le, Ngò sê lhê.

<sup>10</sup> Nàng hui zo râ nghut é wuîhke hkyô lé, hkâgyuq. Ngò, nungmoq lé taí

kyo kôlé, haû nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám râ nghut lhê; hau htâng, nungmoq gi, raxê nyí tup zing-rî é hui zo kó râ nghut lhê. Shí shoq lhumzuí nyí aq, haú hkûn, Ngò, nang lé, asak janmaú byi râ nghut lhê.

<sup>11</sup> Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Í dâm nghú râ shí é hkyô\* gi, wó ung é sù lé, wó záng htung râ a nghut.' gâ ri.

*Pergamu Myuq Mâ É Noqkuq  
Hpúng Lé Kâ Kat É Laiká*

<sup>12</sup> Pergamu myuq mâ é noqkuq hpûng é maumang lagyo lé isu nghú kâ kat aq:

Haú shamsó í shut dap é sâm wó Su é dang gi,

<sup>13</sup> 'Nàng nyi é jowò lé, Ngò sê lhê; haú gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myíng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat hui é hkûn lhang, nàng Ngo lé lumjínng é hkyô lé, a he-ngik pyám nghut ri.

<sup>14</sup> Nghut kôlhang, Ngò, nang lé mara hûn râ hkyô ratsuí joq ashí; hkâsu mù gâ le, hparà lhô pé lé tîng byí é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpoyô râ hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri.

<sup>15</sup> Haú eq rajung za, haú Nikola é chángzô pé mhoqshit é hkyô lé myhik zing é byu pé le, náng chyáng nyi ri.

<sup>16</sup> Haú mù luí, myit lhíng aq! Haú a nghut jáng, Ngò gi, náng chyáng hân jé lé mù, haú Ngá nhut mai htoq é sham eq yhangmoq lé zan râ nghut lhê.

<sup>17</sup> Gyo râ nohkyap dap sù gi, haú Woi-nyí mai noqkuq hpûng pé lé taí

é hkyô lé, gyô yù sháng gaq. Wó ung é sù lé gi, haq tô é mannaq muk lé le, myíng asik kâ tô é luqgok hpyú racham lé le, Ngò byi râ nghut lhê, lhom hap yu é sù za sheq, myíng haú lé sé râ nghut lhê.' gâ ri.

*Htuatira Myuq Mâ É Noqkuq  
Hpúng Lé Kâ Kat É Laiká*

<sup>18</sup> Htuatira myuq mâ é noqkuq hpûng é maumang lagyo lé isu nghú kâ kat aq:

Haú myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi,

<sup>19</sup> 'Náng é a-kyang, chyitdap myit, lumjínng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

<sup>20</sup> Nghut kôlhang, yhumsing gùng yhumsíng myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wui lé, ashop é dông gungsho zùm yap râ eq hparà lhô pé lé tîng byí é zoshuq zo râ hkyô lé mhoqshit luí, yhangmoq lé hkyô shuí ngoq ri.

<sup>21</sup> Ngò gi, yhang lé, ashop é dông gungsho zùm yap é hkyô mai myit lhíng râ ahkyíng byi kôlhang, yhang gi, a myit lhíng nàu nghut ri.

<sup>22</sup> Haú mù, Ngò gi, yhang lé, jam-jau hui râ yhupchong má dú lhez pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhíng kô é za a nghut jáng, wuîhke jamjau mó hui zo nhâng râ nghut lhê.

<sup>23</sup> Ngò gi, yhang zô pé lé sat pyám râ nghut lhê; haú hkûn, Ngò gi, myit nhiklhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkanngó lé, Ngò tau byi râ nghut é lé le, haú noqkuq hpûng pé banshoq wó sé kó râ nghut lhê.

\* 2:11 Í dâm nghú râ shí é hkyô gâ é gi, ngaraí ming wang é lé gâ lhê.

<sup>24</sup> Mhoqshit hkyô haú lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut.

<sup>25</sup> Ngò jé lé é jé shoq, nungmoq wó tô é lé za myhik zing nyi keq.

<sup>26-27</sup> Wó ung é eq Ngò ô nau é hkyô lé jìhtûm jé shoq châng é sù lé gi,

"Yhang gi, yhangmoq lé, shamtoq dumbáng èq up† râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."☆

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê.

<sup>28</sup> Ngò gi, yhang lé, haú bó-myhû byi râ nghut lhê.

<sup>29</sup> Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

### 3

#### *Sardi Myuq Mâ É Noqkuq Hpúng Lé Kâ Kat É Laiká*

<sup>1</sup> Sardi myuq mâ é noqkuq hpûng é maumang lagyo lé isu nghû kâ kat aq;

Haú Garai Gasâng é woi-nyí nyhit woi-nyí eq kyî nyhit cham lé chûng Su é dang gi, 'Ngò gi, náng é a-kyang lé sê lhê; náng gi, asak dui nyi sù ga kôlhang, shi byuq sù nghut ri.

<sup>2</sup> Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

<sup>3</sup> Haú mù, náng hkâsu kut wó hap yu é eq wó gyô yu é hkyô lé, myit bun aq; haú dông cháng luí, myit lhîng aq. Náng a bûn gyîng é nghut le gi, Ngò hkau sù su lé râ nghut luí, náng gi, Ngò hká u lé râ lé, sé râ a nghut.

<sup>4</sup> Nghut kôlhang, Sardi myuq má, yhumsing é mebu lé agot a-û a kut

é byù ra-am nyi akô. Haú bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô.

<sup>5</sup> Wó ung é sù gi, haú bang su, hpyu é mebu myang wut râ nghut lhê. Ngò gi, haú yuq é myîng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pé é hí má le, haú yuq é myîng lé, Ngò yín yû râ nghut lhê.

<sup>6</sup> Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

#### *Hpiladehpi Myuq Mâ É Noqkuq Hpúng Lé Kâ Kat É Laiká*

<sup>7</sup> Hpiladehpi myuq mâ é noqkuq hpûng é maumang lagyo lé isu nghû kâ kat aq;

Haú chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi,

<sup>8</sup> 'Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhûm, Ngò náng hí má hpông to byi lhê. Nàng gi, wum-o ratsuí za bò kôlhang, Ngá é dang gyo luí, Ngá é myîng lé a he-ngik pyâm é hkyô lé, Ngò sê lhê.

<sup>9</sup> Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaú pé lé, Ngò, náng é hkyî wang má, lé paí gop nhâng luí, Ngò, náng lé chyitdap é hkyô, yhangmoq lé sé nhâng râ nghut lhê.

<sup>10</sup> Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyîng mai, Ngò, nang lé lhoq lhut yû râ nghut lhê.

<sup>11</sup> Ngò gi, a myáng má jé lé lô râ nghut lhê. Náng é janmaú lé, ó yuq

† 2:26-27 Shamtoq dumbáng èq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkya-on 2:9

èq le a wó yu pyám byi sháng gaq,  
nàng wó tô é pé lé myhik zing nyi  
aq.

<sup>12</sup> Wó ung é sù lé gi, Ngá é Garai  
Gasâng é noqkuq yhâm mâ é hkungz-  
ing mó dut nhâng râ nghut lhê. Haú  
yuq gi, hkâ-nhám le haú mai dum  
htoq ló râ a nghut. Ngò gi, Ngá é  
Garai Gasâng é myìng lé le, Ngá é  
Garai Gasâng chyáng mai htoq luí,  
mauhkûng mai gyó lé lo é, Yerusalem  
wà mó Asik ga é, Ngá é Garai Gasâng  
é myuq myìng lé le, Ngá é myìng sik lé  
le, yhâng chyáng kê tap byi râ nghut  
lhê.

<sup>13</sup> Gyo râ nohkyap dap sù gi, haú  
Woi-nyí mai noqkuq hpûng pé lé taí é  
hkyô lé, gyô yù sháng gaq.' gâ ri.

*Ladoki Myuq Mâ É Noqkuq Hpúng  
Lé Kâ Kat É Laiká*

<sup>14</sup> Ladoki wà mó mâ é noqkuq hpûng  
é maumang lagyo lé isu nghû kê kat  
aq:

Haú lhumzui é eq tengmán é  
saksé nghut é, Garai Gasang hpan  
tô é lé up é, Amen gá Su é dang gi,

<sup>15</sup> 'Ngò gi, nàng kut é muzó lé sê  
lhê; nàng gi, gú le a nghut, nye le a  
nghut dut ri. Nàng gi, gú jáng jâng gú,  
nye jáng jâng nye dut râ lé, Ngò ô nau  
ri.

<sup>16</sup> Nghut kôlhang, nàng gi, gú le a  
nghut, nye lé a nghut, lumnye nghut  
é yanmai, Ngò gi, nang lé, Ngá é nhut  
mai byé htoq pyám râ za nghut bê.

<sup>17</sup> "Ngò gi, wó sù nghut lhê; ngò gi,  
sutzè gyai wó bê nghut luí, haí lhang  
a ra lo." ga nàng taí ri. Nghut kôlhang,  
nàng gi, wuîhke jamjau hui sù, asho  
awui dut sù, myùng sù, myoqjit sù  
eq achín dut sù nghut é lé, nàng a sé  
myhi-nhung.

<sup>18</sup> Haú mù luí, nàng gi, wó sù sùt  
sù wó dut sháng gaq, myi má jên yu  
é hìng lé le, nàng achín dut é hoq hpu  
hkyô lé, wó nghop pyám sháng gaq,  
wut râ matú, mebu hpyú lé le, nàng  
myoq wó myâng sháng gaq, náng é  
myoqjí má kat râ matú, myoq chi lé le,  
nàng, Ngá chyáng mai wui yù râ matú,  
Ngò, nang lé hpaqchyí byi lhê.

<sup>19</sup> Ngò chyitdap é bang lé gi, tan  
luí, mhoqshit lhê. Haú mù, nàng gi,  
hân bûn gying luí, myit lhang aq.

<sup>20</sup> Wú aq! Ngò gi, hkum yâm má  
yap to luí, hkum lé kok nyi lhê. Rayuq  
yuq, Ngá é htê lé wó gyo luí, hkum  
hpóng byí é nghut jáng, Ngò gi, wàng  
mù, haú yuq eq rahá zo shuq râ nghut  
lhê; haú yuq le, Ngò eq rahá zo shuq  
râ nghut lhê.

<sup>21</sup> Ngò gi, ûng luí, Ngá Wa eq  
rahá Yhâng é hkohkâm-tanghkuq  
má zung é eq rajung za, wó ung é sù  
lé gi, Ngò eq rahá Ngá é hkohkâm-  
tanghkuq má zùng râ ahkáng, Ngò  
byi râ nghut lhê.

<sup>22</sup> Gyo râ nohkyap dap é sù gi,  
haú Woi-nyí mai noqkuq hpûng pé lé  
taí é hkyô lé, gyô yù sháng gaq.' gâ é  
nghut ri." gâ ri.

## 4

*Mauhkûng Htoq Má Hkohkâm-  
tanghkuq Joq É Hkyô*

<sup>1</sup> Hau htâng má, ngò wú kat le,  
mauhkûng má hkum ralhum bóng tô  
é lé myang ri. Ngò sâng-hi dàm wó gyô  
é tut htê su gâ é danghtê ngo lé taí é gi,  
"Shí má doq lò aq, htàngnùng má dut  
lò râ hkyô pé lé, Ngò, nang lé tûn shit  
bá." gâ ri.

<sup>2</sup> Haú hkûn jáng yhang, ngò gi, Woi-  
nyí má moq byuq ló luí, mauhkûng  
htoq má hkohkâm-tanghkuq ralhum  
joq é lé myàng ri; tanghkuq haú má,  
byù rayuq zung tô ri.

<sup>3</sup> Haú má zung to Su é isâm gi,  
huhpé eq ne yúng lungsêng su dut ri.  
Huí nyuì lungsêng su dut é woqgan  
sìng-yang gi, haú hkohkâm-tanghkuq  
má hkông lhang tô ri.

<sup>4</sup> Hkohkâm-tanghkuq hau é  
lhanghkyuq má, hkohkâm-tanghkuq  
gotú í xe myí lhum le joq to luí, hpyu  
é mebu wut mù, ulhum má hìng  
janmaú tsûng tô é suwún í xe myi yuq  
gi, haú má zung tô bum akô.

<sup>5</sup> Haú hkohkâm-tanghkuq mai, lhap  
hpyat é, mying hûm é eq maugum  
gûm é pé dut htoq lo ri. Haú  
hkohkâm-tanghkuq hí má, myi-kok

nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri.

<sup>6</sup> Hau htoq agó, san zâ é myoqjâm su dut mâ é wui-nhông le, haú hkohkâm-tanghkuq hí má dítg tô ri.

Haú hkohkâm-tanghkuq agùng má le, lhinghkyuq má le, hî-u nunghtáng lhinghkyuq myoqjí dap é dui é dusak myí du nyi tô ri.

<sup>7</sup> Dui é dusak sâng-hî du gi, hkanhkyi su dut ri; í du nghû râ du gi, nohtó su dut ri; sùm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zung su dut ri.

<sup>8</sup> Dui é dusak myí du haú gi, du hkanqmó dùng hkyuq lhum lhum dap é htoq agó, lhinghkyuq má myoqjí kôm dap lui, dùng hkaú má lhang dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sû Yhumsîng Garai Gasang gi, choyiýung, choyiýung, choyiýung nyi ri." gâ akô.

<sup>9</sup> Haú dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkanq, aróng eq jeju bun hkyô byí é hkanqmó,

<sup>10</sup> haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop lui, Yhang lé noqkuq akô. Yhangmoq gi, yhangmoq é hkohkâm-janmaú lé, haú hkohkâm-tanghkuq hí má hkyut to mù, taí kô é gi,

<sup>11</sup> "Ngamoq é Yhumsîng eq Garai Gasang é, nyi mi-nyí, joq mijoq lé, Nang hpan to bê nghut lui,

haú pé gi, Nang ô nau é dông hpan tô é hui bê nghut mù, nyi to joq tô bùm bê nghut é yanmai,

Nang gi, hpungwup shingkanq, aróng eq hpungwup a-tsam lé, hap yù gíng Sû nghut ri."

gâ akô.

## 5

### *Chyúmding Eq Sauzo*

<sup>1</sup> Hau htâng, ngò gi, hkohkâm-tanghkuq má zung to Su é loqyo loq má, í shut é laiká kê to é, dizik nyhit lhum tap tô é chyúmding le myang ri.

<sup>2</sup> Hau htoq agó, a-tsam mó bo é maumang lagyo rayuq gi, "Haú dizik pé lé hî pyám râ eq chyúmding lé hpóng râ gi, ó yuq wá gingdán lhê lú?" ga lui, hté mó eq wut taí nyi é lé le, ngò myang ri.

<sup>3</sup> Nghut kôhang, mauhkûng htoq má le, myigùng htoq má le, myigùng ô má le, haú chyúmding lé wó hpóng râ eq ahkaú má wó wú râ byù rayuq lhang a nyi nghut ri.

<sup>4</sup> Haú chyúmding lé hpóng mù, ahkaú má wú râ gingdán é byù rayuq hkâlhang a nyi é yanmai, ngò gyai yhang ngau pyám é nghut lhê.

<sup>5</sup> Haú hkûn, haú suwún wui mâ é rayuq, ngo lé taí é gi, "Hkâ-ngaú! Wú aq, haú Yudaq byuhú mâ é Hkanhkyi nghu é, haú Dawiq é Amyit nghut Sû gi, úng bê nghut lui, haú chyúmding eq haú má é dizik nyhit lhum lé wó hpóng lhê." gâ ri.

<sup>6</sup> Hau htâng, haú dui é dusak myí du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haú gi, hkyuí nyhit lhum eq myoqjí nyhit lhum dap ri. Myoqjí haú nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri.

<sup>7</sup> Haú Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri.

<sup>8</sup> Haú chyúmding lé yu é hkûn jáng, haú dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkanqmó gi, títg eq sânyúng bâng é kyúdung dang gâ é namngón jung byíng mui tô é hîng góm pé le chung bum akô nghut ri.

<sup>9</sup> Yhangmoq gi,

"Nàng gi, haû chyúmding lé yù râ  
eq hau é dizik pé lé hpóng râ  
gingdán Sû nghut ri.

Haî mù gâ le, Nàng gi, sat hui bê  
nghut luî, byuhú hkangmó mai  
le, myíng hkangmó mai le,  
byù myú hkangmó mai le,  
mingdán hkangmó mai le,  
Garai Gasâng é matú,  
Náng é suí èq byù pé lé wui hpyit  
yù bê nghut ri.

<sup>10</sup> Nga-nhûng é Garai Gasang lé dojaú  
râ matú, Nàng gi, yhangmoq lé,  
mingdán byu pé eq hkyangjông  
pé dut nhâng bê nghut luî,  
yhangmoq gi, myidàm htoq má  
up kó râ nghut lhê."

ga luî, mahkôn sik ralhum hkon akô  
nghut ri.

<sup>11</sup> Haú hkûn, ngò wú kat le, haû  
hkohkâm-tanghkuq lhîngkhyuq má le,  
dui é dusak pé eq suwún wui é  
lhîngkhyuq má le, nyi tô bum é mau-  
mang lagyo ajùm ayò mun mun sen  
sên é htê lé wó gyô ri.

<sup>12</sup> Yhangmoq gi,

"Haû sat hui bê Sauzo gi, hpungwup  
a-tsam, sutzè, hpaqchyî byéng-  
yá, wum-o, aróng sitang,  
hpungwup shingkang eq hkya-  
on kungtôn hkyô lé, hap yù  
ging ri."

ga luî, htê mó èq ton bum akô nghut  
ri.

<sup>13</sup> Hau htoq agó, mauhkûng htoq  
má nyi é, myigùng htoq má nyi é,  
myigùng ô má nyi é, wuiming má nyi  
é, hpan to huí é lhunglháng gi,

"Hkya-on kungtôn hkyô, aróng si-  
tang, hpungwup shingkang eq  
hpungwup a-tsam gi,

haû hkohkâm-tanghkuq má zung tô é  
Sû eq Sauzô chyáng,

pyat dedu ahtum abyuq ru joq  
nyí sháng gaq ô!"

ga luî, ton nyi bùm kô é lé, ngò wó gyô  
ri.

<sup>14</sup> Haû dui é dusak myí du gi, "Amen"  
ga taí jang, haû suwún wuí gi, ngóm  
gop luí noqkuq akô nghut ri.

## 6

### *Dizik Nyhit Lhúm É Hkyô*

<sup>1</sup> Haû Sauzo gi, dizik nyhit lhum mâ  
é sâng-hî lhum lé hpông kat é hkûn,  
ngò myang é nghut lhê. Hau htâng,  
haû dui é dusak myí du mâ é radu gi,  
maugum su gâ é htê mó èq, "Lé aq." gâ  
é lé, ngò wó gyô ri.

<sup>2</sup> Ngò wú kat é hkûn, ngá é myoq  
hí má myang hpyú radu nyi tô é lé  
myang ri! Haú má jî to sù gi, lai rahpu  
chung tô é htoq agó, yhang lé, janmaú  
ralhum tsûng to byí luî, ûng budang  
wó râ matú ûng sù rayuq dông htoq ló  
ri.

<sup>3</sup> Haû Sauzo gi, í lhum nghû râ dizik  
lé hpông kat é hkûn, haû í du nghû râ  
dui é dusak gi, "Lé aq." ga taí é lé, ngò  
wó gyô ri.

<sup>4</sup> Hau htâng, myang nè radu htoq lo  
ri; haú má jî tô é sù gi, myidàm htoq  
mâ é nguingón simsaq hkyô lé wup  
yù râ eq, byù yhangchang rayuq eq  
rayuq sat lhum nhâng râ a-tsam byí  
é hui sù nghut luî, yhang lé shâm mó  
rahkya le byí to bê nghut ri.

<sup>5</sup> Haû Sauzo gi, sùm lhum nghû râ  
dizik lé hpông kat é hkûn, haû sùm du  
nghû râ dui é dusak gi, "Lé aq." ga taí  
é lé, ngò wó gyô ri. Ngò wú kat le,  
myang noq radu ngá myoq hí má nyi  
tô é lé myang ri! Haú má jî tô é sù gi,  
yhang é loq má jàng rahpu chung to ri.

<sup>6</sup> Haû hkûn, "Ra-nyí é zuihpau gi,  
sungsô rabyé, ra-nyí é zuihpau gi,  
muk-yo guq sum byé nghut lhê; haû  
tsanlun xû eq tsibiyiq wing lé kúm gi,  
hkâlhoq hten kó." gâ é htê, haû dui é  
dusak myí du hkaû mai htoq ló é su  
gâ é lé, ngò wó gyô ri.

<sup>7</sup> Haû Sauzo gi, myí lhum nghû râ  
dizik lé hpông kat é hkûn, haû myí du  
nghû râ dui é dusak gi, "Lé aq." ga taí  
é lé, ngò wó gyô ri.

<sup>8</sup> Ngò wú kat é hkûn, ngá é myoq  
hí má, myang muí radu nyi tô é lé  
myang ri! Haú má jî to su é mying  
gi, Shî hkyô gâ ri; Moming le, yhang  
é htâng má châng tô ri; yhangnhik gi,  
sham èq, mutmó gyó é èq, wúm gyó é  
èq, tân é yosô-ze èq, myidàm htoq myi

tú mâ é ratú má nyi é bang lé sat pyám rá ahkáng wó yu to bekô nghut ri.

<sup>9</sup> Sauzo gi, ngo lhum nghû rá dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

<sup>10</sup> Yhangmoq gi, "Chyoiyúng é eq tengmán é, ahko ahkáng lhunglhang wó é Yhumsîng ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi rá l hú?" ga, htê mó èq garu bum akô.

<sup>11</sup> Haú hkûn, yhangmoq yuq hkangmó gi, bu hpyû hîng radung dung hut é hui luí, yhangmoq su sat hui rá bang, yhangmoq é byinzùm dui-nhâng zoshâng wuì nghut é gumang wuì sat huì ngap é hkûn jé shoq, razup zim za nyi shi keq ga taí é lé wó gyô akô nghut ri.

<sup>12</sup> Hkyuq lhum nghû rá dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri;

<sup>13</sup> maihpáng gâm lé, lài mó èq lo mut nhûn kat é hkûn, a myhîng shî é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri.

<sup>14</sup> Haú mauhkûng gi, laiká lé dîng lhûm é su htot pyâm é hui luí, bùm hkang bùm mó eq zinlóng lhumjup pé gi, yhâng é jowò mai huí pyâm é huí ri.

<sup>15</sup> Haú hkûn, haú myidàm htoq má é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhang bang gi, bùm dong pé eq bùm pé mâ é luqgok gyoro pé má haq tô bùm uchyang,

<sup>16</sup> haú bùm pé eq luqgok pé lé, "Ngamoq é gûng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq.

<sup>17</sup> Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi rá l hú?" ga garû taí bum akô nghut ri.

## 7

### *144,000 Yuq Masat Lhô Tap Hui Kô É Hkyô*

<sup>1</sup> Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wuì ming htoq má le, siggâm pé má le, lài a hik sháng gaq ga, myi shut mâ é lài lé zuí zing to kô é lé, ngò myang ri.

<sup>2</sup> Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wuì ming lé lhoq hten rá ahkáng wó tô é maumang lagyo myi yuq haú lé,

<sup>3</sup> "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi, haú myigùng, wui ming eq siggâm pé lé hkâlhoq hten shi kó." ga htê mó èq wut taí kat ri.

<sup>4</sup> Haú hkûn, masat lhô tap huí é bang byù hkâ-myhó yuq nghut é lé, ngò wó gyô ri. Israelaq byuhú ban-shoq mâ é 144,000 yuq nghut ri.

<sup>5</sup> Masat lhô tap huí yu é,  
Yudaq up mâ é bang gi, 12,000 yuq,  
Rubin up mâ é bang gi, 12,000 yuq,  
Gat up mâ é bang gi, 12,000 yuq,

<sup>6</sup> Ashe up mâ é bang gi, 12,000 yuq,  
Nahtali up mâ é bang gi, 12,000 yuq,  
Manase up mâ é bang gi, 12,000 yuq,

<sup>7</sup> Simeon up mâ é bang gi, 12,000 yuq,  
Lewiq up mâ é bang gi, 12,000 yuq,

<sup>8</sup> Yishahka up mâ é bang gi, 12,000 yuq,  
<sup>8</sup> Zebulun up mâ é bang gi, 12,000 yuq,

Yosep up mâ é bang gi, 12,000 yuq,  
Ben-yamyin up mâ é bang gi, 12,000 yuq,  
nghut bum akô.

### *Bu Hpyû Hîng Wut Bâng É Hkyô*

<sup>9</sup> Hau htâng, ngò wú kat é hkûn, mingdán hkangmó mai le, byuhú hkangmó mai le, byù myû hkangmó

mai le, myíng chângjup mai le, lé é bang, ó yuq lháng a ung nghap é byù moq mó gi, haù hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luî, yhangmoq é loq má byùm-haq chung tô bùm kômù,

10 "Hkyi yù hkyô gi, haù hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"

ga luî, htê mó eq garû bum akô nghut ri.

11 Haù maumang lagyo lunglhang bang gi, haù hkohkâm-tanghkuq é lhîngkhyuq má le, suwún wuî eq dui é dusak myî du é lhîngkhyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé no-  
qkuq uchyang,

12 "Amen! Hkya-on kungton hkyô eq hpungwup shingkang, hpaqchyî byéng-yá eq jeju bun hkyô, aróng, hpungwup a-tsam eq wum-o gi, nga-nhûng é Garai Gasâng chyáng pyat dedu ahtum abyuq ru joq nyî sháng gaq ô!"

Amen!"  
ga taî bum akô.

13 Haù hkûn, suwún wuî mâ é rayuq gi, "Shî bu hpyû hîng wut é bang gi, ô pé l hú? Yhangmoq gi, hkâmai lé é bang nghut akô l hú?" ga ngo lé myî ri.

14 Ngò gi, "Suwún hpó ê, nàng sê lhê." nghû tô taî jáng, yhang gi, "Shî bang gi, haù wuîhke jamjau mó mai wó lut htoq lô luî, yhangmoq é bu hîng lé, haù Sauzô é sui má chí hpyû yù bê bang nghut akô.

15 Haù mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyî, myín Yhang lé dojaú nyî kô é nghut lhê; haù hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ\* nghut lhê.

16 Yhangmoq gi, hkâ-nhám le, zòmut wuîshit hui râ a nghut lo; buì lhap é le, hkyíng hkyíng nyé é le, yhangmoq lé wó záng râ a nghut.

17 Hkâsu mù gâ le, haù hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luî, Yhang gi, yhangmoq lé, asak wuìbùm jé shoq shuí ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga taî ri.

## 8

### *Nyhit Lhum Nghû Râ Dizik Eq Namngón Jung Nyhê É Hîng Góm*

1 Haù Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zím byuq ri.

2 Haù hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

3 Namngón jung nyhê é hîng góm chung é maumang lagyo gotû rayuq gi, haù hkungga gyap yàm má lé yap tô ri. Haù hkohkâm-tanghkuq hí mâ é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byi tô ri.

4 Haù namngón jûng é myihkau gi, sân-yúng bâng é kyûdung danghtê eq rahá, maumang lagyo haù yuq é loq mai Garai Gasâng chyáng hkyang rot ló bê nghut ri.

5 Hau htâng, maumang lagyo haù yuq gi, góm lé yù mù, hkungga gyap mâ é myi lhoq pyîng yù luî, myidàm htoq má dú hkyô kat é hkûn, maugum mó gûm é, myíng hûm é, lhap hpyat é eq layàng nún é pé dut htoq lo ri.

### *Tut Mut É Hkyô*

6 Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

\* 7:15 *Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyi râ gâ é nghut lhê.*



<sup>7</sup> Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyî sum tú mâ é ratú eq sigâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

<sup>8</sup> Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú mâ é ratú gi, sui dut byuq bê nghut ri;

<sup>9</sup> wuìshuq lung-aû mâ é dui jung sum tú mâ é ratú gi, shi byuq luî, wuìsanghpo pé sum tú mâ é ratú gi, htên byuq bê nghut ri.

<sup>10</sup> Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pé htoq má lo gyó záng ri.

<sup>11</sup> Kyî hau é myìng gi, Kyî Kyî Hko gâ é nghut ri. Wuìlàng sum tú mâ é ratú hkô byuq luî, wuì haú hkô byuq é yanmai byù myo myo shi byuq bekô nghut ri.

<sup>12</sup> Myi yuq nghû râ maumang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luî, haú pé é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

<sup>13</sup> Ngò wú nyi le, zunbung radu gi, maulat má dâng wún mù, "Gotû maumang lagyo sum yuq èq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó èq garú taí ri.

## 9

<sup>1</sup> Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byí tô ri.

<sup>2</sup> Kyî haú gi, nik dik htûm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, buì eq maulat gi, mauchut byuq bê nghut ri.

<sup>3</sup> Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byí to bê nghut ri.

<sup>4</sup> Myidàm htoq mâ é wàhu pé lé le, mhan-haq hpoqnoq pé lé le, sigâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri.

<sup>5</sup> Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok èq pat hkûn no hpû é su yhang nghut ri.

<sup>6</sup> Haú buinyi pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haú shî hkyô gi, yhangmoq chyáng mai hpanq byuq râ nghut lhê.

<sup>7</sup> Dinggám haú pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri.

<sup>8</sup> Yhangmoq é xâm gi, myiwe wui é xâm su dut luî, yhangmoq é zuì gi, hkanghkyi zuì su dut ri.

<sup>9</sup> Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jûm eq myanglhêng pé mying hûm é htê su gâ ri.

<sup>10</sup> Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

<sup>11</sup> Yhangmoq é hkohkâm gi, nik dik

htûm é Lasang-dong mâ é maumang nghut ri; haû é mying gi, Hebre myíng dong Abadon ga, Grik myíng dông Apolion\* gâ ri.

<sup>12</sup> Sâng-hî lhum dingnyé gi, laî lô byuq bê nghut ri; nghut kôlhang, dingnyé í lhum jé lô shirâ nghut lhê.

<sup>13</sup> Haû hkyuq yuq nghû râ maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi,

<sup>14</sup> "Uhprat wuî mó lâng má tuî lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri.

<sup>15</sup> Haú hkûn, xângzo byù sum tú mâ é ratú lé sat pyám râ matú, ahkyíng, buinyî, lhôhkyap, zanwut lé, rì rì hen to bê nghut é haû maumang myi yuq lé nhang kat bê nghut ri.

<sup>16</sup> Myang jî jî é gyè jum gi, byù du sen í hkyîng bo é hkyô lé, ngò wó gyô ri.

<sup>17</sup> Ngò, shing-rán myang é má, myang jûm eq haú pé má jî bâng é wànggò-long pé gi, myi su ne é, shîng shîng nyui é eq hang su hui é nghut ri. Myáng jum é ulhum gi, hkanghkyî pé é ulhum su dut luî, yhangmoq é nhut mai, myi, myihkau eq hang pé htoq lo ri.

<sup>18</sup> Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri.

<sup>19</sup> Myang haú jum é sho-myi gi, lhangmuî su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

<sup>20</sup> Wúm ihkyup haû sùm jung mai wó lut luî, myit gyó tô é xângzo byu pé gi, yhangmoq é loq pê èq zui saí é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pê é alhô lé le, noqkuq é hkyô lé a tô pyám shi kô nghut ri.

<sup>21</sup> Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaú é mai le, myit a lhîng shi kô nghut ri.

## 10

### *Maumang Eq Laiká Dîng É Hkyô*

<sup>1</sup> Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, buî su dut luî, yhâng é hkyî gi, myi zîng su dut ri.

<sup>2</sup> Yhâng é loq má gi, hpông tô é laiká ding zo ralhum chung tô ri; yhâng é loqyo hkyî gi, wuîshuq lung-aû má nang, yhâng é loqpaî hkyî gi, myigùng htoq má nâng to luî,

<sup>3</sup> hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tú gûm kat ri.

<sup>4</sup> Haû maugum htê nyhit lhum tú gûm kat é hkûn, ngò ká râ da jáng, "Haû maugum htê nyhit lhum tú gûm é hkyô lé zaú pyám aq; haú pé lé hkâkâ to." ga, mauhkûng mai danghtê htoq lo é lé ngò wó gyô kat ri.

<sup>5</sup> Haú hkûn, wuîshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri.

<sup>6</sup> Haû mù, yhang gi, mauhkûng eq haú má nyi é lhunglhang lé le, myidàm htoq eq haú má nyi é lhunglhang lé le, wuîshuq lung-aû eq haú má nyi é lhunglhang lé le, hpan tô é, pyat dedu ahtum abyuq dui nyi Su é myîng lé lang luî, dakam é gi, "Ahkyíng ratsuí le, lhoq myáng nyî lo râ a nghut!

<sup>7</sup> Nghut kôlhang, Garai Gasang mai Yhâng é dui-nhâng zoshâng wuî nghut é myiqhtoî pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq

\* **9:11** Apolion gâ é lichyúm gi, lhoq hten lhoq hpyoq sù gâ é nghut ri.

yhâng é tut lé mut myhîng é buinyì pé má, shit râ nghut lhê." gâ ri.

<sup>8</sup> Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haû wuîshuq lung-aû eq myidàm htoq má nâng yap tô é maumang lagyô loq má hpông tô é laiká ding lé, ê yù aq." gâ ri.

<sup>9</sup> Haû mù, ngò gi, ê luí, laiká ding zo haû, ngo lé byi râ matú maumang lagyo haû lé ê dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri.

<sup>10</sup> Haû mù, ngò gi, laiká ding zo haû lé, maumang lagyô é loq mai yù mù, zô é nghut lhê; haû hkûn, ngá é nhut má gi, byo-î su yhang chuî nghâm ri; nghut kôle, bàn zô kat é hkûn, ngá é wam hkaû má hkô bê nghut ri.

<sup>11</sup> Haû hkûn, "Nâng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoi dum htoi ra râ nghut lhê." ga, ngo lé taí kyô ri.

## 11

### *Saksé Í Yuq É Hkyô*

<sup>1</sup> Ké râ jung dumbáng su dut é jàm-yang rahkat ngo lé byi luí, ngo lé taí é gi, "Ê mù, haû Garai Gasâng é noqkuq yhûm lé le, hkungga gyap lé le, kê wú luí, haû má noqkuq é bang lé nghap wú aq.

<sup>2</sup> Nghut kôlhang, shinggan mâ é wâng lé gi, a kê é za lhaí pyâm to aq; hkâsu mù gâ le, haû gi, tûngbaù pé lé byi to bê nghut lhê. Yhangmoq gi, haû chyoiyúng myuq lé, lhamó myixe í hkyap tup chôm nang kó râ nghut lhê.

<sup>3</sup> Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut\* mù, buinyì 1260 nyí tup myiqhtoi htoi kó râ nghut lhê." gâ ri.

<sup>4</sup> Yhangnhik gi, haû myidàm Yhum-sing é hí má yuq tô é tsanlun gàm

í gâm eq myibung tsungjang í lhum nghut ri.

<sup>5</sup> Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm zing-ri é sù gi, haû su kut sat pyâm é hui zo râ nghut lhê.

<sup>6</sup> Yhangnhik gi, yhangnhik myiqhtoi htoi nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wuì pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

<sup>7</sup> Yhangnhik gi, saksé ban hkâm é hkûn, haû nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê.

<sup>8</sup> Yhangnhik é mâng lé gi, danglêng dong Sodom eq Egutuq gâ é, yhangnhik é Yhumsîng lé le, tapzîng má jén sat pyâm é myuq mó é hkyô gùng má, leq to râ nghut lhê.

<sup>9</sup> Haû hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê.

<sup>10</sup> Myidàm htoq má nyi é bang gi, yhangnhik shî byuq é yanmai gabú nguingón luí, rayuq eq rayuq chyunghuq byi lhûm é đông ngón poî kut kó râ nghut lhê. Hkâsu mù gâ le, myiqhtoi haû nhik gi, myidàm htoq má nyi nyi é bang lé, wuîhke jamjau byi lai bê su nhik nghut akô.

<sup>11</sup> Nghut kôlhang, sum nyí èq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri.

<sup>12</sup> Haû hkûn, "Shî má doq lò keq." ga, mauhkûng mai yhangnhik lé wut

\* 11:3 Ji mebu wut gâ é gi, iyon yôn é lé gâ lhê.

é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq ló bekô nghut ri.

<sup>13</sup> Haú u lé yhang, layàng mó nún lô luí, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

<sup>14</sup> Í lhum nghû râ dingnyé gi, laí byuq bê nghut ri; sùm lhum nghû râ dingnyé gi, jé râ za nghut bê.

### *Nyhit Lhum Nghû Râ Tut Mut É Hkyô*

<sup>15</sup> Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

"Mingkan htoq mâ é mingdán gi, nganhûng é Yhumsîng eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lhê."

gâ ri.

<sup>16</sup> Haú hkûn, yhumsing é hkohkâm-tanghkuq má zûng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

<sup>17</sup> "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkya-on lhê.

<sup>18</sup> Byù myû pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shî bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é myîng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyîng gi, jé bê nghut ri."

gâ akô.

<sup>19</sup> Haú hkûn, mauhkûng htoq má, Garai Gasâng é noqkuq yhûm hpông to luí, Yhâng é noqkuq yhûmhkaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myîng hûm é, maugum gûm é, layàng nún é, likwò mó gyó é pé dut htoq lo ri.

## 12

### *Myiwe Myhí Eq Manjung É Hkyô*

<sup>1</sup> Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyî ke luí, kyî raxe í cham dap é janmaú lé, yhâng é ulhum má tsûng tô ri.

<sup>2</sup> Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri.

<sup>3</sup> Hau htâng, mauhkûng má gotú kumlhá dum htoq shit é gi: gyai kô é manjung nè mó\* radu gi, ulhum nyhit lhum eq hkyuî raxê lhum dap luí, yhâng é ulhum hkangmó má janmaú tsûng tô ri.

<sup>4</sup> Yhâng é sho-myi gi, mauhkûng mâ é kyî sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri.

<sup>5</sup> Myiwe myhí haú gi, mingdán ban-shoq lé shamtoq dumbáng eq up râ nghut é yuqzo rayuq lé hkû bê nghut ri; yhâng é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri.

<sup>6</sup> Myiwe myhí haú gi, yhâng é matú Garai Gasang lajâng to byî é yoso hkaú má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lhê.

\* 12:3 Manjung nè mó gâ é gi, Tsadán lé taí nau é nghut lhê.

7 Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan ê zan kôluí, haú manjung eq yhâng é maumâng pé le, tau zân akô.

8 Nghut kôlhang, yhangmoq gi, a ûng kômù, mauhkûng mâ é yhangmoq nyi jowò lhoq hpyuq pyám bekô nghut ri.

9 Haú mingkan gón lé hkyô shuí nghoq é, natzau eq Tsadán ga é, a-nham lhê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyám é hui bê nghut ri.

10 Haú hkûn, mauhkûng htoq má htê mó dông taí é lé, ngò wó gyô é gi, "Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le, Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wuì lé, nyí, myín mara hun nyi é sù gi, dú hkyô pyám é hui bê nghut ri.

11 Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le, yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

12 Haú mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aû gi, dingnye wó ri;

hkâsu mù gâ le, haú natzau gi, yhâng é ahkyíng yàm-yoq tot za ru joq alô nghut é lé sê é yanmai, nhikmo-yô é èq, nungnhik chyáng gyó lé lô bê nghut ri."

gâ ri.

13 Haú manjung gi, myidàm htoq má dú hkyô kat huí é lé myàng luí, haú yuqzo hku é myiwe myhí lé zing-rí ri.

14 Myiwe myhí haú gi, lhangmuí chyáng mai wó lut luí, yhang é matú lajâng tô é yoso má wó dang jé mù, ahkyíng ralhum, ahkyíng í lhum, ahkyíng rawuí hkup† lhom baú nyi é hui sháng gaq ga, zùn mó é dùng í lhum byí é huí ri.

15 Haú hkûn, haú lhangmuí gi, myiwe myhí haú lé wó lhoq myhú pyám shoq ga, myiwe myhí é nunghtáng má, yhâng é nhut mai wuì mó llang í é wuì lhoq htoq kat ri.

16 Nghut kôlhang, manjung nhut mai lhoq htoq kat é wuì mó llang haú lé, myigùng gi, yhâng é nhut há mù myui pyám byí é dông, myiwe myhí haú lé garúm yu ri.

17 Haú mù, manjung haú gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri.

18 Manjung haú gi, wuìshuq lung-aû yàm má yap tô ri.

## 13

### *Tân Jung Dusak Radu Wuìshuq Lung-aû Mai Htoq Lo É Hkyô*

1 Haú hkûn, haú wuìshuq lung-aû mai tân jung dusak radu htoq lo é lé, ngò myàng ri. Dusak haú má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é myìng dap tô bum ri.

2 Ngò myang é tân jung dusak haú gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haú manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haú lé ap byí ri.

3 Tân jung dusak hau é ulhum ralhum gi, shí râ í é dàm dap huí é su dut kôlhang, damhkô haú gi, yâ ge

† 12:14 Ahkyíng ralhum, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haú gi, 1260 nyí nghut ri.

pyám bê nghut lui, mingkan gón gi, mauhong byuq kômù, yhâng htâng châng bùm bekô nghut ri.

4 Manjung gi, tân jung dusak lé ahko ahkáng ap byi é yanmai, byu pé gi, manjung haú lé noqkuq é htoq agó, tân jung dusak haú lé le, noqkuq kômù, "Ó yuq wá, tân jung dusak shí du su dut ri thú? Ó yuq wá, yhang lé wó zan úng rã thú?" ga bum akô.

5 Gyáng dang tái rã eq Garaí aróng lhoq hpoi dang tái rã nhut gi, tân jung dusak haú lé byi to bê nghut é htoq agó, lhamó myi xe í hkyap tup, yhâng é ahko ahkáng lé chûng rã ahkáng wó bê nghut ri.

6 Yhang gi, yhâng nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é mying eq nyi jowò lé le, mauhkûng htoq má nyi é bang lé le, lumù gansang é sũ nghut ri.

7 Haú sân-yúng bang lé majan zân ung yù rã a-tsam, yhang lé byi bê nghut ri. Hau htoq agó, byuhú hkanmó lé le, byù myù hkanmó lé le, mying hkanmó lé le, mingdán hkanmó lé le, up rã ahkáng, yhang lé byi bê nghut ri.

8 Haú sat hui bê Sauzo eq sêng é asak jihpán laiká buk má, mau htoq xâng hkun mai, mying a kê lhôm é, myidàm htoq má nyi é lhunglhâng bang gi, haú tân jung dusak lé noqkuq kó rã nghut lhê.

9 Gyo rã nohkyap dap sũ gi, gyô yù sháng gaq.

10 Shúm zung é hui rã sũ gi, shúm zung é hui rã za nghut lhê.

Sham eq sat é hui rã sũ gi, sham eq sat é hui rã za nghut lhê.\*

Haú mù, sân-yúng bang gi, hkam jân é hkyô eq lhumzui hkyô bò kó rã nghut lhê.

11 Hau htâng, ngò gi, tân jung dusak gotú radu† myigùng mai htoq lo é lé myang ri. Yhang gi, sauzô é hkyuú su dut é hkyuú í lhum yuq ri; nghut kôlhâng, yhang gi, manjung su ga dang nyo ri.

12 Yhang gi, tân jung dusak hí lhê dù é ahko ahkáng lhunglhâng lé, haú du é hí má chûng mù, shí rã í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri.

13 Hau htoq agó, yhang gi, byu pé é myoq hí má, mauhkûng mai myigùng shut myi lé lhâng wó lhoq hkyô é, limik kumhá mó kut shit ri.

14 Yhang gi, tân jung dusak hí lhê dù é hí má, kumhá haú pé kut rã ahkáng wó é yanmai, myidàm htoq má nyi é bang lé mhoq hpyoq yù lui, haú sâm damhkô dap kôlhâng, dui nyi é tân jung dusak haú lé, hkunggã é dông, yhangmoq lé, yhâng é alhô saí nhang ri.

15 Yhang gi, haú tân jung dusak hí lhê dù é alhô lé, soq wó mut kat byi é a-tsam lé wó yù sũ nghut ri; haú mù, alhô haú gi, dang wó tái lui, yhang lé a noqkuq é bang lé, sat hui nhang ri.

16 Hau htoq agó, yhang gi, byù mó byù zo, wó sũ myùng sũ, luthkyô wó bang eq jùn pé, yuq hkanmó lé, yhumsing é loqyo loq má nghut nghut, ngelang má nghut nghut, masat lhô zik tap yù nhang ri.

17 Haú hkún, haú tân jung dusak é mying, a nghut jáng, yhâng mying é masat námbat dap sũ mai lai lui, úng é, wui é hkyô, ó yuq le wó kut rã a nghut.

18 Hpaqchyí byéng-yá gi, shí má bo rã ri. Hpaqchyí bò sũ gi, haú tân jung dusak é námbat lé sôn wú sháng gaq; hkâsu mù gã le, haú gi, byù rayuq é námbat nghut lhê. Yhâng é námbat gi, 666 nghut ri.

## 14

### Sauzo Eq 144,000 Yuq É Hkyô

### Tân Jung Dusak Radu Myigùng Mai Htoq Lo É Hkyô

\* 13:10 Chyúmding ra-am má gi, Byù rayuq yuq lé, shúm kut é sũ gi, shúm zung é hui rã nghut lhê. Sham eq byu sat é sũ gi, sham eq sat é hui rã nghut lhê, ga bo tó ri. † 13:11 Tân jung dusak gotú radu gã é shí gi, myiqhtoi pyoq lé gã nau é nghut lhê.

<sup>1</sup> Hau htâng, ngò wú kat le, haù Sauzo gi, Zi-un bùm má yap tô é lé myang ri; Yhâng myìng eq Yhâng Wâ é myìng lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri.

<sup>2</sup> Haù hkùn, ngò gi, wuì pé mying hùm é htê eq maugum mó gùm é htê su gâ é htê, mauhkûng mai htoq lo é lé wó gyô ri. Ngò wó gyô é htê haù gi, tíng bat bang, yhangmoq é tíng lé bat myhîng é htê su gâ ri.

<sup>3</sup> Yhangmoq gi, haù hkohkâm-tanghkuq é hí má le, dui é dusak myí du eq suwún wui pé hí má le, mahkôn sik lé hkon akô nghut ri. Haù myidàm htoq mai hkyi yù huí é byù 144,000 yuq mai lai luí, ó yuq le, mahkôn haù lé a wó mhoq sê yù kó nghut ri.

<sup>4</sup> Haù bang gi, myiwe wuì eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haù Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luí, sâng-hi myhîng é ashi lé su, haù Garai Gasang eq Sauzo lé ap byí é hui akô nghut ri.

<sup>5</sup> Yhangmoq é nhut má, mhaù é hkyô haí le a taí kó; yhangmoq chyáng mara hùn râ hkyô le a bò kó nghut ri.

### *Maumang Sum Yuq É Hkyô*

<sup>6</sup> Hau htâng, maumang lagyo gotû rayuq gi, maulat má dâng wún é lé ngò myang ri; yhang gi, haù mingkan htoq má nyi é, mingdán hkanmó mâ é bang, byuhú hkanmó mâ é bang, myíng hkanmó mâ é bang, byù myú hkanmó mâ é bang lé, hko kyo râ ahtum abyuq é gabú danglù wó ri.

<sup>7</sup> Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyaú keq. Haù mauhkûng eq myigùng, wuìshuq lung-aù eq wuìbúm pé hpan tô é Sû lé, noqkuq keq." ga luí, htê mó èq taí ri.

<sup>8</sup> Í yuq nghû râ maumang lagyo gi, htâng má châng lé mù, "Haù mingdán pé\* lhungháng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

<sup>9</sup> Sum yuq nghû râ maumang lagyo gi, yhangnhik é htâng má châng lé mù, "Haù tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle,

<sup>10</sup> Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haù chyoyúng maumang lagyo pé hí má le, Sauzo é hí má le, yhang gi, duq nyi é myi eq hang èq zing-rí é hui zo râ nghut lhê.

<sup>11</sup> Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haù tân jung dusak eq yhâng é alhô lé, noqkuq é bang eq yhâng mying é masat lhô tap yu sù é matú gi, nyí, myín, no râ ahkyíng wó râ a nghut." ga luí, htê mó èq taí ri.

<sup>12</sup> Garai Gasâng é jep é tarâ cháng luí, Yesuq lé lhumsuzi nyi é bang nghut é, sâng-yúng bang gi, hkan shi-rang é hkyô bò rá lhê.

<sup>13</sup> Hau htâng, "Ahkuí mai gi, haù Yhumsing má shí é sù, hkungsô wó nyi ri nghû kâ to aq." gâ é htê, mauhkûng mai htoq lo é lé, ngò wó gyô ri.

Haù hkùn, haù Woi-nyí gi, "Nghut rô, yhangmoq kut é muzó é akyú gi, yhangmoq htâng cháng râ nghut é yanmai, yhangmoq gi, yhumsing zui nú é muzó mai myang hkying bekô râ nghut lhê." ga taí ri.

### *Myidàm Htoq Mâ É Kyôshi Shû É Hkyô*

<sup>14</sup> Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haù má Byu Yhangzo su dut é byù rayuq zung tô ri; Yhâng

\* **14:8** *Mingdán pé gâ é gi, a lumjîng bang lé gâ é nghut lhê.*

é ulhum má gi, hîng janmaú tsûng to luí, Yhâng é loq má gi, htoq é zaiyik ralhum chung tô ri.

<sup>15</sup> Haú hkûn, gotû maumang lagyo gi, noqkuq yhûm mai htoq lô mù, "Haú myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haú mhut htoq má zung tô é Sû lé, htê mó eq taí garû kat ri.

<sup>16</sup> Haú mù, mhut htoq má zung tô é Sû gi, Yhâng é zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

<sup>17</sup> Maumang lagyo gotû rayuq gi, mauhkûng htoq mâ é noqkuq yhûm mai htoq lo ri; haú yuq le, htoq é zaiyik ralhum chung tô ri.

<sup>18</sup> Haú, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaú haú pé lé, yâm tsîng yù aq." ga, htê mó eq taí garû kat ri.

<sup>19</sup> Maumang lagyo haú gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri.

<sup>20</sup> Myuq shinggan mâ é tsibiyiq wing pyik jang haú má, tsibiyiq shi haú pé lé náng nyhoq luí, tsibiyiq wing pyik jang haú mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui lô bê nghut ri.

## 15

*Ló Htâng É Wúm Nyhit Lhum Chung É Maumang Lagyo Nyhit Yuq É Hkyô*

<sup>1</sup> Ngò gi, mauhkûng má gotû limik kumhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm

† 14:20 180 déng gi, Grik pé é stadia 1600 kô bo ri.

haú pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê.

<sup>2</sup> Hau htoq agó, myi eq nyhò tô é myoqjàm wùi-nhông su dut é lé le, ngò myang ri; haú tân jung dusak eq yhâng é alhò lé le, yhâng mying é nâmbat lé le, wó ung pyám bê bang gi, wùi-nhông yàm haú má yap tô bum akô; yhangmoq gi, Garai Gasang byí é tíng pé lé chung to kôluí,

<sup>3</sup> Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

<sup>4</sup> Yhumsîng ê, Nàng lé a gyuq a hkungga râ eq Náng myíng lé a lhoq gyaú râ gi, ó yuq wá nyi râ lhú?

Hkâsu mù gâ le, Nàng za chyoiyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myû lunglhang gi, Náng hí má lé noqkuq kó râ nghut lhê."

gâ akô nghut ri.

<sup>5</sup> Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri.

<sup>6</sup> Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baíyup tô akô nghut ri.

<sup>7</sup> Haú hkûn, haú dui é dusak myí du mâ é radu gi, pyat dedu ahtum abyuq dui nyi é Garai Gasâng é nhikmo-yô hkyô byíng tô é hîng góm nyhit lhum, haú maumang lagyo nyhit yuq lé byí ri.

<sup>8</sup> Garai Gasâng é hpungwup shingkang eq hpungwup a-tsâm



é yanmai, haû noqkuq yhûm gi, myihkau byíng zan to bê nghut luí, haû maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

## 16

### *Garai Gasâng É Nhkmo-yo Hkyô Bo É Góm Nyhit Lhum*

<sup>1</sup> Hau htâng, maumang lagyo nyhit yuq lé, "Htoq ê mù, haû Garai Gasâng é nhkmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó eq taí é lé, ngò wó gyô ri.

<sup>2</sup> Haú hkûn, sâng-hí yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haû tân jung dusak é masat lhô dap é eq yhâng é alhô lé noqkuq é bâng chyáng, achay achyut é eq hkê-nho dik é, yapjeq ana dap tô bùm bê nghut ri.

<sup>3</sup> Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haû gi, shí bê byù rayuq é sui su dut byuq é htoq agó, haú má lúng é dui jung lhunglháng gi, shi byuq bê nghut ri.

<sup>4</sup> Sum yuq nghû râ maumang lagyo gi, yhâng é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri.

<sup>5</sup> Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Chyoiyúng Sû ê,  
Nàng haú su kut jéyáng bê nghut é yanmai, Nàng gi, tengmán Sû nghut ri;

<sup>6</sup> hkâsu mù gâ le, yhangmoq gi, Nàng é sâng-yúng bang eq myiqhtoí pé é sui lé, lhoq htoq pyám bekò nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri.

<sup>7</sup> Haú hkûn, haú hkungga gyap mai, "Nghut rô! Wum-o a-tsam dik shoq bò Sû Yhumsing Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

<sup>8</sup> Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myí eq nyhê kyuq râ ahkáng wó bê nghut ri.

<sup>9</sup> Haú mù, yhangmoq gi, nyé dik é eq nyhê kyuq é hui zo luí, wúm shí pé lé up nyi é Garai Gasâng é mying lé nhíng akô; haú-í yhang hpuzo kôlhang, yhangmoq gi, myit le a lhíng kó, Garai Gasang lé le a shigyaú kó nghut ri.

<sup>10</sup> Ngo yuq nghû râ maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jáng, yhâng é mingdán gi, mauchut tuq dut byuq bê nghut ri. Mingbyû wuì gi, yhumsing é shô lé lháng, ngat tân bùm shoq shî-nò jamjau hui zo kôluí,

<sup>11</sup> yhangmoq no hpû é eq jeq é ana dap é yanmai, mauhkung má é Garai Gasang lé nhíng akô; haú-í yhang hpuzo kôlhang, yhangmoq gi, yhangmoq kut é hkyô mai myit a lhíng shi kó nghut ri.

<sup>12</sup> Hkyuq yuq nghû râ maumang lagyo gi, yhâng é góm lé, Uhprat wuì mó lêng má hut hkyô kat jáng, wuìlàng haú gi, kân byuq luí, haú buihtoq hkyam mâ é hkohkam pé, lé lô râ hkyô dong bê nghut ri.

<sup>13</sup> Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoí pyoq pé é nhut mai htoq lô kô é bang nghut akô.

<sup>14</sup> Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyi mó má majan zan râ matú, mingkan gón mâ é hkohkam pé lé lhoq tsíng yù râ ga, htoq e ló akô nghut ri.

15 "Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmé lé, zúng nyí luí, gyíng gyíng kut nyi é sù gi, hkungsô wó nyi ri."\*

16 Haú mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsíng tô akô nghut ri.

17 Nyhit yuq nghû râ maumang lagyo gi, yhâng é góm lé, maulat má hut hkyô kat ri; haú hkûn, haú no-qkuq yhûm má é hkohkâm-tanghkuq mai, "Bàn bê!" gâ é htê mó htoq lo ri.

18 Hau htoq agó, lhap hpyat é, myíng hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê.

19 Haú mù, haú myuq mó gi, sûm hkyam byak goq byuq luí, mingdán pé má é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsibiyiq wing byíng shoq bo é góm lé shuq nhâng bê nghut ri.

20 Zinlóng hkangmó gi, hpanq byuq bê nghut luí, bùm pé le byuq byuq bê nghut ri.

21 Haú hkûn, myi xê joí kô laí é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wúhke jamjaú é wúm nghut é yanmai, byu pé gi, Garai Gasang lé nhíng bum akô nghut ri.

## 17

### *Shiwa Myhí Mó É Hkyô*

1 Haú góm nyhit lhum chung tô é maumang lagyo nyhit yuq má é rayuq gi, lé lô mù, "Lé aq, haú wui myo myô pé htoq má zung tô é shiwa myhí mó lé dam byi râ hkyô, ngò, nang lé tûn shit bá.

2 Myidàm htoq má é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang

kut shut é myiwe yuqgè nyi zô lhum hkyô é tsibiyiq wing lé shuq wut bùm bekô nghut ri." ga luí, ngo lé taí ri.

3 Haú mù, maumang lagyo haú gi, Woi-nyí má, ngo lé yoso shut shuí wang e ló ri. Haú ulhum nyhit lhum eq hkyuí raxê lhum dap luí, taí hpoí é myíng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

4 Myiwe myhí haú gi, me me dut é eq zam zam ne é mebu wut luí, hîng, lungsêng, palhé pé èq mhôn chung ri; yhâng é loq má gi, yhâng é myiwe yuqgè nyi zô lhum hkyô é agot a-û hkyô eq achayut é zè pé byíng tô é hîng góm ralhum chung tô ri.

5 NIK DIK É HKYÔ, MYIDÀM HTOQ MÁ É ACHAQ ACHYUT HKYÔ PÉ EQ SHIWA MYHÍ PÉ É YHÂNGNU, BABELON MYUQ MÓ.

gâ é myíng gi, yhâng é ngelang má kê tap tô ri.

6 Myiwe myhí haú gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê.

7 Haú hkûn, maumang lagyo haú ngo lé taí é gi, "Nàng, haí mù maú lhê lú? Myiwe myhí haú eq, yhang jì tô é, ulhum nyhit lhum eq hkyuí raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê.

8 Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôhlang, nik dik htûm é Lasangdong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myíng a kê tô é, myidàm htoq má nyi é bang gi, tân jung dusak haú lé myàng kô é hkûn, maú byuq bùm kó râ nghut lhê. Hkâsu mù gâ le, haú gi, nyi wú bê, ahkuí a nyi lo, nghut kôhlang, dum lé râ nghut é yanmai nghut ri.

9 Hpaqchyí byéng-yá bo é nyan gi, shí má râ ri. Haú ulhum nyhit lhum gi, myiwe myhí zung é bùm

\* 16:15 Dang shí hkun gi, Yesuq taí é dang nghut lhê.

nyhit lhum nghut ri; hau htoq agó, hkohkâm nyhit yuq le nghut ri.

<sup>10</sup> Ngo yuq gi, byit gyó byuq bê; rayuq gi, ahkuí nyi to ashî; myit tô é rayuq gi, a jé lé shi nghut ri; hau yuq jé lé é hkûn, yhang gi, ahkyíng razup zo za wó nyî râ nghut lhê.

<sup>11</sup> Hí hkûn nyi wú bê, ahkuí a nyi lo dut é tân jung dusak hau gi, shit yuq nghû râ hkohkâm nghut ri. Yhang gi, hau nyhit yuq eq sêng é yanmai, yhang é htên byoq hkyô shut e ló râ nghut lhê.

<sup>12</sup> Hau nàng myàng é hkyuí raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, hau tân jung dusak eq rahá za, hkyíng hkum rahkum kô hkohkâm ayá lé wó yû kó râ nghut lhê.

<sup>13</sup> Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, hau tân jung dusak lé byi kó râ nghut lhê.

<sup>14</sup> Yhangmoq gi, hau Sauzo lé majan chôm zan kó râ nghut lhê; nghut kôlhang, Sauzo hau gi, yhumsing pé é Yhumsing eq hkohkam pé é Hkohkâm nghut é yanmai, yhangmoq lé ung pyám râ nghut lhê. Hau Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

<sup>15</sup> Hau htâng, maumang lagyo hau ngo lé dum tai é gi, "Nàng myang é, shiwa myhí zung tô é wui pé gi, byù myû pé, byù ajùm ayò pé, mingdán pé eq myíng lhumjup nghut ri.

<sup>16</sup> Hau nàng myang é tân jung dusak eq hkyuí raxê lhum gi, shiwa myhí hau lé a jú kut kó râ nghut lui, yhang é sutzè banshoq shang yu pyám byi mù, mebu lhang a dap loshoq achindum kut to kó râ nghut lhê; hau htoq agó, yhang é sho lé zo lui, myí èq nyhê hkyô pyám kó râ nghut lhê.

<sup>17</sup> Hkâsu mù gâ le, Garai Gasang gi, hau bang mai, i-myit rahkat zâ èq, yhumsing é a-tsam, hau tân jung dusak lé byi râ myit, yhangmoq lé kat byi Sû nghut ri. Hau mù, yhangmoq

gi, Garai Gasang é mungdang lhoq dik é hkûn jé shoq, hau su kut kó râ nghut lhê.

<sup>18</sup> Nàng myang é myiwe myhí hau gi, myidàm htoq mâ é hkohkam pé lé up zô é myuq mó nghut ri." gâ ri.

## 18

### *Babelon Lêng Gyop É Hkyô*

<sup>1</sup> Hau htâng, maumang lagyo gotù rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut lui, hau myidàm htoq lé, yhang é hpungwup èq duqbó to byi ri.

<sup>2</sup> Yhang, htê mó o mó èq garû tai kat é gi,

"Babelon myuq mó gi, lêng gyop bê, lêng gyop bê!

Myuq hau gi, nat gâng pé é yhùm eq agè ashop é nat hkangmó é hkyûng dut byuq é htoq agó,

a sansêng é eq achayut é nghoq pé nyi é sùt dut byuq bê nghut ri.

<sup>3</sup> Hkâsu mù gâ le, hau byù myû lhunglhang gi, yhang kut shut é ashop é dông gungsho zùm yap é hkyo é nhik lhoq yô é tsi-byiq wing shuq wut bùm bekô nghut ri.

Hau myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhang é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

<sup>4</sup> Hau htâng, mauhkûng mai htoq lo é htê gotù lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lòm râ matú le,

yhang é wúm pé lé nungmoq a hui zo kó râ matú le, hau mai hân hpang htoq lò keq;

<sup>5</sup> hkâsu mù gâ le, yhang é mara gi, mauhkûng htung shoq bum zang to bê nghut lui,

- Garai Gasang gi, Yhâng é a dingmán é hkyô lé myit bun bê nghut ri.
- <sup>6</sup> Yhang kut byî é eq rajung za, yhang lé tau kut byi keq; Yhang kut bê muzó eq rajung za, yhang lé í tú taû kut keq.  
Yhang nyhó byî é góm má, í tú taû nyhó byi keq.
- <sup>7</sup> Yhang gi, yhumsing gùng lé yhumsing lhoq gyaú yû luí, ladu lai shoq ngón kún nhang é í, wuîhke jamjau hkyô eq iyon hkyô myo myo, yhang lé taû byi keq.  
Hkâsu mù gâ le, yhang gi, yhâng é myit má,  
'Ngò gi, hkohkâm myhí nghut lhê; ngò gi, chuimó a nghut;  
hkâ-nhám le iyon hui râ a nghut.' ga gumrong nyi ri.
- <sup>8</sup> Haû mù luí, yhâng é wúm nghu é shî hkyô, iyon hkyô eq mutmó gyó hkyô gi,  
ra-nyí bui má za, yhâng chyáng jé râ nghut lhê.  
Hau htoq agó, yhang gi, myî eq nyhê hkyô pyâm é lé hui râ nghut lhê;  
hkâsu mù gâ le, yhang lé jéyáng é, haû Yhumsing Garai Gasang gi, wum-o a-tsam bò Sû nghut ri.
- <sup>9</sup> Haû yhang eq rahá myiwe yuggè nyi zô lhum hkyô kut shut é eq yhâng é ladu lai shoq ngón kún hkyô má bo lom é, haû myidàm htoq mâ é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é hui bùm kó râ nghut lhê.
- <sup>10</sup> Yhangmoq gi, yhang no jamjaû nyi é lé wú gyuq kôluí, we we má yap to kômù,  
'Hkik é myuq mó, a-tsam bo é Babelon gi, dingnyé wó ri-nhung!  
Dingnyé wó ri-nhung! Hkyíng hkum ralhum má za, dam byî é hkyô gi, náng chyáng jé bu-nhung!' ga luí, taí garu kó râ nghut lhê.
- <sup>11</sup> Myidàm htoq mâ é hpugá byu pé gi, yhang é yanmai, ngaubyi ngau-nhap é eq iyon yôn é hui kó râ nghut lhê; hkâsu mù gâ le, yhangmoq é gài zè lé, ó yuq le a wui byi lo kô é yanmai nghut ri.
- <sup>12</sup> Gài zè haú pé gi, hîng, ngùn, lungsêng eq palhé, nú-nhâm é pán, me me dut é pán, laí hkyíng eq zam zam ne é pán; namngón jung sik ajung jung, maguí zuí lé saí é, gùloq hpaû jung sik lé saí é, gyi lé saí é, shamtoq lé saí é, luq hpyû lé saí é jung ajà jà nghut ri.
- <sup>13</sup> Hau htoq agó, changhpyik gâm, xunmân, namngón jung, mura, loban, tsibiyiq wing, tsanlun xû, mún eq sungso, nojûng eq sau, myang eq myanglhêng pé; byù é gungdu eq asak pé nghut ri.
- <sup>14</sup> Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taû yù râ a nghut.' ga taí kó râ nghut lhê.
- <sup>15</sup> Gài zè haú pé lé ung luí, yhâng chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,
- <sup>16</sup> 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé mhôn tô é myuq mó gi, dingnyé wó ri-nhung! Dingnyé wó ri-nhung!
- <sup>17</sup> Hkyíng hkum rahkum má za, haû-í yhang wó é sutzè pé htên byoq byuq bu-nhung!' ga taí kó râ nghut lhê.  
Wuî-sanghpo agyi yuq hkangmó eq wuî-sanghpo mai jón wún é bang banshoq, wuî-sanghpo hkâng bang eq wuîshuq lung-aû mai wam baú hkyô wó yu é bang banshoq gi, we we má yap to kômù,
- <sup>18</sup> myuq haû nyé gyó nyi é myihkau lé myàng kôjáng, 'Myuq mó shî eq

pûng é myuq gi, hkâmá joq shirâ lhú?'  
ga taî garu kó râ nghut lê.

<sup>19</sup> Yhangmoq gi, yhumsing é ulhum  
má hpuilhup kyaq gyun mù, ngaubyi  
ngau-nhap eq iyon yon uchyang,  
'Myuq mó gi, dingnyé wó ri-nhung!  
Dingnyé wó ri-nhung!

Wuìshuq lung-aû má wuì-sanghpo pé  
wó é bang gi, yhâng é sutzè pé  
é yanmai, sutzè wó bum akô.

Nghut kôlhang, hkyíng hkum rahkum  
má za, htên byoq hkyô gi,  
yhâng chyáng jé bu-nhung!

<sup>20</sup> Mauhkûng ê, yhang é yanmai hkye  
gabú aq! Sân-yúng bang, lagyô  
pé eq myiqhtoî pé ê, hkye gabú  
keq!

Hkâsu mù gâ le, yhang, nungmoq  
lé kut é eq rajung za, Garai  
Gasang gi, yhang lé jéyáng bê  
nghut ri.'

ga taî kó râ nghut lê." gâ ri.

<sup>21</sup> Hau htâng, wum-o a-tsam mó bo  
é maumang lagyo rayuq gi, luqluí  
long mó sù é luqgok racham waq toq  
yû mù, wuìshuq lung-aû má dú hkyô  
kat luí, taî é gi,

"Haû Babelon myuq mó gi, haû su kut  
wum kat dú hkyô pyâm é hui râ  
nghut luí,  
hkâ-nhám le dum myàng râ a  
nghut lo.

<sup>22</sup> Haû tíng bat é bang, dat gó dat ye é  
bang, sampyí mut é bang eq tut  
mut é bâng é htê lé,  
náng chyáng hkâ-nhám le dum wó  
gyo lo râ a nghut.

Loq hpaqchyî ajung jung kûng é byù  
lé, náng chyáng hkâ-nhám le  
dum myàng lo râ a nghut.

Luqluí luí é htê lé, náng chyáng hkâ-  
nhám le dum wó gyo lo râ a  
nghut.

<sup>23</sup> Haû myibung duq é myishâm lé,  
náng chyáng hkâ-nhám le dum  
wó duq lo râ a nghut.

Myisik lusik é htê lé, náng chyáng hkâ-  
nhám le dum wó gyo lo râ a  
nghut.

Náng é hpugá byû pé gi, mingkân é  
byù mó pé nghut ri.

Náng é myoqheq hpaqchyî eq  
mingdán banshoq mâ é bang  
lé, hkyô shuí ngoq bê nghut  
ri.

<sup>24</sup> Haû myiqhtoî pé é sui, sân-yúng  
bâng é sui eq myidàm htoq má  
sat hui bang banshoq é sui pé  
gi,

yhâng chyáng chyat byu-myàng  
bê nghut ri."  
gâ ri.

## 19

### *Haleluya!*

<sup>1</sup> Hau htâng, mauhkûng htoq má,  
byù ajùm ayò garû é htê mó su gâ é lé,  
ngò wó gyô é gi,

"Haleluya!\*

Hkyi yù hkyô eq hpungwup  
shingkang, a-tsam gi, nga-  
nhûng é Garai Gasang eq sêng  
é nghut lê.

<sup>2</sup> Hkâsu mù gâ le, Yhang tarâ jéyáng é  
hkyô gi, tengmán é eq dingmán  
é yanmai nghut ri.

Yhang gi, myidàm htoq mâ é bang lé,  
haû yhâng é ashop é dông gung-  
sho zùm yap é hkyo eq mara  
kut shut nhang é shiwa myhí  
mó lé, mara byi luí,

Yhâng é dui-nhâng zoshâng wuì é  
sui yuichyîn dam byi bu-nhung  
ô!"

gâ ri.

<sup>3</sup> Dum radàm, yhangmoq taî garu  
kô é gi,

"Haleluya!

Myuq hau é myihkau gi, pyat dedu  
ahtum abyuq ru íng doq nyì  
sháng gaq ô!"

gâ bum akô nghut ri.

<sup>4</sup> Haû suwún í xe myi yuq eq dui  
é dusak myî du gi, haû hkohkâm-  
tanghkuq má zung tô é Garai Gasang lé  
paî gop luí, noqkuq uchyang,

"Amen, Haleluya!"

ga, taî garû bum akô.

<sup>5</sup> Haû hkûn,

\* **19:1** *Haleluya* gâ é gi, Hebre myíng dông, "Yhumsing Garai Gasang lé hkya-on kungton lê" gâ é dang  
nghut ri.

"Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!

Nga-nhông é Garai Gasang lé, hkya-on kungtôn keq ô."

gâ é htê, haù hkohkâm-tanghkuq mai htoq lo ri.

<sup>6</sup> Hau htâng, byù ajùm ayo é htê su ga, wuì myo myo mying hùm é htê su ga, maugum mó é htê su ga, taì garû é htê lé ngò wó gyô é gi,

"Haleluya!

Hkâsu mù gâ le, wum-o a-tsam dik shoq bò Sû nga-nhông é Yhumsing Garai Gasang gi, up nyi ri.

<sup>7</sup> Nga-nhông gi, ngón gabú luì, Yhâng é hpungwup shingkanlé lhoq gyaú sháng ô!

Hkâsu mù gâ le, haù Sauzo myiháng poì gi, jé bê nghut luì, Yhâng é myisik gi, rì rì mhôn to bê nghut ri.

<sup>8</sup> Sân-yúng duq wik nú-nhâm é mebu le, wut râ matú, Yhang lé byì to bê nghut ri."

gâ ri. (Nú-nhâm é mebu haù gi, sân-yúng bang kut é dingmán é muzó nghut ri.)

<sup>9</sup> Hau htâng, maumang lagyo gi, ngo lé, "'Haù Sauzô é myiháng zoshuq poì má ji yu é hui bang gi, hkungsô wó nyi ri.' nghû ká aq." ga taì luì, "Dang shí pé gi, Garai Gasâng é tengmán mungdang yhang nghut lhê." ga xoq taì ri.

<sup>10</sup> Haù hkûn, ngò gi, yhang lé no-qkuq râ nghû, yhâng é hkyî wang má paì gop kat é nghut lhê. Nghut kôlhang, yhang gi, "Haù su hkâkut! Ngò gi, nàng eq haù Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoì é Woi-nyí é myit đông nghut ri." ga, ngo lé taì hkûm ri.

*Myang Hpyû Jì To Su É Hkyô*

<sup>11</sup> Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haù má jì tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luì, majan zan Sû nghut ri.

<sup>12</sup> Yhâng é myoqjì gi, myishâm su dut mù, Yhâng é ulhum má gi, janmaù myo myo tsúng tô ri. Yhang mai lai luì, ó yuq le a bo sê é mying, Yhâng chyáng kâ tap tô ri.

<sup>13</sup> Yhang gi, sui má jum yù bê nghut é buhîng radung wut to luì, Yhâng é mying gi, Garai Gasâng é mungdang gâ ri.

<sup>14</sup> Haù mauhkûng gyè pé gi, hpyu é eq sanséng nú-nhâm é mebu wut mù, myang hpyû ji kôluì, Yhâng htâng má châng bum akô nghut ri.

<sup>15</sup> Byù myû haù pé lé zan râ matú, htoq é sâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsi-byiq shi pyik jang má, yhangmoq lé pyik râ nghut lhê.

<sup>16</sup> Hkohkam pê é Hkohkâm eq yhumsing pê é Yhumsing gâ é mying gi, Yhâng é buhîng eq Yhâng é tangbaù má kâ tap tô ri.

<sup>17</sup> Dum, maumang lagyo rayuq gi, buì má yap tô é lé ngò myang ri; yhang gi, maulat mâ é nghoqzô pé banshoq lé, "Lé keq, Garai Gasâng é zoshuq poì mó matú, lé zup zing keq;

<sup>18</sup> haù hkûn, nungmoq gi, hkohkam pê é, gyezaù pê é, wum-o a-tsam mó bò bâng é, myang jùm eq ji bâng é gungsho, luthkyô wó bang eq jùn pê é, byù mó byù zo pé lunglhâng é gungsho pé lé, myàng zo kó râ nghut lhê." ga, htê mó eq wut garû taì ri.

<sup>19</sup> Hau htâng, haù tân jung dusak eq myidàm htoq mâ é hkohkâm eq yhangmoq é gyezô pé gi, haù myang htoq má jì to Sû eq Yhâng é gyezô pé lé, majan zan râ matú chôm zing bùm kô é lé, ngò myang ri.

<sup>20</sup> Nghut kôlhang, haù tân jung

dusak gi, chyup yu é hui bekô nghut ri; hau htoq agó, haú tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik đông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duì gù dú hkyô kat é hui bekô nghut ri.

<sup>21</sup> Haú myit gyó tô é bang gi, myang gûng má jî to Su é nhut mai htoq lo é sham eq sat pyâm é hui bekô nghut luí, ngoq pé lhunglhang gi, haú bang é gungsho lé, gyi gyi dau dau myàng zô bùm bekô nghut ri.

## 20

### *Rahkyîng Zàn*

<sup>1</sup> Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri.

<sup>2</sup> Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut rahkyîng lhûng to râ matú, chyup tuí yù bê nghut ri.

<sup>3</sup> Haú mù, maumang lagyo haú gi, rahkyîng zàn a byíng shí é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra râ nghut lhê.

<sup>4</sup> Ngò gi, haú tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bang é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yû bang é sobyo pé nghut ri. Yhangmoq gi, dum dui toq mù, zanwut rahkyîng

tup Hkrisduq eq rahá up nyi bekô nghut ri.

<sup>5</sup> Haú gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng zàn haú a byíng byíng wó dum dui toq kó râ a nghut.)

<sup>6</sup> Sâng-hî dàm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

### *Tsadán Htên Byoq Huí É Hkyô*

<sup>7</sup> Rahkyîng zàn haú lai jáng, Tsadán gi, htóng mai nhang htoq kat é hui luí,

<sup>8</sup> majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaú shuí tsíng yù râ ga, htoq é râ nghut lhê. Byù haú bang gi, wuìshuq lung-aú yàm mâ é semuì myhó myo kó râ nghut lhê.

<sup>9</sup> Yhangmoq gi, maumyîhtunghtáng hkap shoq chòm yán doq lò kômù, haú Garai Gasâng é byu pé nyi é dap nghut é, Garai Gasang chyitdap é myuq lhîngkyuq má, lé lóm tô bùm bekô. Nghut kôlhang, mauhkûng mai myi gyó lô luí, yhangmoq lé nyhê hkyô pyám bê nghut ri.

<sup>10</sup> Haú tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpoyu é natzau haú le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuìhke jamjau hui zô nyi kó râ nghut lhê.

### *Ló Htâng É Tarâ Doqdan Hkyô*

<sup>11</sup> Hau htâng, hkohkâm-tanghkuq hpyû mó ralhûm eq haú má zung tô é Sû lé, ngò myang ri. Haú mauhkûng eq myigùng gi, Yhâng é hí mai hpang ló bê nghut mù, yhangnhik é matú jowò a joq lo nghut ri.

<sup>12</sup> Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká

buk pé hpông é lé, ngò myang ri. Asak jihpán laiká buk gà é gotû laiká buk le, hpông tô ri. Haû shi byuq bê bang gi, yhumsîng kut é eq rajung za, laiká buk pé má kê tô é dông, tarâ doqdân é huî bùm bekô nghut ri.

<sup>13</sup> Haû hkûn, wuîshuq lung-aû gi, yhang má lúng tô é, shi byuq bê bang lé ap byi luî, haû shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsîng kut é eq rajung za tarâ doqdân é huî bekô nghut ri.

<sup>14</sup> Hau htâng, shi é hkyô eq Moming gi, myi nhông má dú hkyô kat é huî bekô nghut ri. Myi nhông haû gi, í dâm nghû râ shi é hkyô nghut lê.

<sup>15</sup> Asak jihpán laiká buk má, myìng a bo é sù ó yuq nghut kôle, myi nhông haû má dú hkyô kat é huî bekô nghut ri.

## 21

### *Yerusalem Asik*

<sup>1</sup> Hau htâng, mauhkûng asik eq myigùng asik lé, ngò myang ri; hkâsu mù gà le, hí lhê é mauhkûng eq myigùng gi, laî ló byuq bê nghut luî, wuîshuq lung-aû le, dum joq râ a nghut lo.

<sup>2</sup> Haû hkûn, Chyoiyúng Myuq gà é Yerusalem asik gi, lusik é matú mhôn yúng tô é myisik su, hen lajâng yù luî, Garai Gasâng chyáng mâ é nghut mù, mauhkûng mai gyó lé lo é lé, ngò myang ri.

<sup>3</sup> Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuî, Garai Gasâng é nyi jowò gi, xângzo byu pé eq rahá nghut luî, Yhang gi, yhangmoq eq rahá nyi nyi râ nghut lê. Yhangmoq gi, Yhâng é byu pé dut râ nghut luî, Garai Gasang yhang, yhangmoq eq rahá nyi mù, yhangmoq é Garai Gasang dut râ nghut lê.

<sup>4</sup> Garai Gasang gi, yhangmoq é myoq má é ngaubyi lunglhang lé, sut pyám byi râ nghut lê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô

ngû é joq râ a nghut lo; hkâsu mù gà le, hí lhê é hkyô pé gi, laî ló byuq bê nghut ri." gà ri.

<sup>5</sup> Haû hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyi bê nghut lê." ga taî luî, "Shî lé kê to aq, hkâsu mù gà le, dang shí pé gi, lumgíng é dang eq tengmán é dang nghut lê." ga taî ri.

<sup>6</sup> Hau htoq agó, Yhang gi, "Haû pé gi, ban kut bê. Ngò gi, Alhpa eq Omega nghut lê; Sâng-hi Awang eq Ló Htáng Sû le nghut lê. Wuî shit sù lé gi, ahpau a dúng é za, asak wuîbùm má é uchyam lé, Ngò byi huq râ nghut lê.

<sup>7</sup> Wó ung é sù ó yuq nghut kôle, Garaî é silí wunlí haû pé banshoq lé sîng râ nghut mù, Ngò gi, yhâng é Garaî Gasang dut luî, yhang gi, Ngá zo dut râ nghut lê.

<sup>8</sup> Nghut kôlhang, gyuq myit bò bang, a lumjîng bang, achaq achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyî kut é bang, hparà noq é bang eq mhaû bang lunglhang é jowò gi, haû hang myi duq nyi é nhông nghut râ nghut lê. Haû gi, í dâm nghû râ shi é hkyô nghut ri." ga ngo lé taî ri.

<sup>9</sup> Ló htâng é wúm nyhit jung byíng tô é góm nyhit lhum chung tô é mau-mang lagyo nyhit yuq má é rayuq gi, lé mù, "Lé aq, haû Sauzô é yhangmyi gà é myisik lé, ngò tân shit râ nghut lê." ga ngo lé taî ri.

<sup>10</sup> Hau htâng, yhang gi, ngo lé Woinyí mai bùm myhâng mó ralhum má shuí jé luî, Garai Gasâng chyáng mâ é nghut mù, mauhkûng mai gyó lé lo é, haû Chyoiyúng Myuq gà é Yerusalem lé tân shit ri.

<sup>11</sup> Myuq haû gi, Garai Gasâng é hpungwup shingkanh hû é htoq agó, haû maubó gi, hpaû dik é huhpé lungsêng su dut luî, myoqjâm su sân-yúng ri.

<sup>12</sup> Myuq xêwâm gi, kô myhang é htoq agó, hkum raxe í lhum hpông tô ri; hkum haû pé má, maumang lagyo raxe í yuq zúng tô ri. Hau htoq agó,



Israelaq byù myû raxe í hu é myìng lé, hkum haú pé má kâ tap to bum ri.

<sup>13</sup> Hkum haú pé gi, buih-toq hkyam shut sùm lhum, buiwàng hkyam shut sùm lhum, maupyî shut sùm lhum, mautsûng shut sùm lhum kut hpông tô ri.

<sup>14</sup> Myuq xêwâm haú gi, awang raxe í lhùm èq hi tô é nghut luí, awang haú pé má, Sauzô é lagyo raxe í yuq é myìng dap tô bum ri.

<sup>15</sup> Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hìng jâm-yang ralhum chung tô ri.

<sup>16</sup> Myuq haú gi, myi chyûn dut mâ é nghut luí, hìng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, hìng hpyang, làm hpyang, myhâng hpyang ban-shoq 1400 déng\* kô bo ri;

<sup>17</sup> yhang gi, haú byù kê é jung eq wuí é maumang lagyo é kê jung lé chùng mù, myuq xêwâm lé ké wú é hkûn, rasho myí xê myi dúng bo ri.

<sup>18</sup> Myuq xêwâm haú gi, huhpé lungseng èq saí é nghut ri; myuq gi, hìng gyíng èq saí é nghut mù, myoqjâm su yhang sân-yúng ri.

<sup>19</sup> Myuq xêwâm haú é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq,

<sup>20</sup> ngo lhum nghû râ gi, nyháu myoqjî su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaú lhum nghû râ gi, utohpaya (bó huí huí é jung) lungseng èq, raxê lhum nghû

râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

<sup>21</sup> Haú myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haú myuq é hkyô mó gi, hìng jet èq saí é nghut luí, myoqjâm su duq san é hkyô nghut ri.

<sup>22</sup> Ngò gi, myuq haú má noqkuq yhùm joq é lé a myàng, hkâsu mù gâ le, haú wum-o a-tsam dik shoq bò Sû Yhumsíng Garai Gasang eq Sauzo gi, myuq hau é noqkuq yhùm nghut nyi é yanmai nghut ri.

<sup>23</sup> Haú Garai Gasâng é hpungwup shingkang gi, myuq haú má duqbó byí é htoq agó, Sauzo gi, myuq hau é myibung nghut é yanmai, myuq haú má gi, buì eq lhamó tsô byi a ra nghut ri.

<sup>24</sup> Haú byù myû pé gi, myuq haú duqbó é hkaú má hkyô wó so kó râ nghut lhê; haú myidàm htoq mâ é hkohkam pé gi, yhangmoq é hkikhkâm hkyô lé, myuq haú má yù lé kó râ nghut lhê.

<sup>25</sup> Myuq haú má gi, myín nghû é a joq é yanmai, myuq hkum myhî é le joq râ a nghut lo.

<sup>26</sup> Haú byù myû pé é hpungwup shingkang eq aróng lé, myuq haú má yu lé kó râ nghut lhê.

<sup>27</sup> Myuq haú má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wâng râ a nghut; haú Sauzô é asak jihpán laiká buk má myìng bo é bang za wó wâng râ nghut lhê.

## 22

### *Asak Wui Mó Lâng*

<sup>1</sup> Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaú mâ é hkyô mó gûng đông yui ló é, myoqjâm su sân-yúng é

\* **21:16** 1400 déng gi, Grik pé é stadia 12000 kô nghut ri.

asak wuì mó lãng lé, maumang lagyo haù, ngo lé tân shit ri.

<sup>2</sup> Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haú pé má é ahaq pé gi, byù myû pé lé yâ gè râ matú nghut ri.

<sup>3</sup> Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaù haú má joq nyí râ nghut mù, Yhâng é dui-nhâng zoshâng wuì gi, Yhang lé noqkuq do-jaú kó râ nghut lhê.

<sup>4</sup> Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kê tap é hui kó râ nghut lhê.

<sup>5</sup> Myín nghû é le joq râ a nghut lo. Myibung duqbó byí é le, bui tsô byí é le, yhangmoq ra kó râ a nghut lo, hkâsu mù gâ le, haù Yhumsîng Garai Gasang gi, yhangmoq lé duqbó byí nyí râ nghut lhê. Hau htoq agó, yhangmoq gi, pyat dedu ahtum abyuq up nyí kó râ nghut lhê.

<sup>6</sup> Maumang haù gi, ngo lé, "Dang shí pé gi, lumgîng é dang eq tengmán é dang nghut lhê. Myiqhtoí pé é woi-nyí lé up é Yhumsîng Garai Gasang gi, adê myàng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taí ri.

#### *Yesuq Jé Lé Lô Râ Hkyô*

<sup>7</sup> "Wú keq, Ngò gi, a myàng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyí ri."\* gâ é lé, ngò wó gyô ri.

<sup>8</sup> Haù hkyô pé lé wó myâng wó gyô é sù gi, ngò Yohan nghut lhê. Ngò gi, haù hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyí wang má noqkuq râ matú paí gop é nghut lhê.

<sup>9</sup> Nghut kôlhang, yhang gi, ngo lé, "Haù su hkâkut! Ngò gi, nãng eq le, nãng é gumang myiqhtoí pé eq le,

laiká shí má é mungdang pé lé châng kut é lhunglhâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

<sup>10</sup> Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gâ le, haù ahkyíng gi, chyâng lò bê nghut ri.

<sup>11</sup> A dîngmán é sù gi, a dîngmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dîngmán é sù gi, dîngmán é dông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

<sup>12</sup> "Wú keq, ngò gi, a myàng má jé lé lô râ nghut lhê! Ngò gi, yuq hkangmó lé, yhumsîng kut é eq rajung za byi râ shigyaú chyunghuq chung tô lhê.

<sup>13</sup> Ngò gi, Alhpa eq Omega nghut lhê, Sâng-hi eq Jihtûm nghut lhê, Sâng-hi Awang eq Lô Htáng Sù le nghut lhê.

<sup>14</sup> Asak shigâm má jé râ eq myuq hkaù shut hkúmdong mai wó wang jé râ ahkáng wó yû shoq, yhumsîng é buhîng lé chì sân é bang gi, hkungsô wó nyí ri.

<sup>15</sup> Shinggan má gi, hkui dông nyi é bang, myoqheq hpaqchyí kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaù é hkyô lé ô naù luí châng kut é bang lhunglhâng nyi bum akô nghut ri.

<sup>16</sup> Ngò, Yesuq gi, haù noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haù duqbó é Bó-myhû le nghut lhê."† gâ é lé, ngò wó gyô ri.

<sup>17</sup> Haù Woi-nyí eq myisik gi, "Lé aq!" gâ akô. Haù wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuì lé, shuq sháng gaq.

\* 22:7 Dang shí hkun gi, Yesuq taí é nghut lhê. † 22:16 Dang shí hkun gi, Yesuq taí é nghut lhê.

<sup>18</sup> Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byî é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng râ nghut lhê.

<sup>19</sup> Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é

asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.

<sup>20</sup> Shí hkyô pé lé saksé hkám byî é Sù gi, "Nghut bê, Ngò gi, a myáng má jé lé lô râ nghut lhê." ga taî ri.

Amen. Yhumsîng Yesuq ê, lé lô aq ô!

<sup>21</sup> Haû Yhumsîng Yesuq é jeju gi, Garai Gasâng é byu pê chyáng joq nyí sháng gaq ô! Amen.